

Visuddhimaggassa

Atthasaṁvaṇṇanābhūtā

Bhadantācariyadhammapālattherena katā

Paramatthamañjūsā nāma

Visuddhimaggamahāṭīkā

(Dutiyo bhāgo)



Buddhavasse 2552

Marammavasse 1370

AD. 2008

Romanized from Myanmar version published in 1960

© Buddhasāsana Society

Ṭikā Series 26

First published in 2008 by Ministry of Religious Affairs

Yangon, Myanmar

THE PĀLI ALPHABET
IN BURMESE AND ROMAN CHARACTERS

VOWELS

အ a အာ ā ဣ i ဤ ī ဥ u ဦ ū ဧ e ဩ o

CONSONANTS WITH VOWEL "A"

က ka	ခ kha	ဂ ga	ဃ gha	င ṅa
စ ca	ဆ cha	ဇ ja	ဈ jha	ည ṇa
ဋ ta	ဌ tha	ဍ ḍa	ဎ ḍha	ဏ ṇa
တ ta	ထ tha	ဒ da	ဓ dha	န na
ပ pa	ဖ pha	ဗ ba	ဘ bha	မ ma

ယ ya ရ ra လ la ဝ va သ sa တ ha ဠ ḷa ၵ ṁ

VOWELS IN COMBINATION

-၁ ၵ = ā ၵ = i ၵ = ī ၵ - ၵ = u ၵ - ၵ = ū - = e -၁ ၵ = o

က ka	ကာ kā	ကိ ki	ကီ kī	ကု ku	ကူ kū	ကေ ke	ကော ko
ခ kha	ခါ khā	ခိ khi	ခီ khī	ခု khu	ခုူ khū	ခေ khe	ခေါ kho ...

CONJUNCT-CONSONANTS

ကက kka	ဃ န္ဂha	ဏ န္ဓha	ဈ သ္ဗha	ဠ ပla	အ လla
ကွ kka	ဠ cca	ဏ္ဍ န္ဍha	ဠ သ္ဗha	ဠ ပba	လျ lya
ကျ kya	ဠ ccha	ဏ္ဍ န္ဍha	ဠ နta	ဠ bbha	လှ lha
ကြ kri	ဠ jja	ဏ္ဍ န္ဍha	ဠ နtva	ဠ bya	ဂှ vha
ကလ kla	ဠ jjha	တ္တ tta	ဠ နtha	ဠ bra	တ္တ sta
ကွ kva	ည န္ဏha	တ္တ ttha	ဠ nda	ဠ mpa	တ္တ strā
ချ khya	ပ န္ဏha	တွ tva	ဠ ndra	ဠ mpha	သ္ဗ sna
ခွ khva	ပ န္ဏha	ကျ tya	ဠ ndha	ဠ mba	သျ sya
ဂှ gga	ဠ န္ဏha	တြ tra	ဠ nna	ဠ mbha	သ ssa
ဠ ggha	ည န္ဏha	ဠ dda	ဠ nya	ဠ mma	သ္ဗ sma
ချ gya	ည န္ဏha	ဠ ddha	ဠ nha	ဠ mya	သ္ဗ sva
ဂှ gra	ဠ ၵta	ဠ dya	ဠ ppa	ဠ mha	တွ hma
ကံ ṅka	ဠ ၵtha	ဠ dra	ဠ ppha	ဠ yya	တွ hva
ခံ ṅkha	ည ၵၵha	ဠ dva	ဠ pya	ဠ yha	ဠ ၵha
ဂံ ṅga					

၁	၂	၃	၄	၅	၆	၇	၈	၉	၀
1	2	3	4	5	6	7	8	9	0

Visuddhimaggamahāṭikā

Dutiyabhāga

Mātikā

Piṭṭhanka

12. Iddhividhaniddesavaṇṇanā

Abhiññākathāvaṇṇanā	1
Dasa-iddhikathāvaṇṇanā	9
Nandopanandanāgadamanakathāvaṇṇanā	29

13. Abhiññāniddesavaṇṇanā

Dibbasotadhātukathāvaṇṇanā	37
Cetopariyaññakathāvaṇṇanā	40
Pubbenivāsānussatiññakathāvaṇṇanā	43
Cutūpapātaññakathāvaṇṇanā	56
Pakiṇṇakathāvaṇṇanā	63

14. Khandhaniddesavaṇṇanā

Paññākathāvaṇṇanā	73
Paññāpabhedakathāvaṇṇanā	77
Paññābhūmi-mūla-sarīravavatthānavaṇṇanā	84
Rūpakkhandhakathāvaṇṇanā	86
Viññāṇakkhandhakathāvaṇṇanā	112
Vedanākkhandhakathāvaṇṇanā	135
Saññākkhandhakathāvaṇṇanā	138
Saṅkhārakkhandhakathāvaṇṇanā	139
Atītādivibhāgakathāvaṇṇanā	154
Kamādivinicchayakathāvaṇṇanā	162

Mātikā

Piṭṭhaṅka

15. Āyatanadhātuniddesavaṇṇanā

Āyatanavithhāarakathāvaṇṇanā	170
Dhātuvithhāarakathāvaṇṇanā	176

16. Indriyasaccaniddesavaṇṇanā

Indriyavithhāarakathāvaṇṇanā	185
Saccavithhāarakathāvaṇṇanā	190

Dukkhaniddesakathāvaṇṇanā

Jātiniddesavaṇṇanā	196
Jarāniddesavaṇṇanā	199
Maraṇaniddesavaṇṇanā	199
Sokaniddesavaṇṇanā	200
Paridevaniddesavaṇṇanā	200
Dukkhaniddesavaṇṇanā	201
Domanassaniddesavaṇṇanā	201
Upāyāsaniddesavaṇṇanā	201
Appiyasampayoganiddesavaṇṇanā	202
Piyavippayoganiddesavaṇṇanā	202
Icchitālābhaniddesavaṇṇanā	202
Pañcupādānakkhandhaniddesavaṇṇanā	202
Samudayaniddesakathāvaṇṇanā	203
Nirodhaniddesakathāvaṇṇanā	204
Magganiddesakathāvaṇṇanā	214
Ekavidhādivinicchayakathāvaṇṇanā	222

17. Paññābhūminiddesavaṇṇanā

Paṭiccasamuppādakathāvaṇṇanā	226
Avijjāpaccayāsaṅkhārapadakathāvaṇṇanā	257

Mātikā	Piṭṭhaṅka
Paṭṭhānapaccayakathāvaṇṇanā ...	266
Avijjāpaccayāsaṅkhārapadavitthārakathāvaṇṇanā ...	289
Saṅkhārapaccayāviññāṇapadavitthārakathāvaṇṇanā ...	294
Viññāṇapaccayānāmarūpapadavitthārakathāvaṇṇanā ...	318
Nāmarūpapaccayāsaḷāyatanapadavitthārakathāvaṇṇanā ...	321
Saḷāyatanapaccayāphassapadavitthārakathāvaṇṇanā ...	323
Phassapaccayāvedanāpadavitthārakathāvaṇṇanā ...	324
Vedanāpaccayātāṇhāpadavitthārakathāvaṇṇanā ...	325
Tāṇhāpaccayā-upādānapadavitthārakathāvaṇṇanā ...	326
Upādānapaccayābhavapadavitthārakathāvaṇṇanā ...	330
Bhavapaccayājāti-ādipadavitthārakathāvaṇṇanā ...	334
Bhavacakkakathāvaṇṇanā ...	335

18. Diṭṭhivisuddhiniddesavaṇṇanā

Nāmarūpapariggahakathāvaṇṇanā ...	350
Arūpadhammānaṃ upaṭṭhānākārakathāvaṇṇanā ...	356
Sambahulasuttantaśāṣṭandānākathāvaṇṇanā ...	362
Upamāhināmarūpavibhāvanākathāvaṇṇanā ...	362

19. Kaṅkhāvitarāṇavisuddhiniddesavaṇṇanā

Paccayapariggahakathāvaṇṇanā ...	368
----------------------------------	-----

20. Maggāmaggañāṇadassanavisuddhiniddesavaṇṇanā

Sammasanañāṇakathāvaṇṇanā ...	386
Cattārisākāra-anupassanākathāvaṇṇanā ...	393
Indriyatikkhākāraṇanavakakathāvaṇṇanā ...	398
Rūpanibbattipassanākārakathāvaṇṇanā ...	399
Arūpanibbattipassanākārakathāvaṇṇanā ...	404

Mātikā			Piṭṭhaṅka
Rūpasattakasammasanakathāvaṇṇanā	405
Arūpasattakasammasanakathāvaṇṇanā	413
Udayabbayañāṇakathāvaṇṇanā	419
Vipassanupakkilesakathāvaṇṇanā	427
Maggāmaggavavatthānakathāvaṇṇanā	433

21. Paṭipadāñāṇadassanavisuddhiniddesavaṇṇanā

Upakkilesavimutta-udayabbayañāṇakathāvaṇṇanā	435
Bhaṅgānupassanāñāṇakathāvaṇṇanā	439
Bhayatupaṭṭhānañāṇakathāvaṇṇanā	445
Ādīnavānupassanāñāṇakathāvaṇṇanā	447
Nibbidānupassanāñāṇakathāvaṇṇanā	451
Muñcitukamyatāñāṇakathāvaṇṇanā	452
Paṭisaṅkhānupassanāñāṇakathāvaṇṇanā	453
Saṅkhārupekkhāñāṇakathāvaṇṇanā	455
Anulomañāṇakathāvaṇṇanā	479
Vuṭṭhānagāminīvipassanākathāvaṇṇanā	481

22. Ñāṇadassanavisuddhiniddesavaṇṇanā

Paṭhamamaggañāṇakathāvaṇṇanā	483
Sotāpannapuggalakathāvaṇṇanā	486
Dutiyamaggañāṇakathāvaṇṇanā	487
Tatīyamaggañāṇakathāvaṇṇanā	488
Catutthamaggañāṇakathāvaṇṇanā	488
Arahantapuggalakathāvaṇṇanā	489
Bodhipakkhiyakathāvaṇṇanā	489
Vuṭṭhānabalasamāyogakathāvaṇṇanā	494
Pahātabbadhammapahāṇakathāvaṇṇanā	495

Mātikā		Piṭṭhaṅka
Pariññādikiccakathāvaṇṇanā	...	503
Pariññādippabhedakathāvaṇṇanā	...	507

23. Paññābhāvanānisarṃsaniddesavaṇṇanā

Ānisarṃsapakāsanāvaṇṇanā	...	513
Nānākilesaviddharṃsanakathāvaṇṇanā	...	513
Phalasarṃsāpattikathāvaṇṇanā	...	513
Nirodhasarṃsāpattikathāvaṇṇanā	...	521
Āhuneyyabhāvādisiddhikathāvaṇṇanā	...	530
Nigamanakathāvaṇṇanā	...	534
Nigamanagāthāyo	...	535

Visuddhimaggamahāṭīkāya dutiyabhāge mātikā niṭṭhitā.

Visuddhimaggamahāṭīkāya dutiyabhāge

Sodhanapattam

479 piṭṭhe 19 pantiyam “dvattimsajavanavīthīsū”ti asuddhapāṭho, so “dvattijavanavīthīsū”ti sodhetvā gahetabbo. Tathā hi imissāyeva ṭīkāya paṭhamabhāge catutthajjhānakathāvaṇṇanāyaṃ 191 piṭṭhe “maggavīthito pubbe dve tayo javanavārā sadisānupassanāva pavattantī”ti vuttam. Tathā sārattadīpaniyā paṭhamabhāge 378 piṭṭhepi.

Visuddhimaggamahāṭikā

(Dutiyo bhāgo)

Namo tassa Bhagavato Arahato Sammāsambuddhassa.

12. Iddhividhaniddesavaṇṇanā

Abhiññākathāvaṇṇanā

365. Samvaṇṇanāvasena anantarasamādhikathāya āsannapaccakkhataṃ dīpento “**ayaṃ samādhībhāvanā**”ti āha. “Abhiññā sampādetum yogo kātabbo”ti vatvā tathā payojanavisese dasseturṃ “**evañhi**”ti-ādi vuttam. Kiñcāpi thiratarabhāvo, vipassanābhāvanāsukhatā ca samādhībhāvanāya ānisaṃso eva, tathāpi pañca lokiyābhiññā yathāvuttasamādhībhāvanāya ānisaṃsabhāvena pākaṭā paññātāti tāsamyeva vasena yogino adhigatānisaṃsatā vuttā, cuddasadhā cittaparidamanena thirataratā vuttā. Lokiyābhiññāsu vasībhāvopi samādhisseva vasībhāvo, tathā ca “samāhito yathābhūtaṃ pajānāti”ti¹ vacanato “**sukheneva paññābhāvanāṃ sampādessati**”ti vuttam. **Tasmāti** yasmā samādhībhāvanāya ānisaṃsalābho thirataratā, sukheneva ca paññābhāvanā ijjhati, tasmā abhiññākathaṃ tāva ārabhissāma, paññābhāvanāya okāse sampattepīti adhippāyo.

Bhagavatā pañca lokikābhiññā vuttāti sambandho. Na catukkajjhānamattameva idha sāsane sampādetabbaṃ, napi iddhividhañānameva, atha kho aññampi atthīti **uttaruttaripaṇītapāṇītadhammadesanattathāca.**

1. Sam 2. 12, 302; Sam 3. 363; Khu 10. 50; Khu 11. 38 piṭṭhesu.

Iddhivikubbananti iddhisaṅkhātāṃ pakativāṇṇajahanakiriyāṃ, idaṃ iddhīsu vikubbaniddhiyā padhānatāya vuttāṃ, iddhim, vikubbanañcāti evaṃ vā attho daṭṭhabbo. Vikubbanassa visuṃ gahaṇampi vuttakāraṇeneva daṭṭhabbāṃ. Ākāśakasiṇavasena arūpasamāpattiyo na sambhavanti, ālokakasiṇaṅca odātakasiṇantogadham katvā “**odātakasiṇapariyantēsū**”ti vuttāṃ kasiṇānulomādicittaparidamanavidhino adhippetattā, ākāśanimmānādi-atthāṃ pana tadubhayampi icchitabbameva. **Aṭṭha aṭṭhāti** yathāvuttesu kasiṇesu ekekasmim aṭṭha aṭṭha samāpattiyo. **Kasiṇānulomatoti** kasiṇapaṭipāṭito, paṭipāṭi ca desanāvasena veditabbā. **Jhānānulomo** pana paṭipattivāsenapi. Ukkamaṇāṃ ukkantaṃ ukkantameva ukkantikaṃ, jhānassa ukkantikaṃ **jhānukkantikaṃ**, tato, jhānalaṅghanatoti attho. **Aṅgasaṅkantito** aṅgātikkamato. **Cittāṃ paridametabbāṃ** yadicchakaṃ yatthicchakaṃ jhānānaṃ samāpajjanādisukhatthāṃ, tesaṃ ārammaṇānaṅca sallaṅkhaṇatthāṃ. Evañhissa tattha visavitā samijjhatīti.

366. **Jhānaṃ samāpajjati**ti kiṃ catubbidhampi jhānaṃ samāpajjati, udāhu ekekanti? Kiñcetha yadi catubbidhampi samāpajjati, aṅgasaṅkantito viseso na siyā, atha ekekaṃ ārammaṇasaṅkantito. Nāyaṃ doso ābhogavasena tesaṃ visesasiddhito. Yadā hi kasiṇānulomameva ābhujitvā tattha tattha kasiṇe jhānāni samāpajjati, na aṅgasaṅkantiṃ, tadā kasiṇānulomo. Yadā pana aṅgasaṅkantiṃ ābhujitvā jhānāni samāpajjati, tadā aṅgasaṅkanti veditabbā. Iminā nayena kasiṇānuloma-ārammaṇasaṅkanti-ādīnampi aññamaññaṃ viseso veditabbo. Idaṃ kasiṇānulomaṃ nāma cittaparidamananti adhippāyo.

Tathevāti “paṭipāṭiyā aṭṭhasu kasiṇesu satakkhattumpi sahasakkhattumpī”ti etassa upasaṃhārattho tathā-saddo. Paṭilomato cettha paṭipāṭi. Tenāha “**paṭilomakkamenā**”ti. Ayañhettha attho—paṭhamāṃ odātakasiṇe jhānaṃ samāpajjati, tato lohitaṅkasiṇeti yāva pathavīkasiṇā vattabbā.

Punappunāṃ samāpajjananti “satakkhattuṃ sahasakkhattuṃ”ti vuttāṃ bahulākāramāha.

Tatthevāti pathavīkasiṇeyeva. **Tatoti** pacchā tatiyajjhānato vuṭṭhānantarakālaṃ. **Tadevāti** pathavīkasiṇameva. **Tato ākiñcaññāyatananti** tato pathavīkasiṇugghāṭimākāse pavattita-ākāsānañcāyatanasamāpattito vuṭṭhāya viññāṇañcāyatanam amanasikarivā taṃ laṅghitvā yathāvutta-ākāsānañcāyatanaviññāṇassa abhāve pavattitam ākiñcaññāyatanam samāpajjati. Pathavīkasiṇugghāṭimākāsakasiṇam pathavīkasiṇapakkhikameva hotīti vuttam **“kasiṇam anukkamitvā”**ti. Atha vā aṭṭhasu kasiṇesu kassaci ukkamanam idha kasiṇukkantikam nāmāti āha **“kasiṇam anukkamitvā”**ti. **Jhānukkantikanti** ettha icchitam avadhāraṇena nivattetabbam, ukkamanassa ca sarūpam dassetum **“evam kasiṇam”**ti-ādim vatvā puna taṃ pakāram saha nissayena sesakasiṇesu atidisanto **“evam āpokasiṇādi -pa- kātabbā”**ti āha. Tenāha **“iminā nāyena”**ti-ādi. Yathā paṭhamajjhānamūlakam pathavīkasiṇādīsu jhānukkantikam dassikam, evam dutiyajjhānādīmūlakampi taṃ yathārahaṃ dassetabbam.

Tadevāti paṭhamajjhānameva. Kasiṇukkantikepi āpokasiṇādīmūlikā yojanā vuttanayeneva kātabbā, tathā yathārahaṃ dutiyajjhānādīmūlikā.

Lohitakasiṇato ākiñcaññāyatananti lohitakasiṇam āvajjento abhimukham katvā tassa ugghāṭanena upaṭṭhite kasiṇugghāṭimākāse amanasikārena ākāsānañcāyatanajjhānam samāpajjitvā tattha pubbe pavattaviññāṇassa apagamam ārammaṇam katvā ākiñcaññāyatanam samāpajjati.

Itaresanti avasiṭṭharūpāvacaṇarajjhānānam. Na hi arūpajjhānesu aṅgasaṅkanti atthi, nāpi tāni pathavīkasiṇe pavattanti. Yaṃ pana aṅgārammaṇasaṅkativacane **“nīlakasiṇam ugghāṭetvā ākāsānañcāyatanam”**ti-ādi vuttam, taṃ yathālābhavasena vuttam, pariyāyena vāti daṭṭhabbam. Nippariyāyato pana yathā aṅgasaṅkanti rūpajjhānesu eva labbhati, evam arūpajjhānesu eva ārammaṇasaṅkanti. Tassa tasseva hi jhānassa ārammaṇantare pavatti **ārammaṇasaṅkanti**. Tenāha **“sabbakasiṇesu ekasseva jhānassa samāpajjanam ārammaṇasaṅkantikam nāmā”**ti.

Yathā pana “sabbakasiṇesū”ti iminā ākāsaviññāṇakasiṇānampi saṅgaho hotīti na sakkā vattuṃ idha aṭṭhannaṃyeva kasiṇānaṃ adhigatattā, evaṃ sabbampi arūpajjhānaṃ “ekam jhānaṃ”ti na sakkā vattuṃ aṭṭhannaṃ samāpattīnaṃ vasena cittaparidamaṇassa icchitattā. Tasmā āruppajjhānānaṃ vasena aṅgārammaṇasaṅkanti pariyāyena vuttāti veditabbaṃ. Tathā hi pītakasiṇugghāṭimākāse yaṃ paṭhamārūppaviññāṇaṃ, tadārammaṇaṃ viññāṇaṇcāyatanāṃ sandhāyāha “**pītakasiṇato viññāṇaṇcāyatanāṃ samāpajjitvā**”ti. Iminā nayena sesadvayepi attho veditabbo.

Ekantarikavasenati aññattho antara-saddo. Antarameva antarikaṃ, ekajjhaṃ antarikaṃ etasminti ekantarikaṃ, jhānasamāpajjanaṃ, tassa vasena. Yathā aṅgānaṃ, ārammaṇassa ca ekajjhaṃ aññathā vireso hoti, tathā samāpajjanavasena. So pana vireso heṭṭhimānaṃ tesāṃ aṅgārammaṇānaṃ samatikkamanavasena hotīti vuttaṃ “**ekantarikavasena aṅgānaṇca ārammaṇānaṇca saṅkamanānaṃ**”ti. “Idaṃ jhānaṃ pañcaṅgikaṃ”ti-ādinā aṅgesu, “idaṃ pathavīkasiṇaṃ”ti-ādinā ārammaṇesu ca vavattthāpitesu ekajjhaṃ tesāṃ vavattthāpane na koci vireso atthīti aṭṭhakathāsu ayaṃ vidhi nābhato. Evaṇca katvā jhānukkantikādīsū paṭilomakkamena, anulomapaṭilomakkamena ca ekantarikabhāvena labbhamānampi jhānādīnaṃ ukkamaṇaṃ na uddhaṭaṃ, tehi nayehi vināpi cittaparidamaṇaṃ ijjatīti papañcaparihāratthaṃ vā te aṭṭhakathāsu anāgatāti daṭṭhabbaṃ.

367. **Abhāvitabhāvano** jhānābhiññāsu akatādhikāro. Tattha upanissayarahitopīti keci. Ādibhūtaṃ yogakammaṃ ādikammaṃ, taṃ etassa atthīti **ādikammiko**, pubbe akataparicayo bhāvanaṃ anuyuñjanto. Tenāha “**yogāvacarō**”ti. **Kasiṇaparikkammampi bhāro**ti dosavivajjanādividhinā kasiṇamaṇḍale paṭipatti yāva uggahanimittuppatti kasiṇaparikkammaṃ, tampi nāma bhāro, pageva iddhivikubbanāti adhippāyo. **Nimittuppādananti** paṭibhāganimittuppādanaṃ. **Taṃ vaḍḍhetvā**ti taṃ nimittaṃ, bhāvanaṇca vaḍḍhetvā. Na hi bhāvanāya vināva nimittavaḍḍhanaṃ labbhati. Keci upacārasamādhim labhitvā appanāsamādhim adhigantuṃ na sakkonti, tādisāpi bahū hontevāti āha “**appanādhigamo bhāro**”ti. **Appanādhigamoti** vā aṭṭhannaṃ samāpattīnaṃ adhigamamāha. Aññova samāpattīnaṃ

upanissayo, añño abhiññānanti āha “**paridamitacittassāpi iddhivikubbanam nāma bhāro**”ti. Khippam nisanti nisāmanam jhānacakkhunā pathavīkasiṇādi jhānārammaṇassa dassanam etassāti khippanisanti, sīghataram jhānam samāpajjitā, tassa bhāvo **khippanisantibhāvo**. Ambatarunicitam¹ mahāmahindattherādīhi otiṇṇaṭṭhānam **therambatthalam**. Yathā paṭipakkhaviyāyā yodhājīvā nimmalameva asitomarādīm gahetvā vicaranti, evam bhikkhunāpi kilesaviyāyā nimmalāva jhānābhīññā vaḷañjittabbāti imamattham dassetum “**tasmā**”ti-ādi vuttam.

Patitthābhāvoti idha parassa upaddavūpasamanam adhippetam. Tam hi khippanisantibhāvotopi garutaram accāyikakiccasādhanavasena vidhātābato durabhisambhavatarattā. Tam pana **rakkhitattheranidassaneneva** siddhampi tato garutarena aṅgāravassaparittāṇena vibhāvetum “**giri bhaṇḍavāhanapūjāya -pa- thero viyā**”ti āha. **Giri bhaṇḍavāhanapūjā** nāma cetiyagirimādīm katvā sakalādīpe, samudde ca yāva yojanā mahatī dīpapūjā. **Pathavīm māpetvāti** mārena pavattitam aṅgāravassam phuliṅgamattenapi yāva manusse na pāpuṇāti, tāvadeva ākāse pathavīm nimminivā.

Balavapubbayogānanti garutarūpanissayānam, iddhividhādīnam hetubhūtamahābhinihārānanti attho. **Aggasāvakādīnanti ādi**-saddena ekacce mahāsāvake saṅgaṇhāti. **Bhāvanānukkamo** yathāvuttam cittaparidamanam. **Paṭisambhidādīti ādi**-saddena ṭhānāṭhānañāṇādīnampi saṅgaho veditabbo, na sesābhīññānameva. Sāvakānampi hi ṭhānāṭhānañāṇādīni padavasasena ijjhanti. **Tasmāti** yasmā pubbahetusampannasseva yathāvuttam bhāvanānukkamaṃ vinā abhiññāyo ijjhanti, na itarassa, tasmā. **Aggidhamanādīhīti** aggimhi tāpanakoṭṭanādīhi. **Yathā cāti ca**-saddena lākhākārādīnam lākhakoṭṭanādīm avuttampi saṅgaṇhāti. **Chanda -pa-vasenāti** “chandavato ce abhiññā sījhati, mayhampi sījhati”ti kattukamyatāchandaṃ sīsam dhuraṃ jeṭṭham pubbaṅgamaṃ katvā, chandaṃ vā uppādetvā tam bhāvanāya mukhaṃ katvā jhānassa samāpajjanavasena. Eseva nayo sesesupi. “**Āvajjanādivasībhāvavasenā**”ti idaṃ aṭṭhasupi samāpattīsu sātīsayam vasībhāvāpādanam sandhāya vuttam. Tañca kho ādikammikavasena,

1. Ambatarūpacitam (Syā)

na katādhikāravasenāti āha “**pubbahetu -pa- vaṭṭati**”ti.

Pubbahetusampanna hi yaṃ jhānaṃ pādakaṃ katvā abhiññā nibbattetabbā, tattheva sātisayaṃ ciṅṇavasitāpi icchitabbā, na sabbatthevāti adhippāyo. “Catutthajjhānamatte ciṅṇavasina”ti vacanato arūpasamāpattiyō vināpi abhiññā ijjhantūti vadanti. Tampi yadi pubbahetusampanna vasena vuttaṃ, yuttameva. Athetarassa, tesāṃ matimattaṃ. **Yathāti** yena pakārena yena vidhinā. **Etthāti** etasmim iddhidvidhanippādane.

368. **Tatrāti** ca tadeva paccāmasati. **Pāḷinayānusārenevāti** pāḷigatiyā anusaraṇeneva, pāḷhasaṃvaṇṇanānukkamenevāti attho. “Catutthajjhānaṃ upasampajja viharatī”ti vatvā “so”ti vuttatā āha “**adhigatacatutthajjhāno yogi**”ti. “Evaṃ samāhite”ti ettha **evaṃ**-saddo heṭṭhājjhānattayādhighamapaṭipāṭisiddhassa catutthajjhānasamādhānassa nidassanatthoti āha “**evanti catutthajjhānakkamanidassanametan**”ti, catutthajjhānassa, tassa ca adhighamakkamassa nidassanaṃ. Yena samādhānānukkamena catutthajjhānasamādhī laddho, tadubhayanidassananti attho. Tenāha “**iminā -pa- vuttaṃ hotī**”ti. Yadi “evan”ti idaṃ āgamanasamādhinā saddhim catutthajjhānasamādhānaṃ dīpeti. Satipārisuddhisamādhī eva pana iddhiyā adhiṭṭhānabhāvato padhānanti āha “**catutthajjhānasamādhinā samāhite**”ti. **Upekkhāsati**pārisuddhibhāvenāti upekkhāya janitasati pārisuddhisabbhāvena. Sabbapaccanīkadhammūpakkilesapārisuddhāya hi paccanīkasamanepi abyāvaṭṭāya pārisuddhi-**upekkhāya** vattamānāya catutthajjhānaṃ, taṃsāmpayuttadhammā ca supārisuddhā, suvisadā ca honti, satisīsena pana tattha desanā katāti āha “**upekkhāsati**pārisuddhibhāvena **parisuddhe**”ti. Parisuddhiyā eva paccayavisesena pavattiviseso pariyodātā sudhantasuvaṇṇassa nighaṃsanena pabhassaratā viyāti āha “**parisuddhattāyeva pariyodāte, pabhassareti vuttaṃ hotī**”ti.

Sukhādīnaṃ paccayānaṃ ghātenāti sukhasomanassānaṃ, dukkhadomanassānaṃca yathākkamaṃ rāgadosapaccayānaṃ vikkhambhanaena. “Sukhaṃ somanassassa paccayo, somanassaṃ rāgassa, dukkhaṃ domanassassā”ti¹ hi vuttaṃ. Yathā rāgādayo cetaso malāsucibhāvena “aṅgaṇāni”ti vuccanti, evaṃ

1. Vi-Ṭṭha 1. 124 piṭṭhe.

upagantvā kilesanaṭṭhena upakkilesāti āha “**anaṅgaṇattāyeva vigatūpakkilese**”ti. Tenāha “**aṅgaṇena hi taṃ cittaṃ upakkilissati**”ti, vibādhīyati upatāpīyatīti attho. **Subhāvitattā**ti paguṇabhāvāpādanena suṭṭhu bhāvitattā. Tenāha “**vasībhāvappatte**”ti, āvajjanādinā pañcadhā, cuddasavidhena vā paridamanena vasavattitaṃ upagateti attho. **Vase vattamānaṃ hi cittaṃ** paguṇabhāvāpattiyā suparimadditaṃ viya cammaṃ, suparikammakatā viya lākhā **mudunti vucati**. **Kammakkhameti** vikubbanādi-iddhikammakkhame. **Tañca ubhayanti** mudutākammaniyadvayaṃ.

Nāhanti-ādīsu na-kāro paṭisedhattho. **Ahanti** sathā attānaṃ niddisati. **Bhikkhaveli** bhikkhū ālapati. **Aññanti** idāni vuccamānacittato aññaṃ. **Ekaḍhammampi**ti ekampi sabhāvadhammaṃ na samanupassāmīti sambandho. Ayaṃ hettha attho—ahaṃ bhikkhave sabbaññutaññāṇena oloketopi aññaṃ ekaḍhammampi na samanupassāmi. **Yaṃ** vasībhāvāpādanena **bhāvitaṃ**, tathā punappunaṃ karaṇena **bahulīkataṃ**, evaṃ savisesamudubhāvappattiyā **muduraṃ**, kammakkhamatāya **kammaniyañca** hoti. **Yathayidaṃ cittaṃ** attano, tesañca paccakkhatāya evamāhāti. Yathā yathāvuttā parisuddhatādayo na vigacchanti, evaṃ subhāvitaṃ cittaṃ.

Tattha avatṭhitaṃ idha “ṭhitaṃ, āneñjappattaṃ”ti ca vuttanti āha “**etesu parisuddhatādīsu ṭhitattā ṭhite, ṭhitattāyeva āneñjappatte**”ti. Yathā mudukammaññatā vasībhāvappattiyā lakkhiyanti, evaṃ vasībhāvappattipi mudukammaññatāhi lakkhiyatīti, mudukammaññabhāvena vā attano vase ṭhitattā “ṭhite”ti vuttam. Yathā hi kāraṇena phalaṃ niddharīyati, evaṃ phalenāvi kāraṇaṃ niddharīyatīti niccalabhāvena avatṭhānaṃ āneñjappatti. Sā ca sampayuttadhammesu thirabhāvena, paṭipakkhehi akammaniyatāya ca sambhavanti saddhādibalānaṃ ānubhāvena hotīti “saddhādīhi pariggahitattā āneñjappatte”ti saṅkhepato vuttamatthaṃ vivaritaṃ “**saddhāpariggahitaṃ hī**”ti-ādi vuttam. Tattha **saddhāpariggahitanti** evaṃ subhāvitaṃ vasībhāvappattaṃ etaṃ cittaṃ ekaṃsena abhiññāsacchikaraṇīyānaṃ dhammānaṃ abhiññāsacchikiriyāya saṃvattatīti evaṃ pavattāya saddhāya pariggahitaṃ yathāvuttasaddhābalena upatthambhitaṃ. **Assaddhiyenāti** tappaṭipakkhena assaddhiyena hetunā na iñjati na calati na kampati, aññadatthu upari visesāvahabhāvene va tiṭṭhati.

Vīriyapariggahitanti-ādīsupi iminā nayena attho veditabbo. Ayam pana viseso—**vīriyapariggahitanti** vasībhāvāpādanaparidamanasādhanena vīriyena upatthambhitam. **Satipariggahitanti** yathāvutte bhāvanābahuḷikāre asamosasādhikāya, kusalānañca dhammānaṃ gatiyo samannesamānāya satiyā upatthambhitam. **Samādhipariggahitanti** tattheva avikkhepasādhanena samādhānena upatthambhitam. **Paññāpariggahitanti** tassā eva bhāvanāya upakārānupakāradhammānaṃ pajānanalakkhaṇāya paññāya upatthambhitam. **Obhāsagatanti** ñāṇobhāsasahagataṃ. Obhāsabhūtena hi yathāvuttasamādhānasamvaddhitena ñāṇena saṃkilesapakkham yāthāvato passanto tato utrasanto ottappanto taṃ adhibhavati, na tena abhibhūyati. Tenāha “**kilesandhakārena na iñjati**”ti. Etena ñāṇapariggahitaṃ hirottappabalaṃ dasseti.

Aṭṭhaṅgasamannāgatanti catutthajjhānasamādhinā samāhitatā, parisuddhatā, pariyodātātā, anaṅgaṇatā, vigatūpakkilesatā, mudubhāvo, kammaniyatā, āneñjappattiyā ṭhitatā, samāhitassa vā cittassa imāni aṅgānīti “samāhite”ti imaṃ aṅgabhāvena aggahetvā ṭhiti-āneñjappattiyā visum gahetvā imehi aṭṭhahi aṅgehi samannāgataṃ. **Abhinīhārakkhamanti** iddhiyādhādi-atthaṃ abhinīhārakkhamaṃ tadabhimukhaṃ karaṇayoggaṃ. Tenāha “**abhiññāsacchikaraṇīyānaṃ dhammānaṃ abhiññāsacchikiriyaṃ**”ti.

Kāmaṃ nīvaraṇāni vikkhambhetvā eva paṭhamajjhānasamadhiḅgamo, vitakkādiḅ vūpasame eva ca dutiyajjhānādisamadhiḅgamo, tathāpi na tathā tehi dūrībhūtā apētā vā yathā catutthajjhānato, cetaso malīnabhāvasaṅkhātā-uppilābhogakarehi nīvaraṇādihi suṭṭhu vimuttiyā tassa parisuddhi pariyodātātā ca yuttāti āha “**nīvaraṇa -pa- pariyodāte**”ti. **Jhānapaṭilābhapaccayānanti** jhānapaṭilābhahetukānaṃ jhānapaṭilābhaṃ nissāya uppajjanakānaṃ. **Pāpakānanti** lāmakānaṃ. **Ichchāvacaṛānanti** icchāya avacaṛānaṃ icchāvasena otiṇṇānaṃ “aho vata mameva satthā paṭipucchitvā paṭipucchitvā bhikkhūnaṃ dhammaṃ deseyyā”ti-ādinayappavattānaṃ mānaṃ māyāsāṭṭheyyādināṃ. **Abhiḅhādīnanti** ādi-saddenāpi tesāmyeva saṅgaho. Abhiḅhā cettha paṭhamajjhānena avikkhambhaneyyā, mānādayo ca tadekaṭṭhā

daṭṭhabbā “jhānapaṭilābhapaccayānan”ti anuvattamānattā. Vikkhambhaneyyā pana nīvaraṇaggahaṇeneva gahitā, katham̐ pana paṭhamajjhānena avikkhambhaneyyā idha vigacchantīti? “Sabbe kusalā dhammā sabbākusalānaṃ paṭipakkhā”ti sallekhapaṭipattivasena evaṃ vuttaṃ jhānassa aparāmaṭṭhabhāvadassanato. Ye panettha “icchāvacarānaṃ abhijjhādīnaṃ”ti imehi padehi kopa-apaccayakāmarāgabyāpādādayo gahitāti adhippāyena “jhānapaṭilābhapaccayānan”ti pāṭham̐ paṭikkhipitvā “jhānapaṭilābhapaccanīkānaṃ”ti pāṭhoti vadanti, taṃ tesāṃ matimattaṃ tathā pāṭhasseva abhāvato. Jhānapaṭilābhapaccanīkā ca nīvaraṇā ceva tadekaṭṭhā ca tesāṃ dūrībhāvaṃ vatvā puna abhāvavigamacodanāya ayujjamānattā. Nanu ca **anaṅgaṇasutta**¹ **vatthasuttesu**² ayamatto na labbhati, oḷārikānaṃyeva pāpadhammānaṃ tattha adhippetattā? Saccametāṃ, idha pana adhigatacatutthajjhānassa vasena vuttattā sukhumāyeva te gahitā, aṅgaṇūpakkilesatāsāmaññaṇa panettha suttānaṃ apadisaṇaṃ. Tathā hi “**suttānusārenā**”ti vuttaṃ, na pana suttavasenāti. Avassaṃ ce tamevaṃ sampaṭicchitabbaṃ adhigatajjhānānampi kesañci icchāvacarānaṃ pavattisabbhāvato.

Iddhipādabhāvūpagamenāti iddhiyā pādakabhāvassa padaṭṭhānabhāvassa upagamanena. **Bhāvanāpāripūriyāti** ito paraṃ kattabba abhāvavasena abhinīhārakkhamabhāvanāya paripuṇṇattā. **Paṇītabhāvūpagamenāti** tato eva padhānabhāvaṃ nītatāya uttamaṭṭhena, atittikaraṭṭhena ca paṇītabhāvassa upagamanena. Ubhayañcetāṃ ṭhitiyā kāraṇavacanaṃ paripuṇṇāya bhāvanāya paṇītabhāvappattiyā “**ṭhite**”ti. “**Āneñjappatte**”ti idaṃ ṭhitiyā visesaṇaṃ. Tenāha “**yathā āneñjappattaṃ hoti, evaṃ ṭhite**”ti. Imasmiṃ pakkhe “ṭhite āneñjappatte”ti ubhayamekaṃ aṅgaṃ, “samāhite”ti pana idampi ekamaṅgaṃ. Tenevassa paṭhamavikappatto visesaṃ sandhāyāha “**evampi aṭṭhaṅgasamannāgatan**”ti.

Dasa-iddhikathāvaṇṇanā

369. **Nipphatti-atthenāti** sijjhanatṭhena. **Paṭilābhatṭhenāti** pāpuṇaṇatṭhena. **Tanti** kāmitaṃ vatthum̐. **Samijjhatīti** nipphajjati. Pabbajjāṃ ādim̐ katvā yāva

1. Ma 1. 29 piṭṭhe.

2. Ma 1. 43 piṭṭhe.

jhānamaggā idha **nekkhammaṃ**. **Ijhatīti** pāpuṇīyati. **Paṭiharatīti** **pāṭihāriyanti** yasmā paṭipakkhaṃ harati apaneti, tasmā pāṭihāriyaṃ. Attano paṭipakkhaṃ haratīti pāṭihāriyaṃ, nekkhammādi, pāṭihāriyameva pāṭihāriyaṃ, yathā “vekatam, vesaman”ti ca.

Ijhanatṭhenāti nipphajjanatṭhena. **Upāyasampadāyāti** sampanna-upāyassa nāyārambhassāti attho. **Ijhatīti** pasaveti¹. **Sīlavāti** ācārasīlena sīlavā. **Kalyāṇadhammoti** dasakusalakammāpathavasena sundaradhammo. Sīlasampattiyā vā **sīlavā**. Dānādisesapuññakiriyavatthivasena **kalyāṇadhammo**. **Paṇidahissatīti** patthessati.

Ijhanatīti vadḍhanti, ukkaṃsaṃ pāpuṇantīti attho. Sāṭisayanipphajjanapaṭilābhāsijjhanabuddhi-atthe hi iddhi vuttā. **Sā dasavidhāti** sabbā iddhiyo ānetvā atthuddhāravasena idhādhippetam iddhiṃ dassetum vuttam. Bahubhāvādikassa adhiṭṭhānam adhiṭṭhānam etissā atthīti **adhiṭṭhānā**. Vividham rūpanimmānasaṅkhātam kubbanam etissā atthīti **vikubbanā**. **Manomayāti** jhānāmanena nibbattibhāvato manomayā. Ñāṇassa vipphāro vegāyitattam etissā atthīti **ñāṇavipphārā**. Ariyānam ayanti **ariyā**. Yato kutoci kammavipākato jātā iddhi **kammavipākajā**. Sāṭisayapuññanibbattā iddhi **puññavato iddhi**. Kammavipākajā iddhi jātiyo paṭṭhāya hoti, itarā yadā tadā puññassa vipaccanakāleti evam vā imāsam viseso veditabbo. Āthabbanavijjābhiniḥḥattā **vijjāmayā**. **Sammāpayogo** upāyapayogo nāyārambho.

370. **Pakatiyā ekoti** sabhāvena eko. **Bahukanti** bahum. Tena agghitaparicchedam adhiṭṭhātabbassa anekabhāvam dassetvā puna paricchedato dassetum “**sataṃ vā**”ti-ādi vuttam. **Āvajjatīti** parikamma-saṅkhātena ābhogena ābhujati bhāvīrūpe tena² parikammamanasikārena manasi karoti. **Ñāṇena adhiṭṭhātīti** tathā parikammaṃ katvā abhiññāñāṇena yathādhippete bahuke adhiṭṭhātī³, adhiṭṭhānacittena saheva bahubhāvāpattito bahubhāvāpādakam iddhividhañāṇam pavattento ca tathā adhiṭṭhātīti vuccati. Sesesupi eseva nayo.

1. Phalam deti (Sī, Syā)

2. Bhāvīyupetena (Ka)

3. Adhiṭṭṭhati (Sī, Syā)

Evanti pakārattho evaṃ-saddo, tena sabbampi adhiṭṭhānappakāraṃ saṅgaṇhāti. **Adhiṭṭhānavasenāti** “ñāṇena adhiṭṭhātī”¹ ti evaṃ vutta-adhiṭṭhānavasena nipphannattā.

371. **Pakativāṇṇanti** pakatisaṅṭhānaṃ attano pākatarūpaṃ. **Pakativāṇṇavijahanavikārasenāti** attano pakativāṇṇavijahanapubbakassa kumārakavaṇṇādivaṇṇavikārassa vasena.

372. **Imamhā kāyāti** paccakkhabhāvena “imamhā” ti vuttā bhikkhussa karajakāyā. **Aññaṃ kāyanti** aññaṃ iddhimayaṃ kāyaṃ. Tato eva iddhimayarūpavantatāya **rūpim**. Abhiññāmanena nibbattattā **manomayaṃ**. **Nipphattivasenāti** nipphajjanavasena. Abhiññāṇassa hi yathā manomayo kāyo nipphajjati, tathā pavatti **manomayiddhi**. Eseva nayo sesesupi. Yadi evaṃ kathamayameva manomayiddhī? Ruḷhīvesā veditabbā yathā “manomayo attabhāvo” ti, yathā vā “gosamañña visāṇādimati piṇḍe”. Atha vā abbhantarato nikkhante², iddhimatā ca ekantasadise imasmiṃ nimmāne supākaṭo manasā nibbattitabhāvoti yathā sātisayo manomayavohāro, na tathā aññaṃsu adhiṭṭhānavikubbaniddhīsu samaññantaravantāsūti veditabbaṃ.

373. **Ñāṇuppattito pubbe vāti** arahattamaggañāṇuppattito pubbe vā vipassanākkhaṇe, tatopi vā pubbe antimabhavikassa paṭisandhiggahaṇato paṭṭhāya. **Pacchā vā** yāva khandhapariniḅbānā. **Taṅkhaṇe vā** magguppattisamaye. **Ñāṇānubhāvanibbatto visesoti** sūriyassa uṭṭhitatṭhāne, samantato ca ālokakaraṇasamatthatā viya tasseva ñāṇassa ānubhāvena nibbatto sabbaso pahātabbapahānabhāvetabbabhāvanāpāripūrisaṅkhāto viseso. Vatthūni pana anantarāyatāvasena āgatāni. **Aniccānupassanāyāti** saṅkhāre aniccato anupassantiyā balavavipassanāya. Āraddhavipassanassa hi yathāvuttavipassanāya pavattikkhaṇe tato pubbe, pacchā ca pakiṇṇakasammasanavāre niccasaññāya pahānaṭṭho ijhati. Eseva nayo sabbattha. Kāmaṃ ettakāya saṅkhepatathāyapi adhippetattho

1. Khu 9. 385 piṭṭhe.

2. Nikkhanto (Syā)

pakāsitova, vitthārakathāya pana vibhūtataro hotīti āha “**vitthārena kathetabban**”ti.

Gabbhagatassevāti anādare sāmivacanam. **Vuttanayenā**ti “pacchimabhavikassā”ti-ādinā **bākkulattheravatthumhi** vuttanayena.

Dārubhāram katvāti dārubhāram sakaṭe katvā, āropetvāti attho. **Ossajjitvā**ti chaḍḍetvā. **Sakaṭamūleti** sakaṭasamīpe. **Vālayakkhānucariteti** kururehi yakkhehi anuvaritabbe. Yakkhapariggahitañhi rājagahanagaram.

374. **Samādhitoti** paṭhamajjhānādisamādhito. **Pubbeti** upacārajjhānakkhaṇe. **Pacchāti** samāpattiyā ciṅṅapariyante. **Taṅkhaṇeti** samāpannakkhaṇe. **Samathānubhāvanibbatto visesoti** tasmim tasmim jhāne samādhitejena nibbatto nīvaraṇavikkhambhanavitakkādisamatikkamasaññāvedayitanirodhaparissaya sahanādiko viseso.

Kapotakandarāyanti evaṃnāmake araññavihāre. **Juṅhāya rattiyā**ti candālokavatiyā rattiyā. **Navoropitehi kesehīti** itthambhūtalakkhaṇe karaṇavacanam. **Yassāti** pahārassa. **Tassāti** yakkhassa. Khippanisantibhāvassa ukkaṃsagatatā thero tasmim paharante eva samāpattim samāpajjīti āha “**paharaṇasamaye samāpattim appesī**”ti. Pāliyam pana “nisinno hoti aññataram samādhim samāpajjitvā”ti¹ vuttam. Ime pana therā samāpattito vuṭṭhānasamakālam tena pahāro dinnoti vadanti.

Sañjīvattheranti kakusandhassa bhagavato dutiyam aggasāvakaṃ mahātheram sandhāyāha. So hi āyasmā araññādisu yattha katthaci nisinno appakasireneva nirodham samāpajjati, tasmā ekadivasam aññatarasmim rukkhamūle nirodham samāpajji, tam sandhāya vuttam “**nirodhasamāpannan**”ti-ādī. Cīvare aṃsumattampi na jhāyittha, sarīre kā kathā. Teneva hi thero “sañjīvo”tveva paññāyittha. **Ayamassāti** assa āyasmato sañjīvattherassa yo nirodhasamāpattiyam aggiparissayābhāvo, ayam

samādhivipphārā iddhīti yojanā. Kathaṃ pana nirodhasamāpattiyaṃ samādhivipphārasambhavoti āha “**anupubba -pa- nibbattattā**”ti.

Paṭhamam ṭhapitabhaṇḍakassāti sabbapaṭhamam ṭhapitabhaṇḍakassa. Tañhi gahaṇakāle sabbapacchimam gayhati. **Kālaparicchedavasena**ti “ettake kāle gate vuṭṭhahissāmī”ti samāpattito pubbe katakālāparicchedavasena. **Bhītā viravimsūti** rattandhakāre rūpadassanena “pisāco uṭṭhahatī”ti maññamānā. Ettakehi nāma bhaṇḍakehi ajjhotthaṭo nibbikāro “aho mahānubhāvo, aho vivekavāsī”ti ca **theragatena pasādena**.

Tattatelakaṭāhanti ādhārasīsena ādheyyamāha, kaṭāhe tattatelaṃ kaṭāhena āsiñcīti adhippāyo. **Vivaṭṭamānanti** katthacipi alagghanavasena bhassantaṃ.

Saparivārāti pañcahi itthisatehi saporivārā. **Rājānam mettāya pharīti** odissakamettāsamāpattiyā rājānam phusi. **Khipitunti** vijjhitaṃ. **Oropetunti** sarasannāham paṭisaṃharitaṃ.

375. **Paṭikkulādīsūti** anīṭṭhādīsu. Anīṭṭham hi paṭikkulāṃ, amanuññampi “paṭikkulan”ti vuccati. **Ādi**-saddena apaṭikkulādīṃ saṅgaṇhāti. **Tatthāti** paṭikkulārammaṇe. **Upekkhakoti** chaḷaṅgupekkhāya upekkhako. **Tatthāti** paṭikkulāpaṭikkulabhede vatthusmiṃ. **Satoti** sativepullappattiyā satimā. **Sampajānoti** paññāvepullappattiyā sampajānakārī. **Ayanti** ayaṃ paṭikkulādivatthūsu apaṭikkulasaññīvihārādikā khīṇāsavānaṃ aggamaggādhigamasiddhā cittissariyatā. Tenāha “**cetovasippattānam -pa-vuccatī**”ti.

Anīṭṭhe vatthusmiṃ sattasaññite **mettāpharaṇam vā** dhātuso paccavekkhaṇāya **dhātumanasikāram vā** gūthādike dhātumanasikāram karontoti yojetabbarṃ. **Apaṭikkulasaññī viharatīti** hitesitāya, dhammasabhāvacintanāya ca na paṭikkulasaññī hutvā iriyāpathavihārena viharati. **Iṭṭhe vatthusmiṃ** nātimittādike. Kesādi-asucikoṭṭhāsamattamevāti **asubhapharaṇam vā** asubhamanasikāram vā. Tattha rūpadhammajātam **aniccanti-ādi-attho** iti-saddo, tasmā aniccadukkhānattavipariṇāmadhammoti

manasikāraṃ vā karontoti yojanā. **Paṭikkūlapaṭikkūlesūti** iṭṭhāniṭṭhāni vatthūni ekajjhaṃ gahetvā vadati. Esa nayo itarattha. Yaṃ vā sattānaṃ paṭhamāṃ paṭikkūlato upaṭṭhitameva pacchā apaṭikkūlato upatiṭṭhati, yañca apaṭikkūlato upaṭṭhitameva pacchā paṭikkūlato upatiṭṭhati, tadubhayepi khīṇāsavo sace ākaṅkhati, vuttanayena apaṭikkūlasaññī vā vihareyya, paṭikkūlasaññī vāti ayamariyiddhi vuttā.

Cakkhunā rūpaṃ disvāti kāraṇavasena “cakkhū”ti laddhavohārena rūpadassanasamatthena cakkhuviññāṇena, cakkhunā vā kāraṇabhūtena, dvārabhūtena vā rūpaṃ passitvā. **Neva sumano hotīti** gehassitasomanassassāyaṃ paṭikkhepo, na nekkhammapakkhikāya kiriyāsomanassavedanāya. **Chalaṅgupekkhanti** iṭṭhāniṭṭhachalaṅarammaṇāpāthe¹ parisuddhapakatibhāvāvijahanalakkhaṇaṃ chasu dvāresu pavattiyā “chalaṅgupekkhā”ti laddhanāmaṃ tatraṃajjhattupekkhaṃ. Yathāvuttamatthaṃ pāḷiyā samatthetuṃ “**paṭisambhidāyan**”ti-ādi vuttaṃ.

376. **Pakkhī-ādīnanti ādi**-saddena devādīnaṃ saṅgaho. **Vehāsagamanādīkāti** pana **ādi**-saddena cakkhuvisuddhi-ādīnaṃ saṅgaṇhāti. Kusalakammaena nibbattitvāpi akusalavipākānubhāvena sukhasamussayato vinipatitattā **vinipātikānaṃ**. **Jhānanti** abhiññāpattaṃ jhānaṃ sandhāyāha. Vipassanāpi ukkaṃsagatā ubbegapītisahitā ākāse laṅghāpanamattāpi hotīti vuttaṃ “**vipassanaṃ vā**”ti. “**Paṭhamakappikānaṃ**”ti idaṃ “ekaccānaṃ manussānaṃ”ti imassa viśesanaṃ daṭṭhabbaṃ. **Evamādīnanti ādi**-saddena punabbasumātādīnaṃ saṅgaho daṭṭhabbo.

377. **Vehāsanti** bhummatthe upayogavacanaṃ, accantaśamyoge vā. Cakkavattī hi cakkarataṇaṃ purakkhatvā attano bhavanato abbhuggantvā ākāseṇeva sineruṃ padakkhiṇaṃ katvā sakalacakkavāḷaṃ anusaṃyāyatīti. **Assabandhāti** assapālā, ye assānaṃ yavadāyakā. Tathā **gobandhā**.

Cakkavattī-ādīnaṃ puññiddhiyā vitthāriyamānāya atipapañco hotīti puññavato iddhiṃ lakkhaṇato dassentena “paripākaṃ gate puññasambhāre

1. Iṭṭhāniṭṭhachalaṅarammaṇāpāthehi (Ka)

ijjhanakaviseso”ti vatvāpi jotikādīnaṃ puññiddhiṃ ekadesena dassetuṃ “**ettha cā**”ti-ādi vuttaṃ. Tattha **suvaṇṇapabbato**ti sabbasuvaṇṇamayo pabbato. Tassa kira gahitagahitaṭṭhāne odhi na paññāyati. **Ekasītāmetteti** ettha **sītā** nāma kasanavasena naṅgalassa gatamaggo. **Tumbari** nāma ālhakaṃ. **Cuddasa maggā**ti catuddasa kasanamaggā.

378. **Vijjam pariĵapitvā**ti gandhārīvijjādikaṃ attano vijjam katūpacāraṃ parivattetvā mantapaṭhanakkamena paṭhitvā.

379. **Sammāpayogenā**ti upāyapayogena, yathā yathicchitattasiddhi hoti, tathā pavattitañyārambhena. **Tassa tassa kammassā**ti¹ yathādhīppetassa nipphādetabbakammassa². **Ettha cā**ti “tattha tattha sammāpayogappaccayā ijjanatṭhena iddhi”ti³ imissā dasamāya iddhiyā niddesepi. **Purimapāḷisadisāvā**”ti samādhivipphāra-iddhi-ādīnaṃ niddesadisāva. **Sakaṭabyūhādikaraṇavasenā**ti sakaṭabyūhacakkabyūhapadumabyūhādīnaṃ samvidhānavasena nibbattavisesoti sambandho. Gaṇitagandhabbādi **sippakammaṃ**. Sallakattakādi **vejjakammaṃ**. Irubbedādīnaṃ **tiṇṇaṃ vedānaṃ**.

“Ekopi hutvā bahudhāva hoti”ti-ādīnā⁴ adhiṭṭhānidhiyā eva gahitattā āha “**adhiṭṭhānā iddhiyeva āgatā**”ti. **Imasmim panattheti** imasmim abhiññānisamsasaṅkhāte, iddhividhasaṅkhāte vā atthe.

380. “Ekavidhena ñāṇavatthun”ti-ādīsu koṭṭhāsatto vidha-saddo, “vividhampi senābyūhaṃ dasseti”ti-ādīsu vikappattho, tadubhayampettha yujjati dasseto āha “**iddhividhāyati iddhikoṭṭhāsāya, iddhivikappāya vā**”ti. Iddhi hi abhiññāsu eko koṭṭhāso, vakkhamānehi bhedehi anekappabhedā ca. **Vuttappakārasenā**ti vuttassa cuddasappakārassa, cittaparidamanassa samāhitatādippakārassa ca vasena. “Iddhividhāyā”ti tadatthassa sampadānavacananti āha “**iddhividhādhigamatthāyā**”ti. “**Kasiṇārammaṇato apanetvā**”ti idaṃ

1. Dhammassa (Sī)

2. Nipphādetabbadhammassa (Sī)

3. Khu 9. 391 piṭṭhe Paṭisambhidāmagge.

4. Dī 1. 73, 74; Ma 1. 98; Saṃ 3. 247, 247; Khu 9. 107, 385 piṭṭhādīsu.

5. Abhi 2. 323 piṭṭhe.

6. Khu 9. 388 piṭṭhe Paṭisambhidāmagge.

abhiññāpādakaparikkamacittānaṃ samānasantānatāya vuttaṃ,
 nāparikkamacittassa kaṣiṇārammaṇattā. **Iddhividhābhimukhaṃ pesetīti**
 nipphādetabbassa iddhividhassa abhimukhabhāvena pavatteti. Yaṃ hi
 “sataṃ homī”ti-ādinā parikkamacittassa pavattanaṃ, tadevassa
 abhinīharaṇaṃ, iddhividhābhimukhapesanañca tatheva iddhividhassa
 pavattanato abhininnāmanaṃ idha parikkamacittassa iddhividhe adhimuttīti
 āha “**adhigantabba-iddhipoṇaṃ iddhipabbhāraṃ karotī**”ti. Idha
 paccanubhavanaphusaṇā sacchikiriyāpattipariyāyā evāti dassento “**pāpuṇātīti**
attho”ti āha. Assāti iddhividhassa.

Ekopīti pi-saddo vakkhamānaṃ bahubhāvaṃ upādāya sampiṇḍanatto.
 So hissa paṭiyogī “ekopi hutvā bahudhā hoti, bahudhāpi hutvā eko hoti”ti.
 So ca kho bahubhāvaṃ nimminivā ṭhitassa antarāva ekabhāvūpagamo.
 Yathākālaparicchedaṃ pana saraseneva ekabhāvūpagamo idha nādhippeto
 aniddhinimmānabhāvato. Tampi pubbekatakālaparicchedavasena siddhattā
 iddhānubhāvoyevāti keci. Aṭṭhāne vāyaṃ **pi-saddo**, eko hutvā bahudhāpi
 hoti, bahudhā hutvā ekopi hotīti sambandho. Imasmiṃ pakkhe pi-saddo
 vakkhamānaṃ ekabhāvaṃ upādāya “sampiṇḍanatto”ti vatvā “so hī”ti-ādi
 sabbaṃ yathārahaṃ vattabbaṃ. Bahubhāvānimmāne payojanaṃ dassetuṃ
 “**bahūnaṃ santike**”ti-ādi vuttaṃ. Tattha **bahūnaṃ santiketi** attanā
 nimmitānaṃ bahūnaṃ samīpe, tehi parivārito hutvāti adhippāyo. **Vā-saddo**
 avuttavikappattho, tena “dhammaṃ vā kathetukāmo”ti evamādi saṅgayhati.
 “**Ñāṇena adhiṭṭhahanto** evaṃ hotī”ti ānetvā sambandhitabbaṃ.

381. Bhavati ettha iddhīti **bhūmiyo**, jhānāni. **Etthāti** ca hetumhi
 bhummavacanaṃ. Vivekato jātā bhūmi **vivekajabhūmi**. Vivekajaṃ hi
 paṭhamaṃ jhānaṃ nīvaraṇavivekasambhūtattā. Pītisukhabhūtā bhūmi
pītisukhabhūmi. Dutiyaṃ jhānaṃ hi pītisukhabhūmibhūtañceva¹
 pītisukhasañjātañca samādhivasena. Upari dvīsūpi eseva nayo.
Iddhilābhāyāti iddhiyā adhigamāya. **Iddhipaṭilābhāyāti** iddhiyā punappunaṃ
 labhamānāya, bahulīkaraṇāyāti attho. **Iddhivikubbanatāyāti** iddhiyā
 vividharūpakāraṇāya, vikubbaniddhiyāti

1. Pītisukhabhūtañceva (Sī, Syā)

attho. **Iddhivisavitāyāti** iddhiyā vividhānisamsapasavanāya. **Iddhivasitāyāti** iddhiyā khippanisanti-ādibhāvāvahavasībhāvattāya. **Iddhivesārajyāti** iddhiyā paṭipakkhadūrībhāvena vigatasamkilesatāya suṭṭhu visāradabhāvāya. Catutthajjhānam tāva iddhiyā bhūmi hotu tattha patiṭṭhāya nipphādetabbato, itarāni pana kathanti āha “**ettha cā**”ti-ādi. Tattha tīṇi jhānāni sambhārabhūmiyoti veditabbānīti sambandho. Tatiyajjhāne sukhapharaṇena, paṭhamadutiyesu pītipharaṇena sukhapharaṇena ca hetubhūtenāti yathārahavasena yojanā. Pharaṇam cettha jhānassa subhāvitabhāvena sātisayānam pītisukhānam vasena jhānappaccayādinā sahaḥjātanāmakāyassa paribrūhanam, rūpakāyassa ca taṃsamuṭṭhānehi paṇītarūpehi paripphuṭatā. Tenāha bhagavā “pītisukhena abhisandeti parisandeti paripūreti parippharati”ti¹. **Sukhasaññanti** jhānasukhena sahaḥgataṃ saññam. **Lahusaññanti** taṃsampayuttalahutāsahagataṃ saññam. **Okkamitvāti** anupavisitvā. Tesu hi jhānesu sātisayāya lahutāya sampayuttaṃ sukham santānavasena pavattento yogī taṃ samokkanto viya hotīti evaṃ vuttaṃ. Saññāsīsenā niddeso. Jhānasampayuttā hi lahutā vināpi iddhiyā ākāsaṃ laṅghāpanappamāṇappattā viya hoti. Lahubhāvaggahaṇeneva cettha mudukammaññabhāvāpi gahitā eva. Tenāha “**lahumudukammaññakāyo hutvā**”ti.

Iminā pariyāyenāti tiṇṇam jhānānam samāpajjanena sukhalahubhāvappattanāmarūpakāyassa sati cittaparidamane catuttham jhānam sukheveva iddhipaṭilābhāya samvattatīti iminā pariyāyena. Pakatibhūmiyā hi adhiṭṭhānabhūtā sambhārabhūmiyo pākārassa nemippadeso viyāti.

382. Iddhipādaniddese **cattāroti** gaṇanaparicchedo. **Iddhipādāti** ettha ijjhātīti iddhi, samijjhati nipphajjatīti attho. Ijjhanti vā etāya sattā iddhā vuddhā ukkaṃsagatā hontīti iddhi. Paṭhamenatthena iddhi eva pādoti iddhipādo, iddhikoṭṭhāsoti attho. Dutiyaenatthena iddhiyā pādoti iddhipādo. **Pādoti** patiṭṭhā, adhigamūpāyoti attho. Tena hi uparūparivisesasaṅkhātānam iddhiṃ pajjanti pāpuṇanti. Ayaṃ tāva aṭṭhakathānayo. Tattha iddhi-saddassa paṭhamo kattu-attho, dutiyo

1. Dī 1. 70; Ma 1. 344 piṭṭhādīsu.

karaṇattho vutto. Pāda-saddassa eko karaṇatthova. Pajjitabbāva iddhi vuttā, na ca ijjhantī, pajjitabbā ca iddhi pajjanakaraṇena pādena samānādhikaraṇā hotīti paṭhamena atthena “iddhi eva pādo iddhipādo”ti na sakkā vattuṃ. Tathā iddhikiriyākaraṇena sādhetabbāva vuddhisāṅkhātā iddhi pajjanakiriyākaraṇena pajjitabbāti dvinnam karaṇānam na asamānādhikaraṇatā sambhavatīti dutiyenatthena “iddhiyā pādo iddhipādo”ti ca na sakkā vattuṃ. Tasmā paṭhamenatthena samānādhikaraṇasamāso, dutiyena sāmivacanasamāso na yujjatīti paṭhamenatthena iddhiyā pādo iddhipādo, dutiyenatthena iddhi eva pādo iddhipādoti samāso yutto, yathāvuttopi vā, pādassa ijhamānakoṭṭhāsa-ijjhanakaraṇūpāyabhāvato.

Pubbabhāgachandavasena **chandahetuko**. Sampayuttachandavasena **chandādhiko**. Pubbābhisaṅkhārasena eva pana saha-jātachandassāpi adhikatā veditabbā. Atha vā “chandañce bhikkhu adhipatim karitvā labhati samādhim, labhati cittassekaggatam, ayam vuccati chandasamādhī”ti imāya pāḷiyā chandādhipatisamādhī **chandasmādhīti** adhipati-saddalopam katvā samāso vuttoti viññāyati. Adhipatisaddatthadassanavasena pana **aṭṭhakathāyam** “chandahetuko chandādhiko vā samādhī”ti vuttam. Tenevāha “**chandam adhipatim karitvā**”ti-ādi. **Padhānabhūtāti** vīriyabhūtāti keci vadanti. Saṅkhatasaṅkhāranivattanattham pana **padhānaggahaṇam**. Atha vā tam tam viśesam saṅkharotīti **saṅkhāro**, sabbampi vīriyam. Tattha catukiccasādhakato aññassa nivattanattham **padhānaggahaṇam**. **Padhānabhūtā** seṭṭhabhūtāti attho. Catubbidhassa pana vīriyassa adhippetattā bahuvacananiddeso. Yo pana “iddhiyā pādo iddhipādo”ti evam samāsayo janāvasena pādassa upāyattattham gahetvā iddhipādattho vutto, so paṭilābhapubbabhāgānam kattukaraṇiddhibhāvaṃ, “chandiddhipādo”ti-ādīnā¹ vā abhidhamme āgatattā chandādīhi iddhipādehi sādhetabbāya vuddhiyā kattiddhibhāvaṃ, chandādīnam karaṇiddhibhāvañca sandhāya vuttoti veditabbo.

Vīriyiddhipāde “**vīriyasamādhipadhānasaṅkhārasamannāgatan**”ti dvikkhattum vīriyam āgatam. Tattha purimam samādhivisesanam vīriyādhipati samādhī **vīriyasamādhīti**. Dutiyam samannāgamaṅgadassanam. Dve eva hi sabbattha samannāgamaṅgāni

1. Abhi 2. 232 piṭṭhe.

samādhī, padhānasaṅkhāro ca. Chandādayo samādhivisesanāni, padhānasaṅkhāro pana padhānavacaneneva visesito, na chandādīhīti na idha vīriyādhipatitā padhānasaṅkhārassa vuttā hoti. Vīriyaṅca samādhim visesetvā ṭhitameva samannāgamaṅgavasena padhānasaṅkhāravacanena vuttanti nāpi dvīhi vīriyehi samannāgamo vutto hotīti. Yasmā pana chandādīhi visiṭṭho samādhī, tathā visiṭṭheneva ca tena sampayutto padhānasaṅkhāro, sesadhammā ca, tasmā samādhivisesanānam vasena cattāro iddhipādā vuttā. Visesanabhāvo ca chandādīnam taṁtaṁnavassayavasena hotīti.

Atha vāti-ādinā nissayaṭṭhepi pāda-sadde upāyaṭṭhena chandādīnam iddhipādātā vuttā. Teneva abhidhamme uttaracūḷabhājanīye “cattāro iddhipādā chandiddhipādo”ti-ādinā¹ chandādīnameva iddhipādātā vuttā. Pañhāpucchake ca “cattāro iddhipādā idha bhikkhu chandasamādhī”ti-ādināva² uddesaṁ katvāpi puna chandādīnamyeva kusalādibhāvo vibhatto. Upāyiddhipādadassanattameva hi sutte, abhidhamme ca nissayiddhipādadassanam katarā, aññathā catubbidhatā na hotīti.

383. **Chandādīni aṭṭhāti** chandasamādhī vīriyasamādhī cittasamādhī vīmaṁsāsamādhīti evaṁ chandādīni aṭṭha. Kāmaṁ cettha catūsopi ṭhānesu samādhī samādhī eva, tathāpi iddhiṁ uppādetukāmatāchandasahitova samādhī iddhipaṭilābhāya saṁvattati, na kevalo. Evaṁ vīriyasamādhī-ādayopi. Tasmā chandādisahitā ete cattāro ca samādhī, chandādayo ca cattāroti aṭṭha pajjati iddhi etehi pāpuṇīyati, sayam vā pajjanti iddhipaṭilābhāya sampajjantīti **padānīti** vuccanti. Tenāha “**iddhipaṭilābhāya saṁvattantī**”ti. Yam pana pāḷiyam “chando na samādhī”ti-ādi, taṁ yadipi chandādayo samādhisahitāva iddhiṁ nipphādentī, tathāpi visum nesam padabhāvadassanam. **Ekato niyuttova**, na ekeko hutvāti adhippāyo. **Niyuttovāti** sahito eva, na viyutto.

384. **Anonatanti** na onatam, vīriyena paggahitattā alīnanti attho. Tenāha “**kosajje na iñjati**”ti, kosajjanimittam na

1. Abhi 2. 232 piṭṭhe.

2. Abhi 2. 233 piṭṭhe.

calatīti attho. Uddham nataṃ **unnataṃ**, uddhataṃ vikkhittaṃ. Na unnataṃ **anunnataṃ**, avikkhittaṃ, samāhitanti attho. Tenāha “**uddhacce na iñjati**”ti. Abhisāṅgavasena nataṃ abhinataṃ, na abhinataṃ **anabhinataṃ**, arattaṃ. Apagamanavasena nataṃ apanataṃ, kodhavasena vimukhaṃ. Na apanataṃ **anapanataṃ**, aduṭṭhaṃ. Diṭṭhiyā “ahaṃ, mamaṃ”ti nissayavasena na nissitanti **anissitaṃ**. Chandarāgavasena na paṭibaddhanti **appaṭibaddhaṃ**. **Rāgo** kevalaṃ āsattimattaṃ, **chandarāgo** pana bahalakilesa. Tathā hissa dūre ṭhitampi ārammaṇaṃ paṭibaddhameva. **Vippamuttanti** visesato pamuttaṃ. Jhānānaṃ kāmarāgapaṭipakkhatāya āha “**kāmarāge**”ti. **Visaṃyuttanti** vivittaṃ saṃkilesato, na vā saṃyuttaṃ catūhipi yogehi. **Vimariyādikataṃ** kilesamariyādāya, yathā īsakampi kilesamariyādā na hoti, tathā paṭipannaṃ. **Ekattagatanti** ekaggataṃ upagataṃ accantameva samāhitaṃ. Tato eva **nānattakilesehi** nānāsabhāvehi kilesehi **na iñjati**.

Esa atthoti kosajjādinimittaṃ. Imassa cittassa āneñjanattho siddho eva āneñjappattiyā pakāsanavasena dassitattā. **Puna vuttoti** iddhiyā bhūmipādapadadassanappasaṅgena “imāni mūlāni nāmā”ti mūlabhāvadassanattaṃ puna vutto. **Purimoti** “saddhādīhi pariggahitattā”ti-ādinā pubbe chadhā dassitanayo. **Ayanti** adhunā soḷasadhā dassitanayo. Suttanaye, paṭisambhidānaye ca dassite tatha sammoho na hoti. Na adassiteti āha “**ubhayattha asammohattha**”ti.

385. **Ñāṇena adhiṭṭhahantoti** “kathaṃ panāyaṃ evaṃ hotī”ti ettha pubbe attanā vuttapadaṃ uddharati adhiṭṭhānavidhiṃ dassetuṃ “**abhiññāpādakaṃ jhānaṃ samāpajjitvā vuṭṭhāyā**”ti. Ettha anupubbena cattāri jhānāni samāpajjitvā catutthajjhānato vuṭṭhāyāti keci, taṃ ayuttaṃ. Yathicchitajjhānasamāpajjanatthañhi cittaparidamaṇaṃ, catutthajjhānameva ca abhiññāpādakaṃ, na itarāni. **Parikammaṃ katvāti** pādakajjhānato vuṭṭhāya kāmāvacaracittena “sataṃ homī”ti-ādinā cintanamevettha parikammakaraṇaṃ, tathāvajjanaṃ eva ca āvajjanaṃ. **Dutiyaṃ pi**-saddo samuccayattho, tena tatiyaṃ pi, tato bhīyyopīti imamatthaṃ dīpeti. Yathā hi jhānabhāvanā, evamabhiññābhāvanāpi. “**Ekavāraṃ dhevāraṃ**”ti idampi nidassanamattaṃ daṭṭhabbaṃ. **Nimittārammaṇanti** paṭibhāganimittārammaṇaṃ. **Parikammacittānīti** ettha ekekassa parikammacittassa

satārammaṇatā daṭṭhabbā “sataṃ homī”ti pavattanato. **Sahassārammaṇānī** etthāpi eseva nayo. **Vaṇṇavasenā**ti attanā parikappitavaṇṇavasena. **No paṇṇattivasenā**ti na sattapaṇṇattivaseṇa. **Taṃ** adhiṭṭhānacittāṃ **appanācittamivā**ti ivaggahaṇaṃ abhiññācittassa jhānacittassa paṭhamuppattisadisabhāvato vuttaṃ, na tassa appanābhāvato. **Rūpāvacaracatutthajjhānikanti** rūpāvacaracatutthajjhānavantaṃ, tena sampayuttaṃ.

386. Yadi evaṃ “āvajjitvā nāṇena adhiṭṭhātī”ti paṭisambhidāvacanaṃ kathanti āha “**yampī**”ti-ādi. **Tatrāpī**ti paṭisambhidāyampi. **Āvajjatī**ti “bahukaṃ āvajjatī”ti idaṃ pāṭhapadaṃ **parikammavaseneva vuttaṃ**, na āvajjanavasena. **Āvajjitvā nāṇena adhiṭṭhātī abhiññāṇavasena vuttaṃ**, na parikammacittasampayuttassa, aññassa vā kāmāvacarassa nāṇassa vasena. Na hi tassa tādiso ānubhāvo atthīti. **Tasmā**ti yasmā appanāppattassa abhiññāṇasseva vasena adhiṭṭhānaṃ, tasmā. Ayamadhiṭṭhānakkamoti dassento “**bahukaṃ āvajjatī**”ti-ādimāha. Tattha **sanniṭṭhāpanavasenā**ti nipphādanavasena.

Kāyasakkhidassanatthanti na kevalaṃ vacanamattameva, atha kho ayametassatthassa attano kāyena sacchikatattā kāyasakkhīti sakkhidassanatthaṃ.

Kokanadanti padumavisesanaṃ yathā “kokāsakan”ti. Taṃ kira bahupattaṃ, vaṇṇasampannaṃ, ativiya sugandhañja hoti. **Pātoti** pageva. Ayañhettha attho—yathā kokanadasaṅkhātaṃ **padumaṃ pāto** sūriyassuggamanavelāyaṃ **phullaṃ** vikaṣitaṃ **avītagandhaṃ siyā virocamaṇaṃ**, evaṃ sarīragandhena, guṇagandhena ca **sugandhaṃ** saradakāle **antalikkhe ādiccamiva** attano tejasā **tapantaṃ** aṅgehi niccharaṇakajutitāya **aṅgīrasaṃ** sammāsambuddhaṃ **passāti**.

Abhabboti paṭipattisāramidaṃ sāsanaṃ, paṭipatti ca pariyattimūlikā, tvañca pariyattim uggahetuṃ asamattho, tasmā abhabboti adhippāyo. **Abhabbo nāma na hoti** vāsadhurasseva padhānabhāvato.

Bhikkhūti pabbajitavohārena vuttaṃ, bhāvināṃ vā bhikkhubhāvaṃ upādāya yathā “agamā rājagahaṃ buddho”ti¹. **Pilotikakhaṇḍanti** suvisuddhaṃ

1. Khu 1. 340 piṭṭhe Suttanipāte.

coḷakhaṇḍaṃ. Rajo haratīti **rajoharaṇaṃ**. **Abhinimminivā adāsi** tattha pubbe katādhikārattā. Tathā hi yoniso ummujjanto “attabhāvassa panāyaṃ doso”ti asubhasaññaṃ, aniccasaññaṃ paṭilabhitvā nāmarūpapariggahādina pañcasu khandhesu ñāṇaṃ otāretvā kalāpasammasanādikkamena vipassanaṃ vaḍḍhetvā udayabbayañāṇādipaṭipāṭiyā vipassanaṃ anulomagotrabhusamīpaṃ pāpesi. **Obhāsavissajjanapubbikā bhāsita-gāthā obhāsagāthā**.

Rāgo rajo ariyassa vinaye, na ca pana **reṇu vuccati “rajo”**ti. Kasmā? Cittassa malīnabhāvakaraṇato. **Rāgassetam adhivacanaṃ “rajo”**ti. **Etam rajanti** etaṃ rāgasankhātāṃ rajaṃ. **Vippajahitvā**ti aggamaggena visesato pajahanahetu. **Paṇḍitā viharanti** teti te pajahanakā paṇḍitā hutvā viharanti. **Vītarajassa** sabbaso pahīnarāgādirajassa buddhassa bhagavato **sāsane**. Tathā hi vadanti—

“Cittamhi saṅkiliṭṭhamhi, saṅkilissanti māṇavā.
Citte suddhe visujjhanti, iti vuttaṃ mahesinā”ti¹.

Chaḷabhiññāgahaṇena gahitāya chaḷabhiññāya vibhāvitepi ariyamagge anuttarabhāvasāmaññaṇa phalanibbāṇehi saddhiṃ saṅgaṇhanto āha **“nava lokuttaradhammā”**ti.

Pattassa pidahanākārena hatthaṃ ṭhapento **“hatthaṃ pidahī”**ti vutto. **Hatthanti** vā karaṇatthe upayogavacanaṃ, hatthena pidahīti attho.

Sahassakkhattunti sahasadhā. Sahassadhā hi attānaṃ ekacitteneva nimminantopi sahasavāraṃ nimminanto viya hoti. Asatipi kiriyābyāvuttīyaṃ tadatthasiddhitoti imamatthaṃ dassetuṃ “sahassakkhattun”ti vuttaṃ. **Ambavaneti** ambavane katavihāre. **Rammeti** ramaṇīye. Yāva kālappavedanā, tāva nisīdīti yojanā.

Aniyametvāti vaṇṇāvayavasārīravayavaparikkhārakiriyāvisesādīhi niyamaṃ akatvā. **Nānāvāṇṇeti** nānākāre yathāvuttavaṇṇādivasena nānāvidhe. **Missakakeseti** palitehi missitakese. Upaḍḍharattavaṇṇa-upaḍḍhapaṇḍuvaṇṇādīsu aññataravaṇṇanti evaṃ **upaḍḍharattacivare**. Padavasena

1. Dī-Ṭṭha 2. 338; Ma-Ṭṭha 1. 237; Saṃ-Ṭṭha 2. 299; Itivuttaka-Ṭṭha 261 piṭṭhesu.

atthassa, gamanavasena pāḷiyā bhaṇanam **padabhāṇam**. Parikathādivasena dhammassa kathanam **dhammakathā**. Sarena bhaṇṇam suttādīnam uccāraṇam **sarabhaṇṇam**. **Aparepī**ti vuttākārato aññepi dīgharassakisathulādike nānappakārake. **Ichhiticchitappakārāyeva** hontīti yathā yathā icchitā, taṁtampakārāyeva honti. Yattakā hi visesā vaṇṇādivasena tesu icchitā, tattakavisesavantova te honti. Te pana tathā bahudhā bhinnākārepi vaṇṇavasena ārammaṇam katvā ekameva adhiṭṭhānacittam pavattati. Ayam hissa ānubhāvo—yathā ekāva cetanā nānāvisesavantam attabhāvam nibbatteti, tattha bhavapatthanā kammaṣṣa visesapaccayo hoti. Acinteyyo ca kammavipākoti ce, idhāpi parikammacittam visesapaccayo hoti, acinteyyo ca iddhivisayoti gahetabbam. **Esa nayoti** yvāyam bahubhāvanimmāne “abhiññāpādakam jhānam samāpajjitvā”ti-ādīnā adhiṭṭhānanayo vutto, esa nayo itaresupi adhiṭṭhānesu.

Iti avisesam atidesena dassetvā visesam sarūpato dassetum “**ayam pana viseso**”ti-ādi vuttam. Tattha iminā bhikkhunā icchantenāti sambandho. **Maṁ jānissanti**ti “iddhimā”ti maṁ jānissanti. **Antarāvāti** paricchinnakālassa abbhantare eva. **Pādakajjhānanti**-ādi parikammakaraṇākāradassanattam vuttam, itaram pana atideseneva vibhāvitanti. **Evam akarontoti** “eko homī”ti antarā adhiṭṭhānam akaronto. “**Yathāparicchinnakālavasenā**”ti iminā “sataṁ homī”ti-ādīnā adhiṭṭhānam karontena kālaparicchavedavaseneva kātabbanti dasseti. **Sayameva eko hoti** adhiṭṭhānassa paṭippassaddhattā. Ettha ca parikammādhiṭṭhānacittānam iddhimā vaṇṇavasena sayameva ārammaṇam hoti. Tesu parikammacittāni santatipaccuppannārammaṇāni. Adhiṭṭhānacittam sampativattamānārammaṇam adhiṭṭhānassa ekacittakkaṇikattāti vadanti.

387. “**Āvibhāvan**”ti padassa hetthā vuttena hoti-saddena sambandho na yujjati upayogavacanena vuttattā, tathā vakkhamānena ca gacchati-saddena attano, paresaṅca āvibhāvassa icchitattā, nāmapadaṅca kiriyāpadāpekkhanti kiriyāsāmaññāvācinā karoti-saddena yojetvā āha “**āvibhāvam karoti**”ti. **Tirobhāvanti** etthāpi eseva

nayo. Yadi evaṃ katham paṭisambhidāyanti codanam sandhāyāha “**idamevahī**”ti-ādi. Kāmaṃ **paṭisambhidāyaṃ** “āvibhāvanti kenaci anāvaṭaṃ hotī”ti-ādinā¹ āgataṃ, tampi idameva āvibhāvakaṇaṃ, tirobhāvakaṇaṃ sandhāya vuttam. Sesapadāni tesamyeva vevacanāni. **Andhakāraṇti** rattandhakāraṃ, divāpi vā bilaguhādigaṭaṃ **andhakāraṃ**. **Paṭicchannanti** kuṭṭakavāṭādinā paṭicchāditaṃ. **Anāpāthanti** dūratāsukhumataratādinā na āpāthagaṭaṃ. **Ayanti** iddhimā. Paṭicchannopi dūre ṭhitopi attā vā paro vā yathā dissatīti vibhattim pariṇāmetvā yojetabbaṃ. **Ālokajātanti** ālokabhūtaṃ, jātālokaṃ vā.

388. **Etam pana pāṭihāriyanti** āvibhāvapāṭihāriyamāha. **Kena katapubbanti** tatha kāyasakkhim pucchivā “sathā tāva kāyasakkhī”ti dassentena “bhagavato”ti vatvā tamatthaṃ vibhāvetum “**bhagavā hī**”ti-ādi vuttam. Sāvattthivāsike passantīti ānetvā sambandho, tathā “yāva avicim dassesī”ti. Ākāsaḡatesu heṭṭhimahēṭṭhimavimānesu uparūparivimānaṃ byavadhāyakesu byūhiyamānesu taggaṭaṃ ākāsaṃ byūḷhaṃ nāma hotīti vuttam “**ākāsaṃca dvidhā viyūhitvā**”ti.

Ayamatthoti āvibhāvapāṭihāriyassa sathārā katabhāvo. Purimabuddhānaṃ paṭipatti-āvajjanaṃ buddhappaveṇiyā anupālanatthaṃ. “**Ekenapādenā**”ti-ādi tivikkamadassanaṃ². **Nayaṃ deti** yassa nayassa anusārena vācanāmaggaṃ ṭhapesi.

Cūḷa-anāthapiṇḍiko nāma anāthapiṇḍikamahāseṭṭhissa kaniṭṭhabhātā.

Sinerupabbataṃ nibbijhitvāti taṃ parisāya dissamānarūpamyeva katvā nibbijhitvā. **Nanti** sinerupabbataṃ.

Anekasatasahassasaṅkhassa okāsalokassa, taṃnivāsisattalokassa ca vivaṭabhāvakaṇaṃ pāṭihāriyaṃ **lokavivaraṇaṃ nāma**. **Mahābrahmāti** sahaṃpatimahābrahmā.

1. Khu 9. 386 piṭṭhe.

2. Tidivikkamadassanaṃ (Ka)

Passatha tāva apanṇakapaṭipadāya phalanti **nirayabhayena tajjetvā** satthu anupubbikathānayaena **saggasukhena palobhetvā**, na pana saggasampattiyāṃ ninnabhāvāpādanena.

389. Yathā āvibhāvakarāṇe ālokaśiṇaṃ samāpajjitabbaṃ ālokanimmānāya, evaṃ tirobhāvakarāṇe andhakāranimmānāya nīlakaśiṇaṃ samāpajjitabbaṃ. Kāmañcetaṃ pāḷiyāṃ sarūpato nāgataṃ, “vivaṭaṃ āvaṭaṃ”¹ ti pana vacanato atthato āgatameva. Odātakaśiṇantogadhaṃ vā ālokaśiṇanti vuttovāyamatto. **Andhakāranti** andhakāravantaṃ.

390. **Avasese** iṭṭiyattherādike.

391. Pākaṭo iddhimā etassa atthīti pākaṭaṃ, pākaṭaṅca taṃ pāṭihāriyañcāti **pākaṭapāṭihāriyaṃ**. Na ettha iddhimā pākaṭoti apākaṭaṃ, apākaṭaṅca taṃ pāṭihāriyañcāti **apākaṭapāṭihāriyaṃ**. Iddhimato eva hi pākaṭāpākaṭabhāvenāyaṃ bhedo, na pāṭihāriyassa. Na hi taṃ apākaṭaṃ atthi.

Uttarimanussadhammāti manussadhammo vuccati dasa kusalakammaphadhammā, tato manussadhammato uttari. Iddhisāṅkhātaṃ pāṭihāriyaṃ **iddhipāṭihāriyaṃ**. **Ālindeti** pamukhe. **Okāsehīti** pakira. **Iddhābhisaṅkhāranti** iddhipayogaṃ. **Abhisaṅkhāsīti** abhisaṅkhari, akāsīti attho. **Tālacchiggaḷenāti** kuñcicacchiddena. **Aggaḷantarikāyāti** piṭṭhasaṅghātānaṃ antarena.

Antarahitoti antaradhāyitukāmo. **Bako** brahmā yathā antaradhāyitum na sakkoti, tathā katvā bhagavā sayāṃ tassa, brahmagaṇassa ca anāpāthabhāvagamaṇena antarahito hutvā “samaṇassa gotamassa imasmim ṭhāne atthibhāvo vā natthibhāvo vā na sakkā jānitum”¹ ti evaṃ brahmagaṇassa vacanokāso mā hotūti “**bhavevāhan**”¹ ti imaṃ gāthaṃ abhāsi.

Tattha **bhavevāhaṃ bhayaṃ disvāti** ahaṃ bhave saṃsāre jātijarādibhedaṃ bhayaṃ disvā eva. **Bhavaṅca vibhavesinanti** imaṅca kāmabhavādim

1. Khu 9. 386 piṭṭhe Paṭisambhidāmagge.

tividhampi sattabhavaṃ, vibhavesinaṃ vibhavaṃ gavesamānampi pariyesamānampi punappunaṃ bhava eva disvā. **Bhavaṃ nābhivadinti** taṇhādhiṭṭhivasena kiñci bhavaṃ na abhivadim na gahesim. **Nandiñca na upādiyinti** bhavataṇhaṃ na upagacchim, na aggahesinti attho.

392. **Alaggamānoti** vinivijjhivā gamanena kuṭṭādīsu katthaci na laggamāno. **Āvajjitvā kataparikammenāti** yassa parato gantukāmo, taṃ āvajjitvā “ākāso hotu, ākāso hotū”ti evaṃ kataparikammaena iddhimatā. Pākārapabbatāpekkhāya “susiro, chiddo”ti ca pulliṅgavasena vuttaṃ. Ubbedhavasena pavattaṃ vivaraṃ **susiraṃ**. Tiriyaṃ pavattaṃ **chiddaṃ**.

Yattha katthaci kasiṇe parikammaṃ katvāti pathavīkasiṇādīsu yattha katthaci kasiṇe jhānaṃ samāpajjitvā parikammaṃ katvā “ākāso hotū”ti adhiṭṭhātabbo. Tattha kāraṇamāha “**aṭṭhasamāpattivasībhāvoyeva pamāṇaṃ**”ti. Tasmā **yam yaṃ icchati, taṃ tadeva hoti**. Etena pathaviyā ummujjananimujjane āpokasiṇasamāpajjanaṃ, udakādīsu pathavīnimmane pathavīkasiṇasamāpajjanaṃ na ekantato icchitabbanti vuttaṃ hoti. **Etanti** etaṃ tirokuṭṭādigamanapāṭihāriyakaraṇe ākāsakasiṇasamāpajjanaṃ **avassaṃ vattabbaṃ** anucchavikabhāvato. Evañca katvā “ākāsakasiṇavasena paṭicchannānaṃ vivaṭakaraṇaṃ”ti-ādivacanaṃ viya pathavīkasiṇavasena “ekopi hutvā bahudhā hoti”ti-ādibhāvo “ākāse vā uduke vā pathaviṃ nimminivā padasā gamaṇaṃ icchati”ti-ādinā yaṃ pakiṇṇakanaye vuttaṃ, tampi samatthitaṃ hoti.

“Doso natthi”ti dvikkhattuṃ baddhaṃ subaddhaṃ viya dalhīkaraṇaṃ nāma hotīti adhippāyena vatvā tena payojanābhāvaṃ dassetuṃ “**puna samāpajjitvā**”ti-ādi vuttaṃ. **Adhiṭṭhitattā ākāso hotiyevāti** sacepi kiñci antarā upaṭṭhitaṃ pabbatādi siyā, tampi “ākāso hotū”ti adhiṭṭhitattā ākāso hotiyeva. Idampi aṭṭhānaparikappanamattaṃ, tādīsassa upaṭṭhānameva natthīti dassetuṃ “**antarā**”ti-ādi vuttaṃ.

393. **Paricchinditvāti** yathicchitaṭṭhānaṃ nāṇena paricchinditvā. **Tatrāti** tasmim pathaviyā udakabhāvādhiṭṭhāne **ayam** yathāvuttapaṭipattivibhāvinī

pāli. Parato “tatrāyaṃ pālī”ti āgataṭṭhānesupi iminā nayena attho veditabbo.

Soti iddhimā. Adhiṭṭhānakāle kālaparicchedaṃ katvā adhiṭṭhātīti vuttaṃ “**paricchinnakālaṃ pana atikkamitvā**”ti. **Pakatiyā udakaṃ** animmāna-udakaṃ.

394. **Viparītanti** yaṃ udakaṃ akkamitvā akkamanto na saṃsīdati, taṃ panettha iddhiyā pathavīnimmānavasena veditabbaṃ. **Pathavīkasiṇanti** pathavīkasiṇajjhānaṃ.

395. **Pallaṅkanti** samantato ūrubaddhāsaṇaṃ. Chinnapakkho, asaṅcātapakkho vā sakuṇo ḍetuṃ na sakkotīti pāliyaṃ “pakkhī sakuṇo”ti¹ pakkhī-saddena visesetvā sakuṇo vuttoti “**pakkhehi yuttasakuṇo**”ti āha. **Parikammaṃ katvāti** “pathavī hotū”ti parikammaṃ katvā.

Ākāse antalikkheti antalikkhasaṅṅite ākāse. Yattha yattha hi āvaraṇaṃ natthi, taṃ taṃ “ākāsaṃ”ti vuccati. Ayaṅca iddhimā na pathaviyā āsanne ākāse gacchati. Yattha pana pakkhīnaṃ agocaro, tattha gacchati, tādisaṅca loke “antalikkhaṇaṃ”ti vuccati. Tena vuttaṃ “antalikkhasaṅṅite ākāse”ti.

Theroti pubbe vuttatipīṭakacūlābhayatthero. **Samāpattisamāpajjananti** puna samāpattisamāpajjanaṃ. **Nanu samāhitamevassa cittanti** iddhimato pāṭihāriyavasena pavattamānassa cittaṃ accantaṃ samāhitameva hoti, na aññadā viya asamāhitanti adhippāyo. Taṃ pana therassa matimattaṃ. Pubbe hi pathavīkasiṇaṃ samāpajjitvā pathaviṃ adhiṭṭhāya gacchati, idāni pana ākāso icchitabbo, tasmā ākāsakasiṇaṃ samāpajjitabbameva. Tenāha “**kiñcāpī**”ti-ādi. **Tirokuṭṭapāṭihāriye vuttanayeneva paṭipajjitabbanti** yathā tattha kuṭṭādi “ākāso hotū”ti adhiṭṭhānena ākāso hoti, evaṃ idhāpi pabbatarukkhādiṃ adhiṭṭhānena ākāsaṃ katvā gantabbanti attho. Atha vā **tirokuṭṭapāṭahāriye vuttanayenevāti** “sace panassa bhikkhuno adhiṭṭhahitvā gacchantassā”ti-ādinā²

1. Khu 9. 386 piṭṭhe Paṭisambhidāmagge.

2. Visuddhi 2. 24 piṭṭhe.

tattha vuttanayena. Etena “purimādhiṭṭhānabaleneva cassa antarā añño pabbato vā rukkho vā utumayo uṭṭhahissatīti aṭṭhānamevetan”ti nāgādīhi kayiramāno vibandho gamanantarāyaṃ na karotīti dasseti.

Okāseti janavivitte yuttaṭṭhāne. **Pākaṭo hoti** ākāśacārī yaṃ samaṇoti.

396. **Dvācattālīsayojanasahassaggahaṇaṃ** paṭhamakappavasena kataṃ. Tato paraṃ pana anukkamena pathaviyā ussitabhāvena tato katipayayojanūnatā siyā, appakaṃ adhikaṃ vā ūnaṃ vā gaṇanūpagaṃ na hotīti tathā vuttaṃ. **Tīsu dīpesu ekakkhaṇe ālokakaraṇenāti** yadā yasmiṃ dīpe majjhe tiṭṭhanti, tadā tato purimasmiṃ atthaṃ gacchantā pacchime udentā hutvā ālokakaraṇena. Aññajotīnaṃ vā abhibhavanena, duddasatāya ca **mahiddhike**. Sattānaṃ sītapariḷāhavūpasamanena, osadhitiṇavanappaṭīnaṃ paribrūhanena ca **mahānubhāve**. **Chupatīti** phusati. **Parimajjatīti** hatthaṃ ito cito ca sañcārento ghaṃseti. **Abhiññāpādakajjhānavasenevāti** yassa kassaci abhiññāpādakajjhānavasena. **Eva-kārena** pādakajjhānavisesaṃ nivatteti, na adhiṭṭhānaṃ. Tenevāha “**natthettha kasiṇasamāpattiniyamo**”ti. Tirokuṭṭapāṭihāriyādīsu viya imasmiṃ nāma kasiṇe jhānaṃ samāpajjitvā adhiṭṭhātabbanti na ettha koci niyamo atthīti attho. Tathā hi pāḷiyaṃ kiñci samāpattim aparāmasitvā “idha so iddhimā”ti-ādi¹ vuttaṃ. **Hatthapāse hoti** “candimasūriye”ti evaṃ vuttaṃ candimasūriyamaṇḍalaṃ. **Rūpagataṃ hatthapāseti** hatthapāse ṭhitam rūpagataṃ, hatthapāse vā rūpagataṃ. Hatthaṃ vā vaḍḍhetvā parāmasatīti yojanā.

Upādinnakaṃ nissāya anupādinnakassa vaḍḍhanaṃ vuttaṃ. Yuttiyā panettha upādinnakassapi vaḍḍhanacchāyā dissati. Attano aṇumahantabhāvāpādane upādinnakassa hāpanaṃ viya vaḍḍhanampi labbhateva. Yathā āyasmato **mahāmoggallānassa nandopanandadamaneti** evaṃ pavattaṃ saha vatthunā theravādaṃ āharitvā tamatthaṃ dassetuṃ “**tipiṭakacūlanāgatthero āhā**”ti-ādi āraddham. **Kim pana na hoti**, hotiyevāti adhippāyo. Dve hi

1. Khu 9. 386 piṭṭhe Paṭisambhidāmagge.

paṭisedhā pakatim̄ gamentīti. **“Tadā mahantaṁ hoti mahāmoggallānattherassa viyā”**ti idaṁ yathādhikatatthadassanavasena vuttaṁ, khuddakabhāvāpādanampettha labbhateva.

Nandopanandanāgadamanakathāvaṇṇanā

Olokesi buddhāciṇṇavasena “atthi nu kho assa upanissayo”ti. Lokiyam̄ ratanattaye pasādalakkhaṇam̄ sāsanaṅvatāram̄ sandhāyāha **“appasanno”**ti. Micchādīṭṭhito vivecetvā pasādetabboti adhippāyo. Tenāha **“ko nu kho -pa-viveceyyā”**ti.

Tam̄ divasanti yadā bhagavā bhikkhusam̄ghaparivuto tāvatimsabhavanābhimukho gacchati, tam̄ divasabhāgam̄. **Āpānabhūmim̄ sajjayimsūti** yattha so nisinno bhojanakiccaṁ karoti, tam̄ parivesanaṭṭhānam̄ sittam̄ sammaṭṭham̄ bhojanūpakaraṇūpanayanādinā sajjayimsu paṭiyādesum̄. **Tividhanātakehīti** vadhūkumārīkaññāvattāhi tividhāhi nātakitthīhi. **Olokayamānoti** pekkhanto, vicārento vā.

Uparūparīti matthakamatthake. **Bhavanenāti** bhavanapadesena. **Bhogeḥīti** sarīrabhogeḥi. **Avakujjenāti** nikujjitena. **Gahetvāti** yathā tāvatimsabhavanassa padesopi nāvasissati, evam̄ pariyādāya.

Sineruparibhaṇḍanti sinerumekhalaṁ. Sinerussa kira samantato bahalato, puthulato ca pañcayojanasahassaparimāṇāni cattāri paribhaṇḍāni tāvatimsabhavanassa ārakkhāya nāgehi, garuḷehi, kumbhaṇḍehi, yakkhehi ca adhiṭṭhitāni, tāni paribhaṇḍabhāvasāmaññena ekajjham̄ katvā “paribhaṇḍan”ti vuttaṁ. Tehi kira sinerussa upaḍḍham̄ pariyādinnaṁ.

Attabhāvam̄ vijahitvāti manussarūpaṁ antaradhāpetvā. **Bādhatīti** khedamattaṁ uppādeti.

Attabhāvam̄ vijahitvāti sukhumattabhāvanimmānena nāgarūpaṁ vijahitvā. **Mukham̄ vivari** “mukhagataṁ samaṇam̄ samkhādissāmī”ti. **Pācīnena ca pacchimena cāti** nāgassa tathānipannattā vuttaṁ. Suṭṭhu satiyā paccupaṭṭhāpanatthamāha **“manasi karohī”**ti.

Ādito paṭṭhāya sabbapāṭihāriyānīti tadā therena katapāṭihāriyāni sandhāya vuttam. **Imam pana ṭhānanti** imam nāsāvātavissajjanakāraṇam.

Anubandhī “na sakkā evaṃmahiddhikassa imassa samaṇassa paṭipaharitun”¹ bhayena palāyantam anubandhi.

Ekapaṭipāṭiyāti ekāya paṭipāṭiyā, nirantaranti attho. **Ayamevā**ti yā upādinnakam nissāya anupādinnakassa vaḍḍhi, ayameva. **Ettha** edise hatthavaḍḍhanādipāṭihāriye **yutti** yuttarūpā cittato, ututo vā upādinnakarūpānam anuppajjanato. Atha vā **upādinnanti** sakalameva indriyabaddham adhippetam. Evampi tassa tathā vaḍḍhi na yujjati evāti vuttanayeneva vaḍḍhi veditabbā. Ekasantāne upādinnam, anupādinnaṅca sambhinnam viya pavattamānampi atthato asambhinnameva. Tattha yathā āḷhakamatte khīre ānekāḷhake udake āsitte yadipi khīram sabbena sambhinnam sabbatthakameva lambamānam hutvā tiṭṭhati, tathāpi na tattha khīram vaḍḍhati, udakameva vaḍḍhati, evamevam yadipi upādinnam anupādinnaṅca sambhinnam viya pavattati, tathāpi upādinnam na vaḍḍhati, iddhānubhāvena cittajam, tadanusārena utujaṅca vaḍḍhatīti daṭṭhabbam.

Soti so iddhimā. **Evaṃ katvā**ti vuttākārena hattham vā vaḍḍhetvā te vā āgantvā hatthapāse ṭhite katvā. Pādaṭṭhapanādipi vuttanayeneva veditabbam. **Aparopi** iddhimā. **Tathevā**ti pāṭihāriyakaraṇato pubbe viya. **Tathūpamametanti** yathā udakapuṇṇāsu nānāpātīsu bahūhi nānācandamaṇḍalesu dissamānesu na tena candamaṇḍalassa gamanādi-uparodho, bahūnaṅca paccekam dassanam ijjhati, tathūpamametam pāṭihāriyam candimasūriyānam gamanādi-uparodhābhāvato, bahūnaṅca iddhimantānam tattha iddhipayogassa yathicchitam samijjhanatoti adhippāyo.

397. **Paricchedam katvā**ti abhividhivasena pana paricchedam katvā, na mariyādasena. Tathā hesa brahmaloke attano kāyena vasam vatteti. **Paḷī**ti paṭisambhidāmaggaṭṭhi.

Yāva brahmalokāpi kāyena vasam vattetiti ettha yasmā na brahmalokasseva gamanam adhippetam, nāpi brahmalokassa gamanameva, atha

1. Paṭipharitunti (Sī, Syā)

kho aññathā aññampi. **Yāva brahmalokā**ti pana dūrāvadhini dassanametaṃ, tasmā “sace brahmalokaṃ gantukāmā hotī”ti vatvāpi itarampi dassetuṃ “**santikepi dūre adhiṭṭhātī**”ti-ādi vuttam. Tattha **pi**-saddo samuccayattho, tena vuttāvasesassa adhiṭṭhāniddhiyā nipphādetabbassa sabbassāpi saṅgaho, na vuttassevāti daṭṭhabbaṃ.

Yamakapāṭihāriyāvasāneti-ādinā tivikkamassa adhiṭṭhāniddhinipphannatā vuttā, aññattha pana lakkhaṇānisamsatā. Tadubhayaṃ yathā aññamaññaṃ na virujjhati, tathā vicāretvā gahetabbam.

Nilamātikanti nilavaṇṇodakamātikam.

Mahābodhinti aparājītapallaṅkaṃ mahābodhim. **Citte uppanne santike akāsī**ti tathā cittupattisamanantameva pathaviṃ, samuddaṅca saṃkhipitvā mahābodhisantike akāsi.

Nakkhattadivaseti mahadivase. **Candapūveti** candasadise candamaṇḍalākāre pūve. **Ekapattapūramattamakāsī**ti yathā te pamāṇato sarūpeneva antopattapariyāpannā honti, tathā akāsi.

Kākavaliyavattusmiṅca “bhagavā thokaṃ bahuṃ akāsī”ti ānetvā sambandhitabbam. Taṃ pana vutthuṃ saṅkhepatova dassetuṃ “**mahākassapatthero kirā**”ti-ādi vuttam. **Samāpattiyāti** nirodhasamāpattiyā.

Gaṅgāṭireti tambapaṇṇidīpe gaṅgānadiyā tīre. **Saññaṃ adāsī**ti yathā te yathādhiṭṭhitam sappiṃ passanti, tathā saññaṃ adāsi.

Tassāti yassa brahmuno rūpaṃ daṭṭhukāmo, tassa brahmuno rūpaṃ passati. **Saddaṃ suṇātī**ti dibbāya sotadhātuyā brahmuno saddaṃ suṇāti. **Cittaṃ pajānātī**ti cetopariyāññaṇena brahmuno cittaṃ pajānāti. **Karajakāyassa vasenāti** cātumahābhūtikarūpakāyassa vasena. “Cittaṃ pariṇāmetī”ti ettha kiṃ taṃ cittaṃ, kathaṃ vā pariṇāmananti āha “**pādakajjhānacittaṃ gahetvā kāye āropetī**”ti. Kathaṃ pana kāye āropetīti āha “**kāyānugatikaṃ karotī**”ti. Evampi saddadandharovāyanti¹ vacanapathaṃ pacchindanto āha “**dandhagamanan**”ti.

1. Saddadaddarovāyanti (Sī), sadde gandhe theravāyanti (katthaci) kiṃ nu kho dandhagamanam janeti, dandhagamanovāyanti (Ka)

Karotīti sambandho. **Kāyagamanam hi dandham**, dandhamahābhūtapaccayattāti adhippāyo. Ayañhettha attho—dissamānena kāyena gantukāmatāya vasena cittaṃ pariṇāmento yogī pādakajjhānam samāpajjitvā vuṭṭhāya “idaṃ cittaṃ kāyo viya dandhagamanam hotū”ti parikammaṃ karoti. Tathā parikammakaraṇam hi sandhāya “pādakajjhānacittaṃ gahetvā”ti vuttam. Parikammaṃ pana katvā puna samāpajjitvā ñāṇena adhiṭṭhahanto taṃ cittaṃ kāye āropeti, kāyānugatikam dandhagamanam karoti.

Sukhasaññanti sukhasahagatam saññam, saññāsīsenā niddeso. Lahubhāvena saññātanti **lahusaññam**. Katham pana iddhicittena saha sukhasaññāya sambhavoti āha “**sukhasaññā nāma upekkhāsampayuttā saññā**”ti. Sukhanti saññātanti vā **sukhasaññam**. Tenevāha “**upekkhā hi santam sukhanti vuttā**”ti. Ekantagarukehi nīvaraṇehi, oḷārikehi anupasantasabhāvehi ca vitakkādīhi vippayogo cittacetāsikānam lahubbhāvassa karaṇanti dassento āha “**sāyeva -pa- veditabbā**”ti. Tam **okkantassāti** tam sukhalahusaññam anuppattassa. **Assāti** yogino. **Gantukāmatā eva ettha pamāṇanti** ettha etasmim dissamānena kāyena gamane yaṃ ṭhānam gantukāmo, tam uddissa gantukāmatāvasena pavattaparikkammādhiṭṭhānāni eva pamāṇam, tāvatā gamanam ijhati. Tasmā magganimmānavāyu-adhiṭṭhānehi vināpi icchitadesappatti hotīti. Idāni tamevattham pākaṭataram kātuṃ “**sati hī**”ti-ādi vuttam.

Kāyam gahetvāti karajakāyam ārammaṇakaraṇavasena parikkammacittena gahetvā. **Citte āropetīti** “ayam kāyo idaṃ cittaṃ viya hotū”ti pādakajjhānacitte āropeti taggatikam karoti. Tenāha “**cittānugatikam karoti sīghagamanam**”ti. **Cittagamananti** cittappavattimāha. **Idam pana** cittavasena kāyapariṇāmanapāṭihāriyam. **Cittagamanamevāti** cittaṃ samānagamanameva. Katham pana kāyo dandhappavattiko lahuparivattinā cittaṃ samānagatiko hotīti? Na sabbathā samānagatiko. Yatheva hi kāyavasena cittapariṇāmane cittaṃ sabbathā kāyena samanagatikam na hoti. Na hi tadā cittaṃ sabhāvasiddhena attano khaṇena avattitvā garuvuttikassa rūpadhammassa khaṇena vattati. “Idam cittaṃ ayam kāyo viya hotū”ti pana

adhiṭṭhānena dandhagatikassa kāyassa anuvattanato yāva icchitaṭṭhānappatti,
tāva kāyagati-anulomeneva hutvā santānavasena pavattamānaṃ cittaṃ
kāyagatiyā pariṇāmitaṃ nāma hoti, evaṃ “ayaṃ kāyo idaṃ cittaṃ viya
hotū”ti adhiṭṭhānena pageva sukhalahusaññāya sampādītattā
abhāvitiddhipādānaṃ viya dandhaṃ avattitvā yathā
lahukatipayacittavāreheva icchitaṭṭhānappatti hoti, evaṃ pavattamāno kāyo
cittagatiyā pariṇāmito nāma hoti, na ekacittakkhaṇeneva
icchitaṭṭhānappattiyā.

Evañca katvā “seyyathāpi nāma balavā puriso samiñjitaṃ vā bāhaṃ
pasāreyya, pasāritaṃ vā bāhaṃ samiñjeyyā”ti idampi upamāvacanaṃ
nippariyāyeneva samatthitaṃ hoti. Avassaṃ cetāṃ evaṃ
sampaṭicchitabbaṃ, aññāthā suttātidhammapāṭhehi, vinaya-aṭṭhakathāya ca
virodho siyā, dhammatā ca vilomitā. “Nāhaṃ bhikkhave aññaṃ
ekadhammampi”ti¹ hi ettha aññagahaṇena rūpadhammā gahitā
alahuparivattitāya. Abhidhamme² ca purejātapaccayo rūpameva vutto,
pacchājātapaccayo ca tasseva. Yattha yattha ca dhammā uppajanti, tattha
tattheva bhijjanti. Natthi desantarasaṅkamaṇaṃ, na ca sabhāvo aññāthā
hotīti. Na hi iddhibalena dhammānaṃ kenaci lakkhaṇaṃ aññāthattaṃ kātuṃ
sakkā, bhāvāññāthattameva pana kātuṃ sakkā. “**Tisupi khaṇesū**”ti idampi
gamanārambhaṃ sandhāya vuttaṃ, na gamananiṭṭhānanti vadanti. **Theroti**
aṭṭhakathācariyānaṃ antare eko thero. **Idhāti** idaṃ pāṭihāriyaṃ vibhajitvā
vuttapāṭhe. **Sayam gamanameva āgataṃ** “brahmalokaṃ gacchatī”ti vuttattā.

Cakkhusotādīnanti cakkhusotādīnaṃ aṅgānaṃ. Tathā hi vuttaṃ
“sabbaṅgapaccaṅgaṇaṃ”ti, sabba-aṅgapaccaṅgavantanti attho. **Pasādo nāma**
natthīti imināva³ bhāvajīvitindriyānaṃpi abhāvo vuttoti daṭṭhabbaṃ.
Rucivasenāti icchāvasena. **Aññāmpīti** bhagavatā kariyamānato aññāmpī
kiriyaṃ karoti. Ayañcettha buddhānubhāvo. Yadi sāvakanimmītesu
nānappakāratā natthi, “sace pana nānāvaṇṇe kātukāmo hotī”ti-ādī yaṃ
heṭṭhā vuttaṃ, taṃ kathanti? Taṃ tathā tathā parikammaṃ katvā
adhiṭṭhahantassa te te vaṇṇavayādivisesā parikammānurūpaṃ ijjhantīti katvā
vuttaṃ. Idha pana yathādhiṭṭhite nimmitarūpe, sace sāvako “ime visesā

1. Am 1. 3, 4 piṭṭhādīsu.

2. Abhi 8. 6 piṭṭhādīsu.

3. Iminā ca (Syā)

hontū”ti icchati, na ijjhati, buddhānaṃ pana ijjhātīti ayamattho dassitoti na koci virodho.

Idāni yāni tāni “yāva brahmalokāpi kāyena vasaṃ vatteti”ti pāḷiyā atthadassanavasena vibhattāni “dūrepi santike adhiṭṭhātī”ti-ādīni¹ cuddasa pāṭihāriyāni, tattha sikhāpattāṃ kāyena vasavattanapāṭi hāriyaṃ dassetuṃ “**ettha cā**”ti-ādi āradhāṃ. Tattha yanti kiriyāparāmasanaṃ, tena “**rūpaṃ passati**”ti ettha yadetaṃ rūpadassanaṃ, “**saddaṃ suṇāti**”ti ettha yadetaṃ saddasavanaṃ, “**cittaṃ pajānāti**”ti ettha yadetaṃ cittajānananti evaṃ dibbacakkhusotacetopariyaññakattukaṃ dassanasavanaajānanakiriyaṃ parāmasatīti daṭṭhabbaṃ. Ito paresu **santiṭṭhatī**ti-ādīsupi eseva nayo **yampissāti** yampi assa. Yogino adhiṭṭhānanti sambandho. **Yañca khoti ettha kho**-saddo āvadhāraṇattho, visesattho vā, tena ayamevettha kāyena vasavattanapāṭihāriyesu ukkaṭṭhataranti dīpeti. Kasmā? “Ayaṃ nu kho iddhiṃ, ayaṃ nu kho nimmito”ti ekaccassa brahmuno āsaṅkuppādanato. Yadaggena cetāṃ adhiṭṭhitāṃ visesato manomayanti vuccati tadaggena ukkaṭṭhataranti veditabbaṃ. Tenāha “**ettāvatā kāyena vasaṃ vatteti nāma**”ti. Yadi evaṃ kasmā idha sesāni gahitānīti āha “**sesaṃ -pa- vuttan**”ti.

398. **Idaṃ nānākaraṇanti** kāmamimāpi dve iddhiyo adhiṭṭhānavaseneva ijjhanti, tathāpi idaṃ idāni vuccamānaṃ imāsaṃ nānākaraṇaṃ viseso **pakativaṇṇaṃ vijahitvā**ti attano pakatirūpaṃ vijahitvā apanetvā paresaṃ adassetvāti attho. **Kumārakavaṇṇanti** kumārakasaṇṭhānaṃ **dasseti**ti tathā vikubbanto attani dasseti. **Nāgavaṇṇaṃ vā**ti-ādīsupi eseva nayo. **Hatthimpi dasseti**ti attānampi hatthiṃ katvā dasseti, bahiddhāpi hatthiṃ dasseti. Etadatthameva hi idha “hatthivaṇṇaṃ vā dasseti”ti avatvā “hatthimpi dasseti”ti² vuttaṃ. Yaṃ pana keci bahiddhā hatthi-ādīdassanavacanaṃ “pakativaṇṇaṃ vijahitvā”ti vacanena vikubbaniddhibhāvena virujjhatīti vadanti, tadayuttaṃ. Kasmā? Pakativaṇṇavijahanaṃ nāma attano pakatirūpassa aññesaṃ adassanaṃ, na sabbena sabbāṃ tassa nirodhanaṃ. Evaṃ sati attānaṃ adassetvā bahiddhā hatthiṃ dassento “pakativaṇṇaṃ vijahitvā hatthiṃ

1. Khu 9. 385 piṭṭhe Paṭisambhidāmagge. 2. Khu 9. 388 piṭṭhe Paṭisambhidāmagge.

dassetī”ti vuccamāne ko ettha virodho, attanā pana hatthivaṇṇo hutvā bahiddhāpi hatthim dassante vattabbameva natthi. Tenevāha “bahiddhāpi hatthi-ādidassanavasena vuttan”ti. Evañca katvā vikubbaniddhibhāvena ca na koci virodho.

Pāliyañca **kumārakavaṇṇam vāti**-ādīsu aniyamattho vā-saddo vutto. Tesu ekekasēva karaṇadassanattham. **Hatthimpīti**-ādīsu pana hatthi-ādīnam bahūnam ekajjham kātabbābhāvadassanattham samuccayattho pi-saddo vutto. Tena “hatthimpi dassetī”ti-ādīsu ditiye vuttanayeneva attho gahetabbo.

Iddhimato attano kumārakākārena paresam dassanam kumārakavaṇṇanimmanam, na ettha kiñci apubbam pathavī-ādivatthu nipphādīyatīti kasiṇaniyamena payoanābhāvato “**pathavīkasiṇādīsu aññatarārammaṇato**”ti vuttam. Satipi vā vatthunipphādane yathāraham tam pathavīkasiṇādivaseneva ijjatīti evampettha kasiṇaniyamena payoanam nattheva. Kumārakavaṇṇaṇhi dassentena nīlavaṇṇam vā dassetabbam siyā, pītādīsu aññataravaṇṇam vā. Tathā sati nīlādīkasiṇāni samāpajjitabbānīti āpannova kasiṇaniyamo. Eseva nayo sesesupi. Evamadhiṭṭhite¹ yadeke pathavīkasiṇavasena “ekopi hutvā bahudhā hotī”ti-ādī² bhāvoti evam pavattena kasiṇaniddesena idha vikubbaniddhiniddese “pathavīkasiṇādīsu aññatarārammaṇato”ti-ādivacanassa virodham āsaṅkanti, so anokāsovāti daṭṭhabbam. Nimminitabbabhāvena attanā icchitoti **attano kumārakavaṇṇo**, na pana attano daharakāle kumārakavaṇṇoti. **Nāgā**divaṇḍesupi ayaṁ nayo byāpī evāti yadeke “nāgādinimmāne na yujjati viyā”ti vadanti, tadapohatam daṭṭhabbam.

Bahiddhāpīti pi-saddena ajjhataṁ sampiṇḍeti. Ayañhettha attho— **hatthimpi dassetīti**-ādi ajjhataṁ, bahiddhāpi hatthi-ādidassanavasena vuttam, “kumārakavaṇṇam vā”ti-ādi viya ajjhataṁ kumārakavaṇṇādīnam dassanavasenāti. Yaṁ ettha vattabbam adhiṭṭhānavimānam, tam heṭṭhā vuttameva.

1. Evamavaṭṭhite (Syā, Ka) 2. Dī 1. 73; Ma 1. 98; Saṁ 3. 251; Khu 9. 385 piṭṭhādīsu.

399. **Kāyanti** attano karajakāyaṃ. **Vuttanayenevāti** “ayaṃ kāyo susiro hotū”ti parikkammaṃ katvā puna “pāḍakajjhānaṃ samāpajjitvā vuṭṭhāyā”ti imaṃ heṭṭhā vuttanayānusāramāha. **Aññaṃ kāyanti** yaṃ manomayaṃ kāyaṃ nimminitukāmo, taṃ. **Muñjamhāti** muñjatiṇato. **Īsikanti** tassa kaṇḍaṃ. **Kosiyāti** asikosato. **Karaṇḍāyāti** peḷāya, nimmokatoti ca vadanti. **Abbāhatīti** uddharati. **Pavāheyyāti** ākaḍḍheyya.

Iddhividhaniddesavaṇṇanā niṭṭhitā.

Iti dvādasamaparicchedavaṇṇanā.

13. Abhiññāniddesavaṇṇanā

Dibbasotadhātukathāvaṇṇanā

400. **Tatthā**ti dibbasotadhātuyā niddese. Abhiññāpāḷiyā hi niddesamukhena abhiññānaṃ nibbattanavidhi vidhīyati. Abhiññāsīsenettha abhiññāpāḷi vuttā. Tenāha “**tato parāsu ca tīsu abhiññāsū**”ti. **Tato parāsū**ti ca sathuno desanākkamaṃ, attano ca uddesakkamaṃ, sandhāya vuttaṃ, na paṭipattikkamaṃ. Na hi paṭipajjantā imināva kamena paṭipajjanti.

Sabbatthāti dibbasotadhātupāḷiyam sesābhiññāpāḷiyañcāti sabbattha. **Tatrā**ti vākyopaññāse nipātamattaṃ, **tatra** vā yathāvuttapāṭhe. **Dibbasadisattā**ti dibbe bhavāti dibbā, devānaṃ sotadhātu, tāya dibbāya sadisattā. Idāni taṃ dibbasadisataṃ vibhāvetuṃ “**devānaṃ hī**”ti-ādi vuttaṃ. Tattha **sucaritakammanibbattā**ti

saddhābahulatāvisuddhadiṭṭhitānisamsadassāvitādisampattiyā suṭṭhu caritattā sucaritena devūpapattijanakena puññakammena nibbattā.

Pittasemharuhirādihīti ādi-saddena vātarogādīnaṃ saṅgaho. **Apalibuddhā**ti anupaddutā. Pittādihī anupaddutattā, kammaṃ ca uḷāratāya **upakkilesavimutti** veditabbā. Upakkilesadosarahitaṃ hi kammaṃ tiṇḍādidosarahitaṃ viya sassam uḷāraphalaṃ anupakkilīṭṭhaṃ hoti. Kāraṇūpacārena cassa phalaṃ tathā voharīyati, yathā “sukkaṃ sukkavipākaṃ”ti¹. **Dūrepi** pi-saddena sukhumassāpi ārammaṇassa sampaṭicchanasamatthataṃ saṅgaṇhāti. **Pasādasotadhātū**ti catumahābhūtānaṃ pasādalakkhaṇā sotadhātu.

Vīriyārambhavaseneva ijjanato sabbāpi kusalabhāvanā vīriyabhāvanā, padhānasāṅkhārasamannāgatā vā iddhipādabhāvanāpi visesato vīriyabhāvanā, tassā ānubhāvena nibbattā **vīriyabhāvanābalanibbattā**. Ñāṇamayā sotadhātu ñāṇasotadhātu. **Tādisāyevā**ti upakkilesavimuttatāya, dūrepi sukhumassāpi ārammaṇassa sampaṭicchanasamatthatāya ca taṃsadisā eva. **Dibbavīhārasena paṭiladdhattā**ti dibbavīhārasāṅkhātānaṃ catunnaṃ bhūmīnaṃ vasena paṭiladdhattā, iminā kāraṇavasenañcā dibbabhāvamāha. Yaṃ cettha vattabbaṃ, taṃ heṭṭhā vuttameva.

1. Dī 3. 192; Ma 2. 25; Am 1. 553 piṭṭhesu.

Dibbavīhārasannissittāti aṭṭhaṅgasamannāgamena¹ ukkaṃsagataṃ pādakajjhānasāṅkhātaṃ dibbavīhāraṃ sannissāya pavattattā, dibbavīhārapariyāpannaṃ vā attanā sampayuttaṃ rūpāvacaracattutthajjhānaṃ nissayapaccayabhūtaṃ sannissittāti evampettha attho daṭṭhabbo.

Savanaṭṭhenati saddagahaṇaṭṭhena. Yāthāvato hi saddūpaladdhi saddasabhāvāvabodho savanaṃ. Santesupi aññesu sabhāvadhāraṇādīsu dhātu-atthesu attasuññatāsandassanattā satthu dhātudesanāti āha “**nijjīvattṭhena cā**”ti. **Sotadhātukiccaṃ** saddasampaticchanāṃ, saddasanniṭṭhānapaccayā ca.

Ñāṇassa parisuddhi upakkilesavigamenevāti āha “**nirupakkilesāyā**”ti. **Mānusikā** manussa santakā, maṃsasotadhātu, dibbavidūrādivisayaggahaṇasāṅkhātena attano kiccavisesena atikkantaṃ mānusikaṃ etāyāti **atikkantamānusikā**. Tenāha “**manussūpacāraṃ atikkamivā saddasavenenā**”ti. Tattha **manussūpacāranti** manussehi upacaritabbattṭhānaṃ pakatiyā sotadvārena gahetabbaṃ visayanti adhippāyo. Tenāha “**saddasavenenā**”ti. **Dibbeti** devalokapariyāpanne. Te pana visesato devānaṃ kathā saddā honṭīti āha “**devānaṃ sadde**”ti. Manussānaṃ eteti mānusa, te **mānuse**. Evaṃ devamanussasaddānaṃyeva gahittā vuttaṃ “**padesapariyādānaṃ**”ti, ekadesaggahaṇanti attho. **Sadehasannissitā** attano sarīre sannissitā. **Nippadesapariyādānaṃ** ṭhānabhedaggahaṇamukhena saviññāṇakādibhedabhinnassa saddassa anavasesena saṅgaṇhanato.

Ayaṃ dibbasotadhātu. **Parikkammamādhicittenti** parikkammabhūtaveṇikasamādhicittena, dibbasotañāṇassa parikkammavasena pavattakkhaṇikasamādhinā samāhitacittenti attho. **Parikkammamādhinā** nāma dibbasotadhātuyā upacārāvatthātipi vadanti. Sā pana nānāvajjanavasena vuttāti daṭṭhabbā. Sabboḷārikasaddadassanattānaṃ sīhādīnaṃ saddo paṭhamaṃ gahito. Tiyojanamattakepi kira kesarasīhassa sīhanāda-saddo suyati. **Ādi**-saddena meghasaddabyagghasaddādīnaṃ saṅgaho daṭṭhabbo. Ettha ca yathā oḷārikasaddāvajjanaṃ yāvadeva sukhumasaddāvajjanūpāyadassanattānaṃ, hathā saddaggahaṇabhāvanābalena sukhumatarasaddaggahaṇasamsiddhito.

1. Dī 1. 76, 77; Ma 1. 314, 315, 346, 347; Vi 1. 5 piṭṭhādīsu.

Evam āsannasaddaggaṇānusāreṇa dūrādūratarasaddaggaṇampi samijjhatīti dassetuṃ “**puratthimāya disāyā**”ti-ādinā disāsambandhavasena saddānaṃ manasikāravidhi āradhho. Tattha **saddanimittanti** ñāṇupattihetubhāvato saddo eva saddanimittaṃ, yo vā yathāvutto upādāyupādāya labbhamano saddānaṃ oḷārikasukhumākāro, taṃ saddanimittaṃ. Tenevāha “**saddānaṃ saddanimittan**”ti. Yaṃ pana vuttaṃ “**oḷārikānampi sukhumānampi saddānaṃ saddanimittaṃ manasi kātabban**”ti, taṃ oḷārikasukhumasammatesupi oḷārikasukhumasabbhāvadassanattamaṃ. Tañca sabbaṃ sukhome ñāṇaparicayadassanattamaṃ daṭṭhabbaṃ. Saddanimittassa apaccuppannasabhāvattā “saddova saddanimittan”ti ayameva pakkho ñāyāgatoti keci, taṃ na oḷārikasukhumānaṃ saddānaṃ vaṇṇārammaṇena ñāṇena nilapītādivaṇṇānaṃ viya tattheva gahetabbato. Oḷārikasukhumabhāvo cettha saddanimittanti adhippetanti. **Tassāti** yathāvuttena vidhinā paṭipajjantassa yogino. **Te saddāti** ye sabboḷārikato pabhuti āvajjantassa anukkamena sukhumasukhumā saddā¹ āvajjitā, te. **Pākatikacittassāpīti** pādakajjhānasamāpajjanato pubbe pavattacittassāpī. **Parikammasamādhicittassāti** dibbasotadhātuyā uppādanattaṃ pādakajjhānaṃ samāpajjitvā vuṭṭhitassa saddaṃ ārabha parikammakaraṇavasena pavattakkhaṇikasamādhicittassa. Pubbepi ñāṇena parimadditattā ativiya pākaṭā hotīti sambandho.

Tesu saddesūti ye parikammaṃ visayadassanattamaṃ bahū saddā vuttā, tesu saddesu. **Aññataranti** yatthassa parikammakaraṇavasena abhiññaṃ manasikāro pavatto, taṃ ekaṃ saddaṃ. **Tato paranti** tato appanuppattito paraṃ. **Tasmim sote**ti tasmim ñāṇasote. **Patito hotīti** dibbasotadhātu antogadhā hoti appanācittassa uppattito pabhuti dibbasotaññalābhī nāma hoti, na dānissa tadatthamaṃ bhāvanābhīyogo icchitabboti attho. **Tanti** dibbasotadhātum. **Thāmajātanti** jātathāmaṃ daḷhabhāvappattaṃ. **Vaḍḍhetabbaṃ** pādakajjhānārammaṇaṃ. Kinti kittakanti āha “**ettantare saddaṃ suñāmīti ekaṅgulamattaṃ paricchinditvā**”ti. Pādakajjhānassa hi ārammaṇabhūtaṃ kasiṇanimittaṃ “**ettakaṃ thānaṃ pharatū**”ti manasi karitvā pādakajjhānaṃ samāpajjantassa kasiṇanimittaṃ tattakaṃ thānaṃ pharitvā

1. Sukhumā saddā (Ka)

tiṭṭhati. So samāpattito vuṭṭhāya tattha gate sadde āvajjati, subhāvitabhāvanattā tattha aññataram saddam ārabha uppanāvajjanānantaram cattāri, pañca vā javanāni uppajjanti. Tesu pacchimam iddhicittam, itarassa punapi pādakajjhānam samāpajjitabbameva. Tato eva hi pādakajjhānārammaṇena phuṭṭhokāsabbhantaragatepi sadde suṇātiyevāti sāsaṅkam vadati. **Ekaṅguladvāṅgulā**diggahaṇaṅcetha sukhumasaddāpekkhāya kataṁ.

Evaṁ suṇantovā¹ti evaṁ paricchinditvā paricchinditvā savanena vasīkatābhīṅho hutvā yathāvajjite sadde suṇanto eva. **Pāṭiyekanti** ekajjhaṁ pavattamānepi te sadde paccekaṁ vatthubhedena vavatthapetukāmatāya sati.

Dibbasotadhātukathāvaṇṇanā niṭṭhitā.

Cetopariyañānakathāvaṇṇanā

401. **Pariyāṭīti** sarāgādivibhāgena paricchiṇṇa jānāti. Tenāha “**paricchindatīti attho**”ti. Yesaṅhi dhātūnam gati attho, buddhipi tesam attho. “Parasattānan”ti ettha para-saddo aññatthoti āha “**attānam ṭhapetvā sesasattānan**”ti, yathā hi² yo paro na hoti, so attā. Yo attā na hoti, so paroti. **Sattānanti** cetha rūpādīsu satthāti sattā. Tassā pana paññattiyā saviññāṇakasantāne nirulhattā nicchandarāgāpi sattātveva vuccanti, bhūtapubbagatiyā vā. “Pun”ti narakaṁ. Tattha galanti papatantīti **puggalā**, pāpakārino. Itarepi saṁsāre saṁsārino taṁsabhāvānātivattanato puggalātveva vuccanti. Taṁtaṁsattanikāyassa vā tattha tattha upapattiyā pūraṇato, aniccatā vasena galanato ca **puggalā**ti neruttā.

Etañhīti ettha hi-saddo hetu attho. Yasmā “etaṁ cetopariyañānam dibbacakkuñānavasena ijjhatī”ti taṁ dibbacakkuñānam, **etassa** cetopariyañānassa uppādane **parikammaṁ**, tasmā tena cetopariyañānam uppādetukāmena adhigatadibbacakkuñānena bhikkhunāti evaṁ yojanā

1. Evaṁ suṇanto ca (Ka)

2. Tathā hi (Ka)

kātabbā. **Hadayarūpanti** na hadayavatthu, atha kho hadayamaṁsapesi. Yaṁ bahi kamalamakuḷasaṅṭhānaṁ, anto kosātakīphalasadisanti vuccati, tañhi nissāya dāni vuccamānaṁ lohitaṁ tiṭṭhati. Hadayavatthu pana imaṁ lohitaṁ nissāya pavattatīti. Kathaṁ pana dibbacakkhunā lohitaṁ vaṇṇadassanena arūpaṁ cittaṁ pariyesatīti āha “**yadā hī**”ti-ādi. Kathaṁ pana somanassasahagatādicittavuttiyā kammajassa lohitaṁ vividhavaṇṇabhāvāpattīti? Ko vā evamāha “kammajameva taṁ lohitaṁ”ti catusantatirūpassāpi tattha labbhamānattā. Tenevāha “**idam rūpaṁ somanassindriyasamuṭṭhānaṁ**”ti-ādi. Evampi yaṁ tattha acittajaṁ, tassa yathāvuttavaṇṇabhedena na bhavitabbanti? Bhavitabbaṁ sesatisantatirūpaṇaṁ tadanuvattanato. Yathā hi gamanādīsu cittajarūpāni utukammāhārasamuṭṭhānarūpehi anuvattiyanti, aññathā kāyassa desantaruppattiyeva na siyā, evamidhāpi cittajarūpaṁ sesatisantatirūpāni anuvattamānāni pavattanti. Pasādakodhavelāsu cakkhussa vaṇṇabhedāpattiyeva ca tadatthassa nidassanaṁ daṭṭhabbaṁ.

Pariyesantenāti paṭhamāṁ tāva anumānato ñāṇaṁ pesetvā gavesantena. Cetopariyaññāṇaṁhi uppādetukāmena yoginā heṭṭhā vuttanayena rūpāvacaracattutthajjhānaṁ aṭṭhaṅgasamannāgataṁ abhinihārakkhamaṁ katvā dibbacakkuññāṇassa lābhī samāno ālokaṁ vaḍḍhetvā dibbena cakkhunā parassa hadayamaṁsapesiṁ nissāya pavattamānassa lohitaṁ vaṇṇadassanena “idāni imassa cittaṁsomanassasahagataṁ”ti vā “domanassasahagataṁ”ti vā “upekkhāsahagataṁ”ti vā nayaggāhavasenapi vavatthapetvā pādakajjhānaṁ samāpajjitvā vuṭṭhāya “imassa cittaṁ jānāmī”ti parikammaṁ kātabbaṁ. Kālasatampi kālasahassampi punappunaṁ pādakajjhānaṁ samāpajjitvā vuṭṭhāya tatheva paṭipajjitabbaṁ. Tassevaṁ dibbacakkhunā hadayalohitavaṇṇadassanādividhinā paṭipajjantassa idāni cetopariyaññāṇaṁ uppajjissatīti yaṁ tadā pavattatīti vavatthāpitaṁ cittaṁ, taṁ ārammaṇaṁ katvā manodvārāvajjanaṁ uppajjati, tasmim̐ niruddhe cattāri, pañca vā javanāni javanti. Tesāṁ purimāni tīni, cattāri vā parikammādisamaññāni kāmāvacarāni, catutthaṁ, pañcamaṁ vā appanācittaṁ rūpāvacaracattutthajjhānikaṁ. Tattha yaṁ antena appanācittena saddhiṁ uppannaṁ ñāṇaṁ, idaṁ **cetopariyaññāṇaṁ**. Tañhi yathānena parikammaṁ kataṁ, taṁ parassa cittaṁ paccakkhato paṭivijjhantaṁ vibhāventameva

hutvā pavattati rūpaṃ viya ca dibbacakkhuññaṃ, saddaṃ viya ca dibbasotaññaṃ. Tato paraṃ pana kāmāvacaracittehi sarāgādivavatthāpanaṃ hoti nilādivavatthāpanaṃ viya. Evamadhigatassa pana cetopariyaññaṃssa thāmagamanavidhānampi adhigamanavidhānasadisamevāti taṃ dassetuṃ “**tasmā tena -pa-thāmagataṃ kātabban**”ti vuttaṃ.

Evam thāmagate hīti-ādi thāmagatānisaṃsadassanaṃ. **Sabbampi kāmāvacaracittanti** catupaṇṇāsavidhampi kāmāvacaracittaṃ. “**Sabbampi**”ti padaṃ “rūpāvacarārūpāvacaracittan”ti etthāpi ānetvā sambandhitabbaṃ. Tena pañcadasavidhampi rūpāvacaracittaṃ, dvādasavidhampi arūpāvacaracittanti vuttaṃ hoti. **Pajānāti**ti sarāgādipakārehi jānāti, paccakkhato paṭivijjhatīti adhippāyo. Puthujjanavasenaṃ abhiññākathāti lokuttaraṃ cittaṃ idha anuddhaṃ. Tampi hi uparimo, sadiso vā ariyo heṭṭhimassa, sadisassa ca cittampi pajānāti eva. Tenāha “**anuttaraṃ vā cittaṃ**”ti-ādi. **Saṅkamantoti** ñāṇena upasaṅkamanto. Ekaccañhi cittaṃ ñatvā parikkammaṃ vinā tadaññaṃ cittaṃ jānanto “**cittā cittaṃ saṅkamanto**”ti vutto. Tenāha “**vināpi hadayarūpadassanena**”ti. Hadayarūpadassanādividhānaṃ hi ādikammikavasena vuttaṃ. Tenāha “**vuttampi cetan**”ti-ādi. **Yattha katthacīti** pañcavokārabhave, catuvokārabhavepi vā. Na kato abhiññānuyogasaṅkhāto abhiniveso etenāti **akatābhiniveso**, tassa, ādikammikassāti attho. **Ayaṃ kathāti** “ālokaṃ vaḍḍhetvā”ti-ādinā vuttaparikkammakathā.

Avasesanti vuttāvasesaṃ. Evam avibhāvena vuttaṃ vibhāgato dassetuṃ “**catubhūmakam kusalābyākataṃ cittaṃ vītarāgan**”ti āha. Tañhi yonisomanasikārappaccayataṃhetukatāhi rāgena sampayogāsaṅkābhāvato “vītarāgan”ti vattabbaṃ labhati. Sesākusalacittānaṃ rāgena sampayogābhāvato nattheva sarāgatā, taṃnimittakatāya pana siyā taṃsahitātālesoti nattheva vītarāgatāpīti dukavinimuttatāva yuttāti vuttaṃ “**imasmim duke saṅgahaṃ na gacchanti**”ti. Yadi evam padesikaṃ cetopariyaññaṃ āpajjatīti? Nāpajjati dukantarapariyāpannattā tesam. Ye pana “paṭipakkhabhāve asatipi sampayogābhāvo evettha pamāṇaṃ ekacca-abyākatānaṃ viyā”ti sesākusalacittānampi vītarāgataṃ

paṭijānanti, te sandhāyāha “**keci pana therā tānipi saṅgaṇhanti**”ti.
Sadosadukepi imināva nayena attho veditabbo.

Pāṭipuggalikanayenāti āveṇikanayena, tadaññākusalacittesu viya lobhadosehi amissitassa mohasseva sabbhāvatoti attho.
Akusalamūlasaṅkhātesu saha mohenevāti **samoharṃ** paṭhamanaye, dutiyanaye pana saheva mohenāti **samohanti** evaṃ uttarapurimapaḍāvadhāraṇato dvīsu nayesu bhedo veditabbo. Attanā sampayuttaṃ thinamiddhaṃ anuvattanavasena gataṃ pavattaṃ **thinamiddhānugataṃ** pañcavidhaṃ asaṅkhārikākusalacittaṃ **saṅkhittaṃ**, ārammaṇe saṅkocanavasena pavattanato. Vuttanayena **uddhaccānugataṃ** veditabbaṃ, taṃ pana uddhaccasahagataṃ cittaṃ, yattha vā uddhaccaṃ paccayavisesena thāmajātaṃ hutvā pavattati.
Kilesavikkhambhanasamatthatāya, vipulaphalatāya, dīghasantānatāya ca mahantabhāvaṃ gataṃ, mahantehi vā uḷāracchandavīriyacittapaññehi gataṃ paṭipannanti **mahaggataṃ**. **Avasesanti** paritta-appamāṇaṃ. Attānaṃ uttaritūṃ samatthehi saha uttarehīti **sa-uttaraṃ**. Uttaṇṇanti uttaraṃ, loke apariyāpannabhāvena lokato uttaranti **lokuttaraṃ**. Tato eva natthi etassa uttaranti **anuttaraṃ**. Upanijjhānalakkhaṇappattena samādhinā sammadeva āhitanti **samāhitaṃ**. **Tadaṅgavimuttippattaṃ** kāmāvacarakusalacittaṃ. **Vikkhambhanavimuttippattaṃ** mahaggatacittaṃ. **Samucchedavimuttippattaṃ** maggacittaṃ. **Paṭippassaddhivimuttippattaṃ** phalacittaṃ. **Nissaraṇavimuttippattampi** tadubhayameva. Kāmaṃ kānici paccavekkhaṇacittādīni nibbānaṃmaṇāni honti, nissaraṇavimuttippattāni pana na honti tādisakiccāyogato. **Pāliyaṃ**¹ āgatasarāgādibhedavasena ceva tesam antarabhedavasena ca **sabbappakāraṃpi**.

Cetopariyaññakathāvaṇṇanā niṭṭhitā.

Pubbenivāsānussatiññakathāvaṇṇanā

402. Pubbenivāsaṃ anussarati, tassa vā anussaraṇaṃ **pubbenivāsānussati**, taṃ nissayādipaccayabhūtaṃ paṭicca uppajjanato “pubbe nivāsānussatimhi yaṃ ñāṇaṃ, tadatthāyā”ti saṅkhepena vuttamatthaṃ

1. Dī 1. 76; Dī 2. 237; Ma 1. 76 piṭṭhādīsu.

vivaranto pubbenivāsaṃ tāva dassetvā tattha satīñāṇāni dassetuṃ “**pubbenivāso**”ti-ādimāha. Tattha “pubbe”ti idaṃ padaṃ “ekampi jātin”ti-ādivacanato atītabhavavisayaṃ idhādhippetanti āha “**atītajātīsū**”ti. Nivāsa-saddo kammaśādhano, khandhavinimutto ca nivasitadhammo natthīti āha “**nivutthakkhandhā**”ti. Nivutthatā cettha sasantāne pavattatā, tathābhūtā ca te anu anu bhūtā jātā pavattā tattha uppajjitvā vigatāva hontīti āha “**nivutthāti ajjhāvutthā anubhūtā attano santāne uppajjitvā niruddhā**”ti. Evaṃ sasantapariyāpannadhammavasena nivāsa-saddassa atthaṃ vatvā idāni avisesena vattuṃ “nivutthadhammā vā nivutthā”ti vatvā taṃ vivarituṃ “**gocaranivāsenā**”ti-ādi vuttaṃ. Gocarabhūtāpi hi gocarāsevanāya āsevitā ārammaṇakaraṇavasena anubhūtā nivutthā nāma hontīti. Te pana duvidhā saparaviññāṇagocaratāyāti ubhayepi te dassetuṃ “**attano**”ti-ādi vuttaṃ.

Tattha “attano viññāṇena viññātā”ti vatvā “paricchinnā”ti vacanaṃ ye te gocaranivāsenā nivutthadhammā, te na kevalaṃ viññāṇena viññāṇamattā, atha kho yathā pubbe jāti nāma gottavaṇṇaliṅgāhārādi visesehi paricchadakārikāya paññāya paricchijja gahitā, tathevetam ṇāṇaṃ paricchijja gaṇhātīti imassa atthassa dīpanatthaṃ vuttaṃ. Paraviññāṇaviññātāpi vā nivutthāti sambandho. Na kevalaṃ attanova viññāṇena, atha kho paresaṃ viññāṇena viññātāpi vāti attho. Idhāpi “paricchinnā”ti padaṃ ānetvā sambandhitabbaṃ “paresampi vā viññāṇena viññātā paricchinnā”ti. Tassa ca gahaṇe payojanaṃ vuttanayeneva vattabbaṃ. Te ca kho yasmā atītāsu eva jātīsu aññehi viññātā paricchinnā, te ca parinibbutāpi hontī. Ye hi¹ te viññātā, tesam tadā vattamānasantānānusārena tesampi atīte pavatti nāyatīti sikhāpattam pubbenivāsānussatīñāṇassa visayabhūtaṃ pubbenivāsaṃ dassetuṃ “**chinnavaṭṭumakānussaraṇādīsū**”ti vuttaṃ. Chinnavaṭṭumakā sammāsambuddhā, tesam anusaraṇā **chinnavaṭṭumakānussaraṇaṃ**. Ādi-saddena paccekasambuddhabuddhasāvakaṇussaraṇāni gayhantīti vadanti. Chinnavaṭṭumakā pana sabbeva anupādisesāya

1. Yesam hi (Ka)

nibbānadhātuyā parinibbutā. Tesam anussaraṇam nāma tesam paṭipattiyā anussaraṇam, sā pana paṭipatti saṅkhepato chaḷārammaṇaggahaṇalakkhaṇāti tāni idha¹ paraviññāṇaviññātaggahaṇena gahitāni, te panete samāsambuddhānaṃyeva visayā, na aññesanti āha **“te buddhānaṃyeva labbhanti”**ti. Na hi atīte buddhā bhagavanto evaṃ vipassimsu, evaṃ maggaṃ bhāvesum, evaṃ phalanibbānāni sacchākaṃsu, evaṃ veneyye vinesunti ettha sabbadā aññesaṃ ñāṇassa gati atthīti. Yāya satiyā pubbenivāsaṃ anussarati, sā pubbenivāsānussatīti ānetvā sambandhitabbaṃ.

Anekavidhanti nānābhavayonigativinñāṇaṭṭhitisattāvāsādivasena bahuviddham. **Pakārehīti** nāmagottādi-ākārehi saddhim, sahayoge cetam karaṇavacanam. **Pavattitam** desanāvasena. Tenāha **“samvaṇṇitan”**ti, vitthāritanti attho. **“Nivāsan”**ti antogadhabhedasāmaññavacanametanti te bhede byāpanicchāvasena saṅgahetvā dassento **“tatha tatha nivutthasantānan”**ti āha. Sāvakasasetam anussaraṇam, na satthunoti vuttam **“khandhapaṭipāṭivasena cutipaṭisandhivasena vā”**ti. **Khandhapaṭipāṭi** khandhānam anukkamo. Sā ca kho cutito paṭṭhāya uppaṭipāṭivasena. Keci panettha **“iriyāpathapaṭipāṭi khandhapaṭipāṭi”**ti vadanti. **Anugantvā** **anugantvāti** ñāṇagatiyā anugantvā anugantvā. **Titthiyāti** aññatitthiyā, te pana kammavādino kiriyavādino tāpasādayo. Ṭhapetvā aggasāvaka mahāsāvake itare satthu sāvaka **pakatisāvaka**.

Yasmā titthiyānam brahmajālādīsu cattālīsāya eva samvaṭṭavivaṭṭānam anussaraṇam āgataṃ, tasmā **“na tato paran”**ti vatvā tam kāraṇam vadanto **“dubbalapaññattā”**ti-ādīmāha, tena vipassanābhīyogo pubbenivāsānussatīñāṇassa visesakāraṇanti dasseti. **Balavapaññattāti** ettha nāmarūpaparicchedādiyeva paññāya balavakāraṇam daṭṭhabbam. Tañhettha nesaṃ sādharāṇakāraṇam. **Ettakoti** kappānam lakkham, tadadhikam ekam, dve ca asaṅkhyeyyānīti kālavasena evaṃparimāṇo yathākkamaṃ tesam mahāsāvaka² aggasāvakapaccekabuddhānam puññañāṇābhinihāro sāvakapaccekabodhipāramitā samitā. Yadi bodhisambhārasambharaṇakālaparicchinnō tesam tesam ariyānam abhiññāṇānavibhāvo, evaṃ

1. Idha pana (Syā)

2. Theragāthā-Ṭṭha 2. 541 piṭṭhe vitthāro.

sante buddhānampi visayaparichedatā āpannāti āha **“buddhānaṃ pana paricchedo nāma natthī”**ti. “Yāvatakaṃ ñeyyaṃ, tāvatakaṃ ñāṇaṃ”¹ti vacanato sabbaññutaññāṇassa viya buddhānaṃ abhiññāñāṇānampi visaye paricchedo nāma natthi. Tattha yaṃ yaṃ ñātuṃ icchanti, taṃ taṃ jānanti eva. Atha vā satipi kālaparicchede kāraṇūpāyakosallapariggahādinaṃ sātisayattā mahābodhisambhārānaṃ paññāpāramitāya pavatti-ānubhāvassa paricchedo nāma natthi, kuto tannibbattānaṃ abhiññāñāṇānanti āha **“buddhānaṃ pana paricchedo nāma natthī”**ti. Atīte ettakāni kappānaṃ asaṅkhyeyyānīti evaṃ kālaparicchedo nāma natthi, anāgate anāgataṃsaññāṇassa viya.

Evaṃ channaṃ janānaṃ pubbenivāsānussaraṇaṃ kālavibhāgato dassetvā idāni ārammaṇaggahaṇato ānubhāvavisesato, pavatti-ākārato ca dassetvā **“titthiyā cā”**ti-ādi vuttaṃ. **Cutipāṭisandhivasenā**ti attano, parassa vā tasmim tasmim attabhāve cutim disvā antarā kiñci anāmasitvā paṭisandhiyā eva gahaṇavasena. Vuttamevatthaṃ byatirekato, anvayato ca vibhāvetvā **“tesaññī”**ti-ādi vuttaṃ. Pakatisāvaka cutipāṭisandhivasenapi saṅkamanānīti ayamatto heṭṭhā vuttanayena **“balavapaññattā”**ti hetunā vibhāvetabbo, cutipāṭisandhivasena saṅkamanānaṃ vemajjhadassane payo janābhāvato. Ñāṇabaladassanattaṃ panettha vuttaṃ.

Taṃ taṃ pākāṭamevāti yathā nāma saradasamaye ṭhitamajjhanhikavelāyaṃ caturatanike gehe cakkhumato purisassa rūpagataṃ supākāṭameva hotīti lokasiddhametaṃ, siyā pana tassa sukhumataratirohitādibhedassa rūpagatassa agocaratā. Nattheva buddhānaṃ ñātuṃ icchitassa ñeyyassa agocaratā, atha kho taṃ ñāṇālokena obhāsitaṃ hatthatale āmakalaṃ viya supākāṭaṃ suvibhūtameva hoti tathā ñeyyāvaraṇassa supahīnattā. **Peyyālapāḷim viya saṅkhipitvā**ti yathā peyyālapāḷim paṭhantā **“paṭhamaṃ jhānaṃ -pa- pañcamaṃ jhānaṃ”**ti ādipariyosānameva gaṇhantā saṅkhipitvā sajjhāyanti, na anupadaṃ, evaṃ anekāpi kappakoṭiyo saṅkhipitvā. **Yaṃ yaṃ icchantīti** yasmim kappe, yasmim bhave

1. Khu 7. 278; Khu 8. 176; Khu 9. 376 piṭṭhesu.

yaṃ yaṃ jānituṃ icchanti, tattha tattheva ñātuṃ icchite eva ñāṇena **okkamantā. Sīhokkantavasena** sīhagatipatanavasena ñāṇagatiyā **gacchanti.** Satadhā bhinnassa vāḷassa koṭiyā koṭipaṭipādanavasena **katavālavedhaparicayassa. Sarabhaṅgasadisassā**ti sarabhaṅgabodhisatta¹ sadisassa. Lakkhaṭṭhānassa appattavasena **na sajjati.** Atikkamanapassagamanavasena **na virajjhati.**

Khajjupanakappabhāsadisaraṃ hutvā upaṭṭhātīti ñāṇassa ativiya appānubhāvatāya khajjotobhāsasamaṃ hutvā pubbenivāsānussatiñāṇaṃ upaṭṭhātī. Esa nayo sesesupi. **Dīpappabhāsadisanti** pākatikadīpālokasadisaraṃ. **Ukkāpabhā** mahā-ummukāloko. **Osadhītārakappabhāti** ussannā pabhā etāya dhīyatīti osadhi, osadhīnaṃ vā anubalappadāyikattā osadhīti evaṃ laddhanāmāya tārakāya pabhā. **Saradasūriyamaṇḍalasadisaraṃ** savisaye sabbaso andhakāraavidhamanato.

Yaṭṭhikoṭigamaṇaṃ viya khandhapaṭipāṭiyā amuñcanato. Kunnadīnaṃ atikkamanāya ekeneva rukkhaḍḍena katasaṅkamo **daṇḍakasetu.** Catūhi, pañcahi vā janehi gantuṃ sakkuṇeyyo phalake attharivā āṇiyo koṭṭetvā katasaṅkamo **jaṅghasetu.** Jaṅghasatthassa gamanayoggo saṅkamo jaṅghasetu jaṅghamaggo viya. Sakaṭassa gamanayoggo saṅkamo **sakaṭasetu** sakaṭamaggo viya. Mahatā jaṅghasatthena gantabbamaggo **mahājaṅghamaggo.** Bahūhi vīsāya vā timsāya vā sakaṭehi ekajjhaṃ gantabbamaggo **mahāsakaṭamaggo.**

Imasmiṃ pana adhikāreti “cittaṃ paññaṇca bhāvayan”ti² cittaśisena sāvakassa niddiṭṭhasamādhībhāvanādhikāre.

403. **Tasmāti** yasmā sāvakānaṃ pubbenivāsānussaraṇaṃ idhādhippetāṃ, tasmā. **Evanti** yathā te anussaranti, evaṃ anussarītukāmena. Heṭṭhā tīsu jhānesu yathārahaṃ pītisukhehi kāyacittānaṃ sampīnanāya “**cattāri jhānāni samāpajjitvā**”ti vuttaṃ, aññathā pādakajjhānameva samāpajjitabbaṃ siyā. Yāya nisajjāya nisinnassa anussaraṇārambho, sā idha **sabbapacchimā nisajjā. Tato āsanapaññāpananti** tato nisajjāya purimakāṃ āsanapaññāpanaṃ āvajjitabbanti sambandho. Esa nayo

1. Khu 6. 5 piṭṭhe Jātake.

2. Saṃ 1. 13, 167; Khu 10. 197; Khu 11. 33 piṭṭhesu.

sesesupi. **Bhojanakāloti**-ādīsu kālasīsena tasmim̄ tasmim̄ kāle katakiccamāha. **Cetiyaṅgaṇabodhiyaṅgaṇavandanakāloti** cetiyaṅgabodhiyaṅgaṇesu cetiyabodhīnaṃ vandana-kālo. **Sakalaṃ rattivandivanti** accantasāmyoge upayogavacanaṃ.

Kiñci kiccaṃ. **Ettakenāti** pādakajjhānasamāpajjanena. Pādakajjhānañhi satthakassa viya nisānasilā satipaññānampi nisitabhāvāvaham̄. Yam̄ tassa, tā taṃ samāpajjanena paramanepakkappattā honti. Tenāha “**dīpe jalite viya pākataṃ hoti**”ti, andhakāraṭṭhāneti adhippāyo. **Purimabhaveti** imassa bhavassa anantare purimasmiṃ bhava. **Pavattitanāmarūpanti** attano paccayehi pavattitanāmarūpaṃ. Tañca kho paṭthamaṃ rūpaṃ āvajjitvā nāmaṃ āvajjitabbaṃ. Paṭthamaṃ nāmaṃ āvajjitvā pacchā rūpanti apare. **Pahotīti** sakkoti. **Paṇḍito** nāma imissā abhiññābhāvanāya katādhikāro.

“**Aññaṃ uppannaṃ**”ti idaṃ aññaṃ kammabhavā añño upapattibhavo uppannoti katvā vuttaṃ addhāpaccuppannantarabhāvato. Aññathā ekabhavepi aññaṃ nāmarūpaṃ uppajjati, niruddhañca appaṭisandhikaṃ. Tenevāha—

“Ye niruddhā marantassa, tiṭṭhamānassa vā idha.
Sabbepi sadisā khandhā, gatā appaṭisandhikā”ti¹.

Taṃ ṭhānanti taṃ nikkhepaṭṭhānaṃ. **Āhundaṛikanti** samantato, upari ca ghanasañchannaṃ sambādhaṭṭhānaṃ. **Andhatamamivāti** andhakāratimissa viya.

Kūṭāgāraṇṇikatthāyāti kūṭāgārassa kūṭatthāya. Kūṭāgārassa kaṇṇikā viya pubbenivāsānussatiññaṃ, mahārukkho viya purimabhava cutikkhaṇe pavattanāmarūpaṃ, sākāpālāsā viya tena sambandham̄ imasmiṃ bhava paṭisandhicittaṃ, pharasudhārā viya parikammabhāvanā, kammārasālā viya pādakajjhānanti evaṃ upamāsaṃsandanaṃ veditabbaṃ.

Katṭhaphālakopamāpi “yathā nāma balavā puriso odanapacanaṃ-di-attham̄ mahantaṃ dāruṃ phāletu tassa tacapheggumattaphālāne pharasudhārāya vipannāya mahantaṃ dāruṃ phāletuṃ asakkonto dhuraṇikkhepaṃ akatvā”ti-ādinā vuttanāyānusārena veditabbā. Tathā **kesohāraṇṇikā**.

1. Khu 8. 90 piṭṭhe Mahāniddece.

Pubbenivāsaññānaṃ nāma na hoti atītāsu jātīsu

nivutthadhammārammaṇattābhāvā¹. **Tanti** pacchimanisajjato pabhuti yāva paṭisandhi pavattaṃ ñāṇaṃ pubbenivāsānusātīññāṇassa parikammabhāvena pavattasamādhinā sampayuttaññānaṃ **parikammasamādhīññānaṃ. Taṃ rūpāvacaraṃ sandhāya na yujjati** taṃ tesāṃ vacanaṃ atītaṃsaññānaṃ ce, rūpāvacaraṃ adhippetāṃ na yujjati parikammasamādhīññāṇassa kāmāvacarabhāvato. Na hi anantaracuticittassa orato pavattikkhandhe ārabha rūpāvacaraṃ cittaṃ uppajjati pāḷiyāṃ, aṭṭhakathāyaṃ vā āgataṃ atthi. Yesāṃ javanānaṃ purimānīti yojanā. Yadā pana appanācittaṃ hoti, tadāssāti sambandho. **Idaṃ pubbenivāsānussatiññānaṃ nāmāti** kāmāṃ anantarassa bhavassa cutikkhaṇe pavattitanāmarūpaṃ ārammaṇaṃ katvā pavattaññānaṃ dassitaṃ, taṃ pana nidassanamattaṃ daṭṭhabbaṃ ñāṇasāmaññassa jotitabhāvato. Yatheva hi tato nāmarūpato pabhuti sabbe atītā khandhā, khandhapaṭibaddā ca sabbo pubbenivāso, evaṃ tassa paṭivijjhanavasena pavattaññānaṃ pubbenivāsānussatiññānaṃ. Tenāha “**tena ñāṇena sampayuttāya satiyā anekavihitaṃ pubbenivāsaṃ anussarati**”ti.

404. **Ekampi jātinti** ekampi bhavaṃ. So hi ekakammanibbato ādānanikkheparicchinno antogadhadhammappabhedo khandhappabandho idha jātīti adhippeto. Tenāha “**ekampi -pa- khandhasantānaṃ**”ti. **Parihāyamānoti** khīyamāno vinassamāno. **Kappoti** asaṅkhyeyyakappo. So pana atthato kālo, tadā pavattamānaṅkharavāsenaṃ parihāni veditabbā. **Vaḍḍhamāno vivaṭṭakappoti** etthāpi eseva nayo. Yo pana “kālaṃ khepeti”ti, “kālo ghasati bhūtāni, sabbāneva saha’ttanā”ti² ca ādisu kālassāpi khayō vuccati, so idha nādhippeto anitṭhappasaṅgato. Saṃvaṭṭanaṃ vinassanaṃ saṃvaṭṭo, saṃvaṭṭato uddham tathā ṭhāyī **saṃvaṭṭatṭhāyī. Taṃmūlakattāti** taṃpubbakattā. Vivaṭṭanaṃ nibbattanaṃ, vaḍḍhanaṃ vā **vivaṭṭo**.

Tejosaṃvaṭṭo āposamvaṭṭo vāyosaṃvaṭṭoti evaṃ saṃvaṭṭasīmānukkamena saṃvaṭṭesu vattabbesu tathā avatvā “**āposamvaṭṭo**

1. Nivutthadhammārammaṇattā (Kā)

2. Khu 5. 68 piṭṭhe Jātake.

tejosamvaṭṭo vāyosamvaṭṭo”ti vacanaṃ

samvaṭṭakamahābhūtaḍḍaṇḍanānupubbīyāti keci. Samvaṭṭānupubbīyāti apare.
Āpena samvaṭṭo **āposamvaṭṭo**. **Samvaṭṭasīmāti** samvaṭṭamariyādā.

Samvaṭṭatīti vinassati. **Sadāti** sabbakālaṃ, tīsupi samvaṭṭakālesūti attho.

Ekam buddhakhettaṃ”ti idha yaṃ sandhāya vuttaṃ, taṃ niyametvā dassetuṃ **“buddhakhettaṃ nāma tividhan”**ti-ādi vuttaṃ. Yattake ṭhāne tathāgataṃ paṭisandhiññānubhāvo puññaphalasaṃmuttejito saraseneva pathavī vijambhati, taṃ sabbimpi buddhaṅkurassa nibbattanakhettaṃ nāmāti āha **“jātikhettaṃ dasasahassacakkavāḷapariyantana”**ti. **Ānubhāvo vattatīti** idha iddhiṃ cetovasippatto āṇākhettapariyāpanne yattha kattaci cakkavāḷe ṭhatvā attano atthāya parittaṃ katvā tattheva aññaṃ cakkavāḷaṃ gatopi kataparitto eva hoti. Atha vā tattha ekacakkavāḷe ṭhatvā sabbasattānaṃ atthāya paritte kate āṇākhette sabbasattānaṃ abhisambhuṇātveva parittānubhāvo tattha devatāhi parittāṇāya samphaṭṭicchitabbato. Yaṃ visayakhettaṃ sandhāya ekasmiṃyeva khaṇe sarena abhiviññāpanaṃ, attano rūpadassanañca paṭijānantena bhagavatā “yāvata vā pana ākaṅkheyyā”ti¹ vuttaṃ. **Yatthāti** yasmiṃ anantāparimāṇe visayakhetto. **Yaṃ yaṃ tathāgato ākaṅkhati, taṃ taṃ jānāti** ākaṅkhāmatapaṭibaddhavuttitāya buddhaññaṇassa. **Sanṭhahantanti** vivaṭṭamānaṃ jāyamānaṃ.

405. **Gokhāyitakamattesūti** gohi khāditabbappamāṇesu. **Yanti** yasmiṃ samaye. Puppaphalūpajīviniyo ca devatā brahmaloke nibbattantīti sambandho.

Etesanti “vassūpajīvino”ti-ādinā vuttasattānaṃ. **Tatthāti** brahmaloke. So ca kho parittābhāḍibrahmaloko veditabbo. “Paṭiladdhājñhānavasena”ti vatvā jhānappaṭilābhassa sambhavaṃ dassetuṃ **“tadāhī”**ti-ādi vuttaṃ. Lokam byūhenti sampiṇḍentīti **lokabyūhā**. Te kira disvā manussā tattha tattha ṭhitāpi nisinnāpi samvegajātā,

1. Am 1. 229 piṭṭhe.

sambhamappattā ca hutvā tesam āsanne ṭhāne sannipatanti. Sikhābandhassa muttatāya **muttasirā**. Ito cito ca vidhūyamānakesatāya **vikīṇakesā**. Lokavināśabhayena sokavantacittatāya **ativiya virūpavesadhārino**. **Mārisāti** devānam piyasamudācāro. Katham panete kappavuṭṭhānam jānantīti? Dhammatāya sañcoditāti ācariyā. Tādīsanimittadassanenāti eke. Brahmadevatāhi uyyojitāti apare.

Mettādīnīti mettāmanasikārādīni kāmāvacarapuññāni. **Devaloketi** kāmadevaloke. Devānam kira sukhasamphassavātaggahaṇaparicayena vāyokasiṇe jhānāni sukheveva ijjhanti. Tena vuttam “**vāyokasiṇe parikammaṃ katvā jhānam paṭilabhanti**”ti. **Tadaññe panāti** āpāyike sandhāyāha. **Tatthāti** devaloke.

Dutiyo sūriyoti dutiyam sūriyamaṇḍalam. **Sattasūriyanti** sattasūriyapātubhāvasuttam. **Pakatisūriyeti** kappavuṭṭhānakālato pubbe uppannasūriyavimāne. Kappavuṭṭhānakāle pana yathā aññe kāmāvacaradevā, evam sūriyadevaputtopi jhānam nibbattetvā brahmalokam upapajjati, sūriyamaṇḍalam pana pabhassaratarañceva tejavantatarañca hutvā pavattati. Tam antaradhāyitvā aññemeva uppajjatīti apare. Gaṅgā yamunā sarabhū aciravatī mahīti imā **pañca mahānadiyo**.

Pabhavāti uppattiṭṭhānabhūtā. **Hamsapātano**¹ mandākinimāha.

Na saṅṭhātīti na tiṭṭhati.

Pariyādinnasinehanti parikkhīṇasineham. Yāya āpodhātuyā tattha tattha pathavīdhātu ābandhattā sampiṇḍatā hutvā tiṭṭhati, sā chasūriyapātubhāvena parikkhayam gacchati. **Yathā cidanti** yathā ca idam cakkavālam. **Evam koṭisatasahassacakkavālanipīti** vipattimahāmeghuppattito paṭṭhāya idha vuttam sabbam kappavuṭṭhānam, tam tattha atidisati.

Palujjitvāti chijjitvā. **Saṅkhāragatanti** bhūtopādāyappabhedam saṅkhārajātam. **Sabbasaṅkhāraparikkhayāti** jhāpetabbasaṅkhāraparikkhayā. Sayampi saṅkhāragatam samānam indhanābhāvato chārikampi asasetvā niḍḍahitvā vūpasamatīti āha “**sappi -pa- nibbāyati**”ti.

1. Hamsapātano (Ka)

406. **Dīghassa addhunoti** saṁvaṭṭaṭṭhāyī-asaṅkhyeyyakappasaṅkhātassa dīghassa kālassa accayena. **Tālakkhandhādīti ādi-**saddena sākasālādirukkhe saṅgaṇhāti. **Ghanam karotīti** visaritum adatvā piṇḍitam karoti. Tenāha “**parivaṭuman**”ti, vaṭṭabhāvena paricchinnam. **Tanti** udakam. **Assāti** vātassa. **Vivaram detīti** yathā ghanam karoti sampiṇḍeti, evam tattha antaram deti. **Parikkhayamānanti** pubbe yāva brahmalokā ekoghabhūtena vātena parisosiyamānatāya parikkhayam gacchantam. Brahmaloko pātubhavatīti yojanā. **Brahmalokoti** ca paṭhamajjhānabhūmimāha. **Upari catukāmāvacaradevalokaṭṭhāneti** yāmadevalokādīnam catunnam patiṭṭhānaṭṭhāne. Cātumahārājikatāvatiṁsabhavanānam pana patiṭṭhānaṭṭhānāni pathaviṁsambandhatāya na tāva pātubhavanti.

Rundhantīti¹ yathā heṭṭhā na bhassati², evam nirodhenti.

“**Paṭhamatarābhiniḅattā**”ti idaṁ āyukkhayassa sambhavadassanam, tena dvinnam, catunnam, aṭṭhannam vā kappānam ādimhi niḅattāti dasseti. **Tatoti** ābhassarabrahmalokato. Paritābha-appamāṇābhāpi hi ābhassaraggahaṇeneva saṅgaham gacchanti. “**Te honti sayampabhā antalikkhacarā**”ti idaṁ upacārajjhānapuññassa mahānubhāvatāya vuttam. **Āluppakārakanti** ālopanam katvā katvāti vadanti, āluppanam vilopam katvāti attho.

Haṭṭhatuṭṭhāti ativiya haṭṭhā uppilāvitacittā³. **Nāmam karontīti** tathā voharanti.

Sinerucakkavālahimavantapabbatāti ettha dīpasamuddāpīti vattabham. Tathā hi vakkhati “ninnaninnaṭṭhāne samuddā, samasamaṭṭhāne dīpā”ti. **Thūpathūpāti** unnatunnatā.

Atimaññantīti atikkamitvā maññanti, hīlentīti attho. **Teneva nayanāti** “ekacce vaṇṇavanto hontī”ti-ādina⁴ vuttena nayneva. **Padālatāti** evamnamikā latājāti. Tassā kira pārāsavajāti gaḷocīti vadanti. Akaṭṭhe eva bhūmippadese paccanako **akaṭṭhapāko**. **Akaṇoti** kuṇḍakarahito.

1. Rumbhenti (Sī), rumbhanti (Syā)

3. Uppilāvitappattā (Sī, Syā)

2. Na bhavissati (Syā)

4. Dī 3. 72 piṭṭhe.

Sumanasaṅkhātajātipupphasadiso **sumanajātipupphasadiso**. Yo yo raso etassāti yaṃyaṃraso, odano taṃ **yaṃyaṃrasaṃ**, yādisarasavantanti attho. Rasapathavī, bhūmipappaṭako, padālatā ca paribhuttā sudhāhāro viya khuddaṃ vinodetvā rasaharaṇīti rasameva brūhentā tiṭṭhanti, na vatthuno sukhumabhāvena nissandā, sukhumabhāveneva gahaṇindhanameva ca honti¹. Odano pana paribhutto rasaṃ vaḍḍhentopi vatthuno oḷārikabhāvena nissandaṃ vissajjento passāvaṃ, kasaṭaṅca uppādetīti āha **“tato pabhuti muttakarīsaṃ sañjāyati”**ti. Purimattabhāvesu pavatta-upacārajjhānānubhāvena yāva sattasantāne kāmarāgavikkhambhanavego na samito, na tāva balavakāmarāgūpanissayāni itthipurisindriyāni pāturaheṣuṃ. Yadā panassa vicchinnatāya balavakāmarāgo laddhāvasaro ahosi, tadā tadupanissayāni tāni sattānaṃ attabhāvesu sañjāyimsu. Tena vuttam **“purisassa -pa- pātubhavati”**ti. Tenevāha **“tatra sudan”**ti-ādi.

Alasajātikassāti sajjukameva taṇḍulaṃ aggahetvā paradivasassatthāya gahaṇena alasapakatikassa.

Anutthunantīti anusocanti. **Sammanneyyāmāti** samanujāneyyāma. **Noti** amhesu. **Sammāti** sammadeva yathārahaṃ. **Khīyitabbanti** khīyanārahaṃ nindanīyaṃ. **Garahitabbanti** hīletabbaṃ.

Ayameva bhagavā paṭibalo pagghaniggahaṃ kātunti yojanā. **Raṇjetīti** saṅgahavatthūhi sammadeva rameti pīṇeti.

Vivaṭṭaṭṭhāyī-asaṅkhyeyyaṃ catusaṭṭhi-antarakappasaṅgahaṃ. Vīsati-antarakappasaṅgahanti keci. Sesāsaṅkhyeyyāni kālato tena samappamāṇāneva

407. **Mahādharāhīti** tālasālakkhandhappamāṇāhi mahatīhi khārudakadhārāhi. **Samantatoti** sabbaso. **Pathavitoti** pathaviyā heṭṭhimantato pabhuti. Tena hi khārudakena phuṭṭhaphuṭṭhā pathavīpabbatādayo.

1. Vatthuno sukhumabhāvena nissandā sukhumā, nissandasukhumabhāveneva gahaṇindhanameva ca honti. (Syā)

udake pakkhittaloṇasakkharā viya vilīyanteva, tasmā pathavīsandhārudakena saddhim ekūdakameva taṃ hotīti keci. Apare “pathavīsandhārakam udakakkhandhañca udakasandhārakam vāyukkhandhañca anavasesato vināsetvā sabbattha sayameva ekoghahūtam tiṭṭhati”ti vadanti, taṃ yuttam. **Tayopi brahmaloketi** parittābha-appamāṇābha-ābhassarabrahmaloke, tayidaṃ “ayaṃ pana viseso”ti āraddhattā vuttam, aññathā “chapi brahmaloke”ti vattabam siyā. **Subhakiṇheti** ukkaṭṭhaniddesena tatiyajjhānabhūmiyā upalakkhaṇam. Parittāsubha-appamāṇāsubhepi hi āhacca udakam tiṭṭhati. Heṭṭhā “ābhassare āhacca tiṭṭhati”ti etthāpi eseva nayo. **Tanti** taṃ kappavināsaka-udakam. **Udakānugatanti** udakena anugataṃ phuṭṭham. **Abhibhavivāti** vilīyāpetvā.

Idamekam asaṅkhyeyyanti idaṃ samvaṭṭasaṅkhātam kappassa ekam asaṅkhyeyyam.

408. Thūlaraje apagate eva pathavīnissitam saṅharajam apagacchatīti vuttam “**tato saṅharajan**”ti. Samuṭṭhāpetīti sambandho. “**Visamaṭṭhāne thitamahārukkhe**”ti idaṃ paṭhamam samuṭṭhāpetabbatam sandhāya vuttam.

Cakkavālapabbatampi sinerupabbatampīti mahāpathaviyā viparivattaneneva viparivattitam cakkavālapabbatampi sinerupabbatampi vāto ukkhipivā ākāse khipati. **Te** cakkavālapabbatādayo. **Abhiantvāti** ghaṭṭetvā. **Aññamaññanti** ekissā lokadhātuyā cakkavālahimavantasinerum aññissā lokadhātuyā cakkavāḷādihīti evam aññamaññam samāgamavasena ghaṭṭetvā. **Sabbasaṅkhāragatanti** pathavīsandhāraka-udakam, taṃsandhārakavātanti sabbam saṅkhāragatam vināsetvā sayampi vinassati avaṭṭhānassa kāraṇābhāvato.

409. Yadi pi saṅkhārānam ahetuko sarasanirodho vināsakābhāvato, santānanirodho pana hetuvirahito natthi yathā taṃ sattakāyesūti. Bhājanalokassāpi sahetukena vināsenā bhavitabbanti hetum pucchati “**kiṃkāraṇā evam loko vinassati**”ti. Itaro yathā tattha nibbattanakasattānam puññabalena paṭhamam loko vivaṭṭati, evam tesam pāpabalena samvaṭṭatīti dassento “**akusalamūlakāraṇā**”ti āha. Yathā hi rāgadosamohānam adhikabhāvena yathākkamam rogantarakappo, satthantarakappo, dubbhikkhantarakappoti ime

tividhā antarakappā vivaṭṭaṭṭhāyimi asaṅkhyeyyakappe jāyanti, evamete yathāvuttā tayo saṁvaṭṭā rāgādīnaṁ adhikabhāveneva hontīti dassento “**akusalamūlesu hī**”ti-ādimāha. **Ussannatareti** ativiya ussanne. Dose ussannatare adhikataradosena viya tikkhatarena khārudakena vināso yuttoti vuttam **“dose ussannatare udakena vinassatī”**ti. Pākaṭasattusadisassa dosassa aggisadisatā, apākaṭasattusadisassa rāgassa khārudakasadisatā ca yuttāti adhippāyena **“dose ussannatare agginā, rāge ussannatare udakenā”**ti kecivādassa adhippāyo veditabbo. Rāgo sattānaṁ bahulaṁ pavattatīti rāgavasena bahuso lokavināso.

410. Evaṁ pasaṅgena saṁvaṭṭādike pakāsetvā idāni yathādhikatam nesam anussaraṇākāram dassetuṁ **“pubbenivāsam anussarantopī”**ti-ādi āradham.

“Amumhi saṁvaṭṭakappe”ti idaṁ saṁvaṭṭakappassa ādito **pāliyam**¹ gahitattā vuttam. Tatthāpi hi imassa tatipayam kālam bhavādīsu saṁsaraṇam upalabbhatīti. Saṁvaṭṭakappe vā vaṭṭamānesu bhavādīsu imassa upapatti ahosi, taṁdassanametaṁ daṭṭhabbam. Atha vā **amumhi saṁvaṭṭakappeti** ettha **vā**-saddo luttaniddiṭṭho daṭṭhabbo, tena ca aniyamatthena itarāsaṅkhyeyyānampi saṅgaho siddho hoti. **Bhave vāti**-ādīsu kāmādiḥhave vā aṇḍajādiyoniya vā devādigatiya vā nānattakāyanānattasaññī-ādiviññāṇaṭṭhitiya vā **sattāvāse vā** khattiyādi **sattanikāyevā**. **Āsinti** ahoṣim. **Vaṇṇasampattim vāti vā**-saddena vaṇṇavipattim vāti dasseti.

Sālimānsodanāhāro vā gihikāle. **Pavattaphalabhojano vā** tāpasādikāle. **Sāmisā** gehassitā somanassādayo. **Nirāmisā** nekkhammassitā. **Ādi**-saddena vivekajasamādhijasukhādīnaṁ saṅgaho.

“Amutrāsini”ti-ādīnā sabbam yāvadicchakam anussaraṇam dassetvā idāni aññathā attam dassetuṁ **“apicā”**ti-ādi vuttam. Tattha **amutrāsinti** sāmāññaniddesoyam, byāpanicchālopo vā, amutra amutrāsinti vuttam hoti. **Anupubbena ārohanassa yāvadicchakam anussaraṇanti**

1. Dī 1. 76 piṭṭhe.

ettha **ārohantassā**ti paṭilomato nāṇena pubbenivāsaṃ ārohantassa.
Paccavekkhaṇanti anussaritānussaritassa paccavekkhaṇaṃ, na anussaraṇaṃ.
Ititi vuttatthanidassanaṃ. Tañca kho yathārahato, na yathānupubbato
dassento “**nāmagottavasenā**”ti-ādimāha. **Vaṇṇādīhī**
vaṇṇāhāra vedayitāyuparicchedehi. **Odātoti**ti ettha **iti**-saddo ādi-attho,
pakārattho vā, tena evamādi evaṃpakāraṇānāttatoti dassitaṃ hoti.

Pubbenivāsānussatiñāṇakathāvaṇṇanā niṭṭhitā.

Cutūpapātañāṇakathāvaṇṇanā

411. **Cutiya**ti cavane. **Upapā**teti upapajjane. Samīpatthe cetam
bhumavacanaṃ, cutikkhaṇasāmantā, upapattikkhaṇasāmantā cāti vuttaṃ
hoti. Tathā hi vakkhati “ye pana āsannacutikā”ti-ādi¹. Dibbacakkuñāṇeneva
sattānaṃ cuti ca upapatti ca nāyatīti āha “**dibbacakkuñāṇatthanti vuttaṃ
hoti**”ti. **Dibbasadisattā**ti-ādīsu yaṃ vattabbaṃ, taṃ heṭṭhā vuttameva. Ayaṃ
pana viseso—tatha “sotadhātū”ti padaṃ apekkhitvā itthilingavasena vuttaṃ,
idha napuṃsakalingavasena vattabbaṃ. Tatha ca ālokapariggahena
payojanaṃ natthi, idha atthīti vuttaṃ “**ālokapariggahena mahājutikattāpi
dibban**”ti, kasiṇālokānuggahena pattabbattā, sayam
ñāṇālokapharaṇabhāvena ca mahājutikabhāvatoti attho. Mahājutikampi hi
“dibban”ti vuccati “dibbamidaṃ byamhan”ti-ādīsu. **Mahāgatikattā**ti
mahanīyagamanattā, vimhayanīyapavattikattāti attho. Vimhayanīyāhissa
pavatti tirokuṭṭādigatarūpadassanato. “Dibbasadisattā”ti ca
hīnūpamādassanaṃ devatānaṃ dibbacakkhutopi imassa mahānubhāvattā.
Tena dibbacakkhulābhāya yogino parikammakaraṇaṃ
tappaṭipakkhābhāvavassa atthato tassa vijayicchā nāma hoti,
dibbacakkhulābhī ca iddhimā devatānaṃ
vacanaggahaṇakkhamanadhammānāvasena mahāmogallānattherādayo
viya dānaggahaṇalakkhaṇe, vohāre ca pavatteyyāti evaṃ vihāravijayicchā
vohārajutigatisaṅkhātānaṃ atthānaṃ vasena imassa abhiññāṇāssa

1. Visuddhi 2. 54 piṭṭhe.

dibbacakkhubhāvasiddhito. Saddavidū ca tesu eva atthesu divu-saddaṃ icchantīti vuttaṃ “**taṃ sabbaṃ saddasatthānusārena veditabbaṃ**”ti.

Dassanattthenāti rūpadassanabhāvena. Cakkhunā hi sattā rūpaṃ passanti. Yathā maṃsacakkhu viññāṇadhiṭṭhitāṃ samavisamaṃ ācikkhantaṃ viya pavattati, na tathā idaṃ. Idaṃ pana sayameva tato sātisayaṃ cakkhukiccakārīti āha “**cakkhukiccakaraṇena cakkhumivātipi cakkhū**”ti. “**Diṭṭhivisuddhihetuttā**”ti saṅkhepato vuttamatthaṃ vivarituṃ “**yo hī**”ti-ādi vuttaṃ. **Ucchedadiṭṭhiṃ gaṇhāti** parato upapattiyā¹ adassanato ethevāyaṃ satto ucchinno, evamitarepīti. **Navasattapātubhāvadiṭṭhiṃ gaṇhāti** lābhī adhiccasamuppattiko viya. **Buddhaputtā passantiyevā**ti uttarapadāvadhāraṇaṃ, na purimapadāvadhāraṇaṃ. Evaṃ hi **jayaddisajātakādī**hi avirodho siddho hoti.

Manussānaṃ idanti mānusakaṃ, manussānaṃ gocarabhūtaṃ rūpārammaṇaṃ. Tadaññassa pana dibbatirohitātisukhumādibhedassa rūpassa dassanato **atikkantaṃ mānusakaṃ**. Evarūpañca manussūpacāraṃ atikkantaṃ nāma hotīti āha “**manussūpacāraṃ atikkamitvā rūpadassanena**”ti. Evaṃ visayamukhena dassetvā idāni visayīmukhena dassetuṃ “**mānusakaṃ vā**”ti-ādi vuttaṃ. Tatthāpi maṃsacakkhātikkamo tassa kiccātikkameneva daṭṭhabbo.

Dibbacakkhunāti dibbacakkhuñāṇenapi. **Daṭṭhuṃ na sakkā** khaṇassa ati-ittharatāya atisukhumatāya kesañci rūpassa. Apica dibbacakkhussa paccuppannaṃ rūpārammaṇaṃ, tañca purejātapaccayabhūtaṃ, na ca āvajjanaparikkammehi vinā mahagatassa pavatti atthi, nāpi uppajjamānameva rūpaṃ ārammaṇapaccayo bhavituṃ sakkoti, bhijjamānaṃ vā. Tasmā “cutūpapātakkaṇe rūpaṃ dibbacakkhunā daṭṭhuṃ na sakkā”ti suvuttametaṃ. Yadi dibbacakkhuñāṇaṃ rūpārammaṇameva, atha kasmā “satte passatī”ti vuttanti? Yebhuyyena sattasantānagatarūpadassanato evaṃ vuttaṃ. Sattagahaṇassa vā kāraṇabhāvato vohāravasena vuttantipi keci. Te cavamānāti adhippetāti sambandho. **Evarūpeti** na cutūpapātakkaṇasamaṅginoti adhippāyo.

Mohūpanissayaṃ nāma kammaṃ nihīnaṃ nihīnaphalaṃ hotīti āha “**mohanissandayuttattā**”ti. **Tabbiparī**te tassa hīlitādibhāvassa

1. Uppattiyā (Sī, Syā)

viparīte, ahiḷite anohiḷite anoññāte anavaññāte cittikateti attho. **Suvaṇṇeti** sundaravaṇṇe. **Dubbaṇṇeti** asundaravaṇṇe. Sā paṇāyaṃ suvaṇṇadubbaṇṇatā yathākkamaṃ kammaṃ adosadosūpanissayatāya hotīti āha “**adosanissandayuttattā**”ti-ādi. Sundaraṃ gatiṃ gatā sugatāti āha “**sugatigate**”ti, sugatiṃ upapanneti attho. Alobhajjhāsayā sattā vadaññū vigatamaccherā alobhūpanissayena kammunā subhavā samiddhā hotīti āha “**alobhanissandayuttattā vā aḍḍhe mahaddhane**”ti. Dukkhaṃ gatiṃ gatā duggatāti āha “**duggatigate**”ti. Lobhajjhāsayā sattā luddhā maccharino lobhūpanissayena kammunā duggatā durupetā¹ hotīti āha “**lobhanissandayuttattā vā dalidde appannapāne**”ti.

Upacitanti phalāvahabhāvena kataṃ. Yathā kataṃ hi kammaṃ phaladānasamattamaṃ hoti, tathā kataṃ upacitaṃ. **Cavamāneti-ādīhi dibbacakkhukiccaṃ vuttanti** visayamukhena visayībyāpāramāha. **Purimehīti** vā “dibbena cakkhuna”ti-ādīni padāni sandhāya vuttaṃ. **Ādīhīti** ettha ca-saddo luttaniddiṭṭho. Tasmā “dibbena -pa- passatī”ti imehi, “cavamāne”ti-ādīhi ca dibbacakkhukiccaṃ vuttanti attho.

Iminā pana padenāti “yathākammūpage satte pajānātī”ti iminā vākyena. **Idha bhikkhūti** imasmim̄ sāsane bhikkhu dibbacakkhuññāḷābhīti adhippāyo. **So** ca dibbacakkhuññāḷābhī nerayike ca satte paccakkhato disvā ṭhito. **Evaṃ manasi karotīti** tesam̄ nerayikānaṃ nirayasamvattaniyassa kammaṃ nātukāmatāvasena pādakajjhānaṃ samāpajjitvā vuṭṭhāya parikammavasena manasi karoti. **Kim nu khoti-ādi** manasikāravidhidassanaṃ. Evaṃ pana parikammaṃ katvā pādakajjhānaṃ samāpajjitvā vuṭṭhitassa taṃ kammaṃ ārammaṇaṃ katvā āvajjanaṃ uppajjati, tasmim̄ niruddhe cattāri, pañca vā javanāni javantīti-ādi sabbaṃ vuttanayameva. “**Visuṃ parikammaṃ nāma natthī**”ti idaṃ pana dibbacakkhuññāḷāna vinnā yathākammūpagaññassa visuṃ parikammaṃ natthīti adhippāyena vuttaṃ. Evañcetaṃ icchitabbaṃ, aññathā yathākammūpagaññassa mahaggatabhāvo eva na siyā. Devānaṃ dassanepi eseva nayo. Nerayikadevaggahaṇaṃ cettha nidassanamattaṃ daṭṭhabbaṃ. Ākañkhamāno hi

1. Petā (Syā)

dibbacakkhulābhī aññagatikesupi evaṃ paṭipajjatiyeva. Tathā hi vakkhati “apāyaggahaṇena tiracchānayanim dīpeti”¹, “sugatiggahaṇena manussagatipi saṅgayhati”² ca. Taṃ nirayasamvattaniyaṃ kammaṃ ārammaṇaṃ etassāti **taṃkammārammaṇaṃ. Phārusakavanādīsūti ādi-**saddena cittalatāvanādīnaṃ saṅgaho.

Yathā cimassāti yathā ca imassa yathākammūpagañāṇassa visum parikammaṃ natthi, evaṃ anāgataṃsañāṇassapīti visum parikammābhāvaṃ nidasseti. Tattha kāraṇamāha “**dibbacakkhupādakāneva hi imāni**”³ti. Tatrāyamadhippāyo—yathā dibbacakkhulābhī nirayādi-abhimukhaṃ ālokaṃ vaḍḍhetvā nerayikādi-ke satte disvā tehi pubbe āyūhitaṃ nirayasamvattaniyādikaṃ kammaṃ tādisena samādānena, tajjena ca manasikārena parikkhate citte yāthāvato jānāti, evaṃ yassa yassa sattassa samanantarā anāgataṃ attabhāvaṃ ñātukāmo taṃ taṃ odissa ālokaṃ vaḍḍhetvā tena tena atīte, etarahi vā āyūhitaṃ tassa nibbattaṃ kammaṃ yathākammūpagañāṇena disvā tena nibbattatappaṃ anāgataṃ attabhāvaṃ ñātukāmo tādisena samādānena, tajjena ca manasikārena parikkhate citte yāthāvato jānāti. Eseva nayo tato paresupi attabhāvesu. Etaṃ **anāgataṃsañāṇaṃ** nāma. Yasmā etaṃ dvayaṃ dibbacakkhuñāṇe satiyeva sijjhati, nāsati. Tena vuttaṃ “**imāni dibbacakkhunā saheva ijjhantī**”³ti.

Kāyena duṭṭhu caritaṃ, kāyato vā uppannaṃ kilesapūtikattā duṭṭhaṃ caritaṃ kāyaduccaritaṃ evaṃ yojetabbo. **Kāyoti** cettha copanakāyo adhippeto. Kāyaviññattivasena pavattaṃ akusalaṃ kāyakammaṃ **kāyaduccaritaṃ. Itaresūti** vacīmanoduccaritesu. Yasmim̐ santāne kamm̐ katūpacitaṃ, asatī’ssa antarupacchede³ vipākārahābhāvassa avigacchanato so tena sahitoyevāti vattabboti āha “**samannāgatāti samaṅgībhūtā**”³ti. “**Anatthakāmā hutvā**”³ti etena mātāpitaro viya puttānaṃ, ācariyupajjhāyā viya ca nissitakānaṃ atthakāmā hutvā garahakā upavādakā na hontīti dasseti. **Guṇaparidhamāsanenāti** vijjamānānaṃ guṇānaṃ viddhamāsanena vināsanenāti attho. Nanu

1. Visuddhi 2. 57 piṭṭhe. 2. Visuddhi 2. 58 piṭṭhe. 3. Āhārupacchede (Syā, Ka)

ca antimavatthunāpi upavādo guṇaparidhamśanamevāti? Saccametaṃ. Guṇāti panettha jhānādivisesā uttarimanussadhammā adhippetāti sīlaparidhamśanam visum gahitaṃ. Tenāha “**natthi imesaṃ samaṇadhammo**”ti-ādi. **Samaṇadhammoti** ca sīlasaṃyamaṃ sandhāya vadati. **Jānaṃ vāti** yaṃ upadeti, tassa ariyabhāvaṃ jānanto vā. **Ajānaṃ vāti** ajānanto vā. Jānanaṃ ajānanaṃ cettha appamaṇaṃ, ariyabhāvo eva pamāṇaṃ. Tenāha “**ubhayathāpi ariyūpavādova hoti**”ti. “Ariyo”ti pana ajānato aduṭṭhacittasseva tatha ariyaguṇābhāvaṃ pavedentassa guṇaparidhamśanam na hotīti tassa ariyūpavādo natthīti vadanti. **Satekiccaṃ pana hoti** khamāpanena, na anantariyaṃ viya atekiccaṃ.

Rujjhatīti tudati, dukkhaṃ vedanaṃ uppādetīti attho. **Tanti** taṃ theramaṃ, **taṃ** vā kiriyaṃ. Jānanto eva thero “atthi te āvuso patiṭṭhā”ti pucchi. Itaropi saccābhisamayo sāsane patiṭṭhāti āha “**sotāpanno ahan**”ti. Thero taṃ karuṇāyamāno “**khīṇāsavo tayā upavadito**”ti attānaṃ āvikāsi.

Sace navakatarā honti tasmim vihare bhikkhū. **Sammukhā akhamāpentepīti** purato khamāpane asambhavantepe. “Akhamante”ti vā pāṭho. Taṃ sotāpannassa vasena vedītabbaṃ.

Parinibbutamañcaṭṭhānanti pūjākaraṇaṭṭhānaṃ sandhāyāha.

Samādātabbaṭṭhena samādānāni, kammāni samādānāni yesaṃ, te kammasamādānā, micchādiṭṭhivasena kammasamādānā, hetu-atthaṃ vā antogadhaṃ katvā micchādiṭṭhivasena pare kammesu samādāpakā **micchādiṭṭhikammasamādānā**. Tayimamatthaṃ dassento “**micchādiṭṭhivasenā**”ti-ādimāha. **Sīlasampannoti**-ādi paripakkindriyassa maggasamāngino vasena vuttaṃ. Aggamaggaṭṭhe pana vattabbameva natthi. **Aññanti** arahattaṃ. **Evaṃsampadanti** yathā taṃ avassambhāvī, evamidampīti attho. **Taṃ vācaṃ appahāyāti**-ādīsu ariyūpavādaṃ sandhāya “puna evarūpim vācaṃ na vakkhāmī”ti vadanto vācaṃ pajahati nāma, “puna evarūpaṃ cittaṃ na uppādessāmī”ti cinto cittaṃ pajahati nāma, “puna evarūpim diṭṭhim na gaṇhissāmī”ti pajahanto diṭṭhim pajahati nāma, tathā akaronto neva pajahati, na paṭinissajjati.

Yathābhatam nikkhitto, evam nirayeti yathā nirayapālehi āharitvā niraye ṭhapito, evam niraye ṭhapitoyevāti attho. Micchādīṭṭhivasena akattabham nāma pāpam natthi, yato saṃsārakhāṇubhāvopi nāma hotīti āha “micchādīṭṭhiparamāni bhikkhave vajjānī”ti.

“Ucchinnabhavanettiko bhikkhave tathāgatassa kāyo tiṭṭhati, ayañceva kāyo, bahiddhā ca nāmarūpan”ti¹ evamādīsu viya idha kāya-saddo khandhapañcakavisayoti āha “**kāyassa bhedāti upādinnakkhandhapariccāgā**”ti. Avītarāgassa maraṇato param nāma bhavantarūpādānamevāti āha “**param maraṇāti tadanantaram abhinibbattikkhandhaggahaṇe**”ti. Yena tiṭṭhati, tassa upacchedeneva kāyo bhijjatīti āha “**kāyassa bhedāti jīvitindriyassa upacchedā**”ti.

Eti imasmā sukhanti ayo, puññanti āha “**puññasammata ayā**”ti. Ayanti etasmā sukhānīti āyo, puññakammādisukhasādhanam. Tenāha “**sukhānam vā āyassa abhāvā**”ti. Iyati assādiyatīti ayo, assādoti āha “**assādasaññito ayo**”ti.

Nāgarājādīnanti ādi-saddena supaññādīnam saṅgaho. **Asurasadisanti** petāsurasadisam. **Soti** asurakāyo. **Sabbasamussayehīti** sabbehi sampattisamussayehi. **Vuttavipariyāyenāti** “suṭṭhu caritam, sobhanam vā caritam anavajjattā”ti-ādīnā “kāyaduccaritenā”ti-ādīnam padānam vuttassa atthassa vipariyāyena.

Nigamanavacanam vuttassevatthassa puna vacananti katvā. **Ayamettha saṅkhepatthoti** “dibbena cakkhunā -pa- passatī”ti ettha ayam yathāvutto saṅkhepattho.

412. **Kasiṇārammaṇanti** aṭṭhannampi kasiṇānam vasena kasiṇārammaṇam. **Sabbākārenāti** “cuddasavidhena cittaparidamanena aṭṭhaṅgasamannāgamena bhūmipādapadamūlasampādanenā”ti iminā sabbappakārena. **Abhinīhārakkhamam** dibbacakkhuñāṇābhimukham pesanāraham pesanayoggaṃ **katvā. Āsannam kātabbanti** dibbacakkhuñāṇupattiyā samīpabhūtam kātabbam. Tattha upacārajjhānam paṇaṭaram.

1. Dī 1. 42 piṭṭhe.

katvā ārammaṇaṅca vaḍḍhetabbaṃ. Tenāha “**upacārajjhānagocaraṃ katvā vaḍḍhetvā ṭhapetabbaṃ**”ti. **Tatthāti** tasmim vaḍḍhite kasiṇārammaṇe. **Appanāti** jhānavasena appanā. Na hi akataparikkammaṃ abhiññāvasena appanā ijjhati. Tenāha “**pādakajjhānanissayaṃ hotī**”ti, pādakajjhānārammaṇaṃ hotīti attho. **Na parikkammaṃ** parikkammaṃ taṃ kasiṇārammaṇaṃ apassayo na hoti. Tathā sati rūpadassanaṃ na siyā. **Imesūti** yathāvuttesu tejakasiṇādīsū tīsu kasiṇesu. **Uppādetvāti** upacārajjhānuppādanena uppādetvā. Upacārajjhānapavattiyā hi saddhim paṭibhāganimituppatti. **Tatthāti** kasiṇaniddese¹.

Antoyeva rūpagataṃ passitabbaṃ na bahiddhā vikkhepāputtihetubhāvato. **Parikkammaṃ vāro atikkamatīti** idha parikkammaṃ nāma yathāvuttakasiṇārammaṇaṃ upacārajjhānaṃ, taṃ rūpagataṃ passato na pavattati. Kasiṇālokavasena ca rūpagatadassanaṃ, kasiṇāloko ca parikkammavasenāti tadubhayampi parikkammaṃ appavattiyā na hoti. Tenāha “**tato āloko antaradhāyati, tasmim antarahite rūpagatampi na dissati**”ti. Rūpagataṃ passato parikkammaṃ vāro atikkamati, parikkammamatikkantassa kasiṇārammaṇaṃ nānaṃ na hotīti² rūpagataṃ na dissati, kathaṃ pana paṭipajjitabanti āha “**athānenā**”ti-ādi. **Evam anukkamenāti** punappunaṃ pādakajjhānaṃ samāpajjitvā tato tato vuṭṭhāya abhiṇhaṃ ālokassa pharaṇavasena āloko thāmagato hoti ciraṭṭhāyī. Tathā ca sati tattha sucirampi rūpagataṃ passateva. Tena vuttaṃ “**ettha āloko -pa-hotī**”ti.

Svāyamattho tiṇukkūpamāya vibhāvetabboti dassento āha “**rattim tiṇukkāyā**”ti-ādi. Tattha **punappunaṃ pavesananti** punappunaṃ pādakajjhānasamāpajjanaṃ. **Thāmagatālokassa yathāparicchedena ṭhānanti** yattakaṃ ṭhānaṃ paricchinditvā kasiṇaṃ vaḍḍhitaṃ, thāmagatassa ālokassa tattakaṃ pharivā avatṭhānaṃ.

Anāpāthagatanti āpāthagamanayogyassa vasena vuttaṃ. Antokucchigatādi pana tadabhāvato tena visesitabbameva. **Tadevāti**

1. Visuddhi 1. 147 piṭṭhe.

2. Parikkammaṃ passatassa kasiṇārammaṇaṃ nānaṃ hotīti (Sī, Ka)

dibbacakkhumeva. **Etthā**ti etesu rūpamārabba pavattacittesu. **Rūpadassanasamatthanti** rūpaṃ sabhāvato vibhāvanasamattham cakkhuviññānaṃ viya. **Pubbabhāgacittānī**ti āvajjanaparikkammaśāṅkhātāni pubbhāgacittāni. Tāni hi ārammaṇaṃ karontānipi na yāthāvato taṃ vibhāvetvā pavattanti āvajjanasampaticchanacittāni viya.

Taṃ panetaṃ dibbacakkhu. **Paripanthoti** antarāyiko. **Jhānavibbhantakoti** jhānummattako jhānabhāvanāmukhena ummādappatto. **Appamattena bhavitabbanti** “dibbacakkhu mayā adhigatan”ti santosaṃ anāpajjitvā vipassanānuyogavasena vā saccābhisamayavasena vā appamattena bhavitabbaṃ.

Evam passitukāmena”ti-ādinaṃ dibbacakkhussa nānāvajjanaparikkammañceva dibbacakkhuññānaṃ dassitaṃ, na tassa uppattikkamoti taṃ dassetuṃ “**tatrāyan**”ti-ādi vuttaṃ. Taṃ heṭṭhā vuttanayattā suviññeyyameva.

Cutūpapātaññakathāvaṇṇanā niṭṭhitā.

Pakiṇṇakakathāvaṇṇanā

413. **Iti**ti evaṃ vuttappakārenāti attho. Tena “so evaṃ samāhite citte”ti-ādinaṃ¹ yathā dassetipāḷigatiṃ, tassā atthavivaraṇanayaṅca paccāmasati. Saccesu viya ariyasaccāni khandhesu upādānakkhandhā antogadhā. Tadubhaye ca sabhāvato, samudayato, atthaṅgamato, assādato, ādīnavato, nissaraṇato ca yathābhūtaṃ sayambhuññānaṃ avedī aññāsi paṭivijjhi pavedesi vāti sātisaṃyena pañcakkhandhāvabodhena bhagavāva thometabboti āha “**pañcakkhandhavidū**”ti. Nātvā viññeyyāti sambandho. **Tāsūti** pañcasu abhiññāsu. Taggahaṇeneva ca paribhaṇḍaññānaṃ gahitattā “pañcā”ti vuttaṃ. Tenāha “**etāsu hī**”ti-ādi.

Tattha **paribhaṇḍaññānī**ti parivāraññānī. Yathā hi sinerussa parivāraṭṭhānāni yāni taṃsiddhiyā siddhāni mekhalaṭṭhānāni paribhaṇḍānī vuccanti, evaṃ imānīpi dibbacakkhusiddhiyā siddhāni tassa paribhaṇḍānī vuttāni. **Idhāgatānī**ti ettha **idhā**ti yathā dassetāni suttapadāni sandhāya vuttaṃ.

1. Dī 1. 76, 77; Ma 1. 314, 346, 347; Vi 1. 5 piṭṭhādīsu.

Tato aññesu pana sāmaññaphalādīsu manomayaññāmpi visum abhiññāñābhāvena āgatam.

“**Tesū**”ti idaṃ paccāmasanaṃ kiṃ tikānaṃ, udāhu ārammaṇānanti? Kiñcetha yadi tikānaṃ, tadayuttaṃ. Na hi tikesu abhiññāñāṇāni pavattanti. Atha ārammaṇānaṃ, tampi ayuttaṃ. Na hi aññaṃ uddisivā aññassa paccāmasanaṃ yuttanti. Yathā icchati, tathā bhavatu tāva tikānaṃ, nanu vuttaṃ “na hi tikesu abhiññāñāṇāni pavattanti”ti? Nāyaṃ virodho tikavohārena ārammaṇānaṃyeva gayhamānattā. Atha vā pana hotu ārammaṇānaṃ, nanu vuttaṃ “na hi aññaṃ uddisivā aññassa paccāmasanaṃ yuttanti”ti? Ayampi na doso yathāvuttakāraṇenevāti.

414. Asatipi vatthubhede bhūmikālasantānabhedavasena bhinnesu **sattasu ārammaṇesu**. Tikavasena hesa bhedo gahito. Iddhividhaññāssa maggārammaṇatāya abhāvato idha maggārammaṇatiko na labbhati. **Tanti** iddhividhaññānaṃ. **Kāyaṃ cittasannissitaṃ katvāti**-ādīsu yaṃ vattabbaṃ, taṃ heṭṭhā vuttameva. **Upayogaladdhanti** laddha-upayogavacanaṃ. Dutiyāvibhattivāsena vuttaṃ “**kāyaṃ pariṇāmeti**”ti. Tenāha “**rūpakāyārammaṇato**”ti, rūpakāyassa vaṇṇārammaṇatoti attho.

Tadeva cittanti yadeva kāyavasena cittapariṇāmane vuttaṃ pādakajjhānacittam, tadeva. Rāmagāme cetiyaṃ ṭhapetvā sesesu sattasu cetiyesu dhātuyo iddhiyā āharitvā rājagahe bhūmighamaṇḍape kataṃ **mahādhātunidhānaṃ**. “**Ime gandhā**”ti-ādinā paccuppanne gandhādike gahetvāpi asussanādivisesayuttaṃ anāgatameva, nesam rūpaṃ adhiṭṭhānacittassa ārammaṇaṃ hoti anāgatādhiṭṭhānattā. **Vattaniyasenāsanam** nāma viñjhāṭaviyam¹ vihāro. **Dadhirasanti** dadhimaṇḍo, taṃ adhiṭṭhahantassa anāgataṃ dadhivaṇṇaṃ ārammaṇaṃ hoti. **Paccuppannārammaṇaṃ hoti** paccuppannassa rūpakāyassa ārammaṇakaraṇato.

Sakāyacittānanti attano kāyassa, cittassa ca.

415. **Saddo ca paritto** sabbassa rūpassa kāmāvacarabhāvato. **Vijjamānamevā**²ti vattamānaṃyeva.

1. Vijjhāṭaviyam (Syā)

2. Vijjamānaṃyeva (Ka)

416. **Sotāpannessa cittaṅti** sotāpannessa āveṇikaṃ cittaṃ.

Sakadāgāmissāti-ādisupi eśeva nayo. **Yāva arahato netabbanti** “sakadāgāmi anāgāmino cittaṃ na jānāti, anāgāmi arahato”ti evaṃ netabbaṃ. **Sabbesanti** sabbesaṃ ariyānaṃ jānāti, ko pana vādo anariyānaṃ. Aññopi ca uparimo anāgāmi-ādi heṭṭhimassa sakadāgāmi-ādikassa cittaṃ jānātīti sambandho.

Atītaśsa, anāgataśsa ca parassa cittaśsa jānanaṃ sambhavati, paccuppannaśsa pana na sambhavatīti adhippāyena pucchati **“kathaṃ paccuppannaṃ ārammaṇaṃ hotī”**ti. Itaro yattha sambhavati, taṃ dassanattaṃ paccuppannaṃ tāva vibhajitvā dassento **“paccuppannaṃ nāma tividhan”**ti-ādimāha. Tattha **uppādaṭṭhitibhaṅgappattanti** uppādaṃ, ṭhitim, bhaṅgañca pattaṃ, khaṇattayapariyāpannanti attho. **Etthantare ekadvesantativārā veditabbā**ti etthantare pavattā rūpasantativārā ekadvesantativārā nāmāti veditabbāti attho. Ālokaṭṭhānato ovarakaṃ paviṭṭhassa pageva tattha nisinnassa viya yāva rūpagataṃ pākaṭaṃ hoti. Tattha upaḍḍhavelā avibhūtavārā, upaḍḍhavelā vibhūtavārā, tadubhayaṃ gahetvā **“dvesantativārā”**ti vuttaṃ. Tayidaṃ na sabbasādhāraṇaṃ, ekaccassa sīghampi pākaṭaṃ hotīti “ekadvesantativārā”ti ekaggahaṇampi kataṃ, atiparittasabhāva-utu-ādisamuṭṭhānā vā ekadvesantativārā veditabbā.

Tīre akkanta-udakalekhā nāma kālussiyaṃ gatā tīrasamīpe udakarāji. **Yāva na vipasīdatīti** kālussiyavigamena yāva vipasannā na hoti. Keci pana “atinte tīre allapādena akkante yāva pāde udakalekhā na vipasīdati, na saṃsīdati, na vūpasammaṭī”ti evamettha atthaṃ vadanti. Te panete kiriyābhedenā vuttā kālavisēsā, na aññamaññaṃ samasamā, ūnādhikabhāgavantova daṭṭhabbā. **Dve tayo javanavārā** kāmāvacaṛajavanavasena veditabbā, na itarajavanavasena. Na hi te parimitakālā, anantarā pavattabhavaṅgādayopi tadantogadhāva daṭṭhabbā. **Tadubhayanti** rūpārūpasantatidvayaṃ.

Ekabhavaparicchinnanti paṭisandhicutiparicchinnaṃ. Ekabhavapariyāpannaṃ dhammajātaṃ etarahīti vattaṃ **addhāpaccuppannaṃ nāma**. **Manoti** sasampayuttaṃ viññāṇamaḥa. **Dhammāti** ārammaṇadhammā. **Manoti** vā manāyatanāṃ. **Dhammāti**

vedanādayo arūpakkhandhā. **Ubhayametaṃ paccuppananti** addhāpaccuppannaṃ hontaṃ etaṃ ubhayaṃ hotīti attho. **Vifññānanti** nikantiviññānaṃ. Tañhi tasmim̐ paccuppanne chandarāgavasena paṭibaddhaṃ hoti. **Abhinandatīti** taṇhādiṭṭhābhinandanāhi abhinandati. Tathābhūto ca vatthupariññāya abhāvato tesu paccuppannesu dhammesu **samhīratī** taṇhādiṭṭhīhi ākaḍḍhīyati. Ettha ca dvādasāyatanānaṃ¹ “etaṃ paccuppannaṃ”² āgatattā³ tattha pavatto chandarāgo addhāpaccuppannārammaṇo, na khaṇapaccuppannārammaṇoti viññāyatīti dassento “**yaṃ sandhāya bhaddekarattasutte -pa- samhīratīti vuttan**”⁴ ti āha. “Paccuppannaṃca yo dhammaṃ, tattha tattha vipassatī”⁴ etthāpi vipassanācittaṃ khaṇapaccuppannaṃ, vipassitabbadhammā addhāpaccuppannāti gahetabbaṃ. Aññathā vipassanāva na sambhaveyya. “Khaṇapaccuppannaṃ pāliyaṃ āgatan”⁴ ti na vuttam̐ tassa vasena ārammaṇakaraṇassa aṭṭhakathāyaṃ anāgatattā.

Kecīti abhayagirivāsino. **Ekakkhaṇe cittaṃ uppajjatīti** iddhicittassa uppattisamakālemeva paracittassapi uppattisambhavatoti yuttidassanaṃ. **Yathā ākāseti**-ādi sadisūdāharaṇaṃ. **Tam̐ pana tesam̐** vacanaṃ **ayuttam̐**. Kasmā? Maggaphalavīthito aññattha anīṭṭhe ṭhāne āvajjanajavanānaṃ nānārammaṇabhāvappattidosatoti yuttivacanaṃ.

Yadi evaṃ kathaṃ cetopariyaññānaṃ paccuppannārammaṇaṃ hotīti āha “**santatipaccuppannaṃ panā**”⁴ ti-ādi. **Addhāpaccuppannaṃ pana javanavārena dīpetabbaṃ**, na sakalena paccuppannaddhunāti adhippāyo.

Tatrāyaṃ dīpanāti-ādi javanavārassa addhāpaccuppannabhāvādīpanamukhena iddhicittassa pavatti-ākāradīpanaṃ. **Ītarānīti** āvajjanaparikkammacittāni. Ettha ca “kecī”⁴ ti yadipi abhayagirivāsino adhippetā, te pana cittassa ṭhitikkhaṇaṃ na icchantīti “ṭhitikkhaṇe vā paṭivijjhatī”⁴ ti na vattabbaṃ siyā. Tathā ye “iddhimassa ca⁵ parassa ca ekakkhaṇe cittaṃ uppajjatī”⁴ ti vadanti, tesam̐ “ṭhitikkhaṇe vā bhaṅgakkhaṇe vā paṭivijjhatī”⁴ ti vacanaṃ na sameti. Na hi tasmim̐ khaṇadvaye uppajjamānaṃ paracittena saha ekakkhaṇe uppajjati nāmāti. Ṭhitibhaṅgakkhaṇesu ca uppajjamānaṃ ekadesaṃ paccuppannārammaṇaṃ, ekadesaṃ atītārammaṇaṃ āpajjati. Yaṅca vuttam̐ “parassa cittaṃ jānissāmīti rāsivasena

1. Dvādasāyatanāni (Syā, Ka)

2. Ma 3. 238 piṭṭhe.

3. Āgatāni (Syā), ākatā (Ka)

4. Ma 3. 226, 239 piṭṭhādīsu.

5. Iddhimato ca (Ka)

mahājanassa citte āvajjite”ti, ettha ca mahājano atthato pare anekapuggalāti “paresaṃ cittaṃ jānissāmī”ti āvajjanappavatti vattabbā siyā. Athāpi parassāti mahājanassāti attho sambhaveyya, tathāpi tassa ekapuggalasseva vā cittarāsiṃ āvajjitvā ekassa paṭivijjhanāṃ ayuttaṃ. Na hi rāsi-āvajjanāṃ ekadesāvajjanāṃ hotīti, tasmā tehi “mahājanassa citte āvajjite”ti-ādi na vattabbāṃ.

Yaṃ pana te vadanti “yasmā iddhimassa ca parassa ca ekakkhaṇe cittaṃ uppajjati”ti. Tatthāyaṃ adhippāyo yutto siyā, cetopariyañāḥalābhī parassa cittaṃ ñātukāmo pādakajjhānaṃ samāpajjitvā vuṭṭhāya atītādivibhāgaṃ akatvā cittaśāmaññena “imassa **cittaṃ** jānāmi, imassa cittaṃ jānāmi”ti parikkammaṃ katvā puna pādakajjhānaṃ samāpajjitvā vuṭṭhāya śāmaññeneva cittaṃ āvajjitvā tiṇṇaṃ, catunnaṃ vā parikkammānaṃ anantarā cetopariyañāḥena paracittaṃ paṭivijjhanti vibhāveti rūpaṃ viya dibbacakkhunā. Tato paraṃ pana kāmāvacaracittehi sarāgādivavattānaṃ hoti nīlādivavattānaṃ viya. Tattha dibbacakkhunā dīṭṭhahadayavatturūpassa sattassa abhimukhībhūtaṃ cittaśāmaññena cittaṃ āvajjayamānaṃ āvajjanāṃ abhimukhībhūtaṃ vijjamānaṃ cittaṃ ārammaṇaṃ katvā cittaṃ āvajjeti. Parikkammāni ca taṃ taṃ vijjamānaṃ cittaṃ cittaśāmaññeneva ārammaṇaṃ katvā cittaajānanaparikkammāni hutvā pavattanti. Cetopariyañāḥaṃ pana vijjamānaṃ cittaṃ paṭivijjhantaṃ vibhāventaṃ tena saha ekakkhaṇe eva uppajjati.

Tattha yasmā santānassa santānaggahaṇato ekattavasena āvajjanādīni “cittaṃ”tveva pavattāni. Tañca cittaṃveva, yaṃ cetopariyañāḥena vibhāvitaṃ. Tasmā samānākārappavattito na anitṭhe maggaphalavīthito aññasmiṃ ṭhāne nānārammaṇatā āvajjanajavanānaṃ hoti. Paccuppannārammaṇaṃca parikkammaṃ paccuppannārammaṇassa cetopariyañāḥassa āsevanapaccayena paccayoti siddhaṃ hoti. Atītattiko ca evaṃ upapanno hoti. Aññāthā santatipaccuppanne, addhāpaccuppanne ca “paccuppannaṃ”ti idha vuccamāne atītānāgatānaṃca paccuppannatā āpajjeyya. Tathā ca sati “paccuppanno dhammo paccuppannassa dhammassa anantarapaccayena paccayo”ti vattabbāṃ siyā, na ca taṃ vuttaṃ. “Atīto dhammo paccuppannassa dhammassa anantarapaccayena paccayo. Purimā purimā atītā khandhā pacchimānaṃ pacchimānaṃ paccuppannānaṃ khandhānaṃ

anantara -pa- anulomaṃ gotrabhussā”ti-ādi¹ vacanato pana addhāsantatipaccuppannesveva ca anantarātītā cattāro khandhā atītāti viññāyanti. Na ca **abhidhammamātikāyaṃ**² āgatassa paccuppannapadassa addhāsantatipaccuppannapadatthatā katthaci pāḷiyaṃ vuttā. Tasmā tehi iddhiṃmassa ca parassa ca ekakkhaṇe cittupattiyā cetopariyañāṇassa paccuppannārammaṇatā vuttā. Yadā pana “yaṃ imassa cittaṃ pavattaṃ, taṃ jānāmi. Yaṃ bhavissati, taṃ jānāmi”ti vā ābhogaṃ katvā pādakajjhānasamāpajjanādīni karoti, tadā āvajjanaparikkammāni, cetopariyañāṇaṇca atītānāgatārammaṇāneva honti āvajjaneneva vibhāgassa katattā.

Ye pana “iddhimā parassa cittaṃ jānitukāmo āvajjeti, āvajjanaṃ khaṇapaccuppannaṃ ārammaṇaṃ katvā teneva saha nirujjhati. Tato cattāri, pañca vā javanāni, yesaṃ pacchimaṃ iddhicittaṃ, sesāni kāmāvacarāni, tesaṃ sabbesampi tadeva niruddhaṃ cittaṃ ārammaṇaṃ hoti, na ca tāni nānārammaṇāni honti addhānavasena paccuppannārammaṇattā”ti idaṃ vacanaṃ nissāya “āvajjanajavanānaṃ paccuppannātītārammaṇabhāvepi nānārammaṇatābhāvo viya, ekadviticatupañcacittakkhaṇānāgatesupi cittesu āvajjitesu āvajjanajavanānaṃ yathāsambhavaṃ anāgatapaccuppannātītārammaṇabhāvepi nānārammaṇatā na siyā. Tena catupañcacittakkhaṇānāgate āvajjite anāgatārammaṇaparikkammānantaraṃ khaṇapaccuppannārammaṇaṃ cetopariyañāṇaṃ siddhaṃ”ti vadanti. Tesaṃ vādo “anāgatārammaṇo dhammo paccuppannārammaṇassa dhammassa āsevanapaccayena paccayo, paccuppannārammaṇo dhammo atītārammaṇassa dhammassa āsevanapaccayena paccayo”ti imesaṃ pañhānaṃ anuddhaṭṭatā, gaṇanāya ca “āsevane tīṇi”ti³ vuttattā na sījhati. Na hi kusakiriyāmahaggataṃ anāsevanaṃ atthīti. Etassa ca vādassa nissayabhāvo āvajjanajavanānaṃ khaṇapaccuppannaniruddhārammaṇatāvacaṇassa na sījhati, “yaṃ pavattaṃ, pavattissati cā”ti visesaṃ akatvā gahaṇe āvajjanassa anāgataggahaṇābhāvaṃ, tadabhāvā javanānampi vattamānaggahaṇābhāvaṇca sandhāyeva tassa vuttattā. Tadā hi bhavaṅgalanānantaraṃ abhimukhībhūtaṃeva cittaṃ ārabha āvajjanā pavattatīti jānanacittassapi vattamānārammaṇabhāve āvajjanajānanacittānaṃ sahaṭṭhānadosaṃpattiyā,

1. Abhi 9. 413 piṭṭhe Paṭṭhāne. 2. Abhi 1. 3 piṭṭhe. 3. Abhi 9. 432 piṭṭhe Paṭṭhāne.

rāsi-ekadesāvajjanapaṭivedhe sampattasampattāvajjanajānane ca aniṭṭhe ṭhāne āvajjanajavanānam nānārammaṇabhāvadosāpattiyā ca yaṃ vuttam “khaṇapaccuppannam cittam cetopariyañāṇassa ārammaṇam hoti”ti, tam ayuttanti paṭikkhipitvā yathāvuttadosāpattim, kālavasena ca addhāsantatipaccuppannārammaṇattā nānārammaṇatābhāvamdisvā āvajjanajavanānam vattamānataṃniruddhārammaṇabhāvo vuttoti. Tampi vacanam purimavādino nānujāneyyūṃ. Tasmim hi sati “āvajjanā kusalānan”ti-ādīsu¹ viya aññapadasaṅgahitassa anantarapaccayavidhānato “paccuppannārammaṇa-āvajjanā atītārammaṇānam khandhānam anantarapaccayena paccayo”ti ca vattabam siyā, na ca vuttanti.

Kasmā panevaṃ cetopariyañāṇassa paccuppannārammaṇatā vicāritā, nanu “atīto dhammo paccuppannassa dhammassa, anāgato dhammo paccuppannassa dhammassa ārammaṇapaccayena paccayo”ti² etesaṃ vibhaṅgesu “atītā khandhā iddhividhañāṇassa cetopariyañāṇassa pubbenivāsānussatiñāṇassa yathākammūpagañāṇassa āvajjanāya ārammaṇapaccayena paccayo, anāgatā khandhā iddhividhañāṇassa cetopariyañāṇassa anāgataṃsañāṇassa āvajjanāya ārammaṇapaccayena paccayo”ti², uppanattike ca “anuppannā khandhā uppādino khandhā iddhividhañāṇassa cetopariyañāṇassa anāgataṃsañāṇassa āvajjanāya ārammaṇapaccayena paccayo”ti³ cetopariyañāṇaggahaṇam katvā “paccuppanno dhammo paccuppannassa dhammassā”ti⁴ etassa vibhaṅge “paccuppannā khandhā iddhividhañāṇassa āvajjanāya ārammaṇapaccayena paccayo”ti, uppanattike ca “uppannā khandhā iddhividhañāṇassa āvajjanāya ārammaṇapaccayena paccayo”ti⁶ ettakasseva vuttattā paccuppanne citte cetopariyañāṇam nappavattatīti viññāyati. Yadi hi pavatteyya, purimesu viya itaresu ca cetopariyañāṇaggahaṇam kattabam siyāti? Saccam kattabam, nayadassanavasena pana tam saṅkhittanti aññāya pāliya viññāyati.

“Atītārammaṇo dhammo paccuppannārammaṇassa dhammassa ārammaṇapaccayena paccayo, anāgatārammaṇo dhammo paccuppannārammaṇassa,

1. Abhi 8. 138 piṭṭhe Paṭṭhāne.

3. Abhi 9. 405 piṭṭhe Paṭṭhāne.

5. Abhi 9. 413 piṭṭhe Paṭṭhāne.

2. Abhi 9. 412 piṭṭhe Paṭṭhāne.

4. Abhi 9. 412 piṭṭhe Paṭṭhāne.

6. Abhi 9. 405 piṭṭhe Paṭṭhāne.

paccuppannārammaṇo dhammo paccuppannārammaṇassā”ti¹ etesaṃ hi vibhaṅgesu “cetopariyañāṇena atītārammaṇapaccuppannacittasamaṅgissa cittaṃ jānāti, atītārammaṇā paccuppannā khandhā cetopariyañāṇassa āvajjanāya ārammaṇapaccayena paccayo, cetopariyañāṇena anāgatārammaṇapaccuppannacittasamaṅgissa cittaṃ jānāti, anāgatārammaṇā paccuppannā khandhā cetopariyañāṇassa āvajjanāya ārammaṇapaccayena paccayo, cetopariyañāṇena paccuppannārammaṇacittasamaṅgissa cittaṃ jānāti, paccuppannārammaṇā paccuppannā khandhā cetopariyañāṇassa āvajjanāya ārammaṇapaccayena paccayo”ti² cetopariyañāṇassa paccuppannārammaṇe pavatti vuttāti. Tenevāyaṃ vicāraṇā katāti veditabbā.

417. **Tesanti** tesu dvīsu ñāṇesūti niddhāraṇe sāmivacanaṃ. **Cittameva ārammaṇaṃ** cetopariyañāṇattāti adhippāyo. Tenāha “**aññaṃ khandhaṃ vā khandhappaṭibaddhaṃ vā na jānāti**”ti. Tattha **khandhappaṭibaddhaṃ** nāmagottādi. Yadi evaṃ kathaṃ maggārammaṇanti āha “**maggasampayuttacittārammaṇattā pana pariyāyato maggārammaṇanti vuttan**”ti. **Cetanāmattameva ārammaṇaṃ**, tathā hi taṃ “yathākammūpagañāṇaṃ”ti vuccatīti adhippāyo. **Khandhappaṭibaddhesūti** ettha nibbānampi khandhappaṭibaddhameva. Khandhe hi visayikatattāti vadanti. Tathā hi vuttaṃ **aṭṭhasālīniyaṃ** “atīte buddhā maggaṃ bhāvayīmsu, phalaṃ sacchākāmsu, anupādisesāya nibbānadhātuyā parinibbāyīmsūti chinnavaṭumakānussaraṇavasena maggaphalanibbānapaccavekkhaṇatopi appamāṇārammaṇaṃ”ti³. Tattha maggaphalapaccavekkhaṇāni tāva pubbenivāsānussatiñāṇena maggaphalesu ñāṇesu pavattanti. Nibbānapaccavekkhaṇāna nibbānārammaṇesu appamāṇadhammesu ñāṇesūti maggādipaccavekkhaṇāni pubbenivāsānussatiñāṇassa appamāṇārammaṇataṃ sādhetīti veditabbāni. “Appamāṇā khandhā pubbenivāsānussatiñāṇassa ārammaṇapaccayena paccayo”⁴ icceva hi vuttaṃ, na vuttaṃ “nibbānaṃ”ti. Tasmā pubbenivāsāñāṇena eva maggaphalapaccavekkhaṇakicce vuccamānepi nibbānapaccavekkhaṇatā na sakkā vattum. Aṭṭhakathāyaṃ pana nibbānārammaṇatā nidassito.

1. Abhi 9. 424 piṭṭhe Paṭṭhāne.

2. Abhi 9. 424 piṭṭhe Paṭṭhāne.

3. Abhi-Ṭṭha 1. 440 piṭṭhe.

4. Abhi 9. 324 piṭṭhe Paṭṭhāne.

Kusalā khandhā iddhividhapubbenivāsānāgataṃsaññāpekkho bahuvacananiddeso, na cetopariyayathākammūpagaññāpekkhāti tesam catukkhandhārammaṇabhāvassa asādhakoti ce? Na, aññattha “avitakkavicāramattā khandhā ca vicāro ca cetopariyaññassa pubbenivāsānussatiññassa anāgataṃsaññassa ārammaṇapaccayena paccayo”¹, “savitakkasavicārā khandhā ca vitakko ca cetopariyaññassa pubbenivāsānussatiññassa anāgataṃsaññassa ārammaṇapaccayena paccayo”² ca vuttattā cetopariyaññāpekkhāpi bahuvacananiddesoti imassa atthassa siddhito. Evampi yathākammūpagaññassa “avitakkavicāramattā khandhā ca vicāro cā”³ti-ādīsu avuttattā catukkhandhārammaṇatā na sijjhatīti? Na, tattha avacanassa aññakāraṇatā. Yathākammūpagaññena hi kammaśaṃsaṭṭhā cattāro khandhā kammamukhena gayhati. Tañhi yathā cetopariyaññam purimaparikkammavasena avitakkādivibhāgam, sarāgādivibhāgaṃca cittaṃ vibhāveti, na evaṃ vibhāgam vibhāveti. Kammavaseneva pana samudāyam vibhāveti, tasmā “avitakkavicāramattā khandhā ca vicāro cā”³ti-ādike vibhāgakaṇe³ taṃ na vuttaṃ, na catukkhandhānārammaṇatoti. Idaṃ panassa akāraṇanti keci. Tatthāpi “pubbenivāsānussatiññassa yathākammūpagaññassa anāgataṃsaññassa”³ti paṭhanti eva. Na hi taṃ kusalākusalavibhāgam viya savitakkādivibhāgam kammaṃ vibhāvetuṃ asamatthaṃ. Duccaritasucaritavibhāvanampi hi lobhādi-alobhādisampayogavibhāgavisesavibhāvanam hotīti.

“Pubbenivāsānussatiññam, nāmagottānussaraṇakāle na vattabbārammaṇan”³ti ettakameva aṭṭhakathāyam vuttaṃ. Nāmagottaṃ pana khandhūpanibandho sammutisiddho byañjanattho, na byañjananti. **Ayamettha ambhākaṃ khantīti** ācariyassāyam attano mati. Yam pana vuttaṃ “na byañjanan”³ti, tassa samatthanam “**byañjanañhī**”³ti-ādi.

419. **Kāmāvacare nibbattissatīti** nibbattikkhandhajānanamāha.

420. **Etthāti** etasmim ajjhāttārammaṇattikavasena abhiññāñānam, ārammaṇavicāre. “Ajjhāttārammaṇañceva bahiddhārammaṇañcā”³ti ekajjham

1. Abhi 9. 44 piṭṭhe Paṭṭhāne.

2. Abhi 9. 45 piṭṭhe Paṭṭhāne.

3. Ādikenā vibhāgakaṇena (Syā)

gahetvā yaṃ vuttam̐ porāṇaṭṭhakathāyaṃ, taṃ “kālena -pa- hotiyevā”ti iminā adhippāyena vuttanti attho. Na hi ajjhatabhiddhānāma visum̐ ekam̐ atthi, nāpi taṃ ekajjham̐ ārammaṇam̐ kariyatīti. Yadi evam̐ tiko eva na pūrati padadvayāsaṅgahitassa tatiyassa atthantarassa abhāvato. Na, pakārabhedavisayattā tikaniddesassa. Tathā hi aṭṭhakathāyaṃ “te eva tippakārepi dhamme”ti vuttam̐. Te eva ajjhattādivasena tividhepi dhammeti attho. Ettha hi “te eva dhamme”ti avatvā “tippakāre”ti vacanam̐ pakārabhedanibaddhanā yaṃ tikadesanāti dassanattam̐. Yathā hi kusalattikādīnam̐ desanā yathāraham̐ dhammānam̐ jātisampayogappahānasikkhābhūmi-ārammaṇappahedaniamakālādibhedanibandhanā, na evamayaṃ jāti-ādibhedanibandhanā, nāpi sanidassanattikahetudukādidesanā viya sabhāvādibhedanibandhanā, atha kho pakārabhedanibandhanā. Pañceva hi khandhā sasantatipariyāpannataṃ upādāya “ajjhattā”ti vuttā, parasantatipariyāpannataṃ upādāya “bahiddhā”ti, tadubhayaṃ upādāya “ajjhatabhiddhā”ti. Tenāha “anindriyabaddharūpañca nibbānañca ṭhapetvā sabbe dhammā siyā ajjhattā, siyā bahiddhā, siyā ajjhatabhiddhā”ti¹. Nanu cettha atthantarābhāvato, pakārantarassa ca anāmaṭṭhattā tatiyo rāsi natthīti? Nayidamevaṃ. Yadihi hi paṭhamapadena asaṅgahitasāṅgaṇhanavasena dutiyapadassa pavattattā sabbepi sabhāvadhammā padadvayeneva pariggahitā, tehi pana visum̐ visum̐ gahitadhamme ekajjham̐ gahaṇavasena tatiyapadam̐ vuttanti attheva tatiyo rāsi. Na hi samudāyo avayavo hoti, bhinnavatthuke pana dhamme adhiṭṭhānabhedam̐ amuñcitvā ekajjham̐ gahaṇam̐ na sambhavatīti kālena ajjhattam̐, kālena bahiddhā jānanakāleti vuttanti daṭṭhabbam̐.

Abhiññāniddesavaṇṇanā niṭṭhitā.

Iti terasamaparicchedavaṇṇanā.

1. Abhi 1. 273 piṭṭhe.

14. Khandhaniddesavaṇṇanā

Paññākathāvaṇṇanā

421. **Sabbākārenā**ti upacārākāro, appanākāro, vasībhāvākāro, vitakkādisamatikkamākāro, rūpādīhi virajjanākāro, cuddasadhā cittassa paridamanākāro, pañcavidha-ānisaṃsādhigamākāroti evamādinā sabbena bhāvanākārena.

Tadanantarāti “cittam paññan”ti evam desanākkamena, paṭipattikkamena ca tassa samādhissa anantarā. Paññā bhāvetabbā samādhibhāvanāya samannāgatena bhikkhunāti sambandho. “Paññañca bhāvayan”ti evam **atisaṅkhepadesitattā**, gāthāvaṇṇanāyaṃ vā “samādhisilāyaṃ sunisitāṃ vipassanāpaññāsattan”ti evam ativiya saṅkhepena bhāsittā ayaṃ sā paññāti sabhāvato **viññātumpi tāva na sukarā**. Bhāvanāvidhānassa pana adassitattā pageva bhāvetum na sukarāti sambandho. Pucchanatṭhena pañhā, kammaṃ kiriyā karaṇaṃ, pañhāva kammaṃ **pañhākammaṃ**, pucchanapayogoti attho.

Kā paññāti sarūpapucchā. **Kenatṭhena paññāti** kena atthena paññāti vuccati, “paññā”ti padaṃ kaṃ abhidheyyattham nissāya pavattanti attho. Sā panāyaṃ paññā sabhāvato, kiccato, upatṭhānākārato, āsannakāraṇato ca katham jānitabbāti āha “**kānassā lakkhaṇarasapaccupatṭhānapadatṭhānāni**”ti. **Katividhāti** pabhedapucchā. Kasmā panettha saṅkilesavodānapucchā na gahitāti? Vuccate—lokuttarāya tāva paññāya nattheva saṅkilesa. Asati ca tasmim kuto vodānapucchāti tadubhayaṃ na gahitaṃ. Lokiyāya pana tāni bhāvanāvidhāne eva antogadhānīti katvā visum na gahitāni maggāmaggañāṇadassanavisuddhi-antogadhattā, samādhibhāvanāyaṃ vā vuttanāyānusāreṇa veditabbānīti na gahitāni. Paṭipatti nāma diṭṭhānisamse eva hotīti āha “**paññābhāvanāya ko ānisaṃso**”ti.

422. **Tatrā**ti tasmim, tassa vā pañhākamma. **Vissajjananti** vivaraṇaṃ. Pucchito hi attho avibhāvitattā nigūlho¹ muṭṭhiyaṃ kato viya tiṭṭhati,

1. Niruḷho (Syā)

tassa vivaraṇaṃ viṣajjanaṃ vibhūtabhāvakaṇaṇato. **Kā paññāti** kāmañcāyaṃ sarūpapucchā, vibhāgavantānaṃ pana sabhāvavibhāvanaṃ vibhāgadassanamukheneva hotīti vibhāgo tāva anavasesato dassetabbo. Taṃdassanena ca ayamādīnavoti dassetuṃ “**paññā bahuvidhā**”ti-ādi vuttaṃ. Tattha **bahuvidhāti** kusalādivasena anekavidhā. **Nānappakārāti** atthajāpikādibhedena¹, sutamayaññādibhedena ca nānāvidhā. **Taṃ sabbanti** taṃ anavasesaṃ paññāvibhāgaṃ. **Na sādheyyāti** vipassanābhāvanāya saddhiṃ maggabhāvanā idha adhippetattho. Tāya hi taṇhājaṭāvijaṇaṃ, tañca na sādheyya. Anavasesato hi paññāpabhede viṣajjiyamāne “ekavidhena ñāṇavatthū”ti-ādiko² sabbo ñāṇavatthuvibhaṅge, suttantesu ca tattha tattha āgato paññāpabhedo. Sakalopi vā abhidhammanayo āharitvā viṣajjetabbo bhaveyya, tathā ca sati yvāyaṃ idha paññābhāvanāvidhi adhippeto, tassa viṣajjanāya okāsova na bhaveyya. Kiñca yvāyaṃ ṭhānāṭhānakammantaravipākantarādivisaye paññāya pavattibhedo, sopi yathārahaṃ saddhiṃ phalāphalabhedena vibhajitvā viṣajjetabbo siyā. So ca pana viṣajjiyamāno aññadatthu vikkhepāya saṃvatteyya, yathā taṃ avisaye. Tenāha “**uttari ca vikkhepāya saṃvatteyyā**”ti. **Kusalacittasampayuttam viṣassanāññānti** ettha **kusala**-ggahaṇena duvidhampi abyākataṃ nivatteti, tathā “atthi saṃkiliṭṭhapaññā”ti evaṃ pavattaṃ micchāvādaṃ paṭisedheti. **Vipassanāññāṇa**-ggahaṇena sesakusalapaññā.

423. **Sañjānanavijānanākāravisitṭhanti** sañjānanākāravijānanākārehi sātisayaṃ. Yato **nānappakārato jānanaṃ** jānanaabhāvo viṣayaggahaṇākāro. So hi nesaṃ samāno, na sañjānanādi-ākāro. **Pītakantīti** ettha **iti**-saddo ādi-attho, tena “lohitakaṃ odātaṃ dīghaṃ rassaṃ”ti-ādike saññāya gahetabbākāre saṅgaṇhāti. **Sañjānanamattamevāti** ettha **sañjānanam** nāma “nīlaṃ pītan”ti-ādikaṃ ārammaṇe vijjamānaṃ vā avijjamānaṃ vā saññānimittaṃ katvā jānanaṃ. Tathāhesā puna sañjānanapaccayanimittakaraṇarasā. **Matta**-saddena viṣesanivatti-atthena vijānanapajānanākāre nivatteti, **eva**-saddena kadācipi imissā te viṣesā natthevāti avadhāreti. Tenāha “**aniccaṃ**

1. Atthajātikādibhedena (Sī)

2. Abhi 2. 323 piṭṭhe.

dukkhan”ti-ādi. Tattha viññāṇakiccampi kātum asakkontī saññā kuto paññākiccaṃ kareyyāti **“lakkhaṇapaṭivedhaṃ pāpetum na sakkoti”**ceeva vuttaṃ, na vuttaṃ **“maggapātubhāvan”**ti. Ārammaṇe pavattamānaṃ viññāṇaṃ na tattha saññā viya nilapītādikassa sañjānavaseneva pavattati, atha kho tattha aññaṅca visesaṃ¹ jānantameva pavattatīti āha **“viññāṇan”**ti-ādi. Kathaṃ pana viññāṇaṃ lakkhaṇapaṭivedhaṃ pāpetīti? Paññāya dassitamaggena. Lakkhaṇārammaṇikavipassanāya hi anekavāraṃ lakkhaṇāni paṭivijjhivā paṭivijjhivā pavattamānāya paguṇabhāvato paricayavasena ṇāṇavippayuttacittenapi vipassanā sambhavati, yathā taṃ paguṇassa ganthassa sajjhāyane ñāyāgatāpi vārā na viññāyanti. **Lakkhaṇapaṭivedhanti** ca lakkhaṇānaṃ ārammaṇakaraṇamattaṃ sandhāya vuttaṃ, na paṭivijjhanāṃ. **Ussakkivāti** udayabbayañāṇapaṭipāṭiyā āyūhitvā. **Maggapātubhāvaṃ pāpetum na sakkoti** asamboḍhasabhāvattā. **Vuttanayavasena**ti viññāṇe vuttanayavasena ārammaṇaṅca jānāti, lakkhaṇapaṭivedhaṅca pāpeti. Attano pana anaññasādhāraṇena ānubhāvena **ussakkivā maggapātubhāvaṅca pāpeti**.

Idāni yathāvuttamatthaṃ upamāya paṭiṭṭhāpetum **“yathā hī”**ti-ādi vuttaṃ. Tattha **ajātabuddhīti** asañjātabyavahārabuddhi.
Upabhogaparibhoganti upabhogaparibhogārahaṃ,
 upabhogaparibhogavatthūnaṃ paṭilābhayogyanti attho. **Chekoti** mahāsāro.
Kūṭoti kahāpaṇapatirūpako tambakaṃsādimayo. **Addhasāroti**
 upaḍḍhagghanako. **Iti**-saddo ādi-attho, tena pādasāra
 samasāraparopādasārādīnaṃ saṅgaho. **Te pakāreti**
 indajālājātipupphādippakāre² ceva chekādippakāre ca.

Saññā hīti-ādi upamāsamsandanāṃ. **Saññā** vibhāgaṃ akatvā piṇḍavaseneva ārammaṇassa gahaṇato dāraḥassa kahāpaṇadassanasadisī vuttā. Tathā hi sā **“yathā-upaṭṭhitavisayapadaṭṭhānā”** vuccati. **Viññāṇaṃ** ārammaṇe ekaccavisesagahaṇasamatthatāya gāmikapurisassa kahāpaṇadassanasadisāṃ vuttaṃ. **Paññā** ārammaṇe anavasesavisesāvabodhato heraññikassa kahāpaṇadassanasadisī vuttāti daṭṭhabbāṃ.

1. Atha kho na tattha aññaṅca tādīsaṃ visesaṃ (Sī, Syā)

2. Indajālāmātipupphādippakāre (Syā), indajālā-āsāvātipupphādippakāre (Ka)

“**Nānappakārato jānanan**”ti iminā ñeyyadhammā paccekam nānappakārāti tesam yāthāvato avabodho paññāti dasseti. Tathā hi vuttam “sabbe dhammā sabbākārena buddhassa bhagavato ñaṇamukhe āpāthamāgacchanti”ti¹.

Yatthāti yasmim cittuppāde. **Na tattha ekamsena hotīti** tasmim cittuppāde paññā ekantena na hoti. Na hi duhetuka-ahetukacittuppādesu paññā uppajjati. **Avinibbhuttāti** aviyuttā. **Tehīti** saññāviññāṇehi. Yathā hi sukham pītiyā na niyamato aviyuttam, evam saññāviññāṇāni paññāya na niyamato aviyuttāti. Yathā pana pīti sukkena niyamato aviyuttā, evam paññā saññāviññāṇehi niyamato aviyuttā. Tasmā evam avinibbhuttesu imesu tisu dhammesu tesam vinibbhogo dukkaroti tiṇṇam janānam kahāpaṇadassanam nidassanti. Tesam duviññeyyanānattatamyeva vacanantarenapi dassetum “**tenāhā**”ti-ādi vuttam. Tattha rūpadhammesupi tāva nānānadīnam udakassa, nānātelassa vā ekasmim bhājane pakkhipitvā mathitassa “idam asukāya nadiyā udakam, idam asukatelan”ti niddhāretvā sarūpato dassanam dukkaram, kimaṅgam pana arūpadhammesūti dassento “**yam arūpīnam cittacetasikānan**”ti-ādimāha.

424. Dhammānam sako bhāvo, samāno ca bhāvo **dhammasabhāvo**. Tattha paṭhamena kakkhaḷaphusanādisalakkhaṇam gahitam, dutiyena aniccadukkhataḍisāmaññalakkhaṇam. Tadubhayassa ca yāthāvato paṭivijjhanalakkhaṇā paññāti āha “**dhammasabhāvapaṭivedhalakkhaṇā paññā**”ti. Ghaṭapaṭādiपाṭicchādakassa bāhirandhakārassa dipālokādi viya yathāvuttadhammasabhāvapaṭicchādakassa **mohandhakārassa viddhamśanarasā**. Uppajjamāno eva hi paññāloko hadayandhakāram vidhamento evam uppajjati, tato eva dhammasabhāvesu asammuyhanākārena paccupaṭṭhatīti **asammohapaccupaṭṭhānā**. Kāraṇabhūtā vā sayam phalabhūtam asammoham paccupaṭṭhāpetīti evampi **asammohapaccupaṭṭhānā**. Vipassanāpaññāya idha adhippetattā “**samādhi tassā padaṭṭhānan**”ti vuttam. Tathā hi “samāhito yathābhūtam pajānāti”ti² suttapadam nibandhanabhāvena āgataṃ.

1. Khu 7. 277; Khu 8. 175; Khu 9. 376 piṭṭhesu.

2. Saṃ 2. 12, 302; Saṃ 3. 363; Khu 10. 50; Khu 11. 38 piṭṭhesu.

Paññāpabhedakathāvaṇṇanā

425. Dhammasabhāvapaṭivedho nāma paññāya āveṇiko sabhāvo, na tenassā koci vibhāgo labbhatīti āha “**dhammasabhāvapaṭivedhalakkhaṇena tāva ekavidhā**”ti. Lujjanapalujjanaṭṭhena **loko** vuccati vaṭṭam, tappariyāpannatāya loke niyuttā, tattha vā viditāti **lokiyā**. Tattha apariyāpannatāya lokato uttarā uttiṇṇāti **lokuttarā**. Lokuttarāpi hi maggasampayuttā bhāvetabbā. Vipassanāpariyāyopi tassā labbhatevāti lokuttaraggahaṇam na virujjhati. Attānam ārammaṇam katvā pavattehi saha āsavehīti **sāsavā**, ārammaṇakaraṇavasenapi natthi etissā āsavāti **anāsavā**. **Ādi**-saddena āsavavippayuttasāsavadukādīnam saṅgaho daṭṭhabbo. **Nāmarūpavavattānavasenāti** nāmavavattānavasena, rūpavavattānavasena ca. Paṭhamam nibbānadassanato dassanañca, nissayabhāvato sampayuttā dhammā bhavanti ettha, sayampi vā bhavati uppajjati na nibbānam viya apātubhāvanti bhūmi cāti **dassanabhūmi**, paṭhamamaggo. Sesamaggattayam pana yasmā paṭhamamaggena diṭṭhasmimyeva dhamme bhāvanāvasena uppajjati, na adiṭṭhapubbam kiñci passati, tasmā bhāvanā ca yathāvuttenatthena bhūmi cāti **bhāvanābhūmi**. Tattha paññā dassanabhūmibhāvanābhūmivasena duvidhāti vuttā. Sutādinirapekkhāya cintāya nibbattā **cintāmayā**. Evam **sutamayā**, **bhāvanāmayā** ca. Maya-saddo paccekam sambandhitabbo. Āye vaḍḍhiyam kosallam **āyakosallam**, apāye avaḍḍhiyam kosallam **apāyakosallam**, upāye tassa tassa atthassa nibbattikāraṇe kosallam **upāyakosallanti** visum visum kosallapadam sambandhitabbam. Ajjhattam abhiniveso paṭipajjanam etissāti **ajjhattābhinivesā**. Evam **bahiddhābhinivesā**, **ubhayābhinivesā** ca veditabbā.

426. **Lokiyamaggasampayuttāti** lokiyakusalacittuppādesu maggasampayuttā, visesato diṭṭhivisuddhi-ādivisuddhicatukkasāṅgahitamaggasampayuttā. Samudāyesu pavattā samaññā tadekadesesupi vattatīti āha “**maggasampayuttā**”ti, paccekampi vā sammādiṭṭhi-ādīnam maggasamaññāti katvā evam vuttam.

Dhammanānattābhāvepi padatthanānattamattena dukkaravacanāṃ hotīti vuttaṃ “**atthato panesā lokiyalokuttarāvā**”ti.

Āsavavippayuttasāsavadukādīsupi vippayuttatādiggahaṇameva viseso, atthato lokiyalokuttarāva paññāti āha “**eseva nayo**”ti. **Ādi**-saddena oghanīya-oghavippayutta-oghanīyādidukānaṃ saṅgaho daṭṭhabbo. Paṭhamajjhānikāni cattāri maggacittāni, tathā dutiyādi-jjhānikāni cāti evaṃ soḷasasu maggacittesu. Vipassanāpaññāya idha adhippetattā mahaggatapaññāna gahitā.

427. **Attano cintāvasenā**ti tassa tassa anavajjassa atthassa sādhaneparopadesena vinā attano upāyacintāvaseneva. **Sutavasenā**ti yathāsutassa paropadesassa vasena. **Yathā tathā vā**ti parato upadesaṃ sutvā vā asutvā vā sayameva bhāvanaṃ anuyuñjantassa. “**Appanāppattā**”ti idaṃ sikhāppattabhāvanāmayāṃ dassetuṃ vuttaṃ, na pana “appanāppattāva bhāvanāmayā”ti.

Yogavihitesūti paññāvihitesu paññāpariṇāmitesu upāyasampāditesu. **Kammāyatanesū**ti ettha kammameva kammāyatanaṃ, kammañca taṃ āyatanañca ājīvānanti vā kammāyatanaṃ. Esa nayo **sippāyatanesupi**. Tattha duvidhaṃ kammaṃ hīnañca vaḍḍhakīkammādi, ukkaṭṭhañca kasivāṇijādi. Sippampi duvidhaṃ hīnañca naḷakārasippādi, ukkaṭṭhañca muddāgaṇanādi. Vijjāva **vijjāṭṭhānaṃ**. Taṃ dhammikameva, nāgamaṇḍalaparittaphudhamanakamantasadisā¹ veditabbaṃ. Tāni panetāni ekacce paṇḍitā bodhisattasadisā manussānaṃ phāsuvihāraṃ ākaṅkhaṇāneva aññehi kariyamānāni passanti, na vā katāni uggaṇhanti na kathentānaṃ suṇanti, atha kho attano dhammatāya cintāya karonti paññavantehi attano dhammatāya cintāya katānipi aññehi uggaṇhitvā karontehi katasadisāneva honti.

Kammassakatanti “idaṃ kammaṃ sattānaṃ sakaṃ, idaṃ no sakan”ti evaṃ jānanaññaṇaṃ. **Saccānulomikanti** vipassanāññaṇaṃ. Taṃ hi saccapaṭivedhassa anulomanato “saccānulomikan”ti vuccati. Idānissa pavattanākāraṃ dassetuṃ “**rūpaṃ aniccanti vā**”ti-ādi vuttaṃ. Tattha vā-saddena aniyamatthena

1. Thūpanakamantasadisāṃ (Sī, Ka) Abhi-Ṭṭha 2. 393 piṭṭhe passitabbaṃ.

dukkhānattalakkhaṇānīpi gahitānevāti daṭṭhabbaṃ nānantariyakabhāvato. Yaṃ hi aniccaṃ, taṃ dukkhaṃ. Yaṃ dukkhaṃ, tadanattāti. **Yaṃ evarūpinti** yaṃ evaṃ heṭṭhā niddiṭṭhasabhāvaṃ. **Anulomikaṃ khantinti**-ādīni paññāvevacanāni. Sā hi heṭṭhā vuttānaṃ kammāyatanādīnaṃ appaccanīkadassanena anulomanato, tathā sattānaṃ hitacariyāya maggasaccassa, paramatthasaccassa, nibbānassa ca avilomanato anulometīti **anulomikā**. Sabbānīpi etāni kāraṇāni khamati daṭṭhuṃ sakkotīti **khanti**. Passatīti **diṭṭhi**. Rocetīti **ruci**. Munātīti **muti**¹. Pekkhatīti **pekkhā**. Te ca kammāyatanādayo dhammā etāya nijjhāyamānā nijjhānaṃ khamantīti **dhammanijjhānakhanti**. **Parato asutvā paṭilabhatīti** aññassa upadesavacanaṃ asutvā sayameva cintento paṭilabhati. **Ayaṃ vuccatīti** ayaṃ cintāmayā paññā nāma vuccati. Sā panesā abhiññātānaṃ bodhisattānameva uppajjati. Tatthāpi saccānulomikaññaṃ dvinnāmyeva bodhisattānaṃ antimabhavikānaṃ, sesapaññā sabbesampi pūritapāramīnaṃ mahāpaññānaṃ² uppajjati. **Parato sutvā paṭilabhatīti** kammāyatanādīni parena kariyamānāni vā katāni vā dvisvāpi parassa kathayamānassa vacanaṃ sutvāpi ācariyasantike uggahetvāpi paṭiladdhā sabbā parato sutvāva paṭiladdhā nāmāti veditabbā. **Samāpannassāti** samāpattisamaṅgissa, nidassanamattañcetaṃ. Vipassanāmaggapaññā idha “bhāvanāmayā paññā”ti adhippetā.

Sāti “parittārammaṇā mahaggatārammaṇā”ti³ vuttapaññā. **Lokiyavipassanāti** lokiyavipassanāpaññā. **Sā lokuttaravipassanāti** yā nibbānaṃ ārabha pavattā appamāṇārammaṇā paññā vuttā, sā lokuttaravipassanāti maggapaññaṃ sandhāyāha. Sā hi saṅkhārānaṃ aniccatādim āgaṇhantīpi vipassanākickapāripūriyā, nibbānassa vā tathalakkhaṇaṃ visesato passatīti vipassanāti vuccati. Gotrabhuññaṃ pana kiñcāpi appamāṇārammaṇaṃ, maggassa pana āvajjanatṭhāniyattā na vipassanāvohāraṃ labhati.

Ayanti etāya sampattiyoti **āyo**, vuddhi. **Tattha kosallanti** tasmim anattahāni-atthuppattilakkhaṇe āye kosallaṃ kusalatā nipuṇatā.

1. Mudatīti mudi (Abhi-Ṭṭha 2. 394 piṭṭhe.)

2. Mahāpuññānaṃ (Ka-Syā)

3. Abhi 2. 325 piṭṭhe.

Taṃ pana ekantikam āyakoṣallaṃ pāḷivaseneva dassetuṃ **“ime dhamme”**ti-ādi vuttaṃ. Tattha **idaṃ vuccatīti** yā imesaṃ akusaladhammānaṃ anuppattipahānesu, kusaladhammānaṃca uppattiṭṭhitīsu paññā, idaṃ **āyakoṣallaṃ** nāmāti vuccati.

Vuddhilakkhaṇā āyato apetattā **apāyo**, avuddhi. **Tattha kosallanti** tasmim atthahāni-anatthuppattilakkhaṇe apāye koṣallaṃ kusalatā **apāyakoṣallaṃ**. Tampi pāḷivaseneva dassetuṃ **“ime dhamme”**ti-ādi vuttaṃ. Tattha **idaṃ vuccatīti** yā imesaṃ kusaladhammānaṃ anuppajjananirujjhanesu, akusaladhammānaṃ vā uppattiṭṭhitīsu paññā, idaṃ apāyakoṣallaṃ nāmāti vuccati. Āyakoṣallaṃ tāva paññā hotu, apāyakoṣallaṃ kathaṃ paññā nāma jātāti? Evaṃ maññati **“apāyuppādanasamatthatā apāyakoṣallaṃ nāma siyā”**ti, taṃ pana tassa matimattaṃ. Kasmā? Paññavā eva hi **“mayhaṃ evaṃ manasi karoto anuppannā kusalā dhammā nuppajjanti, uppannā nirujjanti. Anuppannā akusalā dhammā uppajjanti, uppannā pavaḍḍhanti”**ti pajānāti, so evaṃ ñatvā anuppanne akusale na uppādeti, uppanne pajahati. Anuppanne kusale uppādeti, uppanne bhāvanāpāripūrim pāpeti. Evaṃ apāyakoṣallampi paññā evāti.

Sabbatthāti sabbesu. **Tesaṃ tesaṃ dhammānanti** sattānaṃ taṃtaṃhitasukhadhammānaṃ. **Taṅkhaṇappavattanti** accāyike kicce vā bhaye vā uppanne tassa tikicchanatthaṃ tasmimyeva khaṇe pavattaṃ. Ṭhānena uppatti etasā atthīti **ṭhānuppattikam**, ṭhānaso eva uppajjanakam. **Tatrupāyāti** tatra tatra karaṇīye upāyabhūtā.

Gahetvāti **“idaṃ rūpaṃ, ettakaṃ rūpaṃ”**ti-ādinā pariggaṇhanavasena gahetvā. **Ubhayaṃ gahetvāti** **“ajjhattaṃ bahiddhā”**ti ubhayaṃ anupubbato pariggahetvā. Atha vā **“yaṃ kiñci samudayadhammaṃ, sabbaṃ taṃ nirodhadhammaṃ”**ti ekappahāreneva sabbepi pañcakkhandhe avibhāgena pariggahetvā. Ayaṃ pana tikkhavipassakassa mahāpuññassa bhikkhuno vipassanābhiniveso.

428. **Dukkhasaccaṃ ārabbhāti** dukkhasaccaṃ ārammaṇaṃ katvā, tappatiṭṭhādaḥsammodhavidhānaṃsasavasena **ca pavattaṃ ñāṇaṃ dukkhe ñāṇaṃ. Dukkhasamudayaṃ**

ārabbhāti etthāpi eseva nayo. Tathā sesapadadvayepi. Paccavekkhaṇāñāṇaṃ hi catusaccam¹ ārabbhā pavattañāṇaṃ nāma, tatiyaṃ pana maggañāṇaṃ, itarasaccāni vipassanāñāṇanti pākaṭameva.

“Atthādīsu pabhedagatāni ñāṇāni”ti saṅkhepena vuttamatthaṃ pāḷivaseneva vivarituṃ **“vuttañhetan”**ti-ādi vuttam. Tatha **atthe ñāṇaṃ atthapaṭisambhidā**ti yaṃ atthappabhedassa sallakkhaṇavibhāvanavavattānakaraṇasamatthaṃ atthe pabhedagataṃ ñāṇaṃ, ayaṃ atthapaṭisambhidā nāma. Sesapadesupi eseva nayo. Dhammappabhedassa hi sallakkhaṇavibhāvanavavattānakaraṇasamatthaṃ dhamme pabhedagataṃ ñāṇaṃ **dhammapaṭisambhidā**. Niruttippabhedassa sallakkhaṇavibhāvanavavattānakaraṇasamatthaṃ niruttābhilāpe pabhedagataṃ ñāṇaṃ **niruttipaṭisambhidā**. Paṭibhānappabhedassa sallakkhaṇavibhāvanavavattānakaraṇasamatthaṃ paṭibhāne pabhedagataṃ ñāṇaṃ **paṭibhānapaṭisambhidā**. Niruttipaṭibhānappabhedā tabbisayānaṃ atthādīnaṃ paccayuppannatādibhedehi bhinditvā veditabbā.

Nibbānampi sampāpakahetu-anusārena arīyati, adhigammatīti attho. **“Yaṃ kiñci paccayasambhūtan”**ti etena saccahetudhammapaccayākāravāresu āgatāni dukkhādīni gahitāni. Saccapaccayākāravāresu nibbānaṃ, pariyattivāre bhāsitattho, abhidhammabhājanīye vipāko, kiriyā cāti evaṃ pāḷiyaṃ vuttānaṃ eva vasena pañca atthā veditabbā. **Dahatī**ti vidahati, nibbattakahetu-ādīnaṃ sādharmaṇametam nibbacanaṃ. Tadatthaṃ pana vibhāvetuṃ **“pavatteti vā sampāpuṇituṃ vā detī”**ti vuttam. Tesu purimo attho maggavajjesa daṭṭhabbo. Bhāsitampi hi avabodhanavasena atthaṃ pavatteti, maggo pana nibbānaṃ pāpetīti tasmim pacchimo attho. Nibbānaṃ hi pattabbo attho, bhāsitattho ñāpetabbo attho, itaro nibbattetabbo atthoti evaṃ tividho hoti.

“Yo koci phalanibbattako hetū”ti etena saccahetudhammapaccayākāravāresu āgatāni samudayādīni gahitāni, saccapaccayākāravāresu maggo, pariyattivāre bhāsitam, abhidhammabhājanīye kusalākusalanti evaṃ pāḷiyaṃ vuttānaṃ eva vasena pañca dhammā veditabbā.

1. Catutthasaccam (Sī)

Tattha maggo sampāpako, bhāsitaṃ nāpako, itaraṃ nibbattakoti evaṃ tividho hetu veditabbo. Ettha ca kiriyānaṃ avipākatāya dhammabhāvo na vutto. Yadi evaṃ vipākā na hontīti atthabhāvopi na vattabbo? Na, paccayuppannabhāvato. Evaṃ sati kusalākusalānampi atthabhāvo āpajjatīti ce? Nāyaṃ doso appaṭṭisiddhattā. Vipākassa pana padhānahetutāya pākaṭabhāvato dhammabhāvo eva tesam vutto. Kiriyānaṃ paccayabhāvato dhammabhāvo āpajjatīti ce? Nāyaṃ doso appaṭṭisiddhattā. Kammaphalasambandhassa pana hetubhāvassābhāvato dhammabhāvo na vutto. Apica “ayaṃ imassa paccayo, ayaṃ paccayuppanno”ti. Etaṃ¹ bhedamakavā kevalaṃ kusalākusale, vipākakiriyādhamme ca paccavekkhantassa dhammatthapaṭṭisambhidā hontīti tesam atthadhammatā na vuttāti daṭṭhabbaṃ.

Ayameva hi atthoti yvāyaṃ atthadhammānaṃ pañcadhā vibhajanavasena attho vutto, ayameva abhidhamme vibhajivā dassitoti sambandho.

“Dhammaniruttābhiḷāpe”ti ettha dhamma-saddo sabhāvavācakoti katvā āha “**sabhāvaniruttī**”ti, aviparītaniruttīti attho. Tenāha “**abyabhicārī vohāro**”ti, tassa tassa atthassa bodhane paṭṭiniyatasambandho saddavohāroti attho. **Tadabhiḷāpeti** tassa sabhāvaniruttisaññitassa abyabhicārīvohārassa abhiḷāpane. Sā panāyaṃ sabhāvanirutti māgadhabhāsā². Atthato nāmapaññatīti ācariyā. Apare pana yadi sabhāvanirutti paññattisabhāvā, evaṃ sati paññatti abhilapitabbā, na vacananti āpajjati. Na ca vacanato aññaṃ abhilapitabbaṃ uccāretabbaṃ atthi. Atha phassādivacanehi bodhetabbaṃ abhilapitabbaṃ, evaṃ sati atthadhammānampi bodhetabbattā tesampi niruttibhāvo āpajjati. Phassoti ca sabhāvanirutti, phassaṃ phassāti³ na sabhāvaniruttīti dassitovāyamattho. Na ca avacanaṃ evaṃpakāraṃ atthi. Tasmā vacanabhūtāya eva tassā sabhāvaniruttīyā abhiḷāpe uccāraṇeti attho daṭṭhabbo.

Taṃ sabhāvaniruttisaddaṃ ārammaṇaṃ katvā paccavekkhantassa tasmim sabhāvaniruttābhiḷāpe pabhedagataṃ nāṇaṃ **niruttīpaṭṭisambhidā**, “evamayaṃ

1. Evaṃ (Sī, Syā, Ka)

2. Māgadhibhāsā (Sī)

3. Phassāti (Sī, Syā)

niruttipaṭiyambhidā saddārammaṇā nāma jātā, na paññatti-ārammaṇā”ti¹ ca aṭṭhakathāyaṃ vuttattā niruttisaddārammaṇāya sotaviññānavīthiyā parato manodvāre niruttipaṭisambhidā pavattatīti vadanti. “Niruttipaṭisambhidā paccuppannārammaṇā”ti² ca vacanasaddaṃ gahetvā pacchā jānanam sandhāya vuttanti. Evaṃ pana aññasmiṃ paccuppannārammaṇe aññaṃ paccuppannārammaṇam vuttanti āpajjati. Yathā pana dibbasotaññaṃ manussādisaddabhedanicchayassa paccayabhūtaṃ taṃtaṃsaddavibhāvakaṃ, evaṃ sabhāvāsabhāvaniruttinicchayassa paccayabhūtaṃ paccuppannasabhāvaniruttisaddārammaṇam taṃvibhāvakaṃ ñāṇam niruttipaṭisambhidāti vuccamāne na koci pāḷivirodho. “Taṃ sabhāvaniruttisaddaṃ ārammaṇam katvā paccavekkhantassā”ti ca “paccuppannasaddārammaṇam paccavekkhaṇam pavattentassā”ti na na sakkā vattum. Tañhi ñāṇam sabhāvaniruttim vibhāventameva taṃtaṃsaddapaccavekkhaṇānantaraṃ taṃtaṃpabhedanicchayahetubhāvato niruttim bhindantaṃ paṭivijjhantameva uppajjatīti pabhedagatampi hotīti.

Sabbattha ñāṇanti sabbasmiṃ visaye ñāṇam, sabbampi ñāṇanti adhippāyo. Tenāha “**ñāṇārammaṇam ñāṇan**”ti. **Sabbatthāti** vā sabbesu atthādīsu, tīsu, catūsūpi vā pavattattā, kusalakiriyābhūtāya paṭibhānapaṭisambhidāya dhammatthabhāvato tīsu eva vā pavattattā “sabbattha ñāṇan”ti vuttaṃ. Tenāha “**yathāvuttesu vā**”ti-ādi. Tattha **sagocarakiccādivasenāti** sagocarassa, kiccādikassa ca vasena “idam ñāṇam idam nāma ārammaṇam katvā pavattaṃ iminā nāma kiccenā”ti jānanam. **Ādi**-saddena lakkhaṇapaccupaṭṭhānapadaṭṭhānabhūmi-ādīnaṃ saṅgaho. Tenevāha “imāni ñāṇāni idamatthajotakāni”ti-ādi³.

429. **Pabhedam gacchantīti** anekabhedabhinnesu ārammaṇesu tesam yāthāvato taṃtaṃpabhedāvabodhanasamatthataṃ upagacchanti.

Mahāsāvakaṇāṅca asekkhabhūmiyaṃ pabhedam gatāti sāmāññavidhinā dassitamattham apavādena nivattetum **ānandatthera**-ggahaṇam kataṃ.

Etā paṭisambhidā. Sekkhabhūmiyaṃ pabhedagamanam appavisayam, asekkhabhūmiyaṃ bahuvisanti āha “**adhigamo nāma arahattappattī**”ti, sātisayam vā adhigamam sandhāya evaṃ vuttaṃ. Sekkhena pattānampi hi imāsam arahattappattiyā

1. Abhi-Ṭṭha 2. 371 piṭṭhe.

2. Abhi 2. 320 piṭṭhe.

3. Abhi 2. 308 piṭṭhādīsu.

visadabhāvādhiḡameti. Pubbayogo viya pana arahattappatti arahatopi paṭisambhidāvisadatāya paccayo na na hotīti pañcannampi yathāyogam sekkhāsekkhapaṭisambhidāvisadatāya kāraṇatā yojetabbā.

Atthadhammādīnaṃ anavasesasaṅgaṇhanato buddhavacanavisayā eva pariyatti-ādayo dassitā. Pāḷiyā sajjhāyo **pariyāpuṇanaṃ**, tadatthasavanaṃ **savanaṃ**, parito sabbaso ñātum icchā **paripucchāti** āha “**pāḷi-atthakathādīsu gaṇṭhipada-atthapadavinicchayakathā**”ti, padatthato, adhippāyato ca duviññeyyaṭṭhānaṃ vitthārato sanniṭṭhānakathāti attho. Yassa hi padassa attho duviññeyyo, taṃ **gaṇṭhipadaṃ**, yassa adhippāyo duviññeyyo, taṃ **atthapadaṃ**. **Ādi**-saddena khandhādipaṭisaṃyutte kathāmagge saṅgaṇhāti. Bhāvanānuyogasahitaṃ gataṃ, paccāgatañca etassa atthīti gatapaccāgatiko, tassa bhāvo, tena **gatapaccāgatikabhāvena**. Vasanaṭṭhānato yāva gocaragāmo, tato ca yāva vasanaṭṭhānaṃ kammaṭṭhānanuyuttoti attho. **Yāva anulomagotrabhusamīpanti** saṅkhārupekkhāññāmaḡa. Tañhi tesam samīpappavattaṃ.

Satthesūti anavajjesu sattānaṃ hitasukhāvahesu ganthesu. Tathā **sippāyatanesūti** etthāpi. Pubbakāle ekasatarājūnaṃ desabhāsā **ekasatavohārā**. Dhammapade¹ yamakavaggo **opammavaggo**ti vadanti, mūlapaṇṇāse² yamakavaggo **opammavaggo** evāti apare. **Sutapaṭibhānabahulānanti** bahussutānaṃ paṭibhānavantānaṃ.

Sabbānīti pubbe vuttāni pañca, pacchā vuttāni aṭṭhapi vā. Sekkhaphalavimokkhaṃ pariyosāne bhavā **sekkhaphalavimokkhantikā**. Ṭhānāṭhānaññabalādīni sabbabuddhaguṇesu sakiccato pākāṭatarānīti vuttaṃ “**dasa balāni viyā**”ti, aññe vā sabbaññutaññādayopi sabbe bhagavato guṇavisesā **asekkhaphalavimokkhantikā** eva.

Paññābhūmi-mūla-sarīravavatthānavaṇṇanā

430. **Imāya paññāyāti** vipassanāpaññāya. **Bhūmi** sallakkhaṇādiggahaṇavasena pavattiṭṭhānabhāvato. **Ādi**-saddena āhārādīnaṃ saṅgaho daṭṭhabbo. Kasmā panete evaṃ bahudhammā bhūmibhāvena gayhanti, nanu khandhādīsu

1. Khu 1. 13 piṭṭhe.

2. Ma 1. 266, 354 piṭṭhesu.

ekenāpi atthasiddhi hotīti? Na, tividhasattānuggahattham khandhādittayaggahaṇam kattabbam, aññathā sabbasādhāraṇo anuggaho na kato siyā. Tividhā hi sattā rūpasammūḷhā arūpasammūḷhā ubhayasammūḷhāti. Tesu ye arūpasammūḷhā, tadattham khandhānam gahaṇam arūpadhammānam catudhā vibhattattā. Ye rūpasammūḷhā, tadattham āyatanānam rūpadhammānam addhekādasadhā vibhattattā. Ye pana ubhayasammūḷhā, tadattham dhātūnam ubhayesampi vibhattattā. Tathā indriyabhedena tikkhindriyā majjhindriyā mudindriyā, samkhittarucī majjhimarucī vitthārarucīti ca tividhā sattā, tesampi atthāya yathākkamaṇam khandhādiggahaṇam katanti yojetabbam. Indriyaggahaṇam pana kāmaṇam etc dhammā issarā viya sahaḷāyadhammesu issariyaṇam āhipaccaṇam pavattenti, taṇam pana nesaṇam dhammasabhāvasiddham, na ettha kassaci vasibhāvo “suññā ete avasavattino”ti anattalakkhaṇassa sukhaggahaṇattham. Taṇam panetaṇam catubbidhampi pavattinivattitadubhayahetuvaseṇa diṭṭhameva upakāravahaṇam, na aññathāti saccādivayaṇam gahitaṇam. **Ādi**-saddena gahitadhammesupi ayaṇam nayo netabbo. **Mūlaṇam** patiṭṭhābhāvato. Sati hi sīlavissuddhiyaṇam, cittavisuddhiyaṇca ayaṇam paññā mūlajātaṇ hoti, nāsati. **Sarīraṇam** paribrūhetabbato. Imissā hi paññāya santānavaseṇa pavattamānāya pādapāṇisīsaṭṭhāniyā diṭṭhivissuddhi-ādikā imā pañca visuddhiyo avayaveṇa samudāyūpalakkhaṇayeva “sarīraṇam”ti veditabbā.

431. **Pañca khandhāti** ettha **pañcāti** gaṇanaparichedo, tena na tato heṭṭhā, na uddhanti dasseti. **Khandhāti** paricchinnadhammanidassanaṇam. Yasmā cettha khandha-saddo rāsaṭṭho “mahā-udakakkhandho”ti-ādīsu¹ viya, tasmā atītādivibhāgabhinnaṇam sabbaṇam rūpaṇam rāsivaseṇa buddhiyā ekajjhaṇam gahetvā “rūpameva khandho rūpakkhando”ti samānādhikaraṇasamāso daṭṭhabbo. “Tīhi khandhehi iṇam dassamā”ti-ādīsu viya koṭṭhāsaṭṭhe pana khandha-sadde nibbānassāpi khandhantarabhāvo āpajjati? Nāpajjati atītādivibhāgabhāvato. Na hi ekassa niccassa sato nibbānassa atītādivibhāgo atthīti. Paṭhamenaṭṭhena rūparāsīti attho, dutiyeva rūpakoṭṭhāsoti. **Vedanākkhandhoti**-ādīsopi eseva nayo. Kasmā panete khandhā pañceva vuttā iminā eva ca kamaṇāti? Bhājanabhōjana byañjana bhattakāraka bhūñjaka-

1. Am 1. 366; Am 2. 296 piṭṭhesu.

vikappadassanato, yathoḷārikayathāsamkilesūpadesato cāhi veditabbaṃ.
Vivādamūlahetubhāvaṃ saṃsārahetutaṃ, kammahetutañca cintetvā
vedanāsaññā saṅkhārakkhandhato niharitvā visuṃ khandhabhāvena desitā.

Rūpakkhandhakathāvaṇṇanā

432. **Tatthā**ti tesu pañcasu khandhesu. **Yaṃ kiñcī**ti
anavasesapariyādānaṃ. **Ruppanalakkhaṇanti** atippasaṅganiyamaṇaṃ. Yaṃ-
saddena hi sanipātena kiṃ-saddena ca gahitena aniyamatthatāya atippasaṅge
āpanne taṃ ruppanasaddo nivatteti, tena rūpassa anavasesapariggaho kato
hoti. **Sītādīhi**ti sītuṇḥajighacchāpipāsādīhi. Hetu-atthe cetāṃ karaṇavacanaṃ.
Ruppanaṃ lakkhaṇaṃ etassāti **ruppanalakkhaṇaṃ**. Dhammo eva
dhammajātaṃ. Ruppanaṅcetha sītādivirodhipaccayasannipāte
visadisuppatti. Nanu ca arūpadhammānampi virodhipaccayasamāgame
visadisuppatti labbhatīti? Saccāṃ labbhati, na pana vibhūtataṃ.
Vibhūtataṃ hettha ruppanaṃ adhippetāṃ sītādiggaṇato. Yadi evaṃ
kathaṃ brahmaloke rūpasamaññā? Tatthāpi taṃsabhāvānativattanato
hotiyeva rūpasamaññā, anuggāhakapaccayasasena vā.
Virodhipaccayasannipāte yo attano santāne bhinne bhijjamānasseva
visadisuppattihetubhāvo, taṃ ruppananti aññe. Imasmiṃ pakkhe rūpayati
vikāraṃ āpādetīti rūpaṃ, purimapakke pana ruppattīti. Saṅghaṭṭanena
vikārāpattiyāṃ ruppanasaddo niruḷhoti keci. Imasmiṃ pakkhe
arūpadhammesu rūpasamaññāya pasaṅgo eva natthi saṅghaṭṭanābhāvato.
Paṭighāto ruppananti apare. **Sabbaṃ taṃ ekato katvā**ti rāsaṭṭhaṃ hadaye
ṭhapetvā vadati.

Bhūtopādāyabhedatoti ettha tadadhīnavuttitāya bhavati ettha
upādāyarūpanti **bhūtaṃ**. Bhūtāni upādiyateva, na pana sayāṃ tehi, aññehi vā
upādiyatīti **upādāyaṃ**.

Kāmaṃ catudhātuvavatthāne vacanatthāditopi bhūtāni vibhāvitāneva,
sabhāvadhammānaṃ pana lakkhaṇādivibhāvanāti katvā vuttāṃ
“**lakkhaṇarasapaccupaṭṭhānāni catudhātuvavatthāne vuttāni**”ti. Tattha
padaṭṭhānassa avuttattā āha “**padaṭṭhānato panā**”ti-ādi. Avacanañca tassa
tassatthassa paccayatoti ettha pakārantarena vibhāvitattāti daṭṭhabbaṃ.
Sabbāpīti catassopi dhātuyo. Āposaṅgahitāya tejonupālītāya

vāyovitthambhitāya eva pathaviḍhātuyā pavatti, na aññathāti sā
sesabhūtattayapadaṭṭhānā, evamitarāpīti āha
“avasesadhātuttayapadaṭṭhānā”ti.

Catuvīsatividhanti gaṇanaparicchedo balarūpādīnaṃ paṭisedhanattho. Tattha yaṃ vattabbaṃ, taṃ parato āvi bhavissati. Cakkhatīti **cakkhu**, viññāṇādhiṭṭhitāṃ rūpaṃ assādentāṃ viya hotīti attho. **Cakkhatīti** hi ayam **cakkhati**-saddo “madhuṃ cakkhati, byañjanaṃ cakkhati”ti-ādīsu viya assādanattho. Vuttañhetāṃ “cakkhuṃ kho māgaṇḍiya rūpārāmaṃ rūparatāṃ rūpasamuditaṃ”ti¹. Aṭṭhakathāyampi vuccati “rūpesu āviñchanarasan”ti². Satipi sotādīnaṃ saddārammaṇādibhāve niruḷhattā dassane eva cakkhu-saddo pavattati padumādīsu paṅkajādīsaddā viyāti daṭṭhabbaṃ. Atha vā **cakkhatīti** viññāṇādhiṭṭhitāṃ samavisamaṃ ācikkhantaṃ viya abhibyattaṃ vadantaṃ viya hotīti attho. Aṭṭhakathāyaṃ pana “vibhāveti cā”ti³ vuttaṃ. Taṃ anekatthattā dhātūnaṃ vibhāvanatthataṭṭhāpi cakkhati-saddassa sambhavaṭṭi katvā vuttaṃ. Suṇāti etena, viññāṇādhiṭṭhitāṃ sayāṃ vā suṇāṭīti **sotaṃ**. Ghāyati etena, sayāṃ vā ghāyāṭīti **ghānaṃ**. Rasaggahaṇamūlakattā ajjhoharaṇassa jīvitanimittaṃ āhāraraso jīvitaṃ, tasmim ninnatāya taṃ avhāyāṭīti **jivhā** niruttinayena. Kucchitānaṃ sāsavadhammānaṃ āyo uppattiṭṭhānanti **kāyo** anuttariyahetubhāvaṃ anāgacchantesu kāmarāganidānakammajānitesu, kāmarāgassa ca viśesapaccayesu ghānajivhākāyesu kāyassa viśesato sāsavapaccayattā. Tena hi phoṭṭhabbasukhaṃ assādentā sattā methunampi sevanti. Kāyindriyavatthukā vā cattāro khandhā balavakāmāsavādihetubhāvato viśesena sāsavāṭi kucchitānaṃ sāsavadhammānaṃ āyoti **kāyo** vutto. Vaṇṇavikāraṃ āpajjamānaṃ hadayaṅgatabhāvaṃ rūpayāṭīti **rūpaṃ**, rūpamiva pakāsaṃ karoti saviggahamiva dassatīti attho. Anekatthattā vā dhātūnaṃ pakāsanattho eva rūpasaddo daṭṭhabbo. Sappatīti **saddo**, udāharīyati, sakehi vā paccayehi sappīyati⁴ sotaviññeyyabhāvaṃ upanīyāṭīti attho. Gandhayāṭīti **gandho**, attano vatthum sūcayati apākaṭaṃ “idaṃ sugandhaṃ, duggandhaṃ”ti

1. Ma 2. 171 piṭṭhe.

2. Visuddhi 2. 74; Abhi-Ṭṭha 1. 349 piṭṭhe.

3. Mahāniddesa-Ṭṭha 143; Abhi-Ṭṭha 2. 42 piṭṭhesu.

4. Sariyati (Si), sabbiyati (Syā)

pakāseti, paṭicchannaṃ vā pupphaphalādiṃ “idamettha atthī”ti pesuññaṃ karontaṃ viya hotīti attho. Rasanti taṃ sattāti **raso**, asādentīti attho.

Itthiyāva indriyaṃ **itthindriyaṃ**, tathā **purisindriyaṃ**. Jīvanti tena sahajātadhammāti jīvitam, tadeva indriyaṃ **jīvitindriyaṃ**. Hadayañca taṃ vatthu ca, hadayassa vā manoviññāṇassa vatthu **hadayavatthu**. Copanakāyabhāvato kāyo ca so adhippāyaviññāpanato viññatti cāti **kāyaviññatti**. Copanavācābhāvato, adhippāyaviññāpanato ca vacī ca sāvī viññatti cāti **vacīviññatti**. Viggahābhāvato na kassati, kasitum chinditum na sakkā, na vā kāsati dibbatīti akāsaṃ, akāsameva ākāsaṃ, tadeva nissattanijjīvaṭṭhena **ākāsadhātu**. **Rūpassāti** nipphannarūpassa. Lahubhāvo **lahutā**. Sayam anipphanatāya “rūpassā”ti visesitaṃ. Esa nayo sesesupi. Ayaṃ pana viseso—kammani sādhu kammaññaṃ, tassa bhāvo **kammaññatā**. Paṭhamam, upari ca cayo pavatti **upacayo**. Pubbāparavasena sambandhā tati pavatti **santati**. Aniccassa vināsino bhāvo **aniccatā**. Kalam karīyatīti **kabalīkāro**. Āharatīti **āhāro**. Evaṃ tāva upādāyarūpaṃ saddatthato veditabbam.

Kamato pana sabbesaṃ rūpadhammānaṃ nissayabhāvena mūlabhūtattā paṭhamam bhūtarūpāni uddiṭṭhāni. Itaresu ajjhattikabhāvena attabhāvasamaññāya mūlabhāvato cakkhādīni pañca ādīto uddiṭṭhāni. Tesam visayīnaṃ ime visayāti dassetum rūpādīni cattāri uddiṭṭhāni. Phoṭṭhabbam pana anupādārūpattā, bhūtaggahaṇena gahitattā ca idha na gahitaṃ. Svāyaṃ attabhāvo imehi “itthī”ti vā “puriso”ti vā saṅkham gacchatīti dassanattham tadanantaram itthipurisindriyadvayaṃ uddiṭṭham. “Iminā jīvati”ti vohāram labbhatīti dassanattham tato jīvitindriyaṃ. Tassa imaṃ nissāya viññāṇappavattiyam attahitādisiddhīti dassanattham hadayavatthu. Tassa imāsaṃ vasena sabbe kāyavacīpayogāti dassanattham viññattidvayaṃ. Imāya rūpakāyassa paricchedo, añjaso cāti dassanattham ākāsadhātu. Imehissa sukhappavatti, uppatti-ādayo cāti dassanattham lahutādayo. Sabbo cāyaṃ catusantatirūpasantāno iminā upatthambhīyatīti dassanattham ante kabalīkāro āhāro uddiṭṭhoti veditabbo.

433. Idāni yathā-uddiṭṭhāni upādārūpāni lakkhaṇādito niddisituṃ “**tattha rūpābhighātārahabhūtappasādalakkhaṇan**”ti-ādi āradham. Tattha **tatthāti** tesu upādārūpesu. Rūpe, rūpassa vā abhighāto rūpābhighāto, taṃ arahatīti rūpābhighātāraho, rūpābhighāto hotu vā mā vā evamsabhāvo catunnam bhūtānam pasādo **rūpābhighātārahabhūtappasādo**, evamlakkhaṇam cakkhūti attho. Yasmā paccayantarasaḥito eva cakkhupasādo rūpābhīhananavasena pavattati, na kevalo. Tasmā taṃsabhāvatāva pamāṇam, na rūpābhighātoti dassanattam rūpābhighātārahata vuttā yathā vipākāraḥam kusalākusalanti. Abhighāto ca visayavisayīnam aññamaññam abhimukhībhāvo yogyadesāvattāṇam abhighāto viyāti katvā. So rūpe cakkhussa, rūpassa vā cakkhumhi hoti. Tenāha “yam cakkhu anidassanam sappatigham rūpamhi sanidassanamhi sappatighamhi paṭihaññi vā”ti, “yamhi cakkhumhi anidassanamhi sappatighamhi rūpam sanidassanam sappatigham paṭihaññi vā paṭihaññati vā”ti¹ ca ādi. Paripuṇṇāparipuṇṇāyatanattabhāvanibbattakassa kammaṣa nidānabhūtā kāmataṇhā, rūpataṇhā ca tadāyatanikabhavapatthanābhāvato daṭṭhukāmatādivohāram arahatīti dutiyanayo sabbattha vutto. Tattha daṭṭhukāmatānidānakammaṣa samuṭṭhānam etesanti **daṭṭhukāmatānidānakammasamuṭṭhānāni**. Evamvidhānam bhūtānam pasādo **daṭṭhukāmatā -pa- pasādo**. Evamlakkhaṇam cakkhu. Tassa tassa hi bhavassa mūlakāraṇabhūtā taṇhā tasmim tasmim bhava uppajjanārahāyatanavisayāpi nāma hotīti kāmataṇhādīnam daṭṭhukāmatādivohārārahata vuttā.

Daṭṭhukāmatāti hi daṭṭhumicchā, rūpataṇhāti attho. Ettha ca daṭṭhukāmatāya, sesānaṅca taṃtamattabhāvanibbattakammāyūhanakkhaṇato sati purimanibbattiyam vattabam natthi, asati pana maggena asamugghātita bhāvoyeva kāraṇanti daṭṭhabbam. Yato maggena asamucchinnam kāraṇalābhe sati uppajjitvā attano phalassa paccayabhāvūpagamanato vijjamānamevā²ti uppannatā atthitā pariyāyehi vuccati “ariyam aṭṭhaṅgikam maggam bhāvento ariyam aṭṭhaṅgikam maggam bahulīkaronto

1. Abhi 1. 157 piṭṭhe.

2. Na vijjamānameva (Syā)

uppannuppanne pāpake akusale dhamme antarāyeva antaradhāpetī”¹,
 “santaṃ vā ajjhattaṃ kāmacchandaṃ ‘atthi me ajjhattaṃ kāmacchando’² ti
 pajānāti”² ca evamādisu.

Rūpesu puggalassa, viññāṇassa vā āviñchanarasaṃ.

Ādhārabhāvapaccupaṭṭhānaṃ nissayapaccayabhāvato.

Daṭṭhukāmatānidānakammajabhūtapadaṭṭhānaṃ yesaṃ bhūtānaṃ pasādo,
 tevassa āsanna-kāraṇanti katvā. Ettha ca
 taṃtaṃtaṃtabhāvanipphādakasādhāraṇakammavasena purimaṃ
 cakkhulakkhaṇaṃ vuttaṃ kāraṇavisesassa anāmaṭṭhattā. “Evarūpaṃ nāma
 me cakkhu hotū”¹ ti evaṃ nibbattibha-āveṇīkakkammavasena dutiyanti
 vadanti. Satipi pana pañcannaṃ pasādabhāvasāmaññe
 savisaṃyāvabhāsanasaṅkhātassa pasādabyāpārassa vasena purimaṃ vuttaṃ.
 Pasādakāraṇassa satipi kammabhāvasāmaññe, ekatte vā attano
 kāraṇabhedenā bhedadassanavasena dutiyanti daṭṭhabbaṃ. Soṭāḍīnaṃ
 lakkhaṇādīsu vuttanayeneva attho veditabbo.

Etthāha—cakkhādīnaṃ indriyānaṃ kiṃ ekakammunā uppatti, udāhu
 nānākammunāti? Ubhayathāpīti porāṇā. Tattha nānākammunā tāva
 uppattiyāṃ cakkhādīnaṃ visese vattabbaṃ natthi kāraṇassa bhinnattā.
 Ekakammunā pana uppattiyāṃ kathaṃ nesaṃ visesoti? Kāraṇassa bhinnattā
 eva. Taṃtaṃbhavapatthanābhūtā hi taṇhā
 taṃtaṃbhavapariyāpannāyatanābhilāsātāya sayāṃ vicittarūpā
 upanissayabhāvena taṃtaṃbhavanibbattakakammassa vicittabhedataṃ
 vidahati. Yato tadāhitavisesaṃ taṃ
 tathārūpasamatthatāyogenānekarūpāpannaṃ viya anekaṃ viṣiṭṭhasabhāvaṃ
 phalaṃ nibbatteti. Na cettha samatthatā samatthabhāvato aññā veditabbā
 kāraṇavisesena āhitavisesassa viṣiṭṭhaphalanipphādanayogyatāmattato.
 Ayañca ekassapi kammassa anekindriyahetutāvisesayogo yuttito, āgamanato
 ca parato āgamiṣṣati. Api ca ekasseva kusalacittassa
 soḷasādivipākacittanibbattihetutā vuccati. Lokepi ekasseva sālibijassa
 paripuṇṇāparipuṇṇataṇḍulātaṇḍulaphalanibbattihetutā dissateva, kiṃ vā
 etāya yutticintāya. Yato kammaphalaṃ cakkhādīni, kammavipāko ca
 sabbaso buddhānaṃyeva ñāṇassa visayoti.

1. Saṃ 3. 47 piṭṭhe.

2. Dī 2. 238; Ma 1. 77 piṭṭhesu.

434. **Kecīti** mahāsaṅghikesu ekacce. Tesu hi **vasudhammo** evaṃ vadati “cakkhumhi tejo adhikaṃ, sote vāyu, ghāne pathavī, jivhāya āpo, kāye sabbepi samā”ti. Cakkhādīsu tejādi-adhikatā nāma tannissayabhūtānaṃ tadadhikatāyāti dassento “**tejādhikānaṃ bhūtānaṃ pasādo cakkhū**”ti-ādimāha. **Kāyo sabbesanti** ko ettha viseso, nanu tejādi-adhikānaṃca bhūtānaṃ pasādā sabbesaṃyevāti? Saccametāṃ, idaṃ pana “sabbesan”ti vacanaṃ samānānanti imamatthaṃ dīpeti anuvattamānassa ekadesādhikabhāvasa nivāraṇavasena vuttattā. Tejādīnaṃ hi paccekaṃ adhikabhāve viya dvinnaṃ, tiṇṇaṃ vā adhikabhāvepi yathāvuttādhikabhāvene va ekakādivasena labbhamānāya omattatāyapi kāyappasādo na hotīti pākaṭoyamattho. Tasmā catunnampi bhūtānaṃ samabhāvena kāyappasādo hotīti sabbasaddo idha samabhāvādīpako daṭṭhabbo. **Tejādīnanti** padīpasaṅkhātassa tejassa obhāsarūpena, vāyussa saddena, pathaviyā gandhena, kheḷasaṅkhātassa udakassa rasenāti purimavāde, pacchimavāde ca yathāyogaṃ taṃtambhūtaguṇehi anugayhabhāvato, rūpādīnaṃ gahaṇe upakāritabbatoti attho. Ālokādisahakārīkāraṇasahitānaṃyeva cakkhādīnaṃ rūpādi avabhāsanassamatthata, vivarassa ca sotaviññāṇūpanissayabhāvo guṇoti tesāṃ laddhi. Tejādīnaṃ viya pana vivarassa bhūtabhāvābhāvato yathāyoga-ggahaṇaṃ. Atha vā rūpādayo viya vivarampi bhūtaguṇoti parādhippāye tejassa ālokarūpena, ākāsaṅkhātassa vivarassa saddena, vāyussa gandhena, udakassa rasena, pathaviyā phoṭṭhabbenāti evaṃ yathāyogaṃ taṃtambhūtaguṇehīti yojanā.

Rūpādīnaṃ adhikabhāvadassanatoti aggimhi rūpassa pabhassarassa, vāyumi saddassa sabhāvena suyyamānassa, pathaviyā surabhi-ādino gandhassa, āpe ca rasassa madhurassāti imesaṃ visesayuttānaṃ dassanato “rūpādayo tesāṃ guṇā”ti paṭhamavādī āhāti. Tasseva “**iccheyyāmā**”ti-ādīnā uttaramāha. Imināva upāyena dutiyavādinopi niggaho hotīti. Atha vā rūpādivisesaguṇehi teja-ākāsapathavī-āpavāyūhi cakkhādīni katānīti vadantassa **kaṇḍassa** vādaṃ¹

1. Kāraṇadassanavādaṃ (Syā), kāraṇavādissa vādaṃ (Ka)

uddharitvā taṃ niggaheṭuṃ **“athāpi vadeyyun”**ti-ādi vuttanti daṭṭhabbaṃ. Āsave upalabbhamānopi gandho pathaviyā āposamaṃyuttāya kappāsato visadisāyāti¹ na kappāsagandhassa adhikabhāvāpattīti ce? Na, anabhibhūtattā. Āsave hi udakamaṃyuttā pathavī udakena abhibhūtā, na kappāsapathavīti tassa eva gandhena adhikena bhavitabbaṃ. Uṇhodakamaṃyutto ca aggi upalabbhanīyo mahantoti katvā tassa phasso viya vaṇṇopi pabhassaro upalabbheyyāti uṇhodake vaṇṇato agginā anabhisambandhassa sītodakassa vaṇṇo parihāyetha. **Tasmā**ti etassa ubhayassa abhāvā. Tadabhāvena hi rūpādīnaṃ tejādivisesaguṇatā nivattitā. Tannivattanena **“tejādīnaṃ guṇehi rūpādīhi anuggayhabhāvato”**ti idaṃ kāraṇaṃ nivattitanti evaṃ paramparāya ubhayābhāvo visesaparikkappanapahānassa kāraṇaṃ hotīti āha **“tasmā pahāyetaṃ”**²ti-ādi. Ekakalāpepi rūparasādayo visadisā, ko pana vādo nānakalāpe cakkhādayo bhūtavisesābhāvepīti dassetuṃ rūparasādinidassanaṃ vuttaṃ.

Yadi bhūtaviseso natthi, kiṃ pana cakkhādivisesassa kāraṇanti taṃ dassetuṃ **“yaṃ aññamaññassā”**ti-ādi vuttaṃ. Ekampi kammaṃ pañcāyatanikattabhāvabhavappatthanānipphannaṃ cakkhādivisesahetutāya aññamaññassa asādhāraṇanti ca kammavisesoti ca vuttanti daṭṭhabbaṃ. Na hi taṃ yena visesena cakkhussa paccayo, teneva sotassa paccayo hoti indriyantarābhāvappattito. **“Paṭisandhikkhaṇe mahagatā cetanā kaṭattārūpānaṃ kammaṃpaccayena paccayo”**³ vacanena paṭisandhikkhaṇe vijjamaññānaṃ sabbesaṃ kaṭattārūpānaṃ ekā cetanā kammaṃpaccayo hotīti viññāyati. Nānācetanāya hi tadā indriyuppattiyāṃ sati parittena mahagatena ca kammaṃ nibbattitaṃ kaṭattārūpaṃ āpajjeyyāti. Na cekā paṭisandhi anekakammaṃ nibbattā hotīti siddhamekena kammaṃ anekindriyuppatti hotīti.

435. Anallīno nissayo etassāti **anallīnanissayo**, rūpasaddasaṅkhāto visayo. Gandharasānaṃ nissayā ghānajivhānaṃ nissaye

1. Visadisatāyāti (Sī) 2. Tasmā pahāyethetaṃ (Sī, Ka) 3. Abhi 9. 335 piṭṭhe Paṭṭhāne.

alliyantīti te nissayavasena allīnā. Phoṭṭhabbam sayam kāyanissaya-allīnam bhūtattā¹. Aparo nayo—cakkhusotāni appattavisayaggāhakāni sāntare, adhike ca visaye viññāṇuppattihetubhāvato. Sotampi sampattāvisayaggāhī keci. Yadi sotaṃ sampattaggāhi, cittajosaddo sotaviññāṇassa ārammaṇaṃ na siyā. Na hi bahiddhā cittasamuṭṭhānānaṃ uppatti atthi. **Pāliyaṇca**² avisesena saddārammaṇassa sotaviññāṇārammaṇabhāvo vutto. Kiñca disādesavavatthānañca saddassa na siyā, attano visayipadesassa eva gahetabbato gandho viya. Tasmā yattha uppanno saddo, tattheva ṭhito. Sace sotapathe āpāthamāgacchati, nanu dūre ṭhitehi rajakādisaddā cirena suyyantīti? Na dūrāsannānaṃ yathāpākaṭe sadde gahaṇavisesato. Yathā hi dūrāsannānaṃ vacanasadde yathāpākaṭe gahaṇavisesato ākāravisesānaṃ³ aggahaṇaṃ, gahaṇaṇca hoti, evaṃ rajakādisaddepi āsannassa ādito pabhuti yāva avasānā kamena pākaṭibhūte, dūrassa ca avasāne, majjhe vā piṇḍavasena pavattipākaṭibhūte nicchayaggahaṇānaṃ sotaviññāṇavīthiyā parato pavattānaṃ visesato lahukaṃ suto “cirena suto”ti adhimāno hoti. So pana saddo yattha uppanno, tannissitova attano vijjamānakkhaṇe sotassa āpāthamāgacchati. Yadi saddassa bhūtaparamparāya samantato pavatti natthi, kathaṃ paṭighosuppattīti? Dūre ṭhitopi saddo aññattha paṭighosuppattiyā, bhājanādicalanassa ca ayokanto viya ayocalanassa paccayo hotīti daṭṭhabbam.

436. Pubbe lakkhaṇādinā vibhāvitampi cakkhum ṭhitaṭṭhānādito vibhāvetum “**cakkhu cetthā**”ti-ādi āradham. Tattha cakkhu sādhamānaṃ tiṭṭhatīti sambandho. **Ca**-kāro byatirekattho, tenassa vuccamānameva visesaṃ joteti. **Etthā**ti etesu yathānididṭṭhesu pañcasu upādārūpesu. “**Sarīrasaṅṭhānuppattidese**”ti etena avasesaṃ kaṇhamaṇḍalaṃ paṭikkhipati. Snehamiva **satta akkhipaṭalāni byāpetvā** ṭhitāheva attano nissayabhūtāhi **catūhi dhātūhi katūpakāraṃ** tannissiteheva āyuvaṇṇādīhi anupālitam parivāritam tisantatirūpasamuṭṭhāpakehi

1. Bhūtattayattā (Sī) 2. Abhi 1. 106, 136 piṭṭhesu. 3. Akkharavisesānaṃ (Ka-Sī)

utucittāhārehi upatthambhiyamānaṃ tiṭṭhati. Satta-
akkhipaṭalabyāpanavacaneneva cakkhussa anekakalāpagatabhāvaṃ dasseti.
Pamāṇato ūkāsiramattanti ūkāsiramatte padese pavattanato vuttaṃ.
Cakkhuviññāṇassa **vatthubhāvaṃ** nissayabhāvato
āvajjanasampaṭicchanaḍḍānaṃ tadārammaṇavasānānaṃ **dvārabhāvaṃ**
samavasaraṭṭhānato¹. Taṃ panetaṃ cakkhu adhiṭṭhānabhedato, tatthāpi
paccekaṃ anekakalāpagatabhāvato anekampi samānaṃ sāmāññaniddesena
āvajjanāya ekattā, ekasmiṃ khaṇe ekasseva ca kiccakarattā ekaṃ katvā
vuttaṃ. Evampi bahūsu kathamekasseva kiccakarattaṃ. Yaṃ tattha visadaṃ
hutvā rūpābhigāhārahaṃ, taṃ viññāṇassa nissayo hotīti gahetabbaṃ.
Phoṭṭhabbaviseso viya kāyaviññāṇassa ārammaṇabhāve.

Manupassatīti ma-kāro padasandhikaro, atha vā **manūti** macco.

Aṅgulivedhakaṃ aṅgulīyakam².

Visamajjhāsayaṭṭhāya cakkhu vammikachiddābhiratasappo viya,
bilajjhāsayaṭṭhāya sotaṃ udakabilābhiratakumbhīlo viya, ākāsajjhāsayaṭṭhāya
ghānaṃ ajaṭākāsābhiratapakkhī viya, gāmajjhāsayaṭṭhāya jivhā
gāmābhiratakukkuro viya, upādinnakajjhāsayaṭṭhāya kāyo
āmakasusānābhiratasingālo viya passitabboti dassento “**vammi -pa-**
daṭṭhabbā”ti āha. Visamajjhāsayaṭṭhā ca cakkhussa visamajjhāsayaṃ viya
hotīti katvā vuttā, cakkhumato vā puggalassa ajjhāsayaṃ vasena cakkhu
visamajjhāsayaṃ daṭṭhabbaṃ. Esa nayo sesesupi. Sabbopi ca yathāvutto
papañco sotādīsipi yathārahaṃ veditabbo.

437. Cakkhumhi, cakkhussa vā paṭihananaṃ cakkhupaṭihananaṃ, taṃ
lakkhaṇaṃ etassāti **cakkhupaṭihananalakkhaṇaṃ**. Paṭihananañcetta
yathāvutto abhigāhāto. **Visayabhāvo** ārammaṇapaccayaṭṭhā. Kāmaṃ sā eva
gocaratā, tathāpi visayagocarānaṃ ayaṃ viseso—anaññatthabhāvo,
tabbahulacāritā ca cakkhuviññāṇassa. Visayabhāve cassa yaṃ vattabbaṃ.
Taṃ parato āvi bhavissati. **Yattha pana** kāyaviññāṇaṭṭhā-ādiṃ.

1. Samavasaraḍḍānato (Sī), pavasaṭṭhānato (Ka)

2. Aṅgulivalayakam (Syā, Kā)

438. Itthiyā bhāvo, “itthī”ti vā bhavati etena cittaṃ, abhidhānañcāti itthibhāvo, taṃ lakkhaṇaṃ etassāti **itthibhāvalakkhaṇaṃ**. Tato eva “itthī”ti taṃsahitaṃ santānaṃ pakāsentāṃ viya hotīti vuttaṃ **“itthīti pakāsanarasaṃ”**ti. Vaṭṭaṃsatā avisadahaṭṭhapādādītā ca **itthiliṅgaṃ**. Thanamaṃsāvisadatā, nimmassudāḥitā¹, kesabandhanaṃ, vatthaggaḥaṇaṇca “itthī”ti sañjānanaṃ paccayabhāvato **itthinimittaṃ**. Daharakālepi suppakamusalakādīhi kīlā, mattikatakkena suttakantaṇādi ca **itthikuttaṃ**, itthikiriyāti attho. Avisadaḥṭṭhānagamaṇādiko ākāro **itthākappo**. Aparo nayo—**itthīnaṃ muttakaraṇaṃ itthiliṅgaṃ**. Sarādhippāyā **itthinimittaṃ**. Avisadaḥṭṭhānagamaṇanisañjākhādanabhojanādikā **itthikuttaṃ**. Itthisaṅṭhānaṃ **itthākappo**. Imāni ca itthiliṅgādīni yathāsakaṃ kammādinā paccayena uppajjamānānīpi yebhuyyena itthindriyasahite eva santāne taṃtadākārāni hutvā uppajjantīti itthindriyaṃ tesāṃ kāraṇanti katvā vuttaṃ **“itthiliṅganimittakuttākappānaṃ kāraṇabhāvapaccupaḥṭṭhānaṃ”**ti. Itthiliṅgādīsu eva ca kāraṇabhāvasaṅkhātena adhipatibhāvena tassa indriyatā vuttā, indriyasahite santāne itthiliṅgādī-ākārarūpapaccayānaṃ aññathā anuppādanato, itthiggahaṇassa ca tesāṃ rūpānaṃ paccayabhāvato.

Yasmā pana bhāvadasakepi rūpānaṃ itthindriyaṃ na janakaṃ, nāpi anupālakaṃ, upatthambhakaṃ vā, na ca aññesaṃ kalāparūpānaṃ, tasmā taṃ jīvitindriyaṃ viya sakalāparūpānaṃ, āhāro viya vā kalāpantararūpānaṇca “indriya-atthi-avigatapaccayo”ti pāliyaṃ na vuttaṃ. Yasmā ca paccayantarādhīnāni liṅgādīni, tasmā yatthassa ādhipaccāṃ, taṃsadesu matacittakatarūpesupi taṃsaṅṭhānatā dissati. Esa nayo purisindriyepi. Yaṃ panettha visadisaṃ, taṃ vuttanayānusārena veditabbaṃ. Tayidaṃ dvayaṃ yasmā ekasmiṃ santāne saha pavattati “yassa itthindriyaṃ uppajjati, tassa purisindriyaṃ uppajjati? No”ti-ādi²vacanato, tasmā ubhatobyañjanakassāpi ekasmiṃ khaṇe ekameva hotīti veditabbaṃ. Ye pana “sarīrekadesavutti bhāvarūpan”ti vadanti, tesampi taṃ micchāti dassetuṃ **“tadubhayampi -pa-byāpakamevā”**ti vatvā yadi evaṃ kāyappasādena saṅkaro siyāti āsaṅkaṃ nivattento **“na ca kāyappasādenā”**ti-ādimāha. Tassattho—

1. Nimmassudādhītā (Syā)

2. Abhi 7. 117 piṭṭhe Yamake.

yadipi sakalasarīrabhyāpitāya kāyappasādena aṭṭhitokāse ṭhitanti vattabbaṃ nāpajjati, tena pana bhinnanissayattā ṭhitokāse ṭhitantipi vattabbaṃ nāpajjati ayameva cettha nippariyāyakathā. “**Rūparasādayo viyā**”ti etena samānissayesupi nāma **saṅkaro natthi** lakkhaṇabhedato, kimaṅgaṃ pana bhinnanissayasabhāvesūti dasseti.

439. **Sahajarūpānupālana**lakkhaṇanti attanā sahajātarūpānaṃ anupālanalakkhaṇaṃ. Jīvitindriyassa ekantakammajattā sahajaggahaṇena anupāletabbānampi kammajabhāvo siddhoti kammajaggahaṇaṃ na kataṃ. Yathāsakaṃ khaṇamattaṭṭhāyinopi kammajarūpassa pavattihetubhāvena taṃ anupālakaṃ, tasmā sahajarūpānupālanalakkhaṇaṃ. Na hi kammajānaṃ kammaṃyeva ṭhitihetu bhavituṃ arahati āhārajādīnaṃ āhārādi viya. Kiṃ kārāṇā? Taṅkhaṇābhāvato. **Tesanti** sahajarūpānaṃ. **Pavattanaṃ** yāpanaṃ, **ṭhapanam** ṭhitihetutā. Attanā anupālanavasena yāpetabbāni pavattetabbāni bhūtāni etassa padaṭṭhānanti **yāpayitabbabhūtapadaṭṭhānaṃ**¹. **Anupālana**lakkhaṇādīmhi **ādi**-saddena pavattanarasādimeva saṅgaṇhāti. **Atthikkhaṇe**yevāti anupāletabbānaṃ atthikkhaṇeveva. Asati anupāletabbe uppalādimhi kiṃ udakaṃ anupāleyya. Yadi kammajānaṃ ṭhitihetumantarena ṭhiti na hoti, jīvitindriyassa ko ṭhitihetūti āha “**sayan**”ti-ādi. Yadi kammajānaṃ ṭhānaṃ jīvitindriyapaṭibaddhaṃ, atha kasmā sabbakālaṃ na ṭhapetīti āha “**na bhaṅgato**”ti-ādi. **Tassa tassa** anupālanādikassa **sādhana**to. Taṃ sādhanāṅca jīvamānatāvisesassa paccayabhāvato. Indriyabaddharūpassa hi matarūpato kammajassa, tadanubandhabhūtassa ca utusamuṭṭhānādito jīvitindriyakato viseso, na kevalaṃ khaṇaṭṭhitiyā eva, pabandhānupacchedassāpi jīvitindriyaṃ kārāṇanti daṭṭhabbaṃ, itarathā āyukkhayato maraṇaṃ na yujjeyyāti.

440. **Manodhātumanoviññādhātūnaṃ nissaya**lakkhaṇaṃ **hadaya**vattūti kathametaṃ viññātabbanti? Āgamato, yuttito ca. “Yaṃ rūpaṃ nissāya manodhātu ca manoviññādhātu ca pavattanti, taṃ rūpaṃ manodhātuyā ca manoviññādhātuyā ca taṃsampayuttakānaṅca dhammānaṃ nissayapaccayena

1. Yāpetabbabhūtapadaṭṭhānaṃ (Sī, Syā)

paccayo”ti¹ evamādi āgamo. Yadi evaṃ kasmā rūpakaṇḍe taṃ na vuttanti? Tattha avacanaṃ aññakāraṇaṃ. Kiṃ pana tanti? Desanābhedo. Yathā hi cakkhuviññāḍiṇi ekantato cakkhādinissayāni, na evaṃ manoviññāṇaṃ ekantena hadayavatthunissayaṃ. Nissitavasena ca vatthudukādidesanā pavattā “atthi rūpaṃ cakkhuviññāṇassa vatthu, atthi rūpaṃ cakkhuviññāṇassa na vatthū”ti-ādinā². Yampi ekantato hadayavatthunissayaṃ, tassa vasena “atthi rūpaṃ manoviññāṇassa vatthū”ti-ādinā dukādisu vuccamānesupi na tadanugunā ārammaṇadukādayo sambhavanti. Na hi “atthi rūpaṃ manoviññāṇassa ārammaṇaṃ, atthi rūpaṃ na manoviññāṇassa ārammaṇaṃ”ti sakkā vattunti vatthārammaṇadukā bhinnagatikā siyunti ekarasā desanā na bhavēyya. Ekarasañca desanaṃ desetum idha satthu ajjhāsayo. Tasmā tattha hadayavatthu na vuttaṃ, na alabbhamānattāti daṭṭhabbaṃ.

Yutti pana evaṃ veditabbā—nipphanna-upādāyarūpanissayaṃ dhātudvayaṃ pañcavokārabhave. Tattha rūpāyatanādīnaṃ, ojāya ca indriyabaddhato bahipi pavattidassanato na taṃnissayatā yujjati, itthipurisindriyānampi tadubhayarahitepi santāne dhātudvayadassanato na taṃnissayatā yujjati, jīvitindriyassāpi aññakiccaṃ vijjatīti na taṃnissayatā yujjati evāti pārisesato hadayavatthu tesam nissayoti viññāyati. Sakkā hi vattuṃ nipphanna-upādāyarūpanissayaṃ dhātudvayaṃ pañcavokārabhave rūpapaṭibaddhavuttibhāvato. Yaṃ yañhi³ rūpapaṭibaddhavutti, taṃ taṃ nipphanna-upādāyarūpanissayaṃ diṭṭham⁴ yathā “cakkhuviññāḍadhātū”ti. “Pañcavokārabhave”ti ca visesanaṃ manoviññāḍadhātuvasena kataṃ. Manodhātu pana catuvokārabhave nattheva. Nanu ca indriyanissayatāyapi sādhanato viruddho hetu āpajjatīti? Na diṭṭhabādhanato. Diṭṭham hetam cakkhuviññāṇassa viya dhātudvayassa vatthuno mandatikkhādī-ananuvīdhānaṃ. Tathā hissa pāḷiyam indriyapaccayatā na vuttā. Tena tadanuvīdhānasankhātā indriyanissayatā bādhiyati. Hotu dhātudvayanissayo hadayavatthu, upādāyarūpañca, etaṃ pana kammasamuṭṭhānaṃ, paṭiniyata-kiccaṃ, hadayapadese ṭhitamevāti katham viññāyatīti? Vuccate—vatthurūpabhāvato **kammasamuṭṭhānaṃ** cakkhu viya, tato

1. Abhi 8. 5 piṭṭhe Paṭṭhāne.

2. Yaṃ yaṃ (Sī, Ka)

3. Abhi 1. 146 piṭṭhe.

4. Niddiṭṭham (Sī)

eva **paṭiniyata-kiccaṃ**, vatthurūpabhāvatoti ca viññāṇanissayaabhāvatoti attho. Aṭṭhiṃ katvā manasi katvā sabbacetasā samannāharitvā kiñci cintentassa hadayassa khijjanato tatthetamavaṭṭhitanti viññāyati. **Tāsaññeva dhātūnanti** manodhātumanoviññādhātūnaṃyeva. Nissayaabhāvato upari āropetvā vahantaṃ viya paccupatiṭṭhatīti **ubbahanapaccupaṭṭhānaṃ**. Sesam heṭṭhā vuttanayameva.

441. Abhikkamo ādi yesaṃ te abhikkamādī. Ādi-saddena paṭikkamasamiñjanapasāraṇa-ukkhepana-avekkhepanādikā sabbā kiriyā pariggayhati. Tesam abhikkamādīnaṃ pavattakaṃ cittaṃ samuṭṭhānaṃ yassā sā **abhikkamādippavattakacittasamuṭṭhānā**, vāyodhātu. Tassā yaṃ saharūpakāyassa thambhanasandhāraṇacalanasaṅkhātāṃ kiccaṃ, tassa saharūpakāyabhūto ākāraviseso kāyaviññatti nāmāti dassento āha **“abhikkamādī -pa- kāyaviññatti”**ti.

Kassa pana ākāravikāro? Sāmatthiyato vāyodhātu-adhikānaṃ citta-jama-hābhūtānaṃ. Kim taṃ sāmatthiyaṃ? Cittajata, upādāyarūpatā ca. Atha vā vāyodhātuyā ākāravikāro sahaja -pa- paccayoti sambandhitabbaṃ. Yadi evaṃ viññattiyā upādāyarūpabhāvo na yujjati. Na hi upādāyarūpaṃ ekabhūtasannissayaṃ atthi. “Catunnaṃ mahābhūtānaṃ upādāyarūpan”ti hi vuttaṃ, nāyaṃ doso catunnaṃ vikāro catūsu ekassāpi hoti catusādhāraṇadhaṇaṃ viya. Vāyodhātu-adhikatāya ca kalāpassa **“vāyodhātuyā”**ti vacanaṃ na virujjhati. Evaṃ adhikatā ca sāmatthiyato, na pamāṇato. Aññathā hi avinibbhogavuttiyā na yujjeyya. Vāyodhātuyā evāti keci. Tesam matena viññattiyā upādāyarūpatā durupapādā¹. Na hi ekassa vikāro catunnaṃ hoti. Sā panāyaṃ hatthacalanādīsu phandamānavaṇṇaggahaṇānantaramaviññāyamānantarena manodvāra-javanena gayhati. Phandamānavaṇṇavinimutto koci vikāro atthi. Tassa ca taggahaṇānantaraṃ gahaṇaṃ hotīti kathametaṃ viññāyatīti adhippāyaggahaṇato ()². Na hi viññattivikārarahitesa rukkhacalanādīsu **“idamesa kāreti maññe”**ti

1. Durūpapadā (Sī), duruppādā (Syā)

2. (Avasāne tatiye vāre) (Sī)

adhippāyaggahaṇaṃ diṭṭhaṃ, hatthacalanādīsu pana diṭṭhaṃ. Tasmā phandamānavaṇṇavinimutto koci vikāro atthi adhippāyassa nāpakoti viññāyati. Nāpako ca hetu nāpetabbamatthaṃ sayāṃ gahito eva nāpeti, na vijjānānatāmattenāti vaṇṇaggahaṇānantaraṃ vikāraggahaṇampi anumānato viññāyati. Tathā hi vadanti—

“Visayattamanāpanā, saddā nevatthabodhakā.

Na sattāmattato atthe, te aññātā pakāsakā”ti.

Yadi vikāraggahaṇameva kāraṇaṃ adhippāyaggahaṇassa, kasmā aggahitasāṅketānaṃ adhippāyaggahaṇaṃ na hotīti? Na kevalaṃ vikāraggahaṇameva adhippāyaggahaṇassa kāraṇaṃ, atha kho purimasiddhasambandhaggahaṇaṃca imassa upanissayoti daṭṭhabbaṃ. Thambhanasandhāraṇacalanāni viññattivikārasahitāya vāyodhātuyā hontīti vuttaṃ. Kiṃ sabbāva vāyodhātū sabbāni tāni karontīti? Nayidamevaṃ. Sattamajavanasambhūtā hi vāyodhātu purimajavanasambhūtā vāyodhātuyo upathambhakapaccaye labhitvā desantaruppattihetubhāvena calayati cittajarūpaṃ, na itarā. Itarā pana santhambhanasandhāraṇamattaṃ karontiyotassā upakārāya honti. Desantaruppatti eva calananti nimitte ca kattubhāvo samāropitoti daṭṭhabbaṃ. Aññathā dhammānaṃ abyāpāratā, khaṇikatā ca na siyā. Sattahi hugehi ākaḍḍhitabbasakaṭametta **atthakathāyaṃ**¹ nidassitaṃ². Cittajarūpe pana calante taṃsambandhatāya utukammāhārajarūpampi calati naḍīsote pakkhittasukkhagomayapiṇḍaṃ viya phandamānavaṇṇaggahaṇānantaraṃ viññattiggahaṇassa vuttattā. Kiṃ calanakarā eva vāyodhātu viññattivikārasahitāti? Nayidamevaṃ, tathā calayitumasakkuṇantiyopi thambhanasandhāraṇamattakarā paṭhamajavanādisambhūtāpi vāyodhātuyo viññattivikārasahitā evāti gahetabbaṃ. Yena disābhāgenāyaṃ abhikkamādiṃ pavattetukāmo, tadabhimukhavikāramanodvārāvajjanassāpi viññattisamuṭṭhāpakavacanaṃ suṭṭhu yujjati. Yathāvuttavikāraggahaṇamukhena taṃsamaṅgino adhippāyo viññāyatīti vuttaṃ “**adhippāyappakāsanasā**”ti.

1. Abhi-Ṭṭha 1. 125 piṭṭhe.

2. Niddisati (Ka)

Kāyavipphandanassa hetubhūtāya vāyodhātuyā vikārabhāvato pariyāyena viññatti **kāyavipphandanahetubhāvapaccupaṭṭhānā** vuttā. **Cittasamuṭṭhānavāyodhātupadaṭṭhānā**ti ca vāyodhātuyā kiccādhikatāya vuttam. **Kāyavipphandanena adhippāyaviññāpanahetuttā**ti kāyavipphandanena karaṇabhūtena adhippāyassa viññāpanahetubhāvato kāyaviññattīti vuccatīti sambandho. Ayañhettha attho—viññāpetīti viññatti. Kim viññāpeti? Adhippāyam. Kena? Kāyena. Kīdisena? Vipphandamānenāti. Dutīyanaye pana yathāvuttena kāyena viññāyatīti **kāyaviññatti**. Sesam vuttanayameva.

Atthāvabodhanasamattho vacīviseso **vacībhedo**. Tena vāyuvanappatinadīghosādīm nivatteti. Tassa pavattakam cittam samuṭṭhānam yassā sā **vacībhedappavattakacittasamuṭṭhānā**, pathavīdhātu. Tassā yam upādinnaṣaṅkhātassa akkharuppattiṭṭhānassa ghaṭṭanaṣaṅgītam kiccam, tassa sahakārikāraṇabhūto ākāraviseso vacīviññatti nāmāti dassento āha “**vacībhe -pa- vacīviññattī**”ti.

Idāni “kassa pana ākāravikāro”ti-ādi kāyaviññattiyam vuttanayeneva veditabbanam. Ayam pana viseso—yathā tattha “phandamānavañṇaggahaṇānantaran”ti vuttam, evamidha “suyyamānasaddasavanānantaran”ti yojetabbanam. Idha ca thambhanādīnam abhāvato “sattamajavanasambhūtā”ti-ādinayo na labbhati. Ghaṭṭanena hi saddhim saddo uppajjati. Ghaṭṭanaṅca paṭhamajavanādīsupi labbhateva. **Ghaṭṭanam** paccayasena bhūtakaḷāpānam aññamaññam āsannataruppādo. **Calanam** ekassāpi desantaruppādaparamparatāti ayametesam viseso. Yathā ca vāyodhātuyā calanam kiccam, evam pathavīdhātuyā ghaṭṭanam. Tenevāha “**pathavīdhātuyā upādinnaḡhaṭṭanassa paccayo**”ti. Sesam vuttanayameva. **Yathā hī**ti-ādi kāyavacīviññattīnam anumānavasena gahetabbabhāvavibhāvanam. **Yathā hi ussāpetvā baddhagosīsādirūpāni** disvā tadanantarappavattāya aviññāyamānantarāya manodvāravīthiyā gosīsādīnam udakasahacārippakārasaññāṅkāram gahetvā udakaggahaṇam hoti, evam vipphandamānasamuccāriyamānavañṇasaddo gahetvā tadanantarappavattāya aviññāyamānantarāya manodvāravīthiyā purimasiddhasambandhagahaṇūpanissayasahitāya sādhippāyavikāraggaṇam hoti.

442. Rūpāni paricchindati, sayam vā tehi paricchijjati, rūpānam vā paricchadamattam rūpaparicchedo, tam lakkhaṇam etissāti **rūpaparicchedalakkhaṇā**. Ayam hi ākāsadhātu tam tam rūpakalāpaṇam paricchindantī viya hoti. Tenāha “**rūpapariyantappakāsanarasā**”ti. Atthato pana yasmā rūpānam paricchadamattam hutvā gayhati, tasmā vuttam “**rūpamariyādapaccupaṭṭhānā**”ti. Yasmim kalāpe bhūtānam paricchedo, teheva **asamphuṭṭhabhāvapaccupaṭṭhānā**. Vijjamānepi hi kalāpantarabhūtānam kalāpantarabhūtehi samphuṭṭhabhāve tamtamabhūtavivittatā rūpapariyanto ākāsoti yesam so paricchedo, tehi so asamphuṭṭhova. Aññathā paricchinnatā na siyā tesam bhūtānam byāpibhāvāpattito. Abyāpitā hi asamphuṭṭhatā. Tenāha bhagavā “asamphuṭṭham catūhi mahābhūtehi”ti¹. Kaṇṇacchiddamukhavivarādivasena ca **chiddavivarabhāvapaccupaṭṭhānā vā**. Yesam rūpānam paricchedo, tattheva tesam paricchedabhāvena labbhatīti vuttam “**paricchinnarūpapadaṭṭhānā**”ti. “**Yāya paricchinesū**”ti-ādinā ākāsadhātuyā tamtamkalāpānam kalāpantarehi asaṅkarakāraṇatam dasseti.

443. **Adandhatā**ti agarutā. **Vinodanam** vikkhipanam, apanayananti attho. **Athaddhatā**ti akathinatā. Attano mudubhāveneva sabbakiriyāsu **avirodhitā**. Mudu hi katthaci na virujjhati. Tisupi ṭhānesu paṭipakkhe a-kāro dandhatādihetūnam paṭipakkhasamuṭṭhānattā lahutādīnanti keci. Apare pana “sattāpaṭisedhe”ti vadanti. Sarīrena kattabbakiriyānam anukūlatāsaṅkhātakammaññabhāvo lakkhaṇam etissāti **sarīrakiriyānukūlakammaññabhāvalakkhaṇā**. Akammaññam dubbalam nāma hotīti kammaññatā **adubbalabhāvapaccupaṭṭhānā** vuttā.

Lahutādīnam aññamaññāvijahanena duviññeyyanānattatā vuttāti tamtamvikārādhikarūpehi tam nānattappakāsanattham “**evam santepī**”ti vuttam. **Dhātukkhubho** vātapittasemhapakopo, rasādīdhātūnam vā vikārāvattā. Dvidhā vuttopi atthato pathavīdhātu-ādīnam dhātūnamyeva vikāroti daṭṭhabbo. **Paṭipakkhapaccayā** sappāya-utu-āhārā vikkhittacittatā. Te ca tamtamvikārassa visesapaccayabhāvato vuttā, avisesena

1. Abhi 1. 169, 177 piṭṭhesu.

pana sabbe sabbesaṃ paccayā. Yato nesaṃ aññamaññāvijahaṇaṃ,
iddhivaḷaṅjanādīsu viya vasavattanaṃ **maddavappakāro**.

Suparimadditacammaśudhantasuvaṇṇagahaṇaṅcetta
mudukammaññasadisarūpanidassanamattaṃ, na taṃ idha adhippettaṃ
mudutākammaññatāsabbhāvato. Na hi anindriyabaddharūpasantāne
lahutādīni sambhavanti, indriyabaddhepi rūpabhava na santi
dandhattakarādīdhātukkabhāvato. Sati hi tādise dhātukkabhava
tappaṭipakkhapaccayasamuṭṭhānāhi lahutādīhi bhavitabbanti keci, taṃ
akāraṇaṃ. Na hi vūpasametabbapaccanīkāpekkho
tabbīrodhidhammasamuppādo, tathā sati sahetukakiriyacittuppādesu
kāyalahutādīnaṃ abhāvova siyā. Kasmā pana kammajarūpesu lahutādayo na
hontīti? Paccuppannapaccayāpekkhattā. Aññathā sabbadābhāvīhi lahutādīhi
bhavitabbaṃ siyāti.

444. Ādi cayo, īsaṃ vā cayoti ācayo, yathāpaccayaṃ tato tato āgatassa
viya cayoti vā ācayo, tadubhayaṃ ekajjhaṃ gahetvā ācayo lakkhaṇaṃ
etassāti **ācayalakkhaṇo**. **Rūpassa upacayo** paṭhamuppādo, vaḍḍhi ca
“upaññattaṃ upasittan”ti-ādīsu viya upa-saddassa paṭhamūpari-atthassa
nidassanato. **Pubbantatoti** pubbakoṭṭhāsato, anāgatabhāvato attho.
Uppajjamāne rūpadhamme uppādo anāgatakkhaṇato ummujjāpento viya
hotīti vuttaṃ “**ummujjāpanaraso**”ti. Tathā so “ime rūpadhammā”ti
niyyātentō viya gayhatīti āha “**niyyātanapaccupaṭṭhāno**”ti.
Paripuṇṇabhāvapaccupaṭṭhānatā “uparicayo upacayo”ti imassa atthassa
vasena veditabbā. **Pavattilakkhaṇāti** rūpānaṃ pavattananti lakkhitabbā.
Anuppabandhanarasāti pubbāparavasena anu anu pabandhanakiccā. Tato
eva anupacchedavasena gahetabbato **anupacchedapaccupaṭṭhānā**.

Ubhayampīti upacayo santatīti ubhayampi. **Jātirūpassevāti**
rūpuppādasēva¹ **adhivacanaṃ**. Yadi evaṃ kasmā vibhajja vuttāti āha
“**ākāranānattato**”ti, jātirūpassa pavatti-ākārabhedatoti attho. Veneyyavasena
vibhajjakathane kāraṇaṃ parato āvi bhavissati. Kathaṃ panetaṃ
viññātabbāṃ, pavatti-ākāranānattato jātirūpassa bhedo, na

1. Jātirūpasseva (Syā, Ka)

sabhāvatoti? Niddesatoti dassento “**yasmā panā**”ti-ādimāha. Tattha **yo āyatanānanti** yo aḍḍhekādasannaṃ rūpāyatanānaṃ ādicayattā “**ācayo**”ti vutto. **So** evaṃ **upacayo** paṭhamuppādabhāvato upa-saddo paṭhamatthoti katvā. **Yo** pana tattheva uppajjamānānaṃ upari cayattā **upacayo**, **sā** eva **santati** anupabandhavasena uppattibhāvato. Atha vā **yo āyatanānaṃ ācayo**¹ paṭhamabhāvena upalakkhito uppādo, so pana tattheva uppajjamānānaṃ upari cayattā **upacayo**, vaḍḍhīti attho. Upacayo vaḍḍhibhāvena upalakkhito uppādo, **sā** eva **santati** pabandhākārena uppattibhāvato. Tenāha “**aṭṭhakathāyampī**”ti-ādi.

Tattha **evaṃ kiṃ kathitanti** “yo āyatanānaṃ ācayo”ti-ādinā² niddesena kiṃ atthajātaṃ kathitaṃ hoti? Āyatanena ācayo kathito. Ācayupacayasantahiyo hi nibbattibhāvena ācayo evāti āyatanehi ācayādināṃ pakāsītattā tehi ācayo kathito. Āyatanānaṃ ācayādivacaneneva ācayasabhāvāni uppādadhammāni āyatanānīti ācayena tāmpakatikaṃ āyatanānaṃ kathitaṃ. Lakkhaṇaṇhi uppādo, na rūparūpanti.

Rūpaparipāko rūpadhammānaṃ jīṇṇatā. **Upanayanarasāti** bhaṅgupanayanakiccā. **Sabhāvānapagamepīti** kakkhaḷatādisabhāvassa avigamepi. Ṭhitikkhaṇe hi jarā, na ca tadā dhammo sabhāvaṃ vijahati nāma. **Navabhāvo** uppādāvattā, tassa apagamabhāvena gayhatīti āha “**navabhāvāpagamapaccupaṭṭhānā**”ti. “**Arūpadhammānaṃ**”ti idaṃ tesāṃ jarāya suṭṭhu paṭicchannatāya vuttaṃ. Rūpadhammānampi hi khaṇikajarā paṭicchannā evaṃ, yā avīcījarātipi vuccati. **Esa vikāro**ti khaṇḍiccādivikāramāha. So hi arūpadhammesu na labbhati. Yā avīcījarā nāma, tassāpi esa vikāro natthīti sambandhitabbaṃ. Natthi etissā jarāya vīcīti **avīcījarā**, navabhāvato duviññeyyantarajarāti attho.

Parito sabbaso “bhijjanan”ti lakkhitabbāti **paribhedalakkhaṇā**. Niccaṃ nāma dhuvāṃ, rūpaṃ pana khaṇabhāṅgitāya yena bhaṅgena na niccanti aniccaṃ, so aniccassa bhāvoti **aniccatā**. Sā pana yasmā ṭhitippattaṃ rūpaṃ

1. Ādicayo (Sī)

2. Abhi 1. 169 piṭṭhe.

vināsabhāvena saṃsīdanāti viya hotīti vuttaṃ “**saṃsīdanarasā**”ti. Yasmā ca sā rūpadhammānam saṅgabhāvato khayavayākāreneva gayhati, tasmā vuttaṃ “**khayavayapaccupaṭṭhānā**”ti.

445. **Ojālakkhāṇoti** ettha aṅgamaṅgānusārino rasassa sāro upathambhabalakaro bhūtanissito eko viseso ojā. Kabaḷaṃ karīyatīti **kabaḷikāro**. Āharīyatīti **āhāro**, kabaḷaṃ katvā ajjhoharīyatīti attho. Idam pana savatthukaṃ ojaṃ dassetuṃ vuttaṃ. Bāhiraṃ āhāraṃ paccayaṃ labhitvā eva ajjhattikāhāro rūpaṃ uppādeti, so pana rūpaṃ āharatīti āhāro. Tenāha “**rūpāharaṇa raso**”ti. Tato eva ojaṭṭhamakarūpuppādanena imassa kāyassa **upathambhanapaccupaṭṭhāno**. Ojāya rūpāharaṇakiccaṃ bāhirādāhanti āha “**āharitabbavattupadaṭṭhāno**”ti.

446. **Balarūpanti**—ādīsu imasmim kāye balaṃ nāma atthi, sambhavo nāma atthi, rogo nāma atthi, “jāti sañjāti”ti¹ vacanato jāti nāma atthi, tehipi catūhi mahābhūtehi vinā abhāvato upādāyarūpehi bhavitabbanti adhippāyo. **Ekaccānanti** abhayagirivāsīnaṃ. **Paṭikkhittanti** ettha evaṃ paṭikkhepo veditabbo—middhaṃ rūpameva na hoti nīvaraṇesu desitattā. Yassa hi nīvaraṇesu desanā, taṃ na rūpaṃ yathā² kāmacchando. Siyā panetaṃ duvidhaṃ middhaṃ rūpaṃ, arūpañcāti. Tattha yaṃ arūpaṃ, taṃ nīvaraṇesu desitaṃ “na rūpaṃ”ti? Taṃ na, visesavacanābhāvato. Na hi visesetvā middhaṃ nīvaraṇesu desitaṃ, tasmā middhassa duvidhataṃ parikappetvāpi na sakkā nīvaraṇabhāvaṃ nīvattetuṃ. Sakkā hi vattuṃ “yaṃ taṃ arūpato aññāṃ middhaṃ parikappitaṃ, tampi nīvaraṇaṃ middhasabhāvattā itaraṃ middhaṃ viyā”ti.

Bhavatu nīvaraṇaṃ, ko virodhoti ce? Nīvaraṇaṅca pahātabbaṃ. Pañca nīvaraṇe pahāya “addhā munīsi sambuddho, natthi nīvaraṇā tavā”ti³ vacanato. Appahātabbaṅca rūpaṃ “katame dhammā nevadassanena nabhāvanāya pahātabbā? Catūsu bhūmīsu kusalaṃ, catūsu bhūmīsu vipāko, tīsu bhūmīsu kiriyābyākataṃ, rūpaṅca nibbānaṅca. Ime dhammā nevadassanena nabhāvanāya

1. Abhi 2. 104 piṭṭhe.

2. Na rūpaṃ diṭṭhaṃ yathā (Syā)

3. Khu 1. 362 piṭṭhe Suttanipāte.

pahātabbā”ti¹ vacanato. Na cettha tadārammaṇakilesappahānam adhippetam “rūpaṃ bhikkhave na tumhākaṃ, taṃ pajahathā”ti-ādīsu² viya kāmaccandādīnam tathā pahānassa anadhippetattā. Tasmā na middham rūpaṃ. Yadi middhassa rūpabhāvaṃ na sampañicchatha, katham bhagavato niddā. Middhañhi “niddāpacalāyikā”ti-ādīna³ vibhaṅge vibhattattā niddāti? Na middham niddā, niddāhetubhāvato pana taṃ “niddā”ti vibhattam yathā-itthilingādi. Evampi niddāhetuno middhassa abhāvato katam bhagavato niddāti? Niddā bhagavato sarīragilāniyā, na middhena. Sā ca natthīti na sakkā vattum “piṭṭhi me āgilāyati, tamahaṃ āyamissāmi”ti⁴ vacanato. Na cettha evamavadhāraṇam middhameva niddāhetūti, niddāhetu eva middhanti evamavadhāraṇā. Tasmā aññopi atthi niddāhetu, ko pana soti? Sarīragilāniyā. Tena vuttaṃ “niddā bhagavato sarīragilāniyā, na middhenā”ti.

Niddā ca bhagavato natthīti na sakkā vattum “abhiñāmi kho panāham aggivessana -pa- divā supitā”ti⁵ vacanato. Itopi na middham rūpaṃ sampayogavacanato. Vuttañhi “thinamidghanīvaraṇam avijjānīvaraṇena nīvaraṇaṅceva nīvaraṇasampayuttaṅcā”ti-ādī⁶. Na cettha yathālābhabhavanam⁷ sakkā paccetum “sakkharakathalikampi macchagumbampi carantampi tiṭṭhantampi”ti-ādī⁸ viya appasiddhatāya rūpabhāvassa. Siddhe hi tassa rūpabhāve sambhavato yathālābhapaccayo yujjeyyāti. Itopi na rūpaṃ middham āruppesu uppajjanato. Vuttampi cetam “nīvaraṇam dhammam paṭicca nīvaraṇo dhammo uppajjati napurejātapaccayā”ti⁹ imassa vibhaṅge “āruppe kāmaccandanīvaraṇam paṭicca thinamidghanīvaraṇam uddhaccanīvaraṇam avijjānīvaraṇam uppajjati”ti⁹ vitthāro. Tasmā “na middham rūpaṃ”ti yaṃ aṭṭhakathāsu paṭikkhittam, taṃ supaṭikkhittameva.

Itaresūti balarūpādīsu. Kammasamuṭṭhānassāpi rogassa visabhāgapaccayasamuppanno dhātukkubho āsannakāraṇam, pageva itarassa. So ca atthato rūpadhammānam vikāravatthāhitibhaṅgakkhaṇesu eva siyāti vuttaṃ “**rogarūpaṃ jaratā-aniccatāgahaṇena gahitamevā**”ti. **Upacayasantatigahaṇena gahitamevā**ti tabbinimuttassa rūpuppādassa abhāvato.

1. Abhi 1. 269 piṭṭhe. 2. Saṃ 2. 28, 304 piṭṭhesu. 3. Abhi 2. 263 piṭṭhe.
 4. Ma 2. 17 piṭṭhe. 5. Ma 1. 316 piṭṭhe. 6. Abhi 1. 235 piṭṭhe.
 7. Yathālābhavacanam (Ka) 8. Dī 1. 79 piṭṭhe.
 9. Abhi 10. 300 piṭṭhe Paṭṭhāne.

Upādāvattāya ca aññā jāti nāma nattheva. Sambhavo kāmādhātuyāṃ ekacciyaśattānaṃ indriyaparipākapaccayo āpodhātuyā pavatti-ākāravisesoti āha “**sambhavarūpaṃ āpodhātuggahaṇena gahitamevā**”ti. Kāyabalaṃ nāma atthato vāyodhātuyā pavatti-ākāraviseso tassā vipphārabhāvato. Yato naṃ “pāṇabalan”ti vadanti, tenāha “**balārūpaṃ vāyodhātuggahaṇena gahitamevā**”ti. Kasmā pana nesam ayathākkamato paṭikkhepo katoti? **Visuṃ natthīti** katvā anupalabbhamānattā anādaradassanattam, middhapaṭikkhepo vā mahāpañhoti¹ paṭhamam kato. Tadanusārena paṭilomanayena itaresampi abhāvo vuttoti veditabbaṃ.

“**Iti**”ti idam “**aṭṭhavīsatividhan**”ti iminā sambandhitabbaṃ, iminā vuttakkamena aṭṭhavīsatividham hotīti. So ca kho pāṇiyam āgatanayenevāti anūnatā veditabbā. Anadhikabhāvo pana dassito eva.

447. Sampayuttadhammarāsi hinoti etena paṭiṭṭhahatīhi **hetu**, mūlaṭṭhena lobhādiko, alobhādiko ca, tādiso hetu na hotīti **nahetu**. Nāssa hetu atthīti **ahetukam**, sahetukapaṭiyogibhāvato hetunā saha na uppajjati attho.

Ahetukameva hetunā vippayuttatāya **hetuvippayuttam**.

Dhammanānattābhāvepi hi saddatthanānattena veneyyavasena dukantaradesanā hotīti dukapadavasena cetam vuttam.

Paccayādhīnavuttitāya saha paccayenāti **sappaccayam**. Attano paccayehi loke niyuttam, viditanti vā **lokiyam**. Ā bhavaggaṃ, ā gotrabhum vā savantīti āsavā, saha āsavehīti **sāsavam**, āsavehi ālambitabbanti attho. Ādisaddena saṃyojanīyam oghanīyam yogānīyam nīvaraṇīyam saṃkilesikam parāmaṭṭham acetasikam cittavippayuttam narūpāvācaram na-arūpāvācaram na-apariyāpannam aniyatam aniyānikam aniccanti evamādinam saṅgaho daṭṭhabbo.

Āhito aham māno etthāti attā, attabhāvo. Tam attānam adhikicca uddissa pavattā ajjhattā, indriyabaddhadhammā, tesu bhavam **ajjhattikam**, cakkhādi. Aṭṭhakathāyam pana vuttanayena ajjhattameva **ajjhattikam** yathā

1. Mahāpapañcoti (Si), mahāpapañcoti (Syā)

venayikoti¹ imamatthaṃ sandhāya vuttaṃ “**attabhāvaṃ adhikicca pavattattā ajjhattikan**”ti. **Sesaṃ** tevīsatividhaṃ. “**Tatobāhirattā**”ti idaṃ ajjhattikalakkhaṇābhāvato vuttaṃ. **Ghaṭṭanavasena**ti visayī, visayo ca hutvā saṃghaṭṭanavasena. **Sesaṃ** soḷasavidhaṃ. **Viparītattā**ti ghaṭṭanavasena aggahetabbato. **Duppaṭivijhasabhāvattā**ti sukhumabhāvena duviññeyyasabhāvattā. Nāṇassa āsanne na hotīti **dūre**. **Terasa** hadayavatthupariyosānāni. **Sabhāvenevā**ti “rūpassa paricchedo, rūpassa vikāro, rūpassa upacayo”ti-ādinā aggahetvā attano sabhāveneva kakkhaḷattādinā nāṇena paricchijja gahetabbato. **Sesaṃ** dasavidhaṃ. **Tabbiparītattāyā**ti sabhāvena apariggahitabbato. Sotādīnampi cakkhuno viya pasannasabhāvattā eva yathāsakaṃ visayaggahaṇapaccayatāti dassento āha “**cakkhādi -pa- pasādarūpan**”ti. **Viparītattā**ti tabbidhurasabhāvattā. **Adhipatiyatthenā**ti ettha cakkhādīnaṃ tāva pañcannaṃ cakkhuvīññāṇādīsu ādhipateyyaṃ tesāṃ paṭumandabhāvānūvattanato, itthipurisindriyadvayassa sakicce jīvitindriyassa saha jarūpānupālāne. Tadubhayaṃ heṭṭhā vuttameva. **Upādinnattā**ti gahitattā. Kammanibbattañhi “mametaṃ phalaṃ”ti kammaṇā gahitaṃ viya hoti apaṭikkhepatō.

448. **Sanidassanakammajādīnaṃ tikānanti** sanidassanattikassa, kammajādittikānañca. **Oḷāriketi** dvādasavidhe oḷārikarūpe. **Rūpanti** rūpāyatanāṃ. Daṭṭhabbābhāvasāṅkhātena saha nidassanenāti sanidassanaṃ, paṭihanābhāvasāṅkhātena saha paṭighenāti sappāṭighaṃ, sanidassanañca taṃ sappāṭighaṇcāti **sanidassanasappaṭighaṃ**. Tattha yassa daṭṭhabbābhāvo atthi, taṃ **sanidassanaṃ**. Cakkhuvīññāṇogocarabhāvova **daṭṭhabbābhāvo**. Tassa rūpāyatanato anaññattepi aññehi dhammehi rūpāyatanāṃ visesetuṃ aññāṃ viya katvā vuttaṃ “saha nidassanena sanidassanaṃ”ti. Dhammabhāvasāmaññena hi ekībhūtesu dhammesuyo nānattakaro viseso, so añño viya katvā upacarituṃ yutto. Evaṃ hi atthavisesāvabodho hotīti. Yo sayāṃ, nissayavasena ca sampattānaṃ, asampattānañca paṭimukhabhāvo aññamaññaṃ patanaṃ, so **paṭihanābhāvo**, yena byāpārādivikārapaccayantarasaḥitesu

1. Am 3. 20; Vi 1. 3 piṭṭhesu.

cakkhādānaṃ visayesu vikāruppatti. **Sesaṃ** ekādasavidhaṃ oḷārikarūpaṃ. Tañhi sanidassanattābhāvato **anidassanaṃ**, vuttanayeneva **sappaṭighaṃ**. Ubhayapaṭikkhepena **anidassana-appaṭighaṃ**. **Kammato jātanti** ettha yaṃ ekantakammasamuṭṭhānaṃ aṭṭhindriyāni, hadayañcāti navavidhaṃ rūpaṃ, yañca navavidhe catusamuṭṭhāne kammasamuṭṭhānaṃ navavidhameva rūpanti evaṃ aṭṭhārasavidhampi kammato uppajjanato **kammajaṃ**. Yañhi jātañca yañca jāyati yañca jāyissati, taṃ sabbampi “kammajaṃ”ti vuccati yathā duddhanti. **Tadaññapaccaya-jātanti** kammato aññapaccayato jātaṃ utucittāhārajaṃ. **Nakutoci-jātanti** lakkhaṇarūpamāha. Viññattidvayaṃ, saddo, ākāśadhātu, lahutādittayaṃ cittasamuṭṭhānāni avinibbhogarūpānīti etaṃ pañcadasavidhaṃ rūpaṃ **cittajaṃ**. Ākāśadhātu, lahutādittayaṃ, āhārasamuṭṭhānāni avinibbhogarūpānīti etaṃ dvādasavidhaṃ rūpaṃ **āhārajaṃ**. Ettha saddaṃ pakkhipitvā terasavidhaṃ rūpaṃ ututo samuṭṭhitam **utujaṃ**. Sesaṃ kammajātike vuttanayānusārenea veditabbaṃ.

449. Diṭṭhādicatukkavasena, rūparūpādicatukkavasena, vatthādicatukkavasenaṃti pāṭekkaṃ catukkasaddo yojetabbo. Yaṃ rūpāyatanam adakkhi yaṃ passati yaṃ dakkhissati yaṃ passeyya, taṃ sabbaṃ **diṭṭham** nāma diṭṭhasabhāvānātivattanato yathā duddhanti. Esa nayo sesesupi. **Dassanavisayattāti** cakkhuviññānaviññeyyattā. **Savanavisayattāti** sotaviññānaviññeyyattā. **Gandharasaphoṭṭhabbattayanti** gandho raso phoṭṭhabbanti etaṃ tayaṃ. **Mutaṃ** nāma mutvā patvā gahetabbato. Tenāha “**sampattaggāhaka-indriyavisayattā**”ti.

Kimidaṃ phoṭṭhabbaṃ nāmāti? Pathavītejavāyodhātutthayaṃ. Kasmāpanettha āpodhātu aggahitā, nanu sītā phusitvā gayhati, sā ca āpodhātūti? Saccam gayhati, na pana sā āpodhātu. Kiñcarahīti? Tejodhātu eva. Mande hi uṇhabhāve sītābuddhi. Na hi sītā nāma koci guṇo atthi, kevalam pana uṇhabhāvassa mandatāya sītā bhimāno. Kathametaṃ viññātābanti ce? Anavaṭṭhitattā sītābuddhiyā yathā pārāpāre. Tathā hi ghammakāle ātape ṭhitānaṃ chāyaṃ paviṭṭhānaṃ sītābuddhi hoti, tattheva pana pathavīgabbhato uṭṭhitānaṃ uṇhabuddhi. Yadi hi sītā āpodhātu siyā, ekasmim kalāpe uṇhabhāvena saddhim upalabbheyya, na ca upalabbhati. Tasmā viññāyati na āpodhātu

sītatāti. Idañca bhūtānaṃ avinibbhogavuttitaṃ icchantānaṃ uttaraṃ, anicchantānampi pana catunnaṃ bhūtānaṃ ekasmiṃ kalāpe kiccadassanena sabhāgavuttitāya sādhitāya uttarameva. Ye pana “vāyodhātuyā lakkhaṇaṃ sītatā”ti vadanti, tesampi idameva uttaraṃ. Yadi hi vāyodhātu sītatā siyā, ekasmiṃ kalāpe uṇhabhāvena saddhiṃ sītatā upalabbheyya, na ca upalabbhati. Tasmā viññāyati na vāyodhātu sītatāti. Yesaṃ pana dravatā āpodhātu, sā phusitvā gayhatīti dassanaṃ. Te vattabbā “dravabhāvopi phusiyatīti āyasmantānaṃ adhimānamattaṃ saṅghānaṃ viyā”ti. Vuttañhetam purātanehi—

“Dravatā sahavuttīni, tīṇi bhūtāni samphusaṃ.

‘Dravataṃ samphusāmi’ti, lokoyamabhimaññāti.

Phusaṃ bhūtāni saṅghānaṃ, manasā gaṇhate yathā.

‘Paccakkhato phusāmi’ti, ñātabbā dravatā tathā”ti.

Sesanti yathāvuttaṃ rūpādisattavidhaṃ rūpaṃ ṭhapetvā avasiṭṭhaṃ ekavīsatividhaṃ rūpaṃ. **Viññāṇassevāti** manoviññāṇasseva. Avadhāraṇena rūpāyatanādīnampi manoviññāṇaviññeyyatte niyamābhāvato na viññātarūpatāti saṅkarābhāvaṃ dasseti.

Nipphannarūpaṃ panettha rūparūpaṃ nāmāti yadettha aṭṭhavīsatividhe rūpe “nipphannaṃ”ti vuttaṃ rūpaṃ, tadeva rūpalakkhaṇayogato rūpaṃ. Ruppanaṃ rūpaṃ, taṃ etassa atthīti yathā arisasoti, rūpaṇayogato vā yathā nīlaguṇayogato nīlaṃ vatthanti. Svāyaṃ rūpasaddo ruḷhiyā atamaṃsabhāvepi pavattatīti aparena rūpasaddena visesetvā vuttaṃ “**rūparūpan**”ti yathā tilatelaṃ, dukkhadukkanti¹ ca, ruppanasabhāvaṃ rūpanti attho. Yadi evaṃ ākāsadhātu-ādīnaṃ kathaṃ rūpabhāvoti? Nipphannarūpassa paricchedavikāralakkhaṇabhāvato taggatikamevāti “rūpan”tveva vuccati.

Vasanti ettha cittacetasiḷā pavattantīti **vatthu**, cittatamaṃsampayuttānaṃ ādhārabhūtaṃ rūpaṃ. Taṃ pana chabbidhaṃ. Tattha hadayarūpaṃ vatthu eva manodhātumanoviññāṇadhātūnaṃ nissayabhāvato. **Na dvāraṃ** aññanissayaṇaṃ cakkhādi viya. Yathā hi cakkhādīni sampaṭicchanaḍīnaṃ pavattiyā dvāraṃ honti,

1. Visuddhi 2. 130 piṭṭhe.

na evaṃ hadayavatthu. Tena vuttaṃ “**yaṃ panettha hadayarūpaṃ nāma, taṃ vatthu, na dvāraṃ**”ti. **Viññattidvayaṃ dvāraṃ** kammadvārabhāvato. Tannissitassa cittuppādassa abhāvato **na vatthu. Pasādarūpaṃ vatthu ceva** atthasannissitassa cakkhuviññāṇādikassa, **dvāraṇca** aññanissitassa sampaṭicchānādikassa. **Sesaṃ** ekavīsatividhaṃ rūpaṃ vuttavipariyāyato **neva vatthu na ca dvāraṃ.**

450. Ekato eva jātaṃ **ekajaṃ**. Nanu ca ekato eva paccayato¹ paccayuppannassa uppatti natthīti? Saccam natthi, rūpajanakapaccayesu ekatoti ayamettha adhippāyo. Na hi rūpuppatti rūpajanakato aññaṃ paccayaṃ apekkhati. **Dvijanti**-ādīsupi eseva nayo. **Imesanti** imesaṃ pabhedānaṃ **vasena. Kammajamevāti** kammato eva jātaṃ. **Cittajamevāti** etthāpi eseva nayo. **Cittato ca ututo ca jātanti** kālena cittato, kālena ututoti evaṃ cittato ca ututo ca jātaṃ daṭṭhabbaṃ. **Taṃ dvijaṃ** dvīhi jātanti. Parato dvīsipi eseva nayo. **Saddāyatana**mevāti ettha yaṃ cittajaṃ saddāyatanaṃ, taṃ saviññattikamevāti eke. Aviññattikopi atthi vitakkavipphārasaddoti porāṇā.

Vitakkavipphārasaddo na sotaviññeyyoti hi evaṃ pavattamahā-aṭṭhakathāvādaṃ nissāya cittasamuṭṭhānassa saddassa viññattiyā vināpi uppatti icchitabbā. Na hi viññatti “kāyavācāya viññatti”ti vacanato asotaviññeyyena saddena saha uppajjati, evaṃ sante cittajenāpi saddanavakena bhavitabbaṃ. So ca vādo “saddo ca hoti, na sotaviññeyyo cā”ti viruddhamevetanti maññaṃānehi saṅgahakārehi paṭikkhitto. Apare pana mahā-aṭṭhakathāvādaṃ appaṭikkhipitvā tassa adhippāyaṃ vaṇṇenti. Kathaṃ? “Jivhātālucalanādikam vitakkasamuṭṭhitaṃ viññattisahajameva sukhumasaddaṃ dibbasotena sutvā ādisati”ti sutte, paṭṭhāne ca oḷārikam saddaṃ sandhāya sotaviññāṇassa ārammaṇapaccayabhāvo vuttoti iminā adhippāyena vitakkavipphārasaddassa asotaviññeyyatā vuttāti. **Taṃ** catujaṃ. **Avasesanti** avinibbhogarupena saddhim ākāsadhātumāha.

1. Sapaccayato (Ka)

Lakkhaṇarūpaṃ pana nakutocijātanti kutocipi paccayato na jātaṃ, nāpi sayameva jātaṃ paccayehi vinā sayameva jātassa sabbena sabbaṃ abhāvato. Kathaṃ panetaṃ viññātabbaṃ lakkhaṇarūpaṃ na jāyatīti? Lakkhaṇābhāvato. Uppattimantānaṃ hi rūpāyatanādīnaṃ jāti-ādīni lakkhaṇāni vijjanti, na evaṃ jāti-ādīnaṃ. Tasmā viññātabbameṭaṃ jāti-ādīni na jāyantīti. Siyā panetaṃ “jāti-ādīnaṃ jāti-ādīni lakkhaṇāni vijjantī”ti? Taṃ na, kasmā? Tathā sati anavaṭṭhānāpattito. Yadi hi jāti-ādīni jāti-ādimantāni siyūṃ, tānipi jāti-ādimantāni, tānipi jāti-ādimantānīti anavaṭṭhānameva āpajjati. Tasmā suṭṭhu vuttaṃ “jāti-ādīni na jāyantī”ti. Tenāha **“na hi uppādassa uppādo atthi, uppannassa ca paripākabhedaṃ atthi, itaradvayan”**ti, jarāmaṇanti attho.

Tattha **“uppādo natthi”**ti etena uppādassa jarāmaṇābhāvamāha. Asati uppāde kuto jarāmaṇanti mattaggaṇeṇa jarāmaṇassa uppādābhāvampi. Yadi evaṃ jātiyā kutoci jātataṅgānaṃ kathanti āha **“yampi”**ti-ādi. Tattha **kiccānubhāvakkhaṇe ditṭhattā**ti ye te cittaḍḍayo rūpāyatanādīnaṃ rūpānaṃ janakapaccayā, tesaṃ taduppādanaṃ pati anuparatabyāpārānaṃ yo so paccayabhāvūpalakkhaṇīyo kiccānubhāvakkhaṇo, tadā jāyamānaṃ rūpāyatanādīnaṃ dhammānaṃ vikārabhāvena upalabbhamānataṃ sandhāya veneyyapuggalavasena jātiyā kutoci paccayato jātataṃ pāḷiyāṃ anuññātaṃ yathā taṃ cittasamuṭṭhānatādi viññatti-ādīnaṃ. Ayañhetta saṅkhepattho—yehi paccayadhammehi rūpāḍḍayo uppajjeyyūṃ, tesaṃ paccayabhāvūpagamanakkhaṇe upalabbhamānā rūpāḍḍayo tato pure, pacchā ca anupalabbhamānā tato uppajjantīti viññāyanti, evaṃ jātipi veditabbā. Yadi evaṃ nippariyāyato jātiyā kutoci jātataṃ siddhā, atha kasmā veneyyapuggalavasenāti vuttanti? Nayidamevaṃ jāyamānadhammavikārabhāvena upalabbhamānattā. Yadi hi dhammo viya upalabbheyya jāti, nippariyāyova tassā kutoci jātabhāvo, na evamupalabbhati, atha kho vikārabhāvena. Tasmā vuttaṃ **“veneyyapuggalavasenā”**ti.

Tadā kira sotūnaṃ evaṃ cittaṃ uppannaṃ “ayaṃ jāti sabbesaṃ dhammānaṃ pabhavo, sayañca na kutoci jāyati yathā taṃ pakativādīnaṃ pakatī”ti

taṃ nesaṃ¹ micchāgāhaṃ vidhamento satthā “upacayo santatī”ti dvidhā bhinditvā kutoci paccayato jātañca katvā desesi, na pana jarāmaṇaṃ paccayadhammānaṃ kiccānubhāvakkhaṇe adassanato. Yadi evaṃ kathaṃ “jarāmaṇaṃ paṭiccasamuppannaṃ”ti² ()³ vuttaṃ? Yasmā paṭiccasamuppannānaṃ dhammānaṃ paripākabhāṅgatāya tesu santesu honti, na asantesu. Na hi ajātaṃ paripaccati, bhijjati vā, tasmā taṃ jātipaccayataṃ sandhāya “jarāmaṇaṃ paṭiccasamuppannaṃ”ti² pariāyena suttesu vuttaṃ. Yo panettha kāmaabhāvādīsu kammādinā paccayena yonivibhāgato paṭisandhiyaṃ, pavattiyañca rūpadhammānaṃ pavattibhedo vattabbo, so parato paṭiccasamuppādakathāyaṃ āvi bhavissatīti na vuttoti daṭṭhabbo.

Iti rūpakkhandhe vitthārakathā mukhavaṇṇanā.

Viññāṇakkhandhakathāvaṇṇanā

451. **Yaṃ kiñcīti** anavaśesapariyādānadīpakena padadvayena vedayitassa bahubhedataṃ dassento vuccamānaṃ rāsaṭṭhaṃ ulliṅgeti. Vedayitaṃ ārammaṇarasānubhavanaṃ lakkhaṇaṃ etassāti **vedayitalakkhaṇaṃ**. **Sabbaṃ taṃ** dhammajātanti adhippāyo, pubbe vā rūpakkhandhakathāyaṃ vuttaṃ adhikārato ānetvā sambandhitabbaṃ. **Ekato katvāti** atītādibhedabhinnaṃ sabbaṃ taṃ buddhiyā ekato katvā. Evañhi rāsaṭṭhassa sambhavo. Nīlādibhedassa ārammaṇassa sañjānaṃ, “nīlaṃ pītaṃ dīghaṃ rassaṃ”ti⁴ ca ādinā saññuppādavāsena jānaṃ gahaṇaṃ lakkhaṇaṃ etassāti **sañjānalakkhaṇaṃ**. **Abhisāṅkharāṇaṃ** āyūhanaṃ byāpārāpatti, abhisandhanaṃ vā, ubhayathāpi cetanāpadhānatāya saṅkhārakkhandhassa evaṃ vuttaṃ **“abhisāṅkharāṇalakkhaṇaṃ”**ti. Tathā hi **suttantabhājanīye** saṅkhārakkhandhaṃ vibhajantena bhagavatā “cakkhusamphassa jācetanā”ti-ādinā⁵ cetanāva vibhattā. Minitabbavattum nāḷiyā minamāno puriso viya yena sañjānaṃ kāravasiṭṭhena ākārena visayaṃ gaṇhāti, taṃ ārammaṇūpaladdhisāṅkhātaṃ vijānaṃ lakkhaṇaṃ etassāti **vijānalakkhaṇaṃ**. Itare vedanākkhandhādayo suviññeyyā hontīti viññāṇena ekuppādādibhāvato, samānajāti-ādivibhāgato ca.

1. Tena nesaṃ (Syā, Ka)

2. Saṃ 1. 264 piṭṭhe.

3. (Pariāyena sutte) (Syā)

4. Abhi 1. 162 piṭṭhe.

5. Abhi 2. 8 piṭṭhe.

Attanā “vijānanalakkhaṇan”ti vuttamattham suttana samatthetum “**yaṁ kiñci**”ti-ādi vuttam. Yathāpaccayam pavattimattametam, yadidaṁ sabhāvadhammoti dassetum “**vijānanalakkhaṇan**”ti bhāvasādhanavasena vuttam. Dhammasabhāvā vinimutto koci kattā nāma natthīti tasseva kattubhāvaṁ dassetum “**vijānāti**”ti vuttam. Yam vijānanaṭṭhena viññāṇam, tadeva cintanādi-atthena **cittam**, mananaṭṭhena **manoti** pariyāyatopi nam bodheti. Ettāvata ca khandhato, bhedato, pariyāyato ca viññāṇam vibhāvitaṁ hoti.

Jāyanti ettha visadisāpi sadisākārāti **jāti**, samānakāro. Sā panāyam jāti kāmam anekavidhā nānappakārā, taṁ idhādhippetameva pana dasseto “**kusalam, akusalam, abyākatañcā**”ti āha. Tattha kusalaṭṭhena **kusalam**. Koyam kusalaṭṭho nāma? Ārogyaṭṭho anavajjaṭṭho sukhavipākaṭṭho. Ārogyaṭṭhenāpi hi kusalam vuccati “kacci nu bhoto kusalan”ti-ādīsu¹. Anavajjaṭṭhenāpi “katamo pana bhante kusalo kāyasamācāro? Yo kho mahārāja anavajjo kāyasamācāro”ti-ādīsu². Sukhavipākaṭṭhenāpi “kusalānam bhikkhave dhammānam samādānāhetū”ti-ādīsu³. Kusalacittañhi rāgādīnam cetasikarogānam avajjasabhāvānam paṭipakkhabhāvato, sukhavipākavipaccanato ca arogam, anavajjam, sukhavipākañcāti.

Saddatthato pana kucchite pāpadhamme salayati calayati kampeti viddhamsetīti **kusalam**. Kucchitena vā ākārena sayantīti kusā, pāpadhammā, te kuse lunāti chindatīti **kusalam**. Kucchitānam vā sānato tanukaraṇato ñāṇam kusam nāma, tena lātabbam gahetabbam pavattetabbanti salam. Yathā vā kuso ubhayabhāgagataṁ hatthapadesam lunāti, evamidaṁ uppannānuppannavasena ubhayabhāgagataṁ saṅkilesapakkham lunāti chindati, tasmā kuso viya lunatīti **kusalam**. Kucchitānam vā sāvajjadhammānam salanato saṁvaraṇato **kusalam**. Kusaladhammasena hi akusalā pavattinivāraṇena, appavattibhāvāpādanena ca⁴ manacchaṭṭhesu dvāresu appavattiyā saṁvutā pihitā honti. Kucchite vā pāpadhamme salayati kampeti apānetīti **kusalam**. Kucchitānam vā paṇātipātādīnam

1. Khu 5. 327; Khu 6. 77 piṭṭhesu.

2. Ma 2. 318 piṭṭhe.

3. Dī 3. 48 piṭṭhe.

4. Appavatti-āpādanena va (Ka)

pāpadhammānaṃ sānato nisānato tejanato kusā, dosalobhādayo.
 Dosādīnañhi vasena cetaṇāya tikkhabhāvappattiyā paṇātipātādīnaṃ
 mahāsāvajjātā, te kuse lunāti chindatīti **kusalāṃ**. Kucchitānaṃ vā sānato
 antakaraṇato vināsanato kusāni, puññakiriyavasena pavattāni saddhādīni
 indriyāni, tehi lātabbaṃ pavattetabbanti **kusalāṃ**. “Ku”iti vā bhūmi vuccati,
 adhiṭṭhānabhāvena taṃsadisassa attano nissayabhūtaṃ
 rūpārūpappabandhassa sampati, āyatiṅca anudahanena vināsanato kuṃ
 siyantīti kusā, rāgādayo, te viya attano nissayassa lavanato chindanato
kusalāṃ. Payogasampādītā hi kusaladhammā accantameva rūpārūpadhamme
 appavattikaraṇena samucchindantīti.

Na kusalanti **akusalāṃ**, kusalapaṭipakkhanti attho. Na kusalanti hi
 kusalapaṭikkhepena akusalapadassa avayavabhedena atthe vuccamāne yathā
 yaṃ dhammajātaṃ na arogaṃ, na anavajjaṃ, na sukhavipākaṃ, na ca
 kosallasambhūtaṃ, taṃ akusalanti ayamattho dassito hoti, evaṃ yaṃ na
 kucchitānaṃ salanasabhāvaṃ, na kusānaṃ lavanasabhāvaṃ, na kusena
 kuseti vā pavattetabbaṃ, na ca kuso viya lavanakaṃ, taṃ akusalāṃ nāmāti
 ayampi attho dassito hoti. Ettha ca yasmā kusalāṃ akusalassa
 ujuvipaccanīkabhūtaṃ, yato cetasarogapaṭipakkhādibhāvato
 arogādipariyāyenapi bodhitaṃ, tasmā akusalāṃ pana kusalassa
 ujuvipaccanīkabhūtanti vuttaṃ “kusalapaṭipakkhanti attho”ti. Taṃ pana
 yathākkamaṃ pahāyakapahātābbabhāvenevāti daṭṭhabbaṃ.

Na byākatanti **abyākatāṃ**, kusalākusalabhāvena akathitanti attho. Tattha
kusalabhāvo anavajjasukhavipākaṭṭho. **Akusalabhāvo**
 sāvajjadukkhavipākaṭṭho, tadubhayabhāvena avuttanti vuttaṃ hoti. Eteneva
 arogasarogādibhāvena ca avuttatā vaṇṇitāti daṭṭhabbā. Ettha ca “kusalāṃ
 akusalāṃ”ti ca vatvā “abyākatan”ti vuttatā kusalākusalabhāveneva avuttatā
 viññāyati, na pakārantarena. Avuttatā cettha na tathā avattabbatāmattena,
 atha kho tadubhayavinimuttasabhāvātāya tesāṃ dhammānanti daṭṭhabbaṃ.
 Tathā hetāṃ “avipākalakkhaṇaṃ”ti vuccati.

452. **Bhūmibhedatoti** bhavanti ettha dhammāti bhūmi, ṭhānaṃ, avatthā
 ca. Avatthāpi hi avatthāvantānaṃ pavattitṭhānaṃ viya gayhati, evaṃ nesāṃ
 sukhaggahaṇaṃ

hotīti. Tattha lokiyā bhūmi ṭhānavaseneva veditabbā, lokuttarā avatthāvasena. Lokiyā vā ṭhānavatthāvasena, lokuttarā avatthāvaseneva. **Kāmāvacaranti** ettha vatthukāmo kilesakāmoti dve kāmā. Tesu **vatthukāmo** visesato pañca kāmaguṇā kāmīyantīti, **kilesakāmo** taṇhā kāmētīti. Te dvepi sahitā hutvā yattha avacaranti, taṃ **kāmāvacaram**. Kim pana tanti? Ekādasavidho kāmabhāvo. Idam yebhuyyena tattha avacarati pavattatīti **kāmāvacaram** ekassa avacarasaddassa lopam katvā. Evam **rūpārūpāvacarānīpi** veditabbāni rūpataṇhā rūpam, arūpataṇhā arūpanti katvā. Atha vā kāmataṇhā kāmo uttarapadalopena, avacarati etthāti avacaram, kāmassa avacaram **kāmāvacaram**. Evam **rūpāvacarāpāvacarānīpi** veditabbāni. Lokato uttaratīti **lokuttaram** kusalassa adhippetattā. Itaram pana lokato uttiṇṇanti **lokuttaram**.

Somanassupekkhāñāṇasaṅkhārābhedatoti ettha somanassupekkhābhedo tāva yutto tesam bhinnasabhāvattā, ñāṇasaṅkhārābhedo pana kathanti? Nāyam doso ñāṇasaṅkhārakato bhedo ñāṇasaṅkhārābhedo, so ca tesam bhāvābhāvakatoti katvā. Sobhanam mano, sundaram vā mano etassāti sumano, sumanassa bhāvo somanassam, mānasikasukhā vedanā ruḥhiyā, somanassena uppādato paṭṭhāya yāva bhaṅgā sahatam pavattam saṃsaṭṭham, sampayuttanti attho. **Somanassasahagatatā** cassa ārammaṇavasena veditabbā. Itthārammaṇe hi cittam somanassasahagatam hoti. Nanu ca itthārammaṇam lobhassa vatthu¹, katham tattha kusalam hotīti? Nayidamekantikam itthepi ābhogādivasena kusalassa uppajjanato. Yassa hi catusampatticakkasamāyogādivasena yonisova ābhogo hoti, kusalameva ca mayā kattabbanti kusalakarāṇe cittam niyamitam, akusalappavattito ca nivattetvā kusalakarāṇe eva pariṇāmitam, abhiṇhakarāṇavasena ca samudācaritam, tassa itthepi ārammaṇe alobhādisampayuttameva cittam hoti, na lobhādisampayuttam.

1. Lobhanīyavatthu (Syā)

Ñāṇena samaṃ pakārehi yuttanti **ñāṇasampayuttaṃ**. Ekuppādādayo eva cettha pakārāti veditabbā. Tattha kammūpapatti-indriyaparipākakilesadūrībhāvā ñāṇasampayuttatāya kāraṇaṃ. Yo hi paresaṃ dhammaṃ deseti, anavajjāni sippāyatanakammāyatanaviijaṭṭhānāni sikkhāpetīti evamādikāṃ paññāsaṃvattaniyaṃ karoti, tassa kammūpanissayavasena kusalacittaṃ uppajjamānaṃ ñāṇasampayuttaṃ hoti. Tathā abyāpajje loka uppanassa upapattiṃnissāya ñāṇasampayuttaṃ hoti. Vuttañhetarṃ “tassa tattha sukhino dhammapadā plavanti, dandho bhikkhave satuppādo, atha kho so satto khippaṃyeva visesabhāgī hotī”ti¹. Tathā paññādasakapattassa indriyaparipākāṃ nissāya kusalaṃ uppajjamānaṃ ñāṇasampayuttaṃ hoti. Yena pana kilesā vikkhambhitā, tassa kilesadūrībhāvaṃ nissāya ñāṇasampayuttaṃ hoti. Vuttampi cetarṃ “yogā ve jāyate bhūri, ayogā bhūrisaṅkhayo”ti². Attano vā parassa vā samussāhajanitaṃ cittapayogasāṅkhātāṃ saṅkharaṇaṃ saṅkhāro, so etassa natthīti **asaṅkhāraṃ**. Tena pana saha saṅkhārena pavattatīti **sasaṅkhāraṃ**. Ñāṇena vippayuttaṃ virahitanti **ñāṇavippayuttaṃ**. **Vippayogoti** cettha ñāṇassa abhāvo appavattiyevāti daṭṭhabbaṃ. Upekkhatīti upekkhā, vedayamānāpi ārammaṇaṃ ajjhupekkhati majjhataṭākārasaṅṭhitattāti attho. Atha vā upetā sukhadukkhānaṃ aviruddhā ikkhā anubhavananti upekkhā. Atha vā iṭṭhe ca aniṭṭhe ca ārammaṇe pakkhapātābhāvena upapattito yuttito ikkhati anubhavatīti upekkhā, tāya sahatanti **upekkhāsahagataṃ**. Sesaṃ sabbaṃ heṭṭhā vuttanayameva.

Evam aṭṭha kāmāvacarakusalacittāni uddisitvā idāni tesam pavatti-ākāraṃ dassetuṃ “**yadā hī**”ti-ādi āradham. Tattha **paṭiggāhakādisampattinti** ettha **ādi**-saddena desakālakalyāṇamittādisampattim saṅgaṇhāti. **Aññaṃ vā somanassahetunti** ettha aññaḡgahaṇena saddhābahulatā, visuddhadiṭṭhitā, kusalakiriyāya ānisaṃsadassāvitā, somanassapaṭisandhikatā, ekādasa pītisambojjhaṅgaṭṭhāniyā dhammāti evamādīnaṃ saṅgaho. **Ādinayappavattanti** ettha **ādi**-saddena na kevalaṃ “atthi yiṭṭhan”ti-ādīnaṃ³ navannaṃyeva sammādiṭṭhivatthūnaṃ gahaṇaṃ, atha kho

1. Am 1. 505 piṭṭhe.

2. Khu 1. 53 piṭṭhe Dhammapade.

3. Ma 1. 358; Ma 2. 64 piṭṭhādīsu.

dhammavicayasambojjhaṅgaṭṭhāniyādīnampi saṅgaho veditabbo.

Purakkhatvā¹ti pubbaṅgamaṃ katvā. Tañca kho sahaḷātapubbaṅgamavasena “manopubbaṅgamā dhammā”ti-ādīsu² viya sampayogassa adhippetatā.

Asaṃsīdantoti silokamacchariyādivasena puññakiriyāyaṃ saṃsīdaṃ saṅkocaṃ anāpajjanto, tena muttacāgatādīṃ dasseti. **Anussāhitoti** kenacipi na ussāhito. Sarasato hi puññapaṭipattidassanamidaṃ. **Parehīti** pana pākaṭussāhanadassanaṃ.

Dānādīnīti dānaṃ sīlaṃ yāva diṭṭhijukammanti imāni dānādīni dasa puññāni, **dānādīnīti** vā dānasīlabhāvanāmayāni itaresampi sattannaṃ etthevantogadhattā. Yattha sayāṃ uppajjanti, taṃ santānaṃ punanti, pujaṃ bhavaphalaṃ nibbattenti vā puññāni. **Assa** puññacetanāsamaṅgino. **Amuttacāgatā** deyyadhamme sāpekkhacittatā. **Ādi**-saddena sīlasamādānādīsu anadhimuttatādīṃ saṅgaṇhāti. **Tadevāti** somanassasahagatādīnā sadisatāya vuttaṃ. Sadisampi hi “tadevā”ti voharīyati yathā “sā eva tittirī, tāniyeva osadhānī”ti. **Imasmiñhi attheti** līnassa cītassa ussāhanapayogasaṅkhāte atthe. **Etanti** “saṅkhāro”ti etaṃ padaṃ. **Pubbapayogassāti** puññakiriyāyaṃ saṅkoce jāyamāne tato vivecivā samussāhanavasena pavattassa cītapayogassa, pubbaggaṇaṇācēttha tathāpavattapubbābhisaṅkhāravasena so saṅkhāro hotīti katvā vuttaṃ, na tassa saṅkhārasa pubbakālikattā. “Atthi dinnan”ti-ādi³ nayappavattāya sammādiṭṭhiyā asambhavadassanattamaṃ **bāla**-ggaṇaṇaṃ. Saṃsīdanussāhanābhāvadassanattamaṃ **sahassā**-ggaṇaṇaṃ. **Somanassarahitā** honti puññaṃ karontāti adhippāyo. **Somanassahetūnaṃ abhāvaṃ āgammāti** idaṃ nidassanamattaṃ daṭṭhabbaṃ. Majjhattārammaṇatathārūpacetosaṅkhārādayopi hi upekkhāsahagatatāya kāraṇaṃ hontiyevāti.

Evanti-ādi nigamaṇaṃ. Tayidaṃ aṭṭhavidhampi kāmāvacaraṃ kusalacītaṃ rūpārammaṇaṃ yāva dhammārammaṇanti chasu ārammaṇesu yaṃ vā taṃ vā ālambitvā upekkhāsahagatāhetukakiriyāmanoviññādhātānantaraṃ kāyadvārādīhi tīhi dvārehi kāyakammādivasena uppajjati veditabbaṃ.

1. Purakkhitvā (Syā), purekkhitvā (Ka)

2. Khu 1. 13 piṭṭhe Dhammapade.

3. Ma 1. 358; Ma 2. 64 piṭṭhādīsu.

Tattha nāṇasampayuttāni cattāri yadā tihetukapaṭisandhim uppādentī, tadā soḷasa vipākacittāni phalanti. Yadā pana duhetukaṃ, tadā dvādasa tihetukavajjāni. Ahetukaṃ pana paṭisandhim tihetukāni na uppādenteva, duhetukāni pana duhetukapaṭisandhidānakāle dvādasa, ahetukapaṭisandhim dānakāle aṭṭha phalanti. Tihetukā pana paṭisandhi duhetukehi na hotiyeva. **“Aṭṭha phalanti”**ti cetam paṭisandhim janakakammavasena vuttam. Aññena pana kammunā “sahetukaṃ bhavaṅgam ahetukassa bhavaṅgassa anantarapaccayena paccayo”¹ti vacanato sahetukampi vipākacittam ahetukapaṭisandhikassa hotiyeva. Imasmiṃ ca pakkhe balavatā paccayena uppannam asaṅkhāram, dubbalena, sasaṅkhāranti veditabbam. Ye pana āgamanato ca vipākassa asaṅkhārasasaṅkhārabhāvam icchanti, tesam matena dvādasa, aṭṭha ca phalantīti yojetabbam. Evam tidhā phalam dadantañcetaṃ kāmāvacarasugatiyam upapattim, sugatiduggatīsu bhogasampadañca karoti. Nāgasupaṇṇādīnampi hi yaṃ devabhogasampattisadisam bhogajātam uppajjati, tampi kāmāvacarakusalasseva phalam. Na hi akusalassa iṭṭham phalam atthīti.

Rūpāvacaram panāti pana-saddo visesatthajotako. Tena yathā kāmāvacaram kilesānam tadaṅgappahānamattakaram, na evamidam, idam pana vikkhambhanappahānakaram. Yathā vā tam vedanāññāsaṅkhārabhedato aṭṭhadhā bhijjati, na evamidam, idam pana tato aññathā vāti vakkhamānam visesam joteti. Tam panetaṃ savatthukam, sāsavam vinīvaraṇaṃca rūpāvacaranti daṭṭhabbam. **“Savatthukam evā”**ti hi iminā arūpāvacaram nivatteti, **“sāsavan”**ti iminā paṭhamamaggacittam, **“vinīvaraṇam”**ti iminā paṭighasahitadvayam. Katthaci pañca jhānaṅgāni, katthaci cattāri, katthaci tīṇi, katthaci dve, katthaci aparāni dveti evam jhānaṅgayogabhedato pañcavidhanti saṅkhepato vuttamattham vivariturū **“seyyathidan”**ti-ādi āraddham. Tattha yaṃ vattabbam, tam heṭṭhā **jhānakathāyam**² vuttameva. Tayidam bhāvanāmayameva hutvā vuttanayena pathavīkasiṇādikam ālambitvā yathāraham nāṇasampayuttakusalānantaram uppajjati, hinādibhedabhinnam panetaṃ yathākkamam brahmapārisajjādīsu soḷasasupi brahmalokesu upapattinipphādakanti daṭṭhabbam.

1. Abhi 10. 42 piṭṭhe Paṭṭhāne.

2. Visuddhi 1. 150 piṭṭhe.

Rūpasaññāsamatikkamādinā samadhigantabbaṃ **arūpāvacaraṃ**. **Catunnaṃ arūpānanti** upekkhāsamādhisaṅkhātehi catūhi arūpajjhāneti. Karaṇe hi etaṃ sāmivacanaṃ. Arūpānaṃ vā yo ārammaṇādikato sampayuttadhammehi yogo yogabhedo, tassavasena. **Vuttappakārenāti** heṭṭhā **ārūppakathāyaṃ**¹ vuttappakārena. **Paṭhamanti** paṭhamaṃ arūpāvacarakusalacittaṃ. **Dutiyatatiyacatutthānīti** etthāpi eseva nayo. Tānimāni bhāvanāmayāneva hutvā yathānupubbaṃ kaṣiṇuggahāṭimākāsaṃ, paṭhamārūppaviññānaṃ, natthibhāvaṃ, ākiñcaññāyatananti imāni ālambitvā upekkhāsahagataññāsaṃpayuttakusalānantaraṃ uppajjitvā catūsu arūpībrahmalokesu paṭisaṅghapavattivipākādāyīni. Sesaṃ panettha yaṃ vattabbaṃ, taṃ heṭṭhā vuttameva. Chavisuddhiparamparāya samadhigantabbaṃ **lokuttaraṃ**. Tattha vattabbaṃ parato āgamissati. **Catumaggasampayogatoti** sotāpattimaggo yāva arahattamaggoti imehi catūhi ariyamaggehi sampayogato. Catubbidhampi cetāṃ bhāvanāmayameva hutvā nibbānaṃ ālambitvā suññato vimokkho, animitto vimokkho, appaṇihito vimokkhoti nāmena uppajjati, sattabhavādibhavūpapattinivattakanti daṭṭhabbaṃ. **Ekavīsatividhaṃ hoti** nāṭisaṅkhepavittāraṇāyenaṭi adhippāyo.

453. **Kāmāvacaramevāti** ettha nikāyantariyā rūpārūpāvacarampi akusalaṃ icchantīti tesaṃ matinisedhanatthaṃ kāmāvacaraggahaṇaṃ. Mahaggatabhūmiyaṃ uppajjantampi tattha rūpadhātuyaṃ pavattivipākaṃ dentampi ekantena kāmāvacaramevāti dassanatthaṃ avadhāraṇaṃ. Yadi evaṃ kasmā kāmāvacaramevāti? Tattha kāraṇaṃ vuttameva. Kathaṃ vuttaṃ? “Kāmataṇhā kāmo uttarapadalopato, avacarati etthāti avacaraṃ, kāmassa avacaraṃ kāmāvacaraṃ”ti. Ettha hi kāmataṇhāvisayatā “kāmāvacarabhāvassa kāraṇaṃ” vuttā yathā rūpārūpataṇhāvisayatā “rūpārūpāvacarabhāvassa”. Ekamsena cetāṃ evaṃ icchitabbaṃ. Aññathā byāpīlakkaṇaṃ na siyā. Yadi hi ālambitabbadhammasena bhūmivavattānaṃ kareyya, evaṃ sati anārammaṇānaṃ saṅgaho na siyā. Atha vipākādānavasena, evampi avipākānaṃ saṅgaho na siyā. Tasmā ālambaṇadhammasena pariyāpannānaṃ sā kātabbā, apariyāpannānaṃ pana lokato uttiṇṇatāya lokuttaratā, uttaritarābhāvato anuttaratā ca veditabbā.

1. Visuddhi 1. 320 piṭṭhe.

Pariyāpannāti ca paricchedakārikāya taṇhāya paricchijja āpannā, gahitāti attho. Nanu cettha kāmataṇhā katamā? Kāmāvacaradhammārammaṇā taṇhā, kāmāvacaradhammā katame? Kāmataṇhāvisayāti itaretarasannissayatādosoti? Nayidamevaṃ avīci-ādi-ekādasokāsaninnatāya kañci taṇham kāmataṇhābhāvena gahetvā taṃsabhāvāya taṇhāya visayabhāvena kāmāvacaradhammānam upalakkhitabbattā. **NikkhevaKaṇḍepi**¹ “etthāvacarā”ti vacanam avīciparanimmitaparicchinnokāsāya kāmataṇhāya visayabhāvaṃ sandhāya vuttanti gahetabbam. Tadokāsātā ca taṇhāya tanninnatāya veditabbā.

Mūlato tividhanti tīṇi akusalamūlāni lobhādīni, tesaṃ vasena taṃsahitampi tividhanti attho. Tāni hi suppatiṭṭhitabhāvakāraṇattā mūlamivāti mūlāni, lobho mūlam etassāti **lobhamūlam**. Asādhāraṇena niddeso yathā bherisaddo, yavaṅkuroti. Tathā **dosamūlam**. Moho eva mūlam imassa, nāññanti **mohamūlam**.

Somanassupekkhādīṭṭhigatasāṅkhārabhedatoti somanassupekkhābhedato diṭṭhigatabhedato saṅkhārabhedatoti paccekam bhedasaddo yojetabbo. Yadettha vattabbam, taṃ heṭṭhā vuttanayameva. **Diṭṭhigatasampayuttanti** diṭṭhiyeva diṭṭhigataṃ “gūthagataṃ, muttagatan”ti² yathā. Atha vā vipariyesaggāhatāya diṭṭhiyā gatameva, na ettha gantabbavatthu tathā sabhāvanti diṭṭhigataṃ. Tayidaṃ “idameva saccam, moghamaññan”ti³ abhinivesabhāvato lobheneva saddhim pavattati, na dosena.

Yadāhīti-ādi lobhamūlacittānam pavatti-ākāradassanam. **Micchādīṭṭhinti** ucchedadiṭṭhi-ādemicchādīṭṭhim. Tāya hi vipallatthacittā sattā “etāvako jīvavisayo yāva indriyagocarō”ti paralokaṃ paṭikkhipitvā “natthi kāmesu ādīnavo”ti yathā tathā kāmesu pātabyataṃ āpajjanti. **Ādi**-saddena “esa pantho pageva vihito devayāne, yena yanti puttavanto visokā. Taṃ passantī pasavo, pakkhino ca, tena te mātariṇi mithunaṃ carantī”ti-ādīnā nayena puttamukhadassanam saggamokkhamaggoti evamādikaṃ micchādīṭṭhim saṅgaṇhāti.

1. Abhi 1. 205 piṭṭhe.

2. Ma 2. 87; Am 3. 181 piṭṭhesu.

3. Ma 2. 150, 166, 381; Ma 3. 22, 23 piṭṭhādīsu.

Kāme vāti ettha **vā**-saddo aniyamattho, tena brāhmaṇānaṃ suvaṇṇaharaṇameva adinnādāne sāvajjaṃ, itaraṃ anavajjaṃ. Garūnaṃ, gunnaṃ, attano, jīvitassa, vivāhassa ca atthāya musāvādo anavajjo, itaro sāvajjo. Garu-ādīnaṃ atthāya pesuññaharaṇaṃ anavajjaṃ, itaraṃ sāvajjaṃ. Bhāratayuddhasītāharaṇādīkathā pāpavūpasamāya hotīti evamādike micchāgāhe saṅgaṇhāti. **Diṭṭhamaṅgalādīnī**ti diṭṭhasutamutamaṅgalāni. **Sabhāvatikkhenā**ti lobhassa, micchābhīnivesassa vā vasena saraseneva tikhiṇena kurūrena. **Mandenā**ti dandhena atikhiṇena. Tādisaṃ pana attano, parassa vā samussāhanena pavattatīti āha “**samussāhitenā**”ti. **Parabhaṇḍaṃ vā haratīti vā**-saddena tathāpavattanakamusāvādādīnampi saṅgaho daṭṭhabbo. **Kāmānaṃ vā** anubhuyyamaṇānaṃ. **Vā**-saddena parasantakassa vā¹ ayathādhīppetatāya yaṃ laddhaṃ, taṃ gahetabbanti gahaṇādīkaṃ saṅgaṇhāti.

Duvidhameva hoti sampayuttadhammasena bhedābhāvato. Yadi evaṃ kasmā “domanassasahagataṃ paṭighasampayuttan”ti vuttanti? Asādhāraṇadhammehi tassa cittassa upalakkhaṇattham. **Pāṇātipātādīsūti** pāṇātipātānādīsū. **Ādi**-saddena adinnādānamusāvādapesuññapharusasamphappalāpabyāpāde saṅgaṇhāti. Sabhāvatikkhaṃ hutvā pavattamānaṃ cittaṃ asaṅkhārameva hoti, itaraṃ sasaṅkhāranti adhippāyenāha “**tikkhamandappavattikāle**”ti. Mandanaṃ pana hutvā pavattamānaṃ ekaṃsena sasaṅkhāramevāti na sakkā viññātuṃ. Yaṃ sasaṅkhārena sappayogena pavattati, taṃ mandameva hotīti katvā tathāvuttanti daṭṭhabbaṃ.

Mohekahetukaṃ cittaṃ mūlantaravirahato atimūḷhaṃ, vicikicchuddhaccayogato cañcalañcāti **upekkhāsahagata**meva hoti, na tassa kadācīpi sabhāvatikkhatā atthi. Ārammaṇe hi saṃsappanavasena, vikkhipanavasena ca pavattamānassa cittadvayassa kīdise kicce sabhāvatikkhatāya, ussāhetabbatāya vā bhavitabbaṃ, tasmā na tattha saṅkhārabhedo atthi. Aññesu akusalacittesu labbhamānampi uddhaccaṃ visesato ettheva balavaṃ, tato eva sampayuttadhammesu padhānaṃ hutvā pavattatīti idameva uddhaccena visesetvā vuttaṃ “**uddhaccasampayuttan**”ti. Tathā hi **pāliyaṃ**² idha

1. Parasantakassa (Ka)

2. Abhi 1. 103 piṭṭhe.

sarūpato uddhaccaṃ āgataṃ, evaṃ asādhāraṇapadhānadhamavasena mohamūlaṃ “vicikicchāsampayuttaṃ, uddhaccasampayuttaṃ”ti duvidhaṃ vuttanti daṭṭhabbaṃ. **Asanniṭṭhānaṃ** saṃsayo. **Vikkhepo** avūpasamo, bhantatāti attho.

Tayidaṃ dvādasavidhampi akusalacittaṃ chasu ārammaṇesu yaṃ vā taṃ vā ālambitvā upekkhāsahagatāhetukakiriyāmanoviññādhātānantaram kāyadvārādīhi tīhi dvārehi kāyakammādivasena yathārahaṃ pāṇātipātādikammaṇasena ceva kammavasena ca uppajjati veditabbaṃ.

Tattha ṭhapetvā uddhaccasahagataṃ sesaṃ ekādasavidhampi catūsupi apāyesu paṭisandhiṃ deti, pavattivipākaṃ sugatiyampi. Uddhaccasahagataṃ pana pavattivipākamevāti. Etthāha—kiṃ pana kāraṇaṃ sabbadubbaṃ vicikicchāsampayuttaṃ paṭisandhiṃ deti, adhimokkhasabbhāvato tato balavantampi uddhaccasahagataṃ na deti? Dassanena pahātabbesu avuttattā. Idaṃ hi paṭisandhiṃ dettaṃ apāyesu dadeyya, apāyagamānīyaṅca dassanapahātabbanti tattha vucceyya, na ca vuttaṃ. Tasmā paṭisandhiṃ na deti, pavattivipākadānaṃ paṇassa na sakkā paṭikkhipituṃ.

Paṭisambhidāvibhaṅge “uddhaccasahagataṃ nāṇaṃ dhammapaṭisambhidā. Tassa vipāke nāṇaṃ atthapaṭisambhidā”ti¹ vacanato.

Apāre panāhu—pūthujjanassa uppajjamānaṃ uddhaccasahagataṃ dassanappahātabbasahāyasabbhāvato ubhayavipākampi deti, na sekkhassa tadabhāvato. Idamettha vicāretabbaṃ, yassa vipākadānaṃ vuttaṃ, kiṃ taṃ bhāvanāya pahātabbaṃ, udāhu notī? Kiñcetta—yadi tāva bhāvanāya pahātabbaṃ, paṭṭhāne bhāvanāya pahātabbassa nānākkhaṇikakammaṇasabhāvo vattabbo siyā. Atha na bhāvanāya pahātabbaṃ, dassanapahātabbattike “nevadassanenabhāvanāyapahātabbam”iccassa vibhaṅge vattabbaṃ siyā. Yadi tabbiruddhasabhāvatāya tattha na vucceyya, evampi tasmim tike tassa navattabbatā āpajjati? Nāpajjati, kiṃ kāraṇaṃ? **Cittuppādakaṇḍe**² āgatānaṃ dvādasannaṃ akusalacittuppādānaṃ dvīhi padehi saṅghatattā vibhajitvā dassetabbassa niyogato kassaci cittuppādassa abhāvā, yathā uppannattike atītādīnaṃ navattabbatā na vuttā, evametassāpi. Atha vā bhāvanāya pahātuṃ asakkuṇeyyassāpi tassa pūthujjane

1. Abhi 2. 311 piṭṭhe. (Atthato samānaṃ)

2. Abhi 1. 90 piṭṭhe.

vattamānassa bhāvanāya pahātabbasabhāvasāmaññato, sāvajjato ca bhāvanāya pahātabbapariyāyo vijjatīti natthi navattabbatāpasaṅgado. Nippariyāyena ca na bhāvanāya pahātabbanti tassa vasena nānākkhaṇikakammapaccayabhāvopi na vutto. Dassanapahātabbapaccayassāpi uddhaccasahagatassa sahāyavekallamattameva dassanena kataṃ, na kocipi bhāvo anuppādammetaṃ tassa āpāditoti ekantena bhāvanāya pahātabbatā vuttā. Atha vā apāyagamanīyabhāvāpekkhaṃ dassanappahātabbavacananti tadabhāvato taṃ vibhajanam vuttanti.

454. “Viññāṇan”ti padaṃ apekkhitvā “**abyākataṃ vipākan**”ti-ādiko napuṃsakaniddeso, tato eva adhikatābyākatapekkhāya **duvidhanti** vuttaṃ. Aññathā rūpanibbānānampi abyākatabhāvato taṃ catubbidhanti vattabbaṃ siyā. Vipākassa kāmāvacarādibhāvo kusale vuttanayeneva veditabbo. Ahetukatā sahetukatā viya sampayuttahetivasena, na nibbattakahetivasena. Vipākassa hi sahetukatā sahetukakammavasena sijjhamānāpi sampayuttahetivaseneva vuccati, aññathā ahetukānampi sahetukatā āpajjeyyāti. Kasmā pana sahetukassa ahetuko vipāko hotīti? Tattha kāraṇam vuttameva. Kiñca ārammaṇābhiniṇipātamattesu pañcasu viññāṇesu yathā alobhādisampayogo na sambhavati, evaṃ mandataramandakicesu sampañcchanasantīraṇesūti hetūnam uppattiyā asambhavatopi nesam ahetukatā daṭṭhabbā.

Manoviññāṇato uppajjanavisitṭhamananakiccānam abhāvato manomattā dhātu **manodhātu**.

Cakkhusannissitam hutvā rūpassa vijānanam lakkhaṇam etassāti **cakkhusannissitarūpavijānanalakkhaṇam**. Tattha cakkhusannissitavacanena rūpārammaṇam aññam viññāṇam nivatteti. Vijānanaggahaṇena cakkhusannissite phassādike nivatteti. Cakkhurūpaggaṇena nissayato, ārammaṇato ca viññāṇam vibhāveti ubhayādhīnavuttikattā. Yadi hi cakkhu nāma na siyā, andhāpi rūpam passeyyum, na ca passanti. Yadi ca nīlādirūpam nāma na siyā, desādīnyamena na bhavitabbaṃ, attheva ca niyamo, ekantasārammaṇatā ca cittassa vuttāti “ārammaṇena vinā nīlādi-ābhāsam cittam pavattati”ti

evaṃ pavatto vādo micchāvādoti veditabbaṃ. Tenāha bhagavā “cakkhuñca paṭicca rūpe ca uppajjati cakkhuvīññāṇaṃ”ti-ādi¹.

Kasmā panettha vacanabhedo katoti? Ekampi cakkhu viññāṇassa paccayo hoti, rūpaṃ pana anekameva saṃhatanti imassa visesassa dassanattamaṃ. Kiṃ pana kāraṇaṃ ekampi cakkhu viññāṇassa paccayo hoti, rūpaṃ pana anekamevāti? Paccayabhāvavisesato. Cakkhu hi cakkhuvīññāṇassa nissayapurejāta-indriyavippayuttapaccayehi paccayo hontaṃ atthibhāveneva hoti, tasmīṃ sati tassa bhāvato, asati abhāvato. Yato taṃ atthi-avigatapaccayehissa, paccayo hotīti vuccati, taṃnissayatā cassa na ekadesena allīyanavasena icchitabbā arūpabhāvato, atha kho garurājādīsu sissarājapurisādīnaṃ viya tappaṭibaddhavuttitāya. Itare pana paccayā tena tena visesena veditabbā. Svāyaṃ paccayabhāvo na ekasmiṃ na sambhavatīti ekampi cakkhu viññāṇassa paccayo hotīti “cakkhuñca paṭicca”ti ekavacanena niddeso kato.

Rūpaṃ pana yadipi cakkhu viya purejāta-atthi-avigatapaccayehi paccayo hoti puretaraṃ hutvā vijjamānakkhaṇeyeva upakārakattā, tathāpi anekameva saṃhataṃ hutvā paccayo hoti ārammaṇabhāvato. Yañhi paccayadhammaṃ sabhāvabhūtaṃ, parikappitākāramattaṃ vā viññāṇaṃ vibhāventaṃ pavattati, tadaññesañca satipi paccayabhāve so tassa sārammaṇasabhāvātāya yaṃ kiñci anālambitvā pavattitum asamatthassa olubbha pavattikāraṇātāya ālambanīyato ārammaṇaṃ nāma. Tassa yasmā yathā tathā sabhāvūpaladdhivasena² ārammaṇapaccayalābho, tasmā cakkhuvīññāṇaṃ rūpaṃ ārabha pavattamānaṃ tassa sabhāvaṃ vibhāventameva pavattati. Sā cassa indriyādhīnavuttikassa ārammaṇasabhāvūpaladdhi, na ekadvikalāpagatavaṇṇavasena hoti, nāpi katipayakalāpagatavaṇṇavasena, atha kho ābhogānurūpaṃ āpāthagatavaṇṇavasenāti anekameva rūpaṃ saṃhaccakāritāya viññāṇassa paccayo hotīti dassento bhagavā “rūpe cā”ti bahuvacanena niddisi.

1. Ma 1. 158, 326; Ma 3. 328, 332, 333; Saṃ 1. 301; Saṃ 2. 261; Abhi 4. 248 piṭṭhādīsu.

2. Sabhāvūpaladdhivīññāṇassa (Ka)

Yaṃ pana “rūpāyatanam cakkhuvīññādhātuyā taṃsampayuttakānañca dhammānam ārammaṇapaccayena paccayo”¹ vuttam, tam kathanti? Tampi yādisam rūpāyatanam cakkhuvīññāṇassa ārammaṇapaccayena paccayo hoti, tādisameva sandhāya vuttam. Kīdisam pana tanti? Samuditanti pākaṭoyamattho. Evañca katvā yadeke vadanti “āyatanasallakkhaṇavasena cakkhuvīññāḍayo sallakkhaṇārammaṇā, na dabbasallakkhaṇavasenā”²ti, tampi yuttameva hothi. Na cettha samudāyārammaṇatā āsankitabbā samudāyābhogassevābhāvato. Samuditā pana vaṇṇadhammā ārammaṇapaccayā honti. Katham pana paccekam asamatthā samuditā ārammaṇā paccayā honti, na hi paccekam daṭṭhum asakkontā andhā samuditā passantīti? Nayidamekantikam visum visum asamatthānam sivikāvahanādīsu samatthatāya dassanato. Kesādīnañca yasmiṃ ṭhāne ṭhitānam paccekam vaṇṇam gahetum na sakkā, tasmīnyeva ṭhāne samuditānam vaṇṇam gahetum sakkāti bhiyyopi tesam saṃhaccakāritā paribhyattā. Etena cakkhuvīññāṇassa paramāṇurūpam ārammaṇam, udāhu taṃsamudāyoti-ādīkā codanā paṭikkhittāti veditabbā. “Sotañca paṭicca saddecā”²ti-ādīsipi² eseva nayo. Evaṃ ubhayādhīnavuttikatāya cakkhuvīññāṇassa nissayato, ārammaṇato ca vibhāvanam katam, evam sotaviññāḍīsipi yathāraham vattabbam.

Rūpamattārammaṇarasanti rūpāyatanamattasseva ārammaṇakaraṇarasam. Matta-saddena yathā ārammaṇantaramnivatteti, evam rūpāyatanepi labbhamāne ekacce visese nivatteti. Na hi cakkhuvīññāṇam vaṇṇamattato aññam kiñci visesam tattha gahetum sakkoti. Tenāha bhagavā “pañcahi viññāṇehi na kiñci dhammam paṭivijānāti aññatra abhinipātamattā”²ti. Cakkhuvīññāṇam uppajjamānam rūpārammaṇe eva uppajjanato tadabhimukhabhāvena gayhatīti vuttam **“rūpābhimukhabhāvapaccupaṭṭhānan”**ti. Attano anantaram uppajjamānānam arūpadhammānam samanantaravigatā arūpadhammā pavatti-okāsadānena anantasamanantaranaṭṭhavigatapaccayehi upakārakā nissayārammaṇadhammā viya āsannakāraṇanti dassento āha **“rūpārammaṇāya kiriyamanodhātuyā apagamapadaṭṭhānan”**ti. **Sotaviññāḍīsipi** vuttanayeneva attho veditabbo.

1. Abhi 8. 1 piṭṭhe Paṭṭhāne.

2. Ma 1. 158, 326; Ma 3. 328, 333, 334 piṭṭhedīsu.

Cakkhuviññāṇādigahitaṃ rūpādi-ārammaṇaṃ tadanantameva aparipatantaṃ katvā sampañicchantī gaṇhantī viya hotīti vuttaṃ “**rūpādisampañicchanarasā**”ti. Tathābhāvena sampañicchanabhāvena paccupatiṭṭhatīti **tathābhāvapaccupatiṭṭhānā**.

Chasu ārammaṇesu kadāci pañcannaṃ, tato vā katipayānaṃ vijānanasabhāvāpi **chalārammaṇavijānanalakkhaṇā** vuttā taṃsabhāvānavattanato. Chasveva vā itaresaṃ ārammaṇānaṃ antogadhattā. **Santīraṇādikiccā**ti santīraṇatadārammaṇakiccā vā, santīraṇatadārammaṇapaṭisandhibhavaṅgacutikiccā vāti adhippāyo. “**Hadayavattupadaṭṭhānā**”ti idaṃ imāsaṃ dvinnāṃ manoviññāṇadhātūnaṃ ekanteneva hadayavatthusannissayatāya vuttaṃ. Heṭṭhā vuttanayena pana taṃtāmanantarāṭisaviññāṇāpagamapadaṭṭhānātipi vattum vaṭṭatiyeva. **Tassā bhedoti** tassā vipākamanoviññāṇadhātuyā “duvidhā”ti vuttāya duvidhatāsaṅkhāto bhedo. **Ekantamiṭṭhārammaṇeti** ekanteneva iṭṭhe ārammaṇe, ativiya iṭṭhārammaṇeti attho. **Pañcadvāre ceva javanāvasāne cāti** ettha pañcadvāre sampañicchanavoṭṭhabbanānaṃ antarālaṃ ṭhānaṃ, itaratra javanabhavaṅgānanti evaṃ **dvīṭhānā hoti**. Itarāyapi santīraṇatadārammaṇakāle yathāvuttameva ṭhānaṃ, paṭisandhi-ādikāle pana cutibhavaṅgānaṃ antarālaṃ paṭisandhiyā, paṭisandhi-āvajjanānaṃ tadārammaṇāvajjanānaṃ javanāvajjanānaṃ voṭṭhabbanāvajjanānaṃca antarālaṃ bhavaṅgassa, tadārammaṇapaṭisandhīnaṃ javanapaṭisandhīnaṃ vā antarālaṃ cutiyā ṭhānanti veditabbaṃ.

Chasūti ettha pubbe vuttanayeneva vibhāgo veditabbo. Kāyassa nissayabhūtānaṃ nāti-iṭṭhaphoṭṭhabbabhūtānaṃ paṭighaṭṭanāniḅhaṃsassa balavabhāvato **kāyaviññāṇaṃ sukhasampayuttaṃ**. Upādārūpanāmyeva ghaṭṭanā dubbalāti cakkhuviññāṇādiṇi upekkhāsahagatāni. Tenāha “**sesāmupekkhāyuttaṃ**”ti. **Sesāṃ** chabbidhampi.

Alobhādosāmohā ceva alobhādosā ca alobhādayo, tehi alobhādihi vipākahetūhi sampayuttaṃ **alobhādivipākahetusampayuttaṃ**. **Kāmāvacarakusalaṃ viya somanassādibhedatoti** yathā kāmāvacaraṃ kusalaṃ somanassupekkhāṇāṇasaṅkhārābhedaṭṭhavidhaṃ, evamidampīti aṭṭhavidhatāya sadisaṭṭaṃ dasseti. Kāmāvacarabhāvato hīnādito, yonīsu uppattito ca sadisameva, sampayuttadhammato pana ārammaṇato, pavatti-ākārato ca visadisaṃ.

Tathā hi kusalaṃ kammaadvārasena pavattati, na idaṃ, vipākānaṃ aviññattijanakattā. Uppattidvārasena pana imassāpi attheva pavattibhedo pañcadvāramanodvāresu mahāvīpākānaṃ tadārammaṇavasena pavattisambhavato. Yathā pana kusalaṃ gativasena pañcavidham, viññāṇaṭṭhitivasena sattavidhañca, na evamidaṃ tadekadese eva uppajjanato. Tattha ārammaṇato, ekaccapavatti-ākārato ca visadisataṃ dassetuṃ “**yathā panā**”ti-ādi vuttaṃ. **Chasu ārammaṇesūti** parittādi-atitādi-ajjhattādippabhedesu chasu ārammaṇesu.

Āgamanādivasenāti āgamanapaccayavasena. Tattha ekaccānaṃ ācariyānaṃ matena mukhe calite ādāsatale mukhanimittam calanaṃ viya asaṅkhārassa kusalassa vipāko asaṅkhāro, sasaṅkhārassa kusalassa vipāko sasaṅkhāroti evaṃ āgamanavasena. Ekaccānaṃ pana ācariyānaṃ matena balavantehi vibhūtehi paccayehi kammādīhi uppanno asaṅkhāro, dubbalehi sasaṅkhāroti evaṃ paccayavasena. **Sampayuttadhammānanti** pāḷiyam sarūpato āgatasampayuttadhammānaṃ. Tesam hi vasena kusalato vipākassa visesābhāvo. **Nirussāhanti** ettha ussāho nāma anupacchinnāvijjātaṇhāmānasantāne vipākuppādanasamatthatāsaṅkhāto byāpāro, so vipākesu natthīti taṃ nirussāham. Kusalesu pana abhiññāvasapavattesupi atthevāti taṃ **sa-ussāham**.

Lobhādīnaṃ ekantasāvajjatāya ayonisomanasikārahetukānaṃ natthi vipākabhāvo, alobhādīnampi ekanta-anavajjasabhāvānaṃ kāraṇassa tabbidhuratāya nattheva akusalavipākabhāvoti āha “**akusalavipākam ahetukamevā**”ti. Yathā ati-iṭṭhe, iṭṭhamajjhatte ca ārammaṇe vedanābhedasabbhāvato kusalavipākamanoviññāṇadhātu duvidhā hoti somanassasahagatā, upekkhāsahagatāti, na evaṃ ati-aniṭṭhe, aniṭṭhamajjhatte ca ārammaṇe vedanābhedo atthīti akusalavipākamanoviññāṇadhātu ekamevāti “**sattavidhan**”ti vuttaṃ. Sati hi tattha vedanābhede ati-aniṭṭhe domanassena bhavitabbaṃ, na ca paṭighena vinā domanassaṃ uppajjatīti.

Kāyaviññāṇassa dukkhasahagatatā kusalavipāke vuttavipariyāyena veditabbā. **Upekkhā hīnāti** ekantanihīnassa akusalassa vipākabhāvato upekkhāpi samānā hīnā eva dukkhasabhāvattā. Tenāha “**dukkham**

viya nātitikhiṇā”ti. Yathā dukkhaṃ ativiya tikhiṇaṃ kaṭukaṃ, na evamayaṃ tathāpi dukkhasabhāveneva pavattiti. Na hi akusalassa vipāko adukkho hoti. Upekkhābhāvo cassa balavatā bādhiyamānassa paṭippaharituṃ asakkontassa dubbalassa purisassa tena kariyamānabādihāya upekkhanā viyāti daṭṭhabbo. **Itaresūti** kusalavipākesu.

Rūpāvacaranti rūpāvacaravipākaviññāṇaṃ. Vipākakathā hesāti. **Kusalam viyāti** rūpāvacarakusalam viya. Na hi rūpāvacaravipāko tadaññakusalasadiso. Apica sambandhisaddā ete, yadidaṃ “kusalam, vipāko”ti ca. Tasmā yathā “mātarāṃ payirupāsati”ti vutte attano mātaranti avuttampi siddhamevetam, evaṃ idhāpīti attano kusalam viyāti attho. Kusalasadisatā cettha dhammato, ārammaṇato ca veditabbā. Tathā hi ye phassādayo kusale labbhanti, te vipākepi labbhanti. Yasmim ca ārammaṇe kusalam pavattati, tattheva ayaṃ vipākopi pavattati. Yaṃ panettha pañcamajjhānacittam abhiññāpattam, tassa vipāko eva natthi. Kasmā natthi? Asambhavato, ānisaṃsabhūtattā ca. Tañhi vipākaṃ dentaṃ rūpāvacarameva dadeyya. Na hi aññabhūmikaṃ kammaṃ aññabhūmikaṃ vipākaṃ deti. Kammanimittārammaṇatā ca rūpāvacaravipākassa vuttāti na taṃ aññaṃ ārabha pavattati. Parittārammaṇādi-ārammaṇaṅca taṃ na hotīti ayamasambhavo. Jhānassa ānisaṃsabhūtaṅca dānādīnaṃ tasmim attabhāve paccayalābho viyāti.

Pavattito pana vipākassa, kusalassa ca attheva bhedoti taṃ dassetuṃ “**kusalam panā**”ti-ādi vuttam. Kusalam viya kasiṇugghāṭimākāsādi-ārammaṇabhedato catubbidham. Pavattibhedo vuttanayova javanavasena paṭisandhi-ādivasena ca pavattanato.

Catumaggayuttacittaphalattāti catūhi ariyamaggehi sampayuttakusalacittassa phalattā, catubbidhasāmaññaphalasampayuttabhāvatoti attho. Maggavīthiyam dvikkhattuṃ, tikkhattuṃ vā phalasaṃpattiyam aparicchinna-parimāṇam pavattamānampi dvīsu ṭhānesu pavattiyā “**dvidhā pavattati**”ti vuttam. **Sabbampīti** tevīsatividham kāmāvacaravipākaṃ pañcavidham rūpāvacaravipākaṃ, catubbidham arūpāvacaravipākaṃ, catubbidhameva lokuttaravipākanti sabbampi vipākaviññāṇam nāṭisaṅkhepavittāranayena chattimsavidham hoti.

Bhūmibhedato tividham lokuttarassa abhāvato. Lokuttarañhi kiriyacittam natthi ekantena anantaravipākadāyibhāvato. Vuttañhi “samādhimānantarikaññamāhū”ti¹. Hotu tāva sekkhānam uppajjamānam anuttaram kusalam puggalantarabhāvūpanayanato saphalam, arahato pana uppajjamānam puggalantarabhāvūpanayanato nipphalam, tassa kiriyabhāvo kasmā na icchitoti? Icchitabbo siyā. Yadi tassa punappunam uppatti siyā, sakimyeva pana lokuttarakusalam pavattati. Yadi hi punappunam pavatteyya, maggacittam arahatopi pavattatīti lokuttarakiriyacittam siyā, na cetam atthi payoanābhāvato. Tasmā natthi lokuttarakiriyaviññānam.

Kiriyaviññānanti ca kiriyāmatam viññānam, kusalākusalam viya kiñci vipākam anuppādetvā kiriyāmatameva hutvā pavattanakaviññānanti attho. Kasmā panetam vipākam na uppādetīti? Vuccate—ettha hi yadetam āvajjanadvayam, tam anupacchinnabhavamūlepi santāne pavattam anāsevanatāya dubbalabhāvato abījasāmatthiyam viya pupham aphalameva hoti. Yam pana ucchinnabhavamūlāyam santatiyam pavattam aṭṭhārasavidham viññānam, tam samucchinnamūlāyalatāya pupham viya phaladāyi na hotīti veditabham. Aññassa asambhavato kiriyahetunā nāma alobhādīnāva bhavitabbanti āha “**alobhādīkiriyahetuvirahitan**”ti.

Cakkhuvīññānādīnam purecarā hutvā rūpādi-ārammaṇānam vijānanalakkhaṇā **cakkhuvīññānādīpurecararūpādivijānanalakkhaṇā**. Ayam pana manovīññānato uppannāpi viṣiṭṭhamananakiccābhāvena manomattā dhātūti **manodhātu**. Tathā hesā manovīññānassa paccayo na hoti. Ayamettha saṅkhepo, vitthāro pana **dhātuniddese**² āgamissati. **Āvajjanarasāti** ābhogarasā, cittasantānassa vā purimākārato aññathā-ṇojanarasā. **Bhavaṅgavicchedapadaṭṭhānāti** bhavaṅgasantānavicchedapadaṭṭhānā. Apubbārammaṇā sakideva pavattamānā sabbathā visayarasaṃ anubhavitum na sakkotīti iṭṭhādīsu sabbattha **upekkhāyuttāva hoti**.

Sādhāraṇāti sekkhāsekkhaputhujjanānam sādhāraṇā. **Asādhāraṇāti** asekkhānamyeva āveṇikā. **Voṭṭhabbanāvajjanarasāti** pañcadvāresantīraṇena gahitārammaṇam vavattthapentī viya pavattanato voṭṭhabbanarasā,

1. Khu 1. 5, 312 piṭṭhesu.

2. Visuddhi 2. 115 piṭṭhe.

manodvāre pana vuttanayena āvajjanarasā. Tathābhāvena pañcadvāramanodvāresu yathākkamaṃ voṭṭhabbanāvajjanabhāvena paccupatiṭṭhatīti **tathābhāvapaccupaṭṭhānā**. Voṭṭhabbanakāle santīraṇakiccānaṃ tissannaṃ ahetakavipākamanoviññādhātūnaṃ āvajjanakāle yassa kassaci bhavaṅgassāti imesaṃ aññatarāpagamo etissā āsannakāraṇanti āha “**ahetuka -pa- padaṭṭhānā**”ti.

Arahatanti arahataṃyeva asādharaṇabhāvato. **Anuḷāresūti** aṭṭhikasaṅkhalikapetarūpādīsu, aññesu vā appaṇītesu vatthūsu. **Hasituppādanarasāti** hasitasseva uppādanarasā. Tathā hi taṃ cittaṃ “hasituppādanan”tveva vuccati, na aññesaṃ hasituppādakacittānaṃ abhāvato. Aññānīpi hi dvādasa somanassasahagatāni parittakusalākusalakiriyacittāni yathārahaṃ puthujjanādīnaṃ hasituppādakāni vijjanti, idaṃ pana cittaṃ vicāraṇapaññāviraḥitaṃ parittesu appaṇītesu ārammaṇesu arahantānaṃ somanassamattaṃ uppādentam uppajjati. Bhagavatopi uppajjatīti¹ aṭṭhakathāyaṃ vuttaṃ, taṃ atītaṃsādisu appaṭihatañānaṃ vatvā “imehi tīhi dhammehi samannāgatassa buddhassa bhagavato sabbaṃ kāyakammaṃ ñāṇapubbaṅgamaṃ ñāṇanuparivattī”ti² vacanato vicāretabbanti eke. Tattha hasituppādacittena pavattiyamānampi bhagavato sitakaraṇaṃ pubbenivāsānāgatamaṃsasabbaññūtaññāṇānaṃ anuvattakattā ñāṇanuparivattiyevāti evaṃ pana ñāṇanuparivattibhāve sati na koci pāli-aṭṭhakathānaṃ virodho. Evañca katvā aṭṭhakathāyaṃ “tesaṃ ñāṇānaṃ ciṅṅapariyante idaṃ cittaṃ uppajjati”ti vuttaṃ. Avassañca etaṃ evaṃ icchitabbaṃ, aññathā aññassāpi viññattisamuṭṭhāpakassa ahetakacittassa bhagavato uppatti na yujjeyya. Na hi viññattisamuṭṭhāpakassa taṃsamuṭṭhitāya viññattiyā kāyakammādibhāvaṃ āpajjanabhāvo vibandhatīti. **Ekantato hadayavattupadaṭṭhānā** pañcavokārabhave eva uppajjanato.

Ayamettha visesoti ayaṃ sekkhaputhujjanānaṃ uppattiyā vipākuppādanasamatthātā, arahataṃ uppattiyā tadabhāvoti ubhayesaṃ santāne uppattisamupalakkhito ettha kusalakiriyaviññāṇesu viseso. Evañca katvā paccayavekallena avipākassāpi kusalākusalassa

1. Abhi-Ṭṭha 1. 333, 449 piṭṭhesu. 2. Khu 7. 139; Khu 8. 175; Khu 9. 376 piṭṭhesu.

kiriyabhāvappasaṅgo nivattito hoti. Parato **kusalato visesoti** etthāpi eseva nayo.

455. **Sabbānīpi** kusalākusalabyākatāni **ekūnanuvuti viññāṇāni honti** nātisaṅkhepa vitthāranayenāti adhippāyo. Paṭisandhiviññāṇādīnaṃ kiccaṃ nāma bhavantarapaṭisandhādīnā ākārena pavatti eva. Tabbinimuttañca cittaassa aññaṃ kiccaṃ natthīti āha “**cuddasahi ākārehi pavattanti**”ti.

Ānubhāvenāti sāmattihiyena. Katūpacitaṃ hi kammaṃ avasesapaccayasamavāye vipākaṃ dentaṃ, attano ānubhāvaṃ vissajjantaṃ viya hoti. **Devamanussesūti** chasu kāmāvacaradevesu ceva manussesu ca. **Kammakammanimittagatinimittānanti** ettha **kammaṃ** nāma katūpacitaṃ kāmāvacarakusalakammaṃ, tañca kho vipākādānāya laddhokāsaṃ. Tenāha “paccupaṭṭhitaṃ”ti. **Kammanimittaṃ** kammāyūhanakkhaṇe cetanāya paccayabhūtaṃ deyyadhammādi. **Gatinimittaṃ** yaṃ gatiṃ upapajjati, tappariyāpannaṃ rūpāyatanāṃ. **Paṇḍakādibhāvanti** paṇḍakamūgamammaṇādibhāvaṃ. Dubbalassa dvihetukakusalassa vipākabhūtā upekkhāsahagatāhetumanoviññāṇadhātu **dubbala -pa-** **manoviññāṇadhātu**. **Nesanti** bhāvitarūpārūpāvacarakusalānaṃ sattānaṃ. **Kammanimittamevāti** pathavīkasiṇādikāṃ attano kammārammaṇameva.

Evam tāvetthāti ettha viññāṇakkhandhaniddese evaṃ saṅkhepato sarūpadassanamatteneva ekūnavīsatiyā vipākaviññāṇānaṃ paṭisandhivasena pavatti vedītabbā. Bhavāmbanādivibhāgena pana yadettha vattabbaṃ, taṃ **paṭiccasamuppādakathāyaṃ**¹ āgamissatīti.

Taṃ tanti ekūnavīsatiyā paṭisandhiviññāṇesu yaṃ yaṃ uppajjitvā niruddhaṃ, taṃ taṃ anantaraṃ uppattiyā **anubandhamānaṃ**. **Tassa tassevāti** yassa yassa kammaassa vipākabhūtaṃ paṭisandhiviññāṇaṃ, tassa tasseva. **Tasmiññevāti** kammādi ke eva. Kammañce paṭisandhiviññāṇassa ārammaṇaṃ, tasmiṃ kamme, atha kammanimittaṃ, gatinimittañca, tasmiṃ kammanimitte gatinimitteti attho. **Tādisamevāti** yādisaṃ paṭisandhiviññāṇaṃ hetuto, sesasampayuttadhammato ca tādisameva. **Santānavinivattaketi** bhavaṅgasantānaassa vinivattanake. **Aññaṃ** **āvajjanasaṅkhāte cittuppāde**. Kiriyamayacitteneva

1. Visuddhi 2. 180 piṭṭhe.

supinadassanaṃ hotīti āha “supinaṃ apassato”ti. **Aparimāṇasaṅkhyampi pavattatiyeva**, tathā hidaṃ upapattibhavassa aṅgabhāvena pavattanato “bhavaṅganti vuccati. **Tesaññavāti** paṭisandhibhūtānaṃyeva.

Indriyānīti cakkhādīni indriyāni. **Ārammaṇagahaṇakkhamānīti** rūpādi-ārammaṇaṃ gahetuṃ samatthāni. Mātukucchigatakāle viya hi bahinikkhantakālepi na tāva indriyāni sakiccakāni¹ honti, anukkamena pana visadabhāvaṃ pattakāle eva sakiccakāni¹ honti. Tenevāha “idha paripakkattā āyatanānaṃ”ti. **Āpāthagateti** yogyadesāvaṭṭhite. Tameva yogyadesāvaṭṭhitaṃ **rūpaṃ paṭicca** ghaṭṭanā paccayaṃ laddhā. **Ghaṭṭanāti** paṭighāto, yena byāpārādivisesapaccayantarasaḥite cakkhussa visaye vikāruppatti visadisuppatti visayassa iṭṭhāniṭṭhabhāvena anuggaho, upaghāto cāti attho. **Tatoti** ghaṭṭanānantaraṃ. **Ghaṭṭanānubhāvenāti** ghaṭṭanābalena. **Bhavaṅgacalananti** bhavaṅgacittassa pakampanaṃ, tathā dvikkhuttuṃ pavattiyā visadisassa kāraṇabhāvūpagamananti attho. Tañhi cittasantānassa purimāvatthāya bhinnāvatthāhetutāya calanaṃ viyāti “calanaṃ”ti vuttaṃ. Visayavisayībhāvasiddhāya dhammatāya ārammaṇassa abhimukhībhāvena pasādassa tāva ghaṭṭanā hotu, aññasannissitassa pana bhavaṅgassa calanaṃ kathaṃ hotīti? Taṃsambandhabhāvato. Bheritale ṭhapitāsu sakkharāsu ekissā sakkharāya ghaṭitāya tadaññasakkharāyaṃ ṭhitamakkhikā calanaṃ cettha udāharaṇanti. **Tadeva rūpanti** tadeva bhavaṅgacalanassa paccayabhūtaṃ āpāthagataṃ rūpāyatanāṃ. **Bhavaṅgaṃ vicchindamānā viyāti** bhavaṅgasantānaṃ vicchindantī viya. Tadārammaṇuppattiyā parato bhavaṅgassa uppajjanato visayaggahaṇaṃ pañcadvārāvajjanaṃ vatvā tadanantaraṃ dassanādīsu vattabbesu tāni avatvā manodvārāvajjassa gahaṇaṃ uddese dvinnaṃ āvajjanānaṃ āvajjanasāmaññena gahitattā.

Āvajjanānantaranti pañcadvārāvajjanānantaraṃ. Ye hadayavatthu viya sampaṭicchanaḍivīthīcittānīpi nānujānanti, tesaṃ “sampaṭicchanaḍāya cakkhuviññādhātuyā”ti-ādinā tattha tattha pāli āgatā. Na hi sakkā pāliṃ paṭisedhetuṃ.

1. Sakiccakāri (Syā, Ka)

“**Sace mahantaṃ hoti**”ti idaṃ javanapariyosānāya cittappavattiyā vuccamānattā vuttaṃ. Cuddasacittakkhaṇāyukañhi ārammaṇamidha “mahantaṃ”ti adhippetam, tañca uppajjitvā dviticittakkhaṇātītaṃ hutvā āpāthagamanavasena veditabbaṃ.

Yathāvavattāpiteti voṭṭhabbanena vuttākārena katavavattāpane. Āvajjanāya, voṭṭhabbanassa ca vuttattā “avasesakāmāvacarakiriyānaṃ”ti avasesaggahaṇaṃ kataṃ. **Cha satta vāti vā**-saddena “pañca vā”ti idampi vuttamevāti daṭṭhabbaṃ. Suttamucchitādikāle hi pañcapi javanāni javantīti.

Tāniyevāti “aṭṭhannaṃ vā”ti-ādinā¹ vuttāni ekūnatimsa kāmāvacarajavanāniyeva. Ito aññaṃ manodvārāvajjanānantaraṃ uppajjanakacittaṃ nāma natthīti dassanattamaṃ evakāraggahaṇaṃ. “**Gotrabhuto**”ti idaṃ gotrabhuṭṭhāniyānaṃ parikammavodānānampi gahaṇaṃ, na gotrabhuno eva. **Phalacittānīti**, samāpattivaseṇa pavattanakaphalacittāni. **Yaṃ yaṃ laddhapaccayanti** yaṃ yaṃ javanaṃ rūpāvacarajavanādivaseṇa gotrabhu-anantaraṃ uppattiyā laddhapaccayaṃ.

Atimahantanti soḷasacittakkhaṇāyukaṃ. Tattha hi tadārammaṇacittaṃ uppajjati, na aññattha. **Vibhūntanti** supākaṇaṃ, tañca kāmāvacarameva. Tattha hi tadārammaṇassa uppatti. **Kāmāvacarajavanāvasāneti** kāmāvacarajavanasseva avasāne. Na hi taṃ kāmataṇhāhetukakammaṇibbattaṃ mahaggaṭānuttarajavanaṃ anubandhati ajanakattā, janakāsadisattā ca. Yathā gehato bahi gantukāmo taruṇadārako janakaṃ, janakasadiṣaṃ vā anubandhati, na aññaṃ, evamidampi. Tatthāpi na sabbasmā javanā sabbam javanena tadārammaṇassa niyametabbato, ārammaṇena ca vedanāya parivattetabbato. Tatthāyaṃ niyamo— parittakusalalobhamohamūlasomanassasahagatakiriyajavanānaṃ aññatarānantaraṃ atimahati visaye pañcannaṃ somanassasahagatānaṃ aññatarānaṃ tadārammaṇaṃ uppajjati, tathā parittakusalākusala-upekkhāsahagatakiriyajavanānaṃ aññatarānantaraṃ upekkhāsahagatānaṃ channaṃ tadārammaṇānaṃ aññatarānaṃ pavattati. **Iṭṭhārammaṇādīnanti** iṭṭha-iṭṭhamajjhatta-aniṭṭhārammaṇānaṃ vasesāti sambandho. Tayidaṃ ārammaṇena vedanāparivattidassanattamaṃ vuttaṃ. “**Purimakammavaseṇā**”ti idaṃ tadārammaṇavisesadassanattamaṃ.

1. Visuddhi 2. 87 piṭṭhe.

Na hi paṭisandhijanakameva kammaṃ tadārammaṇaṃ janeti, atha kho aññakammampi. Tam pana paṭisandhidāyinaṃ kammaṇa nibbattetabbatadārammaṇato visadisampi nibbattetīti. “**Javanacittavasena**”ti idaṃ tadārammaṇaniyamadassanattam. “Javena tadārammaṇaṃ niyametabban”ti hi vuttaṃ. **Ādi**-saddena paṭisandhicittaṃ saṅgaṇhāti. Tañhi attano ukkaṭṭhatarassa tadārammaṇassa paccayo na hoti. **Yo yo paccayo laddho hotīti** yathāvuttesu iṭṭhārammaṇādīsu yo yo tadārammaṇassa uppattiyā paccayo samaveto hoti. **Kiñci antaranti** kiñci khaṇantaraṃ. **Udakamivāti** paṭisotaṃ gacchantam udakamiva.

Dvikkhattuṃ sakiṃ vāti vacanasiliṭṭhavasena¹ vuttaṃ “aṭṭha vā dasa vā”ti-ādīsu² viya. Dvikkhattuṃyeva pana vaṇṇenti. Vipākacittattā, āvajjanassa ca vidūrattā, mūlabhavaṅgādibhavaṅgasāmaññasabbhāvato ca bhavaṅgassa ārammaṇe pavattanārahaṃ samānaṃ tassa javanassa ārammaṇaṃ ārammaṇaṃ etassāti tadārammaṇanti vuccati ekassa ārammaṇasaddassa lopaṃ katvā “kāmāvacaraṃ, oṭṭhamukhan”ti ca yathā. Ettha ca keci “paṭṭhāne ‘kusalākusale niruddhe vipāko tadārammaṇatā uppajjati’³ ti³ vipākadhammadhammānaṃ eva anantaraṃ tadārammaṇaṃ vuttan”ti kiriyājavanāntaraṃ na icchanti. Vipphāravantaṃ hi javanaṃ nāvaṃ viya nadīsoto bhavaṅgaṃ anubandhati, na pana chaḷaṅgupekkhāvato santavuttikiriyajavanaṃ paṇṇapuṭaṃ viya nadīsototi. Tayidaṃ labbhamānassāpi kenaci adhippāyena katthaci avacanaṃ dissati, yathā taṃ dhammasaṅgahe akusalaniddese labbhamānopi adhipati na vutto. Yañca paṇṇapuṭaṃ nidassitaṃ, tampi nidassitabbena na samānaṃ. Nāvāpaṇṇapuṭānañhi nadīsotassa āvaṭṭanaṃ, gati ca visadisīti nāvāya nadīsotassa anubandhanaṃ, paṇṇapuṭassa ananubandhanañca yujjati, idha pana kiriyajavanetarajavanānaṃ bhavaṅgasotassa āvaṭṭanaṃ, gati ca sadisīti etassa ananubandhanaṃ, itarassa anubandhanañca na yujjati. Tasmā vicāretabbaṃ.

Bhavaṅgamevāti avadhāraṇaṃ bhavapariyosānassa idha na adhippetattā. Aññathā tadārammaṇāvasāne cutipi na hotiyeva. **Dassanādīnīti** dassanasavanaghāyanasāyanaphusanāni. **Iti**-saddo ādi-attho, tena sampaṭicchanaḍīnaṃ saṅgaho daṭṭhabbo. Paṭisandhito bhavaṅgameva, bhavaṅgato

1. Vacanasilesena (Ka)

2. Am 3. 21; Vi 1. 4 piṭṭhesu.

3. Abhi 8. 133 piṭṭhe.

āvajjanamevāti evaṃ pavattacittaniyamavaseneva. **Tampī**ti cuticittampi. Paṭisandhibhavaṅgacittāni viya **ekūnavīsatividhameva hoti** atthato bhedābhāvato.

Bhavadatiṭṭhitinivāsesūti tīsu bhavesu, pañcasu gaṭīsu, sattasu viññāṇaṭṭhitīsu, navasu sattāvāsesu ca. Yo panettha acittako, so idha na gahetabbo viññāṇakathābhāvato. “Etthā”ti idaṃ “saṃsaramānānaṃ sattānaṃ”ti iminā sambandhitabbaṃ. Ettha etesu vuttanayena saṃsaramānesu sattesu yo pana arahattaṃ pāpuṇāti sammāpaṭipattimanvāyāti¹ adhippāyo. **Tassa** arahato **niruddhameva hoti** cittaṃ appaṭisandhikabhāvato.

Iti viññāṇakkhandhe vitthārakathābhāvavaṇṇanā.

Vedanākkhandhakathāvaṇṇanā

456. Vedena anubhavanākārena ayitaṃ pavattaṃ vedayitaṃ, vedayitanti lakkhitabhadhammajātaṃ **vedayitalakkhaṇaṃ**. Taṃ pana atthato vedanā evāti āha “**vedayitalakkhaṇaṃ nāma vedanāvā**”ti. Atha vā vedayitaṃ lakkhaṇaṃ etissāti kappanāsiddham bhedaṃ nissāya aññapadatthasamāsavasenāpi vedanāvā vuccatīti āha “**vedayitalakkhaṇaṃ nāma vedanāvā**”ti. **Vedayati vedayatī**ti byāpanicchāvasena vacanaṃ vedanāya savisaye abhiṇṇhappavattidassanatthaṃ. Sabhāvadhammato añño kattā natthīti dassanatthaṃ kattuniddeso. **Itī**ti aniyamato hetu-attho. **Khoti** vacanālaṅkāramattaṃ. **Tasmāti** tassa niyamaṇaṃ. Idaṃ vuttaṃ hoti—yasmā yathāpaccayaṃ ārammaṇarasam anubhavati, tasmā vedanāti vuccatīti.

“**Kusalaviññāṇena sampayuttā**”ti idaṃ kusalāya vedanāya upalakkhaṇaṃ daṭṭhabbaṃ. Yā kāci kusalā vedanā, sabbā sā kusalena viññāṇena sampayuttāti, na pana tassā kusalabhāvasaṃsiddhidassanatthaṃ. Na hi kusalena viññāṇena sampayogato kusalāya vedanāya kusalabhāvo,

1. Sammāpaṭipattim sandhāyāti (Sī, Syā, Ka)

atha kho yonisomanasikārādikato. Tenāha “**jātivasenā**”ti. **Akusalādīsipi** eseva nayo. Yathā pana jātivasena kusalādiviññāṇasampayuttatāya tividhā, evaṃ yāva ekūnanavutiviññāṇasampayuttāti ekūnanavutividhā veditabbā. **Sabhāvabhedatoti** sampayuttabhūmi-ārammaṇādivasena labbhamānaṃ bhedaṃ aggahetvā kevalaṃ sabhāvakatabhedato evāti attho.

“Pañcavidhā”ti vatvā taṃ pañcavidhataṃ dassetuṃ “**sukhan**”ti-ādi vuttaṃ. Tattha sukhayatīti **sukhaṃ**, kāyaṃ, sampayuttadhamme ca laddhassāde karotīti attho. Suṭṭhu vā khādāti, khaṇāti vā kāyikaṃ ābādanti **sukhaṃ**. Sukaraṃ okāsādānaṃ etassāti **sukhanti** apare. Dukkhatīti **dukkhaṃ**, kāyaṃ, sampayuttadhamme ca vibādhatīti attho. Duṭṭhu vā khādāti, khaṇāti vā kāyikaṃ assādanti **dukkhaṃ**. Dukkaraṃ okāsādānaṃ etassāti **dukkhanti** apare. **Somanassupekkhānaṃ** saddattho heṭṭhā vuttoyeva. Domanassassa somanasse vuttanayānusārena veditabbaṃ. Kim pana kāraṇaṃ mānasetarasātāsātavasena sukhaṃ, dukkhaṃca vibhajitvā vuttaṃ “**sukhaṃ somanassaṃ dukkhaṃ domanassaṃ**”ti. Upekkhā pana mānasī, itarā ca ekadhāva vuttāti? Bhedābhāvato. Yathā hi anuggahūpaghātakatāya sukhadukkhāni aññathā kāyassa anuggahamupaghātaṃca karonti, aññathā manaso, na evamupekkhā. Tasmā bhedābhāvato ekadhāva upekkhā vuttāti.

Tattha yena sabhāvabhedena vedanā pañcavidhā, sā pavattiṭṭhāne dassite supākaṭā hotīti pavattiṭṭhānaṃ tāva dassetuṃ “**tatthā**”ti-ādi āraddhaṃ. **Akusalavipākenāti** etthāpi “kāyaviññāṇena sampayuttan”ti ānetvā sambandhitabbaṃ. Yathā adhikaraṇimatthake kappāsapicupiṇḍaṃ ṭhapetvā ayokūṭena paharantassa picupiṇḍaṃ atikkamitvā kūṭaṃ adhikaraṇiṃ gaṇhāti, nighaṃso balavā hoti, evaṃ paṭighaṭṭanānighaṃsassa balavabhāvato iṭṭhe, iṭṭhamajjhatte ca ārammaṇe kāyaviññāṇaṃ sukhasahagataṃ hoti. Aniṭṭhe, aniṭṭhamajjhatte ca dukkhasahagatanti āha “**kusala -pa- dukkhan**”ti. Kāmāvacaravipākaviññāṇāni pañca kammārammaṇavasena somanassasahagatāni honti, rūpāvacaravipākāni cattāri kammavasena, sesāni terasa kāmāvacarāni, aṭṭha rūpāvacarāni, dvattiṃsa lokuttarāni,

yathārahaṃ cetobhisaṅkhārārammaṇapādakādivasena somanassasahagatāni
hontīti āha “**somanassam dvāsaṭṭhiyā viññāṇehi sampayuttan**”ti.

Domanassam dvīhi akusalaviññāṇehi sampayuttam
cetobhisaṅkhārārammaṇādivasena.

Avasesapañcapaññāsāyāti yathāvuttāni chasaṭṭhi viññāṇāni ṭhapetvā
avasesāya pañcapaññāsāya. Tattha kusalākusalavipākāni iṭṭhāniṭṭhesu
nibbikappakāni sukhadukkhāsampayuttāni bhavitum yuttānipi dvinnam
picupiṇḍānam viya dvinnam dvinnam upādārūpānam ghaṭṭanānighamsassa
mandabhāvato cakkhādisannissitāni aṭṭhapi viññāṇā ni sabbattha
upekkhāsampayuttāneva honti, tathā balavapaccayatāya sukhadukkhānam
tesaṅca tadabhāvato. Apubbārammaṇanissayappavattīni
āvajjanasampaṭicchana viññāṇāni, asadisānantarappaccayam kiriyārambhassa
ādibhūtam voṭṭhabbanam, kāyadukkhapadhānatāya akusalaphalassa
tadupanissayabhūtam akusalavipākapaṭisandhi-ādi,
iṭṭhamajjhattārammaṇappavattīni kāmāvacarakusalavipākaviññāṇāni ca
upekkhāsahagatāniyeva honti. Kammavasena vā vipākānubhavanassa
iṭṭhāniṭṭhārammaṇesu adukkhāmasukhabhāvo yutto. Sati ca vipākabhūtāya
upekkhāya sukhadukkhāmajjhattabhāve kammārammaṇavasena
kusalavipākāya iṭṭhabhāvo, akusalavipākāya aniṭṭhabhāvo ca veditabbo.
Avasiṭṭhāni pana sattatimsa viññāṇāni
cetobhisaṅkhārārammaṇapādakādivasena upekkhāsampayuttāni hontīti evam
pañcapaññāsāya viññāṇehi upekkhāya sampayuttatā veditabbā.

Salakkhaṇam nāma dhammānam anaññasādhāraṇo sabhāvo,
anubhavanaṅca sabbavedanānam sādharmaṇalakkhaṇanti tam paṭinīyatena
ārammaṇena niyametvā dassento āha “**iṭṭhaphoṭṭhabbānubhavanalakkhaṇam
sukhan**”ti tassa byabhicārābhāvato. Bhusam brūhanam vaḍḍhanam
upabrūhanam. Tayidam kāmāṅca cetasikasukhepi labbhati, tam pana
savikappakam cetobhisaṅkhāravasenāpi hoti. Idantu nibbikappakam
sabhāvasiddhattā tato sātīsayanti āha “**sampayuttānam upabrūhanarasan**”ti.
Assādiyatīti assādo, sukhāvedanā. Tenāha bhagavā “yam bhikkhave
pañcupādānakkhandhe paṭicca uppajjati sukham somanassam, ayam vuccati
bhikkhave pañcupādānakkhandhesu

assādo”ti¹. Kāyanissitattā kāye bhavo kāyiko, so eva assādo tathā paccupatiṭṭhatīti **kāyika-assādapaccupaṭṭhānam**. **Kāyindriyapadaṭṭhānam** anaññavatthukattā.

Dukkhasa lakkhaṇādīni vuttanayānusārena veditabbāni.

Sabhāvato, parikkappato vā iṭṭhassa ārammaṇassa anubhavanalakkhaṇam **iṭṭhārammaṇānubhavanalakkhaṇam**. Tenāha “**yathā tathā vā iṭṭhākārasambhogarasan**”ti, yathābhūtena vā ayathābhūtena vā iṭṭhākārena ārammaṇassa **sambhuñjanarasaṃ**, paccanubhavanakiccanti attho. “**Passaddhipadaṭṭhānam**”ti idaṃ passaddhakāyo sukhaṃ vedetī”ti² suttapadam nissāya vuttam, tam pana nirāmisasomanassavasena veditabbanam.

Somanasse vuttavipariyāyena domanassassa lakkhaṇādīni veditabbāni. Domanassassa kāmādhātuyam uppajjanato ekantena hadayavatthupadaṭṭhānatā tato viseso.

Majjhattassa, ārammaṇassa majjhattam vā vedayitam anubhavanam lakkhaṇam etissāti **majjhattavedayitalakkhaṇā**. Majjhattānubhavanato eva sampayuttānam **nāti-upabrūhanamilāpanarasā**. “**Santabhāvapaccupaṭṭhānā**”ti idaṃ anavajjāya nirāmisāya upekkhāya vasena veditabbanam, na sabbāya.

Iti vedanākkhandhe vitthārakathāmukhavaṇṇanā.

Saññākkhandhakathāvaṇṇanā

457. **Sañjānalakkhaṇam nāma saññāvāti**-ādīsu yaṃ vattabbanam, tam vedanākkhandhaniddese vuttanayeneva veditabbanam.

Kāmam vedanāyapi vippayuttam viññāṇam natthi, tassā pana sabhāvato bhinnattā kāyaci vedanāya sampayuttamhi kāyaci vippayuttam hoti. Saññāya pana īdisam natthīti āha “**na hi tam viññāṇam -pa- saññāyā**”ti.

Sabbāvāti catubhūmikāpi. Atha vā yathā vedanā bhinnasabhāvattā bhedanalakkhaṇādīto vuttā, na evamayam, aya pana sabbāva,

1. Saṃ 2. 23, 24 piṭṭhesu.

2. Saṃ 3. 135; Aṃ 3. 535 piṭṭhādīsu.

sañjānanalakkhaṇā. Nīlādibhedassa ārammaṇassa sañjānanam saññam katvā jānanam lakkhaṇam etissāti **sañjānanalakkhaṇā**. Tathā hi sā abhiññāṇena sañjānanato paccābhiññāṇarasāti vuccati. Nimittena hi puna sañjānanakiccā **paccābhiññāṇarasā**. Tassā vaḍḍhakissa dārumhi abhiññāṇam katvā tena abhiññāṇena paccābhijānanakāle pavatti veditabbā. Tenāha “**tadevetan**”ti-ādi. Puna sañjānanassa paccayo punasañjānanapaccayo, tadeva nimittam puna -pa- nimittam, tassa karaṇam, puna -pa- karaṇam, punasañjānanapaccayabhūtam vā nimittakaraṇam puna -pa- karaṇam, tadassā kiccanti **punasañjānanapaccayanimittakaraṇarasā**. Punasañjānananimittakaraṇam nimittakārikāya, nimittena sañjānanantiyā ca sabbāya saññāya samānam yojetabbaṃ. **Abhinivesakaraṇam** “idameva saccan”ti¹ saññābhinivesamatteneva daṭṭhabbaṃ. **Yathā-upaṭṭhitavisayapadaṭṭhānā** avikappasabhāvattā. Ñāṇasampayuttā pana saññāññānameva anuvattati, tasmā abhinivesakārikā, viparītaggāhikā ca na hoti. Eteneva samādhisampayuttatāya aciraṭṭhānatā ca na hotīti veditabbā. Evaṃ rāgadiṭṭhimānādisampayuttāya saññāya rāgādi-anuvattikabhāvoti.

Iti saññākkhandhe vitthārakathāmukhavaṇṇanā.

Saṅkhārakkhandhakathāvaṇṇanā

458. **Rāsikaraṇalakkhaṇanti** sampiṇḍanalakkhaṇam, tato saṅkhārā āyūhanarasā vuccanti. Cetanāpadhānatāya hi saṅkhārakkhandhadhammā evaṃ vuttā. Tenevāha “**kiṃ pana tanti saṅkhārāyevā**”ti-ādi. Tattha **saṅkhatamabhisaṅkharontīti** yathā attano phalam saṅkhatam sammadeva nipphannaṃ hoti, evaṃ abhisaṅkharontīti attho. **Vipphārapaccupaṭṭhānāti** ettha **vipphāro** nāma vipphāravantatā, tasmā sabyāpārapaccupaṭṭhānāti attho.

Tasmim tasmim citte uppanne niyamena uppajjanato **niyatā**. **Sarūpena āgatāti** evaṃ piṭṭhivattake akatvā pāḷiyā sarūpeneva āgatā. Kadācideva uppajjanato na niyatāti **aniyatā**. Yadi pi aniyatā

1. Ma 2. 150, 166, 381; Ma 3. 22, 23 piṭṭhādīsu.

ekajjhaṃ na uppajjanti, tasmim̃ pana citte uppajjanadhammatāya
 “chattimsā”ti vuttaṃ. Tenāha “uppajjamānāpi ca na ekato uppajjanti”ti.

459. **Phusatī**ti kattuniddeso. Yaṃ tattha kāraṇaṃ, taṃ heṭṭhā vuttameva. Phusanti etenāti vā **phasso**. Sampayuttadhammā hi ārammaṇe pavattamānā taṃ phusanalakkhaṇena phassena phusantā viya honti. Ārammaṇaphusanamattaṃ vā **phassoti** sādhanattayampi yujjateva. Sabhāvadhammesu kattukaraṇasādhanavacanāṃ tadākārasamāropanato pariyāyakathā bhāvasādhanavacanameva nipariyāyakathāti vuttaṃ “**phusanalakkaṇo**”ti. **Ayañhī**ti-ādi yathāvuttalakkaṇādisamatthanāṃ. Yadi ayaṃ dhammo cetasiko, svāyaṃ arūpadhammo samāno kathaṃ phusanalakkaṇo, saṃghaṭṭanarasādiko ca hotīti antolīnaṃ codanaṃ hadaye ṭhapetvā tassa sodhanatthaṃ “**arūpadhammopi samāno**”ti-ādi vuttaṃ. Tattha “**phusanākārenea pavattati**”ti iminā arūpassāpi tassa dhammassa ayaṃ sabhāvoti dasseti. Sā ca tassa phusanākārappavatti ambila-ambapakkadim̃ khādantaṃ passantassa parassa kheḷuppatti, paraṃ vibādhiyamānaṃ disvā dayālukassa sarīrakampanaṃ, rukkhasākhaḡge duṭṭhitaṃ purisaṃ disvā bhūmiyaṃ ṭhitassa bhīrukapurisassa jaṅghacalanāṃ, pisācādibhāyitabbāṃ disvā ūrukhambhoti evamādisu pariyyattā hoti.

Ekadesenāti kaṭṭhadvayādi viya attano ekapassena¹. **Analliyamānopī**ti asaṃsiliyamānopī. Rūpasaddehi saha phassassa sāmāññaṃ analliyamānasamghaṭṭanameva, na visayabhāvo. Yathā rūpasaddā cakkhusotāni analliyamānā eva “phusitaṃ”ti-ādinā² vuttā, evaṃ phassassāpi ārammaṇaphusanasamghaṭṭanānīti. **Samghaṭṭanañca** phassassa cittārammaṇānaṃ sannipatanabhāvo eva. Tenāha “**cittamārammaṇaṇca samghaṭṭeti**”ti. Kiccaṭṭhena rasena samghaṭṭanarasatā vuttā, vatthārammaṇasannipātena vā sampajjatiṭi samghaṭṭanasampattiko phasso samghaṭṭanaraso vutto. Yathā “dve pāṇi vajjeyyū”ti-ādīsu³ pāṇissa pāṇimhi samghaṭṭanaṃ tabbisesabhūtā rūpadhammā, evaṃ cittassa ārammaṇe samghaṭṭanaṃ tabbisesabhūto eko cetasikadhammo daṭṭhabbo. “Tiṇṇaṃ saṅgati phasso”ti³ vacanato

1. Ekapadesena (Ka) 2. Paṭihaññi vāti-ādinā (?) 3. Khu 11. 61 piṭṭhe Milindapañhe.
 4. Ma 1. 158, 326; Ma 3. 328, 332, 333; Saṃ 1. 301; Saṃ 2. 261 piṭṭhādīsu.

cakkhurūpaviññānādīnaṃ saṅgativasena gahetabbatā āha
“tikasannipātasāṅkhātassā”ti-ādi. Tassa phassassa kāraṇabhūto tadanurūpo¹
 samannāhāro **tajjāsamannāhāro**. Indriyassa tadabhimukhabhāvo, āvajjanāya
 ca ārammaṇakaraṇaṃ visayassa **parikkhatatā** abhisāṅkhatatā, viññāṇassa
 visayabhāvakarāṇanti attho. Yathā niccammā gāvī yaṃ yaṃ ṭhānaṃ
 upagatā, tattha tattha dukkhameva pāpuṇāti, evaṃ phasse sati vedanā
 uppajjateva. Vedanā ca dukkhasallādisabhāvāti vuttaṃ
“vedanādhiṭṭhānabhāvato pana niccammagāvī viya daṭṭhabbo”ti.

460. **Abhisandahati** pabandhati pavatteti. **Cetanābhāvo** byāpārabhāvo.
Āyūhanaṃ cetayanaṃ īriyanaṃ. **Sarṇvidhanaṃ** vicāraṇaṃ. Āyūhanarasāya
 cetanāya pavattamānāya sabbepi sampayuttadhammā yathāsakaṃ
 kiccappasutā hantīti sā **sakiccaparakkiccasādhikā** vuttā. Jeṭṭhasisso pare
 sajjhāyane uyyojento sayampi sajjhāyati. Mahāvaḍḍhakimhi
 vaḍḍhakikammaṃ kātumāraddhe itarepi karontiyeva. **Ussāhanabhāvenāti**
 ādarakaraṇabhāvena. Sā hi sayam ādarabhūtā sampayuttadhamme
 ādarayatīti. Āyūhanavasena ussāhanaṃ daṭṭhabbaṃ, na vīriyussāhasena.

461. **Vīrabhāvoti** yena vīro nāma hoti, so dhammoti attho. Vidhinā
 īretabbaṃ pavattetabbanti vā **vīriyam**, ussāho, taṃtaṃkiccasaṃmārambho,
 parakkamo vā. **Upatthambhanaṃ** sampayuttadhammānaṃ kosajjapakke
 patitum adatvā dhāraṇaṃ anubalappadānaṃ, sampaggaṇhanaṃ vā.
 Saṃsīdanapaṭipakkho dhammo asaṃsīdanaṃ, na saṃsīdanābhāvamattanti
 asaṃsīdanabhāvena paccupatiṭṭhatīti vuttaṃ
“asaṃsīdanabhāvapaccupatiṭṭhānan”ti. **Sarṇvegapadaṭṭhānanti** aṭṭhasaṃvega²
 pubbikāya kusalakiriyaṃ vīriyarambhavattupadaṭṭhānaṃ. “Maggo
 gantabbo hoti, maggo gato, kammaṃ kātappaṃ, kammaṃ kataṃ,
 appamattako ābādho uppanno, gilānā vuṭṭhito hoti, aciravuṭṭhito gelaññā,
 gāmaṃ vā nigamaṃ vā piṇḍāya vicaranto na labhati lūkhassa vā paṇītassa
 vā bhojanassa yāvadattham pāripūrim, labhati -pa- pāripūrin”ti evaṃ vuttāni
 etāni anurūpapaccavekkhaṇāsahitāni aṭṭha **vīriyārambhavatthūni**, taṃ
 mūlakāni vā paccavekkhaṇāni.

1. Tadanurūpabhūto (Ka)

2. Am-Ṭṭha 1. 401; Itivuttaka-Ṭṭha 109 piṭṭhesu.

462. Attanā anupāletabbānaṃ sahaḷātadhammānaṃ anupālanāṃ jīvitassa byāpāro, tañca nesaṃ jīvananti taṃ tassa kāraṇabhāvaṃ purakkhatvā vuttaṃ “**jīvanti tenā**”ti. Tampi cassa atthato jīvanamevāti āha “**jīvanamattameva vā tan**”ti.

463. **Ādhiyatīti** ṭhpeti. **Avisāro** attano eva avisaraṇasabhāvo. **Avikkhepo** sampayuttānaṃ dhammānaṃ avikkhittatā. Yena sampayuttā avikkhittā honti, so dhammo avikkhepoti. Avūpasamalakkhaṇassa vikkhepassa paṭipakkhatāya cittassa upasamanākārena paccupatiṭṭhatīti **upasamapaccupaṭṭhāno**. **Visesatoti** yebhuyyena. Sukhavirahitopi hi atthi samādhīti. Dīpaccinidassanena santānaṭṭhitibhāvaṃ samādhissa dasseti.

464. **Saddahanti etāyāti** saddahanakiriyāya pavattamānānaṃ dhammānaṃ tattha ādhipaccabhāvena saddhāya paccayataṃ dasseti. Tassā hi dhammānaṃ tathāpaccayabhāve sati puggalo saddahatīti vobhāro hoti. Saddahanaṃ saddheyyavatthuno pattiyāyanaṃ, taṃ lakkhaṇaṃ etissāti **saddahanalakkhaṇā**. **Okappanalakkhaṇāti** anupavisitvā evametanti kappanalakkhaṇā. Kālussiyamaḷaṃ vidhametvā sampayuttānaṃ, puggalasseva vā pasādanaṃ anāvilabhāvakaraṇaṃ raso etissāti **pasādanarasā**. **Pakkhandanaṃ** adhimuccanavasena ārammaṇassa anupavisanaṃ. Akālusabhāvo akālussiyaṃ, anāvilabhāvoti attho. Pasādanīyatṭhānesu passadaviparītaṃ akusalaṃ assaddhiyaṃ, micchādhimutti ca, tappaccanīkova pasādabhūto vatthugato nicchayo **adhimutti**, na yevāpanakādhimokkho. Ratanattayaṃ, kammaṃ, kammaphalañca **saddheyyavatthu**. Sappurisaṃsevanasaddhammasavanayonisomana-sikāradhammānudhammapaṭipattiyo **sotāpattiyaṅgāni**. Kusaladhammānaṃ ādāne **hatthaṃ** viya, sabbasampattisampadāne **vittaṃ** viya, amatakasiphalaphalane **bījaṃ** viya daṭṭhabbā.

465. **Saranti tāyāti** saraṇakiriyāya pavattamānānaṃ dhammānaṃ tattha ādhipaccabhāvena satiyā paccayataṃ dasseti. Tassā hi dhammānaṃ tathāpaccayabhāve sati taṃsamaṅgipuggalo saratīti vohāro hoti. Uda-ke alābu viya pilavitvā gantuṃ adatvā pāsāṇassa viya

niccalassa ārammaṇassa ṭhapanam saraṇam asammuṭṭhatākaraṇam **apilāpanam**. Sammosapaccanīkam kiccaṃ **asammoso**, na sammosābhāvamattam. “Satārakkhena cetasā”¹ti vacanato **ārakkhapaccupaṭṭhānā**. Aññato āgantvā cittavisaye abhimukho bhavati etāyāti **visayābhimukhabhāvo**, sati. Satiyā vatthubhūtā kāyādayova **kāyādisatipaṭṭhānāni**, sati eva vā purimā pacchimāya padaṭṭhānam.

466. **Kāyaduccaritādīhī**ti hetumhi karaṇavacanam. **Hiriyatī**ti lajjākārena jigucchati. **Tehiyevā**ti kāyaduccaritādīhiyeva. **Ottappatī**ti ubbijjati. Hirī pāpadhamme gūtham viya passantī jigucchati āha “**pāpato jigucchanalakkhaṇā hiri**”ti. Ottappam te uṇham viya passantam tato uttasatīti vuttam “**uttāsālakkhaṇam ottappan**”ti. **Vuttappakārenā**ti lajjākārena, uttāsākārena ca. **Attagāravapadaṭṭhanā** hirī ajjhattasamuṭṭhānatāya, attādhipatitāya ca. **Paragāravapadaṭṭhānam** ottappam bahiddhāsamuṭṭhānatāya, lokādhipatitāya ca. Tamevattham pākaṭataram kātum “**attānam hī**”ti-ādi vuttam. Ajjhattasamuṭṭhānādītā ca hiri-ottappānam tattha tattha pākaṭabhāvena vuttā, na panetesam kadāci aññamaññavippayogā. Na hi lajjanam nibbhayam, pāpabhayam vā alajjanam atthīti. **Lokapālakā**ti ettha “dveme bhikkhave sukkā dhammā lokam pārentī”²ti² suttapadam attādhipati, lokādhipatibhāve ca “so attānamyeva adhipatimkaritvā, so lokamyeva adhipatim karitvā”³ti ca³ suttapadāni āharitvā vattabbāni.

467. Yasmā lobhapaṭipakkho alobhoti ye dhammā tena sampayuttā, taṃsamaṅgino vā sattā tena na lubbhanti, sayam kadācipi na lubbhateva, atthato vā alubbhanākāro eva ca hoti, tasmā vuttam “**na lubbhanti**”ti-ādi. **Eseva nayoti** “na dussanti tenā”ti-ādinā kārakattayayojanam atidisati. **Agedho** agijjhanam anabhikaṅkhanam. Alaggabhāvo anāsattatā. **Apariggaho** kassaci vatthuno mamattavasena asaṅgaho. Anallīno bhāvo adhippāyo etassāti **anallīnabhāvo**. Evañhi upamāya sameti.

1. Am 3. 280 piṭṭhe. 2. Am 1. 53; Khu 1. 219 piṭṭhesu. 3. Am 1. 146, 147 piṭṭhesu.

468. Caṇḍikassa bhāvo caṇḍikkaṃ, kopo. Tappaṭipakkho **acaṇḍikkaṃ**, abyāpādo. **Avirodho** aviggaho. **Anukūlamitto** anuvattako. **Vinayarasoti** vinayanaraso. **Sommabhāvo** mejjanavasena hilādanīyatā.

469. Dhammānaṃ yo yo sabhāvo yathāsabhāvo, tassa tassa paṭivijjhanāṃ **yathāsabhāvapaṭivedho**. Akkhalitaṃ avirajjhivā paṭivedho **akkhalitapaṭivedho**. Visayassa obhāsanāṃ tappaṭicchādakasammohandhakāravidhamanāṃ **visayobhāsanāṃ**. Katthacipi visaye asammuyhanākārenea paccupaṭiṭṭhati, sammohapaṭipakkhatāya vā tadabhāvaṃ paccupaṭṭhapetīti **asammohapaccupaṭṭhāno**. **Sabbakusalānaṃ mūlabhūtā**ti sabbesaṃ catubhūmakakusaladhammānaṃ suppaṭiṭṭhitabhāvasādhanena paṭiṭṭhābhūtā, na tesāṃ kusalabhāvasādhanena. Yadi hi tesāṃ kusalabhāvo kusalamūlapaṭibaddho siyā, evaṃ sati taṃ samuṭṭhānarūpesu hetupaccayatā na siyā. Na hi te tesāṃ kusalādibhāvaṃ sāmenti, na ca paccayā na honti. Vuttañhetāṃ “hetū hetusampayuttakānaṃ dhammānaṃ taṃsamuṭṭhānānaṃ rūpānaṃ hetupaccayena paccayo”ti¹. Yathā ca kusalabhāvo, evaṃ abyākatabhāvopi abyākatamūlapaṭibaddho siyā². Tathā sati ahetukacittānaṃ abyākatabhāvo eva na siyā, akusalesu ca yattha ekaṃyeva mūlaṃ, tassa akusalabhāvo na siyā, ubhayampi hotiyeva. Tasmā na mūlapaṭibaddho kusalādibhāvo, atha kho yonisomanasikārādipaṭibaddho. Tesāṃ pana suppaṭiṭṭhitabhāvasādhanāni mūlānībhi gahetabbaṃ.

470. **Passambhanāṃ** darathavūpasamo. Kāyasaddo samūhavācī, so ca kho vedanādikkhandhattayavasenāti āha “**kāyoti cetha vedanādayo tayo khandhā**”ti. Tenevāha “tatha katamā tasmim samaye kāyapassaddhi hoti? Yā tasmim samaye vedanākkhandhassā”ti-ādi³. **Daratho** sārāmbho, domanassapaccayānaṃ uddhaccādhikānaṃ kilesānaṃ, tathāpavattānaṃ vā catunnaṃ khandhānaṃ etaṃ adhivacanaṃ. Darathanimmaddanena pariḷāhaparipphandavirahito sītibhāvo **aparipphandasītibhāvo**. Uddhaccappadhānā

1. Abhi 8. 1 piṭṭhe Paṭṭhāne.

2. Na siyā (Syā)

3. Abhi 1. 23 piṭṭhe.

kilesā **uddhaccādikilesā**, uddhaccaṃ vā ādim katvā sabbakilese saṅgaṇhāti. Sesesupi eseva nayo.

Garubhāvo dandhatā, thinamiddhādihikānaṃ, tathāpavattānaṃ vā catunnaṃ khandhānaṃ etaṃ adhivacanaṃ. Dandhatāya paṭipakkho **adandhatā**, na dandhatāya abhāvamattaṃ.

Thaddhabhāvo **thambho**, diṭṭhimānādihikānaṃ, tappadhānānaṃ vā catunnaṃ khandhānametaṃ nāmaṃ. Thaddhabhāvanimmaddanato eva katthaci ārammaṇe appaṭihatākārena paccupatiṭṭhanti, sampayuttānaṃ vā tattha appaṭighātaṃ paccupaṭṭhāpentīti **appaṭighātapaccupaṭṭhānā**.

Kammaṇi sādhu kammaññaṃ, na kammaññaṃ akammaññaṃ, tassa bhāvo **akammaññabhāvo**, dānasilādipuññakiriyāyaṃ ayogyatā. Atthato kāmaccandādisaṃkilesadhammā, tappadhānā vā cattāro akusalakkhandhā. Kammaññabhāveneva sampannākārena¹ ārammaṇassa gahaṇaṃ **ārammaṇakaraṇasampatti**. Vuttāvasesā kāmaccandādayo, tadekaṭṭhā ca saṃkilesadhammā **avasesanīvaraṇādayo**. Vinibandhanimmaddanena sukhappavattihetutāya **pasādanīyavatthūsu pasādāvahā**. **Suvaṇṇavisuddhi viyāti** yathā suvaṇṇavisuddhi apagatakālakā alaṅkāravikativiniyogakkhamā, evamayampi saṃkilesavigamena hitakiriyāviniyogakkhamā.

Kāyacittānaṃ gelaññaṃ, assaddhiyādi, tadekaṭṭhā ca pāpadhammā. Gelaññaapaṭipakkho agelaññaṃ, tabbhāvo lakkhaṇaṃ etāsanti **agelaññabhāvalakkhaṇā**. Yathāvuttageḷaṇṇanimaddaneneva natthi etāsaṃ ādīnavo doso, na vā etā ādīnaṃ kapaṇaṃ vanti pavattantīti nirādīnavā, tenākārena paccupatiṭṭhanti, taṃ vā sampayuttesu paccupaṭṭhāpentīti **nirādīnavapaccupaṭṭhānā**.

Kāyasambandhī, cittasambandhī ca ujubhāvoti lakkhitabbatāya **kāyacitta-ajjavalakkhaṇā**. Kāyacittānaṃ naṅgalasīsaṇḍakotiḡomuttavaṅkatāsaṅkhātānaṃ kuṭilabhāvānaṃ nimmaddanato **kāyacittakuṭilabhāvanimmaddanarasā**. Tato eva sabbathāpi ajimhabhāvena paccupatiṭṭhanti, sampayuttānaṃ vā ajimhataṃ paccupaṭṭhāpentīti **ajimhatāpaccupaṭṭhānā**. “Santadosapaṭicchādanalakkhaṇā māyā, asantaḡuṇasambhāvanalakkhaṇaṃ sāṭṭheyyaṃ”ti evaṃ vuttā

1. Sammannāhārena (Sī)

tadākārappavattā akusalā khandhā, tadekaṭṭhā ca saṁkilesadhammā **māyāsātheyyādikā**. Ettha ca cittapassaddhi-ādīhi cittameva passaddham, lahu, mudu, kammaññaṁ, paguṇaṁ, uju ca hoti. Kāyapassaddhi-ādīhi pana rūpakāyopi. Tenevettha bhagavatā dhammānaṁ duvidhatā vuttā, na sabbattha.

471. Chandanaṁ **chando**, ārammaṇena atthikatā. “Chando kāmo”ti-ādīsu¹ pana taṇhāpi vuccati, “chandaṁ janeti vāyamatī”ti-ādīsu² vīriyampīti tato nivattanatthaṁ “**kattukāmatāyetaṁ adhivacanaṁ**”ti vuttaṁ. **Kattukāmatā** vuccati karaṇicchā. Cetasikassa ca dhammassa sārammaṇattā karaṇicchā nāma ālambanassa ālambitukāmatāmukheneva hotīti ārammaṇakaraṇicchālakkhaṇo chando **kattukāmatālakkhaṇo** vutto. Tenevāha “**ārammaṇapariyesanaraso, ārammaṇena atthikatāpaccupaṭṭhāno**”ti ca. Yadaggena panāyaṁ attano ārammaṇapariyesanaraso, tadaggena sampayuttānampi hotiyeva ekārammaṇatāya tena tesāṁ. Tenevāha “**ārammaṇaggahaṇe cāyaṁ**³ **cetato hatthappasāraṇaṁ viya daṭṭhabbo**”ti. Svāyaṁ kusalesu uppanno kusalacchandoti vuccati yonisomanasikārasamuṭṭhānattā.

472. **Adhimuccanaṁ** ārammaṇe sanniṭṭhānavasena veditabbaṁ, na pasādanavasena. Yathā tathā vā hi ārammaṇe nicchayanaṁ adhimuccanaṁ anadhimuccantassa paṇātipātādīsu, dānādīsu vā pavattiyā abhāvā, saddhā pana pasādanīyesu pasādādhimokkhāti ayametesāṁ viseso. Voṭṭhabbaṁ pana yathā santūrite atthe, nicchayanākārena pavattitvā parato pavattamānānaṁ tathā pavattiyā paccayo hoti. Yadi evaṁ vicikicchāsampayuttesu kathanti? Tesampi ekaṁseneva saṁsappanākārassa paccayatāya daṭṭhabbaṁ. Dāraḥkassa viya ito cito ca saṁsappanassa “karissāmi na karissāmi”ti anicchayassa paṭipakkhakiriyā asaṁsappanaṁ, yesu cittuppādesu ayaṁ sanniṭṭhānalakkhaṇo adhimokkho, tesāṁ ārammaṇadhammo eva **sanniṭṭheyadhammo**.

1. Abhi 2. 266 piṭṭhe.

2. Abhi 2. 225 piṭṭhe.

3. Ayaṁ (Ka), Abhi-Ṭṭha 1. 177 piṭṭhe passitabbaṁ.

473. **Kiriyā kāroti** kārasaddassa bhāvasādhanatamāha. **Manamhi kāroti** manasi ārammaṇassa karaṇaṃ. Yena hi mano ārammaṇe karīyati ārammaṇenassa saṃyojanato, tato eva tena ārammaṇampi manasi karīyatīti. **Purimamanatoti** bhavaṅgamanato. **Visadisamananti** vīthijavanaṃ manam **karotīti** manasikārasāmañña vīthijavanapaṭipādake dasseti.

Sampayuttadhamme ārammaṇābhimukhaṃ sārento viya hotīti manasikāro **sāraṇalakkhaṇo** vutto. Satiyā asammussanavasena visayābhimukhabhāvapaccupaṭṭhānatā, manasikārassa pana saṃyojanavasena ārammaṇābhimukhabhāvapaccupaṭṭhānatīti ayametesam viseso. Ārammaṇapaṭipādakassa saṅkhārakkhandhapariyāpannatāvacaṇaṃ itaramanasikārānaṃ tadaññakkhandhapariyāpannatāmattaṃ jotetīti tathājotitaṃ taṃ viññāṇakkhandhe otāretvā dassetuṃ “**vīthipaṭipādako**”ti-ādi vuttaṃ.

474. **Tesu dhammesūti** yesu dhammesu sayam uppannā, tesu attanā sampayuttesu cittacetasikadhammesu. Anārammaṇattepi hi tesu samappavattesu udāsinabhāvato “**tatramajjhata**”ti vuccati. **Samavāhitalakkhaṇāti** samaṃ avisamaṃ yathāsakakiccesu pavattanalakkhaṇā. Udāsinabhāvena pavattamānāpi hesā sampayuttadhamme yathāsakakiccesu pavatteti yathā rājā tuṅhī nisinnopi attharakaṇe dhammaṭṭhe yathāsakakiccesu appamatte pavatteti. Alīnānuddhatapavattipaccayatā **ūnādhikatānivāraṇasā**, kiccavasena cetam vuttaṃ. Yadi evaṃ sahaṇādhīpatino kathanti? Tampi tassā kiccameva. Yaṃ sahaṇādhīpātibhāvoti, tassāpi tathāpavattanamevāti nāyaṃ doso. “Idaṃ nihīnakiccaṃ hotu, idaṃ atirekatarakiccaṃ”ti evaṃ pakkhapātasena viya pavatti **pakkhapāto**, taṃ upacchindantī viya hotīti adhippāyo.

“**Aniyatesu icchantī**”ti iminā cetasikantarabhāvena icchantīti dasseti. **Adosoyeva mettā**. Tathā hi soyeva “mettā mettāyanā”ti-ādinā¹ niddiṭṭho. **Upekkhāti** yaṃ upekkhaṃ mettāya saddhim parikappenti, sā **tatramajjhātupekkhāyeva**.

1. Abhi 1. 215 piṭṭhe.

475. **Kāyaduccaritādivatthūnanti** parapāṇaparadhanapara-itthi-ādīnaṃ. **Amaddanaṃ** maddanapaṭipakkhabhāvo. Kāyaduccaritādivatthuto saṅkocanakiriyāpadesena kāyaduccaritādito eva saṅkocanakiriyā vuttāti daṭṭhabbaṃ. Na hi viratiyo duccaritavatthuno **akiriyapaccupaṭṭhānā** yujjanti, atha kho duccaritassa, viratīnañca soraccavasena saṅkocanaṃ, akiriyānañca hirottappānaṃ jigucchanaḍivaseṇāti ayametesāṃ viseso.

476. **Saṅkhārā**ti saṅkhārakkhandhadhamme¹ sandhāyāha. Te hi idhādhippetā, aññathā aṭṭhatimsāti vattabbaṃ siyā. Yathā cittaṃ, evaṃ taṃsampayuttadhammāpi dutiye sasaṅkhārā evāti āha “**sasaṅkhārabhāvamattameva hettha viseso**”ti. **Avasesā** paṭhame vuttadhammā.

Avasesā pañcamena sampayogaṃ gacchantīti ettha kathaṃ karuṇāmuditā-upekkhāsahagata sambhavantīti? Pubbabhāgabhāvato. Appanāpattā eva hi karuṇāmuditā upekkhāsahagatā na honti, tato aññattha pana upekkhāsahagatāpi hontīti ācariyā.

Suvisuddhassa kāyakammādikassa cittasamādhānavasena rūpārūpāvacarakusalappavatti, na kāyakammādināṃ sodhanavasena, nāpi duccaritadurāḷivānaṃ samucchindanapaṭippassambhanavasena mahaggatacittuppādesu viratīnaṃ asambhavoyevāti āha “**ṭhapetvā viratittayan**”ti. **Tatoti** rūpāvacarapaṭhame vuttacetāsikato. **Teyevāti** rūpāvacarapañcame vuttacetāsikā eva, yadi evaṃ rūpāvacarato ko visesoti āha “**arūpāvacarabhāvoyeva hi ettha viseso**”ti.

Paṭhamajjhāniketi paṭhamajjhānavati. **Maggaviññāṇeti** catubbidhepi maggaviññāṇe vuttanayeneva veditabbāti sambandho. **Dutiyaḷjhānikā**dibhede **maggaviññāṇeti** ettha **ādi**-saddena tatiyacatutthapañcamajjhānikāni saṅgaṇhāti. “Vuttanayenā”ti vuttaṃ kiṃ avisesenāti codanāyane taṃ dassento “**karuṇāmuditānaṃ**”ti-ādīmāha. Tattha maggaviññāṇaṃ nibbānārammaṇattā, karuṇāmuditānañca sattārammaṇattā na tāsāṃ tattha sambhavo. Maggadhammesu ca pāḍakādinīyameṇa kadāci sammāsaṅkappaviraho

1. Saṅkhārakkhandhaṃ (Sī)

siyā, na pana virativiraho kāyaduccaritādīnaṃ samucchindanavaseneva ariyamaggassa pavattanatoti **niyataviratitā**.

478. Na **hiriya**ti na lajjatīti **ahiriko**, puggalo, cittaṃ, taṃsampayuttadhammasamudāyo vā. “Ahirikkan”ti vattabbe ekassa kakārassa lopaṃ katvā “**ahirika**”ti vuttaṃ. “Na ottappan”ti ottappassa paṭipakkhabhūtaṃ dhammamāha. **Ajjucchanam** ahīlanam. **Alajjā** aviriḷā¹. **Tehevā**ti kāyaduccaritādīhi eva. **Asārajjam** nibbhayaṭā. **Anuttāso** asam bhāmo. **Vuttapaṭipakkhavasena**ti alajjanākārena pāpānaṃ karaṇarasam ahirikaṃ, anuttāsākārena anottappaṃ, vuttappakāreneva pāpato asaṅkocanapaccupaṭṭhānāni attani, paresu ca agāravapadaṭṭhānāni. Gāmasūkarassa viya asucito kilesāsucito ajjucchanam ahirikena hoti, salabhassa viya aggito pāpato anuttāso anottappena hoṭīti evam vuttapaṭipakkhavasena vitthāro veditabbo.

479. **Lubbhanti tenā**ti-ādīsu yaṃ vattabbaṃ, taṃ heṭṭhā vuttanayānusārena veditabbaṃ. **Lubbhanti**ti abhigijjhanti. **Muyhanti**ti na bujjhanti. **Ārammaṇaggahaṇam** “mama idan”ti taṇhābhinivesavasena abhinivissa ārammaṇassa avissajjanaṃ, na ārammaṇakaraṇamattaṃ. **Abhisāṅgo** abhimukhabhāvena āsatti. **Apariccāgo** avijahanaṃ, dum mocanīyāṭā vā. **Assādadassanaṃ** assādadiṭṭhi. “Assādānupassino ca taṇhā pavaḍḍhatī”ti² hi vuttaṃ.

480. Dhammasabhāvassa yāthāvato adassanaṃ **cittassa andhabhāvo**. **Aññāṇam** ñāṇapaṭipakkho. Sampaṭivijjhitaṃ asamatthatā **asampaṭivedho**. Yathā ñāṇam ārammaṇasabhāvaṃ paṭivijjhitaṃ na labbhati, mohassa tathā pavatti **ārammaṇasabhāvacchādanam**. Asammāpaṭipattiṃ paccupaṭṭhapeti, sammāpaṭipattiyā paṭipakkhabhāvena gayhatīti vā **asammāpaṭipattipaccupaṭṭhāno**. Yassa uppajjati, tassa andhakaraṇam andhakāro, tathā paccupaṭṭhatīti **andhakārapaccupaṭṭhāno**.

481. **Micchā**ti dhammasabhāvassa viparītaṃ, niccāditoti attho. **Ayoniso abhiniveso** anupāyābhiniveso uppathābhiniveso.

1. Vrīḍā, lajjā-amarakosa 7. 23.

2. Saṃ 1. 311, 313, 315 piṭṭhesu.

Dhammasabhāvaṃ atikkamitvā parato āmasanaṃ **parāmāso**.
Viparītaggāhavasena “idameva saccaṃ, moghamaññaṃ”¹ abhinivisanaṃ
micchābhiniveso.

482. Yassa dhammassa vasena uddhataṃ hoti cittaṃ,
taṃsampayuttadhammā vā, so dhammo **uddhaccaṃ**. **Avūpasamoti**
asannisinna-appasannabhāvamāha. **Anavatṭhānaraṃsanti** calanakiccaṃ.
Bhantattanti paribbhamanākāraṃ. Cetaso **avūpasameti** nipphādetabbe
payojane bhummaṃ, avūpasamapaccayabhūtaṃ ārammaṇaṃ vā
“vūpasamo”² ti vuttaṃ. Akusaladhammānaṃ ekantanihīnatāya
“**akusalabhāvena ca lāmakattan**”³ ti vuttaṃ.

483. Thinamiddhamettha aniyataṃ, na mānādīti thinamiddhassa
aniyatatā ca ettha dutiyacitte paṭhamākusalato viseso.

Anussāhanāvasādanabhāvena saṃhatabhāvo thinam, tena yogato cittaṃ
thinam, tassa bhāvoti thinatā². Asamatthatāvighātavasena akammaññatā
middham. Yasmā tato eva tena sampayuttadhammā medhitā
vihatasāmatthiyā honti, tasmā “**middhanatā middhan**”³ ti vuttaṃ.
Anussāhalakkhaṇanti ussāhapaṭipakkhalakkhaṇaṃ. Vīriyassa avanodanaṃ
khipanaṃ **vīriyāvanodanaṃ**³. Sampayuttadhammānaṃ saṃsīdanaṃ kārēna
paccupaṭṭhanti, tesam vā saṃsīdanaṃ paccupaṭṭhanti
saṃsīdanapaccupaṭṭhānaṃ. **Akammaññatālakkaṇanti** ettha kāmam
thinampi akammaññasabhāvameva, taṃ pana cittaṃ, middham
vedanādikkhandhattayassāti ayamettha viseso. Tathā hi pāḷiyam “tatha
katamaṃthinam? Yā cittaṃ akallatā akammaññatā. Tattha katamaṃ
middham? Yā kāyassa akallatā akammaññatā”⁴ ca ādinā imesaṃ niddeso
pavatto. **Onahanaṃ**⁵ viññāḍadvārānaṃ pidahanaṃ. **Līnatā** līnakāro
ārammaṇaggahaṇe saṅkoco. Yasmā thinena cittaṃsaṃsīdanaṃ hoti,
middhena pana vedanādikkhandhattayassa viya rūpakāyassāpi, tasmā taṃ
pacalāyikāniddam paccupaṭṭhanti **pacalāyikāniddāpaccupaṭṭhānaṃ**
vuttaṃ. Arati pantasenāsanesu, adhikusaladhammesu ca arocānā.
Vijambhikā vijambhanasaṅkhātassa kāyaduṭṭhullassa kāraṇabhūtā
saṅkilesappavatti.

1. Ma 2. 150, 166, 381; Ma 3. 22, 23 piṭṭhādīsu.

3. Vīriyassa vinodanaṃ khipanaṃ vīriyavinodanaṃ (Sī)

5. Odahanaṃ (Syā, Ka)

2. Thinatā (Ka)

4. Abhi 1. 233 piṭṭhe.

Arati vijambhikādisūti ca **ādi**-saddena tandi-ādīnaṃ gahaṇaṃ.
Nippādetabbe payojane cetāṃ bhummavacanaṃ.

Avasesā soḷasa. Māno panettha aniyato hoti, tena saddhīṃ sattaraseva honti. Paṭṭhāne hi “saññojanaṃ dhammaṃ paṭicca saññojano dhammo uppajjati hetupaccayā”¹ ettha catukkhattum kāmārāgena, tikkhattum paṭighena ca māno vicikicchā bhavarāgoti tayopete sakadāgāmino saṃyojanānaṃ saṃyojanehi dasavidhā yojanāti dassitāya dasavidhāya yojanāya “kāmārāgasaññojanaṃ paṭicca mānasaññojanaṃ avijjāsaññojanaṃ”¹ vatvā “kāmārāgasaññojanaṃ paṭicca avijjāsaññojanaṃ”¹ tathā “mānasaññojanaṃ paṭicca bhavarā gasaññojanaṃ avijjāsaññojanaṃ”¹ vatvā “bhavarāgasaññojanaṃ paṭicca avijjāsaññojanaṃ”¹ ca evamāgatāhi yojanāhi mānassa aniyatabhāvo pakāsīto. Yadi hi māno niyato siyā, kāmārāgassa mānarahitā pavattī na siyā, tathā bhavarāgassa. Evaṃ sati paṭṭhāne catukkhattum kāmārāgena yojanā na siyā, tikkhattumyeva siyā. Bhavarāgamūlikā ca na siyā. Evañca saṃyojanānaṃ saṃyojanehi aṭṭhavidhena yojanā siyā, na dasavidhena. Dasavidhāva ca dassitā². Seyyādivasena uccato namanāṃ **unnati**. Unnamanavaseneva **sampaggaharaso**. Na vīriyaṃ viya taṃtaṃkiccasādhane abbhussahanavasena. Omānassāpi attānaṃ avaṃ katvā gahaṇampi sampaggahaṇavasenevāti daṭṭhabbaṃ. Ketu vuccati accuggatadhajo, idha pana ketu viyāti ketu, uḷāratamādibhāvo. Taṃ ketubhāvasaṅkhātāṃ ketum kāmētī³ ketukamyāṃ, cittaṃ. Yassa dhammassa vasena ketukamyāṃ, sā **ketukamyatā**. “Ahan”¹ti pavattanato mānassa ditṭhisadisī pavattīti so ditṭhiyā saddhīṃ ekacittuppāde na pavattati, attasinehasannissayo cāti āha “**ditṭhivippayuttalobhapadaṭṭhāno**”¹ti.

Etthāpi cāti ca-saddena thinamiddhaṃ ākaḍḍhati.

485. **Dussantīti** byāpajjanti. **Caṇḍikkarā** kujjhanāṃ. Attano pavattī-ākāravasena, virūpasāmsappanaka-aniṭṭharūpasamuṭṭhāpanavasena ca **visappanaraso**.

1. Abhi 10. 209 piṭṭhe Paṭṭhāne.

2. Dasavidhā ca dassitāti (Sī, Syā)

3. Kamyatīti (Sī, Syā), kammātīti (Ka)

Kāyassa vijjhatabhāvāpādanato¹ **attano nissayadahanaraso**. Dussanaṃ attano, parassa ca upabhogaphalakālesu² aniṭṭhattā **visasāmsaṭṭhapūtimuttaṃ viya daṭṭhabboti** sabbena sabbaṃ aggaḥetabbataṃ dasseti.

486. Yaṃ parasampattīsu issākaraṇaṃ, sā issāti dassento āha “**issāyanā issā**”ti. **Usūyanaṃ** asahanaṃ. **Tatthevāti** parasampattīsu eva. Abhiratiṭṭhapakkhabhūtaṃ issāya kiccaṃ, na abhiratiyā abhāvamattanti āha “**anabhiratirasā**”ti.

487. Maccharayogena “maccharī”ti pavattamānaṃ maccharisaddaṃ gaḥetvā āha “**maccharabhāvo macchariyan**”ti. Niruttinayena pana mā idaṃ acchariyaṃ aññesaṃ hotu, mayhameva hotūti macchariyanti porāṇā. Taṃ macchariyaṃ vuccamānāni lakkhaṇādīni pariyādāya tiṭṭhati. **San̄kocanapaccupaṭṭhānanti** attasampattīnaṃ parehi asādhāraṇabhāvakarāṇena san̄kocanapaccupaṭṭhānaṃ. Kaṭukākāragati **kaṭukañcukatā. Attasampatti** āvāsādi.

488. **Kukatanti** ettha akatampi kukatameva. Evañhi vattāro honti “yaṃ mayā na kataṃ, taṃ kukatan”ti. Tathā hi vakkhati “katākatānusocanarasaṃ”ti. Evaṃ katākataṃ duccharitaṃ, sucaritañca kukataṃ, taṃ ārabha vipaṭṭisārasena pavattaṃ pana cittaṃ taṃsahacaritatāya idha “kukatan”ti gaḥetvā “**tassa bhāvo kukkucan**”ti vuttanti daṭṭhabbaṃ. Pacchā anutāpanaṃ vibādhanāṃ pacchānutāpo. Yathāpavattassa katākatākāraṇaviṭṭhassa duccharitasucaritassa anusocanavasena virūpaṃ paṭisaraṇaṃ vipaṭṭisāro. Parāyattatāhetutāya **dāsabyamiva daṭṭhabbaṃ**. Yathā hi dāsabye sati dāso parāyatto hoti, evaṃ kukkucce sati taṃsamaṅgī. Na hi so attano dhammātāya kusale pavattitum sakkoti. Atha vā katākatā kusalakusalānusocane āyattatāya, tadubhayavasena kukkuccena taṃsamaṅgī hotīti taṃ dāsabyaṃ viya hotīti.

Aniyatesu issādīsū **thinamiddhasambhavova** cāti³ **ca**-saddaṃ ānetvā sambandhitabbaṃ.

1. Majjhatabhāvāpādanato (Sī), micchatabhāvāpādanato (Ka)

2. Upayogaphalakālesu (Sī, Syā)

3. Thinamiddhasambhavo cāti (Sī, Syā)

490. **Pavattiṭṭhitimatto**ti khaṇaṭṭhitimatto. “Nivāte dīpaccīnaṃ ṭhiti viyā”ti hi evaṃ vuttacittaṭṭhiti viya santānaṭṭhitiyā paccayo bhavitum asamatto nicchayābhāvena asaṇṭhahanato cetaso pavattipaccayamattatāya pavattiṭṭhitimatto. Tenāha “**dubbalo samādhi**”ti. **Vigatācīkicchāti** cīkicchitum dukkaratāya vuttam, na sabbathā vicīkicchāya cīkicchābhāvatoti tadatthamattam dasseti. “Evaṃ nu kho, nanu kho”ti-ādinā samsappanavasena setīti **samsayo**. **Kampanarasāti** nānārammaṇe cittassa kampanakiccā. Uddhaccañhi attanā gahitākāre eva ṭhatvā bhamaṭīti¹ ekārammaṇasmimyeva vipphandanavasena pavattati. Vicīkicchā pana yadipi rūpādīsu ekasmimyeva ārammaṇe uppajjati, tathāpi “evaṃ nu kho, nanu kho, idaṃ nu kho, aññaṃ nu kho”ti aññaṃ gahetabbākāraṃ apekkhatīti nānārammaṇe kampanam hotīti. Anicchayam dveḷhakaṃ paccupaṭṭhapetīti **anicchayapaccupaṭṭhānā**. Anekaṃsassa ārammaṇe nānāsabhāvassa gahaṇākārena paccupaṭṭhatīti **anekaṃsagāhapaccupaṭṭhānā**.

491. **Sattārammaṇattāti** sattapaññatti-ārammaṇattā. Nanu ca paññatti-ārammaṇāpi vipākā hontīti codanam sandhāyāha “**ekantaparittārammaṇā hi kāmāvacaravipākā**”ti. **Viratīyopi vipākesu na santīti** etthāpi nanu kesuci vipākesu viratīyopi santīti codanam manasi katvā āha “**pañca sikkhāpadā kusalāyevāti hi vuttan**”ti, tena lokiyavipākesu viratīyo na santīti dasseti.

Tesanti rūpāvacarādivipākaviññāṇānam. Janetabbajanakasambandhe hi idaṃ sāmivacanam.

492. **Teti te** ahētukakiriyasaṅkhārā. Tattha kusalavipākamanodhātusampayuttehi samānā ahētukakiriyamanodhātusampayuttā, somanassasahagatasantīraṇasampayuttehi samānā hasituppādasampayuttā, upekkhāsahagatasantīraṇasampayuttehi samānā voṭṭhabbanasampayuttāti imamattham dassentena “**kusala -pa- samānā**”ti vatvā tato labbhamānamvisesam dassetum “**manoviññādhātudvaye panā**”ti-ādi vuttam. **Vīriyasabbhāvato balappatto samādhi hoti** “vīriyanta balan”ti katvā.

1. Gaṇhatīti (Syā)

Samucchedaviratīhi eva arahantānaṃ viramanakiccassa niṭṭhitattā kiriyacittesu viratiyo na santīti āha “**ṭhapetvā viratiyo**”ti. Kāmāvacarasahetukakiriyasaṅkhārānaṃ kāmāvacarakusalehi viratikato viseso atthi, mahaggatesu pana tādīsopi natthīti āha “**sabbākārenapī**”ti, dhammato, ārammaṇato, pavatti-ākāratoti sabbapakārenapīti attho.

Iti saṅkhārakkhandhe vitthārakathāmukhavaṇṇanā.

Atītādivibhāgakathāvaṇṇanā

Abhidhammantogadhampī suttantabhājanīyaṃ suttantanayo eva, ekanta-abhidhammanayo pana abhidhammabhājanīyanti āha “**abhidhamme padabhājanīyanayenā**”ti.

493. Bhagavato pana evaṃ khandhā vitthāritāti sambandho. Tasmā imāyapi pāḷiyā vasena khandhānaṃ saṃvaṇṇanaṃ karissāmāti adhippāyo. **Yaṃ kiñcīti** ettha yanti sāmāññena aniyamadassanaṃ. **Kiñcīti** pakārabhedanā āmasitvā aniyamadassanaṃ. Ubhayenāpi atītaṃ vā -pasantike vā appaṃ vā bahum vā yādisaṃ vā tādīsaṃ vā napuṃsakaniddesārahaṃ sabbaṃ byāpetvā gaṇhātīti āha “**anavasesapariyādānaṃ**”ti. Evaṃ pana aññesupi napuṃsakaniddesārahesu pasaṅgaṃ disvā tattha adhippetatthaṃ aticca pavattanato atippasaṅgassa niyamanatthaṃ rūpanti vuttanti dassento “**rūpanti atippasaṅganiyamanānaṃ**”ti āha. **Yaṃ kiñcīti** ca **yaṃ**-saddaṃ ekaṃ padaṃ, sanipātaṃ **kiṃ**-saddaṃ ekaṃ padanti gahetvā aniyamekatthadīpanato “**padadvayenāpi**”ti vuttaṃ. **Assāti** rūpassa. **Atītādinā vibhāgaṃ ārabhati** atītānāgatapaccuppannanti-ādinā.

494. **Addhāsantatisamayakhaṇavasenā**ti ettha cutipaṭisandhiparicchinnekāle **addhā**-saddo vattatīti “ahosiṃnu kho ahamatītamaddhānaṃ”ti-ādisutta¹ vasenā viññāyati. Tathā hi **bhaddetarattasuttepi** “atītaṃ nānvāgameyyā”ti-ādinā addhāvaseneva atītādivibhāvo vutto.

1. Ma 1. 10; Saṃ 1. 265 piṭṭhādīsu.

2. Ma 3. 226, 227, 229, 230 piṭṭhādīsu.

“Tayome bhikkhave addhā, katame tayo? Atīto addhā anāgato addhā paccuppanno addhā”¹ ti¹ pana paramatthato paricchijjamāno addhā **niruttipathasutta**vasena khaṇaparicchinno vutto². Tattha hi “yaṃ bhikkhave rūpaṃ jātaṃ -pa- pātubhūtaṃ. Atthīti tassa saṅkhā”³ ti³ vijjamānassa paccuppannatā, tato pubbe, pacchā ca atītānāgatatā vuttā. Tadaññasuttesu pana yebhuyyena cutipaṭisandhiparicchinno atītādiko addhā vuttoti so eva idhāpi “addhāvasenā” ti vutto.

Sītaṃ sītaṃ sabhāgo, tathā uṇhaṃ uṇhassa. Yaṃ pana sītaṃ, uṇhaṃ vā sarīre sannipatitaṃ santānavasena pavattamānaṃ anūnaṃ anadhikaṃ ekākāraṃ, taṃ eko utūti vuccatīti sabhāga-utuno anekattā **eka**-ggahaṇaṃ kataṃ, evaṃ āhārepi. **Ekavīthi-ekajavanasaṃmuṭṭhānanti** pañcachaṭṭhadvārasena vuttaṃ. Santatisamayakathā vipassakānaṃ upakāratthāya aṭṭhakathāsu kathitā. Janako hetu, upathambhako paccayo, tesāṃ uppādanaṃ, upatthambhanañca kiccaṃ. Yathā bījassa aṅkuruppādanaṃ, pathavī-ādīnañca tadupatthambhanaṃ, kammaṃ kaṭattārūpavipākuppādanaṃ, āhārādīnaṃ tadupatthambhanaṃ, evaṃ ekekassa kalāpassa, cittuppādassa ca janakānaṃ kammānantarādīpaccayabhūtānaṃ, upatthambhakānañca saha-jātapure-jātapacchājātānaṃ kiccaṃ yathāsambhavaṃ yojetabbaṃ. Evaṃ utu-ādīnaṃ sabhāgavisabhāgatāsambhavato taṃsamuṭṭhānānaṃ rūpānaṃ santativasena atītādivibhāgo vutto, kammaṃ pana ekabhavanibbattakassa sabhāgavisabhāgatā natthīti taṃsamuṭṭhānānaṃ rūpānaṃ santativasena atītādivibhāgaṃ avatvā upatthambhakavaseneva vutto. Yadā pana liṅgaparivattanaṃ hoti, tadā balavatā akusalena purisaliṅgaṃ antaradhāyati, dubbalena kusalena itthiliṅgaṃ pātubhavati. Dubbalena ca akusalena itthiliṅgaṃ antaradhāyati, balavatā kusalena purisaliṅgaṃ pātubhavatīti kammasamuṭṭhānarūpānaṃ pi attheva visabhāgatāti tesampi santativasena atītādivibhāgo sambhavati, so pana na sabbakālikoti na gahito.

Taṃtaṃsamayanti ekamuhuttādiko so so samayo etassāti taṃtaṃsamayaṃ, rūpaṃ, taṃtaṃsamayavantanti attho.

1. Dī 3. 181; Khu 1. 232 piṭṭhesu. 2. Yutto (Ka) Mūlaṭṭikā. 3. Saṃ 2. 59 piṭṭhe.

Tato pubbeti tato khaṇattayassa pariyāpattito pubbe. Anuppannattā **anāgataṃ**. **Pacchāti** tato pacchā. Khaṇattayaṃ atikkantattā **atītaṃ**. Yassa hetukiccaṃ, paccayakiccaṃca niṭṭhitattā atikkantaṃ, taṃ **atītaṃ** uppādakkhaṇe hetukiccaṃ, uppannaphalattā niṭṭhitañcāti daṭṭhabbaṃ. Tīsupi khaṇesu paccayakiccaṃ. Pathavī-ādīnaṃ sandhāraṇādikaṃ, phassādīnaṃ phusanādikaṃca attano kiccaṃ sakiccaṃ, sakiccassa karaṇakkhaṇo **sakiccakkhaṇo**, saha vā kiccena sakiccaṃ, yasmim khaṇe sakiccaṃ rūpaṃ vā arūpaṃ vā hoti, so **sakiccakkhaṇo**, tasmimkhaṇe paccuppannaṃ. Ettha ca khaṇādīkathāyaṃ “**tato pubbe anāgataṃ, pacchā atītaṃ**”ti vacanaṃ addhādīsu viya bhedaḥbhāvato nippariyāyaṃ. Addhādivasena hi aññeva dhammā atīta aññe anāgatā aññe paccuppannā labbhanti, khaṇādivasena pana natthi dhammato bhedo, kālato eva bhedo. Uppādato pubbe anāgato, khaṇattaye vattamāno, tato paraṃ atītoti nippariyāyā, addhāpaccuppannādi viya kenaci pariyāyena atītamanāgatanti ca vattabbaḥbhāvato.

495. Heṭṭhā vuttaṃ ajjhattikabāhirabhedam sandhāya “**vuttanayo evā**”ti vatvā tena aparitussamānena yadipi tattha ajjhattameva-ajjhattikanti saddattho labbhati, tathāpi attheva ajjhatta-ajjhattikasaddānaṃ, bahiddhābāhirasaddānaṃca aññamaññaṃ atthabhedo. Tathā hi ajjhattikasaddo sapaasantānikesu cakkhādīsu rūpādīsu bāhirasaddo viya pavattati, ajjhattasaddo pana tassa tassa sattassa sasantānikesveva cakkhurūpādīsu tato aññesu bahiddhāsaddo viya pavattati. Tasmā tamatthaṃ dassetuṃ “**apicā**”ti-ādi vuttaṃ. Tattha **idhāti** imasmim suttantanaye. Niyakajjhattampi na pubbe vutta-ajjhattikameva, parapuggalikampi na pubbe vuttabāhiramevāti adhippāyo.

496. Hīnapaṇītabhedo pariyāyato, nippariyāyato ca veditabboti sambandho. **Tadeva** sudassīnaṃ rūpaṃ. **Yatthāti** yasmim ārammaṇabhūte. Yaṃ ārammaṇaṃ katvā akusalavipākaviññānaṃ uppajjati, taṃ hīnaṃ anitṭhabhāvato. Yaṃ **kusalavipākam**, taṃ **paṇītam** itṭhabhāvato. Yathā hi akusalavipāko sayam anitṭho anitṭhe eva uppajjati, na itṭhe, evam kusalavipākopi sayam itṭho itṭhe eva uppajjati, na anitṭhe. Tathā hi vuttaṃ **aṭṭhakathāyaṃ**—

“Akusalakkammajivasena aniṭṭhā pañca kāmaguṇā vibhattā,
kusalakammajaṃ pana aniṭṭhaṃ nāma natthi, sabbaṃ iṭṭhameva.
Kusalakammajivasena iṭṭhā pañca kāmaguṇā vibhattā.
Kusalakammajañhi aniṭṭhaṃ nāma natthi, sabbaṃ iṭṭhamevā”¹ ti ca.

Tattha manāpānīpi kānici hatthirūpādīni akusalakammaṇibhattāni santi,
na pana tāni tesāmyeva hatthi-ādīnaṃ sukhassa hetubhāvaṃ gacchanti.
Tassa tasseva hi sattassa attanā katena kusalena nibbattaṃ sukhassa paccayo
hoti, akusalena nibbattaṃ dukkhassa. Tasmā kammajānaṃ iṭṭhāniṭṭhatā
kammakāraṇasattassa vasena yojanārahā siyā. Tattha yaṃ vuttaṃ
“kusalakammajaṃ aniṭṭhaṃ nāma natthi”² ti, na ca vuttaṃ
“akusalakammajaṃ iṭṭhaṃ nāma natthi”² ti, tena akusalakammajampi
sobhanaṃ parasattānaṃ iṭṭhaṃ atthīti anuññātaṃ bhavissati,
kusalakammajaṃ pana sabbesaṃ iṭṭhamevāti.

Tiracchānagatānaṃ pana kesañci manussarūpaṃ amanāpaṃ, yato te
disvāva palāyanti, manussā ca devatārūpaṃ passivā bhāyanti, tesampi
vipākaviññānaṃ taṃ rūpaṃ ārabba kusalavipākameva uppajjati, tādisassa
pana puññassa abhāvā na tesāṃ tattha abhirati hoti. Kusalakammajassa pana
aniṭṭhassa abhāvo viya akusalakammajassa ca iṭṭhassa abhāvo vattabbo.
Hatthi-ādīnampi hi akusalakammajaṃ manussānaṃ akusalavipākasseva
ārammaṇaṃ, kusalakammajaṃ pana pavatte samuṭṭhitaṃ kusalavipākassa.
Iṭṭhārammaṇena pana vomissakattā appakaṃ akusalakammajaṃ bahulaṃ
akusalavipākuppattiyā kāraṇaṃ na bhavissatīti sakkā viññāturaṃ, vipākaṃ
pana na sakkā vañcetunti vipākavasena iṭṭhāniṭṭhārammaṇavavattānaṃ
suṭṭhu yujjati. Yaṃ pana vuttaṃ “aniṭṭhā pañca kāmaguṇā”² ti, taṃ
rūpādibhāvasāmaññato kāmaguṇasadisatāya taṃsadesesu tabbohārena
vuttaṃ. Iṭṭhāneva hi rūpādīni “kāmaguṇā”² ti pāḷiyam² vuttāni.
Kāmaguṇavisabhāgā vā rūpādayo kāmaguṇā”² ti vuttā asive sivoti vohāro
viya, sabbāni vā iṭṭhāniṭṭhāni rūpādīni taṃhāvattathubhāvato kāmaguṇā eva.
Vuttañhi “rūpā loke piyarūpaṃ satarūpaṃ”³ ti-ādi³. Atisayena pana
kamaṇiyattā suttesu² kāmaguṇāti iṭṭharūpādīni vuttāni.

1. Abhi-Ṭṭha 2. 8 piṭṭhe.

2. Ma 1. 119, 127, 230; Ma 2. 117, 223; Ma 3. 41, 155; Saṃ 3. 18 piṭṭhādīsu.

3. Dī 2. 246; Ma 1. 85 piṭṭhesu.

Vuttanayamevāti atidesena lakkhaṇāto dūrasantikam dassitanti āha “**okāsatopettha upādāyupādāya dūrasantikātā veditabbā**”ti. Tattha kittakato paṭṭhāya rūpaṃ okāsavasena santike nāma, kittakato pana paṭṭhāya dūre nāma? Pakatikathāya kathentānaṃ dvādasa hatthā savanūpacāro nāma, tassa orato santike, parato dūre. Tattha sukhumarūpaṃ dūre hantaṃ lakkhaṇatopi okāsatopi dūre hoti, santike hontaṃ pana okāsatova santike hoti, na lakkhaṇato. Oḷārikarūpaṃ santike hontaṃ lakkhaṇatopi okāsatopi santike hoti, dūre hontaṃ okāsatova hoti, na lakkhaṇato. “Upādāyupādāyā”ti pana vuttattā attano rūpaṃ santike nāma, antokucchigatassāpi parassa dūre. Antokucchigatassa santike, bahi ṭhitassa dūreti evaṃ antogabbhapamukhapariveṇasaṃghārāmasīmāgāmakhettajanapadarajjasamu ddacakkavāḷesu tadantogatabahigatānaṃ vasena dūrasantikātā veditabbā.

497. **Tadekajjhanti** taṃ ekajjhaṃ ekato. **Abhisamyūhitvāti** saṃharitvā samūhaṃ vā katvā. **Abhisankhipitvāti** sankhipitvā sankhepaṃ katvā. “**Sabbampi rūpaṃ -pa- dassitaṃ hotī**”ti iminā rupakhandhasaddānaṃ samānādhikaraṇasamāsabhāvaṃ dasseti. Tenevāha “**na hi rūpato añño rūpakkhandho nāma atthī**”ti.

498. Rāsibhāvūpagamanena vedanākkhandhādayoti dassitā hontīti ānetvā sambandhitabbaṃ.

Santativasena, khaṇādivasena cāti ettha addhāsamayavasena atītādivibhāgassa avacanaṃ sukhādivasena bhinnāya atītādibhāvavacanato. Na hi sukhā eva addhāvasena, samayavasena ca atītādikā hoti, tathā dukkhā eva, adukkhamasukhā eva ca kāyikacetāsikādibhāvena bhinnā, tena vedanāsamudāyo addhāsamayavasena atītādibhāvena vattabbataṃ arahati samudāyassa tehi paricchinditabbattā, vedanākadesā pana gayhamānā santatikhaṇehi paricchedaṃ arahanti tathā paricchinditvā gahetabbato. Ekasantatiyaṃ pana sukhādīsu anekabhedabhinnesu yo bhedo paricchinditabbabhāvena gahito, tassa

ekappakārassa pākaṭassa paricchedikā taṃsahitadvārāmbanappavattā, avicchedena taduppādakekavidhavisayasamāyogappavattā ca santati bhavitum arahatīti tassā bhedantaram anāmasitvā paricchedakabhāvena gahaṇam kataṃ, lahuparivattino vā arūpadhammā parivattaneneva paricchedena paricchindanam arahantīti santatikhaṇavaseneva paricchedo vutto. Ekavidhavisayasamāyogappavattā divasampi buddharūpaṃ passantassa, dhammaṃ suṇantassa pavattasaddhādisahitavedanā **paccuppannā. “Pubbantāparantamajjhataḡatā”**ti etena hetupaccayakiccavasena vuttanayaṃ dasseti.

499. Sabyāpārasa-ussāhasavipākatā kusalādīhi tīhipi sādharāṇāti asādharāṇameva dassetuṃ **“sāvajjakiriyahetuto”**ti-ādi vuttaṃ. Tattha **sāvajjakiriyahetuto**ti pāṇātipātādigārayhakiriyānimittato. **Kilesasantāpabhāvato**ti kilesapariḷāhena sadarathabhāvato. Vūpasantasabhāvāya kusalāya vedanāya **oḷārikā. Sabyāpāratoti** sa-īhato. Tena yathā pavattamānāya’sā vipākena bhavitabbaṃ, tathā pavattim vadanto vipākuppādanayogyatamāha. **Sa-ussāhatoti** sasattito, tena vipākuppādanasamatthatam. **Savipākatoti** vipākasabbhāvato, tena paccayantarasamavāyena’sā vipākanibbattanam. Tīhipi padehi vipākadhammatāmyeva dasseti. Kāyakammādibyāpārasabbhāvato vā **sabyāpārato**, javanussāhasasena **sa-ussāhato**, vipākuppādanasamatthatāvasena **savipākatoti** evamettha attho vedītabbo. Vipākaṃ anuppādentīpi kiriyā kusalā viya sabyāpārā, sa-ussāhā eva ca hotīti tadubhayaṃ anāmasitvā kiriyābyākatavāre **“savipākato”**icceva vuttaṃ. **Sabyābajjhato**¹ti kilesadukkhena sadukkhato. **Vuttavipariyāyatoti** anavajjakiriyahetuto, kilesasantāpabhāvato, abyābajjhato¹ ca vūpasantavuttīti evaṃ akusalāya vuttavipallāsato. **Yathāyoganti** yogānurūpaṃ. Tīsu kāraṇesu yaṃ yaṃ yassā yassā yujjati, tadanurūpanti attho. Kusalākusalavedanāhi vipākabyākatāya tīhipi kāraṇehi **oḷārikā**. Kiriyābyākatāya savipākato, savipākatāvisiṭṭhasabyāpārasa-ussāhato vāti. **Vuttapariyāyenāti** vipākabyākatā

1. Sabyāpajjhato (Sī, Syā)

abyāpārato, anussāhato, avipākato ca tāhi kusalākusalavedanāti sukhumā. Kiriyābyākatā avipākato, avipākatā visiṭṭhasabyāpārāsa-ussāhato vāti evaṃ kusalākusalāya vuttavipallāsenā. Kammavegakkhittā, hi kammaṭṭibimbabhūtā ca kāyakammādibyāpāravirahato nirussāhā vipākā. Sa-ussāhā ca kiriyā avipākadhammā. Savipākadhammā hi sagabbhā viya oḷārikāti.

500. **Nirassādatoti** assādābhāvato sukhaṭṭikkhepatō. **Savipphāratoti** saparipphandato, anupasantatoti attho. **Abhibhavanatoti** ajjhottharaṇato. Sukhāya majjhattatā natthi, upekkhāya sātātā. Santatādayo pana sabbattha sukhupekkhāsu labbhantīti “**yathāyogan**”ti vuttam. **Pākaṭatoti** sukhito dukkhitoti disvāpi jānitabbatā vibhūtabhāvato. **Sā**¹ adukkhamasukhā vedanā.

501. **Asamāpannasamāpannaggahaṇena** cettā bhūmivasenāpi vedanānaṃ oḷārikasukhumatā vuttāti veditabbā. **Itarā** samāpannassa vedanā.

Oghaniyatoti ogehi ārammaṇaṃ katvā atikkamitabbato. Tathā **yoganiyato, ganthaniyato cāti** etthāpi ganthova ganthanaṃ, tassa hitaṃ ārammaṇabhāvena sambandhanatoti **ganthaniyaṃ**. Evaṃ **nīvaraṇiyaṃ, upādāniyaṇca** veditabbam. Saṃkilese niyuttā, saṃkilesaṃ vā arahantīti **saṃkilesikā**. Sā anāsavā.

502. **Tatthāti** yathāvuttāya oḷārikasukhumatāya. **Sambhedoti** saṅkaro. “Oḷārikā, sukhumā”ti ca vuttānampi jāti-ādivasena puna sukhumoḷārikabhāvāpattidoso yathā na hoti, tathā **pariharitabbo**. Jātivasena sukhumāya vedanāya sabhāvapuggalalokiyavasena oḷārikatāṃ pāḷivasena dassetuṃ “**vuttañhetan**”ti-ādi vuttam. Evaṃ sukhādayopīti etthā akusalā vedanā **jātivasena oḷārikā, sabhāvavasena sukhumā**. Kusalajjhānasahagatā sukhā vedanā jātivasena oḷārikā, samāpannassa vedanāti katvā puggalavasena sukhumāti evamādinā yojetabbā. “**Na parāmasitabbo**”ti etena

jāti-ādayo cattāro koṭṭhāsā aññamaññaṃ avomissakā eva gahetabbā. Evaṃ sambhedassa parihāro, na aññathāti dasseti. Yathā abyākatamukhena, evaṃ kusalākusalamukhenapi, yathā ca jātimukhena, evaṃ sabhāvādimukhenapi dassetabbanti imamattamaṃ **“esa nayo sabbatthā”**ti atidisati.

Idāni jāti-ādikoṭṭhāsesupi mitho akusalādīnaṃ upādāyupādāya oḷārikasukhumataṃ dassetum **“apicā”**ti-ādi āradhmaṃ. **“Nissayadahanato”**ti iminā dosasahagatāya pākaṭaṃ kurūrappavattim dasseti. **Niyatā**ti micchattaniyāmena niyatā, ānantariyabhāvappattā kappatiṭṭhanakavipākatāya **kappatṭhitikā** devadattādīnaṃ viya. **Asaṅkhārikā** sabhāvatichiṇatāya **oḷārikā**. **Diṭṭhisampayuttā** mahāsāvajjatāya **oḷārikā**. Sāpi diṭṭhisampayuttā **niyatā oḷārikā**, tato **kappatṭhitikā**, tato **asaṅkhārikā**ti tividhāpi heṭṭhā vuttanayattā ekajjhaṃ vuttā visum vusumyeva yojetabbā. Tenāha **“itarā sukhumā”**ti. **Avisesenā**ti dosasahagatā, lobhasahagatāti abhedena. **Akusalā bahuvipākā** dosussannatāya **oḷārikā**. Tathā **kusalā appavipākā**. Mandadosattā akusalā **appavipākā sukhumā**. Tathā **kusalā bahuvipākā**.

Oḷārikasukhumanikantivatthubhāvato kāmāvacarādīnaṃ oḷārikasukhumatā, lokuttarā pana ekantasukhumāva. Tatthāpi ca vibhāgaṃ parato vakkhati. **Bhāvanāmayāpī**ti bhāvanāmayāya bhedanena dānasīlamayānampi bhedanaṃ nayato dassitanti veditabbaṃ. Bhāvanāya paṇḍalavakālādīsu kadāci ñāṇavippayuttacittenapi manasikāro hotīti vuttam **“bhāvanāmayāpi duhetukā”**ti. **Tam tambhūmivipākakiriyāvedanāsūti** ettha **“kāmāvacaravipākā oḷārikā, rūpāvacarā sukhumā”**ti-ādinā yāva arahattaphalā netabbaṃ. **“Kāmāvacarakiriyā oḷārikā, rūpāvacarakiriyā sukhumā”**ti-ādinā kāmāvacarā ca **“dānākārappavattā oḷārikā,** sīlākārappavattā sukhumā”ti-ādinā yāva nevasaññānāsaññāyatanā netabbaṃ. Yathā ca jātikoṭṭhāse ayaṃ vibhāgo, evaṃ sabhāvakoṭṭhāsādīsūpīti dassetum **“dukkhādī”**ti-ādi vuttam

Sabbo cāyaṃ vibhāgo lakkhaṇasannissito vuttoti katvā āha “okāsavasena cāpī”ti-ādi. **Sukhāpīti pi**-saddena adukkhamasukhaṃ sampiṇḍeti. **Sabbatthāti** sabbāsu bhūmīsu. **Yathānurūpanti** yā yā vedanā yattha yattha labbhati, tadanurūpaṃ. **Vatthuvasenāti** yaṃ vatthum ārabbhavedanā pavattati, tassa vasenāpi. **Hīnavatthukāti** hīnaṃ vatthum ārammaṇaṃ katvā kaṅgubhattaṃ bhuñjantassa vedanā hīnavatthukatāya oḷārikā. Sālimānsodanaṃ bhuñjantassa paṇītavatthukatāya **sukhumāti**.

503. **Ādinā nayanāti** sabbaṃ pāligatiṃ āmasati. Jāti-ādivasena asamānakoṭṭhāsata **visabhāgatā**. Dukkhavipākatādivasena asadisakiccatā **asamsaṭṭhatā**, na asampayogo. Yadi siyā, dūravipariyāyena santikaṃ hotīti samsaṭṭhatā santikatā āpajjati, na ca vedanāya vedanāsampayogo atthi. Santikapadavaṇṇanāya ca “sabhāgato ca sarikkhato cā”ti vakkhatīti vuttanayeneva attho veditabbo. Asadisasabhāvatā **asarikkhatā**. **Sabbavāresūti** oḷārikasukhumabhede vuttanayānusārena vattabbesu sabbesu vāresu. Jāti-ādivasena samānakoṭṭhāsata **sabhāgatā**, dukkhavipākatādivasena pana sadisasabhāvatā **sarikkhatā**. Tenāha “akusalā pana -pa- santike”ti.

Iti vedanākkhandhassa atītādivibhāge vitthārakathāmukhavaṇṇanā.

Kamādivinicchayakathāvaṇṇanā

504. **Etanti** evaṃ atītādivibhāge vitthārakathāmukhaṃ. **Ñāṇabhedatthanti** nānappakāraṃ ñāṇappabhedatthaṃ. **Kamatoti** desanākkamato¹, yena kāraṇenāyaṃ desanākkamo kato, tatoti attho. **Visesatoti** bhedato, khandhupādānakkhandhavibhāgatoti attho. **Anūnādhikatoti** pañcabhāvato. **Upamātoti** upamāhi upametabbato. **Daṭṭhabbato dvidhāti** dvīhi ākārehi ñāṇena passitabbato.

1. Desanānukkamato (Sī, Syā)

Passantassa'thasiddhitoti yathā passantassa yathādhippetatthanipphattito.
Vibhāvināti paññavatā.

Uppattikkamoti yathāpaccayaṃ uppajjantānaṃ uppajjanapaṭipāṭi.
“Dassanenapahātabbā”ti-ādinā¹ paṭhamam pahātabbā paṭhamam vuttā,
dutiyaṃ pahātabbā dutiyaṃ vuttāti ayam **pahānakkamo**. Sīlavisuddhiṃ
paṭipajja cittavisuddhi paṭipajjitabbā, tathā tato parāpīti āha “**sīlavisuddhi**
-pa- paṭipattikkamo”ti, anupubbapaṇītā bhūmiyo anupubbena vavatthitāti
ayam **bhūmikkamo**. “Cattāro satipaṭṭhānā”ti-ādiko² ekakkhaṇepi
satipaṭṭhānādisambhavato **desanākkamo ca**. Dānakathādayo
anupubbukkamsato kathitā, uppatti-ādivavatthānābhāvato pana dānādīnaṃ
idha desanākkamavacanāṃ. Uppatti-ādivavatthānahetukatāya hi “paṭhamam
kalalam hoti”ti-ādika³ desanāpi samānā uppatti-ādikamabhāveneva vuttā.
Yathāvuttavavatthānābhāvena pana anekesaṃ vacanānaṃ sahapavattiyā
asambhavato yena kenaci pubbāpariyena desetabbatāya tena tena
adhippāyena desanāmetasseva kamo **desanākkamo** daṭṭhabbo.
Pubbāpariyavavatthānenāti paṭhamam rūpakkhando, tato
vedanākkhandhoti evam pubbāpariyavavatthānena anuppattito.
Appahātabbatoti khandhesu ekaccānaṃ pahātabbatāva natthi, kuto
pahānakkamo. Sati hi sabbesaṃ pahātabbatāya pahānakkamena nesaṃ
desanā siyā. **Appaṭipajjanīyatoti** sammāpaṭipattivasena na paṭipajjitabbato.
“**Catubhūmipariyāpannattā**”ti iminā vedanādīnaṃ aniyatabhūmikataṃ
dasseti. Niyatabhūmikānañhi bhūmikkamo sambhaveyya.

Abhedenāti rūpādīnaṃ bhedaṃ vibhāgaṃ akatvā ekajjhaṃ
piṇḍaggahaṇena. **Attagāhapatitanti** attagāhasaṅkhāte diṭṭhoghe nipatitaṃ.
Samūhaghanavinibbhogadassanenāti rūpato arūpaṃ vivecento
rūpārūpasamūhe ghanavinibbhujanadassanena. **Cakkhu-ādīnampi**
visayabhūtanti ekadesena samudāyabhūtaṃ rūpakkhandaṃ vadati. Yā ettha
iṭṭhaṃ, aniṭṭhañca rūpaṃ samvedeti, ayam vedanākkhandhoti
iṭṭhāniṭṭharūpaṃvedanikaṃ vedanaṃ desesīti sambandho. Evam sabbattha.
Iṭṭhamajjhata-aniṭṭhamajjhātānampi iṭṭhāniṭṭhasabhāvattā
iṭṭhāniṭṭhaggahaṇeneva gahaṇam daṭṭhabbam. Evanti yathāvuttanayena.
Saññāya

1. Abhi 1. 2 piṭṭhe. 2. Abhi 2. 200 piṭṭhe. 3. Saṃ 1. 208; Abhi 4. 358 piṭṭhesu.

gahitākāre visaye abhisāṅkhārappavattīti āha “**saññāvasena abhisāṅkhāra**”ti. Yathā viññāṇassa sampayuttadhammānaṃ nissayabhāvo pākaṭo, na tathā vedanādīnanti āha “**vedanādīnaṃ nissaya**”ti. “Manopubbaṅgamā dhammā¹, cittānuparivattino dhammā², chadvārādhipati rājā”ti³ vacanato **viññāṇaṃ** adhipati.

505. Rūpakkhandhe “**sāsavaṃ upādāniya**”ti vacanaṃ anāsavānaṃ dhammānaṃ sabbhāvato rūpakkhandhassa taṃsabhāvatanivattanatthaṃ, na anāsavarūpanivattanatthaṃ.

Anāsavāva khandhesu vuttāti ettha aṭṭhānappayutto **eva**-saddo, anāsavā khandhesveva vuttāti attho. Idha pana visuddhimagge sabbepete khandhāpi upādānakkhandhāpi.

506. Sabbasaṅkhatānaṃ sabhāgena ekajjhaṃ saṅgaho **sabbasaṅkhatasabhāgekaṅgaho**. Sabhāgasabhāvena⁴ hi saṅgayhamānā sabbasaṅkhatā pañcakkhandhā honti. Tattha ruppanādisāmaññaṇa samānakoṭṭhāsā sabhāgāti veditabbā. Tesu saṅkhatābhisāṅkharaṇakiccaṃ āyūhanarasāya cetaṇāya balavanti sā “saṅkhārakkhandho”ti vuttā. Aññe ca ruppanādivisesalakkhaṇarahitā phassādayo saṅkhatābhisāṅkharaṇasāmaññaṇenāti daṭṭhabbā, phusanādayo pana sabhāvā⁵ visum khandhasaddavacanīyā na hontīti dhammasabhāvāññunā tathāgatena phassakkhandhādayo na vuttāti veditabbā. “Ye hi keci bhikkhave samaṇā vā brāhmaṇāvā sassatavādā sassataṃ attānaṅca lokaṅca paññapenti, sabbe te ime eva pañcupādānakkhandhe nissāya paṭicca, etesaṃ vā aññataran”ti evamādisuttānaṅca vasena attattaniyagāhassa etapparamatā daṭṭhabbā. Etena ca vakkhamānasuttavasena ca khandhe eva nissāya parittārammaṇādivasena na vattabbā ca diṭṭhi uppajjati khandhanibbānavajjassa sabhāvadharmassa abhāvatoṭi vuttaṃ hoti. **Rūpanti** ruppanasabhāvaṃ dhammajātamāha. **Vedananti**-ādīsupi⁶ eseva nayo. “Sīlakkhandho samādhikkhandho”ti-ādi⁷ vacanato aññesaṅca

1. Khu 1. 13 piṭṭhe Dhammapade.

2. Abhi 1. 10 piṭṭhe.

3. Dhammapada-Ṭṭha 2. 150 piṭṭhe.

4. Sabhāgasabhāgena (Syā, Ka)

5. Sabhāgā (Syā, Ka) 6. Vedanāti-ādīsupi (Sī, Ka)

7. Dī 3. 236 piṭṭhe.

khandhasaddavacaniyānaṃ sīlakkhandhādīnaṃ¹ sabbhāvato na pañcevāti codanaṃ nivattatumāha “**aññesaṃ tadavarodhato**”ti.

507. Pavattiṭṭhānabhūtaṃ vasaṇaṭṭhānaṃ viya hotīti vuttaṃ “**nivāsaṭṭhānato**”ti.

Dukkhadukkhavipariṇāmadukkhasaṅkhāraddukkhatāvasena vedanāya ābādhakattaṃ daṭṭhabbaṃ. Rāgādisampayuttassa vipariṇāmadidukkhassa itthipurisādi-ākāragāhikā taṃtaṃsaṅkappamūlabhūtā saññā **samuṭṭhānaṃ**. Pittādi viya rogassa āsanna-kāraṇaṃ samuṭṭhānaṃ.

Utubhojanavisamatāvisamaparihārādi viya mūlakāraṇaṃ **nidānaṃ**. Cittassa² aṅgabhūtā cetasikāti viññāṇaṃ gilānūpamaṃ vuttaṃ. Kuṭṭharogavato siniyhanaṃ tassa bhīyyobhāvāya viya bālassa puññābhisaṅkhārādivasena pavatti vedanādukkhāvahā asappāyasevanasadi. **Vedanattāyāti** vedanāsabhāvattamaṃ, vedanattalābhāyāti attho. Kāraṇaṭṭhānatāya, bhojanādhāratāya ca **cāraṅkūpamaṃ**, **bhājanūpamaṃ**ca rūpaṃ.

Subhasaññādivasena vedanākāraṇassahetubhāvato, vedanābhojanassa chādāpanato ca **aparādhūpamaṃ**, **byañjanūpamaṃ** ca saññā. Vedanāhetuto **kāraṇakāraṅkūpamo**, **parivesakūpamo** ca saṅkhārakkhandho. Bhattakāro eva yebhuyyena parivisaṭṭi parivesakaggahaṇaṃ. Vedanāya vibādhitabbato, anuggahetabbato ca **aparādhikūpamaṃ**, **bhuñjakūpamaṃ**ca viññāṇaṃ vuttaṃ.

508. “Pañca vadhakā paccatthikā ukkhittāsikāti kho bhikkhave pañcannetaṃ upādānakkhandhānaṃ adhivacanaṃ”ti **āsīvisūpame**³ vadhakoti vuttā, “bhāroti kho bhikkhave pañcannetaṃ upādānakkhandhānaṃ adhivacanaṃ”ti **bhārasutte**⁴ bhārāti, “atītampāhaṃ addhānaṃ evameva rūpena khajjīm, seyyathāpi etarahi paccuppanna rūpena khajjāmi. Ahañceva kho pana anāgataṃ rūpaṃ abhinandeyyaṃ, anāgatampāhaṃ addhānaṃ evameva rūpena khajjeyyaṃ, seyyathāpi -pa- khajjāmi”ti-ādīna⁵ **khajjanīyapariyāye** khādakāti, “so aniccaṃ rūpaṃ ‘aniccaṃ rūpaṃ’ti yathābhūtaṃ nappajānāti”ti-ādīna⁶ **yamakasutte** aniccādikāti. Yadi “idha pana sabbepete ekajjhaṃ katvā khandhāti adhippetā”ti vuttaṃ, bāhullena pana upādānakkhandhānaṃ tadantogadhānaṃ daṭṭhabbatā veditabbā. Vipassanāya bhūmivicāro hesoti.

1. Sīlakkhandhādīnaṃ atthānaṃ (Sī, Ka) 2. Na cittassa (Syā, Ka) 3. Saṃ 2. 383 piṭṭhe.
4. Saṃ 2. 21 piṭṭhe. 5. Saṃ 2. 72 piṭṭhe. 6. Saṃ 2. 94 piṭṭhe.

Phenapiṇḍo viyāti-ādīsu rūpādīnaṃ evaṃ phenapiṇḍādisadisatā daṭṭhabbā yathā phenapiṇḍo nissāro paridubbalo agayhupago, gahitopi kiñci atthaṃ na sādheti, chiddāvachiddo anekasandhisamghaṭṭito bahūnaṃ pāṇakānaṃ āvāso anupubbūpacito sabbāvatthanipātī avassambhedī, evaṃ rūpampi niccasārādivirahato nissāraṃ pheggu viya, sukhabhañjanīyato dubbalaṃ, niccanti vā dhuvanti vā ahanti vā mamanti vā na gahetabbam, gahitampi tathā na hoti, bahuchiddaṃ asītisatasandhisamghaṭṭitaṃ anekakimikulāvāsaṃ kalalādivasena anupubbūpacitaṃ kalalakālato paṭṭhāya sabbāsūpi avatthāsu vinassati, avassameva ca bhijjati. **Aṭṭhakathāyam**¹ pana parimaddanāsahanameva upamūpameyyasambandho vutto.

Yathā pubbuḷo nissāro paridubbalo agayhupago, gahitopi na kiñci atthaṃ sādheti, na ciraṭṭhitiko, tathā vedanāpi. Yathā ca pubbuḷo, udakatalaṃ, udakabinduṃ, udakajallikaṃ saṅkaḍḍhitvā puṭaṃ katvā gahaṇavātañcāti cattāri kāraṇāni paṭicca jāyati, evaṃ vedanāpi vatthum, ārammaṇaṃ, kilesajallaṃ, phassasamghaṭṭanañcāti cattāri kāraṇāni paṭicca uppajjati. Yathā hi udakatale bindunipātajanito vāto udakajallikasamkhātaṃ udakalasikaṃ saṅkaḍḍhitvā puṭaṃ katvā pubbuḷaṃ nāma karoti, evaṃ vatthumhi ārammaṇāpāthagamanajanito phasso anupacchinnaṃ kilesajallaṃ sahakārīpaccayabhāvena² saṅkaḍḍhitvā vedanaṃ nāma karoti. Idañca kileschi mūlakāraṇabhūtehi, ārammaṇassādanabhūtehi ca nibbattaṃ vaṭṭagataṃ vedanaṃ sandhāya vuttaṃ. Ukkaṭṭhaparicchedena vā cattāro paccayā vuttā, ūnehipi pana uppajjateva. Idha muhuttaramaṇīyatā upamopameyyasambandho vutto.

Yathā pana **marīcika** asārā agayhupagā. Na hi taṃ gahetvā pātum vā nhāyitum vā bhājanaṃ vā pūretum sakkā, evaṃ saññāpi asārā agayhupagā. Yathā ca marīcika vipphandaṃ mānā sañjātūmivegā viya khāyantī mahājanaṃ vippalambeti, evaṃ saññāpi “nīlaṃ pītaṃ dīghaṃ rassan”ti-ādīnā ārammaṇe pavattamānā sabhāvamatte aṭṭhatvā “subhaṃ sukhaṃ niccan”ti-ādimicchāgāhassa kāraṇabhāvena lokaṃ vippalambeti.

1. Saṃ-Ṭṭha 2. 294; Abhi-Ṭṭha 2. 30 piṭṭhesu. 2. Sahatārīpaccayantarabhāvena (Sī, Syā)

Yathā **kadalikkhandho** asāro agayhupago. Na hi taṃ gahetvā gopānasī-
ādīnaṃ atthāya upanetuṃ sakkā, upanītampi tathā na hoti,
bahuvaṭṭisamodhāno ca hoti, evaṃ saṅkhārakkhandhopi asāro agayhupago.
Na hi taṃ niccādivasena gahetuṃ sakkā, gahitampi tathā na hoti,
bahudhammasamodhāno ca. Aññadeva hi phassassa lakkhaṇaṃ, aññaṃ
cetanādīnaṃ, te pana sabbe samodhānetvā saṅkhārakkhandhoti vuccati.

Yathā ca **māyā** asārā agayhupagā. Na hi taṃ gahetvā kiñci atthaṃ
kiccaṃ sādhetuṃ sakkā, ittarā lahupaccupaṭṭhānā amaṇi-ādimeva maṇi-
ādirūpena dassentī mahājanaṃ vañceti, evaṃ viññāṇampi asāraṃ ittaraṃ
lahupaccupaṭṭhānaṃ, teneva cittena āgacchantaṃ viya, gacchantaṃ viya,
ṭhitaṃ viya, nisinnaṃ viya ca katvā gāhāpeti, aññadeva cittaṃ āgamane,
aññaṃ gamanādīsūti. Evaṃ viññāṇaṃ māyāsadisāṃ.

Pañcapi upādānakkhandhā asubhādisabhāvā eva
saṅkilesāsucivatthubhāvāditoti asubhādito daṭṭhabbā eva, tathāpi katthaci
koci viseso sukhaḡgahaṇīyo hotīti āha “**visesato cā**”ti-ādi. Tattha cattāro
satipaṭṭhānā catuvipallāsappahānakarāti tesāṃ gocarabhāvena
rūpakkhandhādīsū asubhādibhāvena daṭṭhabbatā vuttā.

509. **Khandhehi na vihaññati** parividitasabhāvattā. Vipassakopi tesāṃ
vipattiyaṃ na dukkhamāpajjati, khīṇāsavesu pana vattabbameva natthi. Te
hi āyatimpi khandhehi na bādhīyantīti.

Kabaḷikārāhāraṃ pariḡānātīti “āhārasamudayā rūpasamudayo”ti¹
vacanato ajjhattikarūpe chandarāgaṃ pajahanto tassa samudayabhūte
kabaḷikārāharepi chandarāgaṃ pajahatīti attho. Ayaṃ **pahānapariññā**.
Ajjhattikarūpaṃ pana pariggaṇhanto tassa paccayabhūtaṃ kabaḷikārāhāraṃ
pariggaṇhātīti **ñātāpariññā**. Tassa ca udayabbayānupassī hotīti **tīraṇāpariññā**
ca yojetabbā. Evaṃ pariññattaye sījjhante ime vipallāsādayo vidhamīyanti
evāti āha “**asubhe subhanti vipallāsaṃ pajahatī**”ti-ādi. Tattha
kāmarāḡabhūtaṃ abhijjhaṃ sandhāyāha “**abhijjhākāyaganthan**”ti.
Asubhānupassanāya hi kāmarāḡappahānaṃ

1. Saṃ 2. 48, 51 piṭṭhesu.

hoti, kāmarāgamukhena vā sabbalobhappahānaṃ vadati. **Na upādiyati** na gaṇhati na uppādeti.

“Phassapaccayā vedanā”¹ti¹ vuttattā “vedanāya chandarāgaṃ pajahanto tassā paccayabhūte phassāhārepi chandarāgaṃ pajahatī”²ti-ādina āhāraparijānane vuttanayena phassaparijānaṃ yojetabbaṃ. Vedanāya dukkhato dassanena tattha **sukhanti vipallāsaṃ pajahati**. Sukhatthameva bhavapatthanā hotīti vedanāya taṇhaṃ pajahanto **bhavoghaṃ uttarati**. Tato eva **bhavayogena viśaṃyujjati**. **Bhavāsavena ca anāsavo hoti**, sabbavedanaṃ dukkhato passanto attano parena apubbaṃ dukkhaṃ uppāditaṃ, sukhaṃ vā vināsitaṃ na cinteti, tato “anattaṃ me acari”²ti-ādi² āghātavatthuppahānato **byāpādakāyaganthaṃ bhindati**. “Sukhabahule sugatibhave suddhī”²ti aggahetvā gosīlagovatādīhi suddhiṃ parāmasanto sukhatthanāvaseneva parāmasatīti vedanāya taṇhaṃ pajahantopi **sīlabbatupādānaṃ na upādiyati**.

Manosañcetanā saṅkhārakkhandho, saññā pana taṃsampayuttāti saññāsaṅkhāre anattato passanto manosañcetanāya chandarāgaṃ pajahati, taṅca pariggaṇhāti, tīreti cāti “**saññaṃ saṅkhāre -pa- parijānāti**”²ti vuttaṃ. Saññāsaṅkhāre anattāti passanto attadiṭṭhimūlakattā sabbadiṭṭhinaṃ attadiṭṭhiṃ viya sabbadiṭṭhiyopi vidhamatīti dassento “**diṭṭhogaṃ uttarati -pa- attavādupādānaṃ na upādiyati**”²ti āha.

Viññānaṃ aniccato passanto aniccānupassanāmukhena tissopi anupassanā ussukkanto tīhipi pariññāhi **viññāṇahāraṃ parijānāti**. Viseso panettha **anicce niccanti vipallāsaṃ pajahati**. Tattha niccaggāhabāhullato avijjāya viññāṇe ghanagahaṇaṃ hotīti ghanavinibbhogaṃ katvā taṃ aniccato passanto **avijjogaṃ uttarati**. Tato eva avijjāyogena viśaṃyutto **avijjāsavena anāsavo ca hoti**. Mohabaleneva sīlabbataparāmasanaṃ hotīti taṃ pajahanto “**sīlabbataparāmāsakāyaganthaṃ bhindati**”.

1. Ma 3. 109; Saṃ 1. 296; Vi 3. 1; Khu 1. 77; Khu 10. 28 piṭṭhādīsu.

2. Abhi 1. 244; Abhi 2. 376 piṭṭhesu.

“Yañca kho idaṃ bhikkhave vuccati cittaṃ itipi, mano itipi, viññāṇaṃ itipi, tatrāssutavā puthujjano nālaṃ nibbindituṃ, nālaṃ virajjituṃ, nālaṃ vimuccituṃ. Taṃ kissa hetu? Dīgharattaṃ hetam bhikkhave assutavato puthujanassa ajjhositaṃ mamāyitaṃ parāmaṭṭhaṃ ‘etaṃ mama, esohamasmi, eso me attā’ti”ādi¹—

vacanato yathā viññāṇaṃ niccato passanto diṭṭhupādānaṃ upādiyati, evaṃ taṃ aniccato passanto **diṭṭhupādānaṃ na upādiyātīti**.

Evaṃ mahānisāmsanti vuttappakārena vipallāsādisakalasaṃkilesavidhamanupāyabhāvato evaṃ vipuludayaṃ. **Vadhakādivasenā**ti ukkhittāsikavadhakodivasena. **Passeyyā**ti ñāṇadassanena paccakkhato passeyya.

Khandhaniddesavaṇṇanā niṭṭhitā.

Iti cuddasamaparicchavedavaṇṇanā.

15. Āyatanadhātuniddesavaṇṇanā

Āyatanavithhāarakathāvaṇṇanā

510. “Khandhāyatanā”ti-ādinā heṭṭhā uddiṭṭhāni paduddhāravasena “āyatanāni”ti vatvā gaṇanaparicchedenāha “dvādasāyatanāni”ti. Tattha vattabbaṃ parato sayameva vakkhati. **Cakkhāyatananti**-ādi nesam̐ sarūpadassanaṃ.

Attho nāma saddattho, bhāvattho pana **lakkhaṇameva**. So pana saddattho duvidho asādhāraṇo sādharmaṇoti. Tattha asādhāraṇo cakkhādisaddattho, sādharmaṇo āyatanasaddattho dvādasannampi samānattā.

Tesu asādhāraṇaṃ tāva dassento “**visesato tāvā**”ti-ādimāha. Tattha **visesatoti** visesatthato, cakkhādisaddatthatoti attho. **Assādeti**ti cakkhati-saddo “madhum̐ cakkhati, byañjanaṃ cakkhatī”ti rāsasāyanattho atthīti tassa vasena atthaṃ vadati. “Cakkhum̐ kho pana māgaṇḍiya rūpārāmaṃ rūparataṃ rūpasammuditaṃ”ti¹ vacanato cakkhu rūpaṃ **assādeti**. Satipi sotādīnaṃ saddārāmatādibhāve yo “yaṃ cakkhu catunnaṃ mahābhūtānaṃ upādāya pasādo”ti-ādinā² pāliyaṃ, “rūpābhigāhātārahābhūtappasādalakkhaṇaṃ”ti-ādinā³ aṭṭhakathāyaṅca vutto atthaviseso, tattheva niruḷhattā cakkhumhi eva cakkhu-saddo pavattati gavādīsu gosaddādi viyāti daṭṭhabbaṃ.

Vibhāveti cāti saddalakkhaṇasiddhassa cakkhati-saddassa vasena atthaṃ vadati. **Cakkhatīti** hi ācikkhati, abhivyattaṃ vadatīti attho. Nettassa ca vadantassa viya samavisamavibhāvanameva ācikkhananti katvā āha “**vibhāveti cāti attho**”ti, anekatthattā vā dhātūnaṃ vibhāvanatthattā ca cakkhati-saddassa daṭṭhabbā. Rattaduṭṭhādikālesu kakaṇṭakarūpaṃ viya, uddarūpaṃ viya⁴ ca vaṇṇavikāraṃ āpajjamānaṃ rūpaṃ hadayaṅgatabhāvaṃ rūpayati rūpamiva pakāsaṃ karoti, saviggahamiva katvā dassetīti attho. Vitthāraṇaṃ

1. Ma 2. 171 piṭṭhe.

3. Abhi-Ṭṭha 1. 349; Visuddhi 2. 74 piṭṭhesu.

2. Abhi 1. 157 piṭṭhe.

4. Naṭarūpaṃ viya (Sī)

vā rūpasaddassa attho, vitthāraṇaṅca pakāsanamevāti āha “**pakāsetīti attho**”ti. Anekatthattā vā dhātūnaṃ pakāsanattho eva rūpasaddo daṭṭhabbo. Vaṇṇavācākassa rūpasaddassa rūpayatīti nibbacaṇaṃ, rūpakkhandhavācākassa ruppatīti ayaṃ vireso. **Udāharīyatīti** vuccatīti atthe vacanasaddo eva gahito siyā, na ca vacanasaddo evettha saddo, atha kho sabbopi sotaviññeyyoti. **Sappatīti** sakehi paccayehi sappīyati, sotaviññeyyabhāvaṃ gamīyatīti attho.

Sūcayātīti attano vatthum apākaṭaṃ gandhavasena “idaṃ sugandhaṃ, duggandhaṃ”ti pakāseti, paṭicchannaṃ vā pupphādivatthum “ettha pupphamatthi, campakādiphalamatthi, ambādī”ti pesuññaṃ karontaṃ viya hotīti attho. Rasaggahaṇamūlakattā ajjhoharaṇassa jīvitahetumhi āhārarase ninnatāya **jīvitaṃ avhayatīti jivhā** nirutilakkhaṇena. **Kucchitānaṃ sāsavadhammānaṃ āyoti** visesena **kāyo** vutto anuttariyahetubhāvaṃ anāgacchantesu kāmarāganidānakammajānitesu, kāmarāgassa ca visesapaccayesu ghānājivhākāyesu kāyassa visesatarasāsavapaccayattā. Tena hi phoṭṭhabbasukhaṃ assādentā sattā methunampi sevanti. **Uppattidesoti** uppattiṭṭhānanti attho, kāyindriyavatthukā vā cattāro khandhā balavakāmāsavādihetubhāvato visesena sāsavāti vuttāti tesam uppattiṭṭhānanti attho.

Munātīti nāḷiyā minamāno viya, mahātulāya dhārayamāno viya ca ārammaṇaṃ vijānātīti attho. Manate iti vā¹ **mano**, taṃ taṃ ārammaṇaṃ paricchedavasena jānātīti vuttaṃ hoti. **Attano lakkhaṇaṃ dhārentīti** ye visesalakkhaṇena āyatanasaddaparā vattabbā, te cakkhādayo tathā vuttāti tato aññe manogocarabhūtā dhammā sāmāññalakkhaṇeṇa ekāyatanabhāvaṃ upanetvā vuttā. Yathā hi oḷārikavatthārammaṇamanasāṅkhātehi visayavisayibhāvehi purimāni pākaṭāni, tathā apākaṭā ca aññe manogocarā na attano sabhāvaṃ na dhārentīti imassa atthassa dīpanattho dhammasaddo. Dhārīyanti sāmāññarūpeṇa avadhārīyantīti vā **dhammā**. Yathā hi rūpādayo cakkhuviññāṇādīhi asādhāraṇato eva yathāsakaṃ sabhāvato

1. Manute iti vā (Ka-Sī)

viññāyanti, na evamete, ete pana anekadhammabhāvato, sādharāṇato, sabhāvasāmaññatopi¹ manasā viññāyantīti.

511. **Sena senā**ti sakena sakena. **Uṭṭhahantī**ti uṭṭhānaṃ karonti. **Vāyamantī**ti ussahanti, attano kiccaṃ karonticceva attho. Imasmiṃ ca atthe āyatanti etthāti āyatanānīti adhikaraṇattho āyatanasaddo, dutiyatatiyesu kattu-attho. **Te cāti** cittacetāsike dhamme. Te hi taṃtaṃdvārāmmaṇesu ayanti gacchanti² pavattantīti **āyā**. **Vitthārentī**ti pubbe anuppannattā līnāni apākaṭāni pubbantato uddhaṃ pattharenti pākaṭāni karonti, uppādentīti attho. **Idaṅca** saṃsāradukkhāṃ. **Na nivattatī**ti anuppādanirodhavasena na nirujjati. **Āyatanam āyatananti** āmedītavacanaṃ assā samaññāya cakkhādīsu niruḷhabhāvadassanattam.

512. Evaṃ avayavabhedavasena āyatanasaddassa attham vatvā idāni tattha pariyāyato dassetuṃ “**apicā**”ti-ādī āraddham. Sādhuphalabharitatāya, aparissayatāya ca **manoramme**.

Tattha **nivasantī**ti nivasantā viya honti. Tenāha “**tadāyattavuttitāyā**”ti. Yattha suvaṇṇaratanādīni nivutthāni viya ākiṇṇāni tiṭṭhanti, so padeso tesam **ākaro**, evaṃ cittacetāsikā cakkhādīsūti te tesam ākaroti dassento āha “**cakkhādīsu ca -pa- ākaro**”ti. **Tannissitattā**ti ettha mano manoviññāṇādīnam cittacetāsikānam nissayapaccayo na hotīti tassa tesam dvārabhāvo nissayabhāvoti daṭṭhabbo. Ahutvā eva paccayasāmaggivasena uppajjantāpi cittacetāsikā aneke ekajjham tattha labbhamānā samosaṭā³ viya hontīti vuttaṃ “**vatthudvārāmmaṇavasena samosaraṇato**”ti. Na hi dhammānam anāgataddhe vijjamānatālesopi-atthi. Tenāha “puñjo natthi anāgate”ti⁴. **Tattheva uppattitoti** tesu cakkhādīsu eva uppattito. Uppattiyā paccayabhūte cakkhādīke uppattiṭṭhānaṃ viya katvā upacāravasena vuttaṃ. Na hi arūpadhammānam nippiariyāyato uppattideso nāma atthi. Yadaggena vā

1. Dhammasabhāvasāmaññatopi (Sī), dhammabhāvasāmaññatopi (Ka)

2. Āyanti āgacchanti (Sī, Syā)

3. Samosaraṇatā (Syā)

4. Khu 7. 32 piṭṭhe Mahāniddece.

te tesam nissayārammaṇabhūtā, tadaggena **sañjātideso**. Na hi paccayabhāvamantarena rūpadhammānampi ādhārādheyyabhāvo atthi. Tenāha “**nissayārammaṇabhāvenā**”ti. Byatirekapadhānatāya kāraṇalakkhaṇassa “**tesam abhāve abhāvato**”iccevēha, na “bhāve bhāvato”ti.

Yathāvuttenatthenāti¹ “cakkhatī”ti-ādinā, “āyatanato āyānaṃ tananato”ti-ādinā, “nivāsaṭṭhānaṃ”ti-ādinā ca vuttappakārena atthena. Dhammāyatanapariyāpannānaṃ dhammānaṃ bahubhāvato yebhuyyena ca te bahū eva hutvā kiccarāti “**dhammā ca te āyatanañca**”ti bahuvacananiddeso.

513. Tathā tathā lakkhitabbato lakkhīyati etenāti vā **lakkhaṇaṃ**, sabhāvo.

Tāvabhāvatoti tattakato, tena anūnādhikabhāvaṃ dasseti. Tattha dvādasāyatanavinimuttassa kassaci dhammassa abhāvā adhikabhāvato codanānatthi, salakkhaṇadhāraṇaṃ pana sabbesaṃ sāmāññalakkhaṇanti ūnacodanā sambhavatīti taṃ dassento āha “**cakkhādayopi hī**”ti-ādī.

Bhavaṅgamanasaṅkhātoti dvikkhattuṃ calitvā pavattabhavaṅgamanasaṅkhāto. Calanavasena bhavaṅgappavattiyā sati eva āvajjanuppatti, na aññatthāti āvajjanassāpi kāraṇabhūtanti katvā vuttaṃ “**bhavaṅgamanasaṅkhāto -pa- uppattidvāraṇaṃ**”ti. **Asādhāraṇanti** cakkhuviññāṇādīnaṃ asādhāraṇaṃ. Satipi asādhāraṇabhāve cakkhādīnaṃ dvārabhāvena gahitattā dhammāyatanena aggahaṇaṃ daṭṭhabbaṃ. Dvārārammaṇabhāvehi vā asādhāraṇataṃ sandhāya “asādhāraṇaṃ”ti vuttaṃ.

514. Yebhuyyasahuppatti-ādīhi uppattikkamādīsu ayutti yojetabbā. Yebhuyyena hi cakkhāyatanādīni kassaci kadāci ekato uppajjanti. Tathā hi vuttaṃ “kāmādhātuyā upapattikkhaṇe kassaci ekādasāyatanāni pātubhavanti”ti-ādī². Tasmā āyatanānaṃ uppattikkamo tāva na yujjati, na pahānakkamo kusalābyākatānaṃ appahātābato, na paṭipattikkamo akusalānaṃ ekacca-abyākatānañca

1. Yathāvuttēna atthenāti (Ka)

2. Abhi-Ṭṭha 3. 309 piṭṭhe.

appaṭipajjanīyato, na bhūmikkamo aḍḍhekādasannaṃ āyatanānaṃ ekantakāmāvacarattā, itaresaṅca catubhūmipariyāpannattā, ekaccassa lokuttarabhāvato cāti. “**Ajjhattikesu hī**”ti etena ajjhattikabhāvena, visayībhāvena ca ajjhattikānaṃ paṭhamānaṃ desetabbataṃ dasseti, tesupi¹ paṭhamānaṃ desetabbesu pākaṭattā paṭhamataraṃ cakkhāyatanānaṃ desitanti.

Tato ghānāyatanādīnīti ettha bahupakārattābhāvena cakkhusotehi purimataraṃ adesetabbāni, saha vattum asakkuṇeyyattā ekena kamena desetabbānīti ghānādikkamena desitānīti adhippāyo. Aññathāpi hi desitesu na na sakkā codetum, na ca sakkā bodhetabbāni na desetuntī. Paccuppannārammaṇattā vā cakkhādīni paṭhamānaṃ vuttāni ārammaṇato supākaṭānīti, manāyatanānaṃ pana kiñci paccunnārammaṇaṃ -pa- kiñci yāva navattabbārammaṇanti pacchā vuttaṃ. Paccuppannārammaṇesupi upādārūpārammaṇāni cattāri paṭhamānaṃ vuttāni, tato bhūtarūpārammaṇaṃ. Upādārūpārammaṇesupi dūratāre dūre, sīghataraṃ sīghaṅca ārammaṇasampaṭicchanaḍḍipānattānaṃ cakkhādīnaṃ desanākkamo. Cakkhusotadvayaṅhi dūragocaranti paṭhamānaṃ vuttaṃ, tatrāpi cakkhu dūratāragocaranti sabbapaṭhamānaṃ vuttaṃ. Passantopi hi dūratāre nadīsotaṃ, na tassa sotapaṭiḅhātasaddaṃ suṇāti. Ghānājivhāsupi ghānaṃ sīghataravuttīti paṭhamānaṃ vuttaṃ purato ṭhapitamattassapi bhojanassa gandho gayhatīti. Yathāṭhānaṃ vā tesānaṃ desanākkamo. Imasmiṅhi sarīre sabbupari cakkhussa adhiṭṭhānaṃ, tassa adho sotassa, tassa adho ghānassa, tassa adho jivhāya, tathā kāyassa yebhuyyato, mano pana arūpibhāvato sabbapacchā vutto. Taṃtaṃgocarattā tassa tassa anantaraṃ bāhirāyatanāni vuttānīti vuttovāyamattthoti evampi imesaṃ kamo veditabbo. Gocarō visayo etassāti **gocaravisayo**, mano. Kassa pana gocarō etassa visayo? Cakkhādīnaṃ pañcannampi. **Viññānuppattikāraṇavavattthānatoti** cakkhuvīññāṇādīnaṃ uppattikāraṇassa vavattthitabhāvato savibhattibhāvato². Etena cakkhādīnānāntaraṃ rūpādivacanassa ca kāraṇamāha.

515. **Saṅgahitattā**ti gaṇanasāṅgahasena saṅgahitattā. **Jātivāsenā**ti cakkhubhāvasamānatāvasena. **Paccayabhedo** kammādibhedo.

1. Tesuhi (Syā, Ka)

2. Paṭibhattabhāvato (Sī)

Dānādīpāṇātipātādibhedabhinnassa hi kusalākusalakammasa, tassa ca sahakārikāraṇabhūtānaṃ abhantarānaṃ, bāhirānaṃca paccayānaṃ bhedenā cakkhāyatanānaṃ bhinnānaṃ visadisānaṃ hotīti. Nirayādiko, apadādigatinānākaraṇānaṃca **gatibhedo** gatīnaṃ, gatīsu vā bhedoti katvā. Hatthi-assādiko, khattiyādiko ca **nikāyabhedo**. Taṃtaṃsattasantānabhedo **puggalabhedo**. Yā cakkhādīnaṃ vatthūnaṃ anantappabhedatā vuttā, so eva hadayavatthussa bhedo tādisabhedānātivattanato. Tato manāyatanassa anantappabhedatā yojetabbā. Yasmā jhānavirahitaṃ nāma lokuttaraṃ natthi, tasmā pañcannaṃ jhānānaṃ vasena aṭṭha lokuttaracittāni cattālīsaṃ hotīti tāni ekāsītiyā lokiyacittesu pakkhipitvā āha “**ekavīsuttarasatappabhedānaṃ**”ti. **Vatthūti** cakkhādivatthu. Tappabhedena viññānaṃ **anantappabhedam**. **Paṭipadā** dukkhāpaṭipadādi. **Ādi**-saddena jhānādhipatibhūmi-ārammaṇādīnaṃ saṅgaho daṭṭhabbo. Nīlaṃ nīlassa sabhāgaṃ, aññaṃ **visabhāgaṃ**. **Paccayo** kammādi. Tatthāpi kusalasamuṭṭhānādītā, sīta-utusamuṭṭhānādītā ca bhedo veditabbo. **Ādi**-saddena gatinikāyabhedo. (**Sabhāvanānattabhedatoti**)¹ sukhā dukkhā adukkhamasukhāti evamādiko **sabhāvabhedo**. Cakkhusamphassajā sotasaṃphassajāti evamādikaṃ **nānattam**.

516. “Anāgamanato aniggamanato”ti saṅkhepena vuttamatthaṃ vivarituṃ “na hī”ti-ādi vuttam. Pubbantāparantesu avijjamānasarūpattā udayato pubbe kutoci nāgacchanti, vayato ca uddham na katthaci gacchanti, vijjamānakkhaṇepi ittarakālatāya aniccā dukkhā vipariṇāmadhammā. Tenāha “**atha kho**”ti-ādi. Sapaṇiphandakiriyāvasena ihaṇaṃ ihā, cintanavasena byāpāraṇaṃ byāpāro, tattha byāpāraṃ dassento āha “**na hi cakkhurūpādīnaṃ evaṃ hoti**”ti. Ihaṃ dassento “**na ca tāni**”ti-ādi. Ubhayampi pana ihā ca hoti byāpāro cāti uppaṭipāṭivacanaṃ. **Dhammatāvāti** sabhāvo eva, kāraṇasamatthatā vā ihābyāpārarahitānaṃ dvārādibhāvo **dhammatā**. Imasmiṃca atthe “**yan**”ti etassa yasmāti attho. Purimasmiṃ sambhavanavisesanaṃ yaṃ-saddo. “Suñño gāmoti kho bhikkhave channetaṃ ajjhattikānaṃ āyatanānaṃ adhivacanaṃ”ti² vacanato **suññagāmo**

1. () Etthantare pāṭho Sī-Syā-potthakesu natthi.

2. Saṃ 2. 383 piṭṭhe.

viya daṭṭhabbāni. Annapānasahitanti gahite suññagāme yaṃ yadeva bhājanam parāmasiyati, taṃ taṃ rittakāmyeva parāmasiyati, evaṃ dhuvādibhāvena gahitāni yoniso upaparikkhiyamānāni rittakāneva etāni dissantīti. Tenāha “**dhuvasubhasukhattabhāvavirahitattā**”ti. Cakkhādidvāresu abhijjhādomanassuppādakabhāvena rūpādīni cakkhādīnam abhigātakānīti vuttāni. Ahisusumārapakkhīkukkurasiṅgālamakkaṭā **cha pāṇakā.** Visamabilākāsagāmasussanavanāni **tesam gocarā.** Tattha visamādi ajjhāsayehi cakkhādīhi visamabhāvabilākāsagāmasusānasannissitasadisūpādinnadhammavanabhāve hi abhiramitattā rūpādīnam visamādisadisatā yojetabbā.

Iti āyatanānam vitthārakathāmukhavaṇṇanā.

Dhātuvitthārakathāvaṇṇanā

517. **Cakkhussa viññāṇanti** cakkhussa kāraṇabhūtassa viññāṇam. Kāmaṃ rūpālokamanasikārādayopi tassa viññāṇassa kāraṇā, te pana sādharmaṇakāraṇam, cakkhu asādhāraṇanti asādhāraṇakāraṇenāyam niddeso yathā bherisaddo, yavaṅkuroti. Tathā hi cakkhu puggalantarāsādhāraṇam, nīlādisabbarūpasādhāraṇācāti sāmibhāvena niddiṭṭham.

Vidahatīti evaṃ evaṅca tayā pavattitabbanti viniyuñjamānam viya uppādetīti attho. **Vidahatīti** ca dhātuvattho eva viṣiṭṭho upasaggena dīpīyatīti vināpi upasaggena **dhātūti** esa saddo tamattham vadatīti daṭṭhabbo. Kattukammabhāvakāraṇādihikāraṇesu ca dhātusaddasiddhi hotīti pañcāpi te atthā vuttā. Lokuttarā dhātuyo saṃsāradukkham na vidahanti, aññadatthu vidhamśentīti katvā “**lokiyā**”ti visesitam. **Vavatthitāti** avatthitā, aññamaññam vā asaṃkiṇṇā. **Suvaṇṇarajatādidhātuyo** suvaṇṇādīnam bījabhūtā selādayo. **Yathāsambhavanti** ettha keci “lokiyalokuttarāsu dhātūsu yo yo attho sambhavati, tadanurūpan”ti attham vadanti, tadayuttam “lokiyā hi dhātuyo”ti visesetvā vuttattā. Atthavasena cetam yathāsambhavaggahaṇam kataṃ, na

dhātuvasena. Kāmaṃ pañcapi atthā cakkhādīnaṃ sabbesaṃ icchitabbā, tathāpi cakkhādīsu yassa yassa dhammassa yadā kattuvacanicchā, na tadā kammabhāvo. Yadā pana¹ kammavacanicchā, na tadā kattubhāvo. Evaṃ sesesupīti yathāsambhavaggahaṇaṃ. Tenāha “**iti cakkhādīsū**”ti-ādi.

518. **Attano sabhāvaṃ dhārentīti dhātuyoti** etthāpi dhātīti² dhātūti padasiddhi veditabbā dhāraṇattho dhā-saddoti katvā. Kattu-atthopi cāyaṃ purimena asadiso vidhānadhāraṇatthānaṃ bhinnasabhāvattā. Nissattasabhāvamattadhāraṇāṅca dhātu-saddassa padhāno atthoti visum vutto. **Dhātuyo viya dhātuyoti** ettha sīhasaddo viya kesarimhi niruḷhā purise selāvayavesu niruḷho dhātusaddo cakkhādīsu upacaritoti daḷḷhabbo. Ñāṇāṅca ñeyyaṅca ñāṇañeyyāni, tesāṃ avayavā tappabhedabhūtā dhātuyo **ñāṇañeyyāvayavā**. Tattha **ñāṇappabhedo** dhammadhātu-ekadeso, **ñeyyappabhedo** aṭṭhārasāpīti ñāṇañeyyāvayavamattā dhātuyo hontīti. Atha vā ñāṇena ñātabbo sabhāvo aviparīto dhātusaddena vuccamāno **ñāṇañeyyo**, na diṭṭhi-ādīhi viparītaggāhakehi ñeyyoti attho, tassa ñāṇañeyyassa **avayavā** cakkhādayo, visabhāgalakkhaṇāvayavesu rasādīsū niruḷho dhātusaddo tādisesu aññāvayavesu cakkhādīsū upacaritoti daḷḷhabbo. Rasādīsū viya vā cakkhādīsūpi niruḷho eva. “**Nijjīvamattassetam**³ **adhivacanan**”ti etena nijjīvamattapadatthe dhātusaddassa niruḷhataṃ dasseti. Cha dhātuyo etassāti **chadhāturo**. Yo loke purisoti dhammasamudāyo vuccati, so chadhāturo channaṃ pathavī-ādīnaṃ nijjīvamattānaṃ sabhāvānaṃ samudāyamatto, na ettha jīvo vā puriso vā atthīti attho.

519. Cakkhādīnaṃ kamo pubbe vuttoti idhakesasmim tike tiṇṇaṃ dhātūnaṃ kamaṃ dassento āha “**hetuphalānupubbavavattānavasena**”ti. Hetuphalānaṃ anupubbavavattānaṃ hetuphalabhāvo eva, manodhammadhātūnaṅca manoviññāṇassa hetubhāvo yathāsambhavaṃ yojetabbo. Kiriyamanodhātu manoviññāṇassa upanissayakoṭiyā, vipākamanodhātu vipākamanoviññāṇassa anantarādināpi, itarassa sabbāpi

1. Yadā ca (Sī, Syā)

2. Dadhatīti (Sī)

3. Nijjīvamattassevetam (Syā, Ka)

upanissayakoṭiyā ca, dhammadhātu pana vedanādikā sahajātā sahajātādinā, asahajātā anantarādinā, upanissayena, ārammaṇādinā ca manoviññāṇassa paccayo hotīti dvārabhūtanamanovasena vā. Dvārabhūtanamopi hi suttesu manodhātūti vuccatīti tassā vā manodhātuyā manoviññāṇassa hetubhāvo yathāsambhavaṃ yojetabbo. Tattha **hetūti** paccayo adhippeto, **phalanti** paccayuppannanti āha “**cakkhudhātū**”ti-ādi.

520. **Sabbāsam vasenāti** yathāvuttānaṃ ābhādhdātu-ādīnaṃ pañcatimsāya dhātūnaṃ vasena. Aparamatthasabhāvassa paramatthasabhāvesu na kadāci antogadhatā atthīti āha “**sabhāvato vijjamānānaṃ**”ti.

Candābhāsūriyābhādhdikā vaṇṇanibhā evāti āha “**rūpadhātuyeva hi ābhādhdātū**”ti. **Rūpadīpaṭibaddhāti** rāgavatthubhāvena gahetabbākāro subhanimittanti katvā “rūpādayo evā”ti avatvā paṭibaddhavacanaṃ vuttaṃ. Asatipi rāgavatthubhāve kusalavipākārammaṇaṃ **subhadhdātūti** dutiyo vikappo vutto. Sesāti manoviññāṇadhātusampayuttā.

Dhātudvayanirodhamattanti manoviññāṇadhātūnaṃ nirodhamattaṃ catutthārappa cittuppādanirodhabhāvato. Tadaññaviññāṇanirodho viya hi viññāṇadhātumanodhātūnaṃ nirodho samāpattibalasiddhoti katvā dhātudvayaggahaṇaṃ.

“**Dhammadhātumattan**”ti idaṃ kāmādhātuyā dhammadhātupariyāpannattā vuttaṃ. **Kāmapaṭisaṃyuttoti** kāmarāgasampayutto, ārammaṇakaraṇena vā kāmaguṇopasaṃhito. **Yaṃ etasmiṃ antareti** ye etasmiṃ avācīparanimmitavasavattiparicchinne okāse. Ogāḷhā hutvā adhobhāge ca okāse carantīti **etthāvacarā**. Aññattha carantāpi yathāvutte eva ṭhāne pariyāpannāti **ettha pariyāpannā**.

Nekkhammadhātu dhammadhātu eva vitakkapakke. **Sabbepi kusalā dhammāti** dānamayapuññakiriyato, silamayapuññakiriyato, pabbajjato ca paṭṭhāya yāva aggamaggādhigamā pavattā sabbepi anavajjadhammā. **Vihimsādhātu** cetanā, paraviheṭhanacchando vā. **Avihimsā** karuṇā.

Hīnāti hīlitā. **Paṇītāti** sambhāvitā. “Nātihīlitā nātisambhāvitā majjhimā”ti **khandhaniddese**¹ āgatā hīnadukato eva nīharitvā **majjhimā** dhātu vuttāti veditabbā. **Ubhopīti** dhammadhātumanoviññādhātuyo.

Viññādhātu yadipi chaviññādhātuvasena vibhattā, tathāpi viññādhātuggahaṇena tassa purecārikapacchācārikattā manodhātu gahitāva hotīti āha “**viññādhātu cakkhuviññādisattaviññādhātu saṅkhepoyevā**”ti. Anekesaṃ cakkhudhātu-ādīnaṃ, tāsū ca ekekissā nānappakāratāya nānādhātūnaṃ vasena **anekadhātu nānādhātu loko** vuttoti āha “**aṭṭhārasadhātuppabhedamattamevā**”ti.

521. **Cakkhusotaghānājivhākāyamanodhātumanoviññādhātubhedenāti** bahūsu potthakesu likhitā, kesuci “cakkhusotaghānājivhākāyamanomanoviññādhātubhedenā”ti. Tattha na cakkhādīnaṃ kevalena dhātusaddena sambandho adhippeto vijānanasabhāvassa pabhedavacanato. Viññādhātusaddena ca sambandhe kariyamāne dve manogahaṇāni na kātābāni. Na hi dve manoviññādhātuyo santi. Antarā vā manodhātugahaṇaṃ akatvā “cakkhu -pa- kāyamanoviññādhātumanodhātū”ti vattabbaṃ atulyayoge dvandasamāsābhāvato. Ayaṃ panettha pāṭho siyā “cakkhu -pa- kāyaviññāṇamanomano viññādhātubhedenā”ti. **Tassa** viññāṇassa yebhuyyena attavādino tassa ekamekassa attassa² advayataṃ, niccattaṅca pavedentīti anekatāniccatāpakāsaṇaṃ tesaṃ jīvasaññāsamūhananāya hoti. Khandhāyatanadesanā **saṅkhepadesanā**, indriyadesanā **vitthāradesanā**, tadubhayaṃ apekkhitvā ayaṃ **anatisaṅkhepavitthārā** dhātudesanā. Abhidhamme vā **suttantabhājanīye**³ vuttā dhātudesanā atisaṅkhepadesanā, ābhādhātu-ādīnaṃ anekadhātunānādhātu-antānaṃ vasena desetabbā ativitthāradesanā, tadubhayaṃ apekkhitvā ayaṃ anatisaṅkhepavitthārā.

Assā bhagavato. Saddhammatejasā vihatāṃ **saddhammatejavihataṃ**.

1. Visuddhi 2. 103 piṭṭhe.

2. Atthassa (Syā, Ka)

3. Abhi 2. 84 piṭṭhe.

522. **Sañkhatoti**¹ gaṇanato. **Jātitoti** cakkhubhāvasāmaññato. Atha vā **jātitoti** cakkhusabhāvato. Tenāha “**cakkhupasādo**”ti. **Vīsati dhammāti saṅkhamgacchati** vedanādīnaṃ abhinditvā gahaṇato. **Sesakusalākusalābyākata**viññāṇavasenāti ettha abyākatāpekkhāya sesaggahaṇaṃ, kusalākusalaṃ pana sabbaso aggahitamevāti.

523. **Tā ca** cakkhuviññāṇadhātu-ādayo **pañcapi**.

Purimehevāti² anantarādīhi eva. Javanamanoviññāṇadhātu pana javanamanoviññāṇadhātuyā āsevanapaccayenāpi paccayo hotīti vuttovāyamatto. **Dhammadhātūti** pana sahajāto vedanādikkhandho adhippeto. Tenāha “**sahajāta -pa- paccayo hoti**”ti. **Avigatādīhīti** ettha **ādi-**saddena manoviññāṇadhātuyā yathārahaṃ hetu-adhipatikammavipākāhārindriyajhānamaggapaccayabhāvo saṅgayhati. Tenāha “**bahudhā paccayo hoti**”ti. **Ekaccā ca dhammadhātu** sukhumarūpanibbānappakārā, yā ca sampayogānantarabhāvādīnaṃ abhāvena ārammaṇakaraṇe yogyā. Pañcadvārikavipākavajjanatthaṃ “**ekaccāya manoviññāṇadhātuyā**”ti vuttaṃ, manodvārikā pana vipākāpi tadārammaṇabhūtā ekaccaṃ dhammadhātuṃ ārabha pavattatīti³. Atha vā “**ekaccāya manoviññāṇadhātuyā**”ti idaṃ sabbaṃ kāmāvacarakusalaṃ kāmāvacarakiriyaṃ abhiññādvayaṃ āruppadvayanti evarūpaṃ manoviññāṇadhātuṃ sandhāya vuttaṃ, lokuttaramanoviññāṇadhātuyā pana ekaccā dhammadhātu ārammaṇapaccayoti pākaṭoyamatto. Cakkhuviññāṇadhātu-ādīnaṃ cakkhādīnaṃ yathāvuttapaccayadhammato atirekepi paccayadhamme dassetuṃ “**na kevalan**”ti-ādi āradhaṃ. Tattha **ālokādayoti** āloko nāma sūriyālokādi. Tassa suttantanayena upanissayabhāvo veditabbo, evaṃ sesānipi.

Vivaraṃ nāma visesato sotabilaṃ. **Vāyu** gandhūpasamharaṇakavāto, **āpo** mukhe pakkhitta-āhārassa temanaka-udakaṃ. **Pathavī** kāyappasādassa nissayabhūtā pathavīdhātu. **Bhavaṅgamaṇaṃ** dvikkhattuṃ calitaṃ bhavaṅgacittaṃ. Sabbattha **manasikāro** āvajjanamanasikāro.

1. Saṅkhātoti (Ka)

2. Purimehīti (Ka)

3. Pavatteyyāti (Sī, Ka)

524. Avisesato daṭṭhabbākārassa vuccamānattā āha “**sabbā evā**”ti. Visesato vipassanāya bhūmivicāro esoti “**saṅkhatā**”ti visesitaṃ. **Pubbantāparantavivittatoti** ettha **pubbanto** nāma atīto addhā, **aparanto** nāma anāgato. Ubhayattha ca saṅkhatā dhātuyo sabhāvavivittā anupalabbhamānasabhāvattā. **Pubbanto** vā sabhāvadhammassa udayo tato pubbe avijjamānattā. **Aparanto** vayo tato param abhāvato. Tasmā **pubbantāparantavivittatoti** pākābhāvato¹ viddhamāsbhāvato¹ vuttaṃ hoti.

Bheritalaṃ viya cakkhudhātu saddassa viya viññāṇassa nissayabhāvato. Ādāsatalādīsipi eseva nayo. **Yantaṃ** nāma ucchuyantaṃ. **Cakkayaṭṭhīti** tilamantaṃ āha. So hi acakkabandhopi taṃsadiatāya cakkayaṭṭhīteva vuccati, cakkabandhameva vā sandhāya tathā vuttaṃ. Imāhi ca upamāhi nijjivānaṃ bheritaladaṇḍādīnaṃ samāyoge, nijjivānaṃ saddādīnaṃ viya nijjivānaṃ cakkhurūpādīnaṃ samāyoge nijjivānaṃ cakkhuvīññādīnaṃ pavattīti kāraṇaphalānaṃ dhātumattataṃ, kārakavedakavirahaṅca dasseti.

Purecarānucarā viyāti nijjivassa kassaci keci nijjivā purecarānucarā viyāti attho. Manodhātuyeva vā attano khaṇaṃ anativattantī attano khaṇaṃ anativattantānaṃyeva cakkhuvīññādīnaṃ avijjamānāyapi purecarānucarābhisandhiyaṃ anantarapubbakālāparakālatāya purecarānucarā viya daṭṭhabbā.

Channañhi viññāṇadhātūnaṃ ekajjhaṃ anekānantarapaccayābhāvato ekajjhaṃ uppatti-abhāvo viya aññamaññānantarapaccayatābhāvato anantaruppattipi natthi. Yadi siyā, chaḷārammaṇasannidhāne manasikāramantarenāpi chaḷārammaṇūpaladdhi siyā, na ca hoti, tasmā dassanādi-anantaraṃ savanādīnaṃ abhāvo viya manoviññāṇadhātānantaraṃ na dassanādīni, na ca dassanādi-anantaraṃ manoviññāṇadhātu hoti. Tattha bhavaṅgassa, dassanādīnaṃ bhinnārammaṇatāya manoviññāṇadhātānantaraṃ dassanādīni, dassanādīnaṃ anantaraṅca savanādīni na uppajjantīti yuttametam. Dassanādīnaṃ, pana santīraṇassa ca abhinnavisayatāya dassanādi-anantaraṃ na manoviññāṇadhātu hotīti

1. Pāgabhāva... (Sī), pārābhāvato (Ka)

ayuttanti? Nayidamevaṃ niyatāniyatavisayānaṃ bhinnavisayabhāvūpapattito. Yadi ca dassanādi-anantaraṃ kāci viññāṇadhātu uppajjeyya, sāpidassanādidvāratāya dassanādiviññāṇadhātu eva siyā, na manoviññāṇadhātu, tato ca dassanādikiccavidhuraṃ cintanaṃ manananti manodvārappavattānaṃ mananakiccāpariccāgo viya dassanaviññāṇadhātuyā dassanakiccāpariccāgo āpajjati. Tathā tadanantarassāti sabbāyapi dassanaviññāṇabhāvato cha viññāṇakāyā na bhaveyyum.

Yathā pana manoviññāṇadhātānantaraṃ manodhātu, tato cakkhuviññāṇādīni, evaṃ dassanaviññāṇadhātānantaraṃ manodhātu, tato sotaviññāṇādīni hontīti ce? Na, manodhātuyā dassanadhātubhāvappasaṅgato. Yathā hi manaso nibbisesāvattā mananamattatāya manodhātu, evaṃ dassanassa nibbisesāvattā dassanamattatāya dassanadhātu siyā. Tañca cakkhuviññāṇaṃ rūpavisayanti saddādivisayābhogābhāvato savanaviññāṇādīnaṃ asambhavo. Tato ca rūpārammaṇapasutameva viññāṇaṃ siyā manoviññāṇaṃ viya dassanaviññāṇādīnaṃ samānavatthubhāvappasaṅgato, aññavatthusannissitañca viññāṇaṃ na siyā, na cetanaṃ yuttanaṃ. Tasmā sukhadukkhaṇaṃ viya upekkhā cakkhuviññāṇādīnaṃ, manoviññāṇassa ca byavadhāyikā **manodhātu** daṭṭhabbā, na cassā upekkhāya viya adukkhamasukhatā adassanādi-amananatā, atha kho mananakiccāvisesato manoviññāṇasabhāgatā. Mano hi hadayavatthumhi vattamāno aññavatthusannissitānaṃ viññāṇaṃ visayaṃ dassetvā nivattamāno aggiviya usumamatte mananamatte ṭhatvā nivattati, aññavatthusannissitaviññāṇanirodhe ca uṭṭhahanto aggi viya usumamatte¹ uṭṭhahati. Paccayānurūpapavattikāni ca mananamattāni manoviññāṇadhātuyā antāni hontī. Paṭighasaññāsahagatānañhi pañcannaṃ viññāṇaṃ indriyārammaṇapaṭighātājatāya abhinipātamattakiccaṃ, mananalakkhaṇindriyasamuppannaṃ ca manoviññāṇassa visayavicintanāsambhūtāya tadanurūpā cintanā. Tasmā abhinipātappaccayapaṭighaṭṭanāni ghaṃsabalena bhavaṅgalakkhaṇaṃ cittaṃ calanāvattaṃ hutvā nivattamānaṃ cintanāvisesavirahato abhinipātānugūṇaṃ cintanāvasānaṃ mananamattaṃ uppādeti.

1. Usumamatte mananamatte ṭhatvā (Sya)

Dassanādipi abhinipātamattaṃ dutiyaṃ khaṇaṃ anativattamānaṃ atānugunaṃ cintanāmananasamaññāviraḥato dassanādi-abhinipātavisesavicittaṃ cittabhāvādinā samānaṃ cintanādimananamattaṃ aññavattusminnibbatteti, tasmā vatthukiccehi taṃsabhāgatāya taduparamodayatāya, tadantāditāya ca manoviññāṇakāyasaṅgahitāpi manodhātu manodvāranikkhama¹ pavesabhūtā ārammaṇantare dvārantaramanasikāratabbisayasampaṭicchanaabhāvena pañcannaṃ viññāṇadhātūnaṃ yathākkamaṃ purecarā, anucarāti ca vuttā. Sā panāyaṃ satipi viññāṇabhāve manaso sambhūya visiṭṭhamananakiccābhāvato dhātubhāvasāmaññena manomattā dhātu **manodhātūti** vuccati.

Yathāvutteneva ca hetunā mattasaddalopaṃ katvā viññāṇaṭṭhayogato manomattaṃ viññāṇanti manoviññāṇakāyasaṅgahopi cassā yujjati eva. Aññaviññāṇehi, pana dvārārammaṇehi ca visesanatthaṃ “manodhātū”ti vuttāti. **Manoviññāṇadhātūti** pana viññāṇadhātuvisesanaṃ manogahaṇaṃ. Dhātuvisesanatthe ca manoviññāṇaggahaṇe viññāṇavisesanaṃ dvārabhūtamanodassanamevāti dvārasamaññārahattā na manodhātūti vuccati. Tañhi manodvārantogadhaṃ, na ca dassanādipurecarānucaranti manaso viññāṇadhātu, manaso viññāṇanti ca manodvārasamaññārahaṃ, savisesaṅca tassa mananakiccaṃ, viññāṇakiccaṅcāti mattasaddassa lopamantarena “manoviññāṇaṇ”ti, nijjivabhāvavibhāvanatthaṃ “manoviññāṇadhātū”ti ca vuccatīti.

Sallamiva sūlamiva tividhadukkhatāsamāyogato **daṭṭhabbo**. **Vedanāsallasūlayogāti** vedanāsaṅkhātāsallasūlayogato. **Āturā viyāti** tena āturibhūtā puggalā viya. Āsāyeva dukkhaṃ **āsādukkhaṃ**, āsāvighātaṃ dukkhaṃ vā. Saññā hi asubhādikampi² subhādito sañjānanti āsaṃ, tassā ca vighātaṃ āsāsitasubhādi-asiddhiyā janetīti. Vanamigo tiṇapurisaṃ purisoti gaṇhanto **ayathābhuccanimittaggāhako**, tathā saññāpīti āha “**vanamigo viyā**”ti. Kammaṇapadhānā saṅkhārāti “**paṭisandhiyaṃ pakkhipanato**”ti-ādi vuttaṃ. **Jātidukkhānubandhatoti** attanā nibbattiyamānena jātidukkhena anubandhattā. Bhavapaccayā jāti hi jātidukkhanti. Padumaṃ viya dissamānaṃ khuracakkaṃ viya

1. Niggama (Sī), nigama (Syā) 2. Abhūtampi subhādiṃ (Sī), asubhaṃ dukkhampi (Syā)

rūpampi itthi-ādibhāvena dissamānaṃ nānāvidhupaddavaṃ janeti. Sabbe anathā rāgādayo, jāti-ādayo ca visayabhūtā, anupasantā, sappaṭibhayā cāti. Tappaṭipakkhabhūtattā **asaṅkhatā dhātu amatādito** daṭṭhabbā.

Vavatthānābhāvo “idameva imassa ārammaṇaṃ”ti niyamābhāvo, tena yathā araṇṇamakkato kenaci anivārito gahitaṃ ekaṃ rukkhasākhaṃ muñcitvā aññaṃ gaṇhāti, tampi muñcitvā aññanti katthaci anavaṭṭhito paribbhamati, evaṃ gahitaṃ ekaṃ ārammaṇaṃ muñcitvā aññaṃ, tampi muñcitvā aññanti anavaṭṭhitatā, ārammaṇaṃ aggahetvā pavattitum asamatthatā ca makkaṭasamānatāti dasseti. Aṭṭhivedhavidhopi uppathaṃ anugacchanto duṭṭhasso **assakhaḷuṅko**. **Yatthakāmanipātito**ti yattha katthaci icchitārammaṇe nipātibhāvato. Nānāvesadhārī **raṅganaṭo**¹.

Āyatanadhātuniddesavaṇṇanā niṭṭhitā.

Iti pannarasamaparicchedavaṇṇanā.

1. Nānāvesadhārī raṅgagato raṅgannaṭo (Sī)

16. Indriyasaccaniddesavaṇṇanā

Indriyavithhārahakathāvaṇṇanā

525. **Bāvīsati**ti gaṇanaparicchedo. **Indriyānī**ti paricchinnadhammanidassanaṃ. **Cakkhundriyanti**-ādi tesaṃ sarūpadassanaṃ. Tattha cakkhudvāre indaṭṭhaṃ kāreti cakkhudvārabhāve taṃdvārikehi attano indabhāvaṃ paramissarabhāvaṃ kārayatīti **cakkhundriyaṃ**. Tañhi te rūpaggaḥaṇe attānaṃ anuvatteti, te ca taṃ anuvattanti. Sesesupi eseva nayo. Tasmā sotaghānajiḥvākāyadvāre indaṭṭhaṃ kāretīti **kāyindriyaṃ**. Vijānanalakkhaṇe indaṭṭhaṃ kāretīti **manindriyaṃ**. Itthibhāvalakkhaṇe, purisabhāvalakkhaṇe, anupālanalakkhaṇe, sukkhalakkhaṇe, dukkhalakkhaṇe, somanassalakkhaṇe, domanassalakkhaṇe, upekkhālakkhaṇe, adhimokkhalakkhaṇe, paggahalakkhaṇe, upaṭṭhānalakkhaṇe, avikkhepalakkhaṇe, dassanalakkhaṇe, anaññātaṃ ñassāmīti pavatte jānanalakkhaṇe, ñātānaṃ eva dhammānaṃ puna ājānane aññātāvibhāve indaṭṭhaṃ kāretīti **aññātāvindriyaṃ**.

Vijāniyāti vijāneyya. **Bhūmito cāti ca**-saddo avuttasampiṇḍanattho, tena tāvatvaṃ saṅgaṇhāti, taṃ pana tāvatvaṃ parato vaṇṇayissāma. Asammasanupagānampi atthibhāvato daṭṭhabbatā idha na gahitā.

Pubbabhāgeti ariyamaggato pubbabhāge. **Anaññātanti** na aññātaṃ na adhigataṃ. Niccatāya natthi etassa mataṃ bhaṅgo, na vā etasmim adhigate maraṇanti amataṃ, pajjitabbato padañcāti **amatapadaṃ** nibbānaṃ. “**Evam paṭipannassa uppajjanato**”ti etena pubbabhāgavasenetāṃ indriyaṃ evaṃ voharīyatīti dasseti. **Ājānanatoti** paṭhamamaggena diṭṭhamariyādaṃ anatikkamitvāva jānanato. Yena taṃsamaṅgipuggalo, taṃsampayuttadhammā vā aññātāvino honti, so aññātāvibhāvo pariniṭṭhitakiccajānanakhīṇāsavassa bhāvabhūto hutvā uppattito “**khīṇāsavassa uppajjanato**”ti vuttaṃ.

Liṅgeti gameti ñāpetīti liṅgaṃ, liṅgiyati vā etenāti liṅgaṃ. Kim liṅgeti, kim vā liṅgiyatīti? Inda, indo vā. Indassa liṅgaṃ indaliṅgaṃ, indaliṅgassa attho taṃsabhāvo **indaliṅgaṭṭho**, indaliṅgameva vā

indriyasaddassa atthoti **indaliṅgaṭṭho**. Sajjitaṃ uppāditanti siṭṭhaṃ, indena siṭṭhaṃ **indasiṭṭhaṃ**. **Juṭṭhaṃ** sevitaṃ. Kammasaṅkhātassa indassa liṅgāni, tena ca siṭṭhānīti kammajāneva yojetabbāni, na aññāni, te ca dve atthā kamme eva yojetabbā, itare ca bhagavati evāti āha “**yathāyogan**”ti. **Tenāti** bhagavato, kamma ca indattā. **Etthāti** etesu indriyesu. **Ulliṅgenti** nāpenti pakāsenti phalasampattivipattihi kāraṇasampattivipatti-avabodhato. “So taṃ nimittaṃ āsevatī”ti-ādīsu¹ gocarākaraṇampi āsevanā vuttāti āha “**kānici gocarāsevanāyā**”ti. Tattha sabbesaṃ gocarikātabbattepi “kānici”ti vacanaṃ avipassitabbānaṃ bahulaṃ manasikaraṇena anāsevanīyattā. Paccavekkhaṇāmattameva hi tesu hotīti. “Tassa taṃ maggaṃ āsevato”ti-ādīsu² bhāvanā āsevanāti vuttāti bhāvetabbāni saddhādīni sandhāyāha “**kānici bhāvanāsevanāyā**”ti.

Ādhipaccaṃ indriyapaccayabhāvo. Asatipi ca indriyapaccayabhāve itthipurisindriyānaṃ, attano attano paccayavasena pavattamāne³ taṃsahitasantāne aññākārena appavattamānehi liṅgādīhi anuvattaniyabhāvo ādhipaccaṃ. Imasmiṃ ca atthe indanti paramissariyaṃ karonticceva **indriyāni**. Cakkhādīsu dassitena nayena aññesaṅca jīvitādīnaṃ tadanuvatthīsu ādhipaccaṃ yathārahaṃ yojetabbāni.

Amohoyeva na visuṃ cattāro dhammā, tasmā tassa saṅkhārakkhandhakathāyaṃ vibhāvītāni lakkhaṇādīni tesaṅca veditabbānīti adhippāyo **sesāni tattha** khandhaniddese lakkhaṇādīhi **sarūpeneva āgatāni**.

526. Sattānaṃ ariyabhūmipaṭilābho bhagavato desanāya sādharmaṇaṃ, padhānaṅca payojananti āha “**ajjhattadhamme pariññāyā**”ti-ādī. Aññesampi indriyānaṃ attabhāvapariyāpannatāya satipi attabhāvapaññāpanāya mūlabhāvato cakkhādīnaṃ sātīsayā attabhāvapariyāpannāti vuttamā “**attabhāvapariyāpannāni cakkhundriyādīni**”ti **abhidhammaṭṭhakathāyaṃ**⁴ itthipurisindriyānantaraṃ jīvitindriyadesanākkamo

1. Am 3. 217 piṭṭhe.

3. Pavattamānehi (Sī, Syā)

2. Am 1. 475 piṭṭhe.

4. Abhi-Ṭṭha 2. 119 piṭṭhe.

vuttoti idhāpi “**tato jīvitindriyan**”¹ti vuttaṃ. Taṃ indriyayamakadesanāya¹ sameti. **Indriyavibhaṅge**² pana manindriyānantaraṃ jīvitindriyaṃ vuttaṃ, taṃ purimapacchimānaṃ ajjhattikabāhirānaṃ anupālakabhāvadīpanatthaṃ tesāṃ majjhe vuttanti veditabbaṃ. **Yañca kiñci vedayitaṃ, sabbaṃ taṃ dukkhaṃ**. Yāva ca duvidhattabhāvānupālakassa jīvitindriyassa pavatti, tāva dukkhabhūtānaṃ etesaṃ vedayitānaṃ anivattīti nāpanatthaṃ, tena ca cakkhādīnaṃ dukkhānubandhatāya pariññeyyataṃ nāpeti.

Paṭipattidassanatthanti pubbhāgapaṭipattidassanatthaṃ. **Tassevāti** anaññātaññassāmīti indriyasēva. **Tato anantaraṃ bhāvetabbattā**³ti bhāvanāmaggasampayuttaṃ aññindriyaṃ sandhāya vuttaṃ. Dassanānantarā hi bhāvanāti.

Bhedoti idha sabhāvato⁴ bhedo adhippeto, na bhūmipuggalādivasenaṃ āha “**sesānaṃ abhedo**”⁵ti. Nanu ca jīvitindriyassa anupālanalakkhaṇaṃ sabhāvo, tenassa duvidhassāpi abhedoti? Saccametaṃ, tassa pana rūpārūpasabhāvakato bhedo gahito, na evaṃ sesānaṃ koci bhedo atthīti tesāṃ abhedoti bhedābhāvo vutto. Nanu cettha vedanā, paññā ca bhinditvā vuttāti? Na, yathā desitesu bāvisatiyā indriyesu bhedābhedassa adhippetattā.

527. Cakkhundriyādīnaṃ satipi purejātādipaccayabhāve indriyapaccayabhāvena sādhetabbameva kiccaṃ **kiccanti** vuttaṃ⁵ tassa anaññasādharaṇattā, indriyakathāya ca adhikatattā. Attano tikkhamandādi-ākāro attākāro, tassa anuvattāpanaṃ **attākārānuvattāpanaṃ**. Tenāha “**tikkhamandādisaṅkhāta-attākārānuvattāpanan**”⁶ti. Atha vā tikkhamandādisaṅkhātassa ca attākārassa ca anuvattāpanaṃ **tikkha -pavattāpanaṃ**. Visuṃ attākāraggahaṇena cettha rūpāvabhāsanādikassa saṅgaho daṭṭhabbo. Cakkhundriyassa hi rūpābhīhananayogyatāsaṅkhāte rūpāvabhāsanāsāmatthiye asati na kadācīpi cakkhuviññāṇassa dassanakkiccaṃ sambhavati. Esa nayo sotindriyādīsipi. Pubbaṅgamabhāvena manindriyassa **vasavattāpanaṃ** hoti, na aññesaṃ. Taṃsāmpayuttānīpi hi indriyāni tabbaseneva⁶ hutvā attano attano indriyakiccaṃ sādheti cetāsikabhāvato, na tesāṃ vasena

1. Abhi 7. 73 piṭṭhe.

2. Abhi 2. 128, 131 piṭṭhesu.

3. Bhāvetabbato (Sī, Ka)

4. Bhāvakato (Sī)

5. Āha (Syā, Ka)

6. Tabbasāneva (Sī, Syā)

manindriyaṃ. Ayañhissa pubbaṅgamatā. Sabbattha ca indriyapaccayabhāvena sādhetabbanti adhikāro anuvattatīti daṭṭhabbo. Satipi anuppādane, anupatthambhane ca tappaccayānaṃ tappavattane nimittabhāvo **anuvindhānaṃ**.

Chādetvā pharivā uppajjamānā sukhadukkhavedanā sahaṅgādamme abhibhavitvā ajjhottharivā sayameva pākaṭā hoti, sahaṅgādamhā ca tassā vasena sukhadukkhabhāvappattā viya hontīti āha “**yathāsakaṃ oḷārikākārānupāpanaṃ**”ti. Asantassa, apaṇitassapi akusalatabbipākādisampayuttassa yathārahaṃ **majjhakkārānupāpanaṃ** yojettabbāṃ. Samānāṅgāyehi vā sukhadukkhāyehi **santapaṇitākārānupāpanaṃ** daṭṭhabbāṃ. **Paṭipakkhābhivhavananti** assaddhiyādiṭṭhābhivhavanānaṃ. **Pasannākārādīti** pasannapaggahita-upaṭṭhitasamāhitadassanākārānupāpanaṃ yathākkamaṃ saddhādānaṃ. **Byāpādādīti ādi-**saddena uddhambhāgiyasāmyojanāni gahitāni. Maggasampayuttasseva ca aññindriyassa kiccaṃ dassitaṃ. Teneva ca phalasampayuttassa taṃtaṃsāmyojanappaṭippassaddhipahānakiccatā dassitā hotīti. Katasabbakiccassa aññātāvindriyaṃ aññassa kātabbassa abhāvā amatābhimukhameva tabbhāvapaccayo ca hoti, na itarāni viya kiccantarapasutaṃ. Tenāha “**amatābhimukhābhāvapaccayatā cā**”ti.

528. **Bhūmito** vinicchayo uttānattho eva. Etthāhākaṃ pana ettakeneva indriyāni vuttāni, etāni eva ca vuttānīti? Ādhipaccaṭṭhavasena, **ādhipaccaṃ** nāma issariyanti vuttamevetāṃ. Tayidaṃ ādhipaccaṃ attano attano kicce, phale cāti aññesampi sabhāvadhammānaṃ kasmā na labbhati? Paccayādhīnavuttikā hi paccayuppannāti siyā phalahetudhammesu anuvattanānuvattanīyatīti? Saccametāṃ, tathāpi atthi tesāṃ viśeso. Svāyaṃ “cakkhuvīññāḍippavattiyāñhi cakkhādānaṃ siddhamādhipaccaṃ”ti-ādina¹ **aṭṭhakathāyaṃ** dassitoyeva. Apica khandhapañcake yāyaṃ sattapaññatti, tassā viśesanissayo “cha ajjhātikāni āyatanāni”ti tānītvā ādhipaccattaṃ upādāya “cakkhundriyaṃ -pa- manindriyaṃ”ti-ādito² vuttāni. Svāyaṃ attabhāvo imesaṃ vasena “itthi puriso”ti samaññaṃ labhatīti

1. Abhi-Ṭṭha 2. 119 piṭṭhe.

2. Abhi 2. 128 piṭṭhe.

dassanattham bhāvadvayaṃ. Tayime upādinnadhammā yena dhammena pavattanti, ayaṃ so dhammo tesam ṭhitihetūti dassanattham jīvitindriyaṃ. Svāyaṃ sattasaññito dhammapuñjo pabandhavasena pavattamāno imāhi vedanāhi saṅkilissatīti dassanattham vedanāpañcakaṃ. Tato visuddhikāmānaṃ vodānasambhārādassanattham saddādipañcakaṃ. Sambhavavodānasambhārā imehi visujjhanti, visuddhippattā niṭṭhitakiccava hontīti dassanattham anaññātaññassāmītindriyādīni tīṇi vuttāni. Sabbattha “ādhipaccattaṃ upādāyā”ti padaṃ yojetabbaṃ. Ettāvata ādhippetatthasiddhīti aññesaṃ aggahaṇaṃ.

Atha vā pavattinivattīnaṃ nissayādidassanatthampi etānīyeva vuttāni. Pavattiyā hi visesato mūlanissayabhūtāni cha ajjhattikāyatanāni. Yathāha “chasu loko samuppanno”ti-ādi¹. Tassa uppatti itthipurisindriyehi visabhāgavatthusarāganimittehi² yebhuyyena sattakāyassa abhinibbatti. Vuttañhetam “tiṇṇaṃ kho mahārāja sannipātā gabbhassa avakkanti hoti mātā ca utunī hoti, gandhabbo ca paccupaṭṭhito hoti, mātāpitāro ca sannipatitā hontī”ti-ādi³. Avaṭṭhānaṃ jīvitindriyena tena anupāletabbato. Tenāha “āyu ṭhiti yapanā yāpanā”ti-ādi⁴. Upabhogo vedanāhi. Vedanāvasena hi iṭṭhādisabbavisayūpabhogo. Yathāha “vedayati vedayatīti kho bhikkhave tasmā vedanāti vuccatī”ti⁵. Evaṃ pavattiyā nissayasamuppādaṭṭhitisambhogadassanattham cakkhundriyaṃ yāva upekkhindriyanti cuddasindriyāni desitāni. Yathā cetāni pavattiyā, evaṃ itarāni nivattiyā. Vivaṭṭasannissitena hi nibbattitāni saddhādīni pañcindriyāni nivattiyā nissayo. Uppādo anaññātaññassāmītindriyena tassa nivattivasena paṭhamam uppajjanato. Avaṭṭhānaṃ aññindriyena, upabhogo aññātāvindriyena aggaphalasangamupabhogato. Khīṇāsavā hi visavitāya nibbutisukhaṃ paribhuñjanti. Evampi etāni eva indriyāni desitāni. Ettāvata yathādhippetatthasiddhito aññesaṃ aggahaṇaṃ. Imināva nesaṃ desanākkamopi samvaṇṇitoti veditabboti.

Indriyaniddesavaṇṇanā niṭṭhitā.

1. Khu 1. 304 piṭṭhe Suttanipāte.

2. Visabhāgavatthusarāganimittehi (Anuṭṭikā)

3. Ma 1. 332; Khu 11. 126 piṭṭhesu.

4. Abhi 1. 20 piṭṭhe.

5. Ma 1. 367 piṭṭhe.

Saccavittḥārakathāvaṇṇanā

529. Ariyasaddena visesanaṃ akatvā kevalaṃ saccasaddena uddiṭṭhānīpi ariyasaccāni evāti dassento “**saccānīti cattāri ariyasaccāni**”ti āha. Sāmaññajotanā hi visese avatiṭṭhati, visesatthinā ca viseso anupayuñjītabboti. Ariyasaccesu vā vicāritesu itarānīpi atthato vicāritāneva hontīti vipassanāya ca bhūmibhūtāni, ariyasaccānevāti ca katvā “saccāni”ti uddharitvāpi “**cattāri ariyasaccāni**”ti vuttaṃ.

Sāsanakkamoti ariyasaccāni vuccanti, ariyasaccadesanā vā. Sakalañhi sāsanaṃ bhagavato vacanaṃ saccavinimuttaṃ natthi pavattinivattitadubhayahetusandassanavasena pavattanato. Tasmā saccesu kamati, sīlasamādhipaññāsāṅkhātā vā sāsanaṃ etesu kamati, pariññādikkasādhanavasena pavattati, tasmā kamati etthāti kamo, kim kamati? Sāsanaṃ. Sāsanaṃ kamo “**sāsanakkamo**”ti saccāni sāsanaṃ pavattiṭṭhānāni vuccanti, taṃdesanā ca tabbohārenāti.

Tathāti taṃsabhāvā dukkhādisabhāvā. **Avitathāti** amusāsabhāvā bādhanādibhāvena bhūtasabhāvā. **Anaññathāti** aññākārahitā abādhanādi-ākāravivittā. Dukkhadukkhātānimitatāhi adhiṭṭhitatā¹ **pīḷanaṭṭho**. Samecca sambhūya paccayehi katabhāvo **saṅkhatatṭho**. Dukkhadukkhātānimitatāhi paridahanam, kilesadāhasamāyogo vā **santāpaṭṭho**. Jarāya, maraṇena cāti dvedhā vipariṇāmetabbatā **vipariṇāmatṭho**. Ettha ca pīḷanaṭṭho dukkhassa saraseneva āvibhavanākāro, itare yathākkamaṃ samudayamagganīrodhadassanehi āvibhavanākārāti ayaṃ catunnampi viseso. Tatratatrābhinandanavasena byāpitvā ūhanaṃ rāsikaraṇam dukkhassa nibbattanaṃ **āyūhanaṃ** ākāressa byāpanattatā. Āgacchati samudayatoti vā ayaṃ, dukkham, tassa ūhanaṃ pavattanaṃ **āyūhanaṃ**, ayaṃ saraseneva āvibhavanākāro. Nidadāti dukkhanti **nidānam**, “idaṃ taṃ dukkhan”ti sampañicchāpentam viya samuṭṭhāpetīti attho. Ayaṃ **nidānatṭho** dukkhadassanena āvibhavanākāro. Saṃsāradukkhena saṃyojanaṃ

1. Anīṭṭhatā (Sī, Syā, Ka)

saṃyogaṭṭho. Maggādhigamanivāraṇaṃ **palibodhaṭṭho.** Ime ca saṃyogapalibodhaṭṭhā nirodhamaggadassanehi āvibhavanākārā. Nissaranti sattā ettha, sayameva vā nissaṭaṃ visaṃyuttaṃ sabbasaṅkhathehi sabbūpadhipaṭṭinissaggabhāvatoti **nissaraṇaṃ.** Ayamassa sabhāvena āvibhavanākāro, itare vivekāsaṅkhatāmataṭṭhā, samudayakkhaya-apaccaya-avināsitā vā samudayamaggadukkhadassanena āvibhavanākārā.

Saṃsārato niggamanam **niyyānaṃ.** Ayamassa sarasena āvibhavanākāro. Palibodhūpacchedanena nibbānādhigamova nibbānanimittatā maggassa **hetuṭṭho.** Paññāpadhānattā cassa nibbānadassanaṃ, catusaccadassanaṃ vā **dassanaṭṭho.** Catusaccadassane, kilesadukkkhasantāpavūpasamane ca ādhipaccaṃ karonti maggadhammā sampayuttadhammesūti so maggassa **ādhipateyyaṭṭho**¹. Visesato vā ālambanādhipatibhūtā maggadhammā honti “maggādhipatino”²ti vacanatoti so tesam ākāro **ādhipateyyaṭṭho.** Ete hetudassanādhipateyyaṭṭhā samudayanirodhadukkhadassanehi āvibhavanākārā. Evamādi āhāti sambandho. **Abhisamayāṭṭhoti** abhisametabbaṭṭho, abhisamayassa vā visayabhūto attho **abhisamayāṭṭho.** Atha vā abhisamayassa pavatti-ākāro **abhisamayāṭṭho.** So cettha abhisametabbena pīḷanādinā dassitoti daṭṭhabbo.

530. Icchitaṃ khaṃ **dukkhaṃ,** gārayhaṃ hutvā asāranti attho.

“**Samāgamo sametan**”ti-ādīsū kevalassa **āgama-saddassa, eta-saddassa** ca payoge saṃyogathassa anupalabbhanato, **saṃ-saddassa ca** saṃyoge upalabbhanato “**saṃyogaṃ dīpeti**”ti āha anvayato, byabhirekato ca tadatthajotakatāsiddhito. **Uppannaṃ uditanti** etthāpi esevanayo. **Aya-saddo** gati-atthe siddho hetusaddo viyakāraṇaṃ dīpeti. Attano phalanipphādanena ayati pavattati, eti vā etasmā phalanti **ayoti, saṃyoge uppatti-kāraṇaṃ samudayoti.** Ettha visum payujjamānāpi upasaggasaddā sadhātukaṃ saṃyogatham, uppādatthañca dīpentī, kiriyāvisesakattāti veditabbā.

1. Adhipateyyaṭṭho (Ka)

2. Abhi 1. 3 piṭṭhe.

“**Abhāvo ettha rodhassāti nirodho**”ti etena nibbānassa dukkhavivittabhāvaṃ dasseti. **Samadhigate** tasmim̄ tadadhigamato puggalassa rodhābhāvo pavattisaṅkhātassa rodhassa paṭipakkhabhūtāya nivattiyā adhigatattāti. Etasmiṅca atthe abhāvo etasmim̄ rodhassāti **nirodho** icceva padasamāso. Dukkhabhāvo panettha puggalassa, na nibbānasseva. Anuppādo eva nirodho **anuppādanirodho**. Āyatim̄ bhavādīsu appavatti, na pana bhaṅgoti bhaṅgavācakaṃ nirodhasaddaṃ nivattetvā anuppādavācakaṃ gaṇhāti. Etasmim̄ atthe kāraṇe phalūpacāraṃ katvā nirodhapaccayo nirodhoti vutto.

Paṭipadā ca hoti puggalassa dukkhanirodhappattiyā. Nanu casā eva dukkhanirodhappattī tassā eva sā paṭipadāti na yujjatīti? Na puggalādhigamassa pattibhāvena, yehi so adhigacchati, tesam̄ kāraṇabhūtānaṃ paṭipadābhāvena ca vuttattā. Sacchikiriyāsacchikaraṇadhammānañhi aññatthābhāvepi puggalasacchikiriyādhammabhāvehi nānattaṃ katvā niddeso katoti. Atha vā yaṃ dukkhanirodhappattiyā niṭṭhānaṃ phalaṃ, sayañca dukkhanirodhappattibhūtaṃ, tassa abhisamayabhūtāya dukkhanirodhappattiyā paṭipadatā daṭṭhabbā.

531. **Buddhādayo ariyā paṭivijjhantīti** ettha paṭividdhakāle pavattaṃ buddhādivohāraṃ “agamā rājagahaṃ buddho”ti-ādīsu¹ viya bhāvini bhūte viya upacāroti purimakālepi āropetvā “buddhādayo”ti vuttaṃ. Te hi buddhādayo catūhi maggehi paṭivijjhantīti. **Tasmā ariyasaccānīti vuccantīti** ettha ariyapaṭivijjhitaḃbāni saccāni ariyasaccānīti purimapade uttarapadalopo daṭṭhabbo. **Tasmāti** tathāgatassa ariyattā tassa saccānīti ariyasaccānīti vuccantīti attho. Tathāgatena hi sayam̄ adhigatattā, paveditattā, tato eva ca aññehi adhigamanīyattā tāni tassa hontīti. **Ariyabhāvasiddhitopīti** ettha ariyasādhakāni saccāni ariyasaccānīti pubbe viya uttarapadalopo daṭṭhabbo. **Ariyāni saccānītipīti** ettha avitathabhāvena araṇīyattā adhigantabbattā ariyāni, ariyasamaññā vā avisaṃvādake avitathe niruḷhā daṭṭhabbā.

532. **Bādhanalakḥaṇanti** ettha dukkhadukkhatanimittabhāvo, udayavayapaṭipīḷitabhāvo vā bādhanam. Bhavādīsu jāti-ādivasena, cakkhurogādivasena ca anekadhā dukkhassa pavattanameva puggalassa santāpanam, tadassa kiccam rasoti **santāpanarasaṃ**. Pavattinivattīsu saṃsāravimokkhesu pavatti hutvā gayhatīti **pavattipaccupaṭṭhānam**. Pabhavati etasmā dukkham nibbattati, purimabhavena pacchimabhavo ghaṭito saṃyutto hutvā pavattatīti **pabhavo**. “Evampi taṇhānusaye anūhate, nibbattati dukkhamidaṃ punappunan”¹ti evaṃ punappunam uppādanam **anupacchedakaraṇam**. Bhavanissaraṇanivāraṇam **palibodho**. Taṇhakkhayādibhāvena² sabbadukkhasantatā **santi**. **Accutirasanti** accutisampattikam, acavana kiccam vā. **Kiccanti** ca cavanābhāvam kiccamiva katvā pariyāyena vuttam, acavanañcassa sabhāvāpariccajanam avikāritā³ daṭṭhabbā. Pañcakkhandhanimittasuññatāya aviggaham hutvā gayhatīti **animittapaccupaṭṭhānam**. Anusayasamucchindanena saṃsāracārakato niggamanūpāyabhāvo **niyyānam**. Sabbakilesānam anuppādanirodhanam **kilesappahānakaraṇam**. Nimittato, pavattato ca cittassa vuṭṭhānam hutvā gayhatīti **vuṭṭhānapaccupaṭṭhānam**.

533. Asuvaṇṇādi suvaṇṇādi viya dissamānam **māyāti** vatthusabbhāvā tassā viparītata vuttā. Udakam viya dissamānā pana **marīci** upagatānam tucchā⁴. Vatthumattampi tassā na dissatīti **visaṃvādikā** vuttā. Marīcimāyā-attavidhuro bhāvo **tacchāvīparītabhūtabhāvo**. **Ariyañāṇassāti** ariyassa avitathaggāhakassa ñāṇassa, tena paṭivedhañāṇam viya paccavekkhaṇañāṇampi gahitam hoti. Tesaṃ gocarabhāvo paṭivijjhitabbatā, ārammaṇabhāvo ca daṭṭhabbo. **Aggilakḥaṇam** uṇhattam. Tañhi katthaci kaṭṭhādi-upādānabhede visaṃvādakam, viparītam, abhūtam vā kadācīpi na hoti. “Jātidhammā jarādhammā, atho maraṇadhammino”⁵ti evaṃ vuttā jāti-ādikā **lokapakati**. Ekaccānam tiracchānānam tiriyam dīghatā, manussādīnam uddham dīghatā, vuddhiniṭṭham pattānam puna avaḍḍhananti evamādikā ca **lokapakati**ti vadanti. Tacchāvīparītabhūtabhāvesu pacchimo **tathatā**. Paṭhamo **avitathatā**, majjhimo **anaññathatā**ti ayametesam viseso,

1. Khu 1. 62; Khu 10. 37 piṭṭhesu.

3. Adhikāratā (Syā), avikāratā (Ka)

5. Am 1. 145; Am 2. 66 piṭṭhesu.

2. Rāgakkhayādibhāvena (Sī)

4. Tucchā hoti (Mūlaṭṭikā)

Dukkhā aññaṃ na bādhakanti kasmā vuttaṃ, nanu taṇhāpi jāti viya dukkhanimittatāya bādhikāti? Na, bādhakappabhavabhāvena visum gahitattā. Evañhi pavatti, pavattihetu ca asaṅkarato bodhitā honti. Atha vā jāti-ādīnaṃ viya dukkhassa adhiṭṭhānabhāvo, dukkhadukkhatā ca bādhakatā, na dukkhappabhavatāti natthi taṇhāya pabhavabhāvena visum gahitāya bādhakabhāvapasaṅgo. Tenāha “**dukkhā aññaṃ na bādhakan**”ti.

Bādhakattaniyāmenāti dukkhaṃ bādhakameva, dukkhameva bādhakanti evaṃ dvidhāpi bādhakattāvadhāraṇenāti attho. **Bādhakattaniyāmenāti** hi bādhakassa, bādhakatte ca niyāmena. Yathā bādhakattassa dukkhe niyatatā, evaṃ dukkhassa ca bādhakatte niyatatāti.

Taṃ vinā nāññatoti satipi avasesakilesa-avasesākusalasāsavakusalāmūlā vasesasāsavakusaladhammānaṃ dukkhahetubhāve na taṇhāya vinā tesam dukkhahetubhāvo atthi, tehi pana vināpi taṇhāya dukkhahetubhāvo atthi kusalehi vinā akusalehi vinā akusalehi rūpāvacarādikusalehi vinā kāmāvacarādīhi ca taṇhāya dukkhanibbattakattā. Santabhāvassa, santabhāve vā niyāmo santabhāvaniyāmo, tena **santabhāvaniyāmena**.

Tacchaniyyānabhāvattāti dvidhāpi niyāmena taccho niyyānabhāvo etassa, na micchāmaggassa viya viparītātāya, na lokiyamaggassa viya vā anekantikātāya atacchoti tacchaniyyānabhāvo, maggo, tassa bhāvo tacchaniyyānabhāvattaṃ, tasmā tacchaniyyānabhāvattā. Sabbattha dvidhāpi niyāmena tacchāviparītabhūtabhāvo vuttoti āha “**iti tacchāvipallāsā**”ti-ādi.

534. Saccasaddassa sambhavantānaṃ atthānaṃ uddharaṇaṃ, sambhavante vā atthe vatvā adhippetassa atthassa uddharaṇaṃ niddhāraṇaṃ **atthuddhāro**. **Viratisacceti** musāvādaviratiyaṃ. Na hi aññāviratīsu saccasaddo niruḷho. Ye pana “viratisaccaṃ samādānavirati”ti vadanti, tesampi na samādānamattaṃ viratisaccaṃ, atha kho samādānavisaṃvādanaṃ. Taṃ pana paṭiññāsaccaṃ musāvādaviratiyeva hoti. “Idameva saccam, moghamaññaṃ”ti¹ pavattā diṭṭhi “saccan”ti abhinivisanavuttiyā **diṭṭhisaccaṃ**. Amosadhammattā nibbānaṃ **paramatthasaccaṃ**. “Amosadhammaṃ nibbānaṃ, tadariyā saccato vidū”ti² hi vuttaṃ, tassa, pana

1. Ma 2. 150, 166, 381; Ma 3. 22, 23 piṭṭhādīsu.

2. Khu 1. 396 piṭṭhe Suttanipāte.

taṃsampāpakassa ca maggassa pajānanā paṭivedho avivādakāraṇanti dvayampi “ekaṃ hi saccaṃ na dutiyamatthi, yasmim pajā no vivade pajānan”¹ti imissā gāthāya “saccaṃ”²ti vuttaṃ.

535. “Netam dukkham ariyasaccanti āgaccheyya, netam ṭhānam vijjati”³ti etena jāti-ādīnam dukkha-ariyasaccabhāve aviparītataṃ dasseti ekanteneva bādhakabhāvato. “Aññam dukkham ariyasaccanti āgaccheyya, netam ṭhānam vijjati”³ti iminā dukkha-ariyasaccabhāvassa jāti-ādīsu niyatataṃ dasseti anaññatthabhāvato². Sacepi kathañci koci evaṃcitto āgaccheyya, paññāpane pana sahadhammena ñāpane attano vādassa paṭiṭṭhāpane samattho natthiṭi dassetuṃ **“ahametaṃ -pa- paññāpessāmīti āgaccheyya, netam ṭhānam vijjati”**ti vuttaṃ. Jāti-ādīnam anaññathatā aññassa ca tathābhūtaṃ abhāvoyevettha ṭhānābhāvo. Sacepi koci āgaccheyya āgacchatu, ṭhānam pana natthiṭi ayamettha suttattho. Esa nayo dutiyasuttepi. Tattha pana attabhāvapaṭilābheneva sattānam jāti-ādīnam patti, sammukhībhāvo ca hoti sampattatā, paccakkhatā ca paṭhamatā, yato taṃ bhagavatā paṭhamam desitam, tannimittatā dutiyatā, tadupasamatā tatiyatā, taṃsampāpakatā catutthatāti daṭṭhabbā.

“Etaparamato”³ti etena catūhi ariyasaccehi pavatti-ādīnam anavasesapariyādānamāha. Nibbutikāmena pariṇānādīhi aññam kiñci kiccaṃ kātabbam natthi, dhammaññakiccaṃ vā ito aññam natthi, pariññeyyādīni ca etaparamānevāti cattāriyeva vuttāni. Taṇhāya ādīnavadassāvīnam vasena taṇhāvattu-ādīnam etaparamatāyāti vuttaṃ. Tathā ālaye pañcakāmaguṇasaṅkhāte, sakalavattukāmasaṅkhāte, bhavattayasāṅkhāte vā dukkhe dosadassāvīnam vasena ālayādīnam etaparamatāyāti vuttaṃ.

536. **“Oḷārikattā”**ti idam jāti-ādīnam dukkhabhāvassa pacurajanapākaṭatāmatam sandhāya vuttaṃ, na ariyena ñāpene paṭivijjhitaṅkāram. Tanti dukkham. **Akatanti** anibbattitam, anipphāditakāraṇanti adhippāyo. Kāraṇe hi siddhe phalam siddhameva hoti. **“Neva akatam āgacchatī”**ti ca iminā

1. Khu 1. 416; Khu 7. 226, 227 piṭṭhesu.

2. Anaññatthabhāvato (Syā, Ka)

3. Etaṃparamato (Ka)

ahetuvādaṃ paṭikkhipahi. “**Na issaranimmānādito**”ti etena pajāpatipurisapakatikālādivāde paṭikkhipati. Yaṃ panettha vattabbaṃ, taṃ parato āvi bhavissati. “**Sahetukena dukkhenā**”ti etena dukkhadassanena janitassa saṃvegassa saṃvaḍḍhanamāha. Dukkhasa hi sahetukabhāvasavanena balavasānvego jāyati yāvāyaṃ hetu, tāva idaṃ dukkhaṃ avicchedena pavattatīti. **Assāsajanatthaṃ nirodhanti** saṃvegajātassa assāsaṃ janetuṃ nirodhasaccamāha. Nibbinnaśāradukkhasa hi nirodhakathā vuccamānā ativiya assāsaṃ sañjaneti.

537. Ye te jāti-ādayo dhammā bhagavatā vuttāti sambandho. Kasmā panettha byādhi na gahitoti? Anekantabhāvato. Tathā hi so kadāci, kesañci ca natthi. Yathāha “tayo rogā pure āsuṃ, icchā anasanaṃ jarā”ti¹. Bākulattherādīnaṃ² so nāhosiyeva, dukkhaggahaṇena vā byādhi ettha gahitovāti daṭṭhabbaṃ. Paramatthato hi dhātukkhobhappaccayaṃ kāyikaṃ dukkhaṃ byādhīti. Upādānakkhandhapañcakaṃ ekaṃ koṭṭhāsaṃ katvā “**dvādasa dhammā**”ti vuttaṃ. Kāmatāṇhābhāvasāmaññena ekajjhaṃ katvā “**dukkhasamudayo ariyasaccan**”ti aññe antogadhabhede anāmasitvā ekarūpena gahitāpi taṇhā sassatadiṭṭhisahagatā, ucchedadiṭṭhisahagatā, diṭṭhivirahitā kevalaṃ kāmassādabhūtā cāti tidhāva bhinditvā vuttā. “**Ayameva ariyo aṭṭhaṅgiko maggo**”ti maggasaccabhāvena ekajjhaṃ katvā vuttāpi sabhāvato bhinnā eva te dhammāti āha “**aṭṭha dhammā**”ti.

Dukkhaniddesakathāvaṇṇanā

Jātiniddesavaṇṇanā

Bhaveti ādānanikkheparicchinno dhammappabandho bhavo, tasmim bhave. So hi jāyati ettha yonigati-ādivibhāgoti jātīti vuccati, jāyanti ettha sattā samānanvayāti **jāti**, nikāyo. **Saṅkhatalakkhaṇeti** yattha katthaci uppāde. So hi jananaṭṭhena jāti. **Paṭisandhiyanti**

1. Khu 1. 325 piṭṭhe Suttanipāte.

2. Ma 2. 165 piṭṭhādīsu vitthāravatthu.

paṭisandhicittakkhaṇe. **Sampatijātoti** ettha jātisaddena¹ labbhamānaṃ mātukucchito nikkhamanasāṅkhātaṃ jāyanatthaṃ sandhāyāha “**pasūtiyan**”ti, abhijātiyanti attho. Jāyati etāya khattiyādisamaññāti **jāti**, kulaṃ.

538. Sayanti etthāti seyyā, mātukucchisaṅkhāto gabbho seyyā etesanti **gabbhaseyyakā**, aṇḍajā, jalābujā ca. **Itaresanti** saṃsedajānaṃ opapātikānaṃca. **Ayampi cāti** “paṭisandhikhandhesvevā”ti anantaraṃ vuttakathāpi, pageva “paṭisandhito paṭṭhāyā”ti vuttakathāyaṃ. Tenāha “**tesaṃ tesaṃ paṭhamapātubhāvo jāti**”ti.

Ummujjanavasena gayhatīti **ummujjanapaccupaṭṭhānaṃ**. Vakkhamānavibhāgaṃ dukkhavicittataṃ paccupaṭṭhapetīti **dukkhavicittatāpaccupaṭṭhānā**.

539. “**Kasmā panā**”ti vadato codakassāyamadhippāyo—ekantadukkhe niraye tāva jātidukkhaṃ hetu, aññasupi vā duggatīsu pāpakammasamuṭṭhānato sukhasaṃvattaniyakammasamuṭṭhānāsu pana sugatīsu kathanti. Itaro “nāyaṃ jāti sabhāvadukkhavasena dukkhāti vattā, na hi kāci paṭisandhi dukkhavedanāsampayuttā atthi, atha kho dukkhassa adhiṭṭhānabhāvato”ti dassento “**anekesaṃ dukkhānaṃ vatthubhāvato**”ti-ādimāha. Adukkhasabhāvampi pariyāyato dukkhanti vuccatīti dukkhasabhāvaṃ dukkhasaddena visesetvā vuttaṃ “**dukkhadukkhan**”ti yathā rūparūpanti.

Dukkhuppattihetutoti “ahu vata me, taṃ vata nāhosī”ti² cetasikadukkhuppattihetuto.

“Yadaniccaṃ, taṃ dukkhan”ti³ vacanato tebhūmakā saṅkhārā saṅkhāradukkhaṃ, tattha kāraṇamāha “**udayabbayappaṭipīlitattā**”ti. Yañhi abhiṇṇaṃ paṭipīlitaṃ, taṃ dukkhamanāyā dukkhanti, vipassanācārassa adhippetattā tebhūmakaggahaṇaṃ.

Dukkhadukkhanti dukkhadomassupāyāse vadati. “Jātipi dukkhā”ti-ādinā⁴ **dukkhasaccavibhaṅge** āgataṃ.

1. Jātasadde (Sī)

2. Ahu vata metaṃ taṃ vata nāhosīti (Sī), ahuvattha me taṃ vata nāhosīti (Syā), aho vata metaṃ nāhosīti (Ka)

3. Saṃ 2. 19, 37, 68, 69, 92, 236, 237 piṭṭhādīsu.

4. Abhi 2. 104 piṭṭhe.

Bhagavatāpīti anāvarenañānavatā acchariyāparimeyyadesanākosallavatā bhagavatāpi. **Upamāvasenā**ti aṅgārakāsūpamādi-upamāvasena.

540. **Puṇḍarīkādīsūti ādi**-saddena na maṇikanakarajatapavāḷādiratanasanniccaye, nāpi aṇḍajameṇḍajavāyajatike¹ subhamanuññasayanatale, nāpi ratanamayakuṭṭimamanohare pāsādatale, nāpi sittasammaṭṭhakusumopahāravati pāsādūpacāre, nāpi muttājālasadisavālikāvikiṇṇe vivaṭaṅgaṇe, nāpi haritakambalasadisamudusaddalāsamo tale² bhūmibhāgeti evamādīnaṃ saṅgaho daṭṭhabbo. **Paramasambādheti** ativiya sambādhe. **Tibbandhakāreti** bahalandhakāre. Pittasemhapubbaruhiragūthodariyādi **nānākuṇapasambādhe**. Mātā yadi vīsativassā, atha tiṃsa, cattālīsādivassā, tattakaṃ kālāṃ adhotavaccakūpasadisatāya **adhimattajegucche**. **Pūtimacchādi** sabbaṃ na sadisūpammaṃ tassa vātādivasena ekaccaduggandhāpagamasabbhāvato. **Dasa māseti** accantasāmyoge upayogavacanaṃ, yebhuyyavasena vuttaṃ tato bhiiyopi ekaccānaṃ tatthāvaṭṭhānasambhavato. Attano adhomukhaṃ ṭhapitasāṅkucitahatthadvayassa ukkuṭikasessa nisīdato **samiñjanappasāraṇādirahito**.

Abhimukhaṃ kaḍḍhanaṃ **ākaḍḍhanaṃ**. Parito samantato kaḍḍhanaṃ parikaḍḍhanaṃ. Heṭṭhā dhūnanaṃ **odhūnanaṃ**. Nidhāya nidhāya dhūnanaṃ **niddhūnanaṃ**. Ākaḍḍhanādisadisañcetha “**ākaḍḍhanādi**”ti vuttaṃ. Taruṇavaṇasadisāṃ ativiya sukhumālaṃ gabbhagataṃ sarīraṃ sītādi-appakampi na sahatīti sītanarakūpapannatādi nidassitaṃ. Tañhi tassa ativiya sītaṃ, ativiya uṇhañca hutvā upatiṭṭhati. Sarīraṃ vāsiyādīhi tacchetvā khārāvasecanakaraṇaṃ **khārāpaṭicchakaṃ**. **Dukkhuppattiṭṭhāneti** gabbhāsayaṣaṇṇitaṃ tatiyaṃ āvaṭṭaṃ sandhāyāha.

Parivattetvāti uddhampāda-adhosīsabhāvena parivattetvā. Idam **vi jāyanamūlakaṃ dukkhaṃ**, yena maraṇadukkhena ca aṭṭitā vedanāppattā sattā katipayamāsamattātikkantampi pavattiṃ vissaranti, mahandhakāraṃ mahāviduggaṃ pakkhandā viya honti.

1. Aṇḍajamuṇḍajavāmajādike (Sī), aṇḍajamuṇḍajavāmajātike (Syā)

2. Samotate (Sī, Ka), samohate (Syā), samosaṭe?

Vadhentassāti socanaparidevanasīsapaṭihananādinā bādhentassa. Khuppipāsā hi ātapāvaṭṭhānādinā ca **ātāpanam**. Pañcaggitāpanādinā **paritāpanam**.

Imassāti yathāvuttassa sattavidhassa. **Sabbassāpī**ti gabbhakālādīsu tāpanamaddan ādinirayaggidāhādīsañjanitassa sakalassāpi. **Vatthumeva** hoti tadabhāve abhāvato. Tenevāha “**jāyetha no ce**”ti-ādi.

541. **Vicittanti** vividham, acchariyam vā.

Iti jātiniddesavaṇṇanā.

Jarāniddesavaṇṇanā

542. **Saṅkhatalakkhaṇanti** “ṭhitassa aññathattan”ti¹ vuttam khaṇikajaram sandhāyāha. **Khaṇḍiccādisammato**ti khaṇḍiccapāliccavalittacatādinā samaññato. Sāti khandhapurāṇabhāvasaññitā pākaṭajarā. **Khandhaparipāko** ekabhavapariyāpannānam khandhānam purāṇabhāvo.

Iti jarāniddesavaṇṇanā.

Maraṇaniddesavaṇṇanā

543. **Saṅkhatalakkhaṇanti** saṅkhārānam vayasaññitam khaṇikamaraṇamāha. **Yaṁ sandhāyā**ti yaṁ khaṇikamaraṇam sandhāya, “jarāmaraṇam dvīhi khandhehi saṅgahitan”ti² ettha “maraṇam”ti vuttanti attho. **Tanti** jīvitindriyupacchedasaññitam pākaṭamaraṇam. “Cavanam”ti lakkhitabbatāya **cutilakkhaṇam**. **Viyogarasanti** yathādhigatehi sattaśaṅkhārehi viyojanarasam. Yathūpapannāya gatiyā vippavāsavasena gayhatīti **gativippavāsapaccupaṭṭhānam**.

Pāpassāti pāpayogena pāpassa, upacitapāpakamassāti attho. **Pāpakammādinimittanti** pāpakammakammanimittagatinimittasaṅkhātām maraṇakāle

1. Saṁ 2. 31, 32; Aṁ 1. 150; Abhi 4. 54 piṭṭhesu.

2. Abhi 3. 13 piṭṭhe.

upaṭṭhitaṃ akusalavipākārammaṇaṃ. Tañhi passantasseva kassaci anubhavantassa viya mahādukkhaṃ hoti. **Bhaddassā**ti bhaddakammaṃ, katakusalassāti attho. Tassa pana kāmaṃ iṭṭhameva ārammaṇaṃ upaṭṭhāti, piyavippayogavatthukaṃ pana mahantaṃ dukkhaṃ uppajjatīti āha “**asahantassa viyogaṃ piyavatthukan**”ti. **Avisesatoti** pāpassa, bhaddassa ca sāmāññato. “Avisesato”ti vatvāpi “sabbesan”ti vacanaṃ taṃ idaṃ dukkhaṃ parimadditasāṅkhārānaṃ ekaccānaṃ khīṇāsavānampi hotiyevāti dassanatthaṃ. **Vitujjamaṇamammānanti** sandhibandhanāvachedakavāyūnā vijjhiyamānamammatṭhānānaṃ.

Iti maraṇaniddesavaṇṇanā.

Sokaniddesavaṇṇanā

544. **Soti soko. Atthato domanassameva hoti** cetasikantarābhāvato. Domanassaviseso pana hoti visayaviseso pavatti-ākāravisesasabbhāvatoti taṃ visesaṃ lakkhaṇādito dassetuṃ “**evaṃ santepi**”ti-ādi vuttaṃ. **Anto nijjhānaṃ** cittasantāpo. **Parijjhāpanaṃ** rāgadosapariḷāhaviṣiṭṭhaṃ dahanam. Katākatakusalākusalavisayaṃ vipparisārākārena pavattaṃ anusocanaṃ kukkucchaṃ, ñāti byasanaḍḍivisaṃ kevalaṃ cittasantāpabhūtaṃ anusocanaṃ sokoti anusocanapaccupaṭṭhānattepi ayametesam viseso.

Visapītaṃ sallaṃ **visasallaṃ**. Sokavasena atisārādi byādhipi hoti, sokabahulassa sarīraṃ na cirasseva jīrati, balavasokābhībhūto maraṇampi pāpuṇātīti āha “**samāvahati ca byādhi jarā maraṇa bhedanā**”ti.

Iti sokaniddesavaṇṇanā.

Paridevaniddesavaṇṇanā

545. **Vacīpalāpoti** vācāvippalāpo, so atthato saddo-eva. **Bhiyyoti** sokadukkhato upari. Sokasamuṭṭhāno hi **paridevo**.

Iti paridevaniddesavaṇṇanā.

Dukkhaniddesavaṇṇanā

546. Jāti-ādīnampi yathārahaṃ dukkhavatthudukkhadukkhatahi satipi dukkhabhāve kāyassa pīlanavasena idaṃ savisesaṃ dukkhamanti āha “**dukkhanti visesato vuttan**”ti.

Iti dukkhaniddesavaṇṇanā.

Domanassaniddesavaṇṇanā

547. **Manovighātarasanti** byāpādasampayogavasena¹ manaso vihaññanakiccaṃ. **Cetodukkhasamappitā**ti cetasikadukkhasamaṅgino. **Āvaṭṭantī**ti āmukhaṃ vaṭṭanti, yaṃdisābhimukhaṃ patitā, taṃdisābhimukhā eva vaṭṭanti. **Vivaṭṭantī**ti viparivattanavasena vaṭṭanti. **Uddhampādaṃ papatantī**ti uddhammukhapādā hutvā patanti. **Satthaṃ āharantī**ti attano sarīrassa vijjhanabhedanavasena satthaṃ upanenti.

Iti domanassaniddesavaṇṇanā.

Upāyāsaniddesavaṇṇanā

548. **Dosoyevā**ti kāyacittānaṃ āyāsanavasena dosasseva pavatti-ākāroti attho, yato bhuso āyāsoti upāyāsoti vuccati yathā bhusamādānaṃ upādānanti. **Eko** dhammoti cuddasahi akusalacetasikehi añño eko cetasikadhammo, yaṃ “pisādo”ti ca vadanti. Nitthunanavasena sampajjanato **nitthunanaraso**, kāye vā nitthunanakāraṇakicco. “Saṅkhāradukkhabhāvato”ti vatvā so panettha sātisayoti dassento “**cittaparidahanato, kāyavisādanato cā**”ti āha.

Ete ca sokaparidevupāyāsā viññattiyā vinā, saha ca yathāpaccayaṃ domanassacittuppādassa pavatti-ākāravisesoti dassetuṃ “ettha cā”ti-ādi vuttaṃ. Tattha **pāko viyā**ti rajanādino pacitabbavatthuno pāko viya.

Iti upāyāsaniddesavaṇṇanā.

1. Byāpādasampayogena (Sī, Syā, Ka)

Appiyasampayoganiddesavaṇṇanā

549. **Samodhānaṃ** samāgamo. Kāyikadukkhacittavighātādi-anatthānaṃ atthibhāvassa paccupaṭṭhāno **anatthabhāvapaccupaṭṭhāno**.

Tesaṃ appiyānaṃ kāyikavācasikapayogasaṅkhāto upakkamo tadupakkamo, tato sambhūto **tadupakkamasambhūto**.

Iti appiyasampayoganiddesavaṇṇanā

Piyavippayoganiddesavaṇṇanā

550. Upaddavabhāvena paccupaṭṭhātīti **byasanapaccupaṭṭhāno**.

Iti piyavippayoganiddesavaṇṇanā.

Ichchitālābhaniddesavaṇṇanā

551. Ichchitālābho nāma yassa kassaci attanā icchitassa vatthuno alābho. “Yampicchaṃ na labhatī”ti hi vuttaṃ. Matthakappattaṃ pana icchitālābhaṃ dassetuṃ pāḷiyaṃ “jātidhammānaṃ sattānaṃ”ti-ādinā niddiṭṭhanti tameva dassetuṃ **“aho vatā”**ti-ādi vuttaṃ. **Ichchāvātī** ettha icchāsahito alābhovātī ca vadanti. **Tappariyesanarasāti** tesaṃ alabbhaneyyavatthūnaṃ pariyesanarasā. **Appatti** alābho.

Iti icchitālābhaniddesavaṇṇanā.

Pañcupādānakkhandhaniddesavaṇṇanā

552. **Yaṃ vuttamidhāti** idha saccaniddese yaṃ sarūpato vuttaṃ. **Avuttanti** aññattha **dukkhakkhandhabālapaṇḍitasuttā**ḍisu vuttampi idha sarūpato avuttaṃ. Tañca sabbaṃ ime upādānakkhandhe vinā na labbhatīti tattha khandhasannissayameva dukkhaṃ khandhe vibādhatīti dassetuṃ **“indanamiva pāvato”**ti vuttaṃ.

Yathā vā lakkhaṃ paharaṇapahārassa vatthu, evaṃ khandhā saṃsāradukkhassa. Yathā ca gorūpaṃ ḍaṃsamakalādivibādhāya, yathā ca khettaṃ nipphannasassalāyanassa, gāmo ca gāmaghātakavibādhāya, evaṃ khandhā jāti-ādidukkhassa vatthūti dassetuṃ “**lakkhamivā**”ti-ādi vuttaṃ. Yebhuyyena loke vibādhakā vibādhetaḅbādhīnā¹ na honti, ime pana vibādhetaḅbādhīnā evāti dassetuṃ “**tiṇalatādīni**”ti vuttaṃ. Kāmaṃ anādimati saṃsāre ādi nāma kassaci natthi, ekabhavaparicchinnaṃ pana khandhasantānaṃ vasena vuttaṃ “**ādidukkhāṃ jāti**”ti. Tenevāha “**pariyosānadukkhāṃ maraṇaṃ**”ti. Na hettha samuccheda maraṇameva adhippettaṃ. Maraṇassa antike āsanne jātaṃ dukkhāṃ **māraṇantikadukkhāṃ. Paridayhanaṃ** cittasantāpo. **Lālappanaṃ** ativiya vippalāpo. **Anutthunanaṃ** anto nijjhāyanaṃ. **Ekamekanti** jāti-ādīnaṃ antarabhedabhinnānaṃ, jāti-ādīnameva vā upādānakkhandhapañcakānaṃ vā ekamekaṃ. **Saṅkhipitvāti** samāsetvā, sāmāññaniddesena vā saṅkhepaṃ katvā.

Iti dukkhaniddesakathāvaṇṇanā.

Samudayaniddesakathāvaṇṇanā

553. **Punabbhavakaraṇaṃ punabbhavo** uttarapadalopena, yathā vā apūpabhakkhanasīlo apūpiko, evaṃ punabbhavakaraṇasīlā, punabbhavaṃ vā phalaṃ arahati, so vā etissā payojananti **ponobhavikā**. Nandanato, rañjanato ca nandīrāgabhāvaṃ sabbāsu atthosu apaccakkhāya vuttiyā **nandīrāgasahagatā**. Tāya ca sattā tattha tattha bhavādike kimikīṭapaṭaṅgādi-attabhāvepi nandanti, rūpābhinandanādibhūtāya rañjanti cāti **tatratatrābhinandinī**. Tenāha “**nandīrāgena sahadatā**”ti-ādi. Tabbhāvattho hi esa sahadatasaddo. Kāmabhavavibhavabhedavasena² pavattiyā kāmataṇhā, bhavataṇhā, vibhavataṇhā ca veditabbā. Kāmataṇhādibhedam anāmasitvā kevalam taṇhābhāveneva ekabhāvaggahaṇena ekattaṃ upanetvā kassacipi sattassa kenaci sadisatābhāvato.

1. Vibādhetaḅbā vinā (Syā, Ka)

2. Kāmabhavavibhavassādavasena (Sī)

taṁtaṁvicittabhāvajanakakammanipphādanena ativicittasabhāvā sakalassa dukkhassa hetubhāvato **dukkhasamudayo ariyasaccam**¹.

Kasmā panettha taṇhāva samudayasaccam vuttāti? Visesahetubhāvato. Avijjā hi bhavesu ādīnavam paṭicchadenti, diṭṭhi-ādi-upādānaṅca tattha tattha abhinivisaṁānam taṇham abhivaḍḍhenti dosādayopi kammaṣa kāraṇam honti, taṇhā pana taṁtaṁbhavayonigativinñāṇaṭṭhitisattāvā sasattanikāyakulabhogissariyā divicittataṁ abhipatthenti, kammavicittatāya upanissayataṁ kammaṣa ca sahāyabhāvam upagacchantī bhavādivicittataṁ niyameti, tasmā dukkhassa visesahetubhāvato aññesu pi avijjā-upādānakammādīsu sutte² abhidhamme³ ca avasesakilesākusalamūlādīsu vuttasu dukkhahetūsu vijjamānesu taṇhāva samudayasaccanti vuttāti veditabbanā.

Iti samudayaniddesakathāvaṇṇanā.

Nirodhaniddesakathāvaṇṇanā

554. **Tassāyevāti** yadaggena taṇhā samudayasaccanti vuttā, tadaggena tassāyevāti avadhāraṇam. Sati hi padhānahetunirodhe tadaññahetū niruddhāyeva hontīti byādhinimittavūpasamanena byādhivūpasamo viya hetunirodhena phalanirodhoti āha “**samudayanirodhena dukkhanirodho**”ti. **Na aññathāti** yathāvuttassa atthassa ekantikataṁ dasseti.

Anupaddaveti pāṇakavijjhanasatthappahārādi-upaddavarahite. Tato eva daṭṭhe thire. Sākhādichedanena **chinnopi**. **Taṇhānusayeti** kāmarāgabhavarāgānusaye. **Anūhateti** asamupaghāṭite.

Yathā sīho yenattani saro khitto, tattheva attano balaṁ dasseti, na sare, tathā buddhānam kāraṇe paṭipatti, na phale. Yathā pana sārameyyā kenaci leḍḍupphāre dinne bhussantā⁴ leḍḍum khādanti,

1. Dukkhasamudayaṁ ariyasaccam (Ka)

2. Dī 2. 246; Ma 1. 84; Ma 3. 293 piṭṭhesu.

3. Abhi 2. 106 piṭṭhe.

4. Bhassantā (Syā)

na pahāradāyake uṭṭhahanti, evaṃ aññatitthiyā dukkhaṃ nirodhetukāmā kāyacchedamanuyuñjanti, na kilesanirodhananti imamatthaṃ dassetuṃ “**sīhasamāna vuttino**”ti-ādi vuttaṃ.

555. Virajjati palujjati chijjati samudayo etenāti **virāgo vuccati maggo**. Virajjanaṃ palujjanaṃ samucchindanaṃ **virāgoti pahānaṃ vuccati**. Tasmāti yasmā pahānapariyāyo virāgasaddo, nirodhasaddo ca, tasmā. Anusayasamugghātato aseso virāgo aseso nirodhoti sambandhanīyaṃ. Cāgādīpadānīpi gahetvā vadati **sabbāneva etānīti**. Yasmā **nibbānaṃ vuccati**, na dukkhassa nirujjhanamattaṃ, tasmā taṇhāya asesavirāganirodhādīpadānīpi nibbānavevacanānīti. Vuttamevatthaṃ samattheti “**yasmā panā**”ti-ādi. Yathā virāgādīpadānī nibbāne yujjanti, taṃdassanaṃ. Tattha **taṃ āgammāti** taṃ nibbānaṃ ārammaṇakaraṇavasena patvā. **Taṇhā virajjati** ariyamaggena accantavirāgavasena taṇhā virajjīyati. **Nirujjhatīti** nirodhīyati, tena virāganirodhasaddānaṃ adhikaraṇasādhanatamāha. **Tadevāti** nibbānameva. **Cāgādayo hontīti** cāgādīhetuṃ phalavohārena vadati. “**Kāmaguṇālayesū**”ti potthakesu likhanti, “kāmaguṇālayādīsū”ti pana pāṭho.

556. **Tayidanti**-ādi na porāṇapāṭho, **saccatthadīpane** pana vuttaniyāmena tato ānetvā pacchā ṭhipitaṃ. Tathā hi pubbe vuttānīpi lakkhaṇādīni punapi vuttāni. Saṃsāradukkhatō nibbinnamānasassa assāsaṃ karonto viya hotīti **assāsakaraṇarasam**. Rāgādisabbapapañcavūpasamanimittatāya nippapañcataṃ paccupaṭṭhapetīti **nippapañcapaccupaṭṭhānaṃ**.

557. **Nattheva nibbānanti** yadi sāmāññato paṭiññā, attanā adhippetanibbānassapi abhāvo āpajjati, tathā sati paṭiññāvirodho. Atha parābhīmataṃ nibbānaṃ pati, evaṃ sati dhammi-asiddhi, tato ca nissayāsiddho hetu. Anupalabbhanīyatoti kiṃ paccakkhato, udāhu anumānato? Purimasmiṃ pakkhe cakkhādīhi anekantikatā, dutiyasmiṃ paramṃ pati asiddho hetu. Tenāha “**na, upāyena upalabbhanīyato**”ti-ādi. Tattha yathā cetopariyaññalābhino eva ariyā paresaṃ lokuttaracittam jānanti, tatthāpi ca arahā eva sabbesaṃ, na sabbe, evaṃ

nibbānampi sīlasamādhipaññāsaṅkhātasammāpaṭipattibhūtena upāyena upalabbhatīti atthavacanaṃ cetaṃ daṭṭhabbaṃ, na payogavacanaṃ. Taṃ parato āvi bhavissati.

558. **Natthīti na vattabbaṃ** ariyehi upalabbhanīyatoti adhippāyo. Samsārato saṃviggamānasā sammāpaṭipattiyā nibbānaṃ adhigacchantīti sabbasamayāsiddhoyaṃ nayo. Tattha sāsānikameva nissāya vadati “**paṭipattiyā vañjhabhāvāpajjanato**”ti. Tenāha “**asati hī**”ti-ādi. **Sammādiṭṭhipurejavāyāti** sammādiṭṭhipubbaṅgamāya. Pubbaṅgamatā cassā padhānabhāvato. Tathā hi sā paṭhamāṃ desanāruḷhā, na sabbapaṭhamāṃ uppajjanato. **Na cāyaṃ** sammāpaṭipatti vañjhā, **nibbānapāpanato** nibbānassa sampāpakato. Tava matena pana nibbānasseva abhāvato vañjhabhāvo āpajjatīti yojanā. **Abhāvapāpakattāti** sammāpaṭipattiyā kilesasamucchindanamukhena khandhānaṃ abhāvasampāpakabhāvato, na vañjhabhāvāpattīti ce vadeyyāsīti attho. Na’iti paṭikkhepe. Yaṃ tayā “abhāvapāpakattā”ti vadantena khandhābhāvo nibbānanti paṭiññātaṃ, taṃ na. Kasmā? **Atītānāgatābhāvepi nibbānappattiyā abhāvato**. Atītānāgatā hi khandhā na santīti tasmīṃ abhāve nibbānaṃ adhigataṃ nāma siyā, so pana natthīti. Na kevalaṃ atītānāgatānameva, atha kho vattamānānampīti tiyaddhagatānaṃ sabbesaṃ khandhānaṃ abhāvo nibbānaṃ. Na hi taṃ ekadesābhāvo¹ bhavituṃ yuttanti vattamānā ce, na na santi, na santi ce, na vattamānāti “vattamānā, na santicā”ti vipaṭisiddhametanti āha “**na, tesāṃ -pa- pajjanato**”ti.

Kiñca bhiyyo—yadi vattamānābhāvo nibbānaṃ, yadā ariyamaggo vattati, tadā tassa nissayabhūtā khandhā vattamānāti katvā tadā nibbānassa abhāvo siyā. Tathā ca satī maggakkhaṇepi nibbānasacchikiriyāya abhāvo āpajjatīti dassento “**vattamāna -pa- dosato**”ti āha. Na mayaṃ sabbesaṃyeva avattamānatāya nibbānaṃ vadāma. Kiñcarahīti, tadā maggakkhaṇe **kilesānaṃ avattamānattā**, tasmā **na doso** yathāvuttadosābhāvoti? Yadi kilesānaṃ avattamānatāsaṅkhāto abhāvo nibbānaṃ, evaṃ satī ariyamaggassa niratthakatā

1. Ekadesābhāve (Ka)

āpajjati maggakkhaṇato pubbepi tadabhāvasiddhito. Tenāha “**ariyamaggassā**”ti-ādi. **Tasmā akāraṇametanti** yasmā na nibbānassa anupalabbhaniyātā, abhāvamattatā, paṭipattiyā vañjhabhāvo, atītānāgatābhāve nibbānādhiḡamo ca āpajjati, vattamānānaṃ abhāvopi na sambhavati, pageva kilesānaṃ avattamānatā¹, ariyamaggassa ca niratthakabhāvāpatti, tasmā nibbānassa abhāvasādhanatthaṃ yadidaṃ “anupalabbhaniyato, abhāvapāpakattā, tadā kilesānaṃ avattamānattā”ti ca kāraṇaṃ vuttaṃ, akāraṇametam, ayuttiresāti attho.

559. **Ādivacanatotī ādi**-saddena avasiṭṭhaṃ jambukhādakasutta² padesaṃ, aññampi asaṅkhatāya dhātuyā niddesapāḷiṃ saṅgaṇhāti. Tathā hi “nibbānaṃ nibbānanti āvuso sārīputta vuccati, katamaṃ nu kho āvuso nibbānanti? Yo kho āvuso rāgakkhayo dosakkhayo mohakkhayo, idaṃ vuccati nibbānaṃ”ti **jambukhādakasutte**², “tatha katamā asaṅkhatā dhātu? Rāgakkhayo dosakkhayo mohakkhayo”ti **āyatanavibhaṅge**³ vuttaṃ. Tatrāyamatto—nibbānaṃ asaṅkhatā dhātu asaṅkhatasabhāvo dhammo. Yasmā taṃ āgamma rāgādayo khīyanti, tasmā rāgakkhayo, dosakkhayo, mohakkhayoti ca vuccatīti. **Āgammāti** ca sabbasaṅkhārehi nibbinnassa visaṅkhāraninnassa gotrabhunā vivaṭṭitamānasassa maggena sacchikaraṇenāti attho. Sacchikiriyamānañhi taṃ adhiḡantvā ārammaṇapaccayabhūtaṅca paṭicca adhipatipaccayabhūte ca tasmīṃ paramassāsabhāvena vinimuttasaṅkhārassa⁴ paramagatibhāvena na patiṭṭhānabhūte patiṭṭhāya khayasaṅkhāto maggo rāgādayo khepetīti taṃsacchikaraṇābhāve rāgādīnaṃ anuppattinirodhagamanābhāvā taṃ āgamma rāgādayo khīyantīti vuccanti. Ekamsena cetam evaṃ sampaṭicchitabbaṃ, itarathā yathārutavasena pāḷiyā atthe gayhamāne bahū dosā āpajjantīti te dassetuṃ “**arahattassāpī**”ti-ādi vuttaṃ. Arahattañhi aggaphalapakukhā cattāro khandhāti na tassa rāgādikhayamattatā yuttā. **Tampi hi -pa- niddiṭṭhaṃ**. Tattha yathā rāgādīnaṃ khīṇante uppannattā arahattaṃ “**rāgakkhayo**”ti-ādinā niddiṭṭhanti suttassa neyyatthattā. Evaṃ nibbānaṃ āgamma rāgādayo khīyantīti nibbānaṃ “rāgakkhayo”ti-ādinā

1. Avattamānattā (Sī, Ka)

2. Saṃ 2. 447 piṭṭhe ājanikapothakesu pana nibbānapañhāsuttanti.

3. Abhi 2. 92 piṭṭhe.

4. Vinimuttasaṅkhārātāya (Sī, Ka)

niddiṭṭhanti imassāpi suttassa neyyatthata veditabbā. Nibbānassa rāgādikkhayamattatāya bahū dosā āpajjantīti dassetuṃ “**kiñca bhiyyo**”ti-ādi āraddhaṃ.

Tattha **ittarakālādippattidosatoti** rāgādīnaṃ khayamattatāya parittakālatā, saṅkhatalakkhaṇatā, payogena vinā saraseneva adhigandhabbatā, rāgādīhi aparimuttatā, ādittatā, dukkhatā, anupasantatā, bahubhāvo, oḷārikatā, gotrabhumaggānaṃ anārammaṇatāti evamādidosaṃpajjanato. Rāgasseva khayō **rāgakkhayo**, na dosādīnaṃ. Tathā dosakkhayādayopīti añño rāgakkhayo, añño dosakkhayo, añño mohakkhayoti tiṇṇaṃ akusalamūlānaṃ khayabhūtāni tīṇi nibbānāni, catunnaṃ upādānānaṃ khayē cattāri, pañcannaṃ nīvaraṇānaṃ khayē pañca, channaṃ taṇhākāyānaṃ khayē cha, sattannaṃ anusayānaṃ khayē satta, aṭṭhannaṃ micchattānaṃ khayē aṭṭha, navannaṃ taṇhāmūlakānaṃ khayē nava, dasannaṃ saṃyojanānaṃ khayē dasa, diyaḍḍhakilesasahasassa khayē pāṭiyekkaṃ nibbānanti bahūni nibbānāni honti. Rāgādikkhayo nāma andhabālānampi pākaṭo, antamaso dīpimigamakkatādīnampi suviññeyyoti oḷārikaṃ nibbānaṃ hoti. Gotrabhukkhaṇe kilesakkhayassa abhāvato, maggakkhaṇe ca akhīṇattā, ārammaṇakaraṇassa ca asambhavo eva. **Tassa nibbānabhāvato**ti sabbapariyosānassa rāgādikkhayassa nibbānabhāvato. Yato khayato paṭṭhāya rāgādīnaṃ pavatti na hoti, so “ayaṃnāmā”ti niyametaḃbo maggaphalañāṇānaṃ ārammaṇabhūto natthīti āha “**na tādisassa khayassa abhāvato**”ti.

Kiñca bhiyyo—yo pacchimabhavato tatiyattabhāveveva rāgādīsu ādīnavaṃ disvā jhānabhāvanāya te vikkhambhetvā aparihīnajjhāno kālaṃ katvā brahmalokaṃ upapanno, tattha yāvatāyukaṃ ṭhatvā idhāgatopi kāmesu vītarāgo va hutvā pabbajitvā arahattaṃ patto, yo ca paṭhamavaye eva rāgādito nibbinno te ca jhānena vikkhambhetvā pacchimavaye arahattaṃ patto, tesāṃ rāgādīnaṃ vikkhambhanato paṭṭhāya anuppajjanato nirodhasadisatāya anuppattiyeva nirodho. Te nibbānappattā nāma siyūṃ, na ca honti, tasmā na tādisassa khayassa nibbānabhāvo, tassāpi ittarakālatādidosaṃmāyogo evāti āha “**bhāvepi**

cā”ti-ādi. Yadi “khayo”ti vacanato yato khayato paṭṭhāya rāgādīnaṃ appavatti, taṃ khayamattaṃ nibbānaṃ maññasi, evaṃ sati “khaye ñāṇaṃ”ti-ādīsu¹ “khayo”ti vuttattā taduppattito paṭṭhāya ca rāgādīnaṃ anuppattīti maggassāpi nibbānabhāvāpattīti dassento “**ariyamaggassa cā**”ti-ādimāha.

Yathā niruddhā na santi, evaṃ anuppannāpīti abhāvasāmaññato nirodhasadisatāya anuppatti eva nirodho **anuppattinirodho**. Ayañhi maggena khepetabbākāro, yadidaṃ uppajjanārahassa anuppattidhammatāpādananti “khayo”ti ca vuccatīti. Taṃ itarakhayato visesento “**anuppattinirodhasaṅkhātassa pana khayassā**”ti āha. Anipphannatā pana tassa khayassa **pariyāyena upanissayattāti** vuttaṃ. Anuppattinirodhakkhayakarassa hi maggassa ārammaṇabhūtaṃ nibbānaṃ atthato tassa upanissayo viyāti vattabbaṃ labhati. **Tadupacārenāti** atthato phalabhūtakhayavohārena. Phalūpacārena hi kāraṇaṃ vohariyati yathā “āyu ghaṭaṃ, semho guḷo”ti ca.

Assāti nibbānassa. “Idampi kho ṭhānaṃ sududdasan”ti-ādinā² paccavekkhato bhagavato appossukkabhāvāvahanato. “Tañhi te māgaṇḍiya ariyaṃ cakkhuṃ natthi, yena tvaṃ ariyena cakkhunā ārogyaṃ jāneyyāsi, nibbānaṃ passeyyāsi”ti vacanato ariyena cakkhunā passitabbaṃ.

560. Yadi nibbānaṃ nāma sabhāvadhammo atthi sattasantānapariyāpanno ca, atha kasmā catumahāpathe sabhā viya sabbasādhāraṇā na labhatīti āha “**maggasamaṅginā pattaḃbato asādhāraṇaṃ**”ti. “Asukassa sammāsambuddhassa kāle uppannaṃ”ti evaṃ purimāya koṭiyā abhāvato **appabhavaṃ**. **Maggabhāveti** ariyamaggassa atthibhāve. **Bhāvato** vijjamānato laddhabbato.

Aṇu-ādīnanti aṇupakatikālapurisādīnaṃ. **Niccabhāvāpattīti** sassatabhāvasiddhi. Kūṭaṭṭhaniccatā hi idhādhippetā. **Hetuno abhāvāti** upapattiyā sādhanahetuno abhāvā. **Niccā te** aṇu-ādayo.

1. Abhi 1. 16, 265 piṭṭhesu.

2. Dī 2. 31, 32; Ma 2. 291; Saṃ 1. 138; Vi 3. 5, 7, 8 piṭṭhādīsu. 3. Ma 2. 177 piṭṭhe.

Nibbānassa niccattāti apekkhadhammatāti¹ hetulakkhaṇānupapatti. “**Aṇu-ādinam asiddhattā**”ti etena “niccā aṇu-ādayo”ti paṭiññāya dhammi-asiddhi, tato ca nissayāsiddho hetūti dasseti.

561. **Yathāvuttayuttisabbhāvato**ti “appabhavattā”ti atthanā vuttaṃ hetuṃ sandhāyāha. Appabhavatā cassa apaccayatāya daṭṭhabbā, tāya tassa purimāyakoṭiyā abhāvo. “Rūpasabhāvātikkamato”ti etena yathā rūpadhammānam ruppanasabhāvo, paṭighātavantatāya kalāpaso² vuttiyā padesasambandho ca sabhāvo, evaṃ nibbānassa katthaci paṭighāto, sappadesatā ca natthīti dasseti. Na hi nibbānam “asukadisāya, asukadese”ti vā niddisīyati, yato taṃ appaṭiṭṭhamevāti.

“**Asithila -pa- gamanīyato**”ti etena nibbānassa ariyānam paccakkhasiddhataṃ dasseti. “**Sabbaññuvacanato**”ti etena tadaññesaṃ anumānasiddhataṃ, tadubhayena “anupalabbhanīyato”ti panassa hetuno asiddhataṃ dasseti. **Paramatthena nāvijjamānam** vijjamānamevāti yathāraddhamattham nigametvā tadatthasādhanam āgamam dassento “**vuttañhetan**”ti-ādimāha.

Tattha ajātam abhūtam akatam asaṅkhatanti³ cattāripi padāni aññamaññavevacanāni. Atha vā vedanādayo viya hetupaccayasamavāyasaṅkhātāya kāraṇasāmaggiyā na jātam na nibbattanti **ajātam**. Kāraṇena vinā, sayameva ca na bhūtam na pātubhūtam na uppannanti **abhūtam**. Evaṃ ajātattā, abhūtattā ca yena kenaci kāraṇena na katanti **akatam**. Jātabhūtakatabhāvo ca nāma rūpādīnam saṅkhadhammānam hoti, na asaṅkhatabhāvassa nibbānassāti dassanattam “**asaṅkhatan**”ti vuttaṃ. Paṭilomato vā samecca sambhūya paccayehi katanti saṅkhatam, tathā na saṅkhatam saṅkhatalakkhaṇarahitanti ca **asaṅkhatanti** evaṃ anekehi kāraṇehi nibbattitabhāve paṭisiddhe “pakativādīnam pakati viya siyā nu kho ekeneva kāraṇena (etaṃ)⁴ katan”ti āsaṅkāyam kenaci na katanti dassanattam “**akatan**”ti vuttaṃ. Evaṃ apaccayampi samānam “sayameva nu kho idam bhūtam

1. Apekkhadhammatādi... (Syā), apaccakkhadhammatāti (Ka)

2. Kalāpato (Ka)

3. Khu 1. 178; Khu 10. 53 piṭṭhesu.

4. () Etthantare pāṭho Syā-Ka-potthakesu natthi.

pātubhūtan”ti āsaṅkāyaṃ taṃ nivattanatthaṃ **“abhūtan”**ti vuttaṃ.
Ayañcetassa asaṅkhatākatābhūtabhāvo sabbena sabbam ajātidhammattāti
dassetum **“ajātan”**ti vuttaṃ.

Evamettha satthā paramatthato nibbānassa atthibhāvaṃ pavedesi.
Pavedento ca “ahaṃ dhammissaro dhammassāmī”ti na attano āṇāmattena
pavedeyi, apica kho pana padaparame anukampamāno yuttitopi pavedesi.
Yathāha—

“No cetam bhikkhave abhavissa ajātam abhūtam akatam
asaṅkhatam, nayidha jātassa bhūtassa katassa saṅkhatassa nissaraṇam
paññāyetha. Yasmā ca kho bhikkhave atthi ajātam abhūtam akatam
asaṅkhatam, tasmā jātassa bhūtassa katassa saṅkhatassa nissaraṇam
paññāyati”ti¹.

Tassattho—bhikkhave yadi ajātādisabhāvā asaṅkhatā dhātu na
abhavissa na siyā, idha loke jātādisabhāvassa
rūpādikkhandhapañcakasaṅkhātassa saṅkhatassa nissaraṇam
anavasesavūpasamo na paññāyeyya na upalabbheyya na sambhaveyya.
Nibbānañhi ārammaṇam katvā pavattamānā sammādiṭṭhi-ādayo
ariyamaggadhammā anavasesam saṅkilese samucchindanti, tenettha
sabbassāpi vaṭṭadukkhasa apagamo nissaraṇam paññāyati. Evam
byatirekavasena nibbānassa atthibhāvaṃ dassetvā idāni anugamanavasenapi
tam dassetvā nigametuṃ **“yasmā ca kho”**ti-ādi vuttaṃ. Tassattho
vuttanayeneva vedītabbo.

Ettha ca yasmā “appaccayā dhammā asaṅkhatā dhammā”². Atthi
bhikkhave tadāyatanam, yattha neva pathavī³. Idampi kho ṭhānam
sududdasam, yadidam sabbasaṅkhārasamatho sabbūpadhipaṭinissaggo⁴.
Asaṅkhatañca vo bhikkhave dhammam desessāmi asaṅkhatagāminiñca
paṭipadan”ti-ādīhi⁵ anekehi suttapadehi “atthi bhikkhave ajātan”ti⁶ iminā ca
suttapadena nibbānadhātuyā paramatthato sabbhāvo sabbalokam
anukampamānena sammāsambuddhena pakāsito,

1. Khu 1. 170; Khu 10. 53 piṭṭhesu. 2. Abhi 1. 4 piṭṭhe. 3. Khu 1. 177 piṭṭhe.
4. Dī 2. 31, 32; Ma 2. 291; Sam 1. 138; Vi 3. 5, 7, 8 piṭṭhesu. 5. Sam 2. 535 piṭṭhe.
6. Khu 1. 178; Khu 10. 53 piṭṭhesu.

tasmā yadipi kattha apaccakkhakārīnampi sāsane abhippasannānaṃ viññūnaṃ saṃsayo natthiyeva. Ye pana paraneyyabuddhino¹ puggalā, tesam vimativinodanattham ayamettha adhippāyaniddhāraṇamukhena yuttivicāraṇā.

Yathā pariññeyyatāya sa-uttarānaṃ kāmānaṃ, rūpanaṅca paṭipakkhabhūtaṃ tabbidhurasabhāvaṃ nissaraṇaṃ paññāyati, evaṃ sabhāvānaṃ sabbesampi saṅkhatadhammānaṃ paṭipakkhabhūtena tabbidhurasabhāvena nissaraṇena bhavitabbaṃ. Yaṅca taṃ nissaraṇaṃ, sā asaṅkhatā dhātu. Kiñcabhiyyo—saṅkhatadhammārammaṇavipassanāññaṇaṃ, apica anulomaññaṇaṃ kilese tadaṅgavasena pajahati, na samucchedavasena pajahitum sakkoti. Tathā sammutisaccārammaṇaṃ paṭhamajjhānādīsu ññaṇaṃ vikkhambhanavaseneva kilese pajahati, na samucchedavasena. Iti saṅkhatadhammārammaṇassa sammutisaccārammaṇassa ca ññaṇassa kilesānaṃ samucchedappahāne asamatthabhāvato tesam samucchedappahānakarassa ariyamaggaññaṇassa tadubhayaviparītasabhāvena ārammaṇena bhavitabbaṃ, sā asaṅkhatā dhātu.

Tathā “atthi bhikkhave ajātaṃ abhūtaṃ akataṃ asaṅkhatan”² evamādi nibbānassa paramatthato atthibhāvajotakavacanāṃ aviparītattham bhagavatā bhāsitatā. Yañhi bhagavatā bhāsitaṃ, taṃ aviparītattham yathā taṃ “sabbe saṅkhārā aniccā, sabbe saṅkhārā dukkhā, sabbe dhammā anattā”², tathā nibbānasaddo katthaci visaye yathābhūtaparamatthavisayo upacāravuttisabbhāvato. Seyyathāpi sīhasaddoti evamādīhi nayehi yuttitopi asaṅkhatāya dhātuyā paramatthato atthibhāvo veditabbo.

Aparo nayo—yadi pana nibbānaṃ abhāvamattameva siyā, tassa “gambhīro duddaso duranubodho santo paṇīto atakkāvacaro nipuṇo paṇḍitavedanīyo”³ gambhīrādītā, “asaṅkhataṅca vo bhikkhave dhammaṃ desessāmi”⁴ ti-ādinā⁴ asaṅkhatādītā, “abyākatā dhammā apaccayā dhammā”⁴ ti-ādinā abyākatadhammādītā ca na vattabbā siyā. Na hi

1. Pariññeyyabuddhino (Sī, Syā, Ka)

2. Ma 1. 290, 292; Khu 1. 53; Khu 2. 317; Khu 10. 7, 53 piṭṭhesu.

3. Dī 2. 31, 32; Ma 2. 291; Saṃ 1. 138; Vi 3. 5, 7, 8 piṭṭhesu. 4. Saṃ 2. 535 piṭṭhe.

abhāvassa koci sabhāvo atthi, yena so gambhīrāsaṅkhatādi-ākārato viññāyeyya. Abhāvo hi abhāvo eva, kuto tassa gambhīrāsaṅkhatādibhāvasambandho. Kiñcāyamabhāvo sabbesaṃ kilesānaṃ sabbasattasantānagatānaṃ eko vā bhaveyya aneko vā. Yadi eko, ekeneva maggena sabbakilesābhāvo kato, sacchikato cāti aññassa, aññesaṅca maggānaṃ niratthakatāti na siyā maggabahutā, ekajjhaṅca sabbasattānaṃ nibbānādhiḡamo āpajjati. Siyā panevaṃ eko eva so nibbānasaññito kilesābhāvo, so pana na maggehi kātabbo, atha kho sacchikātabboti. Evaṃ sati visesato maggassa niratthakatā āpajjati, kilesānaṃ appahānatoti ekopi maggo na siyā. Asati ca kilesappahāne dukkhassa anupacchedanato kilesābhāvasacchikiriyā kimatthiyā siyā, atha pana maggānaṃ santānagatasamyojanattayappahānādipaṭiniyatakiccatāya catūsu maggesu pāṭiyekkaṃ kilesābhāvo. Evaṃ sati sabhāvapabhedenā vinā na bahubhāvoti so kilesakkhaya-pariyāyena vutto sabhāvadhammo eva siyā.

Yesaṃ abhāvo, tappabhedena abhāve bhedopacāroti ce? Yesaṃ abhāvo, tesaṃ sasabhāvātāya tassa sabhāvopacāropi siyā. Tathā ca te saṅkilesasaṅkhatatādito kilesasaṅkhatatādi-upacārāpi siyūṃ. No ce te icchitā, tappabhedena bhedopacāropi na icchitabbo. Na ca pahoti upacarito bahubhāvo atthato bahubhāvāya. Na hi jalaṃ analanti upacaritaṃ dahati, pacati vā. Ekattapañhampi cāyamabhāvo asabhāvātāya na sahatīti na sakkā vatthuṃ natthibhāvasāmaññato abhedavohāro yuttarūpoti. Ekatte ca pubbe vuttā eva dosā, bahubhāve pana sati vuttanayeneva siddhā sabhāvadhammatā. Sabhāvadhammattepi ca bahubhāvo viya bhāvaṃ bhāvopi bahubhāvaṃ na byabhicareyyāti nibbānassa bahubhāvapasaṅgo siyāti ce? Na bahubhāvasseva abhāvappasaṅgato. Yadi hi yathā kakkhaḷatā bhāvaṃ, evaṃ bhāvopi kakkhaḷataṃ na byabhicareyya. Evaṃ sati sabbesaṃ bhāvānaṃ pathavībhāvāpattito kuto bhāvassa bahubhāvo, tasmā lokavohārānaṃ vicittatāya yadipi bahutā bhāvāpekkhā, bhāvātā pana na bahutāpekkhāti na bhāvassa sato nibbānassa bahubhāvo “ekā

niṭṭhā na puthu niṭṭhā”ti vacanato. Ekasmim̐ yeva ca dassanabhāvanādvayaṃ sambhavati.

Parinibbutānaṃ paccekaṃ nibbānabhāve sattasantānaniyataṃ nāma nibbānaṃ siyā. Tathā ca sati saṅkhatabhādidosānativattiyeva, kilesappahānaṃ vā maggakiccaṃ kilesānaṃ abhāvo. Tassa ca ekatte na maggabahutā kiccantarassa kattabbassa abhāvato. Maggabahubhāvo ca maggehi sacchikātabbe ekasmim̐ dhamme indriyānaṃ apāṭavapāṭavapāṭavatarapāṭavatamabhāvena sacchikiriyāvisesena kilesānaṃ pahānabhedena hotīti nibbānassa sabhāvadhammatte eva siyā. Abhāvopi ca kilesānaṃ maggena sakiccatāya kātabbo eva siyā, na sacchikātabbo. Ko hi sabhāvo abhāvassa? Yo sacchikātabbo siyā, so ce nibbānaṃ ekeneva maggena sabbakilesānaṃ abhāvo eko abhinno kātabbo āpanno. Aññathā maggavasena catubbidhabhāve nibbānassa catubbidhabhāvappasaṅgo, nibbānavisesappasaṅgo ca āpajjeyyāti maggakiccassa ekattena maggabahutā siyā. Bahubhāve pana tesaṃ so vuttanayena ekasmim̐ dhamme sacchikiriyāvisesatoti siddhā nibbānassa sabhāvadhammatā. Khayādhigantabbatāya panetaṃ “khayo”ti vuttaṃ. “Khaye ñāṇaṃ”ti¹ hi vacanato ariyamaggo khayō nāma. Tena cetanaṃ adhigantabbanaṃ sacchikātabbanaṃ tasmā “khayo”ti vuttanti.

Iti nirodhaniddesakathāvaṇṇanā.

Magganiddesakathāvaṇṇanā

562. **Aṭṭha dhammā**ti “katamaṃ dukkhanirodhagāminī paṭipadā ariyasaccaṃ”ti ārabhitvā “sammādiṭṭhī”ti-ādinā **pāḷiyam**² dukkhanirodhagāminipaṭipadāniddese āgatā, tameva ca pāḷim̐ ānetvā uddesavasena idha ca vuttā sammādiṭṭhi-ādayo aṭṭha dhammā atthato pakāsītā, na maggasaccaniddesavasenāti adhippāyo. Yadi atthato pakāsītā, kimatthiyaṃ pana idha kathananti āha “**idha panā**”ti-ādi. Tattha “**ekakkhaṇe pavattamānānaṃ**”ti idaṃ lokiyakusalacittuppādesu viratiyo nānakkhaṇikā

1. Abhi 1. 16, 265 piṭṭhesu.

2. Abhi 2. 110 piṭṭhe.

eva hontīti katvā vuttaṃ. Sesamaggadhammā pana tatthāpi ekajjhaṃ uppajjantiyeva. **Visesāvabodhanatthanti** paṭipakkhasamugghātādipavatti-ākāravisesassa avabodhanatthaṃ. Vitthārato maggakathā parato āvi bhavissatīti āha “**saṅkhepato**”ti. **Catusaccapaṭivedhāya paṭipannassāti** yāthā catusaccābhisamayo hoti, evaṃ sabbaso pubbabhāgapaṭipattiyā paripūraṇavasena paṭipannassa. Ariyamaggasaṅkhātassa yogassa sabbhāvato **yogino**. Kāmaṃ avijjānusayasamugghāte tadekaṭṭhakilesānaṃ lesopi nāvasissati, vijjhāya pana avijjā ujuvipaccanīkadhammoti dassanatthaṃ “**avijjānusayasamugghātakan**”ti vuttaṃ. Parato micchāsaṅkappādiggahaṇepi eseva nayo. **Dhātuppakāsanarasā**¹ti paramatthapakāsanarasā, catusaccavibhāvanakiccāti attho. Maggadhammānaṃ paṭipakkhavidhamanākāro sātisayaṃ pākato hutvā upaṭṭhātīti avijjānusayasamugghātakataṃ sammādiṭṭhiyā vatvāpi **avijjandhakāraviddhamśanapaccupaṭṭhānatā** vuttā.

Tathā sampannadiṭṭhinoti yathā avijjānusayasamugghāto hoti, tathā maggasammādiṭṭhiyā sampannadiṭṭhino. Evañhi catusaccapaṭivedhāya paṭipannassa yoginoti imamatthaṃ tathā-saddo upasānharati. Nibbānārammaṇatā pana taṃsampayuttavacaneneva bodhitā. **Micchāsaṅkappanighātakanti** kāmasaṅkappādimicchāsaṅkappasamucchedakaṃ. **Appanārasoti** nibbānārammaṇe maggacittassa samuppādavāsena² pavattanato appanākicco.

Tathā passato vitakkayato cāti vuttappakārāya sammādiṭṭhiyā passato, nibbānārammaṇe ca sammāsaṅkappena cittaṃ abhiniropayato. **Vacīduccaritasamugghātikāti** catubbidhassapi vacīduccaritassa samucchedikā. Musāvādādīnaṃ visānvādanādīkicatāya lūkhānaṃ apariggāhakānaṃ paṭipakkhabhāvato siniddhabhāvena sampayuttadhammānaṃ pariggāhakasabhāvā, sammāvācāti āha “**sā pariggahalakkhaṇā**”ti. Kāyikakiriyā kiñci kattabbaṃ samuṭṭhāpeti, sayañca samuṭṭhānaṃ ghaṭanaṃ hotīti sammākammantasāṅkhātā viratīpi samuṭṭhānasabhāvā vuttā. Sampayuttadhammānaṃ vā ukkhipanaṃ **samuṭṭhāpanaṃ** kāyikakiriyāya bhārukkhipanaṃ viya.

Assāti yogino. Tasmīṃ sati visujjhanato **visuddhibhūtā**. Jīvamānassa sattassa, sampayuttadhammānaṃ vā suddhi **vodānaṃ**, ājīvasseva vā

1. Atthappakāsanarasā (Sī), tathappakāsanarasā (Syā)

2. Samappaṇavasena (Sī)

jīvitindriyavuttiyā. Nāyājīvassa abuddhapaṭikuṭṭhāya sammājīvikāya pavattihetutāya **ñāyājīvapavattiraso**. Imassa hi pavattito paṭṭhāya micchājīvo na pavattatīti.

Sabbākusalaviddhaṃsakopi sammāvāyāmo ujupaṭipakkhadassanavasena **kosajjasamucchedako** vutto. Saṃkilesapakkhatopi tassa paggaṇhaṇaṃ **paggaho**. Kāyādīsu subhādi-ākārupadhāraṇavasena pavattā subhasaññānipubbaṅgamā akusalakkhandhā micchāsati, tassā viddhaṃsano **micchāsativiniddhunano**. **Asammosoti** sammosaviddhaṃsanato tappaṭipakkho. Ārammaṇassa yathāsabhāvasallakkhaṇaṃ **upaṭṭhānaṃ**. “Ārakkhapaccupaṭṭhānā”ti, “satārakkhena cetasā”ti¹ ca vacanato visesato sati kusalacittassa ārakkhāti āha “**satiyā saṃrakkhiyamānacittassā**”ti.

563. **Saccañāṇassāti** saccāni ārabba pavattanakañāṇassa, na paṭivedhañāṇaṃ viya sakideva bujjhati, atha kho punappunaṃ uppajjanato anu anu bodho anubodho², anussavākāraparivitakkadiṭṭhinijjhānakkhanti-anugato vā bodho anubodho, tadeva ñāṇanti **anubodhañāṇaṃ**. Na hi taṃ paccakkhato bujjhati, anussavādivasena pana kappanamukhena bujjhati. **Kiccatoti** pariṇānādito. Taṃkiccakaraṇeneva hi pariññeyyādīni viya³ tānipi tassa pākaṭāni honti. Vivaṭṭānupassanāya hi saṅkhārehi patilīyamānamānasassa uppajjamānaṃ maggañāṇaṃ visaṅkhāraṃ dukkhanissaraṇaṃ ārammaṇaṃ katvā dukkhaṃ paricchindati, dukkhagatañca taṇhaṃ pajahati, nirodhañca sacchikaroti phusati. Ādicco viya pabhāya sammāsaṅkappādīhi saha samuppannaṃ taṃ maggaṃ⁴ bhāveti, na ca saṅkhāre amuñcivā pavattamānena ñāṇena etaṃ sabbaṃ kātum sakkā nimittapavattehi avuṭṭhitattā. Tasmā etāni kiccāni karontam taṃ ñāṇaṃ dukkhādīni vibhāveti tattha sammohanivattanenāti “**cattāripi**⁵ **saccāni paṭivijjhātī**”ti vuttaṃ, ekapaṭivedhenāti adhippāyo.

Dukkhasamudayampi so passatīti kālantaradassanaṃ sandhāya vuttanti ce? Na, “yo nu kho āvuso dukkhaṃ passati, dukkhasamudayampi so passatī”ti-ādinā⁶ ekadassino aññattayadassitāvicaṇāṇāyaṃ taṃsādhanatthaṃ

1. Dī 3. 224; Am 3. 279 piṭṭhesu.

2. Anu-anubodho (Sī)

3. Pariññeyyādīni (Ka)

4. Maggaṃ (Sī)

5. Cattāri (Ka)

6. Saṃ 3. 382 piṭṭhe.

āyasmatā **gavampati**therena imassa **suttassa**¹ ānītattā, paccekañca saccesu dissamānesu aññattayadassanassa yojitattā. Aññathā anupubbābhisamaye purimadiṭṭhassa pacchā adassanato samudayādidassino dukkhādidassitā na yojetabbā siyā. Yojitā ca sā “yo dukkhasamudayaṃ passati, dukkhampi so passati”ti-ādinā¹. **Lokiyam** saccañāṇam. **Tattha** lokiyañāṇe.

Pariyuṭṭhānasaṅkhāto abhibhavo **pariyuṭṭhānābhibhavo**, tassa vasena.

Suddhasaṅkhārapuñjamattadassanato sakkāyadiṭṭhipariyuṭṭhānaṃ nivatteti.

“Lokasamudayaṃ kho kaccāna yathābhūtaṃ sammappaññāya passato yā loke natthitā, sā na hoti”ti² vacanato samudayadassanaṃ

hetuphalapabandhāvicchedadassanato pariyuṭṭhānābhibhavavasena

pavattamānaṃ ucchedadiṭṭhiṃ nivatteti. “Lokanirodhaṃ kho -pa- passato yā loke atthitā, sā na hoti”ti² vacanato nirodhadassanaṃ hetunirodhā

phalanirodhadassanato sassatadiṭṭhiṃ nivatteti. Attakārassa

paccakkhadassanato maggadassanaṃ “natthi attakāre, natthi parakāre, natthi purisakāre”ti-ādikam³ akiriyadiṭṭhiṃ pajahati. “Natthi hetu, natthi paccayo

sattānaṃ saṅkilesāya, ahetū appaccayā sattā saṅkilissanti, natthi hetu -pa- visuddhiyā, ahetū appaccayā sattā visujjhanti”ti-ādikā⁴ ahetukadiṭṭhi ca idha

akiriyādiṭṭhiggahaṇeneva gahitāti daṭṭhabbā. Sāpi hi

visuddhimaggadassanena pahīyatīti. Dukkhe ñāṇaṃ samudayaphalassa

dukkhassa addhuvādibhāvaṃ passatīti **phale vippatipattiṃ** nivatteti.

Issaro lokaṃ pavatteti sajjeti nivatteti saṃharahīti **issarakāraṇino** vadanti. Padhānato loko āvi bhavati, tattheva ca patilīyatīti **padhānakāraṇino**.

“Kālo karoti bhūtāni, kālo saṃharatī pajā.

Kālo sutte jāgarati, kālo hi duratikkamo”ti—

kālavādino. Kaṇṭakassa tikhiṇabhāvo viya, kapiṭṭhaphalādīnaṃ

parimaṇḍalatā viya, migapakkhisarīsapādīnaṃ vicittatā viya ca sabhāveneva

loko sambhoti, vibhoti cāti **sabhāvavādino**. **Ādi**-saddena

1. Saṃ 3. 382 piṭṭhe.

2. Saṃ 1. 257 piṭṭhe.

3. Dī 1. 50 piṭṭhe.

4. Dī 1. 50; Ma 2. 70, 185; Saṃ 2. 172 piṭṭhādīsu.

¹aṇūhi loko pavattati, sabbaṃ pubbekatahetu¹, loko niyato acchejjasuttāvutābhejjamaṇisadiso, na ettha kassaci purisakāroti **niyativādino**.

“Yadicchāya² pavattanti, yadicchāya nivattare.

Yadicchāya sukhaṃ dukkhaṃ, tasmā yādicchakī³ pajā”ti—

yadicchāvādino, ye **adhiccasamuppattivādinoti** ca vuccanti. Evamādi-akāraṇavādasāṅgaho⁴ daṭṭhabbo. Rāmudaka-āḷārādīnaṃ viya, arūpaloke niḡaṇṭhānaṃ viya ca lokathūpikāyaṃ apavaggo mokkhoti gahaṇaṃ **apavaggagāho**. **Ādi**-saddena padhānassa appavatti, guṇaviyuttassa attano sakattani avatṭhānaṃ⁵, brahmunā salokatā, samīpatā, saṃyogo, diṭṭhadhammanibbānavādāti evamādīnaṃ gahaṇaṃ daṭṭhabbaṃ. Ettha ca **padhānassa appavatti** mahatādibhāvena aparīṇāmo, anabhibyatti vā. “Ahamañño, pakati aññā”ti evaṃ pavattapakatīpurisantarajānanaena attasukhadukkhamohesu avibhāgaggahaṇe kira nivattite vuttanayena padhānaṃ nappavattati, so vimokkhoti kāpilā. **Guṇaviyuttassāti** buddhisukhadukkha-icchādosappayattadhammādhhammasāṅkhārehi navahi attaguṇehi viyuttassāti kaṇādamatānusārino⁶. **Salokatā** brahmunā samānalokatā. **Samīpatā** tassa samīpappavattitā. **Saṃyogo** tena ekībhāvūpagamaṇaṃ, “indriyatappanaputtamukhadassanādīhi vinā apavaggo natthī”ti gahetvā tathā pavattanaṃ **kāmasukhallikānuyogo**. Anasanakesaluñcanāditapacariyāya, naggasilagosīlakukkurasīlādīhi ca attaparitāpanena mokkho hotīti **attakilamatho**.

Svāyaṃ sabbo micchāgāho saccañāṇe sati patitṭhaṃ na labhatīti vuttamevatthaṃ saṅgaṇhanto “**loke lokappabhava**”ti gāthamāhāti.

Ñāṇakiccato vinicchayaṇṇanā niṭṭhitā.

1-1. Aṇūhi loko pavattatīti aṇuvādino. Sabbaṃ pubbekatahetūtī pubbekatahetuvādino (?)

2. Yathicchāya (Ka) evamupariṇi.

3. Yadicchakī (Syā)

4. Vādisāṅgaho (Syā)

5. Adhiṭṭhānaṃ (Ka)

6. Kaṇacaraṇamatānusārino (Sī), guṇaparamatānusārino (Syā)

Kaṇāvaramatanusārino (Ka)

564. **Sesā sabbadhammā**ti sesā ekāsīti lokiyadhammā.

Ajjhattikabāhiresu dvādasasu āyatanesu kāmabhavavibhavataṇhāvasena dvādasatikā **chattimsa taṇhāvicaritāni**, khuddakavatthuvibhaṅge vā āgatanayena kālavibhāgamānāmasitvā vuttāni. Tadāmasane hi aṭṭhasataṃ honti. **Asammissanti** ekakattā kenaci asammissam, kuto tadantogadhappahedoti adhippāyo. Vīmaṃsiddhipādādīnaṃ bodhipakkhiyānaṃ satipi kiccanānatte atthato ekattā sammādiṭṭhiyā saṅgahoti sammādiṭṭhimukhena tadantogadhatā vuttā.

Tayo nekkhammavitakkādayoti lokiyakkhaṇe

alobhamettākaraṇāsampayogavasena bhinnā, maggakkhaṇe lobhabyāpādavihiṃsā samucchedanavasenaatayoti ekopi vutto. Esa nayo **sammāvācādīsu**. Appicchatāsantuṭṭhitānaṃ pana bhāve sammā-ājīvasambhavato tena tesam saṅgaho daṭṭhabbo. Bhavantarepi jīvitahetupi ariyehi avītikkamanīyattā **ariyakantānaṃ** sammāvācādīsīlānaṃ gahaṇena yena saddhāhatthena tāni gahetabbāni, so saddhāhattho gahito eva hotīti tato anaññāni saddhindriyasaddhābalāni tattha antogadhāni vuttāni. Chando pana saddhānugūṇoti katvā chandiddhipādassāpi tadantogadhatā vuttā. **Tesam atthitāyāti** saddhindriyasaddhābalachandiddhipādānaṃ atthitāya sīlassa atthibhāvato tividhenāpi sīlena te tayopi gahitāti tattha antogadhā. **Cittasamādhi**ti cittiddhipādaṃ vadati. “Cittam paññaṅca bhāvayan”¹ hi cittamukhena samādhi vuttoti samādhimukhena cittampi vattabbaṃ arahati. Cittiddhipādabhāvanāya pana samādhipi adhimatto hotīti vīmaṃsiddhipādādivacanāṃ viya cittiddhipādoti avatvā idha “cittasamādhi”²ti vuttam. “Pīṭimanassa kāyo passambhati, passaddhakāyo sukham vedeti, sukhino cittam samādhiyatī”²ti vacanato samādhi-upakārā **pītipassaddhiyo**, tasmā samādhiggahaṇena gahitā. Upekkhā pana samādhi-upakārakato, taṃsadisakiccato ca. Tasmā samādhisīsenā etesam antogadhatā daṭṭhabbā.

Antogadhānaṃ pabhedavinicchayaṇṇanā niṭṭhitā.

1. Saṃ 1. 13, 167; Khu 10. 197; Khu 11. 33 piṭṭhesu.

2. Dī 1. 195; Dī 3. 252; Saṃ 3. 135; Am 1. 245; Am 3. 535 piṭṭhesu.

565. **Bhāro viya dukkhasaccam** vighātakattā, saṁharaṇīyavasena vihanatabhāvatoti. **Bhārādānamiva** tattha tattha bhave uppajjanakavighātassa hetubhāvato. **Bhāranikkhepanamiva** pavattidukkhavūpasamabhāvato. **Rogo viya, dubbhikkhamiva** ca bādhakattā. **Roganidānam viya, dubbuṭṭhi viya** ca pabhavalakkhaṇattā. **Dubbuṭṭhīti** ca avassanam vā ativassanam vā. **Rogavūpasamo viya, subhikkhamiva** ca santilakkhaṇattā, sukhabhāvato. “Nibbānam paramam sukhan”¹ti hi vuttam. **Bhesajjamiva, suvuṭṭhi viya** ca dukkhassa hetupacchedato, tassa ca apagamūpāyabhāvato. Niyyānalakkhaṇaṇhi maggasaccam. Anīṭṭhabhāvato, sāsaṅkasappaṭibhayato ca dukkham verivisarukkhabhaya-orimatīrūpamam. **Veram** byāpādo, paccatthikabhāvo vā. **Verasamugghāto** veravūpasamo mettā. **Verasamugghātupāyo** saṅgahavatthūni.

Upamāto vinicchayaṇṇanā niṭṭhitā.

566. **Esa nayo samudayādīsūti** atthi cettha samudayo, na ariyasaccam, atthi ariyasaccam, na samudayo, atthi samudayo ceva ariyasaccaṅca, atthi neva samudayo na ariyasaccanti. Sesasaccadvayepi eseva nayo. **Na ariyasaccam** pariññeyyapahātabbāsaṅkhataniyyānabhāvābhāvato. **Itaram pana ariyasaccadvayanti** samudayamaggasaccadvayamāha. **Siyā dukkham** saṅkhāradukkhatāya. Tenāha “**aniccato**”²ti. **Tathattenāti**² tathasabhāvena, pariññeyyabhāvenāti attho. Etena tam ariyasaccadvayam “siyā dukkham, na ariyasaccam, siyā ariyasaccam, na dukkham”³ti imamattham dasseti. Ariyasaccasaddaparā hi dukkhādisaddā pariññeyyādibhāvam vadanti. Teneva ariyasaccasaddānapekkham dukkhasaddam sandhāya maggasampayuttasāmaññaphaladhammānam ādīpadasaṅgaho vutto, ariyasaccasaddāpekkham pana sandhāya catutthapadasaṅgaho.

Sabbākārenāti sabbappakārena. Yathā maggasampayuttadhammādayo ekaṅgavikalā, evam ahutvā sabbaṅgayogena dukkhatāya ceva ariyasaccatāya cāti attho. “Upādānakkhandhapaṅcakan”³ti vutte taṅhāyapi saṅgaho siyāti taṁnivattanattham “**aññatra taṅhāyā**”³ti vuttam tassā visum ariyasaccabhāvato. Samudayādīsū avasesakilesādayo pabhavaṭṭhena³ samudayo, na ariyasaccam suttantasamvaṇṇanā ayanti

1. Khu 1. 43 piṭṭhe Dhammapade.

2. Tathaṭṭhenāti (Ka)

3. Pabhāvakaṭṭhena (Syā), pabhavakaṭṭhena (Ka)

katvā. Nirodho ariyasaccaṅ, na samudayo. Itaraṅ pana ariyasaccadvayaṅ siyā samudayo attano phalassa paccayaṅṅhena, na pana yassa pahānāya bhagavati brahmacariyaṅ vussati tathattena, sabbākārena pana taṅṅhāsamudayo ceva ariyasaccaṅca. Maggasampayuttadhammā, sāmaṅṅnaphalāni ca yassa pahānāya bhagavati brahmacariyaṅ vussati tathattena neva samudayo, na ariyasaccaṅ. Saṅkhāranirodho, nirodhasamāpatti ca nirodho, na ariyasaccaṅ. Samudayo, ariyasaccaṅ, na nirodho. Itaraṅ pana ariyasaccadvayaṅ siyā nirodho khaṅanirodhasabbhāvato, na pana yassa sacchikiriyāya bhagavati brahmacariyaṅ vussati tathattena. Sabbākārena pana asaṅkhatā dhātu nirodho ceva ariyasaccaṅca. Sesam vuttanayameva. Ariyamaggato añṅāni maggāni maggo, na ariyasaccaṅ. Nirodho ariyasaccaṅ, na maggo. Itaraṅ pana saccadvayaṅ siyā maggo bhavagāminipaṅipadābhāvato, na pana yassa bhāvanāya bhagavati brahmacariyaṅ vussati tathattena, sabbākārena pana nirodhagāminipaṅipadā maggo ceva ariyasaccaṅca. Sesam vuttanayameva.

Catukkato vinicchayaṅṅanaṅ niṅṅṅhitā.

567. **Suṅṅānīti** vedakādīhi bāhirakaparikappitehīti adhippāyo. Dukkhaṅṅhi vedanīyampi santam vedakarahitam, kevalam pana tasmiṅ attano paccayehi pavattamāne dukkham vedetīti vohāramattam hoti. Esa nayo itaresupi.

“Dukkhamevā”ti avadhāraṅena nivattitamattam dassetum “**na koci dukkhito**”ti vuttam. **Kiriyāva vijjatīti** samudayasaccaṅ sandhāya vadati. Purimasaccadvayassa vipākavaṅṅtakammavaṅṅtasaṅgahato kārakassa vā dukkhasaccasabhāvamāha. Kātabbāpi hi kiriyā kārakahitā kevalam attano paccayehi tāya pavattamānāya dukkhasaṅṅṅite dhammappabandhe kiriyam karotīti vohāramattam hoti. Nibbutagamakesupi eseva nayo. “Maggo atthī”ti vattabbe “**maggamatthī**”ti okārassa abhāvo katoti daṅṅṅhabbam. Gamakoti nibbutim gantā.

Kilesāsucipaggharaṅṅṅhena sāsavatā **asubhatāti** katvā anāsavattā nirodhamaggā subhā eva. Dukkhadīnam pariyāyena samudayādībhāvo ca

atthi, na pana nirodhabhāvo, nirodhassa vā na dukkhādi bhāvoti
nirodhāvasesattayānaṃ na aññaṃaññasamaṅgitāti āha “**nirodhasuññāni
vā**”ti-ādi.

Samudaye dukkhassābhāvatoti ponobhavikāya taṇhāya punabbhavassa
abhāvato. Yathā vā pakativādīnaṃ vikārā avikāribhāvato, pubbe patipalīnā
ca pakatibhāveneva tiṭṭhanti, na evaṃ samudayasampayuttampi dukkhaṃ
samudayabhāvena tiṭṭhatīti āha “samudaye dukkhassābhāvato”ti. Magge ca
nirodhassa abhāvatoti sambandho. Yathā avibhattehi vikārehi
mahāhānkāratammatta¹ visesindriyabhūtavisesehi pakatibhāveneva ṭhitehi
pakati sagabbhā icchitā pakativādīhi, evaṃ na phalena sagabbho hetūti
attho. “**Dukkhasamudayānaṃ nirodhamaggānañca asamavāyā**”ti etaṃ
vivaranto āha “**Na hetusamavetaṃ hetuphalan**”ti-ādi. Tattha “idhatantūsu
paṭo, kapālesu ghaṭo, bīraṇesu kaṭo, dvīsu aṇūsu dvi-aṇukan”ti-ādinā
idhavuddhivohārajanako-avisuṃ siddhānaṃ sambandho samavāyo, tena
samavāyena kāraṇesu dvīsu aṇūsu dvi-aṇukaṃ phalaṃ samavetaṃ
ekībhūtamiva sambaddhaṃ, tīsu aṇūsu ti-aṇukanti evaṃ mahāpathavīmahā-
udakamahā-aggimahāvātakkhandhapariyantaṃ phalaṃ attano kāraṇesu
samavetanti **samavāyavādino** vadanti. Evaṃ pana vadantehi aparimāṇesu
kāraṇesu mahāparimāṇaṃ ekaṃ phalaṃ samavetaṃ attano antogadhehi
kāraṇehi sagabbhaṃ asuññanti vuttaṃ hoti. Evamidha samavāyābhāvā phale
hetu natthīti hetusuññaṃ phalanti attho.

Suññato vinicchayaṇṇanā niṭṭhitā.

Ekavidhādivinicchayakathāvaṇṇanā

568. **Pavattibhāvatoti** saṃsārassa pavattibhāvato. **Catu-āhārabhedatoti**
catu-āhārapaccayavisesato. Etena cattāro kabaḷikārādi-āhāraviseso,
ajjhoharaṇiyavatthu, saḷāyatana, avijjā, abhisāṅkhārasāṅkhāte
tappaccayabhūtaḍḍhamaviseso ca

1. Ahaṅkāraṃ pattā (Syā, Ka)

saṅgaṇhāti, ojaṭṭhamakarūpa, vedanā, paṭisandhiviññāṇa, nāmarūpasaṅkhāte tannibbattadhammavisese ca.

Pavattakabhāvato pavattidukkhassa. **Rūpābhinandanādibhedo**¹ rūpakkhandhādi-abhinandanabhedo, rūpārammaṇādivasenāpīti vadanti. Rūpataṇhādīnaṃ paccekaṃ anekabhedattā **cha taṇhākāyā**, tesaṃ **bhedato**.

Upādānehi upādīyatīti upādi, upādānakkhandhapañcakaṃ. Tannissaraṇabhūtaṃ nibbānaṃ, tassa vūpasamo taṃsantīti katvā tassa yāva pacchimaṃ cittaṃ, tāva sesataṃ, tato paraṃ anavasesataṅca upādāya **sa-upādīsesanibbānadhātu**, **nirupādīsesanibbānadhātū**ti dvidhā voharīyati. Yathā cāyaṃ bhedo vohārato, evamikarepīti te katipaye dassetuṃ “**tividho**”ti-ādi vuttaṃ. Aññathā ekassa sato nibbānassa kuto bhedoti.

Samathavipassanābhedatoti ettha sammādiṭṭhisammāsaṅkappā vipassanā, itare samathāti vadanti. Sīlampi hi samathassa upakārakattā samathaggahaṇena gayhatīti tesaṃ adhippāyo. Atha vā yānavayassa vasena laddho maggo samatho vipassanāti āgamanavasena vuttoti daṭṭhabbo. **Ayanti** ariyamaggo. **Sappadesattāti** sīlakkhandhādīnaṃ ekadesattāti attho. Ekadeso hi padissati avayavabhāvena apadisīyatīti padeso, attano samudāyaṃ pati saha padesenāti **sappadesoti** vuccati yathā “sanidassanā dhammā”ti², sīlakkhandhādāyo ca sabbalokiyalokuttarasīlādīsaṅgāhakā, ariyamaggo lokuttaro evāti tadekadeso hoti.

Sajātītoti samānajātito, vacīduccaritavirati-ādibhedesu samānāya sīlajātīyāti attho.

Onatasahāyo viya vāyāmo paggahakiccasāmaññato. **Aṃsakūṭaṃ datvā** **ṭhitasahāyo viya sati** apilāpanavasena niccalabhāvakaraṇasāmaññato. **Sajātītoti** savitakkasavicārādibhedesu samānāya samādhi-jātīyāti attho. **Kiriyatoti** samādhi-anurūpakiriyato. Tato eva hi “cattāro satipaṭṭhānā samādhinimittā, cattāro

1. Rūpābhinandanādibhāvo (Sī, Syā, Ka)

2. Abhi 1. 3 piṭṭhe.

sammappadhānā samādhiparikkhārā”ti¹ sativāyāmānaṃ samādhissa nimittaparikkhārahāvo vutto.

Ākoṭentena viyāti “aniccaṃ aniccaṃ”ti-ādinā paññākiccasadisena kiccena samantato koṭentena viya, “aniccaṃ khayaṭṭhena, dukkhaṃ bhayaṭṭhena”ti-ādinā² **parivattentena** viya ca ādāya ūhitvā dinnameva paññā paṭivijjhati. Dvinnam samānakālattepi paccayabhāvena sammāsaṅkappassa purimakālassa viya niddeso kato. **Sajātītoti** “dukkhe ñāṇaṃ”ti-ādīsu³ samānāya paññājātiyā. **Kiriyato**⁴ti ettha paññāsadisam kiccaṃ “kiriya”ti vuttaṃ, pubbe pana samādhi-upakāraṃ tadanurūpakiccanti ayamettha viseso.

“Sabbam bhikkhave abhiññeyyan”ti⁵ vacanato cattāripi abhimukhaṃ paccakkhato ñātābbāni, abhivisiṭṭhena vā ñāṇena ñātābbānīti **abhiññeyyāni**.

569. **Aññamaññaṃ sabhāgāni**⁶ti aññamaññasamānabhāgāni, sadisarūpānīti attho.

Durabhisambhavataranti abhisambhavisuṃ sādhetuṃ asakkuṇeyyatarāṃ, sattaviḡhātena duradhigamanti attho. **Asananti** kaṇḍam. **Atipāteyyāti** khipeyya. **Koṭiyāti** kaṇḍassa koṭiyā vālaggena. **Koṭinti** vālasseva koṭim. **Paṭivijjheyāti** paṭimukhabhāvena vijjheyya.

Bādhakapabhasanti niyyānalakkhaṇehi vavatthānaṃ **salakkhaṇavavatthānaṃ**. **Duravagāhatthena gambhīrattāti** oḷārikā dukkhasamudayā. Tiracchānagatānampi hi dukkhaṃ, āhārādīsu ca abhilāso pākaṭo. Pīlanādi-āyūhanādivasena pana “idaṃ dukkhaṃ, idamassa kāraṇaṃ”ti yāthāvato ogāhituṃ asakkuṇeyyattā **gambhīrā**. Saṅhasukhumadhammattā nirodhamaggā sabhāvato eva **gambhīraṭṭhena duravagāhā**. Teneva uppanne magge natthi nirodhamaggānaṃ anavagāhoti. Nibbānampi maggena adhigantabbattā tassa phalanti apadisīyatīti āha “**phalāpadesato**”ti. Vuttañhetam “dukkhanirodhe ñāṇam atthapaṭisambhidā”ti⁷. Maggopi nirodhassa sampāpakabhāvato

1. Ma 1. 375 piṭṭhe. 2. Khu 9. 51 piṭṭhe Paṭisambhidāmagge. 3. Saṃ 3. 8 piṭṭhe.

4. Kiriyavasena (Ka)

5. Saṃ 2. 258 piṭṭhe.

6. Aññamaññasabhāgāni (Syā, Ka)

7. Abhi 2. 307 piṭṭhe.

“hetū”ti apadisīyatīti āha “**hetu-apadesato**”ti. Vuttampi cetam
 “dukkhanirodhagāminiyā paṭipadāya ñāṇam dhammapaṭisambhidā”ti.

Iti evaṃ pakārehīti iti vijaññāti sambandho. Tattha iti-saddena
 vijānanakkamaṃ dasseti. **Evaṃ pakārehīti** evaṃ-saddena
 vijānanakāraṇabhūtena eva.

Sabhāgavisabhāgatovinicchayaṇṇanā niṭṭhitā.

Indriyasaccaniddesavaṇṇanā niṭṭhitā.

Iti soḷasamaparicchedavaṇṇanā.

17. Paññābhūminiddesavaṇṇanā

Paṭiccasamuppādakathāvaṇṇanā

570. **Imissā paññāyāti** imissā yathādhigatāya vipassanāya.

Bhūmibhūtesūti pavattiṭṭhānabhūtesu. Kāmañcāyaṃ paṭiccasamuppādapāṭiccasamuppannasamaññā pitāputtasamaññā viya apekkhāsiddhā, hetuphaladhammesu pana yathākkamaṃ vavatthitāvāti “**paṭiccasamuppādo cevā**”ti-ādinā vibhajja vuttaṃ. **Ādi-saddenāti** “Paṭiccasamuppādādibhedā”ti ettha vutta-ādisaddena. **Avasesā honti**, saṃvaṇṇanāvāsenāti adhippāyo. Tenāha “**tesaṃ vaṇṇanākkamo anupatto**”ti.

Avijjādayo dhammā paṭiccasamuppādo, na samuppattimattaṃ. Svāyamattho iminā suttapadena vedittabboti dassento “**vuttañhetan**”ti-ādiṃ vatvā paṭiccasamuppanne pana dassetuṃ “**jarāmarañādayo panā**”ti-ādi āradham. Kasmā panettha anulomato paṭiccasamuppādadharmā dassitā, paṭilomato paṭiccasamuppannā dhammāti? Yato te paccayato uppannā, tassa samanantaradassanattamaṃ.

Na niccaṃ na sassatanti **aniccaṃ**. Samecca sambhūya paccayehi katanti **saṅkhatam**. Paṭicca paccayārahaṃ paccayaṃ nissāya sahitameva uppannanti **paṭiccasamuppannam**. Khayanasabhāvaṃ **khayadhammam**. Vayanasabhāvaṃ **vayadhammam**. Virajjanasabhāvaṃ palujjanasabhāvaṃ **virāgadhammam**. Nirujjhanasabhāvaṃ **nirodhadhammam**. Sesaṃ yadettha vattabbaṃ, taṃ parato āvi bhavissati.

571. **Etthāti** etesu yathāvuttesu suttapadesu. **Saṅkhepoti** atthasaṅkhepo.

Jātipaccayāti jātisāṅkhātā paccayā. Hetumhi nissakkavacanaṃ. **Ṭhitāva sā dhātūti** yāyaṃ jarāmarañassa idappaccayatā “jātipaccayā jarāmarañan”ti, esā dhātu esa sabhāvo. Sā tathāgatānaṃ uppādato pubbe, uddhañca aviññāyamāno, majjhe ca viññāyamāno, na tathāgatehi uppādito, atha kho sambhavantassa jarāmarañassa sabbakālaṃ jātipaccayato sambhavoti ṭhitā eva. Kevalaṃ pana

sayambhūñāṇena abhisambujjhanato, “ayaṃ dhammo tathāgatena adhigato”ti pavedanato ca tathāgato “dhammassāmi”ti vuccati na apubbassa uppādanato. Tena vuttaṃ “ṭhitāva sā dhātū”ti. Sā eva **jāti paccayā jarāmarañanti** ettha vipallāsābhāvato evaṃ avabujjhamānassa etassa sabhāvassa, hetuno vā tatheva bhāvato ṭhitatāti **dhammaṭṭhitatā**. Jāti vā jarāmarañassa uppādaṭṭhiti pavatta-āyūhana samyogapalibodhasamudaya hetu paccayaṭṭhitīti taduppādādibhāvenassā ṭhitatā “**dhammaṭṭhitatā**”ti phalaṃ patisāmatthiyato hetumeva vadati.

Atha vā dhārīyati paccayehīti dhammo, tiṭṭhati tattha tadāyattavuttitāya phalanti ṭhiti, dhammassa ṭhiti **dhammaṭṭhiti**. **Dhammoti** vā kāraṇaṃ, paccayoti attho. Dhammassa ṭhitisabhāvo, dhammato ca añño sabhāvo natthīti **dhammaṭṭhiti**, paccayo. Tenāha “paccayapariggahe paññā dhammaṭṭhitiñāṇaṃ”ti¹. Dhammaṭṭhiti eva **dhammaṭṭhitatā**. Sā eva dhātu “jātipaccayā jarāmarañanti”ti imassa sabhāvassa, hetuno vā aññathattābhāvato “na jātipaccayā jarāmarañanti”ti viññāyamanassa tabbhāvābhāvato niyāmatā vavattitabhāvoti **dhammaniyāmatā**. Phalassa vā jarāmarañassa jātiyā sati sambhavo dhamme hetumhi ṭhitatāti **dhammaṭṭhitatā**. Asati asambhavo dhamme niyatatāti **dhammaniyāmatāti** evaṃ phalena hetum vibhāveti. **Tam** “ṭhitāva sā dhātū”ti-ādinā² vuttaṃ idappaccayataṃ **abhisambujjhati** paccakkhakaṇṇena abhimukhaṃ bujjhati yāthāvato paṭivijjhati. **Abhisametīti** tassa vevacanāṃ. Ādito kathento **ācikkhati**, uddisatīti attho. Tameva uddesaṃ pariyoṣāpento **deseti**. Yathā-uddiṭṭhamatthaṃ niddisanavasena pakārehi nāpentā **paññapeti**. Pakārehiyeva paṭiṭṭhapento **paṭṭhapeti**. Yathāniddiṭṭhamatthaṃ paṭiniddisanavasena **vivarati vibhajati**, vivaṭaṇhi vibhattaṇca atthaṃ hetudhāraṇadassanehi pākāṭaṃ karonto **uttānikaroti**. Uttānikaronto tathāpaccakkhabhūtaṃ katvā nigamanavasena **passathāti cāha**.

572. **Paccayalakkhaṇoti** paccayabhāvalakkhaṇo, paccayoti vā lakkhitabbo. Pavattidukkhassa anubandhāpanakiccatāya **dukkhānubandhanaraso**. Nibbānagāmimagassa uppathabhāvato **kummaggapaccupaṭṭhāno**.

1. Khu 9. 48 piṭṭhe Paṭisambhidāmagge.

2. Saṃ 1. 264 piṭṭhe.

So **panāyaṃ** paṭiccasamuppādo. Yāvattakehi paccayehi yaṃ phalaṃ uppajjanārahaṃ, avikaleheva tehi tassa uppatti, tadaññena ca tassa payojanaṃ natthīti āha “**anūnādhikehevā**”ti. Yathā taṃ cakkhu rūpālokamanasikārehi cakkhuviññāṇassa, etena taṃtaṃphalanipphādanena tassā paccayasāmaggiyā tapparatā **tathatāti** dasseti. **Sāmagginti** samodhānaṃ, samavāyanti attho. **Asambhavābhāvato**ti anuppajjanassa abhāvato. Paccayasāmaggiyañhi sati anuppajjane tassā vitathatā siyā. **Aññadhammappaccayehī**ti aññassa phaladhammassa paccayehi. **Aññadhammānuppattitoti** tato aññassa phaladhammassa anuppajjanato. Na hi kadāci cakkhurūpālokamanasikārehi sotaviññāṇassa sambhavo atthi, yadi siyā, tassā sāmaggiyā aññathatā nāma siyā, na cetāṃ atthīti “**anaññathatā**”ti vuttaṃ. **Paccayatoti** paccayabhāvato. **Paccayasamūhatoti** etthāpi eseva nayo.

573. **Idappaccayā eva idappaccayatāti tā**-saddena padaṃ vaḍḍhitaṃ, na kiñci atthantaraṃ yathā devo eva devatāti. **Idappaccayānaṃ vā samūho idappaccayatāti** samūhatthaṃ **tā**-saddamāha yathā “janānaṃ samūho janatāti. Nanu ca “atthi idappaccayā jarāmarañanti iti puṭṭhena satā ānanda atthitissa vacanīyaṃ. Kiṃ paccayā jarāmarañanti iti ce vadeyya, jātipaccayā jarāmarañanti iccassa vacanīyaṃ”ti¹ jātisaddapaccayasaddasamānādhikaraṇena kiṃ-saddena idaṃsaddassa samānādhikaraṇatā dassanato idappaccayasaddassa kammadhārayasamāso dissati, na hettha “imassa paccayā idappaccayā”ti jarāmarañassa, aññassa vā paccayato jarāmarañasambhavapucchā sambhavati viditabhāvato, asambhavato ca, jarāmarañassa pana paccayapucchā sambhavati. Paccaya-saddena ca samānādhikaraṇatāya idaṃ-saddassa imasmā paccayāti paccayapucchā yujjati. Sā ca samānādhikaraṇatā bāhiratthasamāsepi labbhati. Tato ca aññapadatthavacananicchābhāve kammadhārayasamāso labbhati.

Sānivacanasamāse pana samānādhikaraṇatā natthīti na kathañci kammadhārayasamāsasambhavoti? Nayidamevaṃ vacanicchantarabhāvato. Paṭiccasamuppādavacanicchā hesā “idappaccayatā paṭiccasamuppādo”ti ettha. “Atthi

1. Dī 2. 47 piṭṭhe.

idappaccayā jarāmarañan”ti ettha pana jarāmarañassa paccayamattaparipucchā, tasmā yathā idaṃ-saddassa paṭiccasamuppādavisesanatā, pucchitabbapaccayavisesanatā ca hoti, tathā samāsavikappo ettha, tattha ca kātābhoti na samāsantaradassanaṃ sāmivacanasamāsabādhakaṃ. Kasmā panetthāpi kammadhārayasamāso na icchitoti? Hetuppabhavānaṃ hetu paṭiccasamuppādoti imassatthassa kammadhārayasamāse asambhavato, “imassa attano paccayānurūpassa anurūpo paccayo idappaccayo”ti imassa ca atthassa icchitattā. Yo panettha idaṃ-saddena gahito attho, so “atthi idappaccayā jarāmarañan”ti ettha jarāmarāṇaggahaṇeneva gahitoti idaṃ-saddo paṭiccasamuppannato abhassitvā aññāsambhavato paccaye avatiṭṭhati, tasmā tattha kammadhārayasamāso. Ettha pana idaṃ-saddassa tato pariccajanakāraṇaṃ natthīti sāmivacanasamāso eva. Evampi na idappaccayo eva idappaccayabhāvo bhavituṃ yuttoti idappaccayatāya paṭiccasamuppādātānupapattīti? Nāyaṃ doso atthantarābhāvatoti vuttovāyamatto.

Atha vā pana hotu idappaccayabhāvo idappaccayatāti. **Bhāvoti** cettha avinābhāviphalaṃ pati hetuno satvaṃ. Tathā hi idappaccayasaddo jāti-ādīsu niruḷho. Tañca idappaccayasatvaṃ idappaccayato aññaṃ natthi. Yadi aññaṃ siyā, taṃ avijjamānaṃ siyā. Na hi satā aññaṃ vijjamānaṃ hoti. Atha satvaṃ saṃ nāma, yassa sato bhāvo, taṃ asaṃ nāma siyā. Na hi taṃ satvaṃ sabhāvaṃ satvato aññattā, tasmā sato bhāvo satvanti niddeso na yujjati. Na ca saṃ-sambandhena asaṃ saṃ nāma hoti, pageva asaṃ-sambandhena. Asati ca saditiggahaṇaṃ viparītaggāhoti na gahaṇato saṃsiddhi. Sadisakappanāyañca māṇavakassa sīhabhāvo viya na asato saṃ-sabhāvatā. Yasmā pana idappaccayabhāvo yathāvuttaṃ satvaṃ, na asatvaṃ. Nāpi yassa taṃ satvaṃ, tadasaṃ, tasmā idappaccayabhāvo idappaccayasarūpaṃ sabhāvantarehi vinivattabhāvadassanatthaṃ imassāyanti visesetvā idappaccayatāti vuttanti na idappaccayatāya paṭiccasamuppādabhāvāsambhavo.

Paṭicca samuppajjati etasmāti paṭiccasamuppādoti tassāpi hetu-atthabhāvato jāti-ādīpadānaṃ evameva hetubhāvavācakatāya hetupadhānatā yojetabbā hetuppabhavānaṃ hetu paṭiccasamuppādoti

katvā. Tathā hi “dasabalasamannāgato bhikkhave tathāgato catūhi vesārajehi samannāgato āsabhaṃ ṭhānaṃ paṭijānāti, parisāsu sīhanādaṃ nadati, brahmacakkaṃ pavatteti, imasmim̃ sati idaṃ hoti yāva ‘evametassa kevalassa dukkhakkhandhassa nirodho hotī’ti” anena **sīhanādasuttena**¹ pakāsito evamattho. “Kimvādī panāyasmato satthā kimakkhāyī”ti puṭṭhena āyasmatā **assajittherena**—

“Ye dhammā hetuppabhavā, tesaṃ hetum̃ tathāgato āha.

Tesañca yo nirodho, evaṃvādī mahāsamaṇo”ti²—

vutto. Tena viññāyati hetuppabhavānaṃ hetu paṭiccasamuppādoti. Sesamettha vattabbaṃ parato āvi bhavissati.

574. **Paṭiccāti** taṃ taṃ kāraṇaṃ nissāya. **Sammāti** aviparītaṃ aniccato aniccassa uppādoti katvā. Niccato hi kāraṇato phalassa uppādo viparīto. Tenāha “**titthiya -pa- nirapekkho**”ti. “Uppādo paññāyati”ti³ evaṃ vuttasaṅkhatalakkhaṇato añño “paccayato khaṇato”ti ettha vuttapaccayalakkhaṇo eko ākāro uppādoti tesaṃ adhippāyo. Yaṃ sandhāya te “jāti-ādīnaṃ hetavo jāti-ādāyo”ti vadanti, taṃ tesaṃ matimattaṃ, nibbattilakkhaṇavinimuttassa tādisassa kassaci abhāvato. Tenāha “**taṃ na yujjati**”ti-ādi. **Gambhīranayāsambhavatoti** gambhīrānaṃ nayānañca asambhavato. **Saddabhedatoti** saddavināsato saddāyogato. **Suttaṃ natthi** “paṭiccasamuppādaṃ vo bhikkhave desessāmi”ti-ādisuttapadehi⁴ uppādamattassa appakāsītattā. Ayameva hi attho hetṭhā dassito idānipi dassīyati. Taṃ uppādamattaṃ. **Viharāmi** tasmim̃ paṭhamābhisambuddhakāleti adhippāyo. **Viharāmīti** vā kālavipallāsenā vuttaṃ, vihāsinti attho. **Tatrāti** tasmim̃ padesavihāre. **Paccayākāradassanenāti** yenākārena paccayadhammo paccayuppannassa paccayo hoti, so paccayākāro paccayabhāvo, tassa dassanena. Idha pana vedanānaṃ paccayabhāvo adhippeto.

1. Saṃ 1. 265 piṭṭhe.

2. Vi 3. 51; Khu 3. 27 piṭṭhesu.

3. Saṃ 2. 31, 32; Aṃ 1. 150; Abhi 4. 54 piṭṭhesu.

4. Saṃ 1. 243, 264 piṭṭhesu.

Tenāha “**micchādiṭṭhipaccayāpi vedayitan**”ti-ādi. Vedanānaṃyeva hi paccayaṃ passantena vuttavihāro paṭṭicasamuppādassa ekadesameva passato vihāroti katvā padesavihāro jāto, anantanayasamantapaṭṭhānāmanasikāro paṭṭhamābhisambuddhavihāro. Tañhi nippadesato paccayākāradassananti eke. **Padesavihārasuttavirodho āpajjati** tassa vedanānaṃ paccayadhammanasikāravibhāvanato.

Loko samudeti etasmāti **lokasamudayo**, avijjādiko paccayagaṇo, na lokasamudayamattaṃ. Tenāha “**anulomapaṭṭicasamuppādo**”ti. **Natthitāti** sabbaso abhāvo, naranvayavināso ucchedoti attho. Natthitāsahacaraṇato pana ucchedadiṭṭhi natthitāti adhippetā. **Paccayānuparamo** paccayānaṃ avicchedo. Yathā hi atītahetupañcakasannissayena etarahiphalapāñcakaṃ viya hetupañcakampi hoti, evaṃ etarahihetupañcakasannissayena āyatimphalapāñcakampi bhavissati. Tenāha “**paccayānuparame phalānuparamato**”ti.

Taṃ gambhīrattaṃ **uppādamatte natthi** asabhāvadhammattā¹. Ekattanayādayo nayā sabhāvadhammesu labbhamānato² uppādamatte kathañcipi na labbheyyunti āha “**nayacatukkaṃ uppādamatte natthi**”ti.

575. **Samāne kattarīti** ekasmiṃyeva kattari uppajjanakiriyāya yo kattā, tasmīnyeva paccayanakiriyāya ca kattubhūtetī attho. Yathā “nhatvā bhujjati, bhutvā sayatī”ti. “**Pubbakāle**”ti idaṅca tvāsaddantānaṃ padānaṃ yebhuyyena purimakālakiriyāya dīpanato vuttaṃ, na idha paṭṭicasaddassa purimakālatthattā. Evañhi “cakkhum paṭṭicā”ti nidassanavacanāṃ nidassitabbena sāmsandeyya. Atha vā kāmañcettha ubhinnaṃ kiriyānaṃ samakālatā uppajjanakiriyāya pubbe paccayanakiriyāya asamभवतो, tathāpi phalakiriyāya hetukiriyā purimakālo viya voharituṃ yuttā. Evamettha hetuphalavavatthānaṃ supākaṭaṃ hotīti upacārasiddhaṃ purimakālaṃ gahetvā vuttaṃ “**pubbakāle**”ti. **Atthasiddhikaroti** vākyatthapaṭivīññattikaro. Paṭṭicasamuppādoti hi ettha vākyatthāvabodho idha atthasiddhīti adhippeto. **Payujjamāno** paṭṭicasaddo uppādasaddena

1. Abhāvadhammattā (Ka)

2. Labbhamānakā (Syā)

vuccamānassa samānassa “kattu abhāvato”ti padaṃ ānetvā yojetabbaṃ. Ayañhettha attho “cakkhuñca paṭicca rūpe ca uppajjati cakkhuviññāṇaṃ”ti-ādīsu¹ paccayanakiriyāya, uppajjanakiriyāya ca viññāṇameva kattāti samānakattukatā labbhati.

“Paṭiccasamuppādo”ti ettha pana uppādasaddassa bhāvasādhanatāya kiriyāva vuttāti samānakattulakkhaṇo saddappayogo na sambhavatīti. Tenāha “**saddabhedam gacchatī**”ti, apasaddappayogo hotīti attho. Na cettha parāvarayogo² “appatvā nadim pabbato, atikkamma pabbatam nadi”ti-ādīsu viya, nāpi lakkhaṇahetu-ādīpayogo “sīham disvā bhayam hoti, ghatam pivitvā balaṃ jāyate, ‘dhan’ti katvā daṇḍo patito”ti-ādīsu viya. Nevettha saddabhedo. Na hi hatthatale āmalakam viya sabbaññeyyam paccakkham katvā ṭhitānam mahesīnam vacane akkharacintakānam vipplāpo avasaram labhati. Labhatu, vākyatthena saddasiddhito “nhatvā gamanam, bhutvā sayanam”ti-ādīsu viyāti. Evampi na ca kiñci attham sādheti. Yadi pi paccakam padattho labbhati, vākyattho pana na yujjati, tasmā dasadāḷimādivākyāni viya asambandhatthatāya niratthakam hotīti adhippāyo.

Nāmapade vutte appayuttānīpi “atthi, hoti, vijjati”ti evarūpāni kiriyāpadāni ānetvā sambandhitabbānīti nāyam sandhāyāha “**hoti-saddena saddhim yojayissāmā**”ti. **Imesūti** yathāvuttesu desanāpaṭiññāpucchānigamanavasena vuttesu paṭiccasamuppādapadesu. Nidassanamattañcetam, aññesupi “paṭiccasamuppādameva sādhu kam yoniso manasi kāroti³. Yadi dam idappaccayatā paṭiccasamuppādo⁴. Gambhīro cāyam ānanda paṭiccasamuppādo”ti⁵ evamādīsipi ekenapi saddhim hoti-saddo sambandham na gacchati. **Yogam na gacchati** tathā sambandhavasena avuttattā. “**Na ca uppādo hotī**”ti idam asabhāvadhamattā uppādassa nibbatilakkhaṇāyogam sandhāya vuttam. Yathā hi vināsassa vināso natthi, evam uppādassa vināso viya uppādopi natthi. Yadi siyā, yena uppādena uppādo uppādavā, sopi

1. Ma 1. 158, 326; Ma 3. 328, 332, 333; Saṃ 1. 301; Saṃ 2. 261; Abhi 4. 248 piṭṭhādīsu.

2. Pāṇinī 3. 4. 20 parāvarayoge ca.

3. Saṃ 1. 246 piṭṭhādīsu.

4. Dī 2. 32; Ma 2. 291; Saṃ 1. 138; Vi 3. 5 piṭṭhādīsu. 5. Dī 2. 47; Saṃ 1. 318 piṭṭhesu.

uppādavāti anavaṭṭhānameva āpajjeyyāti vuttovāyamattho. Tenāha “**sace heyyā**”¹ti-ādi. Yadi evaṃ kathaṃ samudayo hotīti? Nāyaṃ doso nibbattiyā anadhippetattā. Evaṃ dukkhakkhandhassa samudayo pātubhāvo sambhavaṭīti ayañhettha attho, idha pana paṭiccasamuppādo hotīti tassa atthibhāvavadanā²ti katvā hoti jāyatīti nibbatticodanā³ katā siyāti adhippāyena vuttam “**na uppādo hotī**”ti.

576. Imesaṃ saṅkhārādīnaṃ paccayā idappaccayā, avijjādayo, tesam bhāvo **idappaccayatā**. Ko pana so bhāvoti āha “**bhāvo ca nāmā**”ti-ādi. Tassattho—yenākārena avijjādayo saṅkhārādīpātubhāvahetū honti, tasmim avijjādīnaṃ pavatti-ākāravisesse vikāre paṭiccasamuppādoti ayaṃ samaññāti. **Tesam** vādīnaṃ taṃ maññanaṃ. **Hetuvacanatoti** hetubhāvavacanato.

577. **Etthāti** paṭiccasamuppādapade. Samuppādapadhānavacanaviññeyyo sasattiko hetu paṭiccasamuppādoti aviparītaṃ attham ajānantānaṃ aññattha samuppādasaddassa bhāvasādhanassa dassanato tathā idhāpi **byañjanacchāyāya uppādoyevāyam** vutto, na hetūti yā **saññā uppajjati, sā imassa** paṭiccasamuppādapadassa evaṃ idāni vuccamānākārena attham gahetvā vūpasametabbā vinodetabbā.

Dvedhāti gāthāya ayaṃ saṅkhepattho—yasmā attano paccayavasena pavatto paccayuppānnadhammasamūho paccetabbato paṭicco ca so saha uppajjanato samuppādo ca, paṭicca vā kāraṇasāmaggiṃ apaccakkhāya saha uppajjanato evāti ca evaṃ dvedhā “paṭiccasamuppādo”ti idaṃ vacanaṃ icchitabbaṃ, tasmā tassa paccayadhammopi phalūpacārena paṭiccasamuppādo icceva vuttoti.

Paccayatāyāti paccayasamūhato. **Pavattoti** nibbatto. **Dhammasamūhoti** paccayuppānnadhammapuñjo. **Patīyamānoti** ñāṇagatiyā abhimukham peyamāno, abhisamiyamānoti attho. **Hitāya sukhāya cāti** lokuttarahitāya, lokuttarasukhāya ca. **Saha uppajjati** ekekassa

1. Sace bhaveyya (Ka)

2. Atthibhāvavajotana (?)

3. Nibbattijotana (?)

kadācīpi uppattiyā abhāvato. **Sammā uppajjati** ahetuto, visamahetuto ca anuppajjanato. **Saha uppajjatī** ekajjhaṃ uppajjati antamaso aṭṭhannaṃ dhammānaṃ uppajjanato. **Na paccakkhāyā**¹ti apaṭikkhipitvā, attano paccayabhūtaḍḍhammasamudāyena kenaci na vināti attho. **Tassāti** yvāyaṃ “paṭiccasamuppādo”ti vutto paccayuppannadhammasamūho, tassa ayaṃ avijjādiko hetusamūho. **“Tappaccayattā”**ti etena paṭiccasamuppādapaccaye paṭicca samuppādasamaññāti dasseti. Tenāha **“yathā loke”**ti-ādi. Yathā hi loke “pittaṃ mathitaṃ², sūrā dudhi, tipusaṃ jaro, semho guḷo, āyu ghatan”ti ca paccayo phalavohārena vuccati, evaṃ phalūpacārena paṭiccasamuppādo vuttoti veditabbo.

578. Paṭicca-sadde paṭi-saddo abhimukhattho, icca-saddo gammatthoti dassento āha **“paṭimukhamito”**ti. Kassa pana paṭimukhaṃ, kena vā ito, ko vā itoti codanattaye pacchimaṃ vissajjento **“hetusamūho”**ti āha. Tasmiñhi vissaṭṭhe hetusamūho nāma paccayasāmaggīti tattha aññamaññassa paṭimukhaṃ, aññamaññeneva ca itoti vissaṭṭhovāyamatto hotīti. **Sahiteti** samudibhe avinibbhutte. **Soti** hetusamūho. Samuppādo iti vuttoti yojanā.

Pātubhāvāyāti uppādāya. Kāmaṃ **pāḷiyam** “avijjāpaccayā saṅkhārā”ti avijjāva paccayabhāvena vuttā, tathāpi na avijjā ekāva paccayo hoti, atha kho sahaṃjātadhammavattu-ārammaṇādayo, yonisomanasikārādayo, taṇhupādānādayo ca dhammā yathārahaṃ saṅkhārūppādane avijjāya sahaṃkārikāraṇaṃ hontiyeva. Evaṃ saṅkhārādayopi viññāṇādīnanti āha **“avijjādi-ekekahetusīsena niddiṭṭho hetusamūho”**ti.

Sādhāraṇaphalanipphādaṭṭhenāti taṃsamūhāpariyāpannānaṃ hetudhammānaṃ sādhāraṇassa phalassa nibbattakabhāvena.

Avekallatṭhenāti anūnabhāvena. Tasmiñhi hetusamūhe ekaccāsādhāraṇāñcetaṃ phalaṃ, ekacceheva ca nibbattetabbaṃ siyā, sabbesaṃ tesam paccayadhammānaṃ aññamaññāpekkhā natthīti paṭimukhagamanābhāvato paṭiccattho na paripūreyyāti. **Sāmaggi-aṅgānanti** paccayasāmaggiyā aṅgabhūtānaṃ, samūhīnanti

1. Apaccakkhatāya (Ka)

2. Madhilaṃ (Syā)

3. Ma 3. 109; Saṃ 1. 243; Khu 1. 77; Vi 3. 1; Khu 10. 28; Abhi 2. 142 piṭṭhādīsu.

attho. Niddhāraṇe cetaṃ sāmivacanaṃ. Phaladhammānaṃ sahitatā nāma visuṃ abhāvo, na hetudhammānaṃ viya aññamaññāpekkhāti āha “**aññamaññānaṃ avinibbhogavuttidhamme**”ti. Avinibbhogaggahaṇaṇācetha rūpadhammānampi saṅgaṇhanatthaṃ. Aññathā sampayuttadhammeti vucceyya.

579. **Paccayatāti** ayaṃ avijjādiko paccayasamūho. **Aññoññanti** aññamaññānaṃ. **Paṭiccāti** nissāya sahakārikāraṇaṃ laddhā. **Samanti** avisamaṃ avekallena. **Sahāti** ekajjhaṃ. **Dhammeti** attano paccayuppannadhamme. Yasmā uppādeti, **tatopi** tasmāpi. Evaṃ paṭiccasamuppādoti muninā bhagavatā bhāsītāti yojanā. **Na apaṭicca** paṭiccevatī avadhāraṇatthaṃ dassento gāthāyaṃ eva-kāro luttaniddiṭṭhoti dasseti.

Ekekadesanti phalasadudāyassa ekadesekadesaṃ, bhāgasoti attho. **Pubbāparabhāvanāti** paṭipāṭiyā. Sabbametaṃ rūpārūpakalāpuppādanānaṃ sandhāya vuttaṃ. **Atthānusāravohārakusalenāti** paramatthadhammānugataavohāranipuṇena.

580. Purimena padenāti yojanā. **Sassatādīnanti** sassatabhāvādīnaṃ, sassatavādādīnaṃ vā. Sassatasahacaritā hi vādāpi sassatādayoti vuccanti yathā “dukkhadesanā dukkhan”ti. **Ucchedādīti** etthāpi eseva nayo. **Vighāto** vināso, pahānanti attho. **Ñāyoti** antadvayavirahitā majjhimā paṭipatti.

Pavattidhammānanti pavattibhūtānaṃ dhammānaṃ, kilesavattādīnanti attho. “Sassato attā ca loko cā”ti-ādi¹nayappavatto **sassatavādo**. “Natthi hetu, natthi paccayo sattānaṃ saṃkilesāyā”ti-ādi²nayappavatto **ahetuvādo**. Pakatī aṇukālādivasena loko pavattatīti evaṃ pavatto **visamahetuvādo**. Issarapurisapajāpativādā³ **vasavattivā dā**. Ahetuvādaggahaṇeneva cetha sabhāvaniyati yadicchāvādānampi saṅgaho daṭṭhabbo. Keci pana “cakkhu eva cakkhussa kāraṇaṃ”ti evamādiko **visamahetuvādo**. Issarādivādo ahetuvādantogadho. Sabhāveneva dhammā pavattantīti vādo “**vasavattivādo**”ti vadanti.

1. Dī 1. 12 piṭṭhe.

2. Dī 1. 50; Ma 2. 70, 185; Saṃ 2. 172 piṭṭhesu.

3. Issarapajāpativādā (Ka)

Kim hi paccayasāmaggiyā payojananti adhippāyo. Samuppādapadena paridīpito hotīti yojanā. Paridīpanassa pana aviparītakāraṇaṃ dassetuṃ “**paccayasāmaggiyaṃ dhammānaṃ uppattito**”ti vuttaṃ. **Vihatā**ti abbhāhatā. “**Purimapurimapaccayavasenā**”ti iminā avicchedavasena pavattamānaṃ ucchedaditṭhinivattakaṃ hetuphalapabandhaṃ dasseti. Tenāha “**kuto ucchedo**”ti. Ucchedābhāvakathaneneva cettha ucchedavādassāpi abbhāvaṃ dassetīti daṭṭhabbaṃ.

Tassā tassā paccayasāmaggiyāti tasmim̐ tasmim̐ hetupaccayasamavāye. **Santatim̐ avicchindivā**ti hetuphalapabandhasaṅkhātassa santānassa avicchindanena. **Tesaṃ tesaṃ** paccayuppannadhammānaṃ sambhavato uppajjanato sassatucchedasaṅkhātāṃ antadvayaṃ anupaggamma yathāsakaṃ paccayehi anurūpaphaluppatti idha majjhimapaṭipadāti adhippetā. Kammavattassa, vipākavattassa ca bhinnasabhāvattā, bhinnakālattā ca **so karoti so paṭisaṃvedetīti vādappahānaṃ**. Kusalākusalakkhandhappavattiyaṅhi kāravohāro, vipākakkhandhappavattiyaṃ vedakavohāroti. Yasmiṃ santāne kammaṃ nibbattaṃ, tattheva tassa phalassa nibbattanato **añño karoti añño paṭisaṃ vedetīti vādappahānaṃ**. Na hi katassa vināso, akatassa vā abbhāgamo attho. “Itthī, purisā”ti vohārena janapadanirutti. Tattha yasmā paṇḍitāpi loke “pañcakkhandhe ānetu, nāmarūpaṃ āgacchatū”ti avatvā itthī, purisotveva voharanti, tasmā “itthī evāyaṃ, puriso evāyanti apariññātavatthukānaṃ hoti abhiniveso. Viddasuno pana paṭiccasamuppādaṃ jānantassa tathā tathā pavattamāne dhamme upādāya paññattimattato tattha paramatthato na abhinivesoti āha “**janapadaniruttiyā anabhiniveso**”ti. **Samaññāyā**ti lokasamaññāya. **Anatidhāvananti** anatikkamaṇaṃ. “Satto”ti hi vutte “ko ettha satto, kim rūpaṃ, udāhu vedanādayo”ti vibhāgaṃ akatvā lokasamaññāvaseneva lokiyeḥi viya lokiyo attho samaññaṃ avilaṅghantena voharitabbo.

Aparo nayo—paccetumarahaṭṭīti paṭicco. Yo hi naṃ pacceti abhisameti, tassa accantameva dukkhavūpasamāya saṃvattati. Sammā, saha ca uppādetīti samuppādo. Paccayadhammo hi attano phalaṃ uppādentō

sampuñṇameva uppādeti, na vikalaṃ. Ye ca dhamme uppādeti, te sabbe saheva uppādeti, na ekekaṃ. Iti paṭicca ca so samuppādo cāti **paṭiccasamuppādo**. Atha vā paṭicca paṭimukhaṃ itvā kāraṇasāmaggiṃ appaṭikkhipitvā saḥite uppādetīti **paṭiccasamuppādo**. Paṭimukhagamanañca paccayassa kāraṇasāmaggiyā aṅgabhāvena phalassa uppādanameva. **Appaṭikkhipitvā**ti ca na vinā tāya kāraṇasāmaggiyā, aṅgabhāvaṃ agantvā sayameva na uppādetīti attho. Etena kāraṇabahutā dassitā, “**saḥite**”ti iminā paccayuppannadhammahutā. Ubhayenāpi “ekaṃ na ekato”ti-ādinā¹ parato vuccamāno sāsananayo dīpito hoti.

Atha vā paṭicca paccetabbaṃ paccayaṃ paṭigantvā na vinā tena sambandhassa uppādo **paṭiccasamuppādo**. Paṭiccasamuppādoti cettha samuppādappadhānavacanaviññeyyo sasattiko hetūti veditabbo. Tattha “paṭiccā”ti vutte kiṃ paṭiccāti vattabbanti āha “**paccetabba**”ti. So ca paccayadhammoti katvā vuttaṃ “**paccaya**”ti. Idāni paṭiccasaddassa atthamāha “**paṭigantvā**”ti. Kāraṇassa sabhāvena tappaṭilābhagatiyā patvā. Kathaṃ na vinā tena? Sati eva tasmim, tassa ca phalassa uppādato eva, na aññathā. Asati, nirodhamato cāti ayaṃ paccayaṭṭhiti paṭiccasaddassa attho. Tenāyaṃ paṭiccasaddo yathā “imasmiṃ sati imassuppādo”ti ete saddā bhūmanissakkavacanajotanīyena idaṃ-saddavacanīyassa hetumato hetu-āyattabhāvena bhāvuppāduttarakiriyāpekkhena yāya’ssa tadāyattatā, tāya samatthatāya hetum vadanti, evaṃ gantvā-saddantaravacanīyena tamviññeyyasseva paccayanakiriyākattuhetumato hetupaccayanena hetu-āyattabhāvena samuppāduttarakiriyāpekkhena yāya’ssa tadāyattatā, tāya samatthatāya hetumāha. Evañca katvā “avijjā paṭicca, saṅkhārā paṭiccasamuppannā”ti-ādi³ saṅkhārapaṭike vuttaṃ. **Samatthatā** cettha nidānādibhāvo. So ca tadavinābhāviphalaṃ pati satvameva. **Sambandhassāti** ca saṃyojanānurūpatāvasena jāti-ādinā sambandhassa jarāmarañā dipaccayuppannassa. **Uppādoti** uppajjanaṃ. Yadi evaṃ kathaṃ paṭiccasaddappayogo, nanu samānakattukānaṃ pubbakāle īdiso saddappayogoti? “Bhutvā gacchati, kasitvā vapatī”ti-ādisu saccametam, tam pana yebhuyyavasena

1. Visuddhi 2. 173 piṭṭhe.

2. Udāna-Ṭṭha 34 piṭṭhe passitabbaṃ.

3. Khu 9. 50 piṭṭhe Paṭisambhidāmagge.

daṭṭhabbaṃ samānāparakāle, asamānakattuke ca dassanato. Samānakāle tāva—

“Andhakāraṃ nihantvāna, uditāyaṃ divākaro.

Vaṇṇapaññāvabhāsehi, obhāsetvā samuggato”ti—

udāharaṇaṃ. Keci pana “mukhaṃ byādāya sayati, akkhīni parivattetvā passatī”ti udāharanti. Apare “nisajja adhīte, ṭhatvā kathetī”ti.

Tattha byādānaparivattanuttarakālabhāvisayanadassanakiriyāpekkhā pubbuttarakālatā atthi, sā ca bhedānupalakkhaṇā kehici na lakkhīyati. “Nisajja adhīte, ṭhatvā kathetī”ti ca samānakālatāyapi ajjhenakathanehi pubbepi nisajjaṭṭhānāti hontīti sakkā pubbuttarakālatā sambhāvetuṃ, tasmā purimāniyeva udāharaṇāni yuttāni. Udayasamakālemeva hi tannivattaniyanivattananti. Aparakāle “dvāramāvaritvā pavisati, āvaritvā nikkhamatī”ti. Keci pana “ḍakkacca patito daṇḍo”ti udāharanti. Abhighātabhūtasahajātāya pana abhighātajasaddassa samānakālatā ettha labbhati, tasmā idhāpi purimāniyeva udāharaṇāni yuttāni. Purimatāvacaṇicchāvaseneva pana lakkhaṇahetukiriyānaṃ lakkhaṇahetubhāvavacaṇicchāti lakkhaṇabhāvato¹ purimakālo icceva “nihantvānā”ti saddasiddhi icchitā, evaṇca paccayanakiriyā samuppajjanakiriyāya purimikāvāti paṭicca-saddasiddhi. Tattha yuttaṃ paccakkhato kattudassanato. Idha pana tadabhāvato na yuttanti ce? Nāyaṃ doso. Idhāpi anumānato siddho. Jarāmaraṇādiko kattā attheva “ñatvā kiriyato vayan”ti evamādiipayogadassanato avassaṃ anumiyamānena kattunā īdiso saddapayogo icchitabbo. Asamāne pana kattari “pisācaṃ disvā bhayaṃ hoti, paññāya cassa disvā āsavā parikkhīṇā hontī”ti² evamādi veditabbaṃ. Yathā ca tattha pisācadassanādiipurisabyāpāro, evamidhāpi paccayanaṃ paccayabyāpāro attano phaluppādanaṃ, taṅca satvaṃ samuppādovāti “paccaye sati, paccayassa uppādā”ti paccayanassa samuppādahetutāya gamako samānassa kattu abhāvepi paṭicca-saddo siddhoti veditabbo. Yadi paṭiccasambandhassa uppādo paṭiccasamuppādo. Kathaṃ

1. Lakkhaṇahetubhāvato (Ka)

2. Ma 1. 215; Ma 2. 143; Abhi 3. 183 piṭṭhādīsu.

paccayo paṭiccasamuppādoti? Heṭṭhā vicāritovāyamattho. Apica yoyaṃ samuppādasaddavibhāvitānaṃ paccayuppannānaṃ paṭiccasaddavibhāvito sasattiko hetu adhippeto, tassa samuppādābhimukhatāya padhānavacanaviññeyyasabhāvattā tathā vuttoti.

Kim pana kāraṇaṃ samuppādapadhānena vacanena samuppādassa hetu veditabbo, na pana sahetuko samuppādo evāti? Vuccate—diṭṭhassa dukkhassa yo paccayo paccayaniddesena tassa vibhāvitattā. Kathaṃ? Yathāha—

“Idha bhikkhave bhikkhu parivīmaṃsamāno parivīmaṃsati ‘yaṃ kho idaṃ anekavidhaṃ nānappakāraṃ dukkhaṃ loka uppajjati jarāmaṇaṃ, idaṃ nu kho dukkhaṃ kiṃnidānaṃ kiṃ samudayaṃ kiṃjātikaṃ kiṃpabhavaṃ, kismiṃ sati jarāmaṇaṃ hoti, kismiṃ asati jarāmaṇaṃ na hoti’ ti. So parivīmaṃsamāno evaṃ pajānāti “yaṃ kho idaṃ -pa- idaṃ kho dukkhaṃ jātinidānaṃ”iccādinā—

diṭṭhassa dukkhassa nidānaṃ **parivīmaṃsasutte**¹ vuttaṃ. Taṃ pajānanañca nidānampi viññātabbanti. Yathā cāha—

“Pubbe me bhikkhave sambodhā anabhisambuddhassa bodhisattasseva sato etadahosi ‘kiccaṃ vatāyaṃ loka āpanno jāyati ca jīyati ca mīyati ca cavati ca upapajjati ca, atha ca paṇimassa dukkhassa nissaraṇaṃ nappajānāti jarāmaṇassa. Kudāssu nāma imassa dukkhassa nissaraṇaṃ paññāyissati jarāmaṇassa’ ti -pa-. Tassa mayhaṃ bhikkhave yoniso manasikārā ahu paññāya abhisamayo ‘jātiyā kho sati jarāmaṇaṃ hoti, jātipaccayā jarāmaṇaṃ’ ti”—

ādinā² diṭṭhassa dukkhassa paccayavīmaṃsābhisamayā vuttā. Paccayo hi ñātabbo. Tadabhisamayāyattañca dukkhanissaraṇapajānananti yo ca ñātabbo, so pavedetabboti paṭiccasamuppādasaddo yaṃ yadidaṃ samuppādasaddavibhāvitaṃ diṭṭhaṃ dukkhaṃ, taṃ paccayaṃ paṭicceva, na aññathāti evaṃ paccayavibhāvanatthaṃ vuccati. Bhavati hi ñātum, pavedetuñca icchitabhāvena padhānassāpi kenaci visesena ñātabbatāya appadhānabhāvena niddeso

1. Saṃ 1. 308 piṭṭhe.

2. Saṃ 1. 251 piṭṭhe.

yathā “ko sotāpanno, yassa tīṇi saṃyojanāni pahīnāni. Ko devadatto, yassa uccatarāni gehāni”ti, evamidhāpi paccayapaccayanapavedanaṭṭhena niddese sattivisesena attano phalena paccanīyatāya ñātabbabhāvena “paṭiccā”ti pariyāyena paccayo vutto.

Yo cāyaṃ “avijjāpaccayā saṅkhārā”ti-ādiko niddeso, so ca sakalassa dukkhakkhandhassa mūlato paṭṭhāya paccayānaṃ pavedanāya niddiṭṭhoti pariyosānepi “evametassa kevalassa dukkhakkhandhassa samudayo hoti”ti evaṃ-saddena samugghātaṃ dukkhaṃ dassetvā tassa yathāvutte paccaye taṃsamudayābhimukhe katvā nigamitā paccayā. **Paṭipadāsuttepi**¹ “avijjāpaccayā -pa- samudayo hoti”ti vatvā “ayaṃ vuccati bhikkhave micchāpaṭipadā”ti vuttam. Na ca paṭiccasamuppānabhāvena gahitaṃ dukkhaṃ micchāpaṭipadam, atha kho dukkhasamudayabhūta paccayāti. Yathā ca “pañcaṅgiko sammāsamādhī², pañcañāṇikosammāsamādhī”ti³ aṅgañāṇapaṭivedanattattā desanāya sammāsamādhipadhānehi saddehi aṅgañāṇapaṭivedanaṃ kataṃ evamidhāpi samuppādapadhānena saddena paccayapaṭivedanaṃ katanti veditabbaṃ.

581. Yā panāyaṃ tantīti sambandho. **Nikkhattāti** ṭhapitā, desitāti attho. Yathāhippetassa atthassa tananato **tanti**, gantho. “Kimvādī bhante sammāsambuddho”ti pucchitena “vibhajjavādī mahārājā”ti⁴ moggaliputtatissattherena vuttattā sammāsambuddhasāvaka vibhajjavādino. Te hi satthārā venayikādibhāvaṃ vibhajja vuttam anuvadanti, somanassādīnaṃ, cīvarādīnaṃca sevītābbāsevītābbabhāvaṃ. Sassatucchedavāde vā vibhajja vadanti. “Sassato attā ca loko cā”ti-ādīnaṃ⁵ ṭhapanīyānaṃ ṭhapanato, rāgādikkhayassa sassatassa, rāgādikāyaduccarītādi-ucchedassa ca vacanato, na pana ekaṃsabyākaraṇīyādike tayo pañhe apanetvā vibhajjabyākaraṇīyameva vadanti. Vibhajjavādīnaṃ maṇḍalaṃ samūho **vibhajjavādimaṇḍalaṃ**. Vibhajjavādino vā bhagavato parisā **vibhajjavādimaṇḍalanti** vadanti, vibhajja vā sassatucchede ubho ante anupagamma majjhimapaṭipadābhūtassa paṭiccasamuppādassa desanato bhagavā, tadanuvādato tassa sāvaka ca **vibhajjavādinoti**. Sesam purimasadisam.

1. Saṃ 1. 246 piṭṭhe.

2. Dī 3. 232 piṭṭhe.

3. Dī 3. 234 piṭṭhe.

4. Vi-Ṭṭha 1. 45; Abhi-Ṭṭha 3. 110 piṭṭhesu.

5. Dī 1. 12 piṭṭhe.

Otaritvā ogāhetvā, vibhajjavādī hutvāti attho. Na hi sayam avibhajjavādī samāno vibhajjavādīnaṃ antare ṭhānamattena vibhajjavādimaṇḍalaṃ otiṅṅo nāma hoti. Ācariyehi avuttaviparītattadīpanena te **na-abbhacikkhantena**. Avijjā puññāneñjābhisaṅkhārānampi hetu paccayo hotīti vadanto, kathāvattumhi paṭikkhitte puggalavādādike ca vadanto sakasamayam vakkamati nāma, tathā **avokkamantena**. **Parasamayam** dosāropanabyāpāravirahena **anāyūhantena**. “Idampi suttaṃ gahetabban”ti parasamayam asampiṇḍentenāti keci vadanti. “Tathāham bhagavatā dhammaṃ desitaṃ ājānāmi, yathā tadevidaṃ viññāṇaṃ sandhāvati saṃsarati anaññaṃ”ti-ādīni¹ vadanto suttaṃ paṭibāhati nāma, tathā **apaṭibāhantena**. “Tathāham bhagavatā dhammaṃ desitaṃ ājānāmi, yathā yeme antarāyikā dhammā vuttā bhagavatā, te paṭisevato nālaṃ antarāyāya², supinante kato vītikkamo āpattikaro hoti”ti ca evamādiṃ vadanto vinayam paṭilometi nāma, tabbipariyāyena taṃ **anulomentena**. Paṭilomento hi kammantaram bhindanto, dhammatañca vilomento kuto kilesavinayam anulometi. **Sutte**³ vutte cattāro mahāpadese, **aṭṭhakathāyañca** vutte suttasuttānuloma-ācariyavāda-attano matimahāpadese **olokentena**. Tadolokanena hi sutte, vinaye ca santiṭṭhati nātidhāvati.

Dhammanti paṭiccasamuppādapāḷim. **Atthanti** tadattham. Hetu, hetuphalāni vā ayamettha hetu **dhammo**, idamettha hetuphalaṃ **atthoti**. **Dhammanti** vā dhammataṃ. Yathā eke “uppādā vā tathāgatānaṃ anuppādā vā tathāgatānaṃ ṭhitāva sā dhātū”ti⁴ suttapadassa attham micchā gāhentā “nicco paṭiccasamuppādo”ti paccayākāradhammaṃ micchā dīpenti, evaṃ adīpetvā heṭṭhā vuttanayeneva attano phalaṃ pati kāraṇassa vavattthitasabhāvaṃ dīpentena. Yathā ca eke “anirodham anuppādan”ti-ādinaṃ paṭiccasamuppādassa attham micchā gāhenti, evaṃ gāhe akatvā vuttanayeneva viparītaṃ **atthasāṅgāhentena**. “Dukkhādīsū aññāṇaṃ avijjā”ti vuttamattham parivattetvā puna “pubbante aññāṇaṃ”ti-ādīhi⁵ **aparehipi pariyāyehi**

1. Ma 1. 323 piṭṭhe.

3. Dī 2. 103; Am 1. 487 piṭṭhesu.

5. Abhi 1. 216 piṭṭhe.

2. Ma 1. 183; Vi 2. 175, 177 piṭṭhesu.

4. Saṃ 1. 264 piṭṭhe.

niddisantena. “Saṅkhārā iminā pariyāyena bhavoti vuccanti, taṅhā iminā pariyāyena upādānan”ti-ādinā niddisantenāti ca vadanti. **Pakatiyāti** yathāvuttavidhānam anāmasitvā kevalameva.

Saccanti catusaccam. **Sattoti** sattasuññatāti vadanti, sattasuññesu pana saṅkhāresu sattavohāro, sattatthakiccasiddhi ca. **Paccayākārameva** cāti paccayākāro eva ca, **ma-kāro** padasandhikaro. Paccayadhammānam attanoyeva phalassa paccayabhāvo paṭiccasamuppādoti attho.

Tasmāti vuttanayena atthavaṇṇanāya kātābhattā, dukkarattā ca **patiṭṭham nādhigacchāmīti** yattha ṭhitassa vaṇṇanā sukarā hoti, tassā patiṭṭhābhūtam tam nayaṃ attanoyeva nāṇabalena nādhigacchāmīti attho. Nissayaṃ pana ācikkhanto “**sāsanam panidan**”ti-ādimāha. Idha **sāsananti** pālīdhammāha, paṭiccasamuppādameva vā. So hi anulomapaṭilomādinānādesanāyapaṭimaṇḍito abbocchinno ajjāpi pavattatīti nissayo hoti. Tadaṭṭhakathāsaṅkhāto ca **pubbācariyamaggo.** “Tam suṇātha samāhitā”ti ādarajanane, ussāhane ca kim payojananti ce, tam dassento āha “**vuttañhetan**”ti-ādi. **Aṭṭhi katvāti** attham katvā. Yathā vā na nassati, evaṃ aṭṭhigatam viya karonto aṭṭhim katvā. Pubbakālato aparakāle bhavam **pubbāpariyam.** **Visesanti** paṭhamārambhato pabhuti khaṇe khaṇe nāṇavisesam, kilesakkhaya visesaṅca labhatīti attho.

582. **Desanābhedatoti** desanāvisesato. Atthato, lakkhaṇādito, ekavidhādito ca **atthalakkhaṇekavidhādito.** **Āṅgānaṅca vavatthānāti** avijjādīnam dvādasannaṃ āṅgānaṃ vavatthānadassanato.

Kammavipākakilesavaṭṭānam mūlakāraṇattā, ādito vuttattā ca avijjā paṭiccasamuppādassa mūlam. Tattha vallyā mūle diṭṭhe tato pabhuti valliharaṇam viya paṭiccasamuppādassa mūle diṭṭhe tato pabhuti paṭiccasamuppādadesanāti upamāsaṃsandanā na kātābbā¹. Na hi bhagavato idameva diṭṭham, idam adiṭṭhanti vibhajanīyam atthi sabbassa diṭṭhattā. Mūlato pabhuti pana valliharaṇam viya mūlato pabhuti paṭiccasamuppādadesanā katāti idamettha

1. Kātābbā (Syā, Ka)

sāmaññaṃ adhippetam, bodhaneyyajjhāsayavasena vā bodhetabbabhāvena mūlādidassanasāmaññaṃ yojetabbaṃ.

Tassāti—

“Sa kho yo bhikkhave kumāro vuddhimanvāya indriyānaṃ paripākamanvāya pañcahi kāmagaṇehi samappito -pa- rajanīyehi. So cakkhunā rūpaṃ disvā piyarūpe rūpe sārājati, appiyarūpe rūpe byāpajjati, anupaṭṭhitakāyasati ca viharati parittacetaso, tañca cetovimuttiṃ paññāvimuttiṃ yathābhūtaṃ nappajānāti, yatthassa te pāpakā akusalā dhammā aparisesā nirujjhanti. So evaṃ anurodhavirodhaṃ samāpanno yaṃ kiñci vedanaṃ vedeti sukhaṃ vā dukkhaṃ vā adukkhamasukhaṃ vā, so taṃ vedanaṃ abhinandati abhivadati, ajjhosāya tiṭṭhatī”¹—

evaṃ vuttassa. Evaṃ sotadvārādīsipi. Tassa **abhinandatoti** sappītikataṇhāya abhimukhabhāvena nandato. **Abhivadatoti** “aho sukhaṃ, aho sukhaṃ”ti vacībhedakaraṇapavattāya balavataṇhāya “ahaṃ, mamā”ti abhivadato. Tato balavatiyā mocetuṃ asakkuṇeyyatāya **ajjhosāya tiṭṭhato**. Tatopi balavatī pana upādānabhūtā taṇhā **nandī**. Ettha ca abhinandanādīnā taṇhā vuttā, nandivacanena tappaccayaṃ upādānaṃ catubbidhampi nanditātadavippayogatāhi, taṇhādiṭṭhābhinandanabhāvehi cāti veditabbaṃ.

Jātipaccayā jarāmaraṇanti-ādikañca tattheva **mahātaṇhāsaṅkhayasutte** vuttaṃ.

Vipākavaṭṭabhūte paṭisandhipavattiphassādike kammamuṭṭhānañca ojaṃ sandhāya “**cattāro āhārā taṇhānidānā**”ti-ādi vuttaṃ. Vaṭṭūpathambhakā pana itarepi āhārā taṇhāpabhāve tasmim avijjamāne na vijjantīti “**taṇhānidānā**”ti vattum vaṭṭanti.

1. Ma 1. 333 piṭṭhe.

583. **Tato tatoti** catubbidhāsu desanāsu tato tato desanato.

Ñāyappaṭivedhāya saṁvattatīti ñāyoti maggo, so eva vā¹ paṭiccasamuppādo “ariyo cassa ñāyo paññāya sudiṭṭho hotī”²ti² vacanato. Sayameva hi so samantabhaddakattā tathā tathā paṭivijjhitabbattā tāya tāya desanāya attano paṭivedhāya saṁvattati. **Catubbidhagambhīrabhāvappattiyāti** dhammatthadesanāpaṭivedhagambhīresu paṭiṭṭhādhiḡamanena paṭiṭṭhitattāti attho.

Samantabhaddakattā, desanāvilāsappatti ca catunnampi desanānaṁ samānaṁ kāraṇanti visesakāraṇaṁ vattukāmo āha “**visesato**”ti. **Assāti** assa bhagavato desanā, assa vā paṭiccasamuppādassa desanāti yojetabbaṁ. **Pavattikāraṇavibhāgo** avibhattasabhāvā avijjādayova, kāraṇanti vā gahitānaṁ pakati-ādīnaṁ, avijjādīnaṁ akāraṇatā, kāraṇatā ca. Tattha sammūḷhā keci akāraṇaṁ kāraṇanti gaṇhanti, keci na kiñci kāraṇaṁ bujjhantīti tesāṁ yathāsakehi anurūpehi kāraṇehi saṅkhārādi**pavattisandassanatthaṁ**, saṁsārappavattisandassanatthanti attho. Pavatti-ādīnavapaṭicchādikā avijjā ādi, tato saṅkhārā uppajjanti, tato viññāṇanti evaṁ pavattiyā **uppattikkamasandassanatthaṁ**. Gabbhaseyyakādivasena vā tattha tattha bhava attabhāvassa uppajjanānupubbisandassanatthaṁca anulomadesanā pavattāti. Itarāsaṁ tadatthātāsambhavepi na tāsāṁ tadatthameva pavatti atthantarasabbhāvato. Ayaṁ pana tadatthā evāti etissā tadatthatā vuttā.

Anuvilokayato yo sambodhito pubbabhāge taṁtaṁpacayuppannāvabodhasaṅkhāto pubbabhāgaṭivedho pavatto, tadanusārena tadanugamena jarāmaraṇādīkassa jāti-ādīkāraṇaṁ yaṁ adhigataṁ, tassa sandassanatthaṁ ayaṁ paṭilomadesanā pavattā. Anuvilokayato paṭilomadesanā pavattāti vā sambandho. Desentopi hi bhagavā kicchāpannaṁ lokaṁ anuviloketvā pubbabhāga -pa-sandassanatthaṁ desesīti. Āhārataṇhādayo paccuppannaddhā, saṅkhārāvijjā atītaddhāti iminā adhippāyenāha “**yāva atītaṁ addhānaṁ atiharitvā**”ti. Āhārā vā taṇhāya pabhāvetabbā anāgato addhā, taṇhādayo

1. Ñāyo eva vā (Syā, Ka)

2. Saṁ 1. 297; Saṁ 3. 338 piṭṭhesu.

paccuppanno, saṅkhārāvijjā atītoti. Paccakkhaṃ pana phalaṃ dassetvā tannidānadassanavasena phalakāraṇaparamparadassanaṃ yujjatīti āhārā purimataṅhāya uppādītā paccuppanno addhā, taṅhādayo atīto, saṅkhārāvijjā tatopi atītataro saṃsārassa anādibhāvadassanatthaṃ vuttoti. **Yāva atītaddānanti** yāva atītatarāṃ addhānanti attho vuttoti. Āyatim punabbhavābhiniḅbatti-āhārakā vā cattāro āhārā “āhāretītāhaṃ na vadāmi -pa- evaṃ pana maṃ avadantaṃ yo evaṃ puccheyya ‘kissa nu kho bhante viññāṇāhāro’ti, esa kallo pañho, tatra kallaṃ veyyākaraṇaṃ, viññāṇāhāro āyatim punabbhavābhiniḅbattiyā”¹ vacanato, taṃsampayuttattā phassacetanānaṃ, tappavattihetuttā ca kabaḷikārāhārassa. Tena hi upatthambhi tarūpakāyassa, tañca icchantassa kāmaviññāṇāyūhanaṃ hoti. Bhojanañhi saddhādīnaṃ, rāgādīnañca upanissayoti vuttaṃ. Tasmā te kammavaṭṭasaṅgahitā āhārā paccuppanno addhāti imasmim pariyāye purimoyeva attho yutto.

Atītaddhato pabhuti “iti kho bhikkhave avijjāpaccayā saṅkhārā”ti-ādinā² atīte, tato parañca hetuphalapaṭipāṭim paccakkhabhūtānaṃ āhārānaṃ nidānadassanavasena ārohitvā nivattanena vinā abujjhantānaṃ taṃsandassanatthaṃ sā ayaṃ desanā pavattāti attho.

Anāgataddhahetusamuṭṭhānato pabhutīti anāgatassa bhavassa hetubhūtānaṃ dhammānaṃ uppattito paṭṭhāya. **Anāgataddhasandassanatthanti** anāgataddhuno appaṭivijjhantānaṃ apassantānaṃ paccakkhaṃ paccuppannaṃ hetum dassetvā hetuphalaparamparāya tassa sandassanatthanti attho. Ettha ca ādito paṭṭhāya yāva pariyosānā, pariyosānato ca paṭṭhāya yāva ādi pavattā desanā dvādasāṅgā, tato eva tisandhi catusaṅkhepā. Majjhato paṭṭhāya yāva ādi pavattā desanā aṭṭhaṅgā dvisandhi tisānkhepā. Majjhato pana paṭṭhāya yāva pariyosānā pavattā desanā chaḷaṅgā dvisandhi tisaṅkhepā. “Saṃyojaniyesu bhikkhave dhammesu assādānupassino viharato taṅhā pavaddhati, taṅhāpaccayā upādānaṃ”ti-ādinā³ majjhato paṭṭhāya yāva pariyosānā pavattā desanā ekasandhi dvisānkhepā. Evaṃ ayaṃ aneakaṅgā

1. Saṃ 1. 254 piṭṭhe.

2. Saṃ 1. 246 piṭṭhe.

3. Saṃ 1. 312, 315, 316 piṭṭhādīsū.

eva paṭiccasamuppādadesanā āgatā. Ekaṅgavasenāpi ca paṭiccasamuppādadesanā labbhateva. Yathāha—

“Tatrabhikkhave sutavā ariyasāvako paṭiccasamuppādaṃyeva sādhukaṃ yoniso manasī karoti ‘iti imasmim̃ sati idaṃ hoti, imassuppādā idaṃ uppajjati. Imasmim̃ asati idaṃ na hoti, imassa nirodhā idaṃ nirujjhatī’ti. Sukhavedaniyaṃ bhikkhave phassaṃ paṭicca uppajjati sukhavedanā”ti¹—

ādi. Ettha hi “phassapaccayā”ti ettako eva paṭiccasamuppādo vutto. Tenetaṃ viññāyati “ekaṅgapaṭiccasamuppādo”ti².

Tattha **imasmim̃ sati idaṃ hotī**ti imasmim̃ avijjādike paccaye sati idaṃ saṅkhārādikaṃ phalaṃ hoti. **Imassuppādā idaṃ uppajjati**ti imassa avijjādikassa paccayassa uppādā idaṃ saṅkhārādikaṃ phalaṃ uppajjati attho. **Imasmim̃ asati idaṃ na hoti, imassa nirodhā idaṃ nirujjhatī**ti avijjādīnaṃ abhāve saṅkhārādīnaṃ abhāvassa, avijjādīnaṃ nirodhā saṅkhārādīnaṃ nirodhassa ca vacanena purimasmim̃ paccayalakkhaṇe niyamo dassito hoti “imasmim̃ sati eva, na asati, imassa uppādā eva, na nirodhā”ti. Tenetaṃ lakkhaṇaṃ antogadhaniyamaṃ idha paṭiccasamuppādassa vuttanti daṭṭhabbaṃ.

Nirodhoti ca avijjādīnaṃ virāgādhigamena āyatim̃ anuppādo appavatti. Tathā hi vuttaṃ “avijjāyatveva asesavirāganirodhā”ti-ādi³. Nirodhavirodhī ca uppādo, yena so uppādavirodhibhāvena⁴ vutto “imassa nirodhā idaṃ nirujjhatī”ti, tenetaṃ dasseti “anirodho uppādo nāma, so cettha atthibhāvotipi vuccatī”ti. “Imasmim̃ sati idaṃ hotī”ti idameva hi lakkhaṇaṃ pariāyantarena “imassuppādā idaṃ uppajjati”ti vadantena parena purimaṃ visesitaṃ hoti, tasmā na dharamānataṃyeva sandhāya “imasmim̃ satī”ti vuttaṃ, atha kho maggena aniruddhabhāvañcāti viññāyati. Yasmā ca “imasmim̃ asati idaṃ na hoti, imassa nirodhā idaṃ nirujjhatī”ti⁵ dvidhāpi uddiṭṭhalakkhaṇassa nirodhassa niddesaṃ vadantena “avijjāyatveva asesavirāganirodhā saṅkhāranirodho”ti-ādinā³

1. Saṃ 1. 321 piṭṭhe.

2. Pañcaṅgapaṭiccasamuppādoti (Syā, Ka)

3. Vi 3. 1; Khu 1. 79 piṭṭhādīsu.

4. Uppādanirodhabhāvena (Syā, Ka) Udāna-Ṭṭha 35 piṭṭhe passitabbaṃ.

5. Khu 1. 78 piṭṭhe Udāne.

nirodho eva vutto, tasmā natthibhāvopi nirodho evāti natthibhāvaviruddho atthibhāvo anirodhoti dassitaṃ hoti. Tena anirodhasaṅkhārena atthibhāvena uppādaṃ viseseti. Tato na idha attalābhamattaṃ uppādoti adhippeto, atha kho anirodhasaṅkhāto atthibhāvo cāti ayamatto vibhāvīti evametam lakkhaṇadvayavacanam aññamaññaṃ visesanavisesitabbabhāvena sātthakanti veditabbaṃ.

Ko panāyaṃ anirodho nāma, yo atthibhāvo, uppādoti ca vuccatīti? Appahīnabhāvo, anibbattitaphalatāppahīnārahatahi¹ phaluppādanārahata ca. Ye tehi pahātabbā akusalā dhammā, tesam ariyamaggena asamuggahātītabhāvo, ye pana na pahātabbā kusalābyākatā dhammā, yāni tesu saṃyojanāni akhīṇāsavānaṃ, tesam aparikkhīṇatā ca. Asamuggahātītanusayatāya hi sasamyojanākhandhappavattī paṭiccasamuppādo. Tathā hi vuttaṃ—

“Yāya ca bhikkhave avijjāya nivutassa bālassa, yāya ca taṇhāya sampayuttassa ayam kāyo samudāgato, sā ceva avijjā bālassa appahīnā, sā ca taṇhā aparikkhīṇā. Tam kissa hetu? Na bhikkhave bālo acari brahmacariyaṃ sammā dukkhakkhayāya, tasmā bālo kāyassa bheda kāyūpago hoti, so kāyūpago samāno na parimuccati jātiyā jarāmaraṇenā”ti—

ādi². Khīṇasaṃyojanānaṃ pana avijjāya abhāvato saṅkhārānaṃ, taṇhupādānānaṃ abhāvato upādānabhavānaṃ na sambhavoti vaṭṭassa upacchedo paññāyati. Tenevāha—

“Channantveva phagguna phassāyatanānaṃ asesavirāganīrodhā phassanīrodho, phassanīrodhā vedanīrodho”ti-ādi³.

Na hi aggamaggādhigamato uddham yāva parinibbānā saḷāyatanādīnaṃ appavattī, atha kho natthitā, nirodhasaddavacanīyatā, khīṇasaṃyojanatīti nirodho vutto. Apica carakatampi kammaṃ anibbattitaphalatāya, appahīnārahataya ca phalārahaṃ santam eva nāma hoti, na nibbattitaphalaṃ

1-1. Anibbattaphalatāhārci (Syā, Ka) 2. Saṃ 1. 263 piṭṭhe. 3. Saṃ 1. 255 piṭṭhe.

nāpi pahīnārahanti phaluppattipaccayānaṃ avijjāsaṅkhārādīnaṃ vuttanayena phalārahabhāvo anirodhoti veditabbaṃ. Evaṃ aniruddhabhāveneva hi yena vinā phalaṃ na sambhavahi, taṃ kāraṇaṃ atītādīpi “imasmim sati”ti iminā vacanena vuttaṃ. Tato eva ca avusitabrahmacariyassa appavattidhammataṃ anāpanno paccayuppādo kālabhedam anāmasitvā anivattitāya eva “imassuppādā”ti vutto. Atha vā avasesapaccayasamavāye avijjamānassāpi vijjamānassa viya pageva vijjamānassa yā phaluppatti-abhimukhatā, sā “imassuppādā”ti vuttā. Tadā hi tato phalaṃ uppajjatīti tadavattham kāraṇaṃ phalassa uppādanabhāvena upaṭṭhitaṃ uppatitaṃ nāma hoti, na vijjamānampi atadavatthanti tadavatthataṃ uppādoti veditabbā.

Tattha “sati”ti iminā vijjamānatāmattena paccayabhāvaṃ vadanto abyāpārataṃ paṭiccasamuppādassa dasseti. Uppādāti uppattidhammataṃ asabbakālabhāvitam, phaluppatti-abhimukhatañca dīpento aniccataṃ paṭiccasamuppādassa dasseti. “Sati, na asati, uppādā, na nirodhā”ti pana hetu-atthehi bhummanissakkavacanehi samatthitaṃ nidānasamudayaajātipabhavabhāvaṃ paṭiccasamuppādassa dasseti. Hetu-atthataṃ cettha bhummavacane yassa bhāvena tadavinābhāviphalassa bhāvo lakkhīyati, tattha pavattiyā veditabbā, yathā adhanānaṃ dhane ananuppādīyamāne dāliddiyaṃ vepullamagamāsi¹, nipphanne sasse subhikkhaṃ jāyatīti ca. Nissakkavacanassāpi hetu-atthataṃ phalassa pabhava pakatiyañca pavattiyā, yathā “kalalā hoti abbudaṃ, abbudā jāyate pesī”ti², “himavatā gaṅgā pabhavati, siṅgato saro jāyatī”ti ca. Avijjādibhāvena ca tadavinābhāvīsaṅkhārādibhāvo lakkhīyati, avijjādīhi ca saṅkhārādayo pabhavanti, pakarīyanti cāti tesam pabhavo, pakati ca, tasmā tadatthadīpanattham “imasmim sati imassuppādā”ti hetu-attho bhummanissakkaniddesā katā.

Yasmā cettha “imasmim sati idaṃ hoti, imassuppādā idaṃ uppajjatī”ti saṅkhepena uddiṭṭhassa paṭiccasamuppādassa “avijjāpaccayā saṅkhārā”ti-ādikō niddeso, tasmā yathāvutto atthibhāvo, uppādo ca

1. Dī 3. 54 piṭṭhe.

2. Saṃ 1. 208; Abhi 4. 358 piṭṭhesu.

tesaṃ tesaṃ paccayuppannadhammānaṃ paccayabhāvoti viññāyati. Na hi aniruddhatāsaṅkhātānaṃ atthibhāvaṃ, uppādañca anivattasabhāvatāsaṅkhātānaṃ, udayāvattatāsaṅkhātānaṃ vā “satiyeva, na asati, uppādā eva, na nirodhā”ti antogadhaniyamehi vacanehi pakāsitaṃ muñjitvā añño paccayabhāvo nāma atthi, tasmā yathāvutto atthibhāvo, uppādo ca paccayabhāvoti veditabbo. Yepi hi paṭṭhāne āgatā hetu-ādayo catuvīsati paccayā, tepi etasseva paccayabhāvassa visesāti veditabbā. Tathā yvāyaṃ mūlahetunidānasambhavapabhavādipariyāyehi, uppādaṭṭhiti pavattaṭṭhiti nimittaṭṭhiti āyūhanaṭṭhiti saṃyogaṭṭhiti palibodhaṭṭhiti-ādipariyāyehi ca pakāsito kāraṇattho, sopi ettheva antogadhoti daṭṭhabbo.

584. Mūlakāraṇasaddaṃ apekkhitvā **na akāraṇanti** napuṃsakaniddeso, akāraṇāti attho. Akāraṇaṃ yadi siyā, suttaṃ paṭibhitaṃ siyāti dassento “**āsavasamudayā**”ti suttaṃ āharati. **Pariyāyo** kāraṇaṃ. **Vaṭṭakathāya sīsabhāvo** vaṭṭahetuno kammassāpi hetubhāvo. Tattha bhavataṇhāyapi hetubhūtā avijjā, tāya paṭicchādītādīnave bhava taṇhāya uppajjanato avijjā visesena sīsabhūtāti “**mūlakāraṇan**”ti vuttā.

Purimāya koṭiyā apaññāyamānāya uppādavirahato niccataṃ gaṇheyyāti āha “**evaṃ cetaṃ bhikkhave vuccati**”ti-ādi. Tena ito pubbe uppannapubbatā natthīti apaññāyanato purimakoti-apaññāyanaṃ vuttanti imamatthaṃ dasseti.

585. Avijjātaṇhāhetukkamena phalesu vattabbesu “**sugatiduggatigāmino**”ti vacanaṃ saddalakkhaṇāvirodhanatthaṃ. Pūjītaṃ hi dvande pubbanipāto. Savarā kira maṃsassa aṭṭhinā alagganatthaṃ punappunaṃ tāpetvā koṭṭetvā uṇhodakaṃ pāyetvā virittaṃ sūnaṃ aṭṭhito muttamaṃsaṃ gāviṃ mārenti. Tenāha “**aggisantāpā**”ti-ādi. Tattha yathā vajjhagāvī ca avijjābhibhūtātāya yathāvuttaṃ uṇhodakapānaṃ ārabhati, evaṃ puthujjano yathāvuttaṃ duggatigāmikammaṃ. Yathā pana sā uṇhodakapāne ādīnavaṃ disvā taṇhāvasena sītudakapānaṃ ārabhati, evaṃ puthujjano avijjāya nātibalavabhāvato duggatigāmikamme ādīnavaṃ disvā

taṇhāvasena sugatigāmikammaṃ ārabhati. Dukkhe hi avijjāṃ taṇhā anuvattati, sukhe taṇham avijjāti.

586. **Katthaci** sutte. **Ekadhammamūlikam desananti** avijjātaṇhāsu ekoyeva dhammo mūlam etissāti ekadhammamūlikā, tam, tattha ekaṃ eva dhammam mūlam katvā paṭicasamuppādadadesanaṃ desetīti attho. Upanisīdati phalaṃ etthāti upanisā, kāraṇam, avijjā upanissā etesanti **avijjūpanisā**. **Assādānupassinoti** upādāniyesu tebhūmakadhammesu visayabhūtesu assādetabbato assādasaññītaṃ sukhasomanassaṃ anupassanasīlassa. Appahīnāvijjatāya bālalakkhaṇayogena **bālassa**. **Evanti** avijjānivuttatā, taṇhāsamyuttatā ca. **Ayam kāyoti** ayam mamañceva tumhākañca paccakkhabhūto saviññāṇakakāyo khandhapañcakaṃ. “Saḷāyatanapaccayā phasso”ti¹ vacanato phassakāraṇañcetaṃ vuccatīti āyatanacchakkaṃ vā. **Samudāgatoti** uppanno. **Bahiddhā ca nāmarūpanti** bahiddhā saviññāṇakakāyo khandhapañcakaṃ, saḷāyatanāni vā. **Itthetanti** itthaṃ etaṃ. Attano ca paresaṇca pañcakkhandhā dvādasāyatanāni dvārāmbanabhāvena vavatthitāni dvayaṃ nāmāti attho. **Dvayaṃ paṭicca phassoti** aññattha cakkhurūpādīni dvayāni paṭicca cakkhusamphassādayo vuttā, idha pana ajjhattikabāhirāni āyatanāni, mahādvayaṃ nāma kiretanti vuttaṃ. Ayamettha adhippāyo—aññattha “cakkhuñca paṭicca rūpe ca uppajjati cakkhuviññāṇam, tiṇṇam saṅgati phasso”ti-ādina² cakkhu ceva rūpā ca -pa- mano ceva dhammā cāti vuttāni dvayāni paṭicca cakkhusamphassādayo vuttā. Idha pana “ayañceva kāyo”ti cakkhādinissaye sesadhamme cakkhādinissite eva katvā vuttaṃ cakkhādikāyaṃ ekattena “ajjhattikāyatanan”ti gahetvā, “bahiddhā ca nāmarūpan”ti vuttaṃ rūpādi-ārammaṇam ekatteneva “bāhirāyatanan”ti tāni ajjhattikabāhirāni āyatanāni paṭicca phasso vutto, tasmā mahādvayametanti.

Evañca katvā attano ca parassa ca pañcahi khandhehi, chahi āyatanehi cāti ayamattho dīpetabbovāti vuttaṃ. “Ayam kāyo”ti hi vuttāni sanissayāni cakkhādinī attano pañcakkhandhā, “bahiddhā nāmarūpan”ti vuttāni

1. Vi 3. 1; Khu 1. 77 piṭṭhādīsu.

2. Ma 1. 158, 326; Ma 3. 328, 332, 333; Saṃ 1. 301; Saṃ 2. 261; Abhi 4. 248 piṭṭhādīsu.

rūpādīni paresaṃ. Tathā ayaṃ kāyo attano cha ajjhattikāni āyatanāni, bahiddhā nāmarūpaṃ paresaṃ bāhirānīti. Aññathā ajjhattikāyatanamatte eva “ayaṃ kayo”ti vuttena ajjhattikāyatanāneva attano pañcakkhandhā hotīti attano ca paresaṃca pañcahi khandhehi dīpanā na sambhaveyyāti.

Saḷevāyatanānīti saḷeva phassakāraṇāni, yehi kāraṇabhūtehi āyatanehi uppanna phassena phuṭṭho bālo sukhadukkhaṃ paṭisaṃvedeti. **Ādi-**saddena “etesaṃ vā aññatarena. Avijjānīvaraṇassa bhikkhave paṇḍitassa taṇhāya sampayuttassā”ti-ādi¹ yojettabbaṃ. Imasmiñhi sutte saṅkhāre avijjātaṇhānissite eva katvā kāyaggahaṇena viññāṇanāmarūpasalāyatanāni gahetvā tasmim kāye saḷāyatanānaṃ phassaṃ taṃnissitameva katvā vedanāya visesapaccayabhāvaṃ dassentena bhagavatā bālapaṇḍitānaṃ atītaddhāvijjātaṇhāmūlako vedanānto paṭiccasamuppādo dassito. Puna ca bālapaṇḍitānaṃ visesaṃ dassentena—

“Yāya ca bhikkhave avijjāya nivutassa bālassa, yāya ca taṇhāya sampayuttassa ayaṃ kāyo samudāgato, sā ceva avijjā bālassa appahīnā, sā ca taṇhā aparikkhīnā. Taṃ kissa hetu? Na bhikkhave bālo acari brahmacariyaṃ sammā dukkhakkhayāya. Tasmā bālo kāyassa bheda kāyūpago hoti, so kāyūpago samāno na parimuccati jātiyā -pa-dukkhāsmāti vadāmi”ti²—

Vedanāpabhavaṃ sāvijjānaṃ taṇhaṃ dassetvā, upādānabhava ca tannissite katvā “kāyūpago hoti”ti-ādinā jāti-ādike dassentena paccuppannahetusamuṭṭhānato pabhuti ubhayamūlavasena paṭiccasamuppādo vutto, tabbipariyāyena ca paṇḍitassa paccuppanna hetuparikkhayato pabhuti ubhayamūlako paṭilomapaṭiccasamuppādoti.

587. **Pūretunti** vaḍḍhetuṃ, upacinitunti attho. Duggatigāmikamassa visesapaccayattā avijjā “**avindiyāṃ vindatī**”ti vuttā, tathā visesapaccayo vindiyassa na hotīti “**vindiyāṃ na vindatī**”ti ca. Attanissitāni

1. Saṃ 1. 263 piṭṭhe.

2. Saṃ 1. 263 piṭṭhe.

katvā cakkhuviññāṇādīnaṃ pavattanaṃ uppādanaṃ **āyatanam**.
 Sammohabhāveṇeva anabhisamayabhūtattā **aviditam** aññātaṃ **karoti**.
Antavirahite javāpetīti vaṇṇāgamavipariyāyavikāraṇāsadhātu-
 atthavisesayogehi pañcavidhassa niruttalakkhaṇassa vasena a-kāra vi-kāra ja-
 kāre gahetvā aññesaṃ vaṇṇānaṃ lopaṃ, ja-kāraṃ ca dutiyassāgamaṃ
 katvā “**avijjā**”ti vuttaṃ. Byañjanatthaṃ vatvā sabhāvatthaṃ dassetuṃ
 “**apicā**”ti-ādi vuttaṃ. Cakkhuviññāṇādīnaṃ vatthārammaṇāni “idaṃ vatthu,
 idaṃ ārammaṇaṃ”ti avijjāya nātuṃ na sakkāti avijjā tappacchādikā vuttā.
 Vatthārammaṇa sabhāvachādanato eva avijjādīnaṃ
 paṭiccasamuppādabhāvassa, jarāmaṇādīnaṃ paṭiccasamuppānabhāvassa
 ca chādanato paṭiccasamuppādapaṭiccasamuppānaccchādanam veditabbaṃ.

Apaccakkhitvāti paccakkhānaṃ akatvā apaṭikkhipivā. **Upakāraṭṭho**
paccayaṭṭho yathā piṇḍapātādi sarīrassa.

Saṅkhatamabhisāṅkharontīti yathā saṅkhatam hoti, evam
 abhisāṅkharonti, saṅkhārasaddaggaṇena āgatā saṅkhārā **saṅkhārasaddena**
āgatasāṅkhārā. Yadi pi avijjāpaccayā saṅkhārāpi saṅkhārasaddena āgatā, te
 pana imissā desanāya padhānāti visuṃ vuttā, tasmā “**duvidhā**”ti ettha
 saṅkhārasaddena āgatasāṅkhāresu abhisāṅkharāṇakasāṅkhāram vajjetvā
 tadanñe saṅkhārasaddena āgatasāṅkhārā yojetabbā. **Saṅkhārasaddena**
āgatasāṅkhārāti vā samudāyo vutto. Tadekadesā ca idha vaṇṇetabbabhāvena
 gahitā avijjāpaccayā saṅkhārā, tasmā vaṇṇetabbasabbasaṅgāhakavasena
 duvidhatā vuttāti veditabbā. “Paṭhamaṃ nirujjhati vacīsāṅkhāro”ti-ādinā¹
 vitakkavicāra-assāsapassāsasaññāvedanāvācīsāṅkhārādayo vuttā, na
 avijjāpaccayā saṅkhāresu vuttā kāyasañcetanādayo.

Saṅkhatasāṅkhārā nāma yathāsakaṃ paccayehi saṅkhatattā. Satipi
 paccayanibbattānaṃ sabbesampi saṅkhatabhāve “mametaṃ phalaṃ”ti
 tatthābhimukhena viya kammunā nibbattitattā
 tebhūmakavipākakaṭattārūpesu sātisayo saṅkhatabhāvoti adhippāyena
aṭṭhakathāyam² kammanibbattānaṃ abhisāṅkhatasāṅkhārātā vuttā. **Pāliyam**
 pana tathā āgataṭṭhānassa abhāvato

1. Ma 1. 376 piṭṭhe.

2. Visuddhi 2. 158 piṭṭhe.

“tepi -pa- ettheva saṅgahaṃ gacchantī”ti vuttam. **Aniccā vata saṅkhārā**ti vuttā utu-ādisamuṭṭhānāpi sabbadhammā. **Abhisāṅkharāṇakasāṅkhāroti vuccati** attano phalassa abhisāṅkharāṇato. Kāyapayogasamuṭṭhāpanavīriyaṃ **kāyikavīriyaṃ. Abhisāṅkhārassāti** payogavegassa.

Vācam saṅkharāṭīti **vacīsāṅkhāro**. Kāyena saṅkharīyatīti **kāyasāṅkhāro**. Cittena saṅkharīyati, cittaṃ vā saṅkharotīti **cittasāṅkhāro**. Saṅkhepato pana sabbepi yathārahaṃ saṅkharonti, saṅkharīyantīti ca saṅkhārāti veditabbā. **Vuttanti** saṅkhārāṭṭhapaccayaṭṭhādīmāha.

Namatīti ekantasārammaṇatāya ārammaṇābhimukhaṃ namati. **Paritassatīti** pipāsati, taṇhāparitāpatāya vā vicalati. **Upādiyatīti** daḷhaṃ ādiyati. **Bhavatīti** upapattibhavaṃ sandhāyāha. **Bhāvayatīti** kammabhavaṃ. Cuti khandhānaṃ maraṇanti “**maranti etenā**”ti vuttam. Dukkhā vedanā uppādadukkhā, ṭhitidukkhatī ca katvā “**dvedhā khaṇatī**”ti vuttam. **Āyāso** pariṣamo visādo.

Niddiṭṭhanayadassananti yathāniddiṭṭhavidhisandassanaṃ. **Kevala-**saddo asammissavācako ca hoti “kevalā sālayo”ti-ādīsu, niravasesavācako ca “kevalā aṅgamagadhā”ti-ādīsu, tasmā dvidhāpi atthaṃ vadati. Tattha **asammissassāti** sukharahitassa. Na hi ettha kiñci uppādavayarahitaṃ atthi. **Sakalassāti** sabbabhavādigatassa, sabbakālikassa ca.

588. “Lakkhaṇekavidhādīto”ti ettha **ādi-**saddo paccekam parisamāpetabboti dassento āha “**lakkhaṇādīto**”ti. Sampayutte, taṃsamaṅgipuggale vā sammohayatīti **sammohanarasā**. Ārammaṇa sabhāvassa chādanaṃ hutvā gayhatīti **chādanapaccupaṭṭhānā**. “Āsavasamudayā avijjāsamudayo”ti¹ vacanato **āsavapadaṭṭhānā**. Paṭisandhijananatthaṃ āyūhanti byāpāraṃ karontīti **āyūhanarasā**. Rāsikaraṇaṃ vā **āyūhanaṃ**. Cetanāsabhāvattā cetanā hutvā gayhatīti **cetanāpaccupaṭṭhānā**. Nāmarūpassa purecārikabhāvena pavattatīti **pubbaṅgamarasaṃ**. Purimabhavena saddhim ghaṭanaṃ hutvā gayhatīti **paṭisandhipaccupaṭṭhānaṃ**. Viññāṇena saha, aññaṃaññaṃca sampayujjatīti **sampayogarasam**. Samaṃ pakārehi

1. Ma 1. 67 piṭṭhe.

yogo **sampayogo**. Visuṃ abhāvo **avinibbhogo**. Rūpaṃ sampayogābhāvato vikiratīti **vikiraṇarasam**. Tato eva hi pisiyamānā taṇḍulādayo vikiranti, cuṇṇibhūtā viddhamsanti, nāmassa kadāci kusalādibhāvopi atthīti tato visesanattham **“abyākatapaccupaṭṭhānan”**ti vuttam. **“Acetano abyākato”**ti¹ ettha viya anārammaṇatā vā abyākatatā daṭṭhabbā. **Āyatanalakkhaṇanti** ghaṭṭanalakkhaṇam, āyānam tananalakkhaṇam vā. Dassanassa yathāsakam visayaggahaṇassa karaṇato **dassanarasam**. **“Dassanādirasan”**ti pana **Sammohavinodaniyam**² vuttam. **Vatthudvārabhāvapaccupaṭṭhānam** yathāraham viññāṇamanoviññāṇadhātūnanti adhippāyo. Vatthuggahaṇaṅcetta cakkhādipaṅcakāpekkham. Akusalavipākupekkhāya aniṭṭhabhāvato dukkhena, itarāya iṭṭhabhāvato sukhena saṅgahitattā **“sukhadukkhapaccupaṭṭhānā”**ti vuttam. Dukkhasamudayattā **hetulakkhaṇā taṇhā**. **“Tatra tatrābhinandinī”**ti³ vacanato **abhinandanarasā**. Cittassa, puggalassa vā rūpādīsu atittabhāvo hutvā gayhatīti **atittabhāvapaccupaṭṭhānā**. **Amuñcanarasam** taṇhādiṭṭhābhinivesavasena. Taṇhādālhattam hutvā kāmupādānam, sesāni diṭṭhi hutvā upaṭṭhahantīti **taṇhādālhattadiṭṭhipaccupaṭṭhānam**. Kammupapattibhavavasena bhavassa lakkhaṇādayo yojetabbā.

589. **Mohādibhāvato**ti ettha **ādi**-saddena ananubodhādīnam saṅgaho. Dukkhadīsu aññānavasena **appaṭipatti**, asubhādīsu subhādivipallāsavasena **micchāpaṭipatti**. Diṭṭhivippayuttavasena vā **appaṭipatti**, diṭṭhisampayuttavasena **micchāpaṭipatti**. **Dvārārammaṇato**ti dvārato, ārammaṇato ca chasu dvāresu, chasu ārammaṇesu ca pavattanato. Ayam pana vibhāgo na avijjāya eva, aññesupi paṭiccasamuppādaṅgesu arūpadhammānam labbhatīti āha **“sabbesupī”**ti.

Vipākadhammadhammādibhāvatoti ettha **ādi**-saddena nevasekkhānāsekkhasamyojanīyādibhāve saṅgaṇhāti. **Catuyonisamvattanato**ti catuyonipariyāpannattabhāvanibbattanato.

1. Visuddhi 1. 348; Abhi-Ṭṭha 2. 54 piṭṭhādīsu.

2. Abhi-Ṭṭha 2. 129 piṭṭhe.

3. Dī 1. 246; Ma 1. 60, 373; Saṃ 3. 369; Abhi 2. 106; Vi 3. 15 piṭṭhādīsu.

Lokiyavibhāgādibhāvatoti ettha **ādi**-saddena abyākatasappaccayasaṅkhatādibhāve saṅgaṇhāti. **Sahetukāhetukāditoti ādi**-saddena sasaṅkhārāsasaṅkhārādibhede saṅgaṇhāti.

Kāmaṃ nāmarūpaṃ paccuppannaddhavasena vuccati, tathāpi yathā paccuppannaṃ, evaṃ atītānāgatampīti addhadvayapariyāpannassāpi nayato gahetabbatā vuttam **“atītādito tividhan”**ti.

Sañjātisamosaraṇaṭṭhānatoti viññāṇataṃsampayuttadhammānaṃ uppattipavattidesabhāvato. **“Bhūtappasādaviññāṇato”**ti pāṭho yutto. **“Viññāṇādito”**ti pana paṭhanti. Ekasesanayena bāhirāyatanassāpi saṅgahe sati ādi-saddena tassa saṅgahitatā daṭṭhabbā. **Nobhayagocaranti** manāyatanamāha. Na hi arūpadhammānaṃ desavasena āsannatā, dūratā vā atthi aviggahattā, tasmā manāyatanassa gocaro manāyatanam sampatto, asampatto vāti na vuccati. **Phassādīnampīti** ettha phasso tāva phusanasabhāvato, lokiyasāsavādibhāvato ca ekavidho. Paṭighasamphassa-adhivacanasamphassabhedato, sahetukādibhāvato ca duvidho. Bhavattayapariyāpannato, vedanāttayasampayogato, ahetukaduhetukatihetukato ca tividho. Yonigativasena catubbidho, pañcavidho ca.

Vedanā anubhavanalakkhaṇato, lokiyasāsavādibhāvato ca ekavidhā. Pañcadvārikamanodvārikabhedato duvidhā. Sukhādibhedato tividhā. Yonigativasena catubbidhā, pañcavidhā ca. Chaḷārammaṇabhedato chabbidhā.

Tañhā lokassa samudayabhāvato ekavidhā. Duvidhā diṭṭhisampayuttavippayuttabhāvato. Tividhā kāmabhavavibhavataṇhābhedato. Catubbidhā catumaggapaheyyato. Pañcavidhā rūpābhinandanādibhāvato. Chabbidhā chataṇhākāyabhedato.

Upādānaṃ ekavidham daḷhaggāhabhāvato. Duvidham taṇhādīṭṭhibhedato. Tividham bhavattayūpanissayabhāvato. Catubbidham kāmupādānādibhedato. Pañcavidham pañcagatisaṃvattanato.

Bhavo ekavidho lokiyasāsavādibhāvato. Duvidho kammupapattibhedato. Tividho kāmabhavādibhedato. Catubbidho caturupādānapaccayato. Pañcavidho pañcagatisaṃvattanato. Chabbidho kāmakkammabhavādibhedato. Sattavidho sattaviññāṇaṭṭhitisāṅgahato. Aṭṭhavidho caturupādānapaccayakammabhavādibhedato. Navavidho kāmabhavādibhedato.

Jāti ekavidhā tattha tattha bhava paṭhamābhiniḃbattibhāvato. Duvidhā rūpakkhandhasaṅkhārakkhandhasāṅgahato. Tividhā bhavattayapariyāpannato. Yonigativasena catubbidhā, pañcavidhā ca. Iminā nayena jarāmarañādīnampi ekavidhādibhāvo veditaḃbo.

590. Sokādīnampi gahitattā āṅgabahuttappasaṅge “dvādasevā”ti āṅgavavattānaṃ veditaḃbaṃ. Na hi sokādayo āṅgabhāvena vuttā, phalena pana kāraṇaṃ avijjāṃ mūlaṅgaṃdassetuṃ te vuttā. Jarāmarañabbhāhatassa hi bālassa te sambhavantīti sokādīnaṃ jarāmarañakāraṇatā vuttā, na pana “kāyikāya dukkhāya vedanāya phuṭṭho”ti ca sutte jarāmarāṇanimittaṅca dukkhaṃ saṅgahitanti taṃ tannimittānaṃ jarāmarañabbhāhatassa sambhave sādhakabhāvena vuttāṃ. Yasmā pana jarāmarāṇeneva sokādīnaṃ ekasaṅkhepo kato, tasmā tesāṃ jātipaccayatā yujjati. Jarāmarāṇapaccayabhāve hi avijjāya ekasaṅkhepo kātabbo siyā. Jātipaccayā pana jarāmarāṇaṃ, sokādayo ca sambhavantīti tattha jarāmarāṇaṃ ekantikāṃ āṅgabhāvena gahitaṃ. Sokādayo pana rūpabhavādīsu abhāvato anekantikā kevalaṃ pākaṭena phalena avijjānidassanattānaṃ gahitā. Tena anāgate jātiyā sati tato parāya paṭisandhiyā hetuhetubhūtā avijjā dassitīti bhavacakkassa avicchedo dassito hotīti. Suttaṅca sokādīnaṃ avijjā kāraṇanti etasseva atthassa sādhaḃkaṃ daṭṭhabbaṃ, na sokādīnaṃ bālassa jarāmarāṇanimittatāmattassa. “Assutavā puthujjano”ti hi vacanena avijjā sokādīnaṃ kāraṇanti dassitā, na ca jarāmarāṇanimittameva dukkhaṃ dukkhanti.

Aparo nayo jarāmarāṇampi paccayo, aññathā dvādasaṅgāni na pariḃrenti. Kassa pana so paccayo? Sokādīnaṃ. Yadi evaṃ kasmā “jarāmarāṇapaccayā sokādayo sambhavantī”ti avatvā “jātipaccayā

jarāmarañam, sokādayo ca sambhavanti”ti vuttanti? Yasmā tadaññenapi dukkhadhammena phutṭhassa te sambhavanti, tasmā appahīnasamyojanassāpi tesam tappaccayatā na ekamsikāti jātipaccayatāva vuttā. Atha vā jarāmarañaggahaṇena upapattibhavo saṅgahito. Upādinnakkhandhaparipāko hi āyuno saṁhāni, indriyānaṁ paripāko ca jarā, tesaṅca bhedo marañanti. Sati ca upapattibhave tattha katupacitaṁ, porāṇaṁ vā kammaṁ **kammabhavo**, kammādi-upaṭṭhāne cuti anantaraṁ paṭisandhim janetīti **upapattibhavo** jātiyā paccayo, tasmā jarāmarañampi jātiyā paccayatāya paṭiccasamuppādo. Yasmā pana “bhavapaccayā jāti”ti ettheva upapattibhavassa jātiyā paccayatā saṅgahitā, tasmā vuttapariyāyasaṅgahato ca¹ “jarāmarañapaccayā jāti”ti na vuttaṁ. Evaṁ jarāmarañassāpi paccayabhāgasiddhito paṭiccasamuppādatāti dvādasasāṅgatā vavatthitāti veditabbā. Tenāha “**dvādasevā**”ti-ādi. **Ayam tāvāti** “desanābhedato”ti-ādinā vuttaṁ, atthasaṁvaṇṇanaṁ sandhāyāha.

Avijjāpaccayāsaṅkhārāpadakathāvaṇṇanā

591. **Ayam panāti** idāni vakkhamānaṁ. “Katamā ca bhikkhave avijjā dukkhe aññāṇaṁ”ti-ādinā² suttantesu catuṭṭhānikā avijjā vuttāti “**suttantapariyāyenā**”ti vuttaṁ. **Nikkhepaṅḍe**³ pana suttantesu catūsu ṭhānesu kathitāya eva avijjāya aṭṭhasu ṭhānesu kiccajātito kathitattā tadatthavaṇṇanāvasena vibhāvanaṁ kātuṁ “**abhidhammapariyāyenā**”ti ārabhitvā “**vuttañhetan**”ti-ādi vuttaṁ. Ahāpetvā vibhajitabbāṁ. Vibhajanañhi abhidhammapariyāyo. “Aṭṭhasu ṭhānesu aññāṇaṁ”ti ānetvā taṁ sambandhitabbāṁ. **Sesaṭṭhānesūti** dukkhasamudayesu, pubbantādīsu ca. **Ārammaṇavasenāti** ārammaṇakaraṇavasenāpi. **Idhāti** imasmim “dukkhe aññāṇaṁ”ti-ādike pāṭhe. **Sāti** avijjā. **Uppannāti** asamūhatuppannā, pageva paccuppannā. “Paṭicchādetvā”ti ettha vuttaṁ paṭicchādanākāraṁ dassetuṁ “**yāthāvasarasalakkhaṇaṁ paṭivijjhitaṁ na deti**”ti vuttaṁ. Rasitabbo paṭivijjhitaṁ sabhāvoraso, attano raso saraso, yāthāvo yathābhūto saraso yāthāvasaraso, yo “pīḷanaṭṭho”ti-ādinā⁴

1. Vuttapariyāyasaṅgahatova (Syā)

3. Abhi 1. 222 piṭṭhe.

2. Ma 1. 67 piṭṭhe.

4. Khu 9. 293 piṭṭhe.

vutto dukkhasaccappabhedā eva ca pubbāntādayo, so eva lakkhitabbattā **yāthāvasarasalakkhaṇam**. Tam **paṭivijjhitaṃ** paccakkhato jānitaṃ **na deti**.

Tadubhayanti pubbantañceva aparantañca atītaṃ, anāgatañca khandhapañcakaṃ. Pubbantāparantabhāgavantatāya vā paccuppannaddhabhūto majjhanto pubbantāparanto. **Ayam avijjā ime saṅkhārāti** idappaccayatāpaṭiccasamuppannadhammesu paccakkhato jānanākāradassanaṃ. **Etthāti** etesu dukkhādīsu. Yadi pi avijjā dukkhādīsu ārammaṇakaraṇavasena pi pavattati, yathā pana nirodhamagge ārammaṇam kātuṃ asakkontī te jānitukāmassa tappaṭicchādanavasena, anirodhamaggesu nirodhamaggaggahaṇakāraṇabhāvena ca pavattamānā te yāthāvato paṭivijjhitaṃ na deti, evaṃ dukkhādīsūpīti veditabbaṃ. Tathā hi vuttaṃ “paṭicchādanavaseneva idhādhippetā”ti. Dukkhādivisayo andhatamakaro, lobhādīnañca andhatamakaraṇam paccayabhūto adassanākāro **aññāṇam**.

592. **Puññādayoti** puññābhisaṅkhārādayo. Tattha punāti attano santānaṃ apuññaphalato, dukkhasaṅkilesato ca sodhetīti puññaṃ. Hitasukhājñāsayaena puññaṃ karotīti tannipphādanena kārakassa ajñāsayaṃ pūreti, puñjabhavaṃ nibbattetīti vā puññaṃ. Iti pūraṅko, puñjanibbattako ca niruttinayena puññanti veditabbo. Puññañca so attano phalassa abhisaṅkharaṇaṭṭhena abhisaṅkhāro cāti **puññābhisaṅkhāro**. Puññaṇapaṭipakkhato apuññanti vuttavipariyāyena **apuññābhisaṅkhāro** veditabbo. Samādhipaccanīkānaṃ atidūrātāya na iñjati, aniñjañca bhavaṃ abhisaṅkharotīti **āneñjābhisaṅkhāro**. Kāyena pavattito, kāyato vā pavatto, kāyassa vā saṅkhāroti **kāyasaṅkhāro**. Vacīcittasaṅkhāresupi eseva nayo. Tattha paṭhamattiko **parivīmaṃsanāsuttā**divasena gahito. Tattha hi “puññaṃ ce saṅkhāraṃ abhisaṅkharoti, puññūpagaṃ hoti viññāṇaṃ”ti-ādinā¹ āgataṃ. Dutiyattiko **vibhaṅgasutta**vasena. Tattha hi “tayome bhikkhave saṅkhārā. Katame tayo? Kāyasaṅkhāro vacīsaṅkhāro cittasaṅkhāro”ti² vuttaṃ.

Vitthārato panāti-ādi puññābhisaṅkhārādīnaṃ sarūpato, pabhedato ca vibhāvanaṃ. **Bhāvanāvaseneva pavattā**, na dānasīlavasenāti tattha labbhamānaṃ puññakiriyavatthum dasseti. Evañca katvā arūpāvacaracetanāpi

1. Saṃ 1. 310 piṭṭhe.

2. Saṃ 1. 278 piṭṭhe.

“bhāvanāvaseneva pavattā”ti vuttā. Ye pana “bhāvanāvasenevā”ti avadhāraṇena abhiññācetanam nivattetīti vadanti, tadayuttam tāsampi avijjāpaccayatāya viya¹ puññābhisaṅkhārābhāvassa ca icchittā. Aññathā abhiññācittuppādassa puññakiriyavatthūsu asaṅgaho eva siyā, na ca yuttam “kusalañca puññakiriyavatthuñca na hotī”ti. **Pāṇātipātādīti ādi**-saddena na tadavasiṭṭha-akusalakammāpathānaṃyeva gahaṇam, atha kho anavasesa-akusalakammassāpi gahaṇam daṭṭhabbam.

Itaresu panāti kāyasaṅkhārādīsu. Puññābhisaṅkhārādayo pavattamānā imehi dvārehi pavattantīti **dvārato pavattidassanattam**. “Samavāsati cetanā”ti kasmā vuttam, yadi kāyavacīviññattīyo samuṭṭhāpentīyo kusalākusalacetanā kāyasaṅkhāro, vacīsaṅkhāroti ca vuccanti, evam sante abhiññācetanāyapi kusalāya tathā pavattāya vacīsaṅkhārābhāvo vattabboti codanam sandhāyāha “**abhiññācetanā**”ti-ādi. **Etthāti** kāyavacīsaṅkhārāggahaṇe, kāyavacīsaṅcetanāggahaṇe vā. **Na gahitāti** aṭṭhakathāyaṃ na gahitā “abhiññācetanā viññāṇassa paccayo na hotī”ti. Kasmā pana na hoti, nanu sāpi kusalā, vipākadhammā cāti? Saccametam, anupacchinnataṇhāvijjamāne pana santāne sabyāpārappavattiyā tassā kusalatā, vipākadhammatā ca vuttā, na vipākuppādanena. Sā pana vipākam uppādentī rūpāvacarameva uppādeyya. Na hi aññabhūmikam kammam aññabhūmikam vipākam uppādetīti. Attanā sadisārammaṇam tiṭṭhānikameva ca uppādeyya **cittuppādakaṇḍe**² rūpāvacaravipākassa kammāsadisārammaṇasseva vuttattā. Na ca rūpāvacaravipāko parittādi-ārammaṇo atthi, abhiññācetanā ca parittādi-ārammaṇāva hoti. Tasmā vipākam na uppādetīti viññāyati. Kasīṇesu ca uppāditassa catutthajjhānasamādhissa ānisaṃsabhūtā abhiññā. Yathāha “so evam samāhite citte”ti-ādi³. Tasmā samādhīphalāsadisā sā, na ca phalam deti. Dānasīlānisaṃsabhūto tasmim bhava paccayalābho viyāti sāpi vipākam na uppādetīti.

“**Yathāca abhiññācetanā, evam uddhaccacetanāpi na hotī**”ti idam uddhaccasahagatadhamme visum uddharitvā “tesam vipāke nāṇam atthapaṭṭisambhidā”ti⁴

1. Avijjāpaccayatāya (Ka)

2. Abhi 1. 116 piṭṭhe.

3. Dī 1. 76, 77; Ma 1. 314, 315, 346, 347; Vi 1. 5 piṭṭhādīsu.

4. Abhi 2. 309 piṭṭhe.

vuttattā vicāretabbaṃ. Sā pana vicāraṇā heṭṭhā khandhaniddesavaṇṇanāyaṃ akusalakathāyaṃ vicāriyā evāti tattha vicāritanayeneva veditabbā. Apicettha yadeke vibhajja vadanti, dassanabhāvanānaṃ abhāvepi yesaṃ puthujjanānaṃ, sekkhānaṃca dassanabhāvanāhi bhavitabbaṃ tesāṃ taduppattikāle tehi pahātuṃ sakkuṇeyyā akusalā dassanena pahātabbā, bhāvanāya pahātabbāti ca vuccanti. Puthujjanānaṃ pana bhāvanāya abhāvā bhāvanāya pahātabbacintā natthi. Tena tesāṃ pavattamānā dassanena pahātuṃ asakkuṇeyyāpi bhāvanāya pahātabbāti na vuccanti. Yadi vucceyyuṃ, dassanenapahātabbā bhāvanāyapahātabbānaṃ kesañci kenaci¹ kadāci ārammaṇa ārammaṇādhipati upanissayapaccayehi paccayo bhaveyyuṃ. Na ca paṭṭhāne dassanenapahātabbā bhāvanāyapahātabbānaṃ kenaci paccayena paccayoti vuttā. Sekkhānaṃ pana vijjamānā bhāvanāya pahātuṃ sakkuṇeyyāti bhāvanāya pahātabbā. Teneva sekkhānaṃ dassanena pahātabbā, cattattā vantattā muttattā pahīnattā paṭinissaṭṭhattā (ukkheṭitattā samukkheṭitattā)² assāditabbā, abhinanditabbā ca na honti. Pahīnatāya eva somanassahetubhūtā, avikkhepahetubhūtā ca na domanassaṃ, uddhaccaṇca uppādentīti na te tesāṃ ārammaṇa ārammaṇādhipatibhāvaṃ, pakatūpanissayabhāvaṇca gacchanti. Na hi pahīne upanissāya ariyo rāgādikilese uppādeti.

Vuttañhetam “soṭāpattimaggena ye kilesā pahīnā, te kilese na puneti na pacceti na paccāgacchati -pa- arahattamaggena -pa- na paccāgacchati”³. Na ca puthujjanānaṃ dassanena pahātuṃ sakkuṇeyyā, itaresāṃ na kenaci paccayena paccayo hontīti na sakkā vattum⁴ “diṭṭhiṃ assādeti abhinandati, tam ārabba rāgo uppajjati, diṭṭhi, vicikicchā, uddhaccaṃ uppajjati. Vicikicchāṃ ārabba vicikicchā, diṭṭhi, uddhaccaṃ uppajjati”⁵ diṭṭhivicikicchānaṃ uddhaccārammaṇapaccayabhāvassa vuttattā. Ettha hi **uddhaccanti** uddhaccasahagatacittuppādaṃ sandhāya vuttam. Evañca katvā adhipatipaccayaniddese “diṭṭhiṃ garuṃ katvā assādeti abhinandati, tam garuṃ katvā rāgo uppajjati, diṭṭhi uppajjati”⁶

1. Keci (Ka)

3. Khu 7. 156; Khu 8. 83 piṭṭhesu.

5. Abhi 8. 134 piṭṭhe Paṭṭhāne.

2. () Etthantare pāṭho bahūsu na dissati.

4. Na sakkā (Ka)

6. Abhi 8. 136 piṭṭhe Paṭṭhāne.

ettakameva vuttaṃ, na vuttaṃ “uddhaccaṃ uppajjati”ti. Tasmā dassanabhāvanāhi pahātabbānaṃ atītādibhāvena na vattabbattepi yādisānaṃ tāhi anuppattidhammatā āpādetabbā, tesu puthujjanesu vattamānā dassanaṃ apekkhitvā tena pahātuṃ sakkuṇeyyā dassanena pahātabbā, sekkhesu vattamānā bhāvanaṃ apekkhitvā tāya pahātuṃ sakkuṇeyyā bhāvanāya pahātabbā.

Tesu bhāvanāya pahātabbā sahāyavirahā vipākaṃ na janayantīti bhāvanāya pahā tabbacetanāya nānākkhaṇikakammaṃpaccayabhāvo na vutto, apekkhitabbadassanabhāvanārahitānaṃ pana puthujjanesu uppajjamānānaṃ sakabhaṇḍe chandarāgādīnaṃ, uddhaccasahagatacittuppādassa ca saṃyojanattayatadekaṭṭhakilesānaṃ anupacchinnatāya aparikkhīṇasahāyānaṃ vipākuppādanaṃ na sakkā paṭisedhitunti uddhaccasahagatadhammānaṃ vipāko vibhaṅge vutto. Yadi evaṃ apekkhitabbadassanabhāvanārahitānaṃ akusalānaṃ nevadassanena nabhāvanāyapahātabbatāya navattabbatā āpajjati? Nāpajjati appahātabbānaṃ “nevadassanenanabhāvanāya pahātabbā”ti¹ vuttatā, appahātabbaviruddhasabhāvattā ca akusalānaṃ.

Evampi te imasmiṃ tike “navattabbā”ti vattabbā āpajjanti? Nāpajjanti cittuppādakaṇḍe dassitānaṃ dvādasa-akusalacittuppādānaṃ dvīhi padehi saṅgahitattā. Yathā hi dhammasena sabbe saṅkhatadhammā saṅgahitāti uppannattike kālavasena asaṅgahitāpi atītā “navattabbā”ti na vuttā cittuppādarūpabhāvena gahitesu navattabbassa abhāvā, evamidhāpi cittuppādabhāvena gahitesu navattabbassa asaṅgahitassa abhāvā navattabbatā navuttāti veditabbā. Yattha hi cittuppādo koci niyogato navattabbo atthi, tattha tesāṃ catuttho koṭṭhāso atthīti yathāvuttapadesu viya tatthāpi bhinditvā bhajāpetabbacittuppāde bhinditvā bhajāpeti “siyā navattabbā parittārammaṇā”ti-ādinā². Tadabhāvā uppannattike, idha ca tathā na vuttā³.

Atha vā yathā sappaṭighēhi samānasabhāvattā rūpadhātuyaṃ tayo mahābhūtā sappaṭighāti vuttā. Yathāha “asaññasattānaṃ anidassanasappaṭighaṃ ekaṃ mahābhūtaṃ paṭicca dve mahābhūtā, dve mahābhūte paṭicca ekaṃ

1. Abhi 1. 2 piṭṭhe.

2. Abhi 1. 271 piṭṭhe.

3. Na vuttaṃ (Syā, Ka)

mahābhūtaṃ”ti¹, evaṃ puthujjanānaṃ pavattamānā bhāvanāya pahātabbasamānasabhāvā bhāvanāya pahātabbāti vucceyyunti? Natthi navattabbatāpasaṅgo. Evañca sati puthujjanānaṃ pavattamānāpi bhāvanāya pahātabbā sakabhaṇḍe chandarāgādayo parabhaṇḍe chandarāgādīnaṃ upanissayapaccayo, rāgo ca rāgadiṭṭhīnaṃ adhipatipaccayoti ayamattho laddho hoti. Yathā pana aphoṭṭhabbattā rūpadhātuyam tayo mahābhūtā na paramatthato sappatiḅhā, evaṃ apekkhitabbabhāvanārahitā puthujjanesu vattamānā sakabhaṇḍe chandarāgādayo na paramatthato bhāvanāya pahātabbāti bhāvanāya pahātabbānaṃ nānākkhaṇṇikakammapaccayatā na vuttā. Na ca dassanenapahātabbā bhāvanāyapahātabbānaṃ kenaci paccayena paccayoti vuttā. Ye hi dassanena pahātabbapaccayā kilesā, na te dassanato uddham pavattanti. Dassanena pahātabbapaccayassapi pana uddhaccasahagatassa sahāyavekallamattameva dassanena kataṃ, na tassa koci bhāvo dassanena anuppattidhammataṃ āpāditoti tassa ekantabhāvanāyapahātabbatā vuttā. Tasmā tassa tādisasseva sati sahāye vipākuppādanavacanāṃ, asati ca vipākānuppādanavacanāṃ na virujjhatīti.

Tayidaṃ sabbaṃ tesāṃ ācariyānaṃ ahopurisikāmattanti apare. Kasmā? Uddhaccasahagatassa ekantena bhāvanāya pahātabbattā. Evañhi vuttaṃ bhagavatā “katame dhammā bhāvanāya pahātabbā? Uddhaccasahagato cittuppādo”ti². Yadi hi taṃ icchitaṃ siyā, yathā atītārammaṇattike “niyogā anāgatārammaṇā natthī”ti³ vatvā vibhajja vuttaṃ, evamidhāpi “niyogā bhāvanāya pahātabbā natthī”ti³ vatvā “uddhaccasahagato siyā bhāvanāya pahātabbo, siyā na vattabbo”ti vadeyya. Yā ca taṃ samatthentena “yadi vucceyyun”ti-ādinā yutti vuttā, sāpi ayutti. Kasmā? Yasmā dassanena pahātabbārammaṇānaṃ rāgadiṭṭhivicikicchā-uddhaccānaṃ dassanena pahātabbabhāvo eva icchitoti. Yaṃ pana uddhaccaggahaṇena pāḷiyam² uddhaccasahagato cittuppādo vuttoti vatvā taṃ sādhetuṃ adhipatipaccayaniddese uddhaccassa anuddharaṇaṃ nibandhanaṃ vuttaṃ, tampi anibandhanaṃ paṭṭhāne sāvasesapāṭhadassanato. Tathā hi “atīto dhammo paccuppannassa dhammassa, anāgato dhammo paccuppannassa dhammassa ārammaṇapaccayena

1. Abhi 8. 22 piṭṭhe Paṭṭhāne.

2. Abhi 1. 269 piṭṭhe.

3. Abhi 1. 273 piṭṭhe.

paccayo”ti¹ etesaṃ vibhaṅge cetopariyañāṅgagahaṇaṃ katvā “paccuppanno dhammo paccuppannassa dhammassā”ti etassa **vibhaṅge**¹ labbhamānampi na uddhaṭaṃ.

Bhāvanāya pahātabbassa vipākadānaṃ pati dassanena pahātabbassa sahāyabhāvūpagamaṇaṃ vicāretabbaṃ. Kiṃ avijjādi viya dānasilādīnaṃ uppatti yāyeva vipākadānasāmatthiyā ṭhānavasena dassanenapahātabbaṃ bhāvanāyapahātabbassa sahāyabhāvaṃ upagacchati, udāhu kilesā viya kammaṃ paṭisandhidānaṃ patīti? Kiñcetha—yadi tāva purimo pakkho pahīnadassanappahātabbattā sekkhasantāne pavattino bhāvanāpahātabbassa kiriyabhāvo āpajjati pahīnavijjātaṅghāmāne santāne pavattadānādi viya. Atha dutiyo, tassāpi dassanenapahātabbatā āpajjati apāyagamanīyasabhāvanati vattanato, tasmā heṭṭhā vicāritanayeneva uddhaccasahagatassa vipākadānaṃ pati pāḷiyā, aṭṭhakathāya ca avirujjhanavasenettha atthavinicchayo veditabbo.

Sāpīti uddhaccacetanāpi. **Viññāṇassa paccayabhāvepi** sampuṇṇassa vipākaviññāṇassa paccayabhāve. Yadi apanetabbā, kasmā “samavīsati cetanā”ti vuttanti tassa kāraṇaṃ dassento āha “**avijjāpaccayā pana sabbāpetā hontī**”ti. Abhiññācetanāyapi paccayabhāvaṃ dasseti. Yadi evaṃ abhiññācetanāya saha ekavīsati vattabbaṃ, na, tathā avacanassa vuttakāraṇattā. Taṃ pana itarāvacanassāpi kāraṇanti samānarūpāya ekissā avacane yaṃ kāraṇaṃ apekkhitvā ekā na vuttā, tena kāraṇena vuttāyapi avattabbaṃ dasseti. **Ayaṃ** tikoti kāyasaṅkhārattiko. **Purimattikanti** puññābhisaṅkhārattikaṃ. **Pavisatīti** kathaṃ pavisati. Puññābhisaṅkhāro hi aṭṭhakāmāvacaracetanāpabhedo kāyaduccaritato viramantassa siyā kāyasaṅkhāro, vacīduccaritato viramantassa siyā vacīsaṅkhāro, manodvāre pana uppannā terasapi cetanā puññābhisaṅkhāro ca hoti cittasaṅkhāro ca. Apuññābhisaṅkhāropi kāyaduccaritavasena pavattiyā siyā kāyasaṅkhāro, vacīduccaritavasena pavattiyā siyā vacīsaṅkhāro, dve dvārāni muñcitvā manodvāre pavattiyā siyā cittasaṅkhāro, āneñjābhisaṅkhāro cāti evaṃ dutiyattiko

1. Abhi 9. 412 piṭṭhe.

purimattikameva pavisati. Tena vuttam **“atthato puññābhisankhārādīnamyeva vasena avijjāya paccayabhāvo veditabbo”**ti.

593. **Avijjābhāve bhāvatoti** avijjāya atthibhāve saṅkhārānaṃ bhāvato. Na hi avijjāya asati kadāci saṅkhārā sambhavanti. Idāni taṃ avijjāya bhāvaṃ dassento **“aññānaṃ appahīnaṃ hotī”**ti āha. Tena maggena anirodho idha avijjāya atthibhāvo, na dharamānatā evāti dasseti. Svāyamatto hetthā vibhāvito yeveva. **“Avijjāsankhātan”**ti ca iminā ñāṇābhāvādīnaṃ nivatteti. Ayañhi a-kāro “ahetukā dhammā¹ abhikkhuko āvāso”ti-ādīsu² taṃyoganivattiyāṃ dissati. Abhāvo hettha dīpito. “Appaccayā dhammā”ti¹ taṃsambandhitānivattiyāṃ. Paccayuppannañhi paccayasambandhī appaccayuppannattāti taṃsambandhitā ettha jotiyati. “Anidassanā dhammā”ti¹ taṃsabhāvanivattiyāṃ. Nidassanañhi daṭṭhabbatā. Atha cakkhuvīññānaṃ nidassanaṃ na passaṭīti taggahettabbatānivattiyāṃ. Tathā “anāsavā dhammā”ti³. “Appaṭighā dhammā¹, anārammaṇā dhammā”ti⁴ taṃkiccanivattiyāṃ. “Arūpino dhammā⁵, acetasikā dhammā”ti⁶ tabbhāvanivattiyāṃ. Tadaññathā hi ettha pakāsīyati. “Amanusso”ti⁷ tabbhāvamattanivattiyāṃ. Manussattamattaṃ natthi, aññaṃ samānanti sadisatā hettha sūcīyati. “Assamaṇo samaṇapaṭiñño⁸, aputto”ti tathā sambhāvanīyaguṇanivattiyāṃ. Garahā hi ettha ñāyati. “Kacci bhoto anāmayā⁹, anudarā kaññā”ti tadanappabhāvanivattiyāṃ. “Anuppannā dhammā”ti¹⁰ taṃsadisabhāvanivattiyāṃ. Atītānañhi uppannapubbattā, uppādidhammānaṃ paccayekadesanibbattiyā āraddhuppādabhāvā, kālavinimuttassa ca vijjamānattā uppannānukūlatā, pageva paccuppannānanti tabbidhurabhāvo ettha viññāyati. “Asekkhā dhammā”ti¹¹ tadapariyosānanivattiyāṃ. Tanniṭṭhānañhettha pakāsīyati. Imesaṃ pana atthānaṃ asambhavato pārisesena yathā kusalapaṭipakkhā dhammā akusalā, evaṃ vijjāpaṭipakkhā avijjāti katvā ñāṇapaṭipakkho dhammo aññānanti veditabbaṃ.

1. Abhi 1. 4 piṭṭhe. 2. Vi 4. 84 piṭṭhe. 3. Abhi 1. 5 piṭṭhe. 4. Abhi 1. 9 piṭṭhe.

5. Abhi 1. 5 piṭṭhe. 6. Abhi 1. 9 piṭṭhe. 7. Dī 2. 196 piṭṭhe.

8. Am 1. 107, 124; Abhi 3. 130, 141 piṭṭhādīsu.

9. Khu 5. 327; Khu 6. 77 piṭṭhādīsu. 10. Abhi 1. 3 piṭṭhe. 11. Abhi 1. 2 piṭṭhe.

Sukhasaññāya gahetvā dukkhadukkhavipariṇāmadukkhasaṅkhāra-
 dukkhatāhi viññūhi dukkhantveva gahetabbaṃ saṃsāradukkhaṃ sukhanti
 saññāya abhinivisitvā, etena tattha taṇhāpavattiṃ dasseti. **Ārabhatīti**
 nibbatteti. **Taṇhāparikkhāreti** taṇhāya “sukhaṃ subhaṇ”ti-ādinā saṅkhate
 parikkhate, alaṅkateti attho. Taṇhā hi dukkhassa samudayoti ajānanto bālo
 “aho vatāhaṃ kāyassa bhedaṃ paraṃ maraṇā khattiyamahāsālānaṃ
 saḥabyataṃ upapajjeyyan”ti-ādinā¹ paritassanto kāyasaṅkhāre parikkharoti.
Taṇhāparikkhāreti vā taṇhāya parivārabhūte. Taṇhāvattuṃ hi cakkhādim,
 rūpādiṅca abhisāṅkharitvā taṃsamaṅgīnaṃ dentā saṅkharā taṇhāya upanentā
 tassā parivārā viya hontīti. **Gativise** brahmalokādiḷe.
 Anekasatapasubbaddhabhimsano vājapeyyādiko **yañño**. Amaraṇatthāti gahitā
 dukkarakiriya **amaratapo**. Amaro vā devo vā bhavyeayaṃ, devaññataro vāti
 pavattiyā vatacariyā **amaratapo**. Dukkhattā vā maro mārako tapo **amaratapo**.
 Diṭṭhe adiṭṭhasaddo viya mare amarasaddo daṭṭhabbo.

Jāti-ādipapātadukkhajananato maruppapātasadisatā
 puññābhisaṅkhārassa vuttā. **“Mahāpariḷāhajanikaṇ”**ti iminā anudhanaṭṭhena
 tiṇukkāsadisataṃ puññaphalassa dasseti. **Appassādatañcāti ca**-saddena
 adhikuṭṭanavinivijjhana-aṅgapaccāṅgalibhaṇjanādim saṅgaṇhāti.
Tappaccayanti tassa vipariṇāmadukkhasabhāvassa sugatiphalassa
 paccayabhūtaṃ. Ramaṇīyabhāvena ca assādabhāvena ca gayhamānaṃ
 puññaphalaṃ dīpasikhāmadhulittasattadhārāsadisam. Tadattho ca
 puññābhisaṅkhāro taṃnipātalehanasadiso vutto. “Sukho imissā
 paribbājikāya taruṇāya mudukāya lomasāya bāhāya samphasso”ti-ādinā²
 sukhasaññāya asubhabhāvassa asallakkaṇeṇeva ekaccakāma paribhogoti
 bālo viya gūthakīḷanaṃ, kilesābhībhūtatāya kodhārati-abhibhūto asavaso
 maritukāmo viya visakhādanaṃ sampati kiriyākhaṇe, āyatim phalakkhaṇe ca
 jīgucchaniyaṃ, dukkhaṅca apuññābhisaṅkhāraṃ ārabhati. Lobhasahagatassa
 vā gūthakīḷanasadisatā, dosasahagatassa visakhādanasadisatā yojetabbā.
 Sabhayassāpi pisācanagarassa kāmaguṇasamiddhiyā
 sukhavipallāsahetubhāvo viya

1. Ma 1. 359 piṭṭhe.

2. Ma 1. 380 piṭṭhe.

ārūppavipākānaṃ nirantaratāya, anupalakkhiyamāna-uppādavayānaṃ
dīghasantānatāya agayhamānavipariṇāmānaṃ
saṅkhāravipariṇāmadukkhabhūtānampi niccādivipallāsahetubhāvoti, tesāṃ
visācanagarasadisatā, tadabhimukhagamanasadisatā ca āneñjābhisaṅkhārassa
yojetabbā.

Avijjābhāvatova saṅkhārabhāvo, na abhāvatoti saṅkhārānaṃ
avijjāpaccayabhāve saṅkhepena anvayato, byatirekato ca vuttamatthaṃ
suttena samatthetuṃ “**vuttampi cetan**”ti-ādinā suttapadaṃ ābhaṭaṃ. Tattha
avidvāti aviddasu. **Avijjāgatoti** avijjāya samannāgato, appahīnāvijjoti
adhippāyo.

Paṭṭhānapaccayakathāvaṇṇanā

594. **Tāvāti** vattabbantarāpekkho nipāto, tena “avijjā saṅkhārānaṃ
paccayo”ti idaṃ tāva siddhaṃ, idaṃ pana aparaṃ vattabbanti dasseti. “Idaṃ
pana vattabban”ti yamatthaṃ sandhāya vuttaṃ, taṃ dassetuṃ
paccayadhammā nāma yesāṃ paccayā honti, yathā vā paccayā honti,
tadubhayesaṃ bahubhāvato anekadhāva paccayā hontīti avijjāyapi taṃ
āsaṅkanto pucchi “**katamesaṃ saṅkhārānaṃ kathaṃ paccayo hoti**”ti,
puññābhisaṅkhārādayo bahū saṅkhārā vuttā. Avijjā ca tesāṃ paccayo hoti,
na sabbesaṃ ekadhāva hoti, tasmā imesaṃ saṅkhārānaṃ evaṃ paccayo
hotīti idaṃ vattabbanti attho. **Tatrāti** tasmim paccayabhāve. Yadipi
“katamesaṃ saṅkhārānaṃ”ti-ādinā asādhāraṇato pucchā āradhā, ekadesena
pana samudāyopalakkhaṇametanti dvādasannaṃ paṭiccasamuppādaṅgānaṃ
yathāsakaṃ paccayuppannānaṃ paccayabhāvo vattabboti taṃ dassetuṃ,
avijjāya vā paccayabhāve pucchite tappasaṅgena sabbetampi
paccayadhammānaṃ paccayabhāvaṃ visajjetukāmo paccaye tāva
pāḷinayeneva dassetuṃ “**bhagavatā hi**”ti-ādi āradhānaṃ. Tattha ca bhagavatā
catuvīsati paccayā vuttāti sambandho. Tesāṃ vasena avijjādīnaṃ
paccayabhāvo veditabboti adhippāyo.

Hetu ca so paccayo cā”ti iminā vacanena hetuno,
adhipatipaccayādibhūtassa ca gahaṇaṃ siyāti taṃ nivārento āha “**hetu hutvā
paccayo**”ti. Evampi so eva doso āpajjatīti puna āha “**hetubhāvena paccayoti
vuttaṃ hoti**”ti. Tena na idha hetusaddena

dhammaggaḥaṇaṃ kataṃ, atha kho dhammassa sattiviseso gahitoti dasseti. Tassa, hi paccayasaddassa ca samānādhikaraṇaṃ sandhāya “hetu ca so paccayo ca, hetu hutvā paccayo”ti ca vuttaṃ. Evañca katvā parato pāliyaṃ “hetū hetu -pa- hetupaccayena paccayo”ti-ādinā¹ tena tena hetubhāvādi-upakārena tassa tassa dhammassa upakārakattaṃ vuttaṃ.

Abhidhammatṭhakathāyaṃ pana “yo hi dhammo yaṃ dhammaṃ appaccakkhāya tiṭṭhati vā uppajjati vā, so tassa paccayo”ti², “mūlatṭhena upakārako dhammo hetupaccayo”ti³ ca evamādinā dhammapaṭṭhānaniddesena dhammato aññā dhammasatti nāma natthīti dhammeheva dhammasattivibhāvanaṃ katanti daṭṭhabbaṃ. Idhāpi vā “hetu ca so paccayo cā”ti dhammeneva dhammasattiṃdasseti. Na hi “hetupaccayo”ti-ādiko uddeso kusalādi-uddeso viya dhammappadhāno, atha kho dhammānaṃ upakārakabhāvappadhānoti.

“**Eseva nayo**”ti iminā tabbhāvena paccayabhāvaṃ ārammaṇādīsu atidisati “ārammaṇaṅca taṃ paccayo cāti ārammaṇapaccayo, ārammaṇaṃ hutvā paccayo, ārammaṇabhāvena paccayoti attho”ti, na kammadhārayamattaṃ.

595. **Vacanāvayavoti** sādhanāvayavaṃ sandhāyāha. Vacanasabhāvaṃhi sādhanāṃ paresaṃ aviditatthañāpanato loka sādhananti pākaṭaṃ paññātaṃ. Tathā hi naṃ avayavalakkhaṇaṃ, vacanasabhāvaṅca sādhanāṃ, avayavapakkhādīni vacanāni sādhananti ca ñāyavādino vadanti. **Paṭiññā**, **hetūti-ādīsūti** paṭiññā, hetu, udāharaṇa, upanaya, nigamaṇāni. Udāharaṇasādhammiyā sādhyasādhanāṃ **hetu**. Virūpo hetūti ca evamādīsu kāraṇaṃ yaṃ kiñci kāraṇalakkhaṇaṃ, sampāpakalakkhaṇampi vā. **Ādi**-saddena tassāpi saṅghetabbatāya, ñāpakalakkhaṇaṃ pana vacanāvayavaggahaṇena gahitaṃ. Kāmaṃ mūlampi kāraṇalakkhaṇaṃ kāraṇameva, kāraṇanti panettha paccayahetu gahito. Mūlanti hetuhetūti kāraṇavisesavisayattā mūlassa visuṃ gahaṇaṃ. **Etīti** etassa atthavacanāṃ vattatīti, taṅca uppattiṭṭhitīnaṃ sādharāṇavacanāṃ. Tenevāha “**tiṭṭhati vā uppajjati vā**”ti. Ekacco hi paccayo ṭhitiyā eva upakārako hoti yathā pacchājātapaccayo,

1. Abhi 8. 1 piṭṭhe Paṭṭhāne. 2. Abhi-Ṭṭha 3. 344 piṭṭhe. 3. Abhi-Ṭṭha 3. 344 piṭṭhe.

ekacco uppattiyā eva yathā anantarādiko, ekacco ubhayassa yathā hetu-
ādayo.

Upakārakalakkhaṇoti ca dhammena dhammasattim upakāraṃ dassetīti daṭṭhabbam. Hinoti patiṭṭhāti etthāti **hetu**, anekatthattā dhātusaddānam hi-saddo mūlasaddo viya patiṭṭhattho veditabbo. Hi noti vā etena kammanidānabhūtena uddham ojaṃ atiharantena mūlena viya pādapo tappaccayaṃ phalaṃ gacchati pavattati vuddhim viruḷhim āpajjatīti hetu. Attano phalaṃ karotīti **kāraṇaṃ**. Nidadāti dassentaṃ viya hotīti **nidānaṃ**. Sambhavati taṃ etasmāti **sambhavo**. Pabhavati etasmāti **pabhavoti** paccayahetusaddehi itaresampī samānatthata veditabbā. Evaṃ santepi kāraṇavisēsavisayo hetusaddo, kāraṇasāmaññavisayo paccayasaddoti dassento “**mūlaṭṭhenā**”ti-ādimāha. Hetu-attho, paccayaṭṭho ca heṭṭhā papañcavasena vuttoti taṃ saṅkhippaṃ dassento āha “**saṅkhepato -pa-hetupaccayo**”ti.

Yathā sālivīhibijādīni taṃtaṃsadhīnaṃ sālivīhi-ādibhāvassa sādhakāni, maṇi-ādippabhāvattḥūni ca nīlādivaṇṇāni nīlādippabhāsādhakāni, evaṃ hetupaccayo yathārahaṃ attanā sampayuttadhammānaṃ kusalādibhāvassa sādhakoti imamattham dasseti “**so sāli-ādīna**”ti-ādīnā. **Ācariyānanti** ca revatācariyaṃ sandhāyāha. **Evaṃ santeti** hetupaccayo yadi kusalādibhāvasādhako, evaṃ sati. **Na sampajjati** na sijjhati. Yathā kusalākusalahetu taṃsamuṭṭhānarūpassa kusalākusalabhāvāya na pariyatto, evaṃ abyākatopi hetu taṃsamuṭṭhānarūpassa abyākatabhāvāya. Sabhāveneva hi taṃ abyākatanti āha “**na hi so tesam kusalādibhāvaṃ sādheti**”ti. Hetupaccayo ca tesam hotiyevāti āha “**na ca paccayo na hoti**”ti. Idāni tamattham pāḷiyā samatthetuṃ “**vuttañhetan**”ti-ādi vuttaṃ. **Vinā etenāti** etena hetunā abyākatabhāvasādhakena vinā ahetukattā abyākatabhāvo siddho sabhāvenevāti adhippāyo.

“Yoniso bhikkhave manasi karoto anuppannā ceva kusalā dhammā uppajjanti, uppannā ca kusalā dhammā abhivaḍḍhantī”ti-ādi¹ vacanehi

1. Am 1. 12 piṭṭhe thokaṃ visadisam.

kusalabhāvassa yonisomanasikārappaṭibaddhatā siddhāti āha
“yonisomanasikārappaṭibaddho kusalabhāvo”ti. Eteneva akusala-
 abyākatabhāvāpi kusalabhāvo viya na hetupaṭibaddhāti dassitaṃ hoti. Yaṃ
 paneke maññeyyūṃ “ahetukahetussa akusalabhāvo viya sahetukahetūnampi
 sabhāvatova kusalādibhāvo, aññesaṃ taṃsampayuttānaṃ hetupaṭibaddho”ti,
 tassa uttaraṃ vattum **“yadi cā”**ti-ādimāha. **Alobho kusalo vā siyā abyākato
 vāti** yadi alobho sabhāvato kusalo, so kusalasabhāvattā abyākato na siyā.
 Atha abyākato taṃsabhāvattā kusalo na siyā alobhasabhāvassa
 adosattābhāvo viya. Yasmā pana ubhayathāpi hoti, tasmā yathā ubhayathā
 hontesu saddhādīsu sampayuttesu hetupaṭibaddhaṃ kusalādibhāvaṃ
 pariyesetha, na sabhāvato, evaṃ hetūsupi kusalādītā aññapaṭibaddhā
 pariyesitabbā, na sabhāvatoṭi yaṃ vuttaṃ “sampayuttahetūsu sabhāvatoṭi
 kusalādibhāvo”ti, taṃ na yujjati. Sā pana pariyesiyamānā
 yonisomanasikārādipaṭibaddhā hotīti hetūsu viya sampayuttesupi
 yonisomanasikārādipaṭibaddho kusalādibhāvo, na hetupaṭibaddhoti siddhaṃ
 hotīti adhippāyo.

Viruḷhamulā viyāti etena mūlāni viya mūlānīti dasseti. Tenevāha
“suppaṭiṭṭhitabhāvasādhanenā”ti. Svāyaṃ “kusalo dhammo kusalassa,
 kusalo dhammo abyākatassa, kusalo dhammo kusalābyākatassa, akusalo
 dhammo akusalassa, akusalo dhammo abyākatassa, akusalo dhammo
 akusalābyākatassa, abyākato dhammo abyākatassā”ti¹ evaṃ sattadhā
pañhāvāre niddiṭṭho. Yaṃ pana vuttaṃ hetukiccaṃ dassentena “hetū
 hetusampayuttakānaṃ dhammānaṃ, taṃ samuṭṭhānānaṃ rūpānaṃ
 hetupaccayena paccayo”ti², tattha paṭhamo hetusaddo paccattaniddoṭṭho
 paccayadhammaniddeso, tenassa hetubhāvena upakārakatā hetupaccayatāti
 dasseti. Dutīyo paccayuppannavisesanaṃ, tena na yesaṃ kesañci
 sampayuttakānaṃ hetū hetupaccayena paccayo, atha kho hetunā
 sampayuttānamevāti dasseti. Nanu ca

1. Abhi 8. 132 piṭṭhe Paṭṭhāne.

2. Abhi 9. 1 piṭṭhe Paṭṭhāne.

sampayuttasaddassa sāpekkhattā dutiye hetusadde avijjamānēpi aññassa apekkhitabbassa aniddiṭṭhattā hetū attanāva sampayuttakānaṃ hetupaccayena paccayoti ayamattho viññāyatīti? Nāyamekanto. Hetusaddo hi paccattaniddiṭṭho “hetupaccayena paccayo”ti ettheva byāvaṇo yadā gayhati, na tadā sampayuttavisesanaṃ hotīti sampayutta-avisitṭhā ye keci gahitā bhaveyyunti. Nanu ca yathā “arūpino āhārā sampayuttakānaṃ dhammānaṃ, arūpino indriyā sampayuttakānaṃ dhammānaṃ”ti ca vutte dutiyena āhāraggahaṇena, indriyaggahaṇena ca vināpi āhārindriyasampayuttakāva gayhanti, evamidhāpi siyāti? Na, āhārindriyāsampayuttassa vajjetabbassa abhāvato. Vajjetabbābhāvato hi tattha dutiye āhārindriyaggahaṇe asatipi taṃsampayuttakāva gayhantīti taṃ na kataṃ, idha pana vajjetabbaṃ atthīti kattabbaṃ dutiyaṃ hetuggahaṇaṃ. Evampi “hetū hetusampayuttakānaṃ”ti ettha hetusampayuttakānaṃ so eva sampayuttakahetūti visesanassa akatattā yo koci hetu yassa kassaci hetusampayuttassa hetupaccayena paccayoti āpajjatīti? Nāpajjati paccattaniddiṭṭhasseva hetuno puna sampayuttavisesanabhāvena vuttattā. Etadatthameva hi vināpi dutiyena hetusaddena hetusampayuttabhāve siddhepi tassa gahaṇaṃ kataṃ.

Atha vā asati dutiye hetusadde hetusampayuttakānaṃ hetupaccayena paccayo, na pana hetūnanti evampi gahaṇaṃ siyāti tannivāraṇatthaṃ so vutto. Tena hetusampayuttabhāvaṃ ye labhanti, tesaṃ sabbesaṃ hetūnaṃ, aññesampi hetū hetupaccayena paccayoti dassitaṃ hoti. Yasmā pana hetujhānamaggā patiṭṭhāmattādibhāvena aññadhammanirapekkhā, na āhārindriyā viya sāpekkhā eva, tasmā etesveva dutiyaṃ hetādiggahaṇaṃ kataṃ. Āhārindriyā pana āharitabba-īsitabbāpekkhā eva, tasmā te vināpi dutiyena āhārindriyaggahaṇena attanā eva āharitabbe, īsitabbe ca āhārindriyabhūte, aññe ca sampayuttake paricchindantīti taṃ tattha na kataṃ. Idha ca dutiyena hetuggahaṇena paccayuppannānaṃ hetunā, paccayabhūteneva ca sampayuttānaṃ hetūnaṃ aññesaṅca paricchinnattā puna visesena kiccaṃ natthīti pañhāvāre

“kusalā hetū sampayuttakānaṃ khandhānaṃ”ti-ādīsu dutiyaṃ hetuggahaṇaṃ na katanti daṭṭhabbānaṃ.

596. **Ārammaṇabhāvenā**ti visayabhāvena, ālambitabbabhāvenāti attho. **Ārabhitvā**pi pi-saddena imamattamaṃ dasseti—rūpāyatanādimate yasmim̐ kismiñci ekasmim̐ aṭṭhatvā “yaṃ yaṃ dhammaṃ ārabbhā”ti¹ aniyamena sabbarūpāyatanānaṃ -pa- sabbadhammāyatanānañca ārammaṇapaccayabhāvassa vuttattā rūpādibhedena chabbidhesu saṅkhatāsaṅkhatapaññattidhammesu na koci dhammo ārammaṇapaccayo na hotīti. Svāyaṃ ārammaṇapaccayabhāvo heṭṭhā vibhāvito eva. **Ālambitvā**ti gahetvā. Ekantasārammaṇabhāvato anārabbhā pavatti eva natthīti āha “**ārabheva**”ti. Svāyaṃ “kusalo dhammo kusalassa, kusalo dhammo akusalassa, kusalo dhammo abyākatassa, akusalo dhammo akusalassa, kusalassa, abyākatassa, abyākato dhammo abyākatassa, kusalassa, akusalassa”ti² evaṃ navappakāro veditabbo.

597. **Jeṭṭhakatthenā**ti pamukhabhāvena. Attādhīnānañhi patibhūto dhammo adhipati. So tesāṃ pamukhabhāvena pavattati. “Chandavato kim nāma na sijjhatī”ti-ādikaṃ purimābhisaṅkhārūpanissayaṃ labhitvā uppajjamāne cittuppāde chandādayo dhurabhūtā jeṭṭhakabhūtā sampayuttadhamme sādhayamānā vase vattayamānā hutvā pavattanti sampayuttadhammā ca tesāṃ vasena vattanti hīnādibhāvena tadanuvattanato, tena te adhipatipaccayā hontī. Garukātabbampi ārammaṇaṃ tanninnaṇapabbhārānaṃ assādanapaccavekkhaṇamaggaphalānaṃ attano vase vattayamānaṃ viya paccayo hoti. Tasmā ayaṃ³ attādhīnānaṃ patibhāvena upakārakatā⁴ adhipatipaccayoti daṭṭhabbo⁵. **Chandādhipatī**ti chandasāṅkhāto adhipati, chandaṃ dhuraṃ chandaṃ jeṭṭhakaṃ katvā cittuppattikāle uppānassa kattukamyatāchandasetaṃ nāmaṃ. Sesesupi eseva nayo. Kasmā pana yathā hetupaccayaniddese “hetū hetusampayuttakānaṃ”ti⁶ vuttaṃ, evamidha “adhipatī adhipatisampayuttakānaṃ”ti avatvā “chandādhipati chandasampayuttakānaṃ”ti-ādinā¹ nayena vuttanti?

1. Abhi 8. 2 piṭṭhe Paṭṭhāne.

2. Abhi 8. 132, 135 piṭṭhe Paṭṭhāne.

3. Sayam̐ (Ka)

4. Upakārakatā (Ka)

5. Daṭṭhabbā (Ka)

6. Abhi 8. 1 piṭṭhe.

Ekakkhaṇe abhāvato. Hetavo hi dve tayopi ekakkhaṇe hetupaccayā honti, mūlaṭṭhena upakārahābhāvassa avijahanato. Adhipati pana jeṭṭhakaṭṭhena upakārako, na ca ekakkhaṇe bahū jeṭṭhakā honti. Tasmā ekato uppannānampi tesam ekakkhaṇe adhipatipaccayabhāvo natthīti “adhipatī adhipatisampayuttakānan”ti avatvā “chandādhipati chandasampayuttakānan”ti-ādinā¹ nayena vuttam.

Yaṃ yaṃ dhammanti yaṃ yaṃ ārammaṇadhammam. **Garuṃ katvāti** garukāraccittikāravasena vā asādanavasena vā garukārikam laddhabbam avijahitabbam anavaññātam katvā. **Te te dhammāti** te te garukātabbā dhammā. **Tesam tesanti** taṃtaṃgarukāradhammānam.

Adhipatipaccayenāti ārammaṇādhipatipaccayena. Svāyam “kusalo dhammo kusalassa sahaḥjātārammaṇehi, akusalassa ārammaṇeneva, abyākatassa sahaḥjātārammaṇehi, kusalābyākatassa sahaḥjātenevāti kusalamūlā cattāro, akusalo dhammo akusalassa sahaḥjātārammaṇehi, abyākatassa sahaḥjāteneva, tathā akusalābyākatassāti akusalamūlā tayo, abyākato dhammo abyākatassa sahaḥjātārammaṇehi, kusalassa ārammaṇeneva, tathā akusalassāti abyākatamūlā tayo”ti saṅkhepato dasappakāro adhipatipaccayo. Ettha ca sattadhā sahaḥjātādhipati, sattadhā ārammaṇādhipati veditabbo.

598. Antarāyatīti antaram, byavadhāyakanti attho. Nāssa antaram vijjatīti anantaro, anantaro ca so paccayo cāti **anantarapaccayo**. “Atthānantaratā anantarapaccayo, kālānantaratā samanantarapaccayo”ti-ādinā bahudhā papañcayanti, asāram ganthavitthāram karonti. Yathā pavatti-okāsādanavisesabhāvena natthivigatapaccayā vuttā, na evam anantarasamanantarapaccayā, ete pana cittaniyamahetubhāvena vuttāti taṃ cittaniyamahetubhāvam dassetum “**yo hi esā**”ti-ādi āradham. Tattha **manoviññādhātūti-ādi cittaniyamoti** ettha **ādi**-saddena santiraṇānantarā voṭṭhabbanam, cuti-anantarā paṭisandhīti yassa yassa cittassa anantarā yaṃ yaṃ cittam uppajjati, tassa tassa tadanantaruppādaniyamo taṃtaṃsahakāripaccayaviṣiṭṭhassa purimapurimacittasseva vasena ijjatīti dasseti.

1. Abhi 8. 2 piṭṭhe.

Atthānantaratāyāti atthena kenaci dhammena anantaratāya. **Kālānantaratāyā**ti kālabhedena anantaratāya. **Ācariyānanti** idhāpi **revatācariyameva** sandhāya vuttam. **Tatthāti** tasmim̄ kālānantaratāya samanantarapaccayabhāve, tasmim̄ vā yathāvuttavirodhe. **Bhāvanābalena pana vāritattāti** ettha yathā rukkhassa vedhe dinne pupphitum̄ samatthasseva pupphanam̄ na hoti, vedhe pana apanīte tāya eva samatthatāya pupphanam̄ hoti, evamidhāpi bhāvanābalena vāritattā samuṭṭhāpanasamatthasseva asamuṭṭhāpanam̄, tasmim̄ca apagate tāya eva samatthatāya samuṭṭhāpanam̄ hotīti adhippāyo. Tampi vacanam̄ **kālānantaratā natthi** sattāhādīnā kālena antaritabhāvato. **Etadeva** “kālantaratā atthi” icceva **vadāma**. Nanu ca kālo nāma koci paramatthato natthīti vadeyyāti āsaṅkanto āha “**kālānantara -paladdhī**”ti.

Byañjanamattatovettha nānākaraṇam̄ paccetabbarṃ, na atthatoti upacayasantati-adhivacananiruttipadānam̄ viya saddatthamattato nānākaraṇam̄, na vacanīyatthatoti adhippāyo. Teneva saddatthavisesam̄ dassetum̄ “kathan”ti-ādīmāha. Tattha purimapacchimānam̄ nirodhuppādantarābhāvato nirantaruppādanasamatthatā anantarapaccayabhāvo. Rūpakalāpānam̄ viya saṅṭhānābhāvato, paccayapaccayuppannānam̄ sahāvattānābhāvato ca “idamito heṭṭhā, uddham̄, tiriyan”ti vibhāgābhāvā attanā ekattamiva upanetvā suṭṭhu anantarabhāvena uppādanasamatthatā samanantarapaccayatā. **Uppādanasamatthatāti** ca abyāpārattā dhammānam̄ yasmim̄ yadākāre niruddhe, vattamāne vā sati taṁtaṁvisesavanto dhammā honti, tassa sova ākāro vuccatīti daṭṭhabbo. Dhammānam̄ pavattimattameva ca upādāya kālavohāroti nirodhā vuṭṭhahantassa nevasaññānāsaññāyatanaphalasaṁpattīnam̄ asaññābhavā cavantassa, purimacutipacchimapaṭṭisandhīnañca nirodhuppādanirantarakāya kālantaratā natthi. Na hi tesam̄ antarā arūpadhammappavatti atthi, yaṁ upādāya kālantaratā vucceyya, na ca rūpadhammappavatti arūpadhammappavattiyā antaram̄ karoti aññasantānattā. Rūpārūpasantatiyo hi dve aññamaññam̄ visadisasabhāvattā aññamaññūpakārabhāvena pavattamānāpi visum̄heva honti. Ekasantatiyañca purimapacchimānam̄ majjhe pavattamānam̄ taṁsantatipariyāpānatāya antarakārakam̄ hoti. Tādisañca kiñci

nevasaññānāsaññāyatanaphalasaṃpattīnaṃ majjhe natthi, na ca abhāvo antarakārako hoti abhāvattā eva. Tasmā javanānantarassa javanassa viya, bhavaṅgānantarassa bhavaṅgassa viya ca nirantaratā suṭṭhu anantaratā hotīti tathā uppādanasamatthatā nevasaññānāsaññāyatanacutīnampi daṭṭhabbā. Uppattiyā paccayabhāvo cettha anantarapaccayādīnaṃ pākaṭoti uppādanasamatthatāva vuttā. Paccuppanānaṃ pana dhammānaṃ pubbantāparantaparicchena gahitānaṃ uppajjatīti vacanaṃ alabhantānaṃ “atīto dhammo paccuppanassa dhammassa anantarapaccayena paccayo”ti-ādinā¹ anantarādipaccayabhāvo vuttoti naso uppattiyā evāti viññāyati. Na hi kusalādiggaṇaṃ viya paccuppanaggahaṇaṃ aparicchedaṃ. Yato uppattimattasamaṅgino eva gahaṇaṃ siyā. Teneva ca atītattike paṭicavārādayo na santīti. Tassa “kusalo dhammo kusalassa, kusalo dhammo abyākatassa, akusalo dhammo akusalassa, akusalo dhammo abyākatassa, abyākato dhammo abyākatassa, abyākato dhammo kusalassa, abyākato dhammo akusalassa”ti sattadhā bhedo veditabbā.

599. **Uppajjamānova saha uppādanabhāvenāti** etthāpi uppattiyā paccayabhāvena pākaṭena ṭhitiyāpi paccayabhāvaṃ nidassetīti daṭṭhabbaṃ aññathā² padīpanidassanaṃ na yujjeyya. Padīpo hi pabhāsassa ṭhitiyāpi paccayo, na uppattiyā eva. Paccayuppanānaṃ sahaajātabhāvena upakārakatā sahaajātapaccayatā. **Okkantikkhaṇeti** paṭisandhikkhaṇe. Tasmim hi khaṇe nāmarūpaṃ okkantaṃ viya paralokato āgantvā idha mātukucchi-ādīṃ pavisaṇaṃ viya uppajjati, tasmā so khaṇo okkantikkhaṇoti vuccati. Ettha ca rūpanti hadayavattthuyeva adhippetam. Tañhi nāmassa, nāmañca tassa sahaajātapaccayo hoti. **Cittacetasiḱāti** pavattiyam cattāro khandhā paṭisandhikkhaṇe cittasamuṭṭhānānaṃ abhāvato. **Rūpino dhammāti** hadayavattthum sandhāyāha. Tattha yadipi pubbe “okkantikkhaṇe nāmarūpan”ti vuttaṃ, tathāpi tena khaṇantare sahaajātapaccayabhāvo rūpadhammānaṃ na nivāritoti tannivāraṇatthamidam vuttanti gahetabbam. **Kiñci kāleti** keci kismiñci kāleti attho, tena rūpino dhammā keci vatthubhūtā kismiñci paṭisandhikāleti aññesaṃ rūpadhammānaṃ, vatthuno ca pavattiyam

1. Abhi 9. 413 piṭṭhe Paṭṭhāne.

2. Aññathā ca (Syā)

arūpadhammānaṃ sahaajātapaccayabhāvaṃ pubbe anivāritaṃ nivāreti. Evañca katvā “kiñci kālan”ti vā “kismiñci kāle”ti vā vattabbe tathā avatvā vibhattivipallāsaṃ katvā vuttaṃ. Tena **kiñcī**ti upayogekavacanaṃ. “**Rūpino dhammā**”ti etena sambandhe paccatabhuvacanaṃ jāyati. “**Kāle**”ti etena sambandhe bhummekavacanaṃ dīpitanti veditabbaṃ. Purimena ca “eko khandho, vatthu ca tiṇṇannaṃ khandhānaṃ”ti¹ ādivacanaṃ nāmasahitaṃ eva vatthu nāmassa paccayoti vattabbe āpanne itarena kevalassa ca tathāvattabbataṃ dasseti. Svāyaṃ sahaajātapaccayo “kusalo dhammo kusalassa, abyākatassa, kusalābyākatassa, akusalo dhammo akusalassa, abyākatassa, akusalābyākatassa, abyākato dhammo abyākatassa, kusalābyākato dhammo abyākatassa, akusalābyākato dhammo abyākatassā”ti² navavidho veditabbo.

600. Attano upakārakassa upakāratā aññamaññapaccayatā. Tathā hissa tidaṇḍaṃ nidassitaṃ. Upakāratā ca aññamaññatāvaseneva daṭṭhabbā, na sahaajātatādivasena. Sahajātādipaccayo hontoyeva hi koci aññamaññapaccayo na hoti, na ca sahaajātādipaccayadhammehi vinā imassa pavatti atthi. Tathā hi sahaajātādipaccayo ca hontoyeva hi koci aññamaññapaccayo hoti. Yadi ca attano upakārakassa upakāratāmattaṃ aññamaññapaccayo siyā, purejātapacchājātabhāvena upakārassa upakārakā vatthukhandhā aññamaññapaccayā siyūṃ, na ca taṃ icchitaṃ. Tena vuttaṃ “upakāratā ca aññamaññavaseneva daṭṭhabbā”ti. Ayañca uppattiyā, ṭhitiyā ca upakārakoti veditabbo. Ayaṃ pana “kusalo dhammo kusalassa, akusalo dhammo akusalassa, abyākato dhammo abyākatassā”ti tividho veditabbo.

601. Taru-ādīnaṃ pathavī viya adhiṭṭhānākārena pathavīdhātu sesadhātūnaṃ, cakkhādayo cakkhuvīññānādīnaṃ upakārakā cittakammasa paṭādayo viya nissayākārena khandhādayo tamtaṃnissayānaṃ khandhādīnaṃ. Pathavīdhātuyāṃ patiṭṭhāya eva hi sesadhātuyo upādārūpāni viya yathāsakaṃ kiccaṃ karonti.

1. Abhi 8. 140 piṭṭhādīsu.

2. Abhi 8. 139, 141 piṭṭhesu.

Adhiṭṭhānākārenāti ādhārākārena. Ādhārākāro cettha tesam sātisayam tadadhīnavuttitāya veditabbo. Yato bhūtāni aniddisitabbaṭṭhānāni vuccanti, evañca katvā cakkhādīnampi adhiṭṭhānākārena upakārakatā suṭṭhu yujjati. Na hi yathāvuttaṃ tadadhīnavuttitāvisesam muñcitvā añño cakkhādīsu adesakānam arūpadhammānam adhiṭṭhānākāro sambhavati. Yadi pi yaṃ yaṃ dhammaṃ paṭicca ye ye dhammā uppajjanti, tesam sabbesaṃ tadadhīnavuttibhāvo. Yena pana paccayabhāvavisesena cakkhādīnam paṭumandabhāvesu cakkhuviññāṇādayo tadanuvidhānākāreneva pavattanti, svāyamidha tesam tadadhīnavuttitāsiddho visesoti. Evañhi paccayabhāvasāmaññe satipi ārammaṇapaccayato nissayapaccayassa viseso vibhāvito hoti. Svāyam nayo heṭṭhā pakāsitova. **Chatṭho panā**ti ettha “rūpino dhammā arūpīnam dhammānam kismiñci kāle”ti idaṃ na labbhati. Yaṃ panettha labbhati “rūpino dhammā kecī”ti, tattha te eva dhamme dassetuṃ “**cakkhāyatanan**”ti-ādi niddiṭṭham. **Yaṃ rūpanti** hadayavatthum sandhāya vuttaṃ. Ayaṃ pana nissayapaccayo terasavidho. Kathaṃ? Sahajātato kusalamūlā tayo, tathā akusalamūlā, abyākatamūlesu pana purejātaṃ labbhati. Abyākatañhi abyākatassa sahajātampi paccayo hoti, purejātampi kusalassa purejātameva, tathā akusalassa, kusalābyākatam sahajātapurejātato kusalassa, sahajātato eva abyākatassa, tathā akusalābyākatan”ti evaṃ terasa.

602. **Tadadhīnavuttitāya attano phalena nissitoti** yaṃ kiñci kāraṇam nissayoti vatvā tattha yo bhuso nissayo, taṃ **upanissayoti** niddhāreti. **Balavakāraṇabhāvena upakārakoti** ārammaṇabhāvavasena anantaram anurūpacittuppādanasamatthāvasena, kevalañca balavantam kāraṇam hutvā upakārako. Tenāha “so”ti-ādi.

Tattha **dānam datvā**ti deyyadhammaṃ cajitvā. Yāya vā cetanāya so diyyati, sā cetanā dānam. **Datvā**ti taṃ cetanam pariyoḍapetvā visuddham katvā. **Sīlam samādiyitvā**ti pañcaṅgadasaṅgādivasena niccasīlam gaṇhitvā. Iminā samādānaviratiyeva dassitā, sampattaviratisamucchedaviratiyo pana loke “sīlan”ti apākaṭattā na vuttā. Kiñcāpi na vuttā,

ārammaṇapaccayo pana hontiyeva. Tattha samucchedavirati sekkhānaṃyeva kusalassa ārammaṇam hoti, na itaresam. **Uposathakammanti** “pāṇam na hane, na cādinnaṃādiye”¹ti evaṃ vuttaṃ uposathasīlam. **Taṃ garuṃ katvā paccavekkhatī** taṃ yathāvuttaṃ kusalaṃ sekkhopi puthujjanopi paccavekkhati, arahāpi taṃ paccavekkhateva. Arahatopi hi pubbe kataṃ kusalaṃ kusalameva. Yena pana cittena paccavekkhati, taṃ kiriyacittam nāma hoti. Tasmā “kusalo kusalassā”²ti imasmim̄ adhikāre na labbhati. **Pubbe suciṇṇānī**ti “datvā katvā”³ti hi āsannakatāni vuttāni, iminā na āsannakatānīti veditabbāni, dānādīhi vā sesāni kāmāvacarakusalāni dassetuṃ idaṃ vuttaṃ. **Jhānā vuṭṭhahitvā**ti jhānaṃ samāpanno jhānato vuṭṭhahitvā. “Jhānaṃ vuṭṭhahitvā”⁴tipi pāḷi. **Sekkhā gotrabhūnti** sotāpannaṃ sandhāya vuttaṃ. So hi gotrabhūṃ paccavekkhati. **“Vodānaṃ”**ti idaṃ pana sakadāgāmi-anāgāmino sandhāya vuttaṃ. Tesaṃhi taṃ cittaṃ vodānaṃ nāma hoti. **Sekkhā**ti sotāpannasakadāgāmi-anāgāmino. **Maggā vuṭṭhahitvā**ti maggaphalabhavaṅgātikkamavasena attanā paṭiladdhamaggā vuṭṭhahitvā, suddhamaggatoyeva pana vuṭṭhāya paccavekkhaṇaṃ nāma natthi. **Ādi-**saddena “kusalaṃ aniccato dukkhato anattato vipassanti”²“³ti³ evamādim̄ saṅgaṇhāti. Yadi pi nānattaṃ akatvāva vibhatto, tathāpi idampi ārammaṇādhipati-ārammaṇūpanissayānaṃ visesoti dassetuṃ **“tathā”**ti-ādi vuttaṃ.

Nesam⁴ cittacetāsikānaṃ anantarapaccaya-anantarūpanissayānaṃ nikkhepaviseso atthi. Yasmā purimo abyākatadhamavasena pavatto, itaro kusalādivasenaṃpīti sopi nikkhepaviseso **atthato ekībhāvameva gacchati** sabbesupi cittuppādesu tadubhayassa icchitabbattā. **Evaṃ santepī**ti-ādi anantara-anantarūpanissayānaṃ visesadassanaṃ. **Yathā hī**ti-ādi anantarūpanissayassa sambhavadassanaṃ.

Pakatoti ettha **pa-kāro** upasaggo, so attano phalassa uppādanasamatthabhāvena suṭṭhukatataṃ dīpeti. Tathā ca kataṃ attano santāne kataṃ hotīti āha **“attano santāne”**ti-ādi. Karaṇaṅca duvidhaṃ nipphādanaṃ, upasevanañcāti taṃ dassetuṃ **“nipphādito vā”**ti-ādi vuttaṃ. Tattha

1. Khu 1. 338 piṭṭhe Suttanipāte.

3. Abhi 8. 133 piṭṭhe Paṭṭhāne.

2. Jhānā vuṭṭhahitvā sammasati (Syā)

4. Tesaṃ (Syā, Ka)

nīpphādanam hetupaccayasamodhānena phalassa nibbattanam. **Upasevanam** pana kāye alliyāpanavasena upayogūpasevanam, vijānanaśāñjānanādīnam vasena¹ ārammaṇūpasevanañca. Teneva anāgatānampi utusampadādīnam² ārammaṇūpasevanena upasevitānam pakatūpanissayatā vuttā hoti, pageva atītapaccuppanānam. Paccuppanassāpi hi “paccuppanam utubhojanam senāsanam upanissāya jhānam uppādeti”ti-ādi³ vacanato pakatūpanissayabhāvo labbhatīti. **Pakatiyā evāti** paccayantarasañkararahitena attano sabhāveneva. **Upanissayoti** balavakāraṇam katvā⁴. **Anekappakāro pabhedo veditabbo** pañhāvāre āgatanayena. Paccayavāre pana—

“Purimā purimā kusalā dhammā pacchimānam pacchimānam kusalānam dhammānam upanissayapaccayena paccayo, purimā purimā kusalā dhammā pacchimānam pacchimānam akusalānam dhammānam kesañci, kusalā abyākatānam, akusalā akusalānam, kusalānam kesañci, akusalā abyākatānam, abyākatā abyākatānam, abyākatā kusalānam, abyākatā akusalānam, puggalopi, senāsanampi upanissayapaccayena paccayo”ti⁵.

Tattha ye purimā yesam pacchimānam anantarūpanissayo honti, te tesam sabbesampi ekanteneva honti, na kesañci kadāci. Tasmā yesu padesu anantarūpanissayo labbhati, tesu “kesañci”ti na sakkā vattunti na vuttam. Ye pana purimā yesam pacchimānam ārammaṇūpanissayo vā pakatūpanissayo vā honti, te tesam, na sabbesam ekantena honti. Yesam uppattivibandhakā paccayā balavanto honti, tesam na bhavanti, itaresam bhavanti. Tasmā yesu padesu anantarapaccayo na labbhati, tesu “kesañci”ti vuttam. Siddhānam paccayadhammānam yehi paccayuppannehi bhavitabbam, tesam “kesañci”ti ayamettha attho.

Kasiṇapaññattiyā ārammaṇūpanissayatābhāvato ekaccāya paññattiyā saddhim sabbo dhammo ārammaṇūpanissayo, anantarātīto cittacetāsikarāsi anantarūpanissayo, kusalākusalavipākakiriyārūpavasena

1. Vijānanaśāñjānanānubhavanādivasena (Syā)

3. Abhi 9. 415 piṭṭhe Paṭṭhāne.

5. Abhi 8. 5, 6 piṭṭhesu.

2. Cakkhusamphassādīnam (Syā)

4. Balavakāraṇam (?)

pañcavidho pakatūpanissayoti ayamettha saṅkhepo. Vitthāro pana¹ **paṭṭhānaṭṭhakathāyam**² veditabbo.

603. **Paṭhamataranti** paccuyuppannato puretaraṃ. Ayañhi purejātapaccayo rūpadhammaseneva labbhati. Paccuyuppanno ca arūpadhammāyeva. Tenāha “**vattamānabhāvena upakārako**”ti. Nissayārammaṇākārādīhi visiṭṭhā purejātabhāvena vinā upakārabhāvaṃ agacchantānaṃ vatthārammaṇānaṃ purejātākārena upakārakatā purejātapaccayatā. Evaṃ vatthārammaṇavasena duvidhe purejātapaccaye “**cakkhāyatanan**”ti-ādi vatthuvaseṇa vuttaṃ, “**rūpārammaṇan**”ti-ādi ārammaṇavasena.

Yaṃ rūpanti hadayavatthuṃ sandhāyāha. Tattha “**kiñci kāle**”ti pavattikālavaseṇa vuttaṃ. “**Kiñci kālena**” iti paṭisandhikālavaseṇa. Yāni ārammaṇapurejātena vinā na vattanti, tesaṃ cakkhuvīññānādīnaṃ ārammaṇapurejātadassaneṇa manodvārepi yaṃ yaṃ ārammaṇapurejātena vattati, tassa tassa ārammaṇapaccayabhūtaṃ sabbaṃ rūparūpaṃ ārammaṇapurejātanti dassitameva hoti. Tathā hi vuttaṃ **pañhāvāre** “ārammaṇapurejātaṃ sekkhā vā puthujjanā vā cakkhuṃ aniccato dukkhato anattato vipassanti”ti-ādi³. “Abyākato dhammo abyākatassa dhammassa purejātapaccayena paccayo, abyākato dhammo kusalassa dhammassa purejātapaccayena paccayo, abyākato dhammo akusalassa dhammassa purejātapaccayena paccayo”ti⁴ abyākatamūlakā tayova vārā. Te ca paccekaṃ vatthupurejātaṃ, ārammaṇapurejātanti dvidhā vibhattā.

604. Paccuyuppannadhammassa puretaraṃ siddhabhāve sati paccayadhammassa pacchājātatāti vuttaṃ “**purejātānan**”ti. Ayañca nayo rūpadhammesu eva labbhati, na arūpadhammesūti vuttaṃ “**rūpadhammānan**”ti. Yadi paccuyuppannadhammā puretarameva jātā, kathaṃ paccayabhāvoti āha “**upathambhakattenā**”ti. Pacchājātena hi vinā santānāvicchedahetubhāvaṃ agacchantānaṃ dhammānaṃ ye pacchājātākārena upakārakā, tesaṃ sā vippayuttākārādīhi visiṭṭhā

1. Vitthārato (Ka)

3. Abhi 8. 153 piṭṭhe Paṭṭhāne.

2. Abhi-Ṭṭha 3. 369 piṭṭhe.

4. Abhi 8. 152, 153 piṭṭhesu.

upakāraṭā pacchājātapaccayatā. Evaṃ sabbapaccayānaṃ paccayantarākāraṇaṃ upakāraṭā yojetabbā. “**Gijjhapotakasarīraṇaṃ āhārāsācetanā viyā**”ti etena manosañcetanāhāraṇaṃ pavattamānehi arūpadhammehi rūpakāyassa upatthambhitabhāvaṃ dasseti. Teneva “āhārāsā viyā”ti avatvā cetanāggahaṇaṃ kataṃ. **Kāyassāti** catusamuṭṭhānikabhūtopādāyarūpasāṅkhātassa rūpakāyassa. Saṅkhepato ṭhapetvā rūpadhamme avasiṭṭho arūpakkhandho pacchājātapaccayo. So jātivaseṇa kusalo, akusalo, vipāko, kiriyāti catubbidhoti veditabbaṃ.

605. Kusalādibhāvena attanā sadisassa payogena karaṇīyassa punappunaṃ karaṇaṃ pavattanaṃ **āsevanatṭho**, attasadisasabhāvatāpādanaṃ vāsaṇaṃ vā. **Purimapurimābhiyogo viyāti** uggahaṇasavanadhāraṇādipurimāpurimāsevanā viya. Tīsu pana etesu **purimā purimā**ti samanantarātītā daṭṭhabbā. Kasmā panettha anantarapaccaye viya “purimā purimā kusalādhammā pacchimānaṃ pacchimānaṃ abyākatānaṃ”ti-ādinā bhinnajātiyehi saddhim niddeso na katoti? Attano gatim gāhetum asamatthattā. Bhinnajātikā hi bhinnajātikānaṃ āsevanaguṇena paṇḍabalavabhāvaṃ sampādentā attanova kusalādibhāvasāṅkhātānaṃ gatim gāhetum na sakkuṇanti. Tasmā tehi saddhim niddesaṃ akatvā ye yesaṃ vāsaṇāsāṅkhātena āsevanaguṇena paṇḍabalavabhāvavasiṭṭhaṃ attano kusalādibhāvasāṅkhātānaṃ gatim gāhetum samatthā, tesāṃ tehi samānājatikeheva saddhimniddeso katoti daṭṭhabbo.

Atha vipākābyākataṃ kasmā na gahitaṃ? Āsevanābhāvato. Vipākābyākataṃhi kammavasena vipākabhāvappattaṃ kamma pariṇāmitaṃ hutvā pavattamānaṃ nirussāhaṃ dubbalaṃ santaṃ āsevanaguṇena attano sabhāvaṃ gāhetvā paribhāvetvā neva aññaṃ vipākaṃ pavatteti, na ca purimavipākānubhāvaṃ gāhetvā uppajjati, atha kho kammavegakkhittaṃ patitaṃ viya hutvā uppajjati. Tasmā sabbathāpi vipāke āsevanā natthīti na gahitaṃ. Kusalākusalakiriyānantaraṃ uppajjamānampi sakammaṇḍapāṭibaddhavuttitāya āsevanaguṇaṃ na gaṇhātīti kusalādayopi tassa āsevanapaccayo na honti. Nānājatīkattāpi cete tassa āsevanādhānaṃ

na karonteva. Bhūmito, pana ārammaṇato vā nānājātikatā nāma natthīti parittakusalakiriyā mahaggatakusalakiriyānaṃ, saṅkhārārammaṇaṅca kusalaṃ nibbānārammaṇassa āsevanapaccayo hotiyeva. Svāyaṃ “kusalo dhammo kusalassa, akusalo dhammo akusalassa, abyākato dhammo abyākatassa āsevanapaccayena paccayo”¹ti¹ tidhāva vutto. Abyākataggahaṇena āvajjanavajjitā kiriyadhammā gahitā.

606. **Cittapayogo** cittakiriyā, āyūhananti attho. Yathā hi kāyavacīpayogo viññatti, evaṃ cittapayogo cetanā. Tena hi sā uppannakiriyatāvisiṭṭhe santāne sesapaccayasamāgame pavattamānānaṃ vipākakaṭattārūpānampi teneva santānavisesena kiriyābhāvena upakārikā hoti. Tassa hi kiriyābhāvassa pavattattā tesam pavatti, na aññathā. Sahajātānaṃ pana āyūhanakiriyābhāvena pavattamānā upakārikāti kiṃ vattabbaṃ. Kammanti ca cetanākammameva adhippetam. Na hi cetanāsampayuttaṃ kammaṃ abhijjhādi kammaṃpaccayo hoti. Satipi vipākadhammabhāve cetanāvajjānaṃ atāmsabhāvattā vipākāpi cetanā sahajātakammaṃpaccayo hotiyeva, svāyaṃ kammaṃpaccayo jātivasena catubbidhoti sabbaṃ vattabbaṃ.

607. “**Nirussāhasantabhāvenā**”¹ti etena sa-ussāhehi vipākadhammadhammehi kusalākusalehi sārammaṇādibhāvena sadisānampi asadisāṃ vipākabhāvaṃ dasseti. So hi vipākānaṃ payogena asādhetaḥḥatāya payogena, aññathā vā sesapaccayesu siddhesu kammaṃsa kaṭattā eva sījjanato nirussāho santabhāvo hoti, na kilesavūpasantabhāvo. Tathāsantabhāvato eva hi bhavaṅgādayo duviññeyyā. Pañcadvārepi hi javanappavattiyā rūpādīnaṃ gahitatā viññāyati, abhinipātasampañcchanasantīraṇamattā pana vipākā duviññeyyā eva. **Nirussāhasantabhāvāyāti** nirussāhasantabhāvattāya. Etena tappaccayavantānaṃ avipākānampi rūpadhammānaṃ vipākānukūlaṃ pavattim dasseti. Pavatteti-ādī pañhāvāranayaṃ gahetvā vuttaṃ. Paṭiccavāre pana “vipākā

1. Abhi 8. 153, 154 piṭṭhesu.

cattāro khandhā arūpino aññamaññaṃ vipākapaccayo”ti-ādinā¹ āgatā. Ettha ca yesaṃ ekantena vipāko vipākapaccayo hoti, tesam vasena nayadassanaṃ katanti daṭṭhabbaṃ. Na hi āruppe kāmarūpabhūmīsu viya vipāko rūpassa paccayo hoti.

608. Satipi janakabhāve upatthambhakattaṃ āhārānaṃ padhānakiccanti āha “**rūpārūpānaṃ upatthambhakattena**”²ti. Upatthambhakattañhi satipi janakatte arūpīnaṃ āhārānaṃ, āhārajarūpasamuṭṭhāpakarūpāhārassa ca hoti. Asatipi catusamuṭṭhānikarūpūpatthambhakarūpāhārassa, asati pana upatthambhakatte āhārānaṃ janakattaṃ natthīti upatthambhakattaṃ padhānaṃ. Atha vā janayamānopi āhāro avicchedavasena upatthambhento janetīti upatthambhanabhāvo eva āhārabhāvoti “**upatthambhakattena**”²ti vuttaṃ. Keci pana “rūpāhāro attanā janitassa āhārapaccayo na hoti, aññaena janitassa hoti, tasmā “**upatthambhakattena**”²ti vuttan”ti vadanti. Taṃ “āhāro rūpassa paccayo honto āhārapaccayo³ na hotīti viruddhametan”ti apare nānujānanti. Rūpāhāro cettha rūpadhammānaṃ eva āhārapaccayo hoti. Arūpāhārā pana rūpadhammānampi āhārapaccayo honti. Tañca kho na kevalaṃ cittasamuṭṭhānānaṃ rūpānameva, atha kho kadāci kaṭattārūpānampīti dassetuṃ “**pañhāvāre panā**”ti-ādi vuttaṃ.

609. **Adhipatiyaṭṭhena**ti ettha na adhipatipaccayadhammānaṃ viya pavattinivārake abhibhavitvā pavattanena garubhāvo adhipatiyaṭṭho, atha kho dassanādikicesu cakkhuviññāṇādīhi, jīvane kammajarūpehi arūpadhammehi ca jīvantehi, manane sampayuttadhammehi, sukhitādibhāve sukhitādīhi, adhimokkhapaggahū paṭṭhānāvikkhepapajānesu, “anaññātaṃ ñassāmī”ti pavattiyāṃ ājānane, aññātāvibhāve ca saddhādisahajātehīti evaṃ taṃtaṃkicesu cakkhādipaccayehi dhammehi cakkhādīnaṃ anuvattanīyatā. Tesu hi kicesu cakkhādīnaṃ issariyaṃ, tappaccayānañca tadanuvattanena tattha pavattī. Kasmā panettha itthipurisindriyadvayaṃ na gahitaṃ, nanu cetampi liṅgādīhi anuvattīyatīti? Saccam anuvattīyati, na pana paccayabhāvato. Yathā hi

1. Abhi 8. 7 piṭṭhe Paṭṭhāne.

2. Upatthambhakaṭṭhena (Ka)

3. Āhārapaccayo (Syā, Ka)

jīvitāhārā yesaṃ paccayā honti, tesam anupālaka-upatthambhakā, atthi-avigatapaccayabhūtā ca honti, na evaṃ itthipurisabhāvā līṅgādīnaṃ kenaci pakārena upakārakā honti. Yato paccayā siyūṃ, kevalaṃ pana yathāsakehi eva paccayehi pavattamānānaṃ līṅgādīnaṃ yathā itthi-ādiggahaṇassa paccayabhāvo hoti, tato aññenākārena taṃsahitasantāne appavattito līṅgādīhi anuvattanīyatā, indriyatā ca tesam vuccati. Tasmā na tesam indriyapaccayabhāvo vutto. **Cakkhā dayo arūpadhammānaṃyevāti** ettha sukhindriyadukkhindriyānipi cakkhādiggahaṇena gahitānīti daṭṭhabbāni.

610. Lakkhaṇārammaṇūpanijjhānabhūtānaṃ vitakkādīnaṃ vitakkanādivasena ārammaṇaṃ upagantvā nijjhānaṃ pekkhanaṃ, cintanaṃ vā vitakkādīnaṃyeva āveṇiko byāpāro **upanijjhāyanattho**. “Ṭhapetvā dvipaṇcaviññāṇe sukhadukkhavedanādvayan”ti vatvāpi **“satta jhānaṅgāni”**ti vacanena ajhānaṅgānaṃ upekkhācittakaggatānaṃ nivattanaṃ katanti daṭṭhabbāni. Yadi evaṃ “satta jhānaṅgāni”ti eteneva siddhe **“ṭhapetvā sukhadukkhavedanādvayan”**ti kasmā vuttam? Vedanābhedesu pañcasu sukhadukkhadvayassa ekantena ajhānaṅgabhāvadassanatthaṃ jhānaṅgaṭṭhāne niddiṭṭhattā, satipi vā jhānaṅgavohāre vedanābhedadvayassa ekantena jhānapaccayattābhāvadassanatthaṃ. Upekkhācittakaggatānaṃ pana yadipi jhānapaccayattābhāvo atthi, najhānapaccayabhāvo pana natthīti sabbānipi satta jhānaṅgānīti ettha gahaṇaṃ kataṃ. Tattha **“sabbānīpi”**ti vacanaṃ **sabbakusalādivhedasaṅgaṇhanatthaṃ**, na pana sabbacittuppādagatasāṅgaṇhanatthanti daṭṭhabbāni. Yesaṃ pana “ṭhapetvā dvipaṇcaviññāṇe vedanāttayan”ti pāṭho, tesam yathāvutto vicāro cittakaggatāvaseneva veditabbo.

611. **Yato tato vāti**¹ sammā vā micchā vāti attho. Pañhāvāre panāti-ādi yadipi paccayaniddese taṃsamuṭṭhānaggahaṇena so attho nāpito eva, pañhāvāre pana sarūpeneva gahitoti dassanatthaṃ vuttam. **Ete pana dvepi -pa- na labbhanti** “yathāsāṅkhyānaṃ”ti vacanaseso veditabbo. **Paṭṭhānatthakathāyaṃ** pana “dvepi jhānamaggapaccayā ahetukacittesu nā labbhanti”²ti vuttam. Tenassa kathamavirodhoti?

1. Yato vā tato vā (?)

2. Abhi-Ṭṭha 3. 351 piṭṭhe.

Adhippāyavasena. Ayañhi tattha adhippāyo—ahetukacittesu eva jhānamaggapaccayā na labbhanti, na sahetukacittesūti sahetukacittesu alābhābhāvadassanattamaṃ vuttaṃ, na sahetukacittesu lābhābhāvadassanattanti. Evañhi atthe gayhamāne sahetukacittesu katthaci kassaci lābho na nivāritoti viññāyati. Tena savitakkāhetukacittesu jhānapaccayassa sambhavo anuññāto hoti. Tattha hi yena alābhena dhammasaṅgaṇiyaṃ manodhātu-ādīnaṃ saṅghasunñatavāresu jhānaṃ na uddhaṭaṃ, taṃ alābhaṃ sandhāya jhānapaccayassapi sahetukacittesu alāto vutto. Yathā hi sahetukacittuppādesu vitakkādīnaṃ saha jāte saṅkaḍḍhitvā ekattagatabhāvakaraṇaṃ upanijjhāyanabyāpāro balavā, na tathā sahetukacittuppādesūti. Idha pana dubbalampi upanijjhāyanaṃ yadi kiñcimattampi atthi, na tena upakāra katā na hotīti savitakkāhetukacittesupi jhānapaccayaṃ anujānantaena **“ete pana dvepi jhānamaggapaccayā dvipaṇcaviññāṇāhetukacittesu na labbhanti”**ti vuttaṃ. Paccayakathā nāma samantapaṭṭhānanissitā, na dhammasaṅgaṇinissitāti.

612. Samaṃ avisamaṃ, sammā, saha vā pakārehi yuttatāya ekībhāvūpagamena viya upakāra katā sampayuttapaccayatā. Kā pana sā pakārehi yuttatāti āha **“ekavattuka-ekārammaṇa-ekuppādekanirodhasaṅkhātenā”**ti. Tattha ye ekavattukā, te sampayuttāti ettake vuccamāne avinibbhogarūpesu ekaṃ mahābhūtaṃ sesamahābhūtopādārūpānaṃ nissayapaccayo hoti, tena tāni ekavattukāni, cakkhādīnissayabhūtāni vā bhūtāni ekaṃ vatthu etesu nissitanti ekavattukānīti kappentassa tesaṃ sampayuttatāpatti siyāti tannivāraṇattamaṃ ekārammaṇaggahaṇaṃ. Ye ekavattukā, ekārammaṇā ca, te sampayuttāti evampi cuti-āsannānaṃ sampañicchanasantīraṇādīnaṃ sampayuttatā āpajjeyyāti ekuppādaggaṇaṃ. Ye ekavattukekārammaṇekuppādā, te sampayuttāti kiṃ pana nānānirodhāpi evaṃtividhalakkhaṇā honti, udāhu ekanirodhā evāti vicāraṇāyaṃ ekanirodhā eva evaṃlakkhaṇā hontīti dassanattamaṃ **“ekanirodhā”**ti vuttaṃ.

Paṭilomato vā ekanirodhā sampayuttāti vuccamāne ekasmiṃ khaṇe nirujjhamānānaṃ rūpārūpadhammānaṃ sampayuttatā āpajjeyyāti,

“ekuppādā”ti vuttaṃ. Evampi avinibbhogarūpānaṃ atthi ekuppādekanirodhatāti tesampi sampayuttatā āpajjeyyāti tannipāraṇattham ekārammaṇaggahaṇaṃ. Ye ekārammaṇā hutvā ekuppādekanirodhā, te sampayuttāti ayañca nayo ekavattukesu eva labbhati, na nānavattukesuṭi dassanattam ekavattukaggahaṇaṃ. Ye ekavattukekārammaṇe kuppādekanirodhā, te sampayuttāti pañcavokārabhavāpekkhāya cetam ekavattukaggahaṇaṃ. Āruppe pana vatthueva natthīti kuto ekavattukaggahaṇassa avasaro.

613. Aññamaññaṃ sambandhatāya yuttānampi samānānaṃ vippayuttabhāvena viśamsaṭṭhatāya nānattūpagamena upakārakatā vippayuttapaccayatā. Ayañca vippayuttatā na sampayuttapaccayatāya viya¹ aññamaññaṃ paccayapaccayuppannadhammasena gahetabbā, atha kho viśumyeva. Tattha hi arūpadhammānaṃ samānajātiyatāya samadhuraṃ, idha rūpārūpadhammānaṃ vijātiyatāya vidhuraṃ. Tene vuttaṃ “yuttānampi -pavippayuttapaccayatā”ti. Na hi vatthusahajātapacchājātavasena ayuttānaṃ rūpādīnaṃ ārammaṇādibhāvena upakārakānaṃ vippayuttānampi vippayuttapaccayatā atthi. Yathā hi “vatthu khandhānaṃ vippayuttapaccayena paccayo, sahajātā kusalā khandhā cittasamuṭṭhānānaṃ rūpānaṃ, pacchājātā kusalā khandhā purejātassa imassa kāyassa vippayuttapaccayena paccayo”ti-ādi² vacanato vatthunā, sahajātapacchājātavasena ca yuttānaṃ atthi vippayuttapaccayabhāvo, na evaṃ ayuttānaṃ atthīti. Yadi evaṃ rūpānaṃ rūpehi kasmā vippayuttapaccayo na vuttoti? Rūpānaṃ rūpehi satipi avinibbhoge sampayogo viya vippayogo natthīti na tesam vippayuttapaccayatā. Vuttañhi “catūhi sampayogo, catūhi vippayogo”ti³. Sampayujjamānānañhi arūpānaṃ rūpehi, rūpānañca tehi siyā sampayogāsankāti tesam aññamaññaṃ vippayuttapaccayatā vuttā. Rūpānaṃ pana rūpehi sampayogo natthīti na tesam vippayuttapaccayatā vuttā.

Rūpino dhammā arūpīnaṃ dhammānaṃ, arūpinopi rūpīnanti ettha arūpaggahaṇaṃ catunnaṃ khandhānaṃ vasena veditabbaṃ. Arūpadhammesu hi cattāro eva khandhā sahajātapurejātānaṃ rūpadhammānaṃ vippayuttapaccayā honti. Nibbānaṃ pana

1. Na sampayuttapaccayatā viya (?) 2. Abhi 8. 159 piṭṭhe Paṭṭhāne. 3. Abhi 3. 2 piṭṭhe.

yathā arūpadhammānaṃ sampayuttapaccayo na hoti, evaṃ rūpadhammānaṃ vippayuttapaccayo na hoti. “Catūhi sampayogo, catūhi vippayogo”¹ hi vuttam. Tasmā arūpadhammesu catunnaṃ khandhānameva vippayuttapaccayatā. Vuttaṅca **pañhāvāre** “sahajāta kusalā khandhā cittasamuṭṭhānānaṃ rūpānaṃ vippayuttapaccayena paccayo”²ti-ādi². **Rūpino dhammā**ti cetam hadayavatthuno ceva cakkhādīnaṅca vasena veditabbaṃ. Rūpadhammesu hi cha vatthūniyeva arūpakkhandhānaṃ vippayuttapaccayo. Rūpāyatanādayo pana ārammaṇadhammā kiñcāpi vippayuttadhammā, vippayuttapaccayo pana na honti. Kim kāraṇā? Sampayogāsaṅkābhāvato. Arūpakkhandhā hi cakkhādīnaṃ vatthūnaṃ abbhantarato nikkhamantā viya uppajjantīti siyā tattha āsaṅkā “kim nu kho ime imehi sampayuttā, udāyu vippayuttā?”³ti. Ārammaṇadhammā pana vatthusannissayena uppajjamānānaṃ ārammaṇamattaṃ hontīti natthi tesu sampayogāsaṅkāti na te vippayuttā. Sampayogāsaṅkāsbhāvato vatthūniyeva vippayuttapaccayā honti. Vuttampi cetam **pañhāvāre** “vatthu kusalānaṃ khandhānaṃ vippayuttapaccayena paccayo, vatthu akusalānaṃ khandhānaṃ, cakkhāyatanānaṃ cakkhuvīññādhātuyā”⁴ti-ādi². Svāyaṃ vippayuttapaccayo “sahajātapacchājātato kusalena abyākatam, tathā akusalena abyākatam, sahajātapurejātapacchājātato abyākatena abyākatam, vatthupurejātato abyākatena kusalam, tathā akusalanti kusalamūlamekam, akusalamūlamekam, abyākatamūlāni tīṇī”⁴ti pañcavidho veditabbo.

614. **Paccuppannalakkhaṇenā**ti paccuppannasabhāvena. Tena “atthi me pāpakammaṃ katam³, atthi puggalo attahitāya paṭipanno”⁴ ca evamādīsu vuttam nibbattitūpalabbhamānatālakkhaṇam atthibhāvaṃ nivāreti. Satipi janakatte upatthambhakattappadhānā atthibhāvena upakāratātī āha “**upatthambhakattenā**”⁴ti. Idaṅca upatthambhakattam vatthārammaṇasahajātādīnaṃ sādharmaṇam atthibhāvena upakārakattanti daṭṭhabbaṃ. “Sattadhā mātikā nikkhattā”⁴ti vuttamattham pāliya eva dassetuṃ “yathāhā”⁴ti-ādi vuttam. Tattha “**cattāro khandhā arūpino**”⁴ti-ādīnā sahajātavasena

1. Abhi 3. 2 piṭṭhe.

3. Ma 3. 203 piṭṭhe.

2. Abhi 8. 159 piṭṭhe Paṭṭhāne.

4. Abhi 3. 109 piṭṭhe.

atthipaccayo dassito, “**cakkhāyatanan**”ti-ādinā purejātavasena, “**yaṃ rūpaṃ nissāyā**”ti-ādinā saha-jātapurejātavasena. Evamayam pāṭho saha-jātapurejāta-atthipaccayavaseneva āgato.

Aññattha pana tato aññathāpi āgatoti dassetum “**pañhāvāre panā**”ti-ādimāha. Tam tena pacchājātāhārindriyavasenāpi atthipaccayattam vibhāveti. Purimapāṭhe pana sāvasesā desanā katāti vedittabbanṃ. Sati ca yesam paccayā honti, tehi ekato, puretaramṃ, pacchā ca uppannabhāve saha-jātādipaccayattābhāvato āhāro, indriyañca saha-jātādibhedam na labhanti, tadabhāvo ca tesam dhammasabhāvavasena daṭṭhabbo. Svāyam atthipaccayo “saha-jātato kusalena kusalamṃ, saha-jātapacchājātato kusalena abyākataṃ, saha-jātato eva kusalena kusalābyākatanti kusalamūlā tayo, tathā akusalāmūlā. Saha-jātapurejātapacchājātāhārindriyato pana abyākataṃ, saha-jātapurejātapacchājātāhārindriyato akusalāñca abyākatañca kusalassa, saha-jātapurejātapacchājātāhārindriyato kusalāñca abyākatañca abyākatassa, saha-jātapurejātapacchājātāhārindriyato akusalāñca abyākatañca akusalassa, saha-jātapurejātapacchājātāhārindriyato akusalāñca abyākatañca abyākatassā”ti evam terasavidho. Saṅkhepena kusalākusalavipākakiriyarūpavasena pañcavidho atthipaccayo, na nibbānam. Yo hi atthibhāvābhāvena anupakārako atthibhāvam labhitvā upakārako hoti, so atthipaccayo hoti. Nibbānañca nibbānārammaṇānam na attano atthibhāvābhāvena anupakāraṃ hutvā atthibhāvalābhena upakāraṃ hotīti, uppādādiyuttānam vā natthibhāvopakāratāvīruddho upakārabhāvo atthipaccayatāti, na nibbānam atthipaccayo hoti.

615. Ārammaṇe phusanādivasena pavattamānānam phassādīnam anekesam sahabhāvo natthīti ekasmim phassādisamudāye sati dutiyo na hoti, asati pana hotīti tena natthibhāvena upakāratā **natthipaccayatā**. Satipi purimataracittānam natthibhāve na tena tāni natthibhāvena upakārakāni, anantameva pana attano atthibhāvena

pavatti-okāsaṃ alabhamānaṃ natthibhāvena okāsaṃ dadamānaṃ viya upakāraṃ hotīti “**pavatti-okāsadānena upakāraṃ**”ti āha. Paṭuppannānanti paccuppannānaṃ.

“**Te-evā**”ti etena natthivigatapaccayānaṃ dhammato visesā bhāvamāha. Evaṃ santepi abhāvamattena upakāraṃ okāsadānaṃ natthipaccayatā, sabhāvavigamena appavattamānaṃ sabhāvavigamena upakāraṃ vigatapaccayatā. **Natthitā** ca nirodhānantarā suññatā, **vigatatā** nirodhappattatī ayametesā viseso.

Atthipaccayadhammā eva cāti ca-saddo lampiṇḍanatto. Tena na kevalaṃ natthivigatapaccayā eva dhammato avisiṭṭhā, atha kho atthivigatapaccayāpīti imamattaṃ dīpeti. Yadi pime paccayā dhammato avisiṭṭhā, tathāpi atthitāya sasabhāvatāya upakāraṃ atthipaccayatā, sabhāvavigamena nirodhassa appattiyā upakāraṃ avigatapaccayatāti paccayabhāvaviseso dhammāviseṣepi vedītabbo. Dhammānaṃhi samatthāvisesaṃ sabbāni yāthāvato abhisambujjhivā bhagavatā catuṅsatipaccayavisesā vuttāti dhammassāmihi saddhāya “evaṃ visesā ete dhammā”ti sutamayaññaṃ uppādetvā cintābhāvanāmayehi tadabhisamayāya yogo karaṇīyo.

Ettha ca ārammaṇa-anantarasamanantara-upanissayapurejāta-āsevasampayuttanattivigatapaccayā arūpadhammānaṃeva, pacchājātapaccayo rūpadhammānaṃeva, itare cuddasa rūpārūpadhammānaṃ.

Hetu-

anantarasamanantarāsevanapacchājātakammavipākajhānamaggasampayutta natthivigatapaccayā arūpadhammā eva, purejātapaccayo rūpameva, ubhayaṃ ārammaṇūpanissaye ṭhapetvā sesā, te dve paññattisabhāvāpi honti.

Anantarasamanantarāsevananattivigatapaccayā atītā eva. Ārammaṇārammaṇādhipati ārammaṇūpanissayā tikālikā, kālavinimuttā ca. Kammāpaccayo atītapaccuppannavasena dvikāliko. Sesā pañcadasa paccuppannāva.

Tathā anantarasamanantara-anantarūpanissayapakatūpanissayāsevanapaccayā nānākkhaṇikakammāpaccayo, natthivigatapaccayā cāti ime paccayā janakā eva, na upatthambhakā. Pacchājātapaccayo upatthambhako eva, na

janako. Sesā janakā ca upatthambhakā cāti ayampi viseso veditabbo.

Avijjāpaccayāsaṅkhārāpadavittahārakathāvaṇṇanā

616. **Paccayesūti** niddhāraṇe bhummaṃ. **Duvidhā** dvippakārena. **Anekadhāti** sattarasadhā ārammaṇapaccayādivasena.

Abhiññācittenti cetopariyapubbenivāsa-anagataṃsaññāsaṅkhātāhi abhiññāhi sahadatācittena. **Samohacittajānanakāle**¹ti paresaṃ, attano ca samohassa cittassa jānanakāle. Avijjāpubbaṅgamā akusalappavattiyo yā kāci vipattiyo, sabbā tā mohamūlikāti ca avijjāya ādīnavadassanena **avijjāsamatikkamatthāya** vivatṭābhipatthanāyāti attho. **Dvinnampi tesam**² puññābhisāṅkhārānaṃ. **Avijjā sammūḷhattāti** bhavādīnavappaṭicchādikāya avijjāya sammūḷhattā. **Tāneva puññānti** tāneva yathāvuttāni kāmāvacararūpāvacarapuññāni. Upanissayapaccayena paccayo hotīti sambandho.

Rāgādīnanti rāgadiṭṭhivicikicchuddhaccadomanassānaṃ. Avijjāsampayuttatā rāgādīnaṃ rāgādi-assādanakālesu avijjāṃ ārabba uppatti veditabbā. Garuṃ katvā assādanaṃ rāgadiṭṭhisampayuttāya eva avijjāya yojetabbaṃ. Assādanañca rāgo, tadaviyuttā ca diṭṭhīti assādanavacaneneva yathāvuttaṃ avijjāṃ garuṃ karontī diṭṭhī ca vuttāti veditabbā. Rāgādīhi ca pāḷiyāṃ sarūpato vuttehi taṃsampayuttasaṅkhārassa avijjārammaṇāditaṃ dasseti. **Anādīnavadassāvinoti** paṇātipātādīsu na ādīnavadassino. Avijjāya anārammaṇassa, paṭhamajavanassa ca ārammaṇādhipati-anantarādipaccayavacanesu avuttassa, vuttassa ca sabbassa saṅgaṇhanatthaṃ “**yaṃ kiñci**”ti āha.

Vuttanayenti samatikkamabhavapatthanāvasena puññābhisāṅkhāre vuttanayena.

617. **Kim panāyanti**-ādīnā codakassa ayamadhippāyo—“avijjāpaccayā saṅkhārā sambhavanti”ti ettha sambhavanti evāti avadhāraṇaṃ na

1. Samohacittāṃ jānanakāle (Ka)

2. Dvinnampi nesaṃ (Sya, Ka)

yujjati, avasesapaccayasamavāyābhāve saṅkhārānaṃ sambhavābhāvato. Tathā saṅkhārā evāti avadhāraṇampi na yujjati. Kasmā? Aññesaṅca paccayuppannadhammānaṃ sambhavassa tato icchitabbattā. Vākyassa avadhāraṇaphalattā avijjāpaccayā eva saṅkhārā sambhavantīti avadhāraṇe gayhamānepi ayaṃ doso. Kasmā? Yasmā lobhādīkammanidāna-upādānavatthārammaṇamanasikārādayo aññepi paccayā labbhanti yevāti. Tattha **ekāti** asahāyā, kāraṇantarānirapekkhāti attho. **Aññepi paccayā** sahakārikāraṇabhūtā. Dosamettha vattukāmo codako pucchātīti ñatvā ācariyo āha “**kiṃ panettā**”ti. Ettha avijjāya paccayantarena rahitabhāve ca sahitabhāve ca kiṃ pana vattabbaṃ, asamattā te codanā, avasiṭṭhaṅca tāva kathehīti vuttaṃ hoti. **Ekakāraṇavādo āpajjati**ti dosappasaṅgo vutto. Anīṭṭho hi ekakāraṇavādo sabbattha sabbakālaṃ sambhavāpattito, ekasadisāsabhāvāpattito ca.

Yasmā ekaṃ na ekatoti-ādīsu tīsu pakāresu avijjamānesu pārisesena anekato anekamevāti etasmim catutthe eva pakāre vijjamāne ekahetuphaladīpane attho atthi, tasmā na nupapajjati upapajjatiyeva. Ekaṃ phalaṃ ekato natthi, anekampi ekato natthi. Anekatopi ekaṃ phalaṃ no atthīti sambandho.

Ekekahetuphaladīpananti “avijjāpaccayā saṅkhārā”ti ekahetudīpanaṃ, “saṅkhārapaccayā viññāṇaṃ”ti ekaphaladīpananti evaṃ tattha tattha ekekahetuphaladīpanaṃ kataṃ.

Veneyyānaṃ anurūpatoti veneyyānaṃ ajjhāsayaṃ anurūpato. Ekasseva hetuno, phalassa ca dīpanā satthu desanāvilāsato vā veneyyapuggalānaṃ ajjhāsayaṃ vā. Tadubhayassa panettha kāraṇaṃ tattha tattha desetabbassa atthassa padhānatā, pākāṭatā, asādāhāraṇatā ca. Desanāvilāsappattā ca buddhā bhagavanto te desetabbe atthe bahūsupi pariyāyesu labbhamānesu yathārucitaṃ gahetvā dhammaṃ desenti, sā **desanāvilāsānurūpatā**. Tattha pana yena pariyāyena ye veneyyā bujjhanti, teneva tesāṃ bodhanaṃ, sā **veneyyajjhāsayanurūpatā**.

Yathāphassaṃ vedanāvavattānāti “sukhavedanīyaṃ bhikkhave phassaṃ paṭicca uppajjati sukhā vedanā”¹ti-ādinā,¹ “cakkhuñca paṭicca rūpe ca uppajjati cakkhuviññānaṃ, tiṇṇaṃ saṅgati phasso, phassapaccayā vedanā”²ti-ādinā² ca sukhavedanīyaphassādi cakkhusamphassādi-anurūpena sukhavedanādicakkhusamphassajāvedanādīnaṃ vavattānato. Samānesupi hi cakkhurūpādīsu phassavasena sukhādivipariyāyābhāvato, samānesu rūpamanasikārādīsu cakkhādisaṅghaṭṭanavasena cakkhusamphassajādivipariyāyābhāvato, aññapaccayasā maññepi cakkhusamphassavasena sukhādicakkhusamphassajādīnaṃ oḷārikasukhumādisaṅkarābhāvato cāti attho. Yathāvuttaphassassa sukhādīnaṃ aviparīto paccayabhāvo eva **yathāvedanaṃ phassavavattānaṃ**. Kāraṇaphalavisesena vā phalakāraṇavisesanicchayo hotīti ubhayatthāpi nicchayo vavattānanti vutto.

Kammādayoti kamma-āhāra-utu-ādayo apākaṭā semhapaṭikārena rogavūpasamanato. Semhassa mandabhāvādinā ca semhaṃyeva pākaṭaṃ kāraṇaṃ. Ayamidha avijjā saṅkhārānaṃ hetubhāvena dīpitāti sambandho. **Assādānupassino taṇhā pavaḍḍhatīti vacanā**ti “saṃyojanīyesu bhikkhave dhammesu assādānupassino taṇhā pavaḍḍhati, taṇhāpaccayā upādānaṃ, upādānapaccayā bhavo”³ti³ iminā suttena taṇhāya saṅkhārakāraṇabhāvassa vuttatīti attho. Puna tassāpi avijjāya kāraṇanti dassanattamaṃ “**avijjāsamudayā āsavasamudayoti ca vacanā**”³ti āha. Taṇhā vā caturupādānabhūtā kāmāsavadiṭṭhāsavā ca saṅkhārassa kāraṇanti pākaṭā avijjāhetukāti suttadvayenāpi avijjāya pākaṭaṃ saṅkhārānaṃ kāraṇabhāvameva dasseti. “Assādānupassino”³ti³ hi vacanena bhavādīnavappaṭicchādanakiccā avijjā taṇhāya kāraṇanti dassitā hoti. Yasmā avidvā, tasmā puññābhisaṅkhārādike abhisaṅkharotīti avijjāya saṅkhārakāraṇabhāvassa pākaṭattā aviddasubhāvova saṅkhārakāraṇabhāvena vutto. Khīṇāsavassa saṅkhārābhāvato, asādhāraṇattā ca puññābhisaṅkhārādīnaṃ sādharāṇakāraṇāni⁴

1. Saṃ 2. 332 piṭṭhe.

2. Ma 1. 158, 326; Ma 3. 328, 332, 333; Saṃ 1. 301, 302; Saṃ 2. 261; Abhi 4. 248, 249 piṭṭhādīsu.

3. Saṃ 1. 312, 315 piṭṭhesu.

4. Sādharāṇāni (Ka)

vatthārammaṇādīnī puññabhavādīnavappaṭicchādikā avijjā
puññābhisankhārādīnaṃ asādhāraṇaṃ kāraṇanti vā attho daṭṭhabbo. Eteneva
“avijjāpaccayā saṅkhārā, saṅkhārapaccayā viññāṇaṃ”¹ ettha pana
padhānattā, pākaṭattā, asādhāraṇattāti
ekekahetuphaladīpanaparihāravacanena sabbattha “phassapaccayā vedanā,
vedanāpaccayā taṇhā”²ti-ādīsu bodhaneyyajjhāsayasena dhammassa
bodhanasaṅkhātāṃ payojanaṃ veditabbāṃ.

618. “**Ekantāniṭṭhaphalāyā**”²ti etena viruddhabhāvaṃ, “sāvajjāyā”²ti etena
vijātiyabhāvaṃ avijjāyā joteti. Puññāneñjābhisankhārā hi iṭṭhavipākātāya,
anavajjasabhāvatāya ca tassā viruddhā, vijātiyā cāti. **Kathaṃ na yujjissatī-**
ādi samādhānaṃ, tena yvāyaṃ ekantāniṭṭhaphalātādihetupadeso, tassa
anekantikataṃ dasseti. Ayaṃ hettha adhippāyo—yāyaṃ tayā codanā “evaṃ
santepī”²ti-ādīnā katā, sā yuttā vipākāṃ pati. Na hi anīṭṭhavepakkaṃ
kāraṇaṃ iṭṭhaṃ phalati, iṭṭhavepakkaṃ vā anīṭṭhaṃ. Yasmā panettha
paccayuppannadhammānaṃ paccayabhāvalakkhaṇadhammānaṃ dhammāta
adhippetā, tatra cāyaṃ niyamo natthi vicittarūpattā tassāti. Tenāha
“**viruddho cā**”²ti-ādi.

Tattha **dhammānanti** sabhāvadhammānaṃ. **Ṭhānanti** avatṭhānaṃ.
²Tasmā **ṭhānaviruddhoti**² atthitāvīraddho. Keci pana “paṭisandhi-ādīni
ṭhānāni”²ti vadanti, evaṃ sati “purimacittaṃ pacchimacittassa ṭhānaviruddho
paccayo”²ti nayidaṃ ekantikaṃ siyā. Bhavaṅgampi hi bhavaṅgassa
anantarapaccayo, javanaṃ javanassa, na ca sippādīnaṃ paṭisandhi-
ādīṭṭhānaṃ atthi, tasmā na taṃ idha adhippetāṃ. **Kammaṃ rūpassa**
namanaruppanavirodhā, sārammaṇānārammaṇādivirodhā **ca**
sabhāvaviruddho paccayo. Khīrādīni dadhi-ādīnaṃ madhurambilarasā
disabhāvavirodhā. Avijānanakicco āloko vijānanakiccassa **viññāṇassa.**
Amadanakiccā ca **gulādayo** madanakiccassa **āsavassa.**

Golomā’vilomādīti-ādīsu golomā’vilomāni dubbāya, **avīti** ca rattā eḷakā
veditabbā. **Visānaṃ** sarassa. **Dadhītilapīṭṭhaguḷāni** bhūtiṇakassa. Sevālaṃ
taṇḍuleyyakassa, kharavaḷavā assatarassāti evamādi **ādi**-saddena saṅgahito.
Yasmā vipākā eva na, tasmā

1. Ma 3. 109; Saṃ 1. 243; Khu 1. 77; Vi 3. 1; Khu 10. 28 piṭṭhādīsu.

2-2. Ṭhānaviruddhoti (?)

dukkhavipākāyapi avijjāya adukkhavipākānaṃ puññāneñjābhisaṅkhārānaṃ paccayattaṃ na na yujjatīti attho.

Tadavipākattepi sāvajjatāya tadaviruddhānaṃ, taṃsadisānañca apuññābhisaṅkhārānameva paccayo, na itaresanti etassa pasaṅgassa nivāraṇatthaṃ “viruddho cāviruddho ca, sadisāsadiso tathā. Dhammānaṃ paccayo siddho”ti vuttaṃ. Tasmā tamatthaṃ pākaṭaṃ karonto “**iti ayam avijjā**”ti-ādimāha.

619. **Sabbattha khandhānaṃ bhedo maraṇanti cutiṃ aggaṇhantoti** idha cuti nāma tattha tattha bhavādīsu rūpādīnaṃ khandhānaṃ maraṇasaññito carimo bhedoti yāthāvato a jānanto. **Sattassa** sato vijjamānasseva. **Dehantarasaṅkamaṇaṃ** aññena kāyena samāgamo.

Sabbattha khandhānaṃ pātubhāvoti tattha tattha bhavādīsu khandhānaṃ paṭhamābhiniḃbatti. **Navasarīrapātubhāvoti** idha jiṇṇassa sarīrassa nikkhepe paralokapariyāpannessa navakāyassa uppādo. Yatheke vadanti—

“Vatthāni jiṇṇāni yathā pahāya,
Navāni gaṇhāti naro parāni.
Nikkhippa dehaṃ idha jiṇṇamevaṃ,
Gaṇhāti attābhinavaṃ sukhesī”ti.

Ayam sattoti ayamattā, yo sāmī, nivāsī, kārako, vedako cāti adhippeto. **Satto marati, satto upapajjatīti** etthāpi eseva nayo. Tīsupi thānesu **ādi-**saddena issarakuttābrahmakuttādivikappanaṃ saṅgaṇhāti.

Sabhāvalakkhaṇanti ruppanānubhavanādīni,
kakkhaḷaphusaṇādisabhāvameva vā. **Sāmaññalakkhaṇanti** aniccatādīni.
Saṅkhāre attato attaniyatoti rūpādīsu ekaccaṃ attato, tadanñāṃ attaniyato.

Attā jānāti vāti vikappeti kāpilādayo viya. **Na jānāti vāti** kāṇādājīvikādayo viya. Kāṇādopi hi attā sabhāvena na jānāti. Yadā buddhiguṇena saṃyujjati, tadā jānātīti icchatī. **So eva karoti ca kāreti cāti** yo parattha sukhadukkhāṃ anubhavati, so eva puññāpuññaṃ sayam karoti, aññañca kāreti, na aññoti

adhippāyo. **Sanṭhāpentā**¹ti dvi-aṇukādi-uppādanavasena, icchāvasena ca sampādentā. **Soti** attasaññito satto. **Indriyasampannoti** cakkhādīhi indriyehi samannāgato, tena saḷāyatanappavattiṃ dasseti. Sabbañhetam̐ yathāpaccayaṃ pavattamānānam̐ avijjādīnam̐ kiccaṃ attano byāpāram̐ katvā dīṭṭhigatiko vimuyhatīti dassanavasena vuttam̐.

Acchejjasuttāvutābhejjamaṇīnam̐ viya pubbāpariyavavattthānam̐ niyati, niyatiyā, niyati eva vā saṅgati samāgamo niyatisaṅgati, tāya bhāvesu pariṇatā manussadevavihaṅgādibhāvam̐ pattā **niyatisaṅgatibhāvapariṇatā**. Niyatiyā, saṅgatiyā, bhāvasaṅkhātena sabhāvena ca pariṇatā nānappakāratam̐ pattā **niyatisaṅgatibhāvapariṇatā**ti ca attham̐ vadanti.

Etehi ca vikappanehi avijjā akusalam̐ cittaṃ katvā satte puññādīsu saṅkhāresu yattha katthaci pavattatīti imamattham̐ dassento āha “so avijjāya **andhīkato**”ti-ādi. **Paṭipajjatīti** upasaṅkamati.

Apariṇāyakoti arahattamaggasampaṭipādakakalyāṇamittarahito, arahattamaggañāṇavasānam̐ vā ñāṇam̐ samavisamam̐ dassetvā satte nibbānam̐ nayatīti pariṇāyakam̐, tena rahito apariṇāyako. **Dhammam̐ ñatvā**ti sappurisūpassayena catusaccappakāsakam̐ suttādīdhammam̐ ñatvā, maggañāṇeneva vā sabbadhammapavaram̐ nibbānadhammam̐ ñatvā. Tam̐jānanāyattam̐ pana sesasaccattayābhisamayam̐ samānakālampi tam̐ purimakālam̐ viya katvā vuttam̐. **Upasanto carissatīti** aggamaggādhihamena sabbaso avijjūpasamā upasanto sa-upādīsesanibbānadhātuyam̐ ṭhito yāva anupādīsesanibbānadhātupatti, tāva sattānam̐ hitacariyāya attabhāvam̐ pavattento carissati, dīṭṭhadhammasukhavihārehi viharissatīti attho.

Saṅkhārapaccayāviññāṇapadavitthārakathāvaṇṇanā

620. Yathāvuttasaṅkhārapaccayā uppajjamānam̐ tam̐ kammanibbattameva bhavituṃ arahatīti “**bāttimsa lokiyavipākaviññāṇāni saṅgahitāni**”ti āha. **Dhātukathāyam̐** pana vippayuttena saṅgahitāsaṅgahitapadaniddese “saṅkhārapaccayā viññāṇena ye dhammā, saḷāyatanapaccayā phassena ye dhammā, phassapaccayā vedanāya ye dhammā vippayuttā,

te dhammā katihi khandhehi -pa- saṅgahitā? Te dhammā asaṅkhatam khandhato ṭhapetvā ekena khandhena, ekādasahi āyatanehi, ekādasahi dhātūhi saṅgahitā. Katihi asaṅgahitā? Catūhi khandhehi, ekenāyatanehi, sattahi dhātūhi asaṅgahitā”ti¹ vacanato sabbaviññāṇaphassavedanāpariggaho kato. Yadi hi ettha viññāṇaphassavedanā sappadesā siyūm, “vipākā dhammā”ti² imassa viya visajjanam siyā. Tasmā tathā abhidhammabhājanīyavasena saṅkhārapaccayā viññāṇādayo gahitāti adhippāyo veditabbo. Avijjāpaccayā saṅkhāro ca abhidhammabhājanīye³ catubhūmakakusalasaṅkhāro, akusalasaṅkhāro ca vuttoti eso eva dhātukathāyaṃ gahitoti daṭṭhabbo. Bhavo pana dhātukathāyaṃ kammūpapattibhavavisesadassanattam na abhidhammabhājanīyavasena gahito, evaṅca katvā tathā “upādānapaccayā bhavo”ti anuddharitvā “kammabhavo”ti-ādinā⁴ nayena bhavo uddhaṭo.

Lokiyavipākamanoviññāṇameva sandhāyāha “**bāvīsatividham hoti**”ti. **Chahi viññāṇehi**ti yathā-adhikatehi cakkhuvīññāṇādīhi chahi viññāṇehi. Kasmā panettha lokiyavipākaviññāṇasseva gahaṇam katanti āha “**lokuttarāni pana vaṭṭakathāya na yujjanti**”ti. Yadi evam kasmā dhātukathāyaṃ “saṅkhārapaccayā viññāṇena ye dhammā vuppayuttā”ti-ādīsu⁵ lokuttaravipākānampi gahaṇam katanti? Tam yathādhammasāsanattā abhidhammadesanāya **vipākattike**² viya anavasesavipākadhammasaṅgaṇhanavasena vuttam. Suttantadesanā pana yathānulomadesanāti tathā pavattinivattiyo asaṅkarato dassetabbā. Tasmā tadatthasamvaṇṇanāti katvā pavattikathāyaṃ lokiyavipākaviññāṇāniyeva gahitāni. Tenevāha “**vaṭṭakathāya na yujjanti na gahitāni**”ti.

Yathā kataṃ kammaṃ phaladāne samattham hoti, tathā kataṃ “upacitan”ti vuccatīti vipākadānāyogyameva saṅkhāram gaṇhanto “**upacitakammābhāve**”ti āha. Hetu nāma byatirekappadhānanti **abhāva-**ggahaṇam, tena kamme satī bhāvato, asatī abhāvato ayamettha

1. Abhi 3. 90 piṭṭhe.

2. Abhi 1. 1 piṭṭhe.

3. Abhi 2. 145 piṭṭhe.

4. Abhi 3. 12 piṭṭhe.

5. Abhi 3. 66 piṭṭhe.

adhippāyo. Yathā panassa viññāṇassa saṅkhārapaccayatā na siddhā, na evaṃ vipākabhāvo. So pana siddhoti katvā āha “**vipākamhetan**”ti. Tena viññāṇassa vipākabhāvena saṅkhārapaccayatā sādheti. Tassa pana sādhanattham “upacitakammābhāve vipākābhāvato”ti vuttanti taṃ vivaranto “**vipākāñcā**”ti-ādimāha. **Yadi uppajjeyyāti** yadi kammanirapekkho vipāko uppajjeyya. **Sabbesaṃ** sattānaṃ brahmattaṃ upagatānaṃ ghāṇādiviññāṇāni mahāvīpākaviññāṇānīti tassa tassa vipākassa anokāye thitānampi. **Vipākānīti** viññāṇāpekkhāya napumsakaniddeso, sabbavīpākaviññāṇānīti attho.

Saṅkhārā bahū ekūnatimsacetanābhedato, viññāṇāni cabahūni bāttimsavidhattā, na ca sabbato sabbānīti āha “**katarasaṅkhārapaccayā kataraviññāṇanti ce**”ti. “**Viññāṇan**”ti ca idaṃ viññāṇasāmaññaṃ gahetvā vuttaṃ. Kāmaṃ **khandhaniddeseṇi**¹ imāni viññāṇāni niddiṭṭhāni, taṃ pana atisaṅkhittaṃ, na ca tattha nesaṃ saṅkhārapaccayatā vibhāvītāti taṃ pavattiyāṃ, paṭisandhiyaṅca bhavādīsu pavattanākāravasena vitthārato dassetuṃ “**kāmāvacarapuññābhisāṅkhārapaccayā**”ti-ādi āradhmaṃ. **Manoviññāṇeti** niddhāraṇe bhumbaṃ. **Mahāvīpākānīti** viññāṇāpekkhāya napumsakaniddeso. **Mahāvīpākāti** pana pāṭhe manoviññāṇadhātuyoti ānetvā sambandhitabbaṃ.

621. **Yamsāṅkhārapaccayāti** yassa yassa saṅkhārassa paccayabhāvena. **Yaṃ viññāṇanti** “yaṃ yaṃ viññāṇan”ti evaṃ ubhayattha āmeditalopo daṭṭhabbo. “**Hotī**”ti iminā kāraṇābhāve viññāṇassa sabbhāvamattaṃ paveditaṃ, na pavattivisesoti taṃ dassento “**evaṃ pavatti veditabbā**”ti āha. Brahmānampi anīṭṭharūpādi-āpāthagamane akusalavīpākacakkhuvīññāṇādīni kadāci uppajjantīti “**imāni terasa -pa- pavattantī**”ti vuttaṃ. Tattha pañcannaṃ khandhānaṃ vokāro vitthāro etthāti pañcavokāro, so eva bhavo, etasmim **pañcavokārabhave**. Hoti hi bhinnādhikaraṇānampi aññāpadatthasamāso yathā “urasilomo”ti. Atha vā yathāpaccayaṃ pavattamānehi pañcahi khandhehi vokarīyatīti pañcavokāro, so eva bhavoti sabbaṃ pubbe viya.

1. Visuddhi 2. 82 piṭṭhe.

“Pavattiyaññeva¹ pavattantī”ti saṅkhepato vuttamattham vivarituṃ “**kathan**”ti-ādi āradham.

“**Yebhuyyena lobhasampayuttajavanāvasāne**”ti idam paṭighavicikicchuddhaccasampayuttānantaram somanassasahagatassa anuppajjanatoti keci, tam na gahetabham. “Cakkhum assādeti abhinandati, tam ārabha rāgo uppajjati, diṭṭhi uppajjati -pa- vicikicchā uppajjati, uddhaccam uppajjati, akusale niruddhe vipāko tadārammaṇatā uppajjati”ti² vacanato. Iṭṭham ce ārammaṇam, somanassatadārammaṇam na na uppajjatīti. Javanena tadārammaṇaniyame somanassasahagatānantaram somanassasahagatānevasandhāya vuttanti apare, tam vicāretabham upekkhāsahagatakusalākusalajavanānantarampi somanassatadārammaṇassa icchitabbatā. Upekkhāsahagatakiriyājavanānantameva hi somanassatadārammaṇam na icchanti.

Yasmā pana tihetukajavanāvasāne ca kadāci ahetukam tadārammaṇam hoti, tasmā “**yebhuyyenā**”ti vuttam. Yasmā ekacittakkhaṇāyukam javanārammaṇam hoti, tadā tattha ekameva tadārammaṇam hotīti katvā “**sakim vā**”ti vuttanti keci. Apare pana tadārammaṇam nāma javanārammaṇānubhavanakiccam, tam ekacittakkhaṇike tathā āsannabhede ārammaṇe nuppajjati. Tasmā “**sakim vā**”ti idam dirattatirattādi viya vacanasiliṭṭhatāvasena vuttanti veditabham, dvikkhattumeva pana uppajjatīti. “Dirattatirattan”ti³ ettha hi vā-saddassa abhāvā vacanasiliṭṭhatāmattena dirattaggahaṇam katanti yujjati. “Nirantaram tirattadassanattam vā”ti idha pana vā-saddo vikappattho vuttoti sakim eva ca kadāci pavattim sandhāya “**sakim vā**”ti vuttanti daṭṭhabham. Teneva hi **sammohavinodaniyam** sakim tadārammaṇappavattiyā vicāretabbatam dassentena “cittappavattigaṇanāyam pana sabbadvāresu tadārammaṇe dve eva cittavārā āgatā”ti⁴ vuttam.

Tattha **cittappavattigaṇanāyanti** vipākakathāyam balavarūpādi-ārammaṇe vuttam cittappavattigaṇanam sandhāyāha. Tattha hi dveva tadārammaṇuppattivārā

1. Pavattiyampi (Syā, Ka)

3. Vi 2. 27 piṭṭhe.

2. Abhi 8. 134, 135 piṭṭhesu.

4. Abhi-Ṭṭha 2. 145 piṭṭhe.

vuttā. Tadeva hi sandhāya idhāpi vuttaṃ **“abhidhammaṭṭhakathāyaṃ pana tadārammaṇe dve cittavārā āgatā”**ti. Abhidhammaṭṭhakathāyaṃ aniyatārammaṇaṭṭhānakiccā hutvā pavattantī¹ dvāraṃ anāmasitvā eva vuttaṃ, taṃ anantaram parato vuttasahetukavipākaviññāṇānaṃ sadisasaṃvaṇṇanaṃ kātukāmatādhippāyena vuttaṃ. Ahetukadvayādīnaṃ bhavaṅgabhūtānaṃ sayameva dvārattā, cutipaṭisandhibhūtānaṃ bhavaṅgasāṅkhātena, aññena ca dvārena anuppattito niyataṃ, aniyataṃ vā dvāraṃ etesanti na sakkā vattunti.

Ahetukadvayassa pana santīraṇatadārammaṇabhūtassa dvāraṃ labbhati, taṅca aniyatanti tampi gaṇhanto **“aniyatadvārārammaṇaṭṭhānakiccā hutvā pavattanti”**ti āha. Teneva cettha mahāvīpākānampi tadārammaṇabhūtānaṃ dvāraṃ labbhatīti tatthāpi dvāraggahaṇaṃ kataṃ.

Ekassa sattassa pavatto rūpāvacaravipāko pathavīkasiṇādīsu yasmim ārammaṇe pavatto, tato aññasmim tassa pavattī natthīti rūpāvacarānaṃ niyatārammaṇatā vuttā. Itarāni āruppavīpākaviññāṇāni. Niyataṃ avatthukānīti niyatāvattukāni. Kasiṇugghāṭimākāsādīsuyeva ārammaṇesu pavattanato niyatārammaṇāni. Tatrāti pavattiyaṃ. Assāti bāttimsavidhassa vipākaviññāṇassa. **Te te saṅkhārā**ti yathāvuttā puññābhisaṅkhārādīsaṅkhārā. **Kamma**paccayenāti nānākkhaṇīkakkamma paccayena. **Upanissaya**paccayenāti pakatūpanissaya paccayena.

622. Evaṃ pavattiyaṃ viññāṇappavattim dassetvā paṭisandhiyaṃ dassetuṃ **“yaṃ pana vuttan”**ti-ādimāha. Tattha **anurūpāya paṭisandhiyā**ti anurūpena paṭisandhikiccena. Taṃ pana anurūpataṃ sayameva vakkhati. Bhavantarena bhavantarassa sandhānaṃ idha paṭisandhīti taṃ acittakampi atthevāti katvā **“kati paṭisandhiyo”**ti puccham katvāpi **“Kati paṭisandhiccittāni”**ti pucchā katā. **“Kena katthā”**ti kena cittaena kasmim bhava.

Tatthāti tesu ekūnavīsatiyā paṭisandhicittesu. Kusalavīpākāya ahetikamanoviññāṇadhātuyāti sambandho. Natthi devesu ahetikā paṭisandhīti **“manussaloke”**ti visesana. Napuṃsakādīnanti

1. Abhi-Ṭṭha 2. 145 piṭṭhe.

ādi-saddena mammādīnaṃ saṅgho. Keci pana ekacce ahetukapaṭisandhikā avikalindriyā hutvā thokaṃ vicāraṇapakatikāpi hontiyeva, tasmā tādisānampi idha ādi-saddena saṅghoti vadanti. **Saṅkhepatoti** samāsato, asukāya paṭisandhiyā asukaṃ ārammaṇanti vibhāgaṃ akatvāti attho.

Sesānanti rūpāvacarā pañca, paṭhamatatiyārūppā dveti imāsaṃ vuttāvasesānaṃ sattannaṃ paṭisandhīnaṃ. **Paccuppannārammaṇaṃ cuticittaṃ nāma natthi** paṭisandhi-ārammaṇe eva pavattanato. **Dvīsu ārammaṇesu**ti atītanavattabbavasena dvīsu ārammaṇesu.

623. **Tānīti** pubbe katāni kammāni. **Assāti** āsannamaraṇassa puggalassa. **Olambantīti** sāyanhe mahantānaṃ pabbatakūṭānaṃ chāyā viya bhūmiyaṃ tassa citte avalambanti upatiṭṭhanti. **Tasmīnniruddheti** tasmīn cuticitte niruddhamatte tassa nirodhasamanantarameva. **Tadevāti** taṃyeva yathāvuttajavanavīthiyā ārammaṇabhūtaṃ. Avijjātaṇhādīsu kilesesu anupacchinnesveva kammādino upaṭṭhānaṃ, tañca ārabha cittasantānassa bhavantarannapaṇapabbhāratā hotīti āha
“anupacchinnakilesabalavināmitan”ti. Santāne hi vināmite¹ tadekadesabhūtaṃ paṭisandhicittaṃ tañca vināmitameva² hoti, na ca ekadesavināmitabhāvena³ vinā santānassa vināmitatā atthīti. Sabbattha pana duggatipaṭisandhininnāya cutiyā purimajavanāni akusalāni, itarāya ca kusalanīti nicchinanti. “Nimittassādagadhitaṃ vā bhikkhave viññānaṃ tiṭṭhamānaṃ tiṭṭhati, anubyañjanassādagadhitaṃ vā, tasmīn ce samaye kālaṃ karoti, thānametaṃ vijjati, yaṃ dvinnaṃ gatīnaṃ aññataraṃ gatīn upapajjeyya nirayaṃ vā tiracchānayaṇiṃ vā”ti⁴ hi vuttaṃ, tasmā akusalaṃ duggatīyaṃ, kusalañca sugatīyaṃ paṭisandhiyā upanissayo hotīti. Arahato pana sabbaso kilesānaṃ upacchinnatā paṭippassaddhasabbabhavussukkatāya kammādinimittaṃ na upaṭṭhahati, tato vijjamānampi kammaṃ aladdhasahāyattā paṭisandhiṃ na janeti.

Vuttappakārakammavasenāti pāpakammavasena, tadupaṭṭhāpitanti adhippāyo. **“Narakādīsu aggijālavanṇādikan”**ti idaṃ taṃsadisatāvasena vuttaṃ.

1. Vinamite (Syā, Ka)

3. Ekadesavinamitabhāvena (Syā, Ka)

2. Vinamitameva (Syā, Ka)

4. Saṃ 2. 377, 378 piṭṭhesu.

Na hi so eva nirayaggivannaṇṇādi tadā tassa āpātham āgacchati. Tattha **aggijālavanaṇṇādikanti ādi**-saddena vettaraṇīsimbali-asipattavanādivaṇṇam saṅgaṇhāti. **Narakādīsūti** pana **ādi**-saddena petatiracchānānam nibaddhasañcaraṇaṭṭhānapariyāpannavannaṇam. **Manodvāre āpāthamāgacchatīti** kammabalena upaṭṭhāpitavaṇṇāyatanaṃ supinaṃ passantassa viya, dibbacakkhussa viya ca manodvāre eva gocarabhāvaṃ gacchati. Ekaṃ āvajjanaṃ, pañca javanāni, dve tadārammaṇānīti tīṇi vīthiccittāni.

Rāgādihetubhūtaṃ hīnamārammaṇanti akusalavipākassa ārammaṇam bhavituṃ yuttaṃ anīṭṭhamārammaṇamāha. Tampi hi saṅkappanavasena rāgassāpi hetu hotīti. Akusalavipākajanakakammasahajātānaṃ vā taṃsadisāsannacutijavanacetanāsahajātānaṃ rāgādīnaṃ hetubhāvo eva hīnatā. Tañhi pacchānutāpajanakakammānamārammaṇam kammavasena anīṭṭham akusalavipākassa ārammaṇam bhaveyya. Aññathā ca iṭṭhārammaṇe pavattassa akusalakammassa vipāko akusalakammanimittārammaṇo na bhaveyya. Na hi akusalavipāko iṭṭhārammaṇo bhavituṃ arahatīti.

Pañcadvāre ca āpātham āgacchantam paccuppannam kammanimittam āsannakatakammārammaṇasantatiyaṃ uppannam, taṃsadiṣaṅca daṭṭhabbaṃ. Aññathā tadeva paṭisandhi-ārammaṇūpaṭṭhāpakam, tadeva ca paṭisandhijanakaṃ bhaveyya. Na ca paṭisandhiyā upacārabhūtāni viya, etasmim tayā pavattitabbanti paṭisandhiyā ārammaṇam anuppādentāni viya ca pavattāni cuti-āsannāni javanāni paṭisandhijanakāni bhaveyyuṃ. “Katattā upacitattā”¹ti hi vuttaṃ. Tadā ca taṃsamānavīthiyaṃ viya pavattamānāni katham katūpacitāni siyuṃ? Tadā na assāditāni. Na ca lokiyāni lokuttarāni viya samānavīthiphālāni hontī. “Pubbe vāssa taṃ kataṃ hoti pāpakammaṃ dukkhavedanīyaṃ, pacchā vāssa taṃ kataṃ hoti pāpakammaṃ dukkhavedanīyaṃ, maraṇakāle vāssa hoti micchādiṭṭhi samattā hoti samādinā. Tena so kāyassa bhedaṃ param maraṇā apāyaṃ duggatiṃ vinipātaṃ nirayaṃ upapajjati”²ti-ādina² sutte maraṇakāle samattāya samādināya micchādiṭṭhiyā, sammādiṭṭhiyā ca saṃsāracetanāya paṭisandhidānaṃ vuttaṃ, na ca dubbalehi pañcadvārikajavanehi micchādiṭṭhi,

1. Abhi 1. 104 piṭṭhādīsu.

2. Ma 3. 258 piṭṭhe.

sammādiṭṭhi vā samattā hoti samādinna. Tathā hi vuttaṃ **sammohavinodaniyaṃ** “sabbampi hetam kusalākusaladhamma-
paṭivijānanādicavanapariyosānaṃ kiccaṃ manodvārikacitteneva hoti, na
pañcadvārikenāti sabbassapetassa kiccassa karaṇe sahajavanakāni
vithicittāni paṭikkhittāni”ti.¹

Tattha hi **na kiñci dhammaṃ paṭivijānāti** “manopubbaṅgamā
dhammā”ti² evaṃ vuttaṃ ekampi kusalaṃ vā akusalaṃ vā na paṭivijānāti
ca vuttaṃ. Yesam paṭivibhāvanappavattiyā sukhaṃ vā dukkhaṃ vā anveti,
tesam sā pavatti pañcadvāre paṭikkhittā. Kusalākusalakammasamādānañca
tādisamevāti. Tadārammaṇānantaraṃ pana cavanaṃ, tadanantarā ca upapatti
manodvārikā eva hoti, na sahajavanakavithicittapariyāpannāti iminā
adhippāyena idha pañcadvārikatadārammaṇānantarā cuti, tadanantarā
paṭisandhi ca vuttāti daṭṭhabbā. Tattha avasesapañcacittakkaṇāyuke
rūpādīmhi uppannaṃ paṭisandhiṃ sandhāya “paccuppannārammaṇaṃ
upapatticittaṃ paccuppannārammaṇassa bhavaṅgassa anantarapaccayena
paccayo”ti³, avasesa-ekacittakkaṇāyuke ca uppannaṃ paṭisandhiṃ
sandhāya “paccuppannārammaṇaṃ upapatticittaṃ atītārammaṇassa
bhavaṅgassa anantarapaccayena paccayo”ti³ ca vuttanti veditabbaṃ.

624. **Kaṇhapakkhe sukkapakkhaṃ ṭhapetvāti** ettha yathā pubbe
“pāpakammaṃ vā kammanimittaṃ vā”ti vutte kaṇhapakkhe
“anavajjakammaṃ vā kammanimittaṃ vā”ti sukkapakkho vutto, evaṃ
“duggatipariyāpannaṃ paṭisandhicittaṃ, narakādīsu aggijālavaṇṇādikaṃ
duggatinimittaṃ”ti ca vutte kaṇhapakkhe “sugatipariyāpannaṃ
paṭisandhicittaṃ, manussaloke rattakambalasadisamātukucchivaṇṇa-
saṅkhātāṃ, devaloke vā uyyānavimānakapparukkhādivaṇṇasaṅkhātāṃ
sugatinimittaṃ”ti evaṃ sukkapakkhaṃ ṭhapetvā sesaṃ sabbaṃ
purimanayeneva veditabbaṃ. **Atītāpaccuppannārammaṇāyāti**
kammakammanimittavasena atītārammaṇāya,
mātukucchivaṇṇādisugatinimittavasena paccuppannārammaṇāya.

625. **Tañca khoti** yadetaṃ “anavajjakammaṃ vā kammanimittaṃ vā”ti
aniyamaṇaṃ kataṃ, tañca kho. **Kammanimittameva āpāthamāgacchati**

1. Abhi-Ṭṭha 2. 388 piṭṭhe. 2. Khu 1. 13 piṭṭhe Dhammapade. 3. Abhi 9. 427 piṭṭhe.

ekantato attano kammārammaṇatāya mahaggatavipākassa. **Suddhāya vāti** mahaggatakammanimittārammaṇāya **javanavīthiyā**, tadārammaṇarahitāyāti attho, sā pana javanavīthi mahaggatavipākassa upacāro viya daṭṭhabbā. Keci pana tañca vīthim mahaggatāvasānam vadanti. “**Navattabbārammaṇā vā**”ti idaṃ rūpāvacarapaṭisandhim, āruppesu ca paṭhamam, tatiyañca sandhāya vuttam. Dutiyacatutthā pana atītārammaṇavacaneneva gahitā.

Mātukucchivaṇṇasaṅkhātanti-ādinā vaṇṇo eva gatinimittabhāvena āgato. Tattha saddo tāva anupādinnabhāvena sugatipariyāpannatāya gatinimittabhāvena aṭṭhakathāsu nāgatoti yuttametam, gandhādīnam pana anāgamane kāraṇam vīmaṃsitabbanam.

Ayam tāta tavatthāya buddhapūjā kariyatīti-ādīsu pubbacetanāvasena puññam hoti. Sabbantimajavane vattamānassāpīti vadanti.

626. “**Etenānusārena āruppacutiyāpi anantarā paṭisandhi veditabbā**”ti idaṃ kasmā vuttam, nanu “pathavīkasiṇajjhānādivasena paṭiladdhamahaggatassa sugatiyam ṭhitassā”ti evamādike eva naye ayampi paṭisandhi avaruddhāti? Na tattha rūpāvacaracuti-anantarāya eva paṭisandhiyā vuttattā. Tattha hi “pathavīkasiṇādikaṃ vā nimittam mahaggatacittam vā manodvāre āpātham āgacchati, cakkhusotānam vā”ti-ādinā tena vacanena rūpāvacaracutiyā eva anantarā paṭisandhi vuttāti viññāyati. Athāpi yathāsambhavayojanāya ayampi paṭisandhi tattheva avaruddhā, arūpāvacaracuti-anantarā pana rūpāvacarapaṭisandhi natthi. Arūpāvacare ca uparūpari cutiyā anantarā heṭṭhimā heṭṭhimā paṭisandhi natthīti catutthārūppacutiyā navattabbārammaṇapaṭisandhi natthi. Tena tato tattheva atītārammaṇā, kāmāvacare ca atītapaccuppannārammaṇā paṭisandhi. Itarāhi ca yathāsambhavam atītanavattabbārammaṇā āruppapaṭisandhi, atītapaccuppannārammaṇā ca kāmāvacarapaṭisandhi yojetabbāti imassa visesassa dassanattam visum uddharaṇam kataṃ.

627. Evam ārammaṇavasena ekavidhāya kāmāvacarasugaticutiyā duvidhā duggatipaṭisandhi, duggaticutiyā duvidhā sugatipaṭisandhi, kāmāvacarasugaticutiyā dvi-ekadvippakārānam kāmārūpārūpanam vasena pañcavidhā

sugatipaṭisandhi, rūpāvacaracutiyaṁ tatheva pañcavidhā, duvidhāya āruppacutiyaṁ paccekam dvinnam dvinnam kāmāruppānam vasena aṭṭhavidhā ca paṭisandhi dassitā. Duggaticutiyaṁ pana ekavidhāya duggatipaṭisandhi duvidhā na dassitā, tam dassetum “**duggatiyam thitassa panā**”ti-ādi vuttam. Yathā vuttā pana—

Dve dve pañcātha pañcaṭṭha, dve bhavālamabhedato.
Cutiyā tādisāyetā, catuvīsati sandhiyo¹.

628. “Kāmāvacarassa kusalassa kammassa katattā”ti-ādinā²
nānākkhaṇikakammappaccayabhāvo heṭṭhā dassitappakāroti
upanissayabhāvameva dassento “**vuttañhetan**”ti-ādimāha.

Nissayapaccayabhūtena rūpena sahapavattiyevettha viññāṇassa tena **missitā**, tadabhāvo **amissitā**. Yavanti ettha sattā ekajātisamanvayena aññamaññamissitā hontīti **yoniyo**. Sucaritaduccaritavasena gantabbā pāpūṇitabbāti gatiyo. Tiṭṭhati etthāti thiti, viññāṇassa thiti **viññāṇaṭṭhiti**. Nānattakāyanānattasaññīti-ādi-āvāso eva sattehi āvasitabbato **sattāvāso**. Asaññasattāvāsassa idha asambhavato “**sattāvāsavasena aṭṭhavidham hoti**”ti vuttam.

629. **Aññatra jātipaṇḍakapaṭisandhiyāti** ettha
paṭhamakappikapaṭisandhiyāpīti vattabham. Sāpi hi bhāvena vināva
uppajjati.

Omatoti avamato, avakaṁsatoti attho. **Ādināti** “missam amissan”ti etasmim duke ādimhi vuttena missaviññāṇena. **Omato dve vā tayo vā dasakā uppajjantīti** gabbhaseyyakānam vasena vuttam. Aññattha pana aneke kalāpā saha uppajjanti. Brahmattabhāvepi hi anekagāvutappamāṇena aneke kalāpā saha uppajjantīti timsato³ adhikāneva rūpāni honti. Tadahujāta-ḷakassa lomam jāti-uṇṇāti keci. Himavantappadese jātimanta-ḷakalomam **jāti-uṇṇāti** apare. Gabbham phāletvā gahita-ḷakalomam **jāti-uṇṇāti** aññe. Imāsu gatīsu imā yoniyo sambhavanti, imāsu na sambhavantīti evam **yonīnam gativasena sambhavabhedo**.

1. Mūlaṭi 2. 107 piṭṭhe atthato samānam.

2. Abhi 1. 104 piṭṭhe.

3. Tato (Ka)

630. **Bhummavajjesūti** bhummadevānaṃ vajjanaṃ yonivibhāgaṃ pati tesāṃ manussasadisattā. **Yoniyo tisso purimikā na hontīti** yonittayapaṭikkhepena pacchimā yoni anuññātāti atthato āpannameva hoti. **Gatittayeti** manussapetatiracchānasaññite gatittaye. Tañhi ettha pubbe anāmaṭṭhaṃ.

Ca-saddo avuttasamuccayatthoti dassetuṃ “**ca-saddenā**”ti-ādi vuttaṃ. Kasmā pana nijjhāmatanḥikapetesu purimikā tisso yoniyo na santīti? Asambhavato. Tāsañhi niccāturabhāvato kāmasevā natthīti na tā aṇḍajādayo honti. Kucchiyaṃ tāsāṃ gabbho nāvatiṭṭhati jālasabbhāvato keci. Aggijālāya santappamānasarīrā etā nibbantantīti allaṭṭhānesu, pupphādīsu ca sambhavābhāvato saṃsedajatāpi tāsāṃ natthevāti vadanti. Tenāha “**opapātikā eva hi eta hontī**”ti.

Rūpībrahmesu tāva opapātikayonikesūti opapātikayonikehi rūpībrahme niddhāreti. **Rūpībrahmesūti** hi adhikaraṇe bhummaṃ, opapātikesūti niddhāraṇe. Tena “opapātikayoni kesū”ti sāmāññato vuttarāsito “rūpībrahmesū”ti visesena tadekadesāṃ niddhāreti.

Cakkhusotavattthudasakānaṃ jīvitānavakassa cāti ettha keci

“cakkhusotavattthusattakānaṃ, jīvitachakkassa cāti catunnaṃ kalāpanāṃ vasena rūpabhāve paṭisandhiviññāṇena saha sattavīsati rūpāni uppajjanti. Tattha gandharasāhārānaṃ paṭikkhattatā”ti kāraṇaṃ vatvā taṃ samatthentā “pāḷiyañhi ‘rūpadhātuyā upapattikkhaṇe ṭhapetvā aññasattānaṃ devānaṃ pañcāyatanāni pātubhavanti, pañca dhātuyo pātubhavanti’¹ vuttaṃ, tathā ‘rūpadhātuyā cha āyatanāni, nava dhātuyo’²ti sabbasaṅgahakavasena tattha vijjamānāyatanadhātuyo dassetuṃ vuttaṃ. Kathāvattthumhi ca ghānāyatanādīnaṃ viya gandhāyatanādīnaṃca tattha bhāvo paṭikkhitto ‘atthi tattha ghānāyatananti? Āmantā. Atthi tattha gandhāyatananti? Na hevaṃ vattabbe’²ti-ādinaṃ². Na ca aphoṭṭhabbāyatanānaṃ pathavīdhātu-ādīnaṃ viya agandharasāyatanānaṃ gandharasānaṃ tattha bhāvo sakkā vuttuṃ, phusituṃ sakkuṇeyyatāvinimuttassa pathavī-ādisabhāvassa viya gandharasāyatanabhāvavinimuttassa

1. Abhi 2. 433 piṭṭhe.

2. Abhi 4. 278 piṭṭhe.

gandharasasabhāvassa abhāvā. Yadi ca ghānasamphassādīnaṃ kāraṇabhāvo natthīti ‘āyatanāni’ti te na vucceyyuṃ, dhātusaddo pana nissattanijjīvavācakoti ‘gandhadhātu rasadhātū’ti avacane kāraṇaṃ natthi, dhammabhāvo ca tesāṃ ekantena icchitabbo sabhāvadhāraṇādilakkhaṇato aññassa abhāvā. Dhammānañca āyatanabhāvo ekantiko¹ **yamake** vutto ‘dhammo āyatananti? Āmantā’ti². Tasmā tesāṃ gandharasāyatanabhāvābhāvepi koci āyatanabhāvo vattabbo. Yadi ca phoṭṭhabbabhāvato añño pathavī-ādibhāvo viya gandharasabhāvato añño tesāṃ koci sabhāvo, siyā, tesāṃ dhammāyatanasaṅgaho. Gandharasabhāve, pana āyatanabhāve ca sati ‘gandho ca so āyatanañca gandhāyatanam, raso ca so āyatanañca rasāyatanan’ti idamāpannamevāti gandharasāyatanabhāvo ca na sakkā nivāretuṃ. ‘Tayo āhārā’ti ca vacanato kabalīkārāhārassa tattha abhāvo viññāyati. Tasmā yathā pāḷiyā avirodho hoti, tathā rūpaḅaṇanā kātabbā. Evañhi dhammatā na vilomitā hoti”ti vadanti.

Ettha vuccate—rūpāvacarasattānaṃ ghānañivhāyatanābhāvato vijjamānāpi gandharasā āyatanakiccaṃ na karontīti te anāmasitvā pāḷiyam “pañcāyatanāni pātubhavanti”ti³, “cha āyatanāni”ti⁴ ca ādi vuttam, “tayo āhārā”ti³ ca ajjoharitabbassa āhārassa abhāvena ojaṭṭhamakarūpasamuṭṭhāpanasaṅkhātassa āhārakiccassa akaraṇato, na sabbena sabbaṃ gandharasānaṃ, ojāya ca abhāvato. Iti visayino, kiccassa ca abhāvena visayo, kiccavā ca dhammo na vutto. Yasmiñhi bhāve visayī natthi, tasmim tamhetuko nippariyāyena visayassa āyatanabhāvo natthīti vijjamānassāpi avacanaṃ yathā tattheva rūpabhāve pathavītejavāyodhātūnaṃ phoṭṭhabbāyatanabhāvena. Yassa pana yattha vacanaṃ, tassa tattha visayīsabbhāvahetuko nippariyāyena āyatanabhāvo vutto yathā tattheva rūpāyatanassa.

Yadi visayīsabbhāvahetuko visayassa nippariyāyena āyatanabhāvo, kathamasāññasattānaṃ dve āyatanāni pātubhavanti,

1. Ekantato (Mūlaṭīkā)

3. Abhi 2. 433 piṭṭhe.

2. Abhi 5. 79 piṭṭhe.

4. Abhi 2. 419 piṭṭhe.

asaññasattānañhi cakkhāyatanam natthi, acakkhāyatanabhāvena¹ ca nesaṃ rūpāyatanam aññesaṃ avisayoti? Nāyam virodho. Yena adhippāyena rūpadhātuyam saññīnam gandhāyatanādīnam avacanam, tena rūpāyatanassāpi avacananti asaññīnam ekaṃ āyatanam vattabbam. Yathāsakañhi indriyagocarabhāvāpekkhāya yesam nippariyāyena āyatanabhāvo atthi, tesu niddisiyamānesu tadabhāvato rūpadhātuyam saññīnam gandhādike visum āyatanabhāvena avatvā dhammasabhāvānativattanato, manoviññāṇassa ca visayabhāvūpagamanato dhammāyatanantogadhe katvā “pañcāyatanāni”ti **pāḷiyam**² vuttam. Etadatthañhi “dhammāyatanam”ti sāmāññato nāmakaraṇam, piṭṭhivaṭṭakāni vā tāni katvā “pañcāyatanāni”ti vuttam.

Yena ca pana adhippāyena asaññīnam rūpāyatanam vuttam, tena saññīnampi gandhādīnam visum gahaṇam kātabbanti imassa nayassa dassanattam “asaññasattānam devānam dve āyatanāni pātubhavanti”ti³ vuttam. Asatipi hi tattha attano indriye rūpassa vaṇṇāyatanasabhāvātikkamo natthevāti taṃ rūpāyatanantveva vuccati. Iminā ca nayadassanena gandhādīni tīni pakkhipitvā saññīnam atṭha āyatanāni, asaññīnam pañcāti ayamatto dassito hoti. Evañcetaṃ sampañcchitabbam, aññathā rūpaloke phusitum asakkuṇeyyatāya pathavī-ādīnam brahmānam vacīghoso eva na siyā. Na hi paṭighaṭṭanānighamsamantarena saddappavatti atthi, na ca phusanasabhāvānam katthaci aphusanabhāvata sakkā viññātum, phoṭṭhabbāyatanasaṅkhātassa ca bhūtattayassa abhāve rūpabhāve rūpāyatanādīnampi sambhavo eva na siyā. Tasmā phusitum sakuṇeyyatāyapi pathavī-ādīnam tattha kāyindriyābhāvena tesam phoṭṭhabbabhāvo na vutto. Evañca katvā rūpadhātuyam tesam sappaṭighavacanañca samatthitam hoti. Vuttañhi “asaññasattānam anidassanasappaṭigham ekaṃ mahābhūtam paṭicca dve mahābhūtā”ti-ādi⁴.

Paṭigho ca nāma bhūtattayassa kāyappasādam pati tannissayabhūtaghaṭṭanādvārena abhimukhabhāvo, idha pana taṃsabhāvata. So ca phusitum asakkuṇeyyasabhāvassa ghaṭṭanāya abhāvato natthi. Yadi tattha asatipi visayini rūpāyatanam gahetvā “dve āyatanāni”ti vuttam, atha

1. Acchatarabhāvena (Ka-Syā), tadabhāvena ca (Ka)

3. Abhi 2. 434 piṭṭhe.

2. Abhi 2. 433 piṭṭhe.

4. Abhi 9. 474 piṭṭhe.

kasmā gandhāyatanādīni gahetvā “pañcāyatanāni”ti na vuttanti?
Nayadassanavasena desanā pavattāti vuttovāyamattho. Atha vā tattha
rūpāyatanasseva vacanam kadāci aññabhūmikānam pasādassa visayabhāvaṃ
sandhāya, na pana itaresaṃ abhāvato, nāpi pariyāyenapi
āyatanabhāvābhāvato. Asaññīnañhi rūpāyatanam samānatalavāsīnam
vehapphalānam, uparibhūmikānañca suddhāvāsānam pasādassa
visayabhāvaṃ gacchati, na pana gandharasāti tesamyeva tattha avacanam
yuttam. **Kathāvatthumhi**¹ ca nippariyāyena gandhāyatanādīnam atthibhāvaṃ
paṭijānantam sandhāya paṭisedho kato.

Yadipi cetam vacanam tattha gandhāyatanādīnam abhāvavibhāvanam na
hoti, atthibhāvādīpanampi pana aññavacanam natthevāti? Nayidamevaṃ
aṭṭhakathāsu tattha nesaṃ atthibhāvassa niddhāretvā vuttattā. Yañhi
aṭṭhakathāvacanam pāḷiyā na virujjhati, tam pāḷi viya pamāṇabhūtam
agarahitāya ācariyaparamparāya yāvajjatanā āgatattā. Tattha siyā—yam
pāḷiyā na virujjhati aṭṭhakathāvacanam, tam pamāṇam, idam pana
virujjhatīti? Nayidamevaṃ, yathā na virujjhati, tathā paṭipādītattā.
Cakkhādīnam āyatanānam, tannissayānañca viññāṇānam
sattasuññatāsandassanattam bhagavato dhātudesanāti āyatanabhāvena
vuttānamyeva dhātubhāvādīpanato dhātubhāvassāpi tesam avacanam yujjati
eva. Tasmā yathā pāḷiyā avirodho hoti, tathā cakkhudasakādivasena idha
rūpagaṇanā katāti na ettha dhammatāvilomanāsaṅkāya okāsoti veditabbam.

Aññesu saṃsedaja-opapātikayonikesūti rūpībrahme pana ṭhapetvā
aññesu opapātikesu, saṃsedajesu cāti evamettha sambandho veditabbo.
Opapātikavisesanañhettha aññaggahaṇam, na saṃsedajavisesanam
asambhavato. Sati hi sambhave, byabhicāre ca visesanavisesitabbatā hoti.
Kāmāvacaradevesu sabbakālam paṭisandhipavattīsu yathāvuttāya santatiyā
rūpānam labbhanato vuttam “**tāni ca niccam deveṣū**”ti. Na hi te kadācipi
vikalindriyā, abhāvakā ca hontīti. Cakkhunesam dasannam pūraṇoti katvā
cakkhudasako nāma asādhāraṇena vā cakkhunā lakkhito dasako
cakkhudasako. **Evam sesāti** yathā cakkhudasako vutto, evam sesāpi dasakā
yojetvā veditabbā.

1. Abhi 4. 278 piṭṭhe.

“Saṃsedajūpapātayonīsū¹, avakaṃsato tiṃsā”ti saṅkhepena vuttamatthaṃ vivaranto “**avakaṃsato panā**”ti-ādimāha, taṃ panetaṃ pāḷiyā na sameti. Na hi pāḷiyāṃ kāmāvacarānaṃ saṃsedajopapātikānaṃ aghānakānaṃ upapatti vuttā. **Dhammahadayavibhaṅge** hi “kāmādhātuyā upapattikkhaṇe kassaci ekādasāyatanāni pātubhavanti, kassaci dasāyatanāni, kassaci aparāni dasāyatanāni, kassaci navāyatanāni, kassaci sattāyatanāni pātubhavanti”²ti vuttaṃ, na vuttaṃ “aṭṭhāyatanāni pātubhavanti”ti. Yadi hi aghānakassāpi upapatti siyā, tikkhattuṃ “dasāyatanāni pātubhavanti”ti vattabbaṃ siyā, tikkhattuṃca “navāyatanāni pātubhavanti”ti, na ca taṃ vuttaṃ.

Tattha **upapattikkhaṇeti** paṭisandhikkhaṇe. **Ekādasāti** paripuṇṇāyatanassa saddāyatanavajjāni ekādasa āyatanāni. **Kassaci dasāyatanāni**ti andhassa cakkhāyatanavajjāni. **Aparāni dasāyatanāni**ti badhirassa sotāyatanavajjāni. **Navāyatanāni**ti andhabadhirassa cakkhusotāyatanavajjāni. **Sattāyatanāni**ti gabbhaseyyakassa rūpagandharasakāyaphoṭṭhabbamanodhammāyatanavasena vuttaṃ. Yadi cakkhusotaghānavikalopi uppajjeyya, tassa aṭṭhevāyatanāni siyūṃ, na ca vuttaṃ “aṭṭhāyatanāni pātubhavanti”ti. Tasmā nattheva cakkhusotaghānavikalo. Sati ca aghānakūpapattiyāṃ punapi “kassaci aparānipi dasāyatanāni pātubhavanti”ti vattabbaṃ siyā. Tathā ca sati yathā andhabadhirassa vasena “kassaci navāyatanāni pātubhavanti”ti ekavāraṃ vuttaṃ, evaṃandhāghānakassa, badhirāghānakassa ca vasena “kassaci aparāni navāyatanāni, kassaci aparānipi navāyatanāni pātubhavanti”ti vattabbaṃ siyāti attho. Evaṃ dhātupātubhāvādipaṅhānipi vattabbāni vadanti. Ettha ca yathā “sattati ukkaṃsatotha rūpāni”ti padaṃ “saṃsedajūpapātayonīsū”ti ettha yonidvayavasena yojīyati, na evaṃ “avakaṃsato tiṃsā”ti idaṃ. Idaṃ pana saṃsedajayonivaseneva yojetabbaṃ. Ekayoganiddiṭṭhassāpi ekadeso sambandhaṃ labhatīti saṃsedajassa jaccandhabadhira-aghānakanapumsakassa jivhākāyavattthudasakānaṃ vasena tiṃsarūpāni uppajjantīti vuttaṃ, na opapātikassāti ayamettha aṭṭhakathāyamadhippāyo.

1. Saṃsedupapātayonisu (Ka)

2. Abhi 2. 426, 427 piṭṭhesu.

Ye pana “opapātikassa jaccandhabadhira-aghānakanapuṁsakassa jivhākāyavatthudasakānaṃ vasena tiṃsarūpāni uppajjantīti mahā-aṭṭhakathāyaṃ vuttan”ti vadanti, taṃ na gahetabbaṃ. So hi pamādapāṭho. Evañca katvā **āyatanayamakavaṇṇanāyaṃ** “kāmadhātuyaṃ pana aghānako opapātikō natthi. Yadi bhaveyya, ‘kassaci aṭṭhāyatanāni pātubhavanti’ti vadeyyā”ti¹ vuttaṃ. Apare panāhu “kassaci ekādasāyatanāni pātubhavanti yāva ‘kassaci navāyatanāni’ti pāḷi opapātikesaṇḍhāya vuttā. Tasmā pubbenāparaṃ aṭṭhakathāyaṃ avirodho siddho. Tathā ca yathāvuttapāḷiyā ayamatthavaṇṇanā aññadatthu saṃsandati sametiyevā”ti. Yaṃ paneke vadanti “opapātikaggahaṇena saṃsedajāpi saṅgayhanti. Tathā hi **dhammahadayavibhaṅge** ‘kāmadhātuyā upapattikkhaṇe kassaci ekādasāyatanāni pātubhavanti’ti-ādīnaṃ² **niddese** ‘opapātikānaṃ petānaṃ’ti-ādīnaṃ³ opapātikaggahaṇameva kataṃ, na saṃsedajaggahaṇan”ti, taṃ paripuṇṇāyatanānaṃyeva saṃsedajānaṃ opapātikesu saṅgahaṇavasena vuttanti veditabbaṃ. Tathā hi vuttaṃ **aṭṭhakathāyaṃ** “saṃsedajayonikā paripuṇṇāyatanāparipuṇṇāyatanabhāvena opapātikasaṅgahaṇaṃ katvā vuttā”ti, padhānāya vā yoniyā sabbaṃ paripuṇṇāyatanayoniṃ dassetuṃ “opapātikānanti vuttan”ti ca, idha pana yonidvayaṃ sarūpeneva pakāsetuṃ, saṃsedajayonivaseneva ca avakaṃsato rūpapavattiṃ dassetuṃ opapātikayoniyā itaraṃ asaṅgahetvā “saṃsedajūpapātayoniṃsū”ti vuttaṃ. Taṃ sabbaṃ vīmaṃsitvā gahetabbaṃ.

Ukkāmsāvakaṃsānaṃ pana antareti “sattati, tiṃsā”ti evaṃ vuttānaṃ rūpassa ukkāmsāvakaṃsaparicchedānaṃ majjhe. **Anurūpato vikappo veditabboti** apāyesu andhassa cha cakkhudasaḅbhāvato, tathā badhirassa sotadasaḅbhāvato, andhabadhirassa pana pañca cakkhusotadasaḅbhāvototi evamādinā nayena veditabbo. Yaṃ penettha vattabbaṃ, taṃ vuttamevāti.

631. Cutipaṭisaṇḍhīnaṃ khandhādīhi aññamaññasamānatā **abhedo**. Asamānatā **bhedo**.

1. Abhi-Ṭṭha 3. 309 piṭṭhe.

2. Abhi 2. 426 piṭṭhe.

3. Abhi 2. 427 piṭṭhe.

Ārammaṇatopi abhinnāti catūsu āruppesu tato tato cavitvā tattha tattheva upapajjantassa vasena vuttam. Tattheva pana heṭṭhā, rūpabhava vā upapatti natthi. Arūpabhūmito cavitvā heṭṭhā upapatti nāma kāmabhava eva, tatthāpi tihetukapaṭisandhi eva. Rūpabhavato pana cuto duhetukopi hotīti vadanti. **Amahaggatabahiddhārammaṇāya** cutiyā anantarā **mahaggata-ajjhattārammaṇā** dutiyacatutthārappapaṭisandhi. Evaṃ nayamattassa dassitattā vuttam, avuttañca sabbam saṅgahetvā āha “**ayaṃ tāva arūpabhūmisuyeva nayo**”ti. Rūpārūpāvacarānam upacārassa balavatāya tato cavitvā duggatiyaṃ upapatti natthīti “**ekaccasugaticutiyā**”ti āha. **Ekaccaduggatipaṭisandhī**ti ettha ekaccaggahaṇassa payojanam maggitabbam. Ayaṃ panettha adhippāyo siyā—nānattakāyanānattasaññīsu vuttā ekacce ca vinipātikā tihetukādipaṭisandhikā, tesam paṭisandhim vinipātikabhāvena “duggatipaṭisandhī”ti gahetvā sabbasugaticutiyā ca sā paṭisandhi hoti, na ekaccasugaticutiyā evāti tannivattanattham ekaccaduggatiggahaṇam katham. Apāyapaṭisandhi eva hi ekaccasugaticutiyā hoti, na sabbasugaticutiyāti. Atha vā duggatipaṭisandhi duvidhā ekaccasugaticutiyā anantarā, duggaticutiyā cāti. Tattha pacchimam vajjetvā purimāmyeva gahetuṃ vuttam “**ekaccaduggatipaṭisandhī**”ti. **Ahetukacutiyā sahetukapaṭisandhī**ti duhetukā ca tihetukā ca yojetabbā. Maṇḍūkadevaputtādīnam viya hi ahetukacutiyā tihetukapaṭisandhipi hotīti.

Tassa tassa viparītato ca yathāyogaṃ yojetabbanti “ekaccasugaticutiyā ekaccaduggatipaṭisandhī”ti-ādīsu bhedavisesesu “ekaccaduggaticutiyā ekaccaduggatipaṭisandhī”ti-ādīnā yaṃ yaṃ yujjati, taṃ taṃ yojetabbanti attho. Yujjamānamattāpekkhanavasena napuṃsakaniddeso kato. **Yojetabbanti** vā bhāvatthataṃ datṭhabbā. “Amahaggatabahiddhārammaṇāya mahaggata-ajjhattārammaṇā”ti-ādīsu pana viparītaṃ yojanā na kātabbā. Na hi mahaggata-ajjhattārammaṇāya cutiyā arūpabhūmisu amahaggatabahiddhārammaṇā paṭisandhi atthi. “Catukkhandhāya āruppacutiyā anantarā pañcakkhandhā kāmāvacarapaṭisandhī”ti etassa vipariyāyo sayameva yojito. “Atītārammaṇāya cutiyā paccuppannārammaṇā

paṭisandhī”ti etassa ca vipariyāyo natthi eva. Bhedaviseso eva ca evaṃ vitthārena dassito, abhedaviseso pana ekekasmim bhede tattha tattheva cutipaṭisandhiyojanāvasena veditabbo “pañcakkhandhāya kāmāvacaracutiya pañcakkhandhā kāmāvacarā -pa- avitakka-avicārāya avitakkāvicārā”ti. Catukkhandhāya pana catukkhandhā sayameva yojitā. Eteneva nayena sakkā viññātunti pañcakkhandhādīsu abhedaviseso na dassitoti.

632. **Iti** evaṃ vuttappakārena. Etaṃ viññāṇaṃ avijjādisahakārikāraṇasahitassa saṅkhārassa vasena **laddhappaccayaṃ**. Bāhirakappitassa adhipatiṭṭhanakassa abhāvato **rūpārūpadhammattaṃ**. Tenāha “**na satto na jīvo**”ti. **Upetīti vuccati** tathāvohāramattaṃ, atthato pana paccayasāmaggiyā bhavantarabhāvena uppajjanamattanti adhippāyo. Tenāha “tassa cā”ti-ādi. **Tato hetuṃ vināti** tattha hetuṃ vinā.

Manussacutipāṭisandhikkamenāti manussacutito manussapaṭisandhikkamena. Evañhi pākaṭaggahaṇaṃ ubhayavisesanaṃ hoti. Pākaṭatā cettha tadāsannakkhandhavasena veditabbā “cavamāne upapajjamāne”ti-ādīsu¹viya. **Manussacutipāṭisandhikkamenā**ti vā manussacutito yassa kassaci paṭisandhikkamena. Tathā hi vakkhati “nissayaṃ assādayamānaṃ vā anāssādayamānaṃ vā”ti².

Sarasenāti sabhāvena, parikkhīṇāyusaṅkhāratāyāti attho. **Upakkamenā**ti attanā, parena vā katena sīsaṅghedanādi-upakkamena. Sabbesaṃ aṅgapaccaṅgasandhīnaṃ bandhanāni **sabbaṅgapaccaṅgasandhibandhanāni**, tesam **chedakānaṃ**. **Sannipātanti** patanaṃ pavatti. Hadayappadesopi anukkamena sussitvā appāvaseso hoti, pageva kāyoti āha “**kamena upasussamāne sarīre**”ti. Tenevāha “taṅkhaṇāvasesahadayavatthusannissitaṃ”ti. “**Niruddhesu cakkādīsū**”ti idaṃ gabbhaseyyakānaṃ āyatanānaṃ anupubbuppatti viya nirodhopi anupubbato hotīti adhippāyena vuttaṃ, atimandabhāvūpagamanaṃ vā sandhāya “**niruddhesū**”ti vuttaṃ, na anavasesanirodhaṃ. Pañcadvārikaviññāṇānantarampi hi pubbe cuti dassitā. **Yamake** ca “yassa cakkhāyatanam nirujjhati, tassa manāyatanam nirujjhatīti? Āmantā.

1. Dī 1. 78; Vi 1. 5 piṭṭhesu.

2. Visuddhi 2. 187 piṭṭhe.

Yassa vā pana manāyatanam nirujjhati, tassa cakkhāyatanam nirujjhatīti? Sacittakānam acakkhukānam cavantānam tesam manāyatanam nirujjhati, no ca tesam cakkhāyatanam nirujjhati. Sacakkhukānam cavantānam tesam manāyatanāna ca nirujjhati, cakkhāyatanā ca nirujjhatī”ti-ādinā¹ cakkhāyatanādīnam cuticittena saha nirodho vuttoti.

Hadayavattumatteti hadayavattupadesamatte. Na hi hadayavattum nissāya kāyindriyam pavattati. Hadayavattupi tadā ātape pakkhattaharitatālapaṇṇam viya appāvesam hotīti “**taṅkhaṇāvasesahadayavattusannissitan**”ti vuttanti vadanti. Itaravattūnam pana sakiccāsamatthatāya kevalam hadayavattusannissitameva, tadā viññānam hotīti vuttam “**taṅkhaṇāvasesahadayavattusannissitan**”ti. Mātughātādi, mahaggatamaññaṃ vā tādīsam garukam nāma. **Samāsevitam** abhiṇhaso katam. **Āsannam** maraṇakāle katam, yadā tadā vā katampi paribyattam hutvā anussaritam. **Pubbakatam** aparāpariyāyavedanīyam. Laddho avaseso avijjādiko viññānassa paccayo etenāti **laddhāvasesapaccayo**, saṅkhāro. Etena vipaccitum katokāsam yathūpacitam kusalākusalacetanamāha. **Kammanimittam** nāma yam vatthum ārammaṇam katvā āyūhanakāle kamman āyūhati, tam. Atīte kappakoṭīsasahasamatthakepi hi kamme kate vipaccanakāle āgantvā kamman vā kammanimittam vā upatiṭṭhati. **Gatinimittam** nāma nibbattanaka-okāse eko vaṇṇo. So ca niraye nibbattanārahassa “aggijālavaṇṇādiko”ti-ādinā hetthā vuttoyeva. **Avijjāpaṭicchādītādīnave tasmim** kammādivisaye paṭisandhiviññānassa ārammaṇabhāvena uppattiṭṭhānabhūte.

Taṅhāya appahīnattā eva, purimuppannāya ca santatiyā tathāpariṇatattā paṭisandhiṭṭhānābhimukham viññānam ninnapoṇapabbhāram hutvā pavattatīti āha “**taṅhā nāmetī**”ti. **Sahajātasāṅkhārā**ti cuti-āsannajavanaviññānasahajātā cetanā, sabbepi vā phassādayo. Tasmim paṭisandhiṭṭhāne kammādivisaye viññānam **khīpanti**. Khīpantā viya tasmim visaye paṭisandhivasena viññānapatiṭṭhānassa hetubhāvena pavattantīti attho. Tanti tam viññānam. Cutipaṭisandhitadāsannaviññānam **santativasena** viññānanti

1. Abhi 5. 132 piṭṭhe.

upanītekattam. **Taṇhāya nāmiyamānaṃ -pa- pavattatī** namanakhipanapurimanissayajahana-
 aparaniṣṣayassādananiṣṣayarahitapavattanānisantativasena tassevekassa
 viññāṇassa honti, na aññassāti dasseti. Santativasenāti ca vadanto
 “tadevidam viññāṇam sandhāvati saṃsarati anaññan”¹ti imaṃca
 micchāgāham paṭikkhipati. Sati hi nānattanaye santativasena ekattanayo
 hotīti. Ettha ca orimatīrarukkhavinibaddharajju viya
 purimabhavattabhāvavinibaddham kammādi-ārammaṇam daṭṭhabbam,
 puriso viya viññāṇam, tassa mātikātikkaṃanicchā viya taṇhā,
 atikkamanapayogo viya khipanakasaṅkhārā, yathā ca so puriso paraṭīre
 patiṭṭhahamāno paraṭīrarukkhavinibaddham kiñci assādayamāno vā
 anassādayamāno vā kevalam pathaviyam sakabalapayogeheva patiṭṭhāti,
 evamidampi bhavantarattabhāvavinibaddham hadayavatthusāṅkhātāṃ
 niṣṣayam pañcavokārabhave assādayamānam, catuvokārabhave
 anassādayamānam vā kevalam ārammaṇasampayuttakammeheva pavattati.
 Tattha **assādayamānanti** pāpuṇantam, paṭilabhamānanti attho.

Bhavantarādipaṭisandhānatoti bhavantarassa aññabhavassa
 ādipaṭisandhānabhāvato. Bhavantarādayo vā
 bhavayonigativinñāṇaṭṭhitissattāvāsantarāni, tesam paṭisandhānatoti attho.
 Tadetam viññāṇam nāpi idhāgataṃ imasmimyeva bhava uppannattā.
Kammanti paṭisandhijanakam kammam. **Saṅkhārāti** cuti-
 āsanna javanaviññāṇasahagatā khipanakasaṅkhārā. **Natīti** namanavasena
 pavattataṇhā. **Visayo** kammādi.

633. Saddapaṭighosādīnam satipi paccayapaccayuppannabhāve
 santānabandho na pākaṭoti tesam ekattanānattabhāvaṃ anāmasitvā
 anāgamanātītahetusamuppādameva dassento “**ettha cā**”ti-ādimāha.
Saddādi hetikāti ettha **paṭighoso** saddahetuko. **Padīpo** padīpantarādi hetuko.
Muddā lañchanahetukā. Chāyā ādāsādi-abhimukhamukhādi hetukā. **Honti**
aññatra agantvāti saddādi paccayadesam anupagantvā² saddādi hetukā honti
 tato pubbe abhāvā. Evam idampi paṭisandhivinnāṇam na hetudesam gantvā
 tamhetukam hoti tato pubbe abhāvā. Tasmā na idam hetudesato
 purimabhavato idhāgataṃ paṭighosādayo viya saddādi desato, nāpi tattha
 hetunā vinā uppannam saddādīhi

1. Ma 1. 323 piṭṭhe.

2. Agantvā (Mūlaṭīkā)

vinā paṭighosādayo viyāti attho. Atha vā **honti aññatra agantvāti** pubbe paccayadese sannihitā hutvā tato aññatra gantvā tappaccayā na honti uppatto pubbe abhāvā, nāpi saddāpaccayā na honti, evaṃ idampīti vuttanayeneva yojetabbaṃ.

Natthi ekatā ekasantānekattepi aññasseva viññāṇassa pātubhavanato. Nāpi nānatā santānabandhato padīpo viya. Khaṇikāya hi padīpajālāya¹ santānekattaṃ upādāya so² evāti vuccati, atthakiccaṇca sādheti, evamidhāpi daṭṭhabbaṃ. “**Yadi hī**”ti-ādinā santānabaddhe ekantaṃ ekatāya, nānatāya ca aggahetabbataṃ, gahaṇe ca dosaṃ dasseti. **Esā nayoti** atidesena bījaṅkurādīsu sabbahetuhetusamuppannesu yathāsambhavaṃ yojanā kātabbāti dasseti. Idhāpi hi hetuhetusamuppannaviññāṇānaṃ ekantamekatte sati na manussagatito devagati sambhūtā siyā. Ekantanānatte na kammavato phalaṃ siyā, tato “rattassa bījaṃ rattassa phalaṃ”ti-ādikassa viya “bhūtapubbāhaṃ bhante rohitasso nāma isi ahosin”ti-ādikassa³ vohārassa lopo siyā, tasmā ettha santānabandhesu hetuhetusamuppannesu na ekantamekatā vā nānatā vā upagantabbā na gahetabbā. Ettha ca ekanta-ekatāpaṭisedhena “sayamkataṃ sukhaṃ dukkhaṃ”ti⁴ imaṃ diṭṭhiṃ nivāreti, ekantanānatāpaṭisedhena “paramkataṃ sukhaṃ dukkhaṃ”ti⁴, hetuhetusamuppannatāvacaṇena “adhiccasamuppannaṃ”ti⁵ imaṃ diṭṭhiṃ nivāreti.

634. **Tatthāti** phaluppattiṭṭhāne. **Aññassāti** yena taṃ kammaṃ kataṃ, tato aññassa. **Aññatoti** yaṃ taṃ kammaṃ nibbattaṃ, tato aññato. “Dhammamattaṃ bhavantaramupeti”ti⁶ vuttattā phalassa **upabhuñjake ca asati kassa taṃ phalaṃ siyāti** anuyuñjati. **Tatrāti** tasmim yathāvutte anuyoge.

Tatthāti ekasantāne. Yasmim dhammapuñje kammaṃ nibbattaṃ, tasseva santāneti attho. **Etassa atthassāti** hetuphalānaṃ atthato aññattepi

1. Khaṇikā hi padīpajālā (Syā)

2. Sā (Syā)

3. Saṃ 1. 61 piṭṭhe.

4. Abhi-Ṭṭha 1. 102; Mūlaṭī 2. 112 piṭṭhādīsipi.

5. Mūlaṭī 2. 112 piṭṭhepi.

6. Visuddhi 2. 186; Abhi-Ṭṭha 2. 154; Mahāniddeśa-Ṭṭha 196; Paṭisaṃ-Ṭṭha 1. 320 piṭṭhesu.

teneva hetuphalabhāvena sambandhattā taṃ phalaṃ “aññassa, aññato”ti vā na vattabbanti etassa atthassa. Catumadhura-alattakarasādibhāvanā ambamātuluṅgādibījanāṃ **abhisaṅkhāro**. Ettha ca abhisaṅkhataṃ bījaṃ viya kammavā satto, abhisaṅkhāro viya kammaṃ, bījassa aṅkurādippabandho viya sattassa paṭisandhiviññāṇādippabandho. Tatthuppannassa madhurassa rattakesarassa vā phalassa vā tasseva bījassa, tato eva ca abhisaṅkhārato bhāvo viya kammakārasseva sattassa, taṃkammato eva ca phalassa bhāvo veditabbo. Bālasarīre kataṃ vijjāpariyāpuṇaṇaṃ, sippasikkhanaṃ, osadhappayogo ca na vuḍḍhasarīraṃ gacchanti. Atha ca tannimittaṃ vijjāpāṭavaṃ sippajānaṃ, anāmayatā ca vuḍḍhasarīre honti, na ca tāni aññassa honti taṃsantatipariyāpanne eva vuḍḍhasarīre uppajjanato, na ca yathāpayuttena vijjāpariyāpuṇaṇādinā vinā tāni aññato honti tadabhāve abhāvato, evaṃ idhāpi santāne yaṃ phalaṃ, etaṃ nāññassa. Na ca aññatoti yojetabbaṃ. Etena ca saṅkhārābhāve phalābhāvameva dasseti, na aññapaccayanivāraṇaṃ karoti.

Yampi vuttaṃ, tattha vadāmāti vacanaseso. Tattha vā upabhuñjake asati siddhā bhuñjakasammutīti sambandho. Phalatīti sammuti **phalatisammuti**.

Rukkhasaṅkhātānaṃ dhammānanti rukkhasaññattiyā upādānabhūtānaṃ bhūtopādāyadhammānaṃ. **Tasmāti** yasmā yathā khandhasantāne kusalākusalacetanuppattiyāṃ “puññaṃ karoti, pāpaṃ karoti”ti kattuvohāro, evaṃ tassa phaluppattiyāṃ “sukhaṃ anubhavati, dukkhaṃ anubhavatī”ti upabhuñjaka vohāro, tasmā na ettha khandhavinimuttana aññena upabhuñjakena nāma koci attho atthīti.

635. **Evaṃ santepīti** asaṅkantipātubhāve tattha ca yathāvuttadosaparihaṇe sati, siddheti attho. **Pavattikkhaṇeyevāti** saṅkhārānaṃ pavattamānakkhaṇe eva. **Pavattito pubbeti** kammāyūhanakkhaṇato pubbe, avijjamānatāya samānattā evaṃ vuttaṃ. **Pacchā cāti** vipaccanappattito pacchā ca.

Avipakkavipākā katattā ce paccayā, vipakkavipākānampi katattaṃ samānanti tesampi phalāvahatā siyāti āsaṅkānivattanatthaṃ āha “**na ca niccaṃ phalāvahā**”ti.

“Na vijjamānattā avijjamānattā vā”ti etena vijjamānattaṃ, avijjamānattañca nissāya vuttadose pariharati. Tassā paṭibhogakiriyāya, bhaṇḍakīṇanakiriyāya, iṇaggahaṇakiriyāya vā karaṇamattaṃ **taṃkiriyākaraṇamattaṃ**, tadeva **tadatthaniyyātane** paṭibhaṇḍadāne, iṇadāne ca paccayo hoti, aphalitaniiyyātanādiphalaṅṅanti attho.

636. **Sammohavighātathanti** bāttimsāya viññāṇesu yathāvuttasaṅkhārānaṃ paṭisandhiyaṃ, pavattiyañca paccayabhāve vibhajja avibhāvite pavattanakasammohassa apanayanatthaṃ.

Puññābhisaṅkhāreti niddhāraṇe bhuttaṃ. **Avisesenāti** “tīhetuko tīhetukassā”ti-ādikaṃ bhedaṃ akatvā sāmāññato, piṇḍavasenaṅṅanti attho. Sabbattha upanissayapaccayo balavakammassa vasena yojetabbo. “Dubbalañhi kammaṃ upanissayapaccayo na hoti”ti **paṭṭhānasaṃvaṇṇanāya** dassitametaṃ. **Rūpāvacarapañcakuṣalacetanābhedaṅṅanti** “ṭhapetvā abhiññāppattaṃ”ti visesetvā vattabbaṃ, na vā vattabbaṃ vipākassa paccayabhāvakathāya avipākārahassa pasaṅgābhāvato. Abhiññācetanāya hi avipākātā heṭṭhā vibhāvītā eva. **Avisesena paṅṅanti** etthāpi eseva nayo. Pañcannaṃ vipākaviññāṇāṅṅanti ānetvā sambandhitabbaṃ.

Pañcannanti cakkhusotaviññāṇāṅṅanti, sampaṭicchanaṃ odhātuyā, dvinnāṃ santīraṇaṃ novīññāṅṅadhātūnañcāti etesaṃ pañcannaṃ. **Tathevāti** dvedhā eva. Kathaṃ pana iṭṭhārammaṇeyeva pavattanakāni kuṣalavipākaviññāṅṅanti duggatīyaṃ pavattantīti āha “**niraye mahāmoggallānattherassa**”ti-ādi. Thero hi tattha iddhiyā vassaṃ nimminivā katipayāṃ velaṃ nirayaggaṃ vūpasametvā tesāṃ dhammaṃ deseti.

Sveva kāmāvacaro puññābhisaṅkhāro. **Avisesena pana puññābhisaṅkhāro**ti kāmāvacaraṃ, rūpāvacarañcāti duvidhampi puññābhisaṅkhāraṃ ekajjhaṃ saṅgaṅṅanti.

Dvādasākuṣalacetanābhedaṅṅanti ettha uddhaccasahagatacetanāya gahaṇe kāraṇaṃ na dissati, vicāretabbametaṃ. Ekassa viññāṅṅassa

tatheva paccayo paṭisandhiyaṃ, no pavatteti ekasseva paccayabhāvaniyamo paṭisandhiyaṃ, no pavatte. Pavatte hi sattannampi paccayoti adhippāyo.

Rūpabhava catunnanti akusalavipākānaṃ

cakkhusotaviññāṇasampaṭicchana santīraṇānaṃ. Tāni pana ekantato aniṭṭhārammaṇāni, rūpabhava ca kathaṃ aniṭṭhārammaṇasamāyogoti āha “**so ca kho**”ti-ādi. “**Tathā kāmāvacaradevalokepi aniṭṭharūpādayo natthī**”ti idaṃ yebhuyyavasena vuttaṃ. Bahulañhi tesaṃ iṭṭhā eva rūpādayo upaṭṭhahanti, kadāci aniṭṭhaṃ. Devānañhi kesañcideva pubbanimittapātubhāvakālādīsu milātamaḷādi-aniṭṭhārammaṇasamāyogo hotīti.

637. Yattha vitthārappakāsaṇaṃ kataṃ, tato bhavato paṭṭhāya mukhamattappakāsaṇaṃ kātukāmo āha “**ādito paṭṭhāyā**”ti. Teneva “dvīsu bhavesū”ti-ādi vuttaṃ. Manussāpi keci aṇḍajā, saṃsedajā ca hontīti tadapekkhāya “**catūsu yonīsū**”ti vuttaṃ. Ekattakāya-ekattasaññitāsāmaññena catutthajhānabhūmikāpi asaññāruppavajjā catutthimyeva viññāṇaṭṭhitim bhajanti. **Esa** puññābhisaṅkhāro. **Vuttanayenevāti** “nānākkhaṇikakammappaccayena ceva upanissayapaccayena cā”ti vuttanayeneva. **Yathāsambhavanti** ekavīsatikāmāvacararūpāvacarakusalavipākesu cuddasaṇaṃ paṭisandhiyaṃ, pavatte ca, sattannaṃ pavatte evāti ayaṃ yathāsambhavo.

Tādiseyevāti nānattakāya-ekattasaññīsāṅkhāteyeva.

Catunnaṃ viññāṇananti bhavādayo apekkhitvā vuttaṃ. Catūsu antogadhānaṃ pana tiṇṇaṃ viññāṇānaṃ tīsu viññāṇaṭṭhitīsu paccayabhāvo yojetabbo. Aviññāṇake sattāvāse saṅkhārapaccayā viññāṇe alabbhamānepi tassa saṅkhārahētukattaṃ labbhateva. Tathā hi tattha puññābhisaṅkhāro kaṭattārūpānaṃ nānākkhaṇikakammappaccayena paccayo hoti. Etasmiṅca mukhamattappakāsaṇe puññābhisaṅkhārādīnaṃ duggati-ādīsu pavattiyaṃ kuslavipākādiviññāṇānaṃ paccayabhāvo bhavesu vuttanayeneva viññāyatīti na vuttoti veditabbo.

Viññānapaccayānāmarūpapadavitthārakathāvaṇṇanā

638. **Vibhāgā nāmarūpānanti** nāmassa, rūpassa ca pabhedato.

Tattha nāmassa tāva pabhedam̐ dessentena kāmam̐ viññāṇampi nāmameva, paccayapaccayuppanne pana asaṅkarato dassetuṃ “**ārammaṇābhimukham̐ namanato vedanādayo tayo khandhā**”ti vuttam̐. Nibbānassa panettha pavattikathāyam̐ appaccayattā, namanaṭṭhābhāvato ca pasaṅgo eva natthi. Nāmanaṭṭhena hi tam̐ nāmam̐, na namanaṭṭhena. **Tesam̐** nāmarūpānam̐ sukhādivasena, pathavī-ādivasena ca **vibhāgo**.

Ekam̐ sattāvāsanti asaṅṅasattāvāsam̐. Purimesu catūsu, asaṅṅasattāvāse cāti **pañcasu**.

Gabbhaseyyaggahaṇena jalābuja gahitāti “**aṇḍajānañcā**”ti vuttam̐. Aṇḍajānañca abhāvakānanti yojetabbam̐. **Santatisīsānīti** kalāpasantānamūlāni. Yadipi vikārarūpāni paṭisandhikkhaṇe na santi, lakkhaṇaparicchedarūpāni pana santīti tāni paramatthato aparinipphannānīti vajjento āha “**rūparūpato**”ti. Phassādike saṅkhārakkhandhabhāvena ekattam̐ netvā “**tevīsati dhammā**”ti vuttam̐. **Apanetvāti** kalāpantaragate pathavī-ādike samānalakkhaṇatāya aggahetvā.

Tesanti brahmakāyikādīnam̐. **Vitthārenāti** catūsipi santatisīsesu rūpānam̐ asaṅkhipanena.

Kāmabhave pana yasmā sesa-opapātikānanti ettha kiñcāpi kāmabhave opapātikā vuttā na santi, yena sesaggahaṇam̐ sātthakam̐ bhaveyya, aṇḍajagabbhaseyyakehi pana opapātikasaṃsedajā sesā hontīti sesaggahaṇam̐ katanti vedītabbam̐. Atha vā brahmakāyikādikehi opapātikehi vuttehi sese sandhāya “**sesa-opapātikānan**”ti āha. Te pana arūpinopi santīti “**kāmabhave**”ti vuttam̐. Aparipuṇṇāyatanānam̐ pana nāmarūpam̐ yathāsambhavam̐ rūpamissakaviññāṇaniddese vuttanayena sakkā dhammagahaṇato viññātuntī na vuttanti daṭṭhabbam̐.

Paṭisandhicittena saha pavatta-ututoti paṭisandhicittena saha uppannarūpesu tejodhātuto. Hadayavatthuno taṅkhaṇuppannattā paṭisandhicittassa **vatthudubbalatā**. Tesam̐ ajjhoharītāhārena anugate

sarīre āhārasamuṭṭhānaṃ suṭṭhaddhakanti sambandho. **Tiroti** teneva mātukucchigatabhāvena tirokkho. Avakaṃsato dve aṭṭhakāneva utucittasamuṭṭhānāni hontīti sasaddakālaṃ sandhāya “**ukkamaṃsato dvinnaṃ navakānaṃ**”ti vuttaṃ. **Pubbeti** yaṃ pubbe santatidvayādikaṃ sattakapariyosānaṃ rūpaṃ idha vuttaṃ, taṃ ekekassa cittassa tīsu tīsu khaṇesu uppajjamānameva vuttanti katvā āha “**pubbe -pa- sattatidvayā**”ti. **Duvidhampi** tanti utusamuṭṭhānaṃ, cittasamuṭṭhānañcāti duvidhampi taṃ saddaṃ.

Saṅghātunti addhaniyabhāvena ṭhātuṃ, attano pana khaṇamattaṃ tiṭṭhateva. **Catuddisā vavatthāpitā**ti aññamaññaṃ saṃsaṭṭhasīsā mūlena catūsu disāsu vavatthāpitā. Aññamaññaṃ āliṅgetvā ṭhitā **bhinnavāhanikā viya**¹ ca.

639. Pañcavokārabhave ca pavattiyanti

rūpājanakakammajapañcaviññāṇapavattikālaṃ, saḥajātaviññāṇapaccayañca sandhāyāha. Tadā hi tato nāmaeva hotīti. Kammaviññāṇapaccayā pana tadāpi ubhayaṃ hotīti sakkā vattuṃ, pacchājātaviññāṇapaccayā ca rūpaṃ upatthaddhaṃ hotīti. **Asaññesūti**-ādi kammaviññāṇapaccayaṃ sandhāya vuttaṃ. **Pañcavokārabhave ca pavattiyanti** bhavaṅgādi janakakammato añña rūpuppattikālaṃ, nirodhasamāpattikālaṃ, bhavaṅgādi-uppattikālaṃ aññakālañca sandhāya vuttanti yuttaṃ. Bhavaṅgādi-uppattikāle hi taṃjanakena kammunā uppajjamānaṃ rūpaṃ, so ca vipāko kammaviññāṇapaccayo hotīti sakkā vattuṃ.

Saḥajātaviññāṇapaccayānapekkhampi hi pavattiyāṃ kammena pavattamānaṃ rūpaṃ, nāmañca na kammaviññāṇānapekkhaṃ hotīti.

Sabbatthāti paṭisandhiyaṃ, pavatte ca. Saḥajātaviññāṇapaccayā nāmarūpaṃ, kammaviññāṇapaccayā nāmarūpañca yathāsambhavaṃ yojetabbaṃ.

Nāmañca rūpañca nāmarūpañcāti ettha nāmarūpasaddo attano ekadesena nāmasaddena nāmasaddassa sarūpo, rūpasaddena ca rūpasaddassa, tasmā sarūpānaṃ ekasesoti **ekadesasarūpekaseso**, nāmarūpasaddassa ṭhānaṃ itaresaṃca nāmarūpasaddānaṃ adassananti attho.

Vipākato aññaṃ **avipākam**. Yato dvidhā mataṃ, tato yuttameva idanti yojetabbaṃ.

1. Bhinnavahanikā viya (Syā)

Kusalādicittakkhaṇeti ādi-saddena akusalakiriyacittakkhaṇe viya vipākacittakkhaṇepi vipākājanakakammasamuṭṭhānaṃ saṅgahitanti veditabbaṃ. Vipākacittakkhaṇe pana abhisaṅkhāraviññāṇapaccayā pubbe vuttanayena ubhayaṅca labbhatīti tādisavipākacittakkhaṇavajjanatthaṃ “**kusalādicittakkhaṇe**”ti vuttaṃ.

640. **Suttantikapariyāyatoti** paṭṭhāne rūpānaṃ upanissayapaccayassa avuttattā vuttaṃ. Suttante pana yasmim̐ sati yaṃ hoti, asati ca na hoti, so tassa upanissayo nidānaṃ hetu pabhavoti katvā “viññāṇūpanisaṃ nāmarūpan”ti rūpassa ca viññāṇūpanissayatā vuttā. Vanapatthapariyāye ca vanapatthagāmanigamanagarajanapadapuggalūpanissayo iriyāpathavihāro, tato ca cīvarādīnaṃ jīvitaparikkhārānaṃ kasirena, appakasirena ca samudāgamaṇaṃ vuttaṃ, na ca vanapatthādayo ārammaṇūpanissayādibhāvaṃ¹ iriyāpathānaṃ, cīvarādisamudāgamanassa ca bhajanti. Tasmā vinā abhāvo eva suttantikapariyāyato upanissayabhāvo daṭṭhabbo. Nāmassa abhisaṅkhāraviññāṇaṃ kammārammaṇapaṭisandhi-ādikāle ārammaṇapaccayova hotīti vattabbameva natthīti rūpasseva suttantikapariyāyato ekadhāva paccayabhāvo vutto. Sasaṃsayassa hi rūpassetaṃ paccayo hotīti vutte nāmassa hotīti vattabbameva natthīti.

Pavattassa pākaṭattā apākaṭaṃ paṭisandhim̐ gahetvā pucchati “**kathaṃ panetan**”ti-ādīnā. Suttato nāmaṃ, yuttito rūpaṃ viññāṇapaccayā hotīti jānitabbaṃ.

Yuttito sādhetvā suttana taṃ dalhaṃ karonto “**kammasamuṭṭhānassāpi hī**”ti-ādīmāha. **Cittasamuṭṭhānassevā**ti cittasamuṭṭhānassa viya. Ettha ca “viññāṇapaccayā nāmarūpan”ti² bhāsamānena bhagavatā yasmā upaparikkhamānānaṃ paṇḍitānaṃ paramatthato nāmarūpamattameva pavattamānaṃ dissati, na sakko, na jīvo, tasmā kenaci appaṭivattiyāṃ anuttaraṃ dhammacakkaṃ pavattitaṃ hoti. Suññatappakāsanaṅhi dhammacakkappavattananti. Atha vā nāmarūpamattatāvacaṇena pavattiyā dukkhasaccamattatā vuttā. Dukkhasaccappakāsanaṇa ca tassa samudayo, tassa ca nirodho, nirodhagāminipaṭipadā

1. Ārammaṇūpanissayabhāvaṃ (Ka), Mūlaṭī 2. 116 piṭṭhe passitabbaṃ.

2. Ma 3. 109; Saṃ 1. 243, 296; Vi 3. 1; Khu 1. 77 piṭṭhādīsu.

ca pakāsītā eva hoti. Ahetukassa dukkhassa, hetunirodhā anirujjhanakassa ca abhāvā, nirodhassa ca upāyena vinā anadhigantabbattāti catusaccappakāsanam dhammacakkappavattanam niddhāretabbanam.

Nāmarūpapaccayāsaḷāyatanapadavittthārakathāvañṇanā

641. **Tanti** nāmarūpanam. **Tassāti** saḷāyatanassa. **Tādisassevāti** katekasesasseva.

Idhāpi **nāmanti** khandhattayasseva gahaṇe kāraṇam vuttanayameva. **Niyamatoti** idaṅca catunnam bhūtānam, channam vatthūnam, jīvitassa ca yathāsambhavam sahajātanissayapurejāta-indriyādinā saḷāyatanassa pavattamānassa ekantena paccayabhāvam sandhāya vuttam. Rūpāyatanādīnam pana sahajātanissayanupālanabhāvo natthīti aggahaṇam veditabbanam. Ārammaṇārammaṇapurejātādibhāvo ca tesam na sasantatipariyāpannānameva, na ca cakkhādīnam viya ekappahārenevāti¹ aniyamato paccayabhāvo. **Niyamato -pa- jīvitindriyanti evanti** ettha **evam-**saddena vā rūpāyatanādīnampi saṅgaho daṭṭhabbo. **Chaṭṭhāyatanañca saḷāyatanañca saḷāyatananti** ettha yadipi chaḷāyatanasaḷāyatanasaddānam saddato sarūpatā natthi, atthato pana saḷāyatanekadesova chaṭṭhāyatananti ekadesasarūpatā atthīti ekadesasarūpekaseso katoti veditabbo. Atthatopi hi sarūpānam ekadesasarūpekasesam icchanti “vaṅko ca kuṭilo ca kuṭilā”ti. Tasmā atthato ekadesasarūpānañca ekasesena bhavitabbanti.

Atha vā chaṭṭhāyatanañca manāyatanañca chaṭṭhāyatananti vā manāyatananti vā chaṭṭhāyatanañca chaṭṭhāyatanañca chaṭṭhāyatananti vā manāyatanañca manāyatanañca manāyatananti vā ekasesam katvā cakkhādīhi saddhim “saḷāyatanan”ti vuttanti tameva ekasesam nāmamattapaccayassa, nāmarūpapaccayassa ca manāyatanassa vasena kataṃ atthato dassento āha “**chaṭṭhāyatanañca saḷāyatanañca saḷāyatananti evam katekasesassā**”ti. Yathāvuttopi hi ekaseso atthato chaṭṭhāyatanañca saḷāyatanañcāti evam kato

1. Ekappahārenevāti (Ka)

nāma hotīti. Sabbattha ca ekasese kate ekavacananiddeso katekasesānaṃ saḷāyatanādisaddavacanīyatāsāmaññavasena katoti daṭṭhabbo.

“**Na aññathā**”ti etena tassa tassa nāmassa, rūpassa ca abhāve taṃ taṃ āyatanam na hotīti byatirekaṃ vibhāveti.

Yanti yaṃ yaṃ nāmaṃ, rūpaṅca. **Yassāti** yassa yassa āyatanassa. **Yathāti** sahaajātādīnā yena yena pakārena. **Neyyanti** ñeyyam.

Tassa vasenāti tassahetu-ādipaccayassa vasena. **Ukkamsāvakaṃsoti** ettha sattadhā paccayabhāvato ukkaṃso aṭṭhadhā paccayabhāvo, tato navadhā, tato dasadhāti ayaṃ ukkaṃso. Avakaṃso pana dasadhā paccayabhāvato navadhā paccayabhāvo, tato aṭṭhadhā, tato sattadhāti evaṃ veditabbo, na pana sattadhā paccayabhāvato eva dvepi ukkaṃsāvakaṃsā yojetabbā tato avakaṃsābhāvatoti.

Vipākaṃ nāmaṃ sambandho. **Vuttanayenevāti** sahaajātādivasena, sattadhā, hetu-ādivasena ca. **Itaranti** avipākaṃ nāmaṃ.

“**Hadayavatthuno sahāyaṃ hutvā**”ti etena arūpe¹ viya asahāyaṃ nāmaṃ na hoti, hadayavatthu ca nāmena saha chaṭṭhāyatanassa paccayo hotīti ettakameva dasseti, na pana yathā hadayavatthu paccayo hoti, tathā nāmampīti ayamatto adhippeto. Vatthu hi nāmassa vippayuttapaccayo hoti, na nāmaṃ. Nāmaṅca vipākahetādipaccayo hoti, na vatthūti. Pavatte arūpadhammā kammajarūpassa ṭhitippattasseva paccayā honti, na uppajjamānassāti vippayutta-atthi-avigatā ca pacchājātavippayuttā dayo eva cakkhādīnaṃ yojetabbā.

“**Tatthevā**”ti iminā “pavatte”ti idaṃ paccāmaṭṭhanti āha “**tattheva hi pavatte**”ti. “Pañcavokārabhave”ti pana idaṃ “pañcannan”ti iminā dīpitamevāti. Pavattiyaṃ cakkhāyatanādīkassa nāmaṃ vipākapaccayo na hoti, attanā janitarūpasseva hoti. Paṭisandhiyaṃ pana kammasamuṭṭhānaṃ cittasamuṭṭhānasadisam, tasmā vatthunopi vipākapaccayo hotiyeva.

1. Āruppe (Syā, Ka)

Rūpatoti rūpesu. Yaṃ yaṃ āyatanam uppajjati paṭisandhiyaṃ aṇḍajalābujānaṃ pañcasu āyatanesu kāyāyatanaṃ eva uppajjati. Itaresaṃ yathārahaṃ itarāni pi.

Avasesamanāyatanassāti ettha “pañcakkhandhabhave panā”ti etassa anuvattamānattā pañcavokārabhave eva pavattamānaṃ pañcaviññāṇehi avasesaṃ manāyatanam vuttanti daṭṭhabbaṃ. Nāmarūpassa saha-jātādisādhāraṇapaccayabhāvo, sampayuttādi-asādhāraṇapaccayabhāvo ca yathāsambhavaṃ yojetabbo. “Rupapaccayā pañcāyatanāni”ti ayampi nayo labbhati nirodhasamāpannānaṃ vasena, so pana apacurabhāvato yebhuyyena ca paṭisandhiyaṃ paccayabhūtasēva nāmarūpassa pavattiyaṃ paccayabhāvo vibhāvītoti na dassitoti vedītabbaṃ.

Salāyatanapaccayāphassapadavithārahakathāvaṇṇanā

642. Bāvīsatiyā lokiyavipākaviññāṇehi sampayuttā
bāvīsatilokiyaviññāṇasampayuttā. Tato eva **bāvīsati.**

Tatthāti tasmim salāyatane, tesu chasu āyatanesūti attho. **Ajjhattanti** sasantatipariyāpannameva gaṇhāti. Tañhi sasantatipariyāpannakammanibbattaṃ tādissassa phassassa paccayo hoti. Rūpādīni, pana bahiddhā anupādinnāni ca phassassa ārammaṇaṃ honti, na tāni cakkhādīni viya sasantatipariyāpannakammakilesanimittappavattibhāvena phassassa paccayā hontīti paṭhamācariyavāde na gahitāni, dutiyācariyavāde pana yathā tathā vā paccayabhāve sati na sakkā vajjetunti gahitāni.

Tatthāti salāyatanapaccayā phassapade. Ye tāva ācariyā mahāvihāravāsīnova yathā viññāṇaṃ, evaṃ nāmarūpaṃ, salāyatanam, phassaṃ, vedanaṃ paccayaṃ, paccayuppannaṃ ca sasantatipariyāpannaṃ dīpentā vipākameva icchanti. “Chaṭṭhāyatanapaccayā phasso”ti **abhidhamabhājanīyapāli**¹ āruppaṃ sandhāya vuttāti “**chaṭṭhāyatanapaccayā phassoti pāli-anusārato**”ti vuttaṃ.

Sabbe phassā na sambhontīti yojanā. Yadi sabbāyatanehi eko phasso sambhaveyya, “salāyatanapaccayā phasso”ti ekassa vacanaṃ

1. Abhi 2. 145, 187 piṭṭhesu.

yujjeyya, athāpi ekamhā āyatanā sabbe phassā sambhaveyyuṃ, tathāpi sabbāyatanehi sabbaphassasambhavato āyatanabhedena phassabhedo natthīti tadabhedavasena ekassa vacanaṃ yujjeyya, tathā pana asambhavato na yuttanti codeti **“na sabbāyatanehī”**ti-ādinā. Aññassāpi vā asambhavantassa vidhānassa bodhanatthametaṃ vuttaṃ **“nāpi ekamhā āyatanā sabbe phassā”**ti. **“Na sabbāyatanehi eko phasso sambhotī”**ti idameva pana ekaphassavacanassāyuttattadīpakam kāraṇanti vedītabbamaṃ. Nidassanavasena vā etaṃ vuttaṃ. Nāpi ekamhā āyatanā sabbe phassā sambhonti, evaṃ na sabbāyatanehi eko phasso sambhoti. Tasmā ekassa vacanaṃ ayuttanti. Parihāraṃ pana anekāyatanehi ekaphassassa sambhavatoti dassento **“tatrīdam viṣṣajjanan”**ti-ādimāha. **Avasesasampayuttadhammāyatanā** phassavajjitā taṃsampayuttacetāsikā dhammā.

Ekopi anekāyatanappabhavo **ekopa’nekāyatanappabhavo**.

Chadhā paccayatte pañca vibhāvaye, ekaṃ navadhā paccayatte, bāhirāni cha āyatanāni ārammaṇādinā yathāsambhavaṃ paccayatte vibhāvayeti sambandho.

Anekabhedassāti kusalavipākādīpañcadvārādivasena anekavidhassa dvīpañcaviññāṇasampayuttavajjassa vipākaphassassa. **Tāni cāti** rūpāyatanādīni. **“Mano ca nesam gocaravisayaṃ paccanubhotī”**ti¹ hi vuttaṃ. **Tathā cāti** paccuppannāni rūpādīni paccuppannañca dhammāyatanapariyāpannaṃ rūparūpaṃ sandhāya vuttaṃ. **Ārammaṇapaccayamattenāti** taṃ sabbaṃ apaccuppannaṃ, aññañca dhammāyatanam sandhāya vuttaṃ.

Phassapaccayāvedanāpadavitthārakathāvaṇṇanā

643. **Dvārato saḷevāti** pabhavasāmaññato ekavidhāpi uppattidvārato cha eva hontīti chaḷeva vedanā vuttā.

Cittabhedena ekūnanavutivīdhāpi idhādhippetā eva dassetuṃ **“vedanāsu panā”**ti-ādi vuttaṃ. **“Sesānan”**ti ettha sampañcchanasampayuttāya cakkhusamphassādayo pañca yadipi anantarādīhi paccayā honti, anantarādīnam

1. Ma 1. 369 piṭṭhe.

pana upanissaye antogadhattā santīraṇatadārammaṇānañca sādharmaṇassa tassa vasena “**ekadhā**”ti vuttaṃ. Ekekasmim dvāre hi cakkhudvārādīsu uppannacakkhuviññāṇādīhi sahaḷatā phassā sakasakavīthīsu sampaṭicchanaḷādīhi sampayuttavedanānaṃ, manodvāre tadārammaṇavaseneva pavattānaṃ tebhūmakavipākavedanānampi sahaḷatamanosamphassasankhāto so phasso aṭṭhadhā paccayo hotīti yojetabbaṃ.

Rūpārūpāvacaravipākavedanā paṭisandhi-ādivaseneva pavattanti, kāmaḷvacarāpi ekaccāti “**tebhūmakavipākavedanānampī**”ti vuttaṃ. Tāsampi hi sahaḷatamanosamphasso aṭṭhadhāva paccayo hoti. Paccayaṃ anupādinnaṃpi keci icchantīti “**yā panā**”ti-ādinā manodvārāvajjanasampayuttaphassassa paccayabhāvo vutto. Tañca mukhamattadassanaṃ daṭṭhabbaṃ. Etena nayena sabbassa anantarassa, anānantarassa ca phassassa tassā tassā vipākavedanāya upanissayatā yojetabbāti.

Vedanāpaccayātaṇhāpadavithhārakathāvaṇṇanā

644. **Idhā**ti imasmim loke, imasmim vā sāsane cha taṇhā dīpitā. **Idhā**ti vā imasmim vedanāpaccayā taṇhāpade. **Tatthā**ti tāsū chasū taṇhāsū.

Ekekāya sassatadiṭṭhisahagatāya, ucchedadiṭṭhisahagatāya ca taṇhāya tadabhinandanānugūṇo rūpādīsū pavatti-ākāro, kevalaṃ kāmassādasena pavattiyā viṣiṭṭhākārattā vuttappavatti-ākārato taṇhāya tividhatā.

Mamattenāti sampiyāyanaena, assādanataṇhāya icceva vuttaṃ hoti. Tattha putto viya vedanā daṭṭhabbā, khīrādayo viya vedanāya paccayabhūtā rūpādayo, khīrādidāyikā dhāti viya rūpādichaḷārammaṇadāyikā cittakārādayo cha. Tattha sukhasamphassavattadāyako tantavāyo, vejjo rasāyatanojāvasena, tadupatthambhitajīvitavasena ca dhammārammaṇassa dāyakoti daṭṭhabbo. **Sabbāpesā** aṭṭhasatappahedāpi.

Ārammaṇapaccayo uppajjamānāya ārammaṇamattameva hoti, na upanissayo viya uppādakoti uppādakassa upanissayasēva vasena

“**ekadhāvā**”ti vuttaṃ. Upanissayena vā ārammaṇūpanissayo saṅgahito. Tena ca ārammaṇabhāvena taṃsabhāgo aññopi ārammaṇapaccayabhāvo dīpito hotīti upanissayavaseneva paccayabhāvo vuttoti veditabbo.

“**Yasmā vā**”ti-ādinā na kevalaṃ vipākasukhavedanā eva, tissopi pana vedanā vipākā visesena taṇhāya upanissayapaccayo, avisesena itarā cāti dasseti. **Upekkhā pana santattā, sukhamicceva bhāsītā**ti tasmā sāpi bhiyyo icchanavasena taṇhāya upanissayoti adhippāyo. Upekkhā pana akusalavipākabhūtā aniṭṭhattā dukkhe avarodhetabbā, itarā iṭṭhattā sukheti sā dukkhaṃ viya, sukhaṃ viya ca upanissayapaccayo hotīti sakkā vattum. “Vedanāpaccayā taṇhā”ti vacanena sabbassa vedanāvato paccayassa atthitāya taṇhuppattippasaṅge tannivāraṇatthamāha “**vedanāpaccayā cā pī**”ti-ādi.

Nanu “anusayasahāyā vedanā taṇhāya paccayo”ti vacanassa abhāvā atippasaṅganivattim na sakkā kātunti? Na, vaṭṭakathāya pavattattā. Vaṭṭassa ca anusayavirahe abhāvato anusayasahitāva paccayoti atthato vuttamevetam hotīti. Atha vā “avijjāpaccayā”ti anuvattamānattā anusayasahitāva paccayoti viññāyati. **Vedanāpaccayā taṇhāti** cettha vedanāpaccayā eva taṇhā, na vedanāya vināti ayaṃ niyamo icchito, na vedanāpaccayā taṇhā hotiyevāti, tasmā atippasaṅgo ettha natthi evāti.

Vusīmatoti vusitavato, vusitabrahmacariyavāsassāti attho. Vussatīti vā vusīti maggo vuccati, so etassa vuttho atthīti **vusīmā**, ukkaṭṭhaniddesena arahā. Aggaphalaṃ vā pariniṭṭhitavāsattā “vusī”ti vuccati, taṃ etassa atthīti **vusīmā**.

Taṇhāpaccayā-upādānapadavittārakathāvaṇṇanā

645. **Atthavibhāgo** atthassa vibhajanā. **Vatthu saṅkhātaṃ kāmanti** kāmagaṇasaññitaṃ rūpādi-ārammaṇamāha. **Upādiyatīti** kāmavasena gaṇhāti, daḷhaṃ assādetīti attho. **Kāmaṃ upādiyatīti** ettha kammasādhano

kāmasaddo, **kāmo ca soti** ettha kattusādhano kilesakāmassa adhippetattā. Upādānasaddo pana ubhayatthāpi kattusādhanova. **Daḷhattho** bhusattho. Yathā bhuso āyāso upāyāso, bhusaṃ kuṭṭhaṃ upakuṭṭhaṃ, evaṃ idhāpīti āha “**upāyāsa-upakuṭṭhādīsu viyā**”ti. **Purimadiṭṭhiṃ uttaradiṭṭhi upādiyatīti** purimadiṭṭhiṃ sassatabhāvena gaṇhantī upādiyati, purimadiṭṭhi-ākārena vā uttaradiṭṭhi uppajjamānā teneva purimadiṭṭhiṃ daḷhaṃ karontī taṃ upādiyatīti vuttā. Atha vā **purimadiṭṭhiṃ uttaradiṭṭhi-upādiyatīti** “sassato attā”ti¹ idam purimadiṭṭhiṃ upādiyamānaṃ uttaradiṭṭhiṃ nidassetuṃ vuttaṃ. Yathā hi esā daḷhīkaraṇavasena purimaṃ uttarā upādiyati, evaṃ “natthi dinnan”ti-ādikāpīti². **Attaggaṇaṃ** pana attavādupādānanti na idam diṭṭhupādānadassananti daṭṭhabbaṃ. **Loko cāti** vā attaggaṇavinimuttaṃ gahaṇaṃ diṭṭhupādānabhūtaṃ idha purimadiṭṭhi-uttaradiṭṭhivacanehi vuttanti veditabbaṃ.

Sīlabbatam upādiyatīti ettha asuddhimaggagosīlādisamādānavasena sīlam, avītikkamanavasena vataṃ. Ubhayatthāpi vā sīlam, tapokammabhāvena gahitatāya vataṃ, gavādipakatibhāvanā. Attano vā gavādibhāvādiṭṭhānaṃ sīlam, “gacchanto bhakkheti, tiṭṭhanto muttetī”ti-ādinā gavādikiriyākaraṇaṃ vataṃ. Taṃtamakiccasammatato vā nivatti sīlam, taṃsamādānavatovesa bhojanakiccakaraṇādivisesapaṭipatti vataṃ, taṃ sīlabbatam asuddhimaggaṃ “suddhimaggo”ti parāmasanto tathā abhinivisanto upādiyati, taṃ gāhaṃ daḷhaṃ gaṇhātīti attho. Sīlabbatasahacaritam parāmāsaṃ sīlabbatanti gahetvā āha “**sīlabbatañca taṃ upādānañcā**”ti. **Gosīlagovatādīnīti** ca tathābhūtaṃ diṭṭhiṃ vadati. Tenevāha “**sayameva upādānānī**”ti. **Abhinivesatoti** abhinivesabhāvato, abhinivisanato vā. **Attavādupādānanti** “attā”ti vādassa paññāpanassa, gahaṇassa ca kāraṇabhūtā diṭṭhīti attho. **Attavādamattamevāti** attassa abhāvā “attā”ti idam vacanamattameva. **Upādiyantīti** daḷhaṃ gaṇhanti. Kathaṃ? “Attā”ti. “Attā”ti hi abhinivisantā vacanamattameva daḷhaṃ katvā gaṇhantīti atthoti³. Evaṃ “attavādamattameva upādiyantī”ti

1. Dī 1. 12 piṭṭhādīsu.

2. Ma 1. 362; Ma 2. 63; Ma 3. 72, 99, 116; Abhi 1. 241; Abhi 2. 389 piṭṭhādīsu.

3. Attāti (Syā, Ka)

vuttaṃ. **Attavādamattanti** vā vācāvattumattamevāha. Vācāvattumattameva hi “attā”ti upādiyanti attassa abhāvāti.

“Dhammasaṅkhepavittḥāre pana kāmupādānaṃ saṅkhepato taṇhādaḷhattaṃ, sesupādānattayaṃ diṭṭhimattameva, vitthārato panā”ti evaṃ dhammasaṅkhepavittḥārasamudāyato tadavayavabhūtaṃ saṅkhepaṃ, vitthāraṅca niddhāretīti. **Dhammasaṅkhepavittḥāreti** niddhāraṅce bhummaṃ daṭṭhabbaṃ. **Kāmesūti** pañcasu kāmaguṇesu. **Kāmacchando**ti kāmasaṅkhāto chando, na kattukamyatāchando, na ca dhammacchando. Kāmanavasena, rañjanavasena ca kāmoyeva rāgo **kāmarāgo**, evaṃ sabbattha kāmattaṃ viditvā kāmo eva nandanaṭṭhena **kāmanandī**, taṇhāyanaṭṭhena kāmoyeva **kāmatanḥā**, sinehanaṭṭhena kāmo eva **kāmasneho**, paridayhanaṭṭhena **kāmaparilāho**, mucchanaṭṭhena **kāmamucchā**, gilitvā pariniṭṭhāpanaṭṭhena **kāmajjhosaṇaṃ** veditabbaṃ. **Appattavisayapatthanā taṇhā** ārammaṇe paritassanabhāvato, **sampattavisayaggahaṇaṃ upādānaṃ** ārammaṇe daḷhaggāhabhāvato. **Appicchatāpaṭipakkhā taṇhā** visayābhimukhabhāvato, **santutṭhipaṭipakkhā upādānaṃ** taṇhādaḷhattaṃ hutvā atricchatābhāvato. **Pariyesanadukkhamulā taṇhā** appattavisayapatthanābhāvato, **ārakkhadukkhamulā upādānaṃ** sampattavisayaggahaṇabhāvato.

Natthi dinnanti-ādīsu **dinnanti** dānamāha, taṃ aphaḷattā rūpaṃ viya dānaṃ nāma na hotīti paṭikkhipati. **Yiṭṭhaṃ** vuccati mahāvijitayaññasadiso mahāyāgo. **Hutanti** āhunapāhunamaṅgalakiriya. Tattha āmantetvā havanaṃ dānaṃ **āhunaṃ**, pāhunānaṃ atithinaṃ atithikiriya **pāhunaṃ**, āvāhādīsu maṅgalatthaṃ dānaṃ **maṅgalakiriya**, dasa kusalakammaṭṭhā **sukatakammāni** nāma, dasa akusalakammaṭṭhā **dukkatakammāni** nāma, **phalaṃ vipākoti** nissandādiphalañceva nippariyāyavipāko ca natthīti yojanā. Yathā cettha, evaṃ “natthi dinnan”ti-ādīsupi phalavipākapaṭikkhepova daṭṭhabbo. **Natthi ayaṃ lokoti** paraloke ṭhito imaṃ lokaṃ “natthī”ti gaṇhāti. Imaṃ hi lokaṃ avekkhitvā paraloko, parañca lokaṃ avekkhitvā ayaṃ loko hoti gantabbato, āgantabbato cāti paralokato idhāgamanassa abhāvā tattheva ucchiḷḷanato cittena paraloke ṭhito imaṃ lokaṃ “natthī”ti gaṇhātīti attho. Na hi ayaṃ diṭṭhi paraloke ṭhitasseva hotīti. **Natthi paralokoti**

idhaloke ʃhito paralokaṃ “natthī”ti gaṇhāti. Idhāpi vuttanayeneva attho veditabbo. Ayaṃ vā ettha attho—saṃsaraṇappadeso idhaloko, paraloko ca nāma koci natthi saṃsaraṇassa abhāvā tattha tattheva ucchiḷjanatoti.

Purimabhavato pacchimabhave upapatanāṃ upapāto, so yesāṃ sīlāṃ, te **opapātikā**. Te pana cavanaka-upapajjanakasattā natthīti dassento āha “**natthi sattā opapātikā**”ti. **Natthi loke samaṇa -pa- pavedentī**ti anulomapaṭipadaṃ paṭipannattā sammaggaṭā sammāpaṭipannā dhammikasamaṇabrahmaṇā lokasmim natthi. Ye imaṅca lokaṃ, paraṅca lokaṃ attanā eva abhivisiṭṭhena ṇāṇena paccakkhato ṇatvā pavedanasamathā sabbaññubuddhā nāma natthīti dasseti. **Rūpaṃ attato samanupassatī**ti-ādīsu vattabbaṃ heṭṭhā vuttameva.

Pakati-aṇu-ādīnaṃ sassataggāhapubbaṅgamo, sarīrassa ucchedaggāhapubbaṅgamo ca tesaṃ gāhānaṃ sāmibhūto koci sassato, ucchiḷjamāno vā attā attīti attaggāho kadāci hotīti “**yebhuyyenā**”ti vuttaṃ. Svāyaṃ attaggāho atthato khandhārammaṇo eva daṭṭhabbo. Yebhuyyena paṭhamāṃ attavādupādānanti-ādīnāva sambandho. Yādipi bhavarāgajavanavīthi paṭhamāṃ pavattati gahitapaṭisandhikassa bhavanikantiyā pavattitabbattā, so pana bhavarāgo taṇhādalḷhattaṃ na hotīti maññamāno na kāmupādānassa paṭhamupattimāha.

Taṇhā kāmupādānanti pana vibhāgassa akaraṇe sabbāpi taṇhā **kāmupādānaṃ**, karaṇepi vā kāmarāgato aññāpi taṇhā dalḷhabhāvaṃ pattā **kāmupādānanti** tassa arahattamaggavajjhatā vuttā.

Uppattiṭṭhānabhūtā cittuppādā **visayo**. Pañcupādānakkhandhā **ālayo**. Tattha ramatīti **ālayarāmā**, pajā. Teneva sā ālayarāmatā sasantāne, parasantāne ca pākaṭā hoti. **Kāmānanti** vatthukāmānaṃ. “Sukhadukkhaṃ kammunā hoti”ti aggahetvā **kotūhalamaṅgalādibahulo hoti**. **Sā** kotūhalamaṅgalādibahulatā. **Assa** kāmupādānavato. **Tanti** diṭṭhupādānaṃ, anattani dhammamatte “attā”ti micchābhinivesassa sukhumataradhammupādānatāya sukhumatā vuttā. Upanissayavacanena

ārammaṇānantarapakatūpanissayā vuttāti anantarapaccayādīnampi saṅgaho kato hoti.

Upādānapaccayābhavapadavitthārakathāvaṇṇanā

646. **Atthatoti** vacanathato. **Dhammatoti** sabhāvadhammato. **Sātthatoti** sātthakato, pubbe vuttassapi puna vacanassa sappayojanato. **Bhedasaṅgahāti** bhedato saṅgahato, vibhāgato ceva vibhattassa saṅkhipanato cāti attho. **Yaṃ yassa paccayoti** yaṃ yaṃ upādānaṃ yassa yassa bhavassa paccayo hoti, tato cāti attho.

Bhavatīti bhavoti phalavohārena kammabhavo vutto. Upapattibhavanibbacanameva hi dvayassapi sādharmaṇaṃ katvā vuttaṃ, bhavati etasmā upapattibhavoti vā. Dutiyo pana kammabhavo sattassa punabbhavabhāvena savisesaṃ bhavatīti **bhavo**. Tato eva na sabbassa bhavantarassa, taṃhetuno vā bhavabhāvappasaṅgo. **Duvidhenāti** dvīhi ākārehi pavattitoti attho. **Duvidhenāti** vā paccattatthe karaṇavacanāṃ, duvidhoti vuttaṃ hoti. **Atthīti** saṃvijjati.

647. Attano paccayehi karīyatīti kammaṃ, attano phalaṃ karotīti kammanti keci, “kamman”ti evaṃ vattabbā **kammasaṅkhātā**. **Parittabhūmakoti** kāmabhūmako. **Mahābhūmakoti** mahaggatabhūmako. **Sabbanti** anavasesaṃ. Bhavaṃ gacchati, gameti cāti **bhavagāmi**. Gacchatīti ca nipphādanasamatthatāvasena, attano pavattikāle bhavābhimukhaṃ hutvā pavattatīti attho, nibbattanameva vā gamanaṃ adhippetāṃ. “**Bhavagāmi**”ti ca etena kammakkhayakaraṃ kammaṃ nivatteti. Ayañhi vaṭṭakathā, tañca vivaṭṭanissitanti. **Apuññābhisaṅkhāroti dvādasa cetanāti** uddhaccasahagatacetanāyapi gahaṇaṃ “avijjāpaccayā saṅkhārā”ti¹ ettha viya veditabbā. “Bhavapaccayā jāti”ti ettha pana “saṅkhārapaccayā viññānaṃ”ti¹ ettha viya sāpi apanetabbā. **Mandabahuvipākatāti** appamahāvīpākatā.

“**Sabbampi bhavagāmikammanti iminā cetanāsampayuttā abhijjhādayo vuttā**”ti etena ācayagāmitāya tesāṃ kammasaṅkhātātā vuttāti

1. Ma 3. 109; Vi 3. 1; Saṃ 1. 243; Khu 1. 77; Khu 10. 28 piṭṭhādīsu.

kammabhavapariyāpannataṃ pariyāyena vadati, nippariyāyena pana cetanāva kammabhavo. Vuttañhi “kammabhavo tīhi khandhehi ekenāyatanena ekāya dhātuyā sampayutto, ekena khandhena ekenāyatanena ekāya dhātuyā kehici sampayutto”ti¹. Upapattibhavo. Tīhipi tikehi vutto upādinnakkhandhova. Yathāha “upapattibhavo. Kāmabhavo. Saññābhavo. Pañcavokārabhavo pañcahi khandhehi ekādasahāyatanehi sattarasahi dhātūhi saṅgahito”ti-ādi². Yadi hi anupādinnakānampi gahaṇaṃ siyā, “dvādasahi āyatanehi aṭṭhārasahi dhātūhi”ti vattabbaṃ siyāti. Kāmataṇhāya kāmatabbato kāmanissayatāya bhogā viya, kāmasahacaritatāya “kuntā pacarantī”ti viya, kāmārammaṇatāya “sukhaṃ rūpan”ti viya, kāmapaccayaṭṭhānatāya “sukho saggo”ti viya kāmāti avīciparanimmitavasavattiparicchinnā upādinnakkhandhā vuccanti. Rūpāvīragato yaṃ nissitā, tadupacārena “mañcā ghosantī”ti viya, “phandanadevatā”ti viya ca “rūpan”ti vuccanti brahmakāyikākaniṭṭhāparicchinnā upādinnakkhandhā.

Rūpameva bhavo **rūpabhavo**, tathā arūpanti ākāsānañcāyatanabhavaggaparicchinnā cattāro upādinnakkhandhā vuccanti. Arūpameva bhavo **arūpabhavo**. Kāmo eva bhavoti kāmabhavo, so pana yasmā yathāvuttenatthena “kāmo”ti vattabbo hoti, tasmā “**kāmasaṅkhāto bhavo**”ti vuttaṃ. Kāmāvacarasaññito vā bhavo “**kāmasaṅkhāto bhavo**”ti vutto. Tathā rūpārūpabhavoti āha “**esa nayo rūpārūpabhavesū**”ti. **Saññāva taṃ bhavoti** ettha vantu-saddassa lopodaṭṭhabbo. Tassa vā atthe akāraṃ katvā “saññābhavo”tipi pāṭho. Tenāha “**saññāvā**”ti-ādi. **Vokīṇṇoti** etena vokāra-saddassa kammaśādanatamāha. Vokiriyati pasārīyati vitthārīyatīti vokāro, vokiraṇaṃ vā vokāro, so ekasseva khandhassa vasena pavattattā “**eko vokāro**”ti vutto, pasaṭṭuppattīti attho.

648. Kiñcāpi bhavaniddese “sabbampi bhavagāmikammaṃ kammabhavo”ti³ iminā cetanāsampayuttadhammāpi vuttā.

Puññābhisaṅkhārādayovāti pana

1. Abhi 3. 45 piṭṭhe.

2. Abhi 3. 13 piṭṭhe.

3. Abhi 2. 143 piṭṭhe.

avadhāraṇaṃ paccayadhammavisesepi atthappabhedena saṅkhārabhavaggaḥeṣu attheva visesoti dassanatthaṃ kataṃ. Tenāha “**evaṃ santepi**”ti-ādi. Saṅkhārabhavānaṃ dhammabhedato na saṅkhārā eva puna vuttāti “**sāttakamevidaṃ punavacanaṃ**”ti etaṃ ayuttanti ce? Na, bhavēkadesabhāvena saṅkhārānaṃ bhavoti puna vuttattā. Parena vā dhammavisesaṃ aggahetvā¹ punavacanaṃ coditanti codakābhilāsavasena “**sāttakamevidaṃ punavacanaṃ**”ti vuttaṃ.

649. Kāmabhavādinibbattakassa kammaṣṣa kāmabhavādinibhāvo phalavohārena aṭṭhakathāyaṃ vutto. Sahajātavīññāṇassapi paccayabhūtaṃ avijjāhetukaṃ saṅkhāraggaḥeṣu yaṃ kiñci kammaṃ pubbe vuttaṃ, idha pana “sabbampi bhavagāmikammaṃ”ti² vacanato bhavassa nibbattaṃ upādānaḥetukaṃ vipaccanāya katokāsameva bhavoti adhippeto. Yaṃ kāmupādānapaccayā rūpabhavanibbattaṃ, arūpabhavanibbattaṃ kammaṃ karīyati, so kammabhavo, tadabhinibbattā khandhā upapattibhavoti imamatthaṃ “**esa nayo rūpārūpabhavesū**”ti atidisati. **Dve kāmabhavā**ti kāmakammabhavo, kāmūpapattibhavoti dve kāmabhavā. Evaṃ “**dve rūpabhavā, dve arūpabhavā**”ti etthāpi. Antogadhe hi visuṃ aggahetvā abbhantaragate eva katvā kāmabhavādike kammūpapattibhavavasena duguṇe katvā āha “**cha bhavā**”ti.

Avisesenāti upādānavasena bhedaṃ akatvā. Upādānabhedākaraṇeṣu ca dvādasappabhedassa saṅgahasena saṅgahato “**cha bhavā**”ti vuttaṃ. **Anupagammā**ti anissāya, anāmasitvāti attho.

650. Gosīlena, kukkurasīlena ca samatthena samādinna gunnaṃ, kukkurānaṃ saḥabyatā vuttāti “sīlabbatupādānavato jhānabhāvanā na ijjhatī”ti maññamānā tena rūpārūpabhavā na hontīti keci vadanti. Vakkhamānena pana pakārena paccayabhāvato “**taṃ na gahetabban**”ti āha. Asuddhimagge ca suddhimaggaparāmasanaṃ sīlabbatupādānanti suddhimaggaparāmasanena rūpārūpāvacaraḥjñānaṃ nibbattaṃ na na yujjati.

Anussavavasenati “setavadhayaḥjaṃ ālabhate bhūtikāmo”ti ādinna-anussavavasena, yathā ime manussaloke kāmā samiddhā, evaṃ

1. Aggaṇetvā (Mūlaṭṭi 2. 123 piṭṭhe.)

2. Abhi 2. 143 piṭṭhe.

devaloke ito samiddhatarāti diṭṭhānusārena vā.

Purāṇabhāratasītāharaṇapasubandhavidhi-ādisavanam

assaddhammassavanam. Ādi-saddena asappurisūparissayam¹, pubbe ca akatapuññaṭam, attamicchāpaṇidhiṅca saṅgaṇhāti. **Kāyaduccaritādīnapīti** attano adhippetānam kāmānam anupāyabhūtānipi kāyaduccaritādīni **karoti**, cirasaggādi attham yuddhādivasenāti adhippāyo. **Sandiṭṭhike vā pana** rajjasenāpatiṭṭhānādisaṅgahe **kāme.** **Tadantogadhā evāti** tasmim duccaritanibbatte, sucaritanibbatte ca kāmabhava antogadhā evāti attho. **Antogadhāti** ca saññābhavapañcavokārabhavānam ekadesena antogadhattā vuttam. Na hi te niravasesā kāmabhava antogadhāti.

Sappabhedassāti sugatiduggatimanussādippabhedavato.

Kāmāvacarasampattibhave paṭhamadutiya-ucchedavādavasena, rūpabhava tatiya-ucchedavādavasena, arūpabhava sesa-ucchedavādavasena ayamattā su-ucchinno hotīti tadupagam kammam karotīti āha “**ayam attā nāmā**”ti-ādi. Tattha **su-ucchinnoti** sakalavaṭṭadukkkhasamucchedena suṭṭhu ucchinno, apunabbhavuppattiko hotīti attho.

“**Kāmāvacarasampattibhave**”ti idam

paṭhamadiṭṭhadhammanibbānavādavasena vuttam, sesam itardiṭṭhadhammanibbāna vādavasena. Tattha kiñcāpi **pāliyam**² rūpāvacarajjhānavaseneva upari cattāro diṭṭhadhammanibbānavādā āgatā, diṭṭhigatiko pana yam kiñci gahetvā³ yathā tathā abhinivisatīti arūpabhavaggahaṇam, arūpajjhānānampi vā catutthajjhānasaṅghato arūpabhavaggahaṇam, santasukhatāya vā taṃsamāṅgino sukhita bhāvasāmaññato. **Vigataparilāhoti** yathābhilāsita visayūpahārena, pahānena ca vūpasantakāmarāgaparilāho, diṭṭheva dhamme nibbānappattoti attho.

Suddhimaggaparāmasanavasena pavattitam yam kiñci lokiyaṃ sīlam, jhānaṅca sīlabbatamicceva idhādhippetanti āha “**idam sīlabbatam nāmā**”ti-ādi. Kamena avatvā sīlabbatupādānassa ante bhavapaccayatāvacaṇam attavādudupādānam viya abhiṇham asamudācārato, attavādudupādānanimittattā ca.

1. Asappurisūpassayam (Syā, Ka)

2. Dī 1. 33 piṭṭhe.

3. Aggahetvā (Syā)

Kammabhaveti niddhāraṇe bhummaṃ. **Hetupaccayappabhedehī**ti ettha maggapaccayo ca vattabbo. Diṭṭhupādānādīni hi sahajātakammabhavassa maggapaccayā hontīti, tasmā tāni sahajātādīsu hetupaccayaṃ apanīya maggapaccayaṃ pakkhipitvā sattadhā paccayā hontīti veditabbāni. Sabbāni pana anantarasamanantara-anantarūpanissayanatthivigatāsevanapaccayehi paccayā honti. Nānantarassa upanissayapaccayena paccayā honti. Kadāci ārammaṇapaccayādināpi, taṃ pana upanissayapaccayeneva saṅgahetvā vuttaṃ “**vippayuttassa pana upanissayapaccayenevā**”ti.

Bhavapaccayājāti-ādipadavitthārakathāvaṇṇanā

651. **Jātīti-ādīsūti ādi**-saddena “jātipaccayā jarāmaraṇaṃ sokaparidevadukkhadomanassupāyāsā sambhavanti”¹ti¹ sabbam saṅgaṇhāti. Tenāha “**jāti-ādīna**”ti-ādi. Upapattibhavuppattiyeva jātīti āha “**na upapattibhavo**”ti. Jāyamānassa pana jāti jātīti² upapattibhavopi asati abhāvā jātiyā paccayoti sakkā vuttum. Jāyamānarūpapadaṭṭhānatāpi hi rūpajātiyā vuttā “upacitarūpapadaṭṭhāno upacayo, anuppabandharūpapadaṭṭhānā santati”³ti³.

Jātānaṃ khandhānaṃ uññātātā, abhimatātā ca **hīnapaṇītātā**. Aniṭṭhañhi hīnaṃ, iṭṭhaṃ paṇītaṃ. **Ādi**-saddena suvaṇṇadubbaṇṇahīnuttamādim saṅgaṇhāti. **Yamakānampi satanti** yamakabhāvena nibbātānampi samānānaṃ. **So ca** sattānaṃ viseso. Bhinnasantānikassa visesakāraṇassa sabbena sabbam abhāvato “**ajjhattasantāne**”ti vuttaṃ. **Aññassa kāraṇassa abhāvatoti** attasantānagatato aññassa visesakāraṇassa anupalabbhamānattā, sati ca tasmim sabbadā sabbesaṃ abhāvatoti pasaṅgassa dunnivāraṇato kāraṇe avisiṭṭhe phalavisesassa ayujjamānakattā. Tenāha “**kammabhavahetukovā**”ti.

Tena tenāti nātibyasanādinā jarāmaraṇato aññena dukkhadhammena. Jarāmaraṇanimittañhi uppannā sokādayo jarāmaraṇābhisambandhā, tadanñe anabhisambandhā. **Upanissayakoṭiyāti** upanissayaṃsena,

1. Ma 3. 109; Saṃ 1. 243; Vi 3. 1; Khu 1. 77; Khu 10. 28 piṭṭhādīsu.

2. Jāyamānassa pana jātīti (Syā, Ka)

3. Abhi-Ṭṭha 1. 364 piṭṭhe.

upanissayalesenāti attho. Yo hi paṭṭhāne anāgato sati bhāvā, asati ca abhāvā suttantapariyāyena upanissayo, so “upanissayakoṭī”ti vuccati. Paccayamahāpadeso kireso, yadidaṃ upanissayoti.

Bhvacakkakathāvaṇṇanā

652. Na kevalaṃ sokādīnaṃyeva jāti paccayo hoti, sokādīnaṃ pana paccayattā avijjāyapi paccayo evāti dassetuṃ “**yasmā panā**”ti-ādi āraddhaṃ. **Etthāti** paṭiccasamuppādadesanāyaṃ. **Aviditādimidanti ma-kāro** padasandhikaro. **Satatanti** sabbakālaṃ yāva aggamaggādhigamā. **Samitanti** saṅgataṃ, abbocchinnanti attho.

Tesūti sokādīsu. **Siddhesūti** labbhamānesu. **Siddhā hoti avijjā** avinābhāvato.

Kāmayānassāti kāmayamānassa, kāmo vā yānaṃ etassāti **kāmayāno**, tassa kāmavasena yāyamānassāti attho. **Chandajātassāti** jātataṇhāchandassa. **Parihāyantīti** vigacchanti. **Ruppatīti** sokādīnā kuppāti.

Pariyuṭṭhānatāya tiṭṭhanasīlo **pariyuṭṭhānatthāyī**. “Pariyuṭṭhatthāyino”ti vā pāṭho. Tattha pariyuṭṭhātīti pariyuṭṭhaṃ, diṭṭhipariyuṭṭhānaṃ, tena tiṭṭhatīti pariyuṭṭhatthāyīti attho daṭṭhabbo.

Pañca pubbanimittānīti “mālā milāyanti, vatthāni kilissanti, kacchehi sedā muccanti, kāye vevaṇṇiyaṃ okkamati, devo devāsane nābhīramatī”ti¹ vuttāni pañca maraṇapubbanimittānīti attho. Tāni hi disvā kammanibbattakkhandhasaṅkhāte upapattibhave bhavacchandabalena devānaṃ balavasoko uppajjatīti.

Bāloti avidvā. Tena avijjāya kāraṇabhāvaṃ dasseti. **Tividhaṃ dukkhanti** tassāruppakathāsavana, kammakāraṇādassana, maraṇakālakammopaṭṭhānanidānaṃ sokādidukkhaṃ.

Āsave sādhentīti āsave gamenti bodhentīti attho.

1. Khu 1. 247 piṭṭhe Itivuttake.

Evam satīti evam bhavacakkassa aviditāditāya anādibhāve sati.
Ādimattakathananti avijjāvasena ādisabbhāvakathanam. Ādi etassa atthīti hi ādimam, bhavacakkaṃ. Tassa bhāvo ādimattam, tassa kathanam ādimattakathanam. Visesanivatti-attho vā mattasaddo, sati anādibhāve avijjā ādimhi, majjhe pariyosāne ca sabbattha siyāti ādimattāya avijjāya kathanam virujjhatīti attho. “Avijjā padhānā”ti vatvā tassā padhānabhāvaṃ dassetuṃ “**avijjāggahaṇenā**”ti-ādi āraddham. Tattha **avijjāggahaṇenāti** avijjāya uppādanena, appahānena vā, attano santāne¹ sannihitabhāvakaraṇenāti attho. **Kammādīnīti** kammavipākavaṭṭāni. **Palibodhentīti** nānādukkhaparibuyūlhe saṃsāracārake nirodhenti. **Tehīti** kilesakammavipākavaṭṭehi. Vaṭṭassa kāraṇabhāvena² padhānattā “**padhānadhammo**”ti avijjā kathitā.

Tato avijjādito. **Brahmādināti ādi**-saddena pajāpatissarapurisādike saṅgaṇhāti. Vadatīti **vado**, tam tam hitāhitam pavattāti attho. Vedeti, vediyatīti vā **vedeyyo**, sukhādim anubhavati, sabbavisaye³ vā jānāti, “sukhito dukkhito”ti-ādinā attanā, parehi ca jānāti, ñāyati cāti attho. **Brahmādinā vā attanā vāti vā**-saddo **ca**-saddattho. Tenāha “**kāravakarahitan**”ti ca-saddatthasamāsam.

Dvādasavidhasuññatāsuññanti avijjādīnam dvādasannaṃ suññasabhāvānam suññatāya suññam dvādasavidhasuññatāsuññam, dhuvabhāvādisuññatāya vā catubbidhampi suññatam ekaṃ katvā dvādasasaṅgatattā dvādasavidhāti tāya dvādasasuññatāya suññanti attho.

653. **Pubbantāharaṇatoti** pubbantato atītakotthāsato paccuppannavipākassa āharaṇato. Vedanāvasānam paricchinnam ekaṃ bhavacakkaṃ hoti. Bhavacakkekadesopi hi bhavacakkanti vuccati. Vedanā vā taṇhāsahāyāya avijjāya paccayo hotīti vedanāto⁴ avijjā, avijjāto⁵ saṅkhārāti sambajjhanato vedanāvasānam bhavacakkaṃ

1. Attano (Ka)

2. Kāraṇabhāve (Syā)

3. Savisaye (Syā, Ka)

4. Vedanāvato (Syā), Mūlaṭṭi 2. 126 piṭṭhe passitabbaṃ.

5. Avijjāvato (Syā)

paripuṇṇamevāti daṭṭhabbaṃ. Avijjāggahaṇena vā taṇhupādānāni tadavinābhāvato. Saṅkhāraggahaṇena bhavo, viññāṇādiggahaṇena jātijarāmarāṇāni, sokādayo ca gahitāti evampi vedanāvasānaṃ bhavacakkanti yuttamevetāṃ. Evaṃ taṇhāmūlake ca yojetabbaṃ. Dvinnampi hi¹ aññamaññānuppaveso hotīti. Avijjā dhammasabhāvaṃ paṭicchādetvā viparītābhinivesaṃ kārentī diṭṭhicarite saṃsāre nayati, tesāṃ vā saṃsāraṃ saṅkhārādīpavattim nayati pavattetīti **saṃsāranāyikā** vuttā. Taṇhāya taṇhācaritānaṃ saṃsāranāyikābhāve vattabbameva natthi.

Paṭhamam bhavacakkaṃ. **Phaluppattiyā**ti kattu-atthe karaṇavacanaṃ, karaṇatthe eva vā. Viññāṇādīpaccuppannaphaluppatti hi idha diṭṭhā, adiṭṭhānaṃ purimabhāve attano hetūnaṃ avijjāsaṅkhārānaṃ phalaṃ anuppādetvā anupacchijjanaṃ pakāseti, pakāsanassa vā karaṇaṃ hotīti. Atha vā purimabhavacakkaṃ dutiyena sambandhaṃ vuttanti vedanāsaṅkhātassa phalassa uppattiyā taṇhādīnaṃ hetūnaṃ anupacchedaṃ pakāseti, tasmā phaluppattiyā kāraṇabhūtāya paṭhamassa bhavacakkassa hetūnaṃ anupacchedappakāsanatoti attho. Saṅkhārādīnameva vā phalānaṃ uppattiyā avijjādīnaṃ hetūnaṃ phalaṃ ajanetvā anupacchedameva, viññāṇādīhetūnaṃ vā saṅkhārādīnaṃ anuppabandhameva pakāseti paṭhamam bhavacakkaṃ, na dutiyaṃ viya pariyosānampīti **“phaluppattiyā hetūnaṃ anupacchedappakāsanato”**ti vuttaṃ. **Anupubbapavattidīpanatoti** “saṅkhārapaccayā viññāṇaṃ, viññāṇapaccayā nāmarūpan”ti-ādinā² dhammānaṃ anupubbato pavattiyā dīpanato. “Viññāṇapaccayā nāmarūpan”ti² hi ettha aparipuṇṇāyatanaṃ kalalarūpaṃ vatvā tato uddham “nāmarūpapaccayā saḷāyatanan”ti saḷāyatanappavatti vuttā. **Sahuppattidīpanatoti** “upādānapaccayā bhavo, bhavapaccayā jāti”ti vā upapattikkhandhānaṃ ekajjhaṃ uppattiyā dīpanato. Na hi ettha paṭhame viya bhavacakke āyatanānaṃ kamena uppatti vuttā.

654. Hetu-ādīpubbakā tayo sandhī etassāti **hetuphalahetupubbakatisandhi**, bhavacakkaṃ. Hetuphalahetuphalavasena catuppabhedo aṅgānaṃ saṅgaho etassāti **catubhedasaṅgaham**. Sarūpato avuttāpi

1. Duvinnaṃ duvinnampi hi (Syā) dvinnaṃ, dvinañhi (Ka)
2. Ma 3. 109; Saṃ 1. 243; Khu 1. 77 piṭṭhādīsu.

tasmim̄ tasmim̄ saṅgahe ākirīyanti avijjāsaṅkhārādiggahaṇehi pakāsiyantīti **ākārā**. Atītahetu-ādīnaṃ vā pakārā **ākārā**. Kilesakammavipākā vipākakilesakammehi sambandhā hutvā punappunāṃ parivattantīti tesu vaṭṭanāmaṃ āropetvā “**tivaṭṭan**”ti vuttam̄, vaṭṭekadesattā vā “vaṭṭānī”ti vuttāni.

Sandhīnaṃ ādipariyosānavavattthitāti sandhīnaṃ pubbāparavavattthitāti attho.

Paritassatīti taṃ taṃ vatthum̄ pariggahakaraṇavasena tassati, taṇhāyatīti attho. **Upādiyatī**ti daḥhagāhaṃ gaṇhāti. **Purimakammabhavasminti** purimakammabhavave sati.

Tassa ca sabbhāvo kariyamānatā evāti āha “**kammabhavave kariyamāneti attho**”ti. **Dukkhādīsu mohoti** dukkhādīnaṃ ādīnavapaṭicchādako appahīno moho. **Āyūhanāti** sampiṇḍanakā dānādikiriyāya pavattanakā. Ekam̄ āvajjanam̄ etesanti ekāvajjanā, tesu **ekāvajjanesu**. **Sattame** cetanā **bhavo**. “**Yā kāci vā pana cetanā bhavo, sampayuttā āyūhanā saṅkhārā**”ti idam̄ yathādassitāya dhammaṭṭhitiññābhājanīye vuttāya paṭisambhidāpāḷiyā¹ vasena vuttam̄. Tattha hi “cetanā bhavo”ti āgatā. Bhavaniddese pana “**sātthato**”ti ettha “cetanāva saṅkhārā, bhavo pana cetanāsampayuttāpī”ti **vibhaṅgapāḷi**vasena dassitam̄. “Tattha katamo puññābhisaṅkhāro? Kusalā cetanā kāmāvacarā”ti-ādīnā hi saṅkhārānaṃ cetanābhāvo **vibhaṅgapāḷiyam̄**² vutto. Tattha **paṭisambhidāpāḷiyam̄** “cetanāsampayuttā vipākadhammattā savipākena āyūhanasaṅkhātēna saṅkhatābhisaṅkharaṇakiccena saṅkhārā”ti³ vuttā. **Vibhaṅgapāḷiyam̄** “sabbampi bhavagāmikammaṃ kammabhavo”ti⁴ bhavassa paccayabhāvena bhavagāmibhāvato, kammaṣaṃsaṭṭhasahāyatāya kammabhāvato ca upapattibhavaṃ bhāventīti “bhavo”ti vuttā. Upapattibhavabhāvanākiccaṃ pana cetanāya sātīsayanti paṭisambhidāpāḷiyā cetanā “bhavo”ti vuttā. Bhavābhisaṅkharaṇakiccaṃ cetanāya sātīsayanti vibhaṅgapāḷiyam̄ “kusalā cetanā”ti-ādīnā⁵ cetanā “saṅkhārā”ti vuttā. Tasmā tena tena

1. Khu 9. 48 piṭṭhe.

2. Abhi 2. 142 piṭṭhe.

3. Khu 9. 50 piṭṭhe.

4. Abhi 2. 143 piṭṭhe.

5. Abhi 2. 142 piṭṭhe.

pariyāyena ubhayaṃ ubhayattha vattuṃ yuttanti natthettha virodho. **Tassa phale upapattibhave nikāmanāti** “tassa sutam hoti cātumahārājikā devā dīghāyukā vaṇṇavanto sukhabahulā’ti”ādisutānusārena bhāvini upapattibhave abhikaṅkhanā. **Gahaṇanti** kāmupādānaṃ kiccenāha. **Parāmasananti** itarāni. **Āyūhanāvasāneti** tīsupi atthavikappesu vuttassa āyūhanassa avasāne.

I dhāti imasmim paccuppanabhava. Bhavantarassa atītabhavassa iminā paccuppanabhavena paṭisandhānaṃ **bhavantarapaṭisandhānaṃ**, bhavantarabhāvena vā paṭisandhānaṃ **bhavantarapaṭisandhānaṃ**, tassa vasena. Yaṃ paṭisandhīti vuccati, taṃ viññāṇanti sambandho. Tathā hi viññāṇaṃ “paṭisandhānapaccupaṭṭhānaṃ”ti vuccati. **Gabbheti** mātukucchiyaṃ, gabbhāvattāyaṃ vā.

Dvīsu atthavikappesu vutte āyūhanasaṅkhāre “**tassa pubbabhāgā**”ti āha, tatiye atthavikappe vutte “**taṃsampayuttā**”ti. Taṃsampayuttā avijjā gahitāva hotīti sambandho. Daharassa cittappavatti bhavaṅgabahulā yebhuyyena bhavantarajanakammāyūhanasamatthā na hotīti “**idha paṭipakkattā āyatanānaṃ**”ti vuttam. “**Kammakaraṇakāle sammoho dassito**”ti etena kammaṃ paccayabhūtaṃ sammohaṃ dasseti, na kammaṃ sampayuttameva.

“Tattha purimabhavasmiṃ pañca kammaṃ sambhārā, etarahi pañca vipākadharmā, etarahi pañca kammaṃ sambhārā, anāgate pañca vipākadharmāti dasa dhammā kammaṃ, dasa dhammā vipāko, iti dvīsu ṭhānesu kammaṃ, kammavaṭṭaṃ, dvīsu ṭhānesu vipāko, vipākavaṭṭanti kammaṃsaṅkhepo ca vipākasaṅkhepo ca, kammabhavo ca vipākabhavo ca kammavaṭṭaṅca vipākavaṭṭaṅca, kammaṃpavattaṅca vipākavaṭṭaṅca, kammaṃsantati ca vipākasantati ca, kiriyā ceva kiriyāphalaṅcāti—

Evam samuppannamidaṃ sahetukaṃ,
Dukkhaṃ aniccaṃ calamittaraddhavaṃ.
Dhammehi dhammā pabhavanti hetuso,
Na hettha attāva paro va vijjati.

Dhammā dhamme sañjanenti, hetusambhārapaccayā.
Hetūnaṅca nirodhāya, dhammo buddhena desito.

Hetūsu uparuddhesu, chinnaṃ vaṭṭaṃ na vaṭṭati.
Evaṃ dukkhanta kiriyāya, brahmacariyidha vijjati.
Satte ca nupalabbhante, nevuccedo na sassatan”ti¹.

Tattha kammāneva vipākaṃ sambharanti vaḍḍhentīti **kammasambhārā**, kammaṃ vā saṅkhārabhavā, tadupakāraṅkāni avijjātaṇhupādānāni **kammasambhārā**. Paṭisandhidāyako vā bhavo kammaṃ, tadupakāraṅkā yathāvuttā āyūhanasaṅkhārā, avijjādayo ca **kammasambhārā**ti kammañca kammasambhārā ca **kammasambhārā**ti ekasesavasena kammasambhāraggaṇaṃ veditabbaṃ. **Dasa dhammā kammanti** avijjādayopi kammasaḥāyatāya kammasarikkhā, tadupakārā cāti “kamman”ti vuttā. Saṅkhippanti ettha avijjādayo, viññāṇādayo cāti **saṅkhepo**, kammaṃ, vipāko ca. “Kammaṃ vipāko”ti evaṃ saṅkhipiyatīti vā **saṅkhepo**, avijjādayo, viññāṇādayo ca. Saṅkhepabhāvasāmaññaṇa pana ekavacanaṃ katanti daṭṭhabbaṃ, saṅkhepasaddo vā bhāvādhivacanaṃti kammabhāgo **kammasaṅkhepo**.

Evaṃ samuppannanti kammatopi vipāko. Tatthāpi “avijjāto saṅkhārā”ti evaṃ samuppannaṃ, tisandhi-ādivasena vā samuppannaṃ idaṃ bhavacakkanti attho. **Ittaranti** gamanadhammaṃ, vinassadhammanti attho. Tena uppādavayavantatādīpakena **anicca**-saddena, vikārapattidīpakena **calasaddena** ca adīpitaṃ kālantaraṭṭhāyitābhāvaṃ vibhāveti. **Addhuvanti** etena thirabhāvābhāvanissāraṃ. Hetu eva sambhārā **hetusambhārā**. “Ṭhānaso hetuso”ti² ettha evaṃ vuttaṃ vā ṭhānaṃ, aññaṃpi tassa tassa sādharmaṇaṃ kāraṇaṃ **sambhāro**, asādharmaṇaṃ **hetu**. **Evanti** evaṃ hetuto dhammamattasambhave, hetunirodhā ca vaṭṭacchede dhamme ca taṃnirodhāya desite satīti attho. Brahmacariyaṃ idha **brahmacariyidha satte cāti** ettha **ca**-saddo “evaṃ brahmacariyañca vijjati, sassatucchedā ca na honti”ti samuccayattho. Evañhi hetu-āyatte dhammamattasambhave satto nupalabbhati, tasmīṅca upalabbhante sassato, ucchedo vā siyāti nupalabbhante tasmīṅ neva ucchedo na sassatanti vuttaṃ hoti.

655. **Saccappabhavatoti** saccato, saccānaṃ vā pabhavato ca.

1. Abhi-Ṭṭha 2. 184 piṭṭhe.

2. Abhi 4. 175; Khu 9. 356 piṭṭhesu.

Kusalākusalaṃ kammanti vaṭṭakathāya vattamānattā sāsavanti viññāyati. **Avisesenāti** “cetanā cetanāsampayuttakā”ti visesaṃ akatvā, sabbampi taṃ kusalākusalaṃ kammaṃ samudayasaccanti vuttanti attho. “Taṇhā ca -pa- avasesā ca sāsavā kusalā dhammā”ti¹ hi cetanācetanāsampayuttavisesaṃ akatvā vuttanti, ariyasaccavisesaṃ vā akatvā samudayasaccanti vuttanti attho. **Saccavibhaṅge** hi sabbepi kilesā sabbampi bhavagāmikammaṃ “samudayasaccan”ti¹ vuttaṃ. Dutiyasaccaṃ pabhavo etassāti **dutiyasaccapabhavaṃ**. Upādānapaccayā bhavoti upapattibhavassa, kammabhavassa ca adhippetattā vuttaṃ “**paṭhamadutiyasaccadvayan**”ti.

656. **Vatthūsūti** ārammaṇesu, dukkhādīsu vā paṭicchādetabbesu vatthūsu. **Sammohetīti** dhammasabhāvaṃ jānituṃ paṭivijjhituṃ adenti tassa paṭicchādanavasena sammoheti. **Vatthuntī** idha ārammaṇaṃ adhippetam. **Aññamaññaṅca upatthambheti** aññamaññasannissayena vinā ṭhātuṃ asakkontā dve naḷakalāpā viya. **Savisayeti** yathāsakaṃ visaye rūpāyatanādike. Jāyamānānaṃ khandhānaṃ vikārabhāvena labbhamānā jāti te janenti viya hotīti vuttaṃ “**khandhe ca janeti**”ti. Tenāha “**tesaṃ abhinibbattibhāvena pavattattā**”ti. **Pākabhedabhāvaṅca adhiṭṭhatīti** etthāpi “khandhe janeti”ti ettha vuttanayeneva attho gahetabbo. Pākabhedavasena vattaticceva attho. Paccatīti pāko, bhijjatīti bhedo, pāko ca bhedo ca **pākabhedam**, tassa bhāvaṃ paccanaṃ, bhijjanaṅcāti attho. **Sokādīnaṃ adhiṭṭhānattāti** tesaṃ kāraṇattā, tehi siddhāya avijjāya sahitehi² saṅkhārehi paccayo ca hoti bhavantarapātubhāvāyāti adhippāyo. Cuticittaṃ vā paṭisandhiviññāṇassa anantarapaccayo hotīti “**paccayo ca hoti bhavantarapātubhāvāyā**”ti vuttaṃ. Taṃ pana cuticittaṃ avijjāsankhārarahitaṃ bhavantarassa paccayo na hotīti sasahāyattadassanatta³ māha “**sokādīnaṃ adhiṭṭhānattā**”ti. **Dvedhāti** attano attano⁴ sarasena, dhammantarapaccayabhāvena cāti dvedhā dvedhā. Byāpanicchālopena hi niddeso.

1. Abhi 2. 114, 115 piṭṭhādīsu.

2. Janitehi (Syā)

3. Sahāyadassanattaṃ (Mūlaṭī 2. 128 piṭṭhe)

4. Attanoyeva (Mūlaṭī 2. 129 piṭṭhe)

657. “**Avijjāpaccayā saṅkhārā**”ti etena saṅkhārānaṃ paccayuppannatādassanena “ko nu kho abhisāṅkharotīti esa no kallo pañho”ti dasseti, tenetaṃ kārakadassananivāraṇaṃ. Attā bhavato bhavantaraṃ saṅkamatīti dassanaṃ **attasaṅkantidassanaṃ**, taṃ saṅkhārapaccayā viññāṇupattivacanena nivāritaṃ hoti. Pañcannaṃ khandhānaṃ abhedato eko attāti gahaṇaṃ **ghanasaññā**, taṃ yamakatālakandaṃ bhindantena viya “viññāṇapaccayā nāmarūpamattametan”ti vacanena nivāritaṃ hoti. “**Evamādidassananivāraṇaṇ**”ti etena “socati paridevati dukkhito”ti-ādidassananivāraṇamāha. Sokādayopi hi paccayāyattā avasavattinoti “jātipaccayā jarāmarāṇaṃ soka -pa- sambhavanti”ti¹ etena vuttamevāti. **Micchādassananivāraṇatopi** kārakadassanādinānāvidhamicchābhinivesanivāraṇatopi.

658. “**Salakkhaṇasāmaññalakkhaṇavasena**”ti etena sabbappakārena dhammānaṃ yāthāvato adassanamāha tadubhayavinimuttassa dhammesu paramatthato passitabbabhāvassa abhāvato. **Upakkhalanaṃ viya** dukkhupattihetuto. **Patanaṃ viya** bhavantarapapātato. **Gaṇḍapātubhāvo viya** dukkhatāsūlayogato, kilesāsucipaggharaṇato ca. **Gaṇḍabhedapīlakā viyāti** bhedanatthaṃ paccamāne gaṇḍe tassa upari jāyamānā khuddakapīlakā viya, gaṇḍassa vā anekadhābhede pīlakā viya. **Ghaṭṭanaṃ viya** saṃghaṭṭanarasatāya phasso. **Ghaṭṭanadukkhāṃ viyāti** ghaṭṭanato jātaṃ dukkhāṃ viya tividhadukkhātāvasena tissannampi vedanānaṃ dukkhabhāvato. **Paṭikārābhilāso viyāti** samudāyassa ekadesanidassanabhāvenāha. **Asappāyaggahaṇaṃ viya** bahuvidhānatthupattinimittato. **Asappāyalepanaṃ viya** dukkhahetuno sasantāne sannidhāpanato. **Gaṇḍavikārapātubhāvo viya** attabhāvagaṇḍassa nibbattivikārabhāvato, tannimittañcassa sūnabhāvādisambhavato. Sūnatāsarāgapubbagghaṇādayo hi **gaṇḍavikārā**. Sarasato gaṇḍassa bhijjanaṃ pākena vinā na hotīti bhedagghaṇenevassa pākopi gahitoti katvā āha “**gaṇḍabhedo viya jarāmarāṇaṇ**”ti. Gaṇḍassa vā visadisāpatti, bhijjanañca **gaṇḍabhedo**, tattha visadisāpatti pākoti veditabbaṃ.

1. Ma 3. 109; Saṃ 1. 243; Khu 1. 77 piṭṭhādīsu.

Upamāhi bhavacakkaṃ viññāpentena ekādhiṭṭhānehi upamāvisesehi taṃ viññāpetvā idāni nānādhiṭṭhānehi viññāpetuṃ “**yasmā vā**”ti-ādi vuttaṃ. Tattha paṭalābhībhūtacakkhuko rūpāni na passati, kiñci passantopi viparītaṃ passati, evaṃ avijjābhībhūto dukkhādīni na paṭipajjati na passati, micchā vā paṭipajjatīti **paṭalam viya avijjā. Kosakārakimi viya** attanāva katattā, vaṭṭassa attano eva paribbhamanakāraṇattā ca **kosappadesā viya saṅkhārā. Saṅkhārapariggahaṃ vinā patiṭṭhaṃ** alabhamānaṃ **viññānaṃ** pariṇāyakapariggahaṃ vinā patiṭṭhaṃ alabhamāno **rājakumāro viyāti** pariggahena vinā patiṭṭhālābho ettha upamopameyyasāmaññaṃ. **Upapattinimittanti** kammādi-ārammaṇamāha. **Parikkappanatoti** ārammaṇakaraṇato, sampayuttana vā vitakkena vitakkanato. Devamanussamiga¹ vihaṅgādivividhappakāratāya **māyā viya nāmarūpaṃ. Patiṭṭhāvisesena** vuddhivisesāpattito **vanappagumbo viya saḷāyatanam.** Āyatanānaṃ visayivisayabhūtānaṃ aññaṃaññābhimukhabhāvo **āyatanaghaṭṭanam.** Tato āyatanaghaṭṭanato dvayasamghaṭṭanuppattito, vedanādukkhahetuto ca **aggi viya phasso. Sapaṭiḷāhato dāho viya vedanā. Uparūpari taṇhāpavaḍḍhanato** loṇūdakapānaṃ viya visayānubhavanaṃ. Ārammaṇe pātukamyatābhāvato **pipāsā viya taṇhā. Tadassupādānanti** taṃ abhilāsakaraṇaṃ taṇhā diṭṭhābhinandaṃ assa taṃsamaṅgino puggalassa, tadassa vā bhaveyya upādānaṃ. Byasanāvahatāya ajānanato bhavupādānaṃ macchassa baḷisupādānaṃ viya. Ettha ca saṅkhārādīnaṃ kosappadesapariṇāyakādīhi dvīhi dvīhi sadisatāya dve dve upamā vuttāti veditabbā.

659. Koci agambhīro eva gambhīro viya khāyati purāṇaṭiṇapaṇṇādibharito pabbatasāṅkhepe jalāsayo viya, na evamayam. Ayaṃ pana gambhīrova hutvā obhāsati pakāsati dissatīti **gambhīrāvabhāso. Yathārahanti** atthādivasena yathānurūpaṃ.

Jātito jarāmarāṇaṃ na na hoti, hoti evāti avadhāraṇe siddhe “siyā nu kho jarāmarāṇaṃ jātito, aññatopi”ti āsaṅkāyaṃ tadāsaṅkānivattanatthaṃ “**na ca jātim vinā aññato hoti**”ti vuttaṃ. Tattha aññaggahaṇaṃ jātiyā paṭiyogivisaṃ, na

1. Devamanussakimi (Ka), Mūlaṭi 2. 129 piṭṭhe passitabbaṃ.

aññamattavisayaṃ “jātim vinā”ti vacanato. Tenassa nāññaṃ jātiyā sahakārikāraṇabhūtaṃ nivattitaṃ hoti. Esa nayo ito paresupi. **Itthanti** idaṃ pakāraṃ, iminā pakārenāti attho. **Jātipaccayasambhūtasamudāgataṭṭho**ti jātipaccayasambhūtaṃ hutvā sahitassa attano paccayānurūpassa uddhaṃ uddhaṃ āgatabhāvo, anuppavattaṭṭho attho. Atha vā sambhūtaṭṭho ca samudāgataṭṭho ca **sambhūhasamudāgataṭṭho**. “Na jātito jarāmaraṇaṃ na hoti, na ca jātim vinā aññato hoti”ti hi jātipaccayasambhūtaṭṭho vutto. **Itthañca jātito samudāgacchatī**ti jātipaccayasamudāgataṭṭho, yā yā jāti yathā yathā paccayo hoti, tadanurūpapātubhāvoti attho.

Tattha “na jātito jarāmaraṇaṃ na hoti”ti iminā jarāmaraṇassa jātipaccayatāya avitathataṃ dasseti, “na jātimvinā aññato jarāmaraṇaṃ hoti”ti iminā anaññathattaṃ, “itthañca jātito samudāgacchatī”ti iminā tathataṃ. Tena ca yathā paccayadhammā attano paccayuppannānaṃ paccayabhāve, tathā avitathā anaññathā, evaṃ paccayuppannadhammāpi tabbhāveti dasseti. Esa nayo sesesupi. “Hetuphale ñāṇaṃ atthapaṭisambhidā”ti etena vacanena atthassa hetuphalabhāvo kathaṃ ñātabboti? “Atthapaṭisambhidā”ti etassa samāsapadassa avayavapadatthamā dassentena “hetuphale ñāṇaṃ”ti vuttattā. “Atthe paṭisambhidā atthapaṭisambhidā”ti ettha hi “atthe”ti etassa atthaṃ dassentena “hetuphale”ti vuttamā, “paṭisambhidā”ti etassa atthaṃ dassentena “ñāṇaṃ”ti, tasmā hetuphala-atthasaddā ekatthā, ñāṇapaṭisambhidā cāti imamattaṃ vadantena sādhitō atthassa hetuphalabhāvo.

Yenākārenāti yena pavatti-ākārena. Sabhāvadhammā hi paccayavisesasiddhena pavatti-ākārena visiṭṭhākārā hontī. Tenāha “sabbe dhammā sabbākārena buddhassa bhagavato ñāṇamukhe āpāthamāgacchantī”ti¹. **Yadavatthāti** yāya avatthāya avatthitā. Avatthāvisesavanto hi dhammā tena tena avatthāvisesena taṃ taṃ atthakiccaṃ sādhetuṃ samatthā hontī. Svāyaṃ pavatti-ākāro, avatthāviseso ca avijjāyapi anupacitakusalasambhārehi duravabodhato eva ñāṇena

1. Khu 7. 277; Khu 8. 175; Khu 9. 376 piṭṭhesu.

alabbhaneyyapatiṭṭho cāti āha “**tassa -pa- gambhīro**”ti. **Tassa** ākārassa, avatthāya ca. **Hetumhi** ñānanti ettha hetuno dhammapariyāyatā vuttanayeneva veditabbā.

Assāti paṭiccasamuppādassa. **Tena tena kāraṇenāti** tena tena veneyyānaṃ bujjhanānugunaṭāsaṅkhātena kāraṇena. **Tatthāti** tasmiṃ desanappakāre. **Anulomapaṭilomatoti** nayidha paccayuppādā paccayuppannuppādasaṅkhātāṃ anulomaṃ, paccayanirodhā paccayuppannanirodhasaṅkhātāṃca paṭilomamāha. Ādito pana antagamanamanulomaṃ, antato ca ādigamaṇaṃ paṭilomamāha. Ādito paṭṭhāya anulomadesanāya, antato paṭṭhāya paṭilomadesanāya ca **tisandhicatusaṅkhepaṃ**. “Ime cattāro āhārā kimnidānā”ti-ādikāya¹ vemajjhato paṭṭhāya paṭilomadesanāya, “cakkhuṅca paṭicca rūpe ca uppajjati cakkhuviññānaṃ, tiṇṇaṃ saṅgati phasso, phassapaccayā vedanā”ti-ādikāya² anulomadesanāya ca **dvisandhitisaṅkhepaṃ**. “Saṃyojanīyesu bhikkhave dhammesu assādānupassino viharato taṇhā pavaddhati, taṇhāpaccayā upādānaṃ”ti-ādīsu³ **ekasandhidvisisaṅkhepaṃ**. Katthaci ekaṅgopi ca paṭiccasamuppādo desito, so “tatra bhikkhave sutavā ariyasāvako”ti-ādinā⁴ dassito eva.

Avijjādīnaṃ sabhāvo paṭivijjhīyatīti **paṭivedho**. Vuttaṃ hetam **aṭṭhakathāyaṃ** “tesaṃ tesaṃ vā tattha tattha vuttadhammānaṃ paṭivijjhitaḥ salakkhaṇasaṅkhāto aviparītasabhāvo paṭivedho”ti⁵. Jānanalakkhaṇassa ñāṇassa paṭipakkhabhūto avijjāya **aññāṇaṭṭho**. Ārammaṇassa paccakkhakaṇaṇena dassanabhūtassa paṭipakkhabhūto **adassanaṭṭho**. Yena panesā dukkhādīnaṃ yāthāvasarasam paṭivijjhitaṃ na deti, chādetvā pariyanandhitvā⁶ tiṭṭhati, so tassā **saccāsampaṭivedhaṭṭho**. Apuññābhisaṅkhārekadeso **sarāgo**, añño **virāgo**. Rāgassa vā apaṭipakkhabhāvato rāgapavaddhako apuññābhisaṅkhāro sabbopi **sarāgo**,

1. Saṃ 1. 253 piṭṭhe.

2. Ma 1. 158, 326; Ma 3. 328, 332, 333; Saṃ 1. 301; Saṃ 2. 261; Abhi 4. 248, 249 piṭṭhādīsu.

3. Saṃ 1. 312, 315 piṭṭhesu.

4. Saṃ 1. 321 piṭṭhe.

5. Abhi-Ṭṭha 1. 23 piṭṭhe.

6. Pariyonaddhitvā (Syā)

itaro tappaṭipakkhabhāvato **virāgo**. “Dīgharattaṃ hettaṃ bhikkhave assutavato puthujjanassa ajjhositāṃ mamāyitaṃ parāmaṭṭhaṃ etaṃ mama, esohamasmi, eso me attā”¹ti¹ attaparāmāsassa viññāṇaṃ visesato vatthu vuttanti viññāṇassa **suññatattḥo** gambhīro. Attā vijānāti saṃsaratīti sabyāpāratāsaṅkanti-abhinivesabalavatāya **abyāpāratṭha-asāṅkantiṭṭhasandhipātubhāvattḥā** ca gambhīrā. **Nāmarūpassa** ṭṭhasandhikkhaṇe **ekuppādo**, pavattiyāṃ visuṃ visuṃ yathārahaṃ **ekuppādo**, nāmassa rūpena, rūpassa ca nāmena asampayogato **vinibbhogo**, nāmassa nāmena, rūpassa ca rūpena, ekaccassa ekaccena **avinibbhogo** yojetabbo. Ekuppādekanirodhe hi avinibbhoge adhippete so rūpassa ca ekakalāpavuttino labbhati. Atha vā ekacatuṅkārābhavesu nāmarūpanāṃ asahavattanato aññamaññavinibbhogo, pañcavokārābhavesu sahavattanato avinibbhogo ca veditabbo.

Adhipatiyattḥo nāma idha indriyapaccayabhāvo. “Lokopeso dvārāpesā khettampetan”²ti² vuttā **lokādi-atthā** cakkhādīsu pañcasu yojetabbā. Manāyatanassāpi lujjanato, manosamphassādīnaṃ dvārākhettabhāvato ca ete atthā sambhavanti eva. Āpāthagatānaṃ rūpādīnaṃ pakāsanayogyatālakkaṇaṃ obhāsaṇaṃ cakkhādīnaṃ **visayibhāvo**, manāyatanassa vijānaṇaṃ. **Samghattanaṭṭho** visesato cakkhusamphassādīnaṃ pañcannaṃ, itare channampi yojetabbā. Phusanañca phassassa sabhāvo, saṃghattanaṃ raso, itare upaṭṭhānākārā. **Ārammaṇarasānubhavanaṭṭho** rasavasena vutto, **vedayatṭho** lakkaṇavasena. Sukhadukkhamaññhattabhāvā yathākkamaṃ tissannaṃ vedanānaṃ sabhāvavasena vuttā. Attā vedayatīti abhinivesassa balavatāya **nijjivattḥo** vedanāya gambhīro. Nijjivāya vā vedanāya vedayitaṃ nijjivavedayitaṃ, nijjivavedayitameva attho **nijjivavedayatṭho**. Sappītikataṇhāya **abhinanditaṭṭho**, balavatarataṇhāya gilivā pariniṭṭhāpanaṃ **ajjhosānaṭṭho**. Itaro sādharmaṇavasena veditabbo. **Ādānaggahaṇābhinivesattḥā** catunnampi upādānaṇaṃ samānā, **parāmāsaṭṭho** vutto diṭṭhupādānaṇameva, tathā **duratikkamaṭṭho**. “Diṭṭhikantāro”³ti³ hi vacanato diṭṭhīnaṃ duratikkamāṭā,

1. Saṃ 1. 321 piṭṭhe.

2. Abhi 1. 157, 158 piṭṭhesu.

3. Abhi 1. 94 piṭṭhe.

daḷhaggahaṇattā vā catunnampi **duratikkamaṭṭho** yojetabbo.

Duratikkamatāyapi hi taṇhāya **samuddaṭṭho** vutto.

Yonigatiṭṭhinivāsesukhipananti samāse bhumavacanassa alopo daṭṭhabbo.

Evañhi tena āyūhanābhisaṅkharapaṇadānaṃ samāso hoti. Jarāmarāṇaṅgaṃ maraṇappadhānanti maraṇaṭṭhā eva **khayādayo** gambhīrāti dassitā.

Navanavānañhi khayena khaṇḍiccādi-paripakkappavatti jarāti, khayatṭho vā jarāya vuttoti daṭṭhabbo. Navabhāvāpagamo hi khayoti vatthum yuttoti.

Vipariṇāmatṭho dvinnampi. Santativasena vā jarāya khayavayabhāvo, sammutikhaṇikavasena maraṇassa bheda-vipariṇāmatā yojetabbā.

660. **Atthanayāti** atthānaṃ nayā, avijjādi-atthehi ekattādī sakena bhāvena nayanti gamentīti¹ ekattādayo, tesam nayāti vuttā. Nīyantīti hi nayāti. Atthā eva vā ekattādibhāvena nīyamānā nīyamānā **atthanayāti** vuttā. Nīyanti etehīti vā nayā, ekattādīhi ca atthā “ekan”ti-ādinā nīyanti, tasmā ekattādayo atthānaṃ nayāti **atthanayā**.

Aṅkurādibhāvenāti

aṅkurapattanālakhandhasākhāpallavapalāsādibhāvena pavattamāne avayave ekajjhaṃ gahetvā santānānupacchedena bījaṃ rukkhabhāvaṃ pattam rukkhabhāvena pavattam taṅca ekattena vuccatīti **santānānupacchedo** yathā ekattam, evaṃ idhāpi avijjāsākhārādihetuhetusaṃsuppannānaṃ santānānupacchedo ekasantaṭipatitā **ekattanayoti** dasseti.

“**Hetuphalasambandhenā**”ti etena santānānupacchedaṃ vibhāveti. Satipi hi hetuphalānaṃ paramatthato bhede hetubhāvena, phalabhāvena ca tesam sambandhabhāvoyevettha **santānānupacchedo**, yato yasmim santāne kammaṃ nibbattaṃ, tattheva phaluppattīti katassa vināso, akatassa abbhāgamo ca natthīti. **Ekattaggahaṇatoti** hetuphalānaṃ bhedaṃ anupadhāretvā hetum, phalaṅca abhinnaṃ katvā ubhinnaṃ ekabhāvassa abhedassa gahaṇena. “Tadeva viññānaṃ sandhāvati saṃsaratī”ti-ādinā **sassatadiṭṭhiṃ upādiyati**.

Lakkhaṇavavatthānanti sabhāvavavatthānaṃ hetuno, phalassa ca bhinnasabhāvātāvabodho. **Bhinnasantānassevāti** sambandharahitassa nānattassa

1. Nīyanti gamentīti (Ka), nīyanti gammentīti (Mūlaṭī 2. 131 piṭṭhe)

gahaṇato añño mato, añño jāto, tasmā “sattantaro ucchinno, sattantaro uppanno”ti gaṇhanto **ucchedadiṭṭhim upādiyati**.

Amhehi uppādetabbanti ānetvā sambandho. **Byāpārābhāvo** anabhisandhitāya abyāvaṭatā. **Sammā passantoti** “nirīhā nijjīvā dhammamattā”ti passanto. Sabhāvo eva niyamo **sabhāvaniyamo** “sasambhāraggino uddhamukhatā, sasambhāravāyuno tiriyaḡamanān”ti evamādi viya. Tena siddho yathāsakaṃ paccayuppannassa **hetubhāvo**. “Kassaci kattuno abhāvā na kāci kiriyā phalapabandhini”ti **akiriyadiṭṭhim upādiyati**.

“Khīrato dadhi, na udakato, tilato telam, na vālikato”ti sabbato sabbasambhavābhāvadassanena **ahetukadiṭṭhim** hetu-anurūpameva phalam passanto **akiriyadiṭṭhim pajahati**. **Yato kutocīti** yadi aññasmā aññassa uppatti siyā, vālikato telassa, ucchuto khīrassa kasmā uppatti na siyā, tasmā na koci kassaci hetu atthīti **ahetukadiṭṭhim**, avijjamānēpi hetumhi niyatatāya tilagāvīsukkasoṇitādīhi telakhīrasarīrādīni pavattantīti **niyatīvādaṅca upādiyati**ti viññātabbam yathāraham.

661. Kasmā? Yasmā idaṅhi bhavacakkaṃ apadāletvā saṃsārabhayamatīto na koci supinantarepi atthīti sambandho. **Agādham** appatiṭṭham **duratīyānaṃ** duratikkamaṃ. **Asanivikkamivāti** asanimaṇḍalamiva. Taṅhi nimmathanameva, nānimmathanaṃ pavattati, evaṃ bhavacakkampi ekantadukkuppādanatova “**niccanimmathanaṃ**”ti vuttaṃ.

Ñāṇāsina apadāletvā saṃsārabhayamatīto natthīti etassa sādhakasuttaṃ dassento “**vuttampi cetan**¹”ti-ādimāha. Tantūnaṃ ākulakaṃ tantākulakaṃ, tantākulakamiva jātā **tantākulakajātā**, kilesakammavipākehi ativiya jaṭitāti attho. Kuliya sakuniyā nīḍaṃ kulikaṃ, taṃ viya jātā **kulikuṇḍikajātā**². Muñjā viya, pabbajā viya ca bhūtā jātā **muñjapabbacabhūtā**.

1. Vuttampi hetam (Ka) 2. Kulāgaṇṭhikajātā (Ka), guṇāguṇḍikam (Mūlaṭi 2. 132 piṭṭhe)

Tadubhayam kira tiṇam ākulam jaṭitam hutvā vaḍḍhati. Vaḍḍhiyā abhāvato **apāyam**, dukkhagatibhāvato **duggatim**, sukhasamussayato vinipatitattā **vinipātañca**, catubbidham apāyam “kandhānañca paṭipāṭi”¹ti-ādinā¹ vuttam **samsārañca nātivattati**. Samsāro eva vā sabbo idha vaḍḍhi-apagamādi-atthehi apāyādināmako vutto kevalam dukkhakkhandhabhāvato.

Paṭiccasamuppādaniddesavaṇṇanā niṭṭhitā.

Iti sattarasamapricchedavaṇṇanā.

1. Visuddhi 2. 176; Di-Ṭṭha 2. 86; Sam-Ṭṭha 2. 89; Am-Ṭṭha 2. 386; Abhi-Ṭṭha 1. 11; Abhi-Ṭṭha 2. 142; Suttanipāta-Ṭṭha 2. 151; Udāna-Ṭṭha 245; Itivuttaka-Ṭṭha 55, 190; Theragāthā-Ṭṭha 1. 191, 257; Paṭisam-Ṭṭha 2. 18; Cūlaniddesa-Ṭṭha 5; Buddhavaṃsa-Ṭṭha 115 piṭṭhādīsu.

18. Diṭṭhivisuddhiniddesavaṇṇanā

Nāmarūpapariggahakathāvaṇṇanā

662. Yā visuddhiyo sampādetabbāti sambandho. **Imesu** yathāvicāritesu khandhādīsu vipassanāya **bhūmibhūtesu dhammesu**. Ganthassa uggaṇhanam vācuggatakaraṇam **uggaho**, parito sabbathāpi atthassa nātumicchā **paripucchā**, savanupaparikkhādivasena tadatthassa manasikāravidhi, tadubhayavasena yasmā tatthapi nāṇam svāsevitam hoti, tasmā vuttam “**uggahaparipucchāvasena nāṇaparicayam katvā**”ti, khandhādīsu sutamayam nāṇam uppādetvāti attho. **Vitthāritameva**, tasmā tattha vitthāritanayānusārena sīlavisuddhi sampādetabbāti adhippāyo. Upacārasamādhipi appanāsamādhi viya vipassanāya adhiṭṭhānabhāvato cittavisuddhiyevāti āha “**sa-upacārā**”ti. **Veditabbāti** attano santāne nibbattanavaseneva veditabbā. Evañhi tā paccakkhato veditā nāma honti, tasmā veditabbā sampādetabbāti vuttam hoti. **Veditabbāti** vā samāpattisukhādhi gamavasena anubhavitabbāti attho. Na hi kevalena jānanamattena cittavisuddhiyam patiṭṭhito nāma hoti, na ca tattha apatiṭṭhāya uparivisuddhim sampādetum sakkāti.

Nāmarūpānam yāthāvadassananti nāmassa, rūpassa ca vibhajja yathābhūtasabhāvadassanam. Nāmaggaṇaṇena cettha vedanādīnam catunnam tebhūmakānam khandhānam gahaṇam, na “viññāṇapaccayā nāmarūpan”ti ettha viya viññāṇam vinā, nāpi “nāmañca rūpañca”ti¹ ettha viya sanibbānehi lokuttarakkhandhehi saddhinti datṭhabbam.

663. Yāti pajjati etenāti yānam, samathova yānam samathayānam, tam etassa atthīti samathayāniko. Jhāne, jhānūpacāre vā patiṭṭhāya vipassanam anuyuñjantassetam nāmam, tena **samathayānikena**. “**Ṭhapetvā nevasaññānāsaññāyatanan**”ti idaṁ bhavaggadhammānam ādikammikassa duppariggahatāya vuttam. **Lakkhaṇarasādivasena pariggahetabbā** nāṇena paricchijja gahetabbā, pariggahavidhi pana **khandhaniddese**² vuttā evāti adhippāyo. Ārammaṇābhimukhanamanam ārammaṇena vinā appavatti, tena namanatṭhena,

1. Dī 3. 178, 228; Abhi 1. 14 piṭṭhesu.

2. Visuddhi 2. 66 piṭṭhe.

nāmakaraṇaṭṭhena vā. Vedanādayo hi arūpadhammā sabbadāpi ca phassādināmakattā pathavī-ādayo viya kesakumbhādināmantarānāpajjanato attanāva katanāmatāya nāmakaraṇaṭṭhena “**nāman**”ti vuccanti. Atha vā adhivacanasamphasso viya adhivacanaṃ nāmaṃ antarena anupacitasambhārānaṃ gahaṇaṃ na gacchantīti nāmāyattaggahaṇatāya vedanādayo “**nāman**”ti vuccanti, rūpaṃ pana vināpi nāmasavanaṃ attano ruppanasabhāveneva gahaṇaṃ gacchati. **Vavatthāpetabbanti** asaṅkarato ṭhapetabbaṃ, aññaṃaññaṃ, rūpena ca amissitaṃ katvā citte ṭhapetabbanti attho.

Nāmarūpapariggaho ca nāmāyāvadeva tassa paṭinissajjanatthanti tadānurūpameva nidassanaṃ dassento “**yathā nāmā**”ti-ādimāha. **Ruppanatoti** ettha ruppanaṭṭho “sītādivirodhipaccayasannipāte visadisuppatti”ti-ādinā¹ **khandhaniddesavaṇṇanāyaṃ** vuttōyeva. Evaṃ visuṃ nāmapariggahaṃ, rūpapariggahaṃca dassetvā idāni ekajjhaṃ nāmarūpapariggahaṃ dassetuṃ “**tato namanalakkhaṇaṃ**”ti-ādi vuttaṃ.

664. Iti arūpamukhena vipassanābhinivesaṃ dassetvā idāni rūpamukhena taṃ dassento “**suddhavipassanāyāniko panā**”ti-ādimāha. Tattha samathayānikassa samathamukhena vipassanābhiniveso, vipassanāyānikassa pana samathaṃ anissāyāti āha “**suddhavipassanāyāniko**”ti, samathabhāvanāya amissitavipassanāyānavāti attho. **Ayameva vā samathayānikoti** yathāvutto samathayāniko eva vā. Tena samathayānikassāpi rūpamukhena vipassanābhiniveso labbhati, na arūpamukhenevāti dasseti. **Tesaṃ tesaṃ dhātupariggahamukhānanti** “yaṃ thaddhalakkhaṇaṃ, ayaṃ pathavīdhātū”ti-ādinā² saṅkhepamanasikārādivasena vuttesu terasasu dhātupariggahamukhesu. Kammasamuṭṭhāno nāma keso cammabbhantaragato. **Tatthevāti** tasmiṃyeva kammasamuṭṭhāne kese. Kāyappasādassa viya bhāvassāpi sakalasarīrabhyāpitāya “**bhāvassa atthitāyā**”ti vuttaṃ. Puna **tatthevāti** tasmiṃyeva kesasaññite rūpasamudāye. **Aparānipīti** pubbe vuttāni kammasamuṭṭhānāni vīsati, imāni āhārasamuṭṭhānādāni catuvīsati rūpānīti sabbānīpi **catucattālīsa**,

1. Visuddhi-Ṭī 2. 86 piṭṭhe.

2. Visuddhi 1. 346 piṭṭhe.

tañca kho tattha labbhamānasantatisīsasāmaññena veditabbaṃ.

“**Catucattālīsā**”ti ca idaṃ saddassa aniyatattā vuttaṃ. Na hi sabbakālaṃ utucittato rūpaṃ uppajjantaṃ sasaddameva uppajjatīti. **Evanti** yathā kese, evaṃ lomādīsu catusamuṭṭhānikesu. **Catuvīsaticoṭṭhāsesūti** dvattimsāya koṭṭhāsesu vakkhamāne aṭṭha koṭṭhāse apanetvā catuvīsaticoṭṭhāsesu. Sedādīnaṃ ātapūpatāpādīnā, cittavikārena ca uppajjanato te **utucittasamuṭṭhānā** vuttā.

Dvattimsakoṭṭhāsagatesu rūpesu pākaṭesu jātesu tadaññānīpi pākaṭāni hontīti tānīpi dassetuṃ “**apare**”ti-ādi vuttaṃ. Tattha **apare dasa ākārāti** tejoyāyokoṭṭhāsavasena apare dasa ākārā. **Kammajeti** bhūtakathanāṃ, na viśesaṇaṃ asitādīparipācākassa tejjassa akammajassa abhāvato. **Tathā cittajeti** ca ekantacittasamuṭṭhānattā assāsapassāsānanti keci, taṃ na, acittajasantāne pavattānaṃ utujabhāvato. Abbhantarattā eva hi te cittajā, na bahiddhā, tasmā tattha “**cittaje**”ti idaṃ viśesaneva, ayañca attho heṭṭhā ānāpānakathāyaṃ vuttoyeva. **Sesesūti** santappanādivasena ceva uddhaṅgamādivasena ca pavattesu tejoyāyokoṭṭhāsesu.

Cakkhudasaṅkādīsu padhānarūpaṃ cakkhādayoti tesu labbhamānaṃ vatthudvārabhāvaṃ avayavakiccaṃ samudāye āropetvā vuttaṃ “**vatthudvāravasena pañca cakkhudasaṅkādayo**”ti. Vatthuvaseṇa hadaya vatthudasaṅkāti yojetabbaṃ, ekayoganiddiṭṭhānampi ekadeso anuvattatīti. **Sabbānipīti** yathāvuttagaṇanāyaṃ catunnavuticatusatādhikāni saḥassarūparūpāni¹. Koṭṭhāsāvayavānaṃ, pana tadavayavakalāpānañja bhede gayhamāne ativiya tato bahutaro rūpabhedo hoti, so pana bhedo idha ādikammikassa duppariggahoti na gahetabbo.

Kāmaṃ vatthuvaseṇāti arūpadhammā pākaṭā honti, dvāravaseṇa pana pariggaho anākuloti katvā vuttaṃ “**dvāravaseṇa arūpadhammā pākaṭā**”

1. Pañcāsīticatusatādhikāni saḥassasahassarūparūpāni (Syā, Ka) saccasañkhepe pana yathāvuttagaṇanāto assāsapassāsakoṭṭhāse saddarūpañca, kāyadvāravaseṇa punagahitaṃ kāyadasakañca hāpetvā cittotujavasena dve saddanavakāni pakkhipitvā ekādhikāni diyaḍḍhasaḥassarūparūpāni (1501) dassitāni (46, 53 gāthāsu)

hontī”ti. Sabbasaṅgāhikavasena **“ekāsīti lokiyacittānī**”ti vuttaṃ, lābhino eva pana mahaggatacittāni supākaṭāni honti. **Avisesenā**ti sādharmaṇato. Phassādayo hi satta cetasikā cakkhuviññāṇādīhipi uppajjanato sabbacittuppādasādhāraṇā. **Sabbepi teti ekāsīti lokiyacittāni**, taṃsampayuttaphassādayoti sabbepi te arūpadhamme. Ārammaṇādivibhāgena pana cittuppādabhede gayhamāne tato bahutaro eva hoti, so pana idha nādhippeto.

665. Assa cakkhupasādassa nissayabhūtā pana catasso dhātuyoti sambandho. Sahajātarūpāni tassa cakkhupasādassa icceva sambandho. **Tatthevā**ti tasmiṃyeva sasambhāracakkhupadese. **Anupādinna**rūpānīti pubbevuttarūpānaṃ upādinna-rūpattā vuttaṃ, akammajarūpānīti attho. **Sesānī**ti paṭhamaṃ cakkhuno vuttattā tato sesāni, tena pana saddhiṃ catupañña-rūpāni honti. Cakkhudasakādīsū ekassapi aggahetabbato **“avasesāni tecattālīsa rūpānī**”ti vuttaṃ. Saddassa aniyatattā taṃ aggahetvā **“tecattālīsa rūpānī**”ti vatvā puna utucittasamuṭṭhāne dve sadde gahetvā **“pañcaccattālīsā**”ti kecivādo dassito.

Avasesarūpānīti “dasa dhātuyo”ti vutte dvādasa rūpadhamme ṭhapetvā avasesāni cha nipphanarūpāni. Rūparūpāneva hi idha pariggayhanti, na rūpaparicchedavikāralakkhaṇāni. Cakkhusannissayarūpārammaṇabhāvasāmaññaena, cittabhāvasāmaññaena ca kusalākusalavipākatāya duvidhampi cakkhuviññāṇaṃ cittantveva vuttaṃ. **Evanti** iminā “cakkhuṃ nissāyā”ti-ādinā vuttaṃ, avuttañca “sotaṃ nissāyā”ti-ādikaṃ saṅgaṇhāti. **Manoviññāṇadhātū**ti etthapi “ekā”ti padaṃ ānetvā sambandhitabbaṃ “ekā manoviññāṇadhātū”ti. Aḍḍhena ekādasa **aḍḍhekādasa**, aḍḍhaṃ vā ekādasamaṃ etāsanti **aḍḍhekādasa**. **Aḍḍhaṭṭhamā**ti etthāpi eseva nayo.

666. **Cakkhudhātuyāṃ vuttanayenevā**ti “yaṃ loko setakaṇhamaṇḍalavicittan”ti-ādinā¹ vuttanayena.

667. **Idha bhikkhu imasmim sarīreti** ajjhataṃ vipassanābhinivesadassanavasena vuttaṃ. Teneva hi ekasseva bhāvassa gahitattā

1. Visuddhi 2. 224 piṭṭhe.

“**sattarasa rūpāni sammasanupagāni**”ti āha. Sammasitum sakkuṇeyyāni sammasanam upagacchanṭi **sammasanupagāni**, sammasanīyānīti attho. **Ākāra**-ggahaṇena viññattidvayam vuttam, **vikāra**-ggahaṇena lahutādittayam, itarena ākāśadhātūti vadanti. **Ākāra**-ggahaṇena pana viññattidvayena saddhim lakkhaṇarūpamāha. Tampi hi rūpānam uppajjanādi-ākāramattanti. **Antaraparicchedoti** taṃtaṃkalāpānam asaṅkarakāraṇatāya antarabhūto paricchedo. Yadi na sammasanupagāni, ākāradimattāni ca, katham rūpānīti āha “**apica kho**”ti-ādi.

668. Evaṃ dvācattālīsāya koṭṭhāsānam vasena vitthārato rūpapariggaham tadanusārena vitthārato eva nāmapariggaham vibhāvetvā tato saṃkhittasaṃkhittatarasaṃkhittatamavasena, aṭṭhārasadhātuvasena, dvādasāyatanavasena, pañcakkhandhavasena ca rūpārūpapariggaham dassetvā atisaṃkhittanayenāpi dassetum “**yam kiñci rūpan**”ti-ādi vuttam.

Yathā ca dhātu-ādivasena, evaṃ indriyasaccapaṭiccasamuppādavasenapi rūpārūpapariggaho veditabbo. Katham? Indriyavasena tāva cakkhādīni pañca, itthipurisindriyāni cāti indriyāni rūpam, manindriyam, pañca vedanindriyāni, saddhādīni pañca cāti ekādasa nāmam, jīvitindriyam nāmañca rūpañca, pacchimāni tīni idha anadhippetāni lokuttarattā. Dukkhasaccam nāmañca rūpañca, samudayasaccam nāmam, itarāni idha nādhippetāni lokuttarattā. Paccayākāre ādito tīni aṅgāni nāmam, catutthapañcamāni nāmañca rūpañca, chaṭṭhasattama-aṭṭhamanavamāni nāmam, dasamam nāmañceva nāmarūpañca, pacchimāni dve paccekam nāmañca rūpañcāti-evaṃ tattha tattha vuttanayānusārena indriyasaccapaccayākāravasenapi nāmarūpapariggaho kātabbo. Evaṃ pana nāmarūpapariggahassa vibhāvena kathane payojanam heṭṭhā vuttameva.

669. Kāmam vedanādīsu arūpadhammesu na uttaruttarā viya purimapurimā sukhumā, tathāpi saṅghaṭṭanena vikāra-āpajjanake rūpadhamme upādāya sabbepi te sukhumā evāti āha “**sukhumattā arūpaṃ na upaṭṭhāti**”ti. **Sammasitabbanti** sammadeva lakkhaṇādito vīmaṃsitabbam. **Manasikātabbanti** tathā citte ṭhapetabbam. **Pariggahetabbanti** paricchedakārikāya paññāya paricchiṇṇa gahetabbam. **Vavatthapetabbanti** aññamaññam asaṅkarato vinicchitabbam. **Assāti**

yogino. **Suvikkhālanti** suvisodhitam. Ādikammikassa hi kammaṭṭhānaṃ pariggaṇhantassa yāva dhammā supariyattaṃ na upatiṭṭhanti, tāva te tappaṭicchādakasammohabalena abhibhūtā avisuddhā nāma honti, asaṅkarato upaṭṭhānābhāvato aññamaññaṅca jaṭitā. Yadā pana sammasanādividhinā taṃ vibhūtaṃ hoti, tadā te suvikkhālītā, nijjaṭā ca nāma honti. Tenāha “**yathā yathā hī**”ti-ādi. Ādikammikassa arūpadhammā yebhuyyena rūpadhamme ārabba pavattanākārena gahaṇaṃ gacchantīti katvā vuttaṃ “**tadārammaṇā arūpadhammā**”ti. Teneva hi heṭṭhā “tassevaṃ pariggahitarūpassa dvārasena arūpadhammā pakaṭā hontī”ti¹ vuttaṃ, na vatthuvasenāti.

Idāni rūpariggaḥo arūpariggaḥassa upāyo, upatthambho cāti yathāvuttamatthaṃ upamāhi pakāsetuṃ “**yathā hī**”ti-ādi vuttaṃ. **Mukhanimittanti** mukhassa paṭibimbaṃ. Tatridaṃ upamāsaṃsandanaṃ—cakkhumā puriso viya yogāvacarō, tassa cakkhu viya yogino kammaṭṭhānapariggāhakaññaṇaṃ, ādāsaṃ viya rūpariggaḥo, mukhanimittaṃ viya arūpariggaḥo, ādāsassa aparisuddhakālo viya rūpariggaḥassa avikkhālitaḥo, tadā mukhanimittassa apaññāyanaṃ viya rūpariggaḥassa avisuddhatāya arūpadhammānaṃ anupaṭṭhānaṃ, ādāsassa punappunaṃ parimajjanaṃ viya rūpariggaḥassa punappunaṃ visodhanaṃ, suparimajjite ādāse subyattaṃ mukhanimittassa paññāyanaṃ viya suvikkhālīte nijjaṭe rūpariggaḥe arūpadhammānaṃ suṭṭhu upaṭṭhānanti. Iminā nayena **telatthikopamā**disupi yathārahaṃ upamāsaṃsandanaṃ veditabbaṃ. **Tilapitṭhanti** tilacuṇṇaṃ. **Katakattṭhinti** katakabājaṃ. **Kalalakaddamanti** tanukaddamaṃ.

Tappaccanīkakilesāti tassa arūpadhammapariggāhakaññaṇassa vibandhabhāvena paṭipakkhabhūtā sammohādīkilesā. **Ucchu-**ādi-upamāsu idaṃ mukhamattassa dassanaṃ—yathā ucchurasāṃ gahetukāmo ucchūni ucchuyante pakkhipitvā ekavāraṃ dvivāraṃ yantakkamanamattena ucchurase anikkhamante na ucchūni chaḍḍetvā gacchati, yathā vā core gahetvā tehi katakammaṃ jānitukāmo dvattippahāramattena tesu tamatthaṃ akathentesu na te muñcati, yathā vā pana godammako goṇaṃ dametukāmo dhure taṃ yojetvā ekavāraṃ dvivāraṃ tasmīṃ pathena agacchante na vissajjeti,

1. Visuddhi 1. 223 piṭṭhe.

yathā ca dadhiṃ manthetvā navanītaṃ gaḥetukāmo dadhikalasiyaṃ manthaṃ pakkhipitvā sakiṃ, dvikkhattuṃ vā manthassa bhamanamattena navanīte anuppajjante na dadhiṃ chaḍḍeti, yathā vā pana macche pacitvā khāditukāmo ekavāraṃ dvivāraṃ aggidānamattena macchesu apaccantesu na te chaḍḍeti. “Atha kho naṃ punappunaṃ parimajjati”ti ettha vuttanayānusārena “atha kho naṃ ucchuyante punappunaṃ uppiḷeti”ti-ādinaṃ sabbattha upamattho yojetabbo.

Arūpadhammānaṃ upaṭṭhānākārakathāvaṇṇanā

670. Ākirīyanti abhimukhā honti etehīti ākāra, arūpadhammānaṃ upaṭṭhānassa mukhabhūtā phusanānubhavanavijānanappakārāti āha “**arūpadhammā tīhi ākārehi upaṭṭhahanti**”ti-ādi. Ārammaṇe pavattamānesu cittacetāsikesu asatipi pubbāpariye phusanalakkhaṇo phasso tattha sabbapaṭhamāṃ abhinipatanto viya hotīti vuttaṃ “**pathamābhiniṭṭhāto phasso**”ti. Tenassa phusanākārena supākaṭabhāvena upaṭṭhānaṃ dasseti. Phasse pana upaṭṭhite yasmiṃ ārammaṇe so phasso, tassa anubhavanalakkhaṇā vedanā, sañjānanalakkhaṇā saññā, āyūhanalakkhaṇā cetanā, paṭivijānanalakkhaṇaṃ viññāṇanti imepi pākaṭā hontīti āha “**taṃsāmpayuttā vedanā**”ti-ādi. Evaṃ salakkhaṇasaṅkhepato catudhātuvavatthānavasena phassamukhena arūpapariggahaṃ dassetvā idāni vitthārato catudhātuvavatthānavasena taṃ dassetuṃ “**tathā kese**”ti-ādi vuttaṃ. Tattha **kese pathavīdhātūti** kesasaṅkhāte pathavīkoṭṭhāse pathavīdhātu. Lakkhaṇavibhattito hi dhātuvavatthānadassanametaṃ.

Punapi dvinnaṃ dhātuvavatthānānaṃ vasena vedanāmukhena arūpapariggahaṃ dassetuṃ “**ekassā**”ti-ādi vuttaṃ. Tattha **tassa**¹ **rasānubhavanakavedanāti** thaddhabhāvasaṅkhātassa phoṭṭhabbasabhāvassa anubhavanavasena pavattavedanā.

Aparassāti etthāpi vuttanayeneva sambandho vedītabbo. Tattha **ārammaṇapaṭivijānananti** thaddhatāsaṅkhātaphoṭṭhabbārammaṇapaṭivijānanam. Kāyadvārābhiniḥatam², kevalam vā manodvārikajavanaviññānamāha. Tañhi

1. Tadārammaṇa (Ka)

2. Kāyadvārābhiniṭṭhātam (Syā)

“pathavīdhātu kakkhaḷalakkhaṇā”ti paṭivijānāti, itaram pana kakkhaḷalakkhaṇa paṭivijānanamattamevāti.

Eteneva upāyenāti yvāyam salakkhaṇasankhepato, salakkhaṇavibhattito ca dhātuvavatthānavasena rūpariggaḥamaṃ dassetvā tatha t̥hitassa phassādimukhena arūpariggaṇhanupāyo dassito, eteneva upāyena. **Kammasamuṭṭhānakeseti** catusamuṭṭhānakesato niddhārite kammasamuṭṭhānakese. **Kakkhaḷalakkhaṇāti-ādinā nāyena** ādi-saddena na kevalam “paggharaṇalakkhaṇā āpodhātū”ti-ādinā¹ lakkhaṇavisesena saddhim dhātvantarāniyeva, atha kho ekasamuṭṭhānādibhedāni koṭṭhāsantarānipīti daṭṭhabbam. Tenevāha “**dvācattālīsāya dhātukoṭṭhāsesū**”ti. **Sabbam nāyabhedam anugantvāti** yvāyam dvācattālīsāya dhātukoṭṭhāsesu pathavīdhātu-ādinam lakkhaṇādito vavatthāpanavasena nānāvīdho rūpariggaḥananayo vutto, tam sabbam nāyabhedam nāyavisesam anugantvā, cakkhudhātu-ādīsu rūpariggaḥamukhesu arūpariggaḥadassanavasena yojanā kātabbāti adhippāyo. Tatridam yojanāmukhamattadassanam—ekassa tāva “cakkhudhātu rūpātighātārahabhūtappasādalakkhaṇā, daṭṭhukāmatānidānakammasamuṭṭhānabhūtappasādalakkhaṇā vā”ti-ādinā² nāyena dhātuyo pariggaṇhantassa “paṭhamābhiniṇipāto phasso, tamsampayuttā vedanā”ti sabbam yojetabbam. Tathā “yathāvuttalakkhaṇāya cakkhudhātuyā rasānubhavanakavedanā vedanākkhandho”ti-ādi yojetabbam. Tathā “yathāvuttalakkhaṇā cakkhudhātū”ti, “ārammaṇapaṭivijānanam viññānam viññānakkhandho”ti-ādinā sabbam yojetabbam. Āyatanādivasena rūpariggaḥamukhesupi eseva nayo.

671. Yathā nāma heṭṭhimajhānam subhāvitam vasībhāvam pāpitameva uparijānassa pādakam padaṭṭhānam hoti, na paṭiladdhamattam, evam rūpariggaḥo suvisuddho nijjaṭo niggumbo eva arūpariggaḥassa pādakam padaṭṭhānam hoti, na avisuddho, tasmā rūpārūpassa ekadesepi anupaṭṭhite so avisuddho eva nāma hoti, pageva bahūsu anupaṭṭhitesūti dassento āha “**sace hī**”ti-ādi. **Pabbateyyā gāvī viya** bālā abyattā akhettaññū.

1. Ādi (Syā, Ka)

2. Abhi-Ṭṭha 1. 349 piṭṭhe.

Khaggenāti khaggaggena. **Samugganti** mañjūsāsadisam mahāsamuggam. Apariggahitakammaṭṭhānassa avibhattam viya upaṭṭhahantampi nāmarūpaṃ vibhattasabhāvameva, tassa ca vibhāgo kammaṭṭhānapariggahesu pākaṭo hotīti ca dassanattam samuggavivaraṇam, yamakatālakandaphālanaṅca nidassanabhāvena vuttam. Yamakatālakandañhi bhinnasantānampi abhinnaṃ viya upaṭṭhāti, evaṃ rūpārūpadhammāti.

Sabbepi tebhūmake dhamme nāmaṅca rūpaṅcāti dvedhā vavatthapetīti ettha kiñcāpi sabba-saddo anavasesapariyādāyako, nāmarūpabhāvo pana aññamaññavidhuroti na tadubhayaṃ samudāyavasena parisamāpayetabban, tasmā “yadettha namanalakkhaṇam, taṃ nāmaṃ. Yaṃ ruppanalakkhaṇam, taṃ rūpaṃ”ti evaṃ dvedhā vavatthapetīti attho. Evaṃ vavatthapentoyeva ca tadubhayaavinimuttassa tebhūmakadhammesu kassaci dhammassa abhāvato “sabbepi tebhūmakadhamme nāmaṅca rūpaṅcāti dvedhā vavatthapetī”ti vuccati. “Nāmaṅca rūpaṅcā”ti eteneva tassa duvidhabhāve siddhe “dvedhā vavatthapetī”ti idaṃ nāmarūpavinimuttassa aññassa abhāvadassanattam. Tenevāha “**nāmarūpamattato uddhan**”ti-ādi. “Sabbepi tebhūmake dhamme”ti pana sabbaggaṇaṅcettha sammasamanupagassa dhammassa anavasesetabbatāya vuttam. Tañhi anavasesato pariññeyyaṃ ekaṃsato virajjitabban, tato ca cittaṃ virājayaṃ pamocetabban. Tenāha bhagavā—

“Sabbam bhikkhave anabhijānaṃ aparijānaṃ tattha cittaṃ avirājayaṃ appajahaṃ abhabbo dukkhakkhayāya. Sabbaṅca kho bhikkhave abhijānaṃ parijānaṃ tattha cittaṃ virājayaṃ pajahaṃ bhabbo dukkhakkhayāya”ti¹.

Yadi tebhūmake dhammajātaṃ anavasesato gahitaṃ “nāmarūpaṃ”ti, yaṃ ito bāhirakehi padatthabhāvena parikappitaṃ, seyyathidaṃ? Pakati-ādi drabyādi jīvādi kāyādi, tattha kathaṃ paṭipajjitabbanti? Ummattakavipallāsasadise asammāsambuddhapavedite kā tattha aññā paṭipatti aññatra ajjupekkhanato. Atha vā tepi nāmarūpantogadhabhāvābhāvavasena nicchitā evāti veditabbā. Kathaṃ? Pakati, mahā, ahaṅkāro, tammattāni, indriyāni, bhūtāni, purisoti ete pakati-ādayo. Tattha samabhāvena pavattamānānaṃ sattarajatamasāṅkhātānaṃ sukhadukkhamaṇānaṃ samudāyo² **pakati, padhānanti** ca vuccati. Sattamattasampavedanīyo **mahā**, buddhīti keci.

1. Saṃ 2. 249, 250 piṭṭhesu.

2. Samudāyo pakatisamudāyo (Syā)

Sattarajādīsu abhimāno **ahamkāro**, asmimattāti keci.

Saddaphassarūparasagandhā **tammattāni** aññamaññavisiṭṭhānam pathavī-ādīnam ekuttaratādassanato ekuttarāni tammattānīti vijjhavāsi-ekalakkhaṇehi tammattehi ekalakkhaṇā visesā sajjiyanti¹, sukhumabhāvena pana nesam sampavesanato ekuttaratāti keci. Sotādīni pañca savaṇādivuttikāni **buddhindriyāni**, vacanādānavicaraṇussaggānandakiccāni² vācādīni pañca **kammindriyāni**. Mano antokaraṇam, itaram bāhirakaraṇam. Gandhādīhi āraddhāni pathavī-udaka-aggivāyu-ākāsāni **bhūtāni**, cetanāsabhāvo **purisoti** evam pakati-ādīni sarūpato veditabbāni.

Tattha hi **pakati** tāva sukhadukkhamohamattatāya nāmaṃ, samavisamabhāvāpattito aniccā, dukkhā, saṅkhatā ca āpannā. **Mahāpi** “tasmā aliṅgato³ liṅgavisesāmatto mahā uppajjati”ti vacanato, buddhibhāvānujānanato ca nāmaṃ, aniccaṃ, saṅkhatameva ca āpannaṃ. “Tasmā mahato cha visesā sajjiyanti”ti¹ sakkate vacanato “asmī”ti gahaṇanimittabhāvānujānanena **ahamkāro** abhimānoti katvā nāmaṃ, tato eva aniccasaṅkhatabhāvāpatti cassa siddhā. Itaram **tammattapañcakam** gandharasarūpaphassasaddabhāvānujānanato rūpaṃ, arūpanti pana kāpilānam micchābhīnivesamattaṃ. Te hi soḷasa visesā pañca bhūtāni, ekādasindriyāni bhūtehi bhūtavisesānīti gandhāditammattehi tannissayāni pathavī-āpotejovāyo-ākāsasaṅkhātāni bhūtāni icchitāni. “Tabbisesā ca nānājātikā ahamkāro ca indriyāni”ti vacanato sotakāyacakkhujivhāghānavācāpāṇipādapāyūpatthāni⁴ ceva mano cāti **ekādasindriyāni**.

Tattha **mano** nāmaṃ, itarāni sabbāni rūpaṃ. **Vācāti** cettha atthāvajotakassa akkharasamudāyassa gahaṇam. Imesaṃ pana dhammino dhammassa anaññatthassa icchitattā siddhāva aniccatā pariṇāmapakkhe, abhibyattipakkhepi yadi sabbisayañāṇuppadena abhibyañjanaṃ siddhāva aniccatā, atha tato pubbepi ñāṇam attheva. Akkhabyattivādo⁵ pana siyāti idamettha disāmatam. Drabyaguṇakammasāmaññavisesasamavāyā **drabyādikā**. Tattha pathavī

1. Sajjiyanti (Syā) 2. ...viharaṇussaggānandakiccāni (Syā) 3. Āliṅgato (Syā)

4. ...vāyupattāni (Syā, Ka)

5. Abhibyattivādā (Ka)

āpo tejo vāyu ākāso kālo disā attā manoti nava **drabyāni**. Sadda rūpa rasa gandha phassa saṅkhā parimāṇāni puthūtvā saṃyoga viyoga paratvā'paratva buddhi sukha dukkha icchā dosa payatta gurutva dravatva sneha vegā saṅkhārā' diṭṭhā ceti evamete tevīsati **guṇā**. Ukkhepanam avakkhepanamākucanam pasāraṇam gamanamiti pañca **kammāni**. Aññamaññaviṣiṭṭhesu aviṣiṭṭhamatidhānam paccayo hoti. Saṃiti yato drabyaguṇakammesu sā atthi evāti etaṃ **mahāsāmaññam**. Pathavī-ādīsu anuvattibyāvuttibuddhinimittam drabyatvādi, tam yathā drabyatva guṇatva kammatva ghaṭatvādi, eso **sāmaññaviseso**. Iha tantesu paṭo, kapālesu ghaṭoti iheti yato hetuhetuphalānam sambandho samavāyoti vutto, **samavāyoti** evamete **drabyādikā**.

Tattha pathavī āpa teja vāyū bhūtarūpaṃ, ākāsaṃ tesam abhāvamattam, paricchedo vā, candasūriyādirivattanam, dhammappavattiṅca upādāya paññattimattam **kālo**. Tathā **disā, attā** ca. **Mano** nāmanam.

Saddarūparasagandhā rūpameva. Tathā **phasso** bhūtattayasabhāvato. **Saṅkhā** ekādikā tam tam upādāya paññattimattam. Tathā avayavasamudāye guṇavisesavasena, saṅṭhānavisesavasena vā mahantam dīgham, tabbipariyāyato aṇu rassanti bhinnalakkhaṇadesesu **puthuvanti**. Bhinnadesajānam sahabhāve **saṃyogoti**. Tadapāye **viyogoti**. Samānadisādesagātānam rūpānam mahadabbantarānam vasena paramaparanti paññattimattam. **Buddhi sukha dukkha icchā dosapayattā** nāmameva. **Gurutva dravatva sneha vegā** rūpadhammānam pavattivisesato gahetabbākārā. Itaro **saṅkhāro** ñāṇassa pavattiviseso. **Adiṭṭhopi** dhammādhammabhāvato nāmameva. **Ukkhepanam avakkhepanam ākucanam pasāraṇam gamananti** rūpadhammānam pavattimattam. Sadisāsadisatāyam sāmaññavisesasaññā, ayuttasambandhe samavāyasamaññāti drabyādīnampi nāmarūpantogadhatā daṭṭhabbā.

Jīvājīvabandha puñña pāpāsava saṃvaranijaravimokkhā **jīvādikā**. Tattha **jīvoti** attā. Puggaladhammādhammākāsakālesu **ajīvasaññā**. Tesu sadda phassa rūpa rasa gandha saṅṭhāna bandha bheda sukhuma para aparāghātappabhācchāyojjākatamāni puggalalakkhaṇanti **puggalo** rūpaṃ rūpadhammānam pavatti-ākāramattato. **Dhammādhammā** jīvapuggalānam gatiṭṭhitimattatāya

tadavisitṭhā. **Ākāsakālā** paññattimattaṃ. Bandho
 “kammapuggalantarasaṃyogo”ti vacanato tehi anuñño. **Puññapāpāni**
 nāmanti pākaṭameva. “Kammapuggalānamāsavo”ti vacanato
 puññāpuññasambhave āsavasamaññāti tato avasiṭṭho¹ **āsavo**. “Āsavanirodho
 saṃvaro”ti vacanato paṭipakkhena puññāpuññanirodho **saṃvaro**.
 “Kammaphalappavattiyā² pakatiyā appavatti nijjaro”ti vacanato
 vipākanirodhanimittaṃ **nijjaro**. **Mokkhopi** “sabbakammavimokkho”ti
 vacanato kammapuggalajīvaviyogo. Tattha **kammapuggalānaṃ**
 saddādilakkhaṇatāya rūpamattatā puññāpuññamattatāya arūpatā. **Jīvo** ca
 arūpamattamevāti ayaṃ drabyamokkho. Bhāvamokkho pana jīvassa
 rāgādibhāvāpariṇāmo rāgādayo nāmamevāti jīvādayopi nāmarūpantogadhā
 eva.

Kāyappavattigatijātibandhāpavaggā **kāyādikā**. Tattha pathavī-
 āpatejavāyu-attasukhadukkhesu **kāyasamaññā**. Tadavisitṭhā
 pavattigatijātibandhāpavaggā, “bhāvoti attho, kāyoti anattantaran”ti
 vacanato kāyato aññaṃ kiñci natthi. “Pavattisaññā
 kiriyāsaṃyogavibhāgesū”ti vacanato gati-ādippakārena pavattā pathavī-
 ādayo eva **pavatti** upacāro. “Tasmim anattantaran”ti vacanato kāyato
 anaññā suramanujapetatiracchānanarakūpapattiyo **gatiyo**. Tāsu
 purimāpurimāvisitṭho gatīsu jātassa nicchayopi pavattimattanti tato anaññā
 kaṇhanīlarattapītasukka-atisukkasaṅkhātā **jātiyo**. Tā uttaruttaravisiṭṭhā
 aññāṇamoharāgadosatavāsandassanappāyā **sukkajāti**, antā accantavimuttā
 avagāhitavā cāti **sukkajāti**. “Dosesu bandhasamaññā”ti vacanato
 aññāṇādilakkhaṇassa **bandhassa** jīvato anaññatā. Aññāṇādidosābhāvato
 apavaggasiddhīti **kāyādayopi** nāmarūpamattameva.

Yopi tattha tattha “puriso attā jīvo”ti-ādipariyāyehi vutto attapadattho,
 sopi yathārahaṃ nāmarūpamattaṃ upādāya paññatto, nāmarūpamattameva
 vā. Tena vuttaṃ “tepi nāmarūpantogadhabhāvābhāvavasena nicchitā evā”ti.

1. Avasiṭṭho (Ka)

2. Kammaphalappattiyā (Ka)

Sambahulasuttantaśaṁsandanaḱathāvaṇṇanā

672. **Soti** so vipassanāḱammiko yogāvacaro. **Evanti** vuttappakāraparāmasanaṁ. **Yathāvasarasatoti** yathābhūtasabhāvato. Nāmarūpaṁ vavatthapetvā etamatthaṁ śaṁsandetvā vavatthapetīti sambandho. **Lokasamaññāyapi pahānatthāya**, pageva “satto jīvo”ti pavattanakamicchābhinivesassāti adhippāyo. Nāmarūpamattatāya avinicchitattā, santānādighanabhedassa ca akatattā abhinivesena vinā samūhekattaggahaṇavasena “satto”ti pavatto sammoho **sattasammoho**. Tassa vikkhambhanā **asammohabhūmi**. **Sambahulasuttantavasenāti** “yathāpi”ti-ādinā idha vuttānaṁ, avuttānañca “rūpañca hidaṁ mahāli attā abhavissa, nayidaṁ rūpaṁ ābhādhāya samvatteyyā”ti¹ evamādinā sambahulānaṁ suttantānaṁ vasena. “Nāmarūpamattamevā”ti-ādinā vuttamevatthaṁ sandhāyāha “**etamatthan**”ti.

Aṅgasambhārāti aṅgasambhārahetu. Tannimittānaṁ taṁ amuñcitvā sati eva tasmīnaṁ “**satto**”ti vohāro.

Agārantvevāti yathā kaṭṭhādīni paṭicca upādāya tesānaṁ nāmaṁ vissajjetvā agāramicceva saṅkhaṁ samaññaṁ gacchati, evaṁ aṭṭhi-ādīni paṭicca upādāya tesānaṁ nāmaṁ vissajjetvā rūpaṁ sarīramicceva saṅkhaṁ gacchatīti yojanā.

Dukkameva sambhotīti dukkhadukkhatādibhedānaṁ tividaṁ dukkhameva sambhavati, yathāpaccayaṁ uppajjati, tadeva dukkhaṁ khaṇaṭṭhitipabandhaṭṭhitivasena tiṭṭhati ceva khaṇanirodha-āyukkhaṇanirodhādivasena nirujjhati cāti attho. Idāni dukkhamevāti evakārena nivattitamattaṁ dassetuṁ “**nāññatrā**”ti-ādi vuttaṁ. Tassattho—yathāvuttaṁ dukkhaṁ ṭhapetvā tato aññaṁ kiñci dhammajātaṁ na sambhavati, yo “satto”ti vā “jīvo”ti vā vucceyya, sabbena sabbaṁ abhāvā kuto tassa nirodhoti.

Upamāhināmarūpavibhāvanāḱathāvaṇṇanā

673. **Ekenāḱarena saṅghitesūti** yena pakārena² akkhādīsū sanniviṭṭhesu rathasamañña, tena ekena āḱarena samavaṭṭhitesu ekajjhaṁ

1. Saṁ 2. 55; Vi 3. 18 piṭṭhesu.

2. Pabandhaṭṭhitippakārena (Syā)

rāsikatesu. **Evamevanti** sannivesavisitṭhe avayavasamudāye santānavasena pavattamāne yathā “ratho gehaṃ muṭṭhi vīṇā senā nagaraṃ rukkho”ti vohāramattaṃ, paramatthato pana rathādi nāma kiñci natthi, evamevaṃ. **Upādānakkhandhesūti** upādānakkhandhasaññitesu rūpārūpadhammesu samuditesu santānavasena pavattamānesu “satto jīvo”ti vohāramattaṃ, paramatthato pana satto vā jīvo vā natthīti yāthāvato jānanam. Idaṃ **yathābhūtaḍḍassanaṃ** “diṭṭhivisuddhī”ti vuccati.

674. **Tassāti** sattoti gahitassa attano. **Vināsanti** niruddhassa vināsaṃ. **Avināsanti** avinassanaṃ, niccatanti attho. Dvayavaseneva hi attavādino ṭhitā, sassato attā, ucchijjatīti vā, ekaccasassatavādopi ettheva samavaruddhoti. **Avināsaṃ anujānanti** buddhi-ādīnaṃ dhammānaṃ vināsaṃ icchantopi “dhammī nicco kūṭaṭṭho”ti attano vināsābhāvaṃ anujānanti. **Sassateti** sassatagāhe. **Patati** katavināsa-akatabbhāgamādidosappasaṅgatoti adhippāyo. **Khīranvayassāti** khīrassa anvayabhūtaḍḍassa, phalabhūtaḍḍati attho. **Tadanvayassāti** tassa attano anvayabhūtaḍḍassa **aññassa** kassaci **abhāvato**. **Oliyati nāmāti** “sassato attā”ti abhinivesena bhavābhirato hutvā bhavanirodhato saṅkocanaṃ āpajjanto bhaveyeva niliyati nāma. **Atidhāvati nāmāti** tattha tattheva hi bhave attā ucchijjatīti ucchedavādī “ucchijjati attā”ti gaṇhanto paraṃ maraṇā santaṃ bhavaṃ “natthī”ti atikkamanto atidhāvati nāmāti vadanti. Kilesanirodhe pana kammaṃ avipaccanato bhavanirodhe icchitabbe tathā aggahetvā “taṃ taṃ bhavavisesaṃ āgamma attā ucchijjatīti evaṃ bhavanirodho hotī”ti gaṇhanto taṃ atidhāvati nāma.

Pariyuṭṭhitāti abhibhūtā. **Cakkhumantoti** yathābhūtaḍḍassanaṃsaṅkhātena ñāṇacakkhunā cakkhumanto.

Kāmaḥbhavādibhedo bhavo āramitabbaṭṭhena ārāmo etesanti **bhavārāmā**. Tasmim bhava ratā abhiratāti **bhavaratā**. Bhava sammodaṃ āpannāti **bhavasammudītā**. Tīhipi padehi bhavassādagadhitatāva vuttā. **Cittaṃ na pakkhandatīti** bhavassādagadhitattā eva bhavanirodhāvahe dhamme cittaṃ

na anuppavisati. **Nappasīdatīti** na okappati. **Na santiṭṭhatīti** na patiṭṭhahati. **Nādhimuccatīti** na adhimuccati.

Aṭṭiyamānāti dukkhāpiyamānā. **Harāyamānāti** lajjamānā. **Jigucchamānāti** hīlentā. **Vibhavanti** ucchedaṃ. **Abhinandantīti** vutta-abhinandanākāradassanaṃ “**yato kira bho**”ti-ādi.

Bhūtanti khandhapañcakaṃ. Tañhi yathāsakaṃ paccayehi jātattā, paramatthato vijjamānattā ca bhūtanti vuccati. **Bhūtatoti** yathābhūtasabhāvato, salakkhaṇato, sāmāññalakkhaṇato ca.

675. Evaṃ sattagāhato avalīyanātidhāvanadose, yathābhūtaḍḍassanato nibbidādiḡe ca suttavaseneva dassetvā idāni nāmarūpamattepi gamanādi-attakiccasiddhaṃ dassetuṃ “**tasmā**”ti-ādi vuttaṃ. Tattha **tasmāti** yasmā “asmī”ti vā “ahan”ti vā gāhassa vatthubhūto satto nāma natthi, paramatthato nāmarūpamattameva, tasmā. Sace koci attā nāma natthi, kathamidha nāmarūpamatte gamanādi-attakiccasiddhīti codanaṃ sandhāyāha “**dāruyantān**”ti-ādi. “**Khāyati**”ti etena yathā nijjīve dārumayayante abbhantare vattamānassa jīvassa vasena sa-īhassa sabyāpārassa viya upaṭṭhānamattaṃ paccayavisesato, evaṃ nijjīve nāmarūpamatte paccayavisesato gamanādi-attakiccasiddhīti sa-īhassa sabyāpārassa viya upaṭṭhānanti dasseti.

Saccatoti bhūtato, paramatthatoti attho. Suññaṃ jīvena yantamiva abhisankhataṃ paccayavasena pavattīti adhippāyo. **Dukkhassa puñjo** niccāturatāya **tiṇakattṭhasadiso** attasuññatāyāti attho. **Etam** nāmarūpaṃ.

Yamakanti yugaḷakaṃ. So ca kho yamakabhāvo aññamaññasannissitabhāvenāti āha “**ubho aññōññanissitā**”ti. Tato eva ca ekasmim bhijjamānasmim ubho bhijjanti. Na hi kadāci pañcavokārabhave rūpe nirujjhante arūpaṃ anirujjhantaṃ, arūpe vā nirujjhante rūpaṃ anirujjhantaṃ atthi. Svāyaṃ bhaṅgo **paccayā** paccayanirodheneva, nāmarūpanirodhoti attho. **Paccayāti** vā paccayabhūtā, aññamaññassa paccayā hontāpi ubho bhijjantiyevāti attho.

676. **Daṇḍābhihātanti** visesanena daṇḍaṃ, daṇḍābhighātassa paccayaṃ purisa.vāyāmañca dasseti, bheriyā pana visetitabbatā saddassa asādhāraṇakāraṇatāya. Teneva hi “aññā bherī”ti bherīyeva gahitā, na daṇḍādayo. Adissamānarūpatāya saddaṃ nāmaṭṭhāniyaṃ katvā “**evamevan**”ti-ādinā upamāsaṃsandanaṃ karoti.

Na cakkhuto jāyareti na cakkhāyatanato niggacchanavasena jātanti. Na hi cakkhāyatanassa paccayabhāvūpagamanato pubbe phassapañcamakā labbhanti, na ca padasavanto, yena te tato niggaccheyyūṃ. Tenevāha “puñjo natthi anāgate”ti¹. **Na rūpatoti** etthāpi eseva nayo. “**No ca ubhinnamantarā**”ti idaṃ pana tesāṃ arūpadhammattā appadesatāya vuttaṃ. Kevalaṃ pana yasmiṃ khaṇe paccayasamavāyo, tadā uppajjanamattamevāti āha “**hetuṃ paṭicca pabhavanti saṅkhatā**”ti, cakkhurūpālokamanasikārādibhedāṃ dhammajātāṃ nissāya paccayabhūtaṃ kāraṇaṃ labhitvā tehi samecca sambhūya katattā saṅkhatā phassādayo dhammā uppajjantīti attho. Tassā pana dhammānaṃ uppattiyā pākaṭaṃ rūpadhammapavattiṃ dassento “**yathāpi saddo pahaṭāya bheriyā**”ti-āha. Phassapañcamaggahaṇaṇcetta pākaṭa-arūpadhammānaṃ dassanaṃ. Sesagāthāsupi eseva nayo.

Vatthurūpāti hadayavatthuto. Tannissayānaṃ arūpadhammānaṃ bahubhedattā sāmāññavohārena te dassetuṃ “**saṅkhatā**”ti vuttaṃ.

677. **Nittejanti** tejahīnaṃ ānubhāvarahitaṃ. Yathā pana taṃ nittejaṃ, taṃ dassetuṃ “**na khādātī**”ti-ādi vuttaṃ. Na hi aññathā saddahanussahanādīsu nāmaṃ “nittejan”ti sakkā vattuṃ, nāpi rūpaṃ sandhāraṇābandhanādīsu. Teneva hi “rūpaṃ nittejan”ti vatvā “**na hi tassa khāditukāmata**”ti-ādi vuttaṃ. “**Atha kho**”ti-ādinā byatirekavasenāpi nāmarūpānaṃ nittejataṃyeva vibhāveti. Aññamaññasannissayena hi nāmarūpassa attakiccasiddhipi paccekāṃ asamatthabhāvibhāvanameva. Tathā hi nāmarūpassa attasuññatā, nirīyatā, byāpāravirahatā ca suṭṭhutarāṃ pākaṭā honti.

Kathaṃ pana paccekāṃ asamatthānaṃ samuditabhāve samatthatā hoti? Asāmaggiyaṃ ahetūnaṃ sāmaggīyampi ahetubhāvāpattito. Na hi

1. Khu 7. 32 piṭṭhe.

paccekam daṭṭhum asakkontānam andhānam satampi saḥassampi samuditam daṭṭhum sakkotīti codanam sandhāyāha “**imassa panatthassā**”ti-ādi. **Imam upamam udāharanti** aṭṭhakathācariyā upamāyapi asiddhassa atthassa sādhetabbato. Tenevāha “upamam te karissāmi, upamāyapidhekacce viññū purisā bhāsitassa attham jānantī”ti¹. **Tuṭṭhahatṭhoti** yadipāham cakkhukaraṇīyam kātum na sakkomi, pādakaraṇīyam pana kātum sakkomi, tvañca cakkhukaraṇīyam, tasmā amhākam ubhinnaṃ sahitānañca vasena icchitadesasampatti sijjhatīti tuṭṭhahatṭho **jaccandho**. **Tattha jaccandhoti**-ādi upamopameyyasaṃsandanam. Dhammānam attalābho parapaṭibaddhoti vattabbameva natthi tato pubbe avijjamānattā, paṭiladdhattalābhassāpi parapaṭibaddhameva atthakiccanti dassetum “**na sakena tejena uppajjati, na tāsū tāsū kiriyāsu pavattati**”ti vuttam. **Tesaṃ nāmarūpānam aññamaññaṃ nissāya uppatti vā pavatti vā na ca na hotīti** jaccandhapīṭhasappi-upamāya sādhitamattham nigamento “asāmaggiyam ahetūnam sāmaggiyampi ahetukabhāvāpattito”ti yathāvuttassa hetuno anekantikabhāvam vibhāveti.

Paradhammasāvānūvattinoti paresam attato aññesam hetupaccayasāṅkhātānam dhammānam vasena anuvattanasīlā. **Attadubbālāti** attanā dubbalā asamatthā. **Parapaccayatoti** paresam dhammānam paccayabhāvato. Etena janakapaccayam vadati. Tenevāha “**jāyare**”ti. **Parārammaṇatoti** paresam dhammānam ārammaṇabhāvato. Etena upatthambhakapaccayam vadati. Paccayaggahaṇam vā rūpāpekkham, ārammaṇaggahaṇam nāmāpekkham. “**Paradhammehī**”ti idam ārammaṇapaccayānam visesanam. Purimattena hi vuttamevattham pacchimattena pakaṭam karoti. **Pabhāvitāti** uppādītā.

Nāvāyantikūpamāyapi nāmarūpānam avasavattitam vibhāvetum “**yathāpī**”ti-ādinā tisso gāthā vuttā. **Nissāyāti** patiṭṭhāya. **Yantīti** gacchanti. **Manusse nissāyāti** netubhūte niyāmakakammakāradīmanusse apassāya. Na hi tesaṃ araṇaggahaṇalaṅkārasaṅgāhāpana-udakussīṅcanādikiriyāya vinā nāvā icchitadesam pāpuṇāti. **Ubhoti** aññamaññaṃ nāvam nissāya manussā, manusse nissāya nāvāti attho.

1. Saṃ 1. 335 piṭṭhe.

Evanti vuttappakārena. **Nānāyehīti** paṭhamādīnaṃ sattannaṃ jhānānaṃ, tesāṃ upacārānañca vasena cuddasa arūpapariggahamukhāni, catudhātuvavatthāne vuttānaṃ terasannaṃ dhātupariggahamukhānaṃ dhātāyatanakhandhamahābhūtavasena, idha vuttānaṃ avuttānañca indriyasaccapaṭiccasamuppannānaṃ vasena samavīsati rūpapariggahamukhāni, tāni paccekāṃ “phasso vedanā cittaṃ”ti imesaṃ sammukhabhāvena upaṭṭhitānaṃ tiṇṇaṃ arūpadhammānaṃ vasena tiguṇitāni samasaṭṭhi, cuddasa arūpapariggahamukhāni, tāni cāti catusattatiyā nāmarūpapariggahanayehi ceva sambahulasuttantaratha geha muṭṭhi vīṇā senā rukkha dāruyantanaḷakalāpi bheri jaccandhapaṅguḷanāvā manussūpamāhi ca nāmarūpapamattatāvavatthāpananayehi ca. **Sattasaññaṃ abhibhavītvāti** anādikālabhāvitāṃ khandhapañcake attagāhaṃ vikkhambhetvā. **Nāmarūpānaṃ yathāvadassananti** “idaṃ nāmaṃ, ettakaṃ nāmaṃ, na ito bhiyyo. Idaṃ rūpaṃ, ettakaṃ rūpaṃ, na ito bhiyyo”ti ca tesāṃ lakkhaṇasallakkhaṇamukhena dhammamattabhāvadassanaṃ. Attadiṭṭhimalavisodhanato **diṭṭhivisuddhīti** veditabbaṃ. **Etassevāti** nāmarūpassa yāthāvadassanasseva.

Diṭṭhivisuddhiniddesavaṇṇanā niṭṭhitā.

Iti aṭṭhārasamaparicchedavaṇṇanā.

19. Kañkhāvitarāṇavisuddhiniddesavaṇṇanā

Paccayapariggahakathāvaṇṇanā

678. Anantaraniddiṭṭhāya diṭṭhivisuddhiyā visayabhāvena dassitattā “**etassevā**”ti vuttaṃ, na tadaññato visesanattham̐ tadaññasseva abhāvato. Ajjhattaṃ vā hi vipassanābhiniveso hotu bahiddhā vā, ajjhattasiddhiyaṃ pana lakkhaṇato sabbampi nāmarūpaṃ anavasesato pariggahitameva hotīti. **Paccayapariggahenā**¹ti hetumhi karaṇavacanāṃ. Paccayapariggahahetu hissa addhattayakañkhāvitarāṇaṃ hotīti, karaṇe vā etaṃ karaṇavacanāṃ paccayapariggahassa sādhakatamabhāvato kañkhāvitarāṇakiriyāya, yadā hissa suparisuddho nijjaṭo niggumbo paccayapariggaho sijjhati, tadānena kañkhā vitarīyatīti. **Vitaritvā**ti atikkamitvā, vikkhambhetvāti attho. Taṃ pana ñāṇaṃ tathādhiyataṃ vasībhāvappattaṃ jhānaṃ viya yogino santāne pabandhavasena pavattatīti katvā vuttaṃ “**ṭhitam̐ ñāṇan**”ti.

Tanti kañkhāvitarāṇavisuddhiṃ². Taṃ sampādetukāmo āpajjatīti sambandho. Yāthāvato diṭṭhaṃ nāmarūpaṃ tividhadukkhatāyogato rogo viya paccayā cassa rogasamuṭṭhānaṃ viya upaṭṭhahantīti imamattham̐ dassento “**yathā nāma -pa- pariyesatī**”ti āha. Saṃsāradukkhanimuggassa santānassa tato vimocetukāmatāvasena anukampitabbatā labbhatīti tamattham̐ dassetuṃ “**yathā vā panā**”ti-ādi vuttaṃ. Evameva ṭhite yadeke vadanti “anukampetabbakumārakadassanena tassa mātāpitu-āvajjanaṃ idha anudāharaṇaṃ nirodhetabbatāya nāmarūpassa anukampitabbatābhāvato”ti, tadapāhataṃ hoti. Avassañcetaṃ evaṃ icchitabbaṃ, aññathā vencyyapuggalasantāne satthu mahākaruṇāpavatti eva vicāretabbā siyā. Mandabuddhitāya **mandarṇ**. Vuḍḍhataropi koci mandabuddhi hotīti tato visesanattham̐ “**kumāran**”ti vuttaṃ. Yo koci paṭhamavaye vattamāno “kumāro”ti vuccatīti tato visesanattham̐ “**daharan**”ti vuttaṃ. Evampi yo ādhāvitvā paridhāvitvā vicāraṇako taruṇadārako,

1. Paccayapariggahaṇena (Syā, Ka)

2. Kañkhāvitarāṇi ca sā visuddhi cāti kañkhāvitarāṇavisuddhi (Syā)

sopi “daharo”ti vuccatīti tato nivattanattham **“uttānaseyyakan”**ti vuttaṃ. Catūhipi padehi karuṇāyitabbatamyeva dasseti. **Āpajjati**ti karoti.

Yathā panassa hetupaccayapariyesanāpatti hoti, tam dassetuṃ **“so”**ti-ādi vuttaṃ. Tattha byatirekamukhena attho sādhitō sammadeva sādhitō hotīti ahetukabhāvaṃ tāva paṭikkhipanto **“na tāvidaṃ nāmarūpaṃ ahetukan”**ti vatvā tattha kāraṇamāha **“sabbatthā”**ti-ādinā. Hetumantarena sati sambhave sabbadhammānaṃ hetu-abhāvo samānoti sabbasamānatā siyā, tathā ca sati sotapadesādīsu, bahiddhā ca cakkhuviññāṇādihetu-abhāvoti sabbattha, cakkhādīnaṃ uppattito pubbe, paribhedato uddhañca hetu-abhāvoti sabbadā ca andhādīnaṃ arūpīnaṃ, asaññīnañca hetu-abhāvoti sabbesañca cakkhuviññāṇādihi bhavitabbaṃ, hetu-abhāvā viśesato tañca natthīti āha **“sabbattha sabbadā sabbesañca ekasadisabhāvāpattito”**ti.

Nidassanamattañcetaṃ yadidaṃ “cakkhuviññāṇādīsu hī”ti¹. Yattakā loke viśesā, tehi sabbesaṃ, sabbakālañca bhavitabbanti adhippāyo. **Ādi**-saddena vā tesampi gahaṇaṃ katamevāti daṭṭhabbaṃ. Tasmā ahetukabhāve viṣiṭṭhatāya asambhavo evāti sabbattha ekasadisabhāvāpattito, sabbadā ekasadisabhāvāpattito, sabbesaṃ ekasadisabhāvāpattitoti paccekam sambandho veditabbo. Evaṃ ahetubhāve paṭisiddhe viśamahetuvādī vadeyya “na idaṃ ahetukaṃ kiñcaraḥi sahetukaṃ, kena pana hetunā sahetukanti? Issarādīna”ti.

Ādi-saddena pakatipurisapajāpatikālādīnaṃ gahaṇaṃ veditabbaṃ, tam paṭikkhipanto āha **“na issarādihetukan”**ti-ādi. Na nāmarūpaṃ issarādihetukaṃ nāmarūpato aññassa anupalabbhamānattā issarapakati-ādīnameva abhāvato. Yadi pana asato issarādīto nāmarūpassa uppatti, evaṃ sati sā eva sabbattha sabbadā sabbesaṃ ekasadisatā āpajjati. Atha nāmarūpamattameva issarādihetukaṃ, nāmarūpañca ahutvā sambhavantaṃ, hutvā ca vinassantaṃ dissatīti issarādīhipi tādisēhi bhavitabbaṃ. Tathā ca tadapi sappaccayaṃ sañkhatamevāti tassāpi paccayapariggaho kātabbo.

1. Cakkhuviññāṇādīnanti (Syā)

Atha taṃ nuppajjati, ahetukatā tassa āpannā. Tenāha
“ahetukabhāvāpattito”ti.

Apica na issarādihetukaṃ nāmarūpaṃ. Kiṃ kāraṇaṃ? Kamena
 uppattito. Yadi hi evaṃ niccaṃ issarādisaññitaṃ
 kammakilesindriyārammaṇādinirapekkhakāraṇampi siyā, sabbesaṃyeva
 ekajjhaṃ uppatti siyā, yattakehi tato uppajjitabbaṃ. Kasmā? Kāraṇassa
 sannihitabhāvato. Yadi pana tassa icchāvasena tassa uppattiṃ
 parikappeyyuṃ, tāsāñca icchānaṃ ekajjhaṃ uppattiyāṃ ko vibandho. Atha
 aññampi kiñci kammakilesindriyārammaṇādi-apekkhitabbaṃ atthīti ce?
 Tadeva hetu kāraṇaṃ, kimaññena aditṭhasāmatthiyena parikappitena
 payojanaṃ? Diṭṭhañhi kammādīnaṃ sāmattiyaṃ
 tadaññapaccayasannidhānepi tadabhāve abhāvato. Yathā hi
 rūpālokamanasikārasannidhānepi cakkhuno abhāve cakkhuviññāṇassa
 abhāvaṃ, bhāve ca bhāvaṃ disvā cakkhuno
 cakkhuviññāṇuppādanasamatthatā atthīti viññāyati. Yathā ca yvāyaṃ
 yamakānampi samānānaṃ
 janakajananīsukkasoṇitādibāhirapaccayasamabhāvepi sattānaṃ
 hīnapaṇitātādiviseso dissati, so ca sasantāne tādisassa aññassa hetuno
 abhāvā kammakilesahetukoti tassa tattha samatthatā atthīti viññāyati, na
 evamissarādikassa. Kāraṇassa hi bhāvābhāve phalassa bhāvābhāvehi
 kāraṇassa samatthatā viññāyeyya. Na ca sannihite tadakāraṇassa
 nāmarūpassa issarādivekallena katthaci anuppatti diṭṭhā, tasmā
 akāraṇamissaro.

Athāpi saggo evaṃ issarādihetuko vucceyya, sopi saggappakāro,
 sabbakālaṃ tato nibbatteyya. Na hi sannihitakāraṇassa phalassa anuppatti
 yuttā. Nicce ca sati aññanirapekkhakāraṇe saggassa ādiyeva na yutto, yāva
 issarādikaṃ kāraṇaṃ, tāva sabbassa atthibhāvappasaṅgato. Athāpi vadeyya
 “aññepi yathārahaṃ paccayā hontiyeva, issarādikampi tesāṃ
 sahakārikāraṇaṃ hotī”ti. Yadettha vattabbaṃ, taṃ heṭṭhā vuttameva. Yadi
 paro vadeyya “idha buddhipubbo bhāvānaṃ racanāviseso diṭṭho, yathā taṃ
 ghaṭagehādīnaṃ. Atthi ca ajjhattikabāhirānaṃ sarīrapadumādīnaṃ
 racanāviseso, tasmā tenāpi buddhipubbena bhavitabbaṃ. Yassa ca so
 buddhipubbo, so issarādiko, tasmā tena nāmarūpasaññitassa lokassa
 kāraṇena bhavitabban”ti. Tayidaṃ asiddhaṃ, racitā

sarīrapadumādayoti tattheva uppannattā. Uppannassa hi sannivesavasena tathā tathā paṭṭhapanam “racanā”ti vuccati. Anekantiko cāyam abuddhipubbassāpi diṭṭhattā. Diṭṭho hi nhāru-ādīnam aggisamyogena racanāviseso, tathā visussantānam pubbacammādīnam. Yadi panāyamissarādiko gavassajagadrabhādīnam karīsāvatte paṭimahutam¹ raceyya, ummatto viya vikkhitto siyā. Kiñcāyam lokam sajjento attattham vā sajjeyya lokattham vā.

Tattha ca yadi purimo makkho katakicco na siyā lokena sādhetabbassa atthibhāvato. Atha dutiyo, kasmā lokassa ahitadukkhāvaham pāpam nirayādim, jarāmarañādiñca sajjati²? Atha tadubhayam anāmasitvā kīlattham sajjati². Kīlā ca nāma rati-atthā hoti. Vinā kīlāya ratiṃ ajānantānam rati-atthāñca kīlamārabhanto ratiyam issaro anissaro siyā. Atha payojananirapekkho, sabbakālam sajjeyya³, tassa cāyam sajana⁴ samatthatā ahetakā vā siyā sahetukā vā. Ahetakā ce, sabbesam siyā sahetukā vā. Ahetakā ce, sabbesampi siyā. Atha sahetukā, so cassa hetu parato vā sambhūto siyā attato vā. Tattha parato ce sambhūto, yadassa so laddho, tassāyam veyyāvaccakarasadiso siyā. Atha attato taduppattito pubbe ayam kīdiso loko cāti sabbamidam ālunavisīṇam ākulabyākulam goyūthena gatamaggasadisapheṇapiṇḍasamam avimaddakkhamam asāram. Tiṭṭhatu pasaṅgo, yathādhikatameva vaṇṇayissāma. **Tasmāti** yasmā idam nāmarūpam na ahetakam, nāpi issarādivisamahetakam, tasmā. **Teti** hetupaccayā.

679. Oḷārikattā, supākaṭattā ca rūpassa paccayapariggaho sukaroti “**imassa tāva rūpakāyassā**”ti-ādīnā paṭhamam tassa paccayapariggahavidhim ārabhati. Tattha yathā nāmarūpassa paccayapariggaho ahetuvisamahetuvādanivattiyā hoti, evam nibbidāvirāgāvahabhāvena tattha abhiratinivattiyāpi icchitabboti tam gabbhaseyyakavasena dassento nibbattaṭṭhānassa sucibhāvapaṭisedhanamukhena asucibhāvam vibhāvetum “**ayam kāyo**”ti-ādīmāha. Tattha uppalādīni asuciṭṭhāne

1. Paṭipahutam (Ka)

2. Sajjati (Syā, Ka)

3. Sajjeyya (Syā)

4. Sajjana (Syā)

nibbattānīpi sayam sucisammatānevāti taṁdassanattam
abbhantaraggahaṇam. Tenāha bhagavā—

“Yathā saṅkārādhānasmim, ujjhitasmim mahāpathe.

Padumam tattha jāyetha, sucigandham manoraman”¹.

“**Nibbattati**”ti idam mātukucchiyam paṭisandhipavattīsu rūpakāyassa nibbattanasāmaññato gahetvā vuttam, na paṭhamābhiniibbattimattam. Evañca katvā āhārassa upatthambhakapaccayatāvacanam, udarapaṭalassa pacchato karaṇādivacanam, duggandhajegucchapaṭikkūlatāvacanañca samatthitam hoti. Evamavaṭṭhite yadekacchi piṭṭhito, purato ca karaṇam kim siyā paṭisandhikāleti-ādi vuttam, tam apāhataṁ² hoti. “**Nibbattakattā**”ti iminā bījam viya aṅkurassa avijjādayo rūpakāyassa asādhāraṇakāraṇatāya **hetūti** dasseti. “**Upatthambhakattā**”ti iminā pana aṅkurassa pathavīsālipārisi-ādayo viya āhāro sādhāraṇakāraṇatāya **paccayoti** dasseti.

Pañca **dhammā hetupaccayāti** avijjādayo pañca dhammā yathāraham hetu ca paccayo cāti attho. Bhavesu vijjāmanadosapaṭicchādanapatthanā daḥhaggāhabhāvena saṅkhārabhavānam hetubhūtā janakasahāyatāya bhavanikanti taṁsahajāta-āsannakāraṇattā abhisāṅkhārikā, apassayabhūtā cāti “**mātā viya dārakassa upanissayā**”ti vuttā. Yathā pitu janitasukke puttassa uppattīti pitā janako, evam **kammaṁ** sattassa uppādakattā **janakam** vuttam. Yathā **dhāti** jātassa dārakassa posanavasena sandhārikā, evam **āhāro** uppannassa kāyassāti **sandhārako** vutto.

Kāmañcetha avijjādayo nāmakāyassāpi paccayo, pakārantarena pana tassa pākaṭam paccayapariggahavidhiṁ dassetuṁ “**cakkhuñca paṭiccā**”ti-ādi vuttam. Tattha **cakkhuñcāti ca**-saddo samuccayattho. Tena cakkhuviññāṇassa āvajjanādi-ajjhataṁ sabbam paccayajātam saṅgaṇhāti. **Rūpecāti** pana **ca**-saddena yathā bahulam bāhīrarūpaṁ cakkhuviññāṇassa ārammaṇapaccayo, evam aññampi bāhīram paccayajātam saṅgaṇhāti.

Paṭiccāti

1. Khu 1. 21 piṭṭhe Dhammapade.

2. Pākaṭam (Syā)

paccayabhūtaṃ laddhāti attho. Tena cakkhussa nissayapurejāta-
indriyavippayutta-atthi-avigatavasena, rūpassa ārammaṇapurejāta-atthi-
avigatavasena, itaresañca saṅgahitānaṃ anantarādisahajātādivasena
paccayabhāvaṃ dasseti. Vacanabhede pana kāraṇaṃ heṭṭhā vuttameva. **Ādi-**
saddena ca phassādīnaṃ viya sahapaccayehi sotaviññāṇādīnaṃ saṅgaho
veditabbo “tiṇṇaṃ saṅgati phasso”ti-ādipāṭhassa¹ viya “sotañca paṭicca”ti-
ādipāṭhassa¹ saṅgahitattā. Evaṃ sammasanupagaṃ sabbaṃ nāmaṃ
sahapaccayena saṅgahitaṃ hoti. Tenāha “**nāmakāyassa paccayapariggahaṃ
karotī**”ti.

Pavattim disvāti etarahi pavattim disvā. **Evanti** iminā na kevalaṃ
sappaccayatāmatameva paccāmaṭṭhaṃ, atha kho yādisehi paccayehi etarahi
pavattati, tādisehi avijjādipaccayeheva atītepi pavattitthāti paccayasadisatāpi
paccāmaṭṭhāti daṭṭhabbaṃ.

680. **Pubbantanti** atītaṃ khandhappabandhakoṭṭhāsaṃ. **Ārabbhāti**
uddissa. **Ahosim nu kho, na nu kho ahosinti** sassatākāraṃ,
adhiccasamuppatti-ākārañca nissāya atīte attano vijjamānataṃ,
avijjamānatañca kaṅkhati. **Kim nu kho ahosinti** jātiliṅgūpapattiyo nissāya
“khattiyo nu kho ahosim, brāhmaṇādīsu gahaṭṭhādīsu devādīsu aññataro nu
kho”ti kaṅkhati. **Kathaṃ nu khoti** saṅṭhānākāraṃ nissāya “dīgho nu kho
ahosim, rassa-odātakāḷapamāṇika-appamāṇikādīnampi aññataro”ti kaṅkhati.
Issaranimmānādīm nissāya “kena nu kho pakārena ahosin”ti nibbattākārato
kaṅkhatīti ca vadanti. **Kim hutvā kim ahosinti** jāti-ādīm nissāya “khattiyo
hutvā nu kho brāhmaṇo ahosim -pa- devo hutvā nu kho manusso ahosin”ti
attano aparāparuppattim kaṅkhati. Sabbattheva ca **addhānanti**
kāladhivacanaṃ. **Bhavissāmi nu khoti** sassatākāraṃ, ucchedākārañca
nissāya anāgate attano vijjamānataṃ, avijjamānatañca kaṅkhati. Sesamettha
vuttanayameva. **Etarahi vā pana paccuppannaṃ addhānanti** idāni vā
paṭisandhimādīm katvā cutipariyantaṃ sabbampi vattamānakālaṃ.
Ajjhattaṃ kathaṃkathī hotīti attano khandhesu vicikicchā hoti. **Ahaṃ nu
khosmīti** attano atthibhāvaṃ kaṅkhati.

1. Ma 1. 128, 326; Ma 3. 328, 332, 333; Saṃ 1. 301-2; Abhi 4. 248-9 piṭṭhādīsu.

ayuttaṃ panetanti. Yuttaṃ ayuttanti kā ettha cintā. Ummattako viya hi bālaputhujano. **No nu khosmīti** attano natthibhāvaṃ kaṅkhati. **Kiṃ nu khosmīti** khattiyova samāno attano khattiyabhāvaṃ kaṅkhati. Esa nayo sesesu. **Kathaṃ nu khosminti** vuttanayameva. Kevalañhettha “abbhantare jīvo nāma atthī”ti gahetvā tassa dīghādibhāvaṃ kaṅkanto “kathaṃ nu khosmin”ti kaṅkhatīti veditabbo. Paccuppannaṃ pana attano sarīrasaññhānaṃ ajānanto nāma natthi. **Kuto āgato, so kuhiṃ gāmī bhavissatīti** attabhāvassa āgatigatiṭṭhānaṃ kaṅkhati. **Sā sabbāpi pahīyatīti** sā yathāvuttā soḷasavidhāpi vicikicchā vikkhambhanavasena pahīyati.

681. Kusalādibhedato sabbappakārassāpi nāmassa sādharmaṇo paccayoti, tato pavattito manasikārādiko kusalādibhedato sabbappakārassāpi nāmassa asādharmaṇo paccayoti ca yojetabbaṃ. **Kusalādibhedatoti** kusalākusalavipākakiriyabhedato. Tassāpi somanassasahagatādi-aññatarabhedavasena **sabbappakārassāpi**. Yaṃ ekantato chadvārikaṃ, tampi chadvāraggahaṇeneva gahitaṃ yathā chaṭṭhārammaṇaṃ chaḷārammaṇaggahaṇenātipi vuttaṃ “**sabbappakārassāpi**”ti. **Tatoti** cakkhurūpādito. **Manasikārādikoti** yonisomanasikāra-ayonisomanasikārādiko, kammabhavaṅgādiko ca. Kāmañcetta dvāraccakkayonisomanasikārādivasena nāmasseva sādharmaṇo, asādharmaṇo ca paccayo vutto, taṃ pana avisesavasena vuttaṃ. Viśesato pana kammaṃ vipākanāmassa, kammamuṭṭhānarūpānaṃ, cittaṃ cetasikanāmassa, cittasamuṭṭhānarūpānaṃ sādharmaṇo paccayo, yathāvuttasseva ca nāmassa, rūpassa ca tadaññāmarūpāpekkhāya asādharmaṇo paccayo. Tathā sabhāgo, utusabhāgo ca āhāro taṃsamuṭṭhānarūpānaṃ sādharmaṇo paccayo, tadaññāpekkhāya asādharmaṇoti rūpassāpi sādharmaṇo, asādharmaṇo ca paccayo yathārahaṃ niddhāretabbo. Paccayapariggaho nāma anadhigatārahattena kātabboti tadapekkhāya “**yonisomanasikārasaddhammassavanādiko kusalassevā**”ti vuttaṃ. **Ādi**-saddena sappurisūpanissayassa, catunnampi vā sampatticakkānaṃ saṅgaho daṭṭhabbo. **Viparīto akusalassāti** vacanato yathā yonisomanasikārādiviparīto

akusalasseva paccayo, tathā yonisomanasikārādi kusalasseva paccayo hotīti attho. Yassa vā kusalam sambhavati, akusalam sambhavati, kusalākusalāni vā, tassāti atthasiddhametaṃ. **Kammādikoti ādi**-saddena avijjādayo viya gatikālādayopi saṅgahitāti daṭṭhabbā. **Bhavaṅgādikoti** bhavaṅgasantīraṇaparittakiriyārahattādiko. Tattha **bhavaṅgam** pañcadvāramanodvārāvajanakiriyānam, **santīraṇam** voṭṭhabbanassa, **parittakiriyā** yathārahaṃ parittamahaggatakiriyānam, **arahattaṃ** āvajjanavajjānam sabbakiriyānam paccayoti veditabbaṃ.

Kammanti cetanāva adhippetā, sā ca kho kusalākusalā. Vuttañhetam “kusalākusalacetanā vipākāna khandhānaṃ, kaṭattā ca rūpānaṃ kammappaccayena paccayo”ti¹. Na cittaṃ viya sasampayuttā. Cittañhettha² sasampayuttam adhippetam “hetū hetusampayuttakānam dhammānam, taṃsamuṭṭhānānaṃca rūpānaṃ hetupaccayena paccayo”ti-ādi³ vacanato. **Tatthāti** tesu kammādisu rūpajanakapaccayesu. Atītato eva kammato phalaṃ uppajjati, na vattamānatoti vuttam “**kammaṃ atītameva kammassamuṭṭhānassa rūpassa paccayo**”ti. Yadi hi paccuppannato kammato phalaṃ uppajjeyya, āyūhanakkhaṇe eva phalena uppajjitabbaṃ bhaveyya, na ca taṃ diṭṭhamicchitam vā. Na hi loke kudācanaṃ kariyamānameva kammaṃ phalaṃ dentaṃ diṭṭham, tathārūpo vā āgamo atthīti. Nanu ca ()⁴ idamapi na diṭṭham, yaṃ vinaṭṭhato hetuto phalaṃ uppajjamānam, mato vā kukkuṭo vassantoti? Saccamadiṭṭham rūpadhammānam pabandhavicchede, idaṃ pana arūpaṃ pabandhopi atthīti upamā na saṃsandati. Kammato hi atītato eva kammassa katattā, upacitattā ca phalaṃ uppajjati. Vuttañhetam “kāmāvacarassa kusalassa kammassa katattā upacitattā vipākam cakkhuviññānam uppannam hotī”ti-ādi⁵. Yasmā anantarādipaccayalābhato uppādakkhaṇe eva cittaṃ balavatā, tasmā taṃ uppajjamānameva rūpaṃ janetīti āha “**cittaṃ cittaṃsamuṭṭhānassa uppajjamānan**”ti. Rūpassa paccayo hotīti sambandho. Yasmā pana rūpassa ṭhitikkhaṇe balavatā pacchājātādipaccayalābhato, tasmā vuttam “**utu-āhārā -pa- hontī**”ti, bāhiraṃ utum, āhārānaṃ paccayaṃ abhitvā attano ṭhitikkhaṇe utu-āhārā rūpaṃ janentīti attho.

1. Abhi 8. 154 piṭṭhe Paṭṭhāne. 2. Cittañcettha (Syā) 3. Abhi 8. 1 piṭṭhe Paṭṭhāne.
4. (Atītakammaṃ vinaṭṭham) (Ka) 5. Abhi 1. 104 piṭṭhe.

Evanti “sādhāraṇāsādhāraṇavasenā”ti-ādinā vuttappakārena.

682. **Saṅkhārānanti** saṅkhatasaṅkhārānaṃ. **Bhaṅganti** maraṇaṃ. **Jarāmarāṇaṃ nāma jātiyā satīti**-ādi phaladassanānupubbiyā hetudassanakkamena nāmarūpassa paccayapariggaho sukaroti katvā dassito. Tattha **bhave satīti** kammabhava sati.

683. **Pubbe vitthāretvā dassita-anulomapaṭiccasamuppādavasenāti** pariyoṣānato paṭṭhāya paṭilomanayena ādipāpanavasena vitthāretvā dassita-anulomapaṭiccasamuppādavasenā. “Asati jātiyā natthi jarāmarāṇa”ti-ādinā¹ hi paṭilomavasena dassite paccayākāre “yassa abhāvā yassa abhāvo, so tassa paccayo”ti byatirekato, anvayato ca nāmarūpassa paccayapariggaho sukaroti.

684. **Purimakammabhavasmim mohoti**-ādi vuttatthameva. Kammasahāyattā kilesavaṭṭaṃ kammavaṭṭe pakkhitvā vuttaṃ “**kammavaṭṭavipākavaṭṭavasenā**”ti.

685. **Diṭṭhadhammo vuccati paccakkhabhūto paccuppanno attabhāvo**, tattha veditabbaphalaṃ kammaṃ **diṭṭhadhammavedanīyaṃ**. Paccuppannabhavato anantaraṃ veditabbaphalaṃ kammaṃ **upapajjavedanīyaṃ**. **Aparāpariyāyeti** diṭṭhadhammānantarānāgatato aññasmim attabhāvapariyāye attabhāvaparivatte. **Ahosikammanti** ahosi eva kammaṃ, na tassa vipāko ahosi, “atthi, bhavissati vā”ti evaṃ vattabbakammaṃ. Paṭipakkhehi² anabhibhūtatāya, paccayavisesena paṭiladdhavisēsātāya ca balavabhāvaṃ pattā tādissassa pubbābhisāṅkhārassa vasena sātisayā hutvā pavattā paṭhamajavanacetanā tasmimyeva attabhāve phaladāyini **diṭṭhadhammavedanīyā** nāma. Sā hi vuttākārena balavati javanasantāne guṇavisesayuttesu upakārāpakāravasappavattiyā, āsevanālābhena appavipākatāya ca paṭhamajavanacetanā itaradvayaṃ viya pavattasantānuparamāpekkhaṃ, okāsalābhāpekkhañca kammaṃ na hotīti imeva pupphamattaṃ viya pavattivipākamattaṃ phalaṃ deti. **Tathā asakkontanti** kammaṃ vipākadānaṃ nāma upadhipayogādipaccayantarasaṃvāyeneva hotīti

1. Saṃ 1. 248 piṭṭhe.

2. Kammaṃ paṭipakkhehi (Syā)

tadabhāvato tasmimyeva attabhāve vipākaṃ dātuṃ asakkontaṃ.
Atthasādhikāti dānādipāṇātipātādi-atthassa nipphādikā. Kā pana sāti āha
 “**sattamajavanacetanā**”ti. Sā hi sanniṭṭhāpakacetanā vuttanayena
 paṭiladdhavisēsā, purimajavanacetanāhi laddhāsevanā ca samānā
 anantarattabhāve vipākadāyini **upapajjavedanīyakammaṃ** nāma. “**Sati**
saṃsārappavattiyā”ti iminā asati saṃsārappavattiyāṃ ahosikammapakke
 tiṭṭhati vipaccanokāsassa abhāvatoti dīpeti.

686. **Yaṃ garukanti** yaṃ akusalaṃ mahāsāvajjaṃ, kusalaṃ
 mahānubhāvaṃ kammaṃ. **Yaṃ bahulanti** yaṃ bahulaṃ abhiṇhaso kataṃ
 samāsevitaṃ. **Maranākāle anussaranti** pariyyattabhāvena maraṇassa
 āsannakāle anussaritaṃ. Āsannakāle kate vattabbameva natthīti hi vuttaṃ.
 “**Punappunaṃ laddhāsevanan**”ti iminā “yaṃ bahulan”ti vuttakammato
 viseseti. Tathā diṭṭhadhammavedanīyaṃ nivatteti paṭisandhi-
 ākaḍḍhanānujānanato. Paṭisandhijanakavasena hi garukādikammacatukkaṃ
 vuttaṃ.

Tattha garukaṃ sabbapaṭhamaṃ vipaccati. Tathā hi taṃ garukanti
 vuttaṃ. Garuke asati bahulikataṃ, tasmimasati āsannaṃ, tasmimpi asati
 “kaṭattā vā panā”ti vuttaṃ purimajātisu katakammaṃ vipaccati.
 Bahulāsannapubbakatesu ca balābalaṃ vā jānitabbaṃ¹, pāpato pāpantaram,
 kalyāṇaṇca, kalyāṇato ca kalyāṇantaram, pāpaṇca, bahulikataṃ ca mahato
 ca pubbakatādi, appaṇca. Bahulānussaraṇena vipaṭisārādijananato
 paṭipakkhassa aparipuṇṇatāya āradhaviṇipākassa kammaṃ, kammasesassa
 vā aparāpariyāye vedanīyassa aparikkhīṇatāya santatiyā pariṇāmaṃvisesatoti
 tehi tehi kāraṇehi āhitabalaṃ paṭhamaṃ vipaccati.

Mahānāradakassapajātake videharaṇṇo senāpati alāto, bījako dāso,
 rājakaṇṇā rucā ca ettha nidassanaṃ. Tathā hi vuttaṃ bhagavatā—

“Tatrananda yvāyaṃ puggalo idha pāṇātipātī -pa- micchādīṭṭhi
 kāyassa bhedaṃ paraṃ maraṇā apāyaṃ duggatim vinipātaṃ nirayaṃ
 upapajjati. Pubbe vāssa taṃ kataṃ hoti pāpakammaṃ

1. Janitabbaṃ (Syā, Ka)

dukkhavedanīyaṃ, pacchā vāssa taṃ kataṃ hoti pāpakammaṃ dukkhavedanīyaṃ, maraṇakāle vāssa hoti micchādiṭṭhi samattā samādinna, tena so kāyassa bhedaṃ paraṃ maraṇā apāyaṃ duggatiṃ vinipātaṃ nirayaṃ upapajjati. Yañca kho so idha pāṇātipātī hoti -pa-micchādiṭṭhi hoti, tassa diṭṭhe vā dhamme vipākaṃ paṭisaṃvedeti upapajja vā apare vā pariyāye.

Tatrānanda yvāyaṃ puggalo idha pāṇātipātī -pa- micchādiṭṭhi kāyassa bhedaṃ paraṃ maraṇā sugatiṃ saggam lokam upapajjati. Pubbe vāssa taṃ kataṃ hoti kalyāṇakammaṃ sukhavedanīyaṃ, pacchā vāssa taṃ kataṃ hoti kalyāṇakammaṃ sukhavedanīyaṃ, maraṇakāle vāssa hoti sammādiṭṭhi samattā samādinna, tena so kāyassa bhedaṃ paraṃ maraṇā sugatiṃ saggam lokam upapajjati. Yañca kho so idha pāṇātipātī hoti -pa- micchādiṭṭhi hoti, tassa diṭṭhe vā dhamme vipākaṃ paṭisaṃvedeti upapajja vā apare vā pariyāye.

Tatrānanda yvāyaṃ puggalo idha pāṇātipātā paṭivirato -pa-sammādiṭṭhi kāyassa bhedaṃ paraṃ maraṇā sugatiṃ saggam lokam upapajjati. Pubbe vāssa taṃ kataṃ hoti kalyāṇakammaṃ sukhavedanīyaṃ, pacchā vāssa taṃ kataṃ hoti kalyāṇakammaṃ sukhavedanīyaṃ, maraṇakāle vāssa hoti sammādiṭṭhi samattā samādinna, tena so kāyassa bhedaṃ paraṃ maraṇā sugatiṃ saggam lokam upapajjati. Yañca kho so idha pāṇātipātā paṭivirato -pa-sammādiṭṭhi hoti, tassa diṭṭhe vā dhamme vipākaṃ paṭisaṃvedeti upapajja vā apare vā pariyāye.

Tatrānanda yvāyaṃ puggalo idha pāṇātipātā paṭivirato -pa-sammādiṭṭhi kāyassa bhedaṃ paraṃ -pa- nirayaṃ upapajjati. Pubbe vāssa taṃ kataṃ hoti pāpakammaṃ dukkhavedanīyaṃ, pacchā vāssa taṃ kataṃ hoti pāpakammaṃ dukkhavedanīyaṃ, maraṇakāle vāssa hoti micchādiṭṭhi samattā samādinna, tena so kāyassa bhedaṃ paraṃ maraṇā apāyaṃ -pa- nirayaṃ upapajjati. Yañca kho so idha pāṇātipātā paṭivirato hoti -pa-

sammādiṭṭhi hoti, tassa diṭṭhe vā dhamme vipākam paṭisaṁvedeti upapajja vā apare vā pariyāye”ti¹.

Kim bahunā yaṁ taṁ tathāgatassa mahākammavibhaṅgañāṇam, tassevāyaṁ visayo, yadidaṁ tassa tassa kamma tena tena kāraṇena pubbāparavipākatā sāmattiyaṁ.

687. Paṭisandhidānādivasena vipākasantānassa nibbattakam janakam. (Tenāha “**taṁ paṭisandhiyampi pavattepi rūpārūpavipākakkhandhe janeti**”ti)². Sukhadukkhasantānassa, nāmarūpappabandhassa vā ciratarappavattihetubhūtam upatthambhakam. Tenāha “**sukhadukkham upatthambheti, addhānam pavatteti**”ti. Upapīlakam sukhadukkappabandhe pavattamāne saṅikam saṅikam taṁ hāpeti. Tenāha “**sukhadukkham pīleti bādhati, addhānam pavattitum na deti**”ti. Ghātetvāti upacchindivā. Kammasa upacchindanam nāma tassa vipākapaṭibāhanamevāti āha “**tassa vipākam paṭibāhitvā**”ti. Tañca attano vipākuppattiyā okāsakaraṇanti vuttam “**attano vipākassa okāsam karoti**”ti. Vipaccanāya katokāsam kammam vipakkameva nāma hotīti āha “**evam pana kamma kate okāse taṁ vipākam uppannam nāma vuccati**”ti. **Upapīlakam** aññassa vipākam upacchindati, na sayam attano vipākam deti. **Upaghātakam** pana dubbalam kammam upacchindivā attano vipākam uppādetīti ayametesam viseso. Bavhābādhatādipaccayūpanipātena vipākassa vibādhakam **upapīlakam**, tathā vipākasappa upacchedakam **upaghātakam**. Kammam upaghātetvā attano vipākassa okāsakaraṇena vipaccane sati janakameva siyā, janakādibhāvo nāma vipākam pati icchitabbo, na kammaṁpatīti vipākasappa upaghātakatā yuttā viya dissati, vīmaṁsitabban.

Kammantaranti kammaviseso kammānam balābalabhedo. **Vipākantaranti** vipākaviseso, tassa hīnapaṇītatādibhedo. Aparo nayo—yasmim kamme kate paṭisandhiyam, pavatte ca vipākakaṭattārūpanam uppatti hoti, taṁ **janakam**. Yasmim pana kate aññena janitassa iṭṭhassa vā aniṭṭhassa vā phalassa vibādhakavicchedakapaccayānuppattiyā, upabrūhanapaccayuppattiyā ca janakānubhāvānurūpanam pariuposaciratarappabandhā honti, taṁ **upatthambhakam**.

1. Ma 3. 257-8 piṭṭhe.

2. () Etthantare pāṭho bahūsu na dissati.

Janakena nibbattitaṃ kusalaphalaṃ vā akusalaphalaṃ vā yena paccanīkabhūtena rogaḍhātusamatādinimittatāya bādhīyati, taṃ **upapīlakam**. Yena pana kammunā janakasāmatthiyavasena ciratarappabandhārahampi samānaṃ phalaṃ vicchedakapaccayuppattiyā upahaññati vicchijjati, taṃ **upaghātakam**. Tattha keci dutiyassa kusalabhāvaṃ itthannāmagatassa appābādhadīghāyukabhāsaṃvattanavasena, pacchimānaṃ dvinnaṃ akusalabhāvaṃ bavhābādha-appāyukatāsaṃvattanavasena vaṇṇenti. Devadattādīnaṃ, pana nāgādīnaṃ, ito anupadinnena yāpanakapetānaṃca narakādīsu akusalavipākupatthambhanupapīlanupaghātakāni na na santīti catunnampi akusalākusalabhāvo na virujjhati. Buddhāveṇikatāya asādhāraṇasseva ñāṇassa gocarabhāvato kammantarādi “**asādhāraṇaṃ sāvakehī**”ti vuttaṃ. **Ekadesato jānitabbaṃ** anavasesato jānituṃ na sakkā avisayattā. Sabbena sabbaṃ ajānane paccayapariggaho na paripūrātīti.

688. Yathāvuttaṃ kammaṃ vattamānavipākappabandhanimittameva adhippetanti kammekadesatāya “**dvādasavidhaṃ kammaṃ kammavaṭṭe pakkhipitvā**”ti vuttaṃ. Kilesavaṭṭampi kmmasahāyatāya kammavaṭṭapakkhikameva katvā āha “**kammavaṭṭavipākavaṭṭavasenā**”ti. Yādisato paccayato paccuppanne addhāne nāmarūpassa pavatti, tādisato eva itarasmimpi addhadvayeti yathā atītānāgate nayaṃ neti, taṃ dassento “**idan**”ti-ādīmāha. Tattha **anāgatepi kammavaṭṭavipākavaṭṭavasenevāti** ettha vuttaṃ **eva-saddaṃ** “etarahi atītepi”ti etthāpi ānetvā vattabbaṃ addhattayepi kiriyākiriya-phalamattatādassanuparattā codanāya. **Iti kammañcevāti**-ādi vuttassevatthassa nigamanavasena vuttaṃ. Aparāparaṃ vaṭṭanaṭṭhena **vaṭṭam**. Tathā pavattanaṃ **pavattam**. Hetu-phalabhāvena sambandhatīti santati, pabandho. Karaṇaṭṭhena, paccayehi karīyatīti vā **kiriya**.

Kammāti kammato. Sambhavati etasmāti sambhavo, kammaṃ sambhavo etassāti **kmmasambhavo**, vipāko.

Kāraṇasāmaggiyaṃ dānādīhi sādhitakiriyaṃ vattamānāya kāraṇamatte kattuvohāroti āha “**neva kāraṇato uddham kārakam passati**”ti. Karotīti hi **kārakam**. Vipākapaṭisaṃvedakam na passatīti

sambandho. Kāmaṃ bālāpi “kārako paṭisaṃvedako”ti vadantā atthato paññattimattameva vadanti, te pana viparītābhinivesavasenāpi vadantīti taṃ appamaṇanti āha “**samaññāmettena paṇḍitā voharantī**”ti.

689. **Evetanti** evaṃvidhaṃ etaṃ dassanaṃ, **sammadassanaṃ**, aviparītadassananti attho. **Bījarukkhādikānaṃvāti** yathā bījato rukkho, rukkhatto puna bījanti anādikālikattā bījarukkkhasantānassa pubbakoti natthi, evaṃ kammaṃpaccayā vipāko, vipākapaccayā kammanti anādikālikattā kammavipākasantānassa pubbakoti na paññāyati. **Ādi-saddena** “kukkuṭiyā aṇḍaṃ, aṇḍato kukkuṭi, punapi kukkuṭiyā aṇḍaṃ”ti evamādiṃ saṅgaṇhāti. **Anāgatepi saṃsāreti** yathā atīte, evaṃ anāgatepi addhāne “khandhānañca paṭipāṭi”ti-ādinā¹ vutte saṃsāre sati kammavipākānaṃ appavattaṃ na dissati, kammavipākānaṃ appavatti na dissati, pavattati evāti attho.

Etamatthanti “kammaṃsā kārako natthi”ti-ādinā² vuttamattham. **Asayaṃvasīti** na sayamaṃvasino, micchābhinivesaparavasāti attho. **Aññamaññavirodhitāti** itarītaravirodhitā, diṭṭhiyo, diṭṭhiyā vā aññamaññena virodhitā viruddhā.

Gambhīrañāṇagocarātāya **gambhīraṃ**. Tathā **nipuṇaṃ**. Sattasuññatāya, aññamaññasabhāvasuññatāya **ca suññaṃ**. **Paccayanti** nāmarūpassa paccayaṃ, tappaccayapaṭivedheneva ca sabbaṃ paṭividhaṃ hotīti. **Kammaṃ natthi vipākamhīti**-ādīsu yaṃ vattabbaṃ, taṃ heṭṭhā vuttameva.

Paccayasūññaṃ phalanti yathāvuttamattham upamāya vibhāvetum “**yathā na sūriye**”ti-ādi vuttam. **Tesanti** sūriyādīnaṃ. **Soti** aggi. **Sambhāreḥīti** ātapādīhi kāraṇehi.

1. Visuddhi 2. 176; Dī-Ṭṭha 2. 86; Saṃ-Ṭṭha 2. 89; Am-Ṭṭha 2. 386; Abhi-Ṭṭha 1. 11; Abhi-Ṭṭha 2. 142; Suttanipāta-Ṭṭha 2. 151; Udāna-Ṭṭha 245; Itivuttaka-Ṭṭha 55, 190; Theragāthā-Ṭṭha 1. 191, 257; Buddhavaṃsa-Ṭṭha 115; Cūḷaniddesa-Ṭṭha 5; Paṭisaṃ-Ṭṭha 2. 18 piṭṭhādīsu.

2. Visuddhi 2. 237 piṭṭhe.

Yadi ca hetu ca phalañca aññamaññarahitaṃ, kathaṃ hetuto phalaṃ nibbattaṭī āha “**kammañca kho upādāyā**”ti. Na kevalaṃ kammaphalameva suññaṃ katturahitaṃ, sabbampi dhammajātaṃ kārakarahitanti dassetuṃ “**na hettha devo**”ti gāthā vuttā. **Hetusambhārapaccayā**ti hetusamūhanimittaṃ, hetupaccayanimittaṃ vā.

690. **Cutipāṭisandhivasena viditā hontī**ti kammavaṭṭavipākavaṭṭavasena paccayapariggahassa katattā cutipāṭisandhivasena viditā hontīti vadanti. Vuttanayena pana sappaccayanāmarūpassa dassanena tīsu addhāsu pahīnavicikicchassa addhattayapariyāpannā dhammā atītapaccuppannānāgatabhavesu ca cutipāṭisandhivasena viditā honti, na anupadadhammavasena tathāpariggahassa akatattā. **Sāssa hoti nātapaniññā**ti yāya nāmarūpariggahaṃ, tassa ca paccayapariggahaṃ karoti, sā assa yogino “idaṃ nāmaṃ, ettakaṃ nāmaṃ”ti-ādinā, “tassa ayaṃ paccayo, ettako paccayo”ti-ādinā ca paricchadavasena nātavati paññāti katvā nātapaniññā.

Idāni yena kāraṇena addhattayapariyāpannā dhammā cutipāṭisandhivasena viditā honti, taṃ dassetuṃ “**so evaṃ pajānāti**”ti-ādi vuttaṃ. Tena dhammānaṃ bhavantarasaṅkamo nāma na kadācīpi atthi tattha tattheva nirujjhanatoti dasseti. Sajjhāya mantodakapāna mukhamaṇḍana padīpasikhūpamāhi tameva dhammānaṃ saṅkamābhāvaṃ vibhāvetuṃ “**apica kho**”ti-ādimāha.

Manodhātu-anantaranti kiriyamanodhātuyā anantaraṃ labbhamānaṃ cakkhuviññānaṃ. **Na ceva āgatanti** kiriyamanodhātuto na ceva āgataṃ kiriyamanodhātuyā cakkhuviññānaṃ abhāvato. **Nāpi na nibbattaṃ anantaranti** kiriyamanodhātuto anāgacchantampi paccayasāmaggīlabhena tato anantaraṃ nāpi na nibbattaṃ, nibbattameva hoti. Yathāyaṃ¹ pavattiyāṃ cittappavatti, tattheva paṭisandhimhi vattate cittasantati, cuticittato anāgacchantampi paṭisandhicittaṃ tato anantaraṃ nāpi na nibbattati, paccayasāmaggivasena nibbattatevāti attho. Santatigahaṇena cettha kutoci āgamābhāvameva vibhāveti. Hetuphalabhāvena hi sambandhatīti dhammappavatti **santatī**ti. Tenāha “**purimaṃ bhijjate cittaṃ**”ti-ādi. **Purimanti** cuticittaṃ.

1. Yathā taṃ (Ka)

Bhijjati nirujjhati. **Pacchimanti** paṭisandhicittam. **Tatoti** cuticittato anantameva jāyati. Yattha hi cuticittato dūrepi kālantarepi uppajjamānam paṭisandhicittam anantameva jāyatīti vuccati. Tasmā **tesam antarikā natthi** tesam cutipaṭisandhicittānam byavadhāyakam kiñci natthi. **Vīci tesam na vijjatīti** tasseva vevacanam. **Itoti** cuticittato anantaram na ca gacchati kiñci cittam. Tañhi sasampayuttadhammam tatheva nirujjhati. **Paṭisandhi cāti** paṭisandhivīññāṇaṇca aññaṇameva yathāpaccayam **jāyati** nibbattatīti punapi saṅkamābhāvameva vibhāvento sappaccayanāmarūpadassanam nigameti.

691. Nāmarūpaggaḥaṇena, tassa ca paccayadhammaggaḥaṇena aggaḥitassa tebhūmakadhammassa abhāvato “**viditasabbadhammassā**”ti vuttam. Na cettha lokuttaradhammā adhigatā. **Thāmagatam hoti** anekākāravokārapaccayapariggahavidhino anuṭṭhitattā. **Sutṭhutaram pahiyati** tiyaddhagatadhammappavattiyā vigatasammohattā. **Sā evāti** soḷasavidhā kaṅkhā eva. Yasmā ettha “buddho, dhammo, saṅgho, sikkhā”ti ca kaṅkhāya gocarabhūtā lokiyā dhammā adhippetā. Na hi lokuttaradhamme ārabha kilesā pavattitum sakkonti. **Pubbantoti** atītā khandhāyatanadhātuyo. **Aparantoti** anāgatā. **Pubbantāparantoti** tadubhayam, addhāpaccuppannam vā tadubhayabhāgayuttattā. Evaṃ buddhādiggahaṇena, paṭiccasamuppannadhammaggaḥaṇena ca gahito aṭṭhamo kaṅkhāvisayo nāmarūpamattam, idappaccayatāggahaṇena pana tassa paccayo gahito, tasmā soḷasavatthukāya kaṅkhāya pahīnāya aṭṭhavatthukā kaṅkhā appatiṭṭhāva hotīti āha “**na kevalaṇca -pa- pahiyatiyevā**”ti.

Diṭṭhekaṭṭhattā vicikicchāya yathā diṭṭhi samucchijjamānā vicikicchāya saddhimyeva samucchijjati, evam vicikicchā vikkhambhiyamānā diṭṭhiyā saddhimyeva vikkhambhīyatīti āha “**dvāsaṭṭhi diṭṭhigatāni vikkhambhantī**”ti. Attābhinivesūpanissayā hi “ahosiṃ nu kho ahan”ti-ādi¹ nayappavattā soḷasavatthukā saṅkhā, sā eva ca pubbantādivatthukabhāvena vuttā. Attābhinivesavatthukāni ca dvāsaṭṭhi diṭṭhigatāni, buddhādivatthukā ca kaṅkhā tadekaṭṭhāti.

1. Ma 1. 10; Saṃ 1. 265 piṭṭhesu.

Dhariyanti attano paccayehīti dhammā, tiṭṭhati ettha tadāyattavuttitāya phalanti ṭhiti, dhammānaṃ ṭhiti dhammaṭṭhiti, paccayadhammo. Atha vā dhammoti kāraṇaṃ “dhammapaṭisambhidā”ti-ādīsu¹ viya, dhammassa ṭhiti sabhāvo, dhammato ca añño sabhāvo natthīti paccayadhammānaṃ paccayabhāvo dhammaṭṭhiti, dhammaṭṭhitiyaṃ nāṇaṃ **dhammaṭṭhitiñāṇaṃ**. Saṅkhārānaṃ yaṃ yaṃ bhūtaṃ aniccatādi yathābhūtaṃ, tattha nāṇanti **yathābhūtañāṇaṃ**. Sammā passatīti **sammādassanaṃ**.

Avijjā paccayoti avijjā hetu-ādivasena saṅkhārānaṃ yathārahaṃ paccayo. Tato eva **saṅkhārā paccayasamuppannā**. **Ubhogeteti** yasmā avijjāpi āsavādivasena paccayasambhūtāva, tasmā avijjā saṅkhārāti ubhayepi ete dhammā paccayasamuppannā. **Itīti** evaṃ. **Paccayapariggahe paññāti** paccayānaṃ paricchijja gahaṇavasena pavattā paññā. Vuttanayena **dhammaṭṭhitiñāṇaṃ**.

Nimittanti saṅkhāranimittaṃ, atthato pañcakkhandhā. Te highanasaññāpavattiyā vatthubhāvato nimittaṃ, saviggahabhāvena upaṭṭhānato vā. Yasmā aniccatā nāma saṅkhārānaṃ aviparītākāro. Tattha niccatāya lesassāpi abhāvato **aniccato** passanto **yathābhūtaṃ jānāti**. Tañca nāṇaṃ aviparītaggahaṇatāya **sammādassanaṃ**. Taṃsamaṅginā ca paccuppannesu viya atītānāgatesupi nayaṃ nentena te suparividitā honti.

Aniccatā ca nāma upattimato, uppādo ca paccayavasenāti aniccatā sijjhamānā saṅkhārānaṃ sappaccayataṃ sādhentī yathāvuttakaṅkhappahānāya samvattatīti imamatthaṃ dassento “**aniccato -pa- pahiyati**”ti āha. Tattha **tadanvayenāti** paccakkhato diṭṭhassa anugamanena. **Etthāti** yathādiṭṭhesu dhammesu. **Dukkhato manasi karontoti-**ādīsipi eseva nayo. **Pavattanti** upādinnakkhandhappavattaṃ. Tañhi kilesābhisaṅkhārehi pavattitattā sātisayaṃ dukkhabhāvena upaṭṭhāti. **Pavattanti** ṭhānanisajjādivasena dukkhadukkhatadivasena ca saṅkhārappavattanti apare. “Nimittaṃ, pavattan”ti ca vutte ajjhatabhiddhāsantānasaññite sabbasmiṃ sappaccaye nāmarūpe yāthāvato pavattā ekāva paññā pariyāyavasena “yāthābhūtañāṇaṃ”tipi “sammādassanaṃ”tipi tattha kaṅkhāvikkhambhanaena “kaṅkhāvitarāṇā”tipi vuccati. Yathā “rukkho pādapo tarū”ti imamatthaṃ dassento āha “**yañca yathābhūtañāṇaṃ**”ti-ādi.

1. Abhi 2. 307-8 piṭṭhesu.

Paramatthato sāsane assāso nāma ariyaphalaṃ, paṭiṭṭhā nāma ariyamaggo, ayaṃ pana anadhigatamaggaphalopi tadadhigamupāyapaṭipattiyāṃ ṭhitattā laddhassāso viya, laddhapatiṭṭho viya ca hotīti vuttaṃ “**laddhassāso laddhapatiṭṭho**”ti.

Aparihīnakaṅkhāvitaraṇavisuddhiko vipassako lokiyāhi sīlasamādhipaṅṅāsampadāhi samannāgatattā uttari appaṭivijjhanto sugatiparāyaṇo ca hotīti vuttaṃ “**niyatagatiko**”ti. Tato eva **cūlasotāpanno nāma hoti**. Sotāpanno hi khīṇāpāyadugativinipātoti.

Atha vā **laddhassāso** diṭṭhivisuddhisamadhiḡamena.

Nāmarūpaparicchedena hi khandhādike sabhāvasarasato sallakkhetvā sāsane dhammupasaṃhitapāmojjappaṭilābhena laddhassāso hoti. **Laddhapatiṭṭho** kaṅkhāvitaraṇavisuddhisamadhiḡamena. Sappaccayanāmarūpadassanena hi parimadditadiṭṭhikaṅṭako viniddhata-ahetuvisamahetuvādo yathāsakaṃ paccayeteva dhammamattaṃ jānitvā sāsane paṭiṭṭhitasaddho laddhapatiṭṭho nāma hoti. Nāmarūpavavattānena dukkhasaccaṃ, dhammaṭṭhitiñāṇena samudayasaccaṃ, tasseva aparabhāgena aniccato manasikārādividhinā maggasaccañca abhiññāya pavattiyā dukkhabhāvaṃ divā appavatte nirodhe ekaṃseneva ninnajjhāsayatāya lokiyeneva ñāṇena catunnaṃ ariyasaccānaṃ adhigatattā apāyesu abhappattiko, sotāpannabhūmiyaṃ bhappattiko ca hotīti vuttaṃ “**niyatagatiko**”ti. Tenāha “**cūlasotāpanno nāma hoti**”ti.

Tasmāti yasmā evaṃ mahānisamsametaṃ yathābhūtañāṇaṃ, tasmā. **Sadā**ti sabbakālaṃ rattiñceva divā ca. **Sabbasoti** nibbattakahetu-ādi-pariḡgaṇhanavasena sabbappakārena.

Kaṅkhāvitaraṇavisuddhiniddesavaṇṇanā niṭṭhitā.

Iti ekūnavīsatiḡaparicchedavaṇṇanā.

20. Maggāmaggañānadassanavisuddhiniddesavaṇṇanā

Sammasanañānakathāvaṇṇanā

692. Evaṃ maggañca amaggañca ñatvā ṭhitam ñāṇanti ayaṃ upakkilesavinimuttā vīthipaṭipannā vipassanāpaññā ariyamaggassa pubbabhāgamaggo, ayaṃ obhāsādibhedo dasavidho upakkilesa na maggoti evaṃ maggañca amaggañca yāthāvato vavatthapetvā ṭhitam ñāṇam.

Atītādivasena anekabhedabhinne dhamme kalāpato saṅkhipitvā sammasanam **kalāpasammasanam**, ayaṃ kira jambudīpavāsīnam abhilāpo. “Yaṃ kiñci rūpan”ti-ādinā¹ nayena hi dhammānam vipassanā **nayavipassanā**, ayaṃ kira tambapaṇṇidīpavāsīnam abhilāpo. Tenevāha “**kalāpasammasanasāṅkhātāya nayavipassanāyā**”ti. **Tāva**-saddo kamattho, tena sammasanappakārānam bahubhedataṃ dīpeti. Bahubhāvato hi tesam paṭhamam nayavipassanāya yogārambham anusāsati “nayavipassanāya tāva yogo karaṇīyo”ti. **Kasmāti** codakavacanam. Tassāyam adhippāyo—yadi maggāmaggañānadassanavisuddhi sampādetabbā, atha kasmā “nayavipassanāya ādito yogo kātabbo”ti vuttanti. Itaro tassāyam adhigamūpāyoti dassento “**āraddhavipassakassā**”ti-ādimāha. Tenetaṃ dasseti “vipassanāya sati udayabbayañāṇuppādo, udayabbayañāṇe sati obhāsādi-upakkilesasambhavo, tato maggāmaggavavatthānam, tasmā tassa āditova ārambhassa sambhavo natthīti vipassanā paṭhamam āraddhabbā²”ti. Evampi paṭhamam nayavipassanāva kasmā āraddhabbā²ti āha “**vipassanāya ca kalāpasammasanam ādi**”ti. Tañhi atītādibhedabhinnānam dhammānam saṅkhipitvā vavatthānavasena pavattanato ādikammikassa sukaram sammasananti ādibhūtam.

Tasmāti ādibhūtattā. Atha vā **tasmāti** yasmā āraddhavipassakassa -pa-kalāpasammasanam ādi, tasmā. **Etanti** kalāpasammasanam. **Apicāti**-ādi kalāpasammasanasseva vipassanāya ādibhāve upacayahetudassanam. Udayabbayañāṇapariyosānā tīraṇapariññā

1. Ma 1. 297; Ma 2. 84; Ma 3. 67; Am 1. 490 piṭṭhādīsu.

2. Āraddhā (Ka)

asampatte eva ca udayabbayañāṇe maggāmaggavavatthānaṃ hotīti āha “**tīraṇapariññāya vattamānāyā**”ti. **Kalāpasammasane tāva yogo kātabboti** etthāpi tasseva paṭhamārambhe kāraṇaṃ vuttanayeneva vedītabbaṃ. Yasmā kalāpasammasanaṃ nāma ekavisuddhiyampi na antogadham, ekacce ca taṃ anāmasitvā vipassanācāraṃ vaṇṇenti. Evaṃ santepi taṃ **suttantesu** ekadesena, anavasesato ca dassitaṃ. **Paṭisambhidāyaṃ**¹ ādikammikānaṃ manasikārasukaratāya vipassanāya ādibhāvena ṭhapitaṃ. Vipasantassa ca obhāsādīsu uppannesu maggāmaggañāṇasambhavo, tasmā “taṃ sampādetukāmena”ti-ādinā ayaṃ vicāro katoti daṭṭhabbaṃ.

693. **Tatrā**ti tasmim tīraṇapariññāya nītapariññānantarabhāve, tāsu vā pariññāsu. **Vinicchayoti** sarūpato, kiccato, bhūmito ca sanniṭṭhānaṃ. Lokuttarāpi purimasim saccadvaye maggasampayuttā tividhāpi pariññā kiccavasena labbhatīti “**lokiyapariññā**”ti visesetvā vuttaṃ. Sabhāvadhammānaṃ lakkhaṇasallakkhaṇato ñeyya-abhimukhā paññā **abhiññāpaññā**. **Ñātaṭṭhe**²ti nītabhāvanimittaṃ. Abhiññeyyassa jānanahetu “ñāṇaṃ”ti vuccati. **Pariññāpaññā**ti aniccādīlakkhaṇāni paricchiḍḍiya jānanapaññā. **Tīraṇaṭṭhe**³ti sammasanabhāvahetu. **Pahānapaññā**ti pahātabbassa pajānanapaññā. Vedayitādīlakkhaṇavidhuratāya **ruppanalakkhaṇaṃ** paccattalakkhaṇaṃ vuttaṃ. **Tesaṃyeva** paccattalakkhaṇasallakkhaṇavasena gahitadhammānaṃyeva. Yathā pathavīphassādīnaṃ kakkhaḷaphusaṇādīlakkhaṇāni tīsupi khaṇesu sallakkhitabbāni paṭinīyatarūpatāya sabhāvasiddhāneva hutvā gayhanti, na evamaniccatādīlakkhaṇāni. Tāni pana bhaṅgudayabbayapīlāvasavattanākāramukhena gahetabbato samāropitarūpāni viya gayhantīti vuttaṃ “**sāmaññalakkhaṇaṃ āropetvā**”ti. Lokiyapariññānaṃyeva adhippetattā lakkhaṇārammaṇikavipassanāva “**pahānapariññā**”ti vuttā.

Saṅkhārapaṭiccheditoti nāmarūpavavatthānato, yā “diṭṭhivisuddhī”ti vuttā. Keci pana “khandhādīnaṃ vipassanāya bhūmibhāvato sabbopi khandhādivicāro saṅkhāraparicchedo”ti vadanti.

“**Paccattalakkhaṇapaṭivedhasseva ādhippaccaṃ**”ti iminā nāmarūpapaccayapariggahapaññānaṃ tīraṇapahānāsamatthataṃ

1. Khu 9. 51 piṭṭhe.

2. Nātaṭṭhena (Syā, Ka)

3. Tīraṇaṭṭhena (Syā, Ka)

dasseti. Tāsampi pana “namanalakkhaṇaṃ nāmaṃ, ruppanalakkhaṇaṃ rūpaṃ”ti arūparūpanaṃ sādharmaṇākārasallakkhaṇavasena pavattiyā ekenākārena tīraṇapariyāyo¹, diṭṭhikaṅkhāvikkhambhanena pahānapariyāyo² labbhatīti siyā tīraṇapahānesupi ādhipaccanti vadanti. Ukkaṭṭhaniddesena pana yathā diṭṭhivisuddhiyāva saṅkhāraparicchedatā, evaṃ lakkhaṇārammaṇikavipassanāya eva tīraṇapahānakiccatā veditabbā. Evaṃ hi tissopi pariññā vavattitā honti, aññathā saṅkāro siyā.

Tīraṇapariññāyabhūmi tattha paññāya aniccatādilakkhaṇasantīraṇato.

Tenāha “**etasmim -pa- ādhipaccan**”ti. Kāmaṃ udayabbayaññānampi kañci micchābhinivesaṃ pajahati, tassa pana athāmagatattā na sātisaṃ pahānanti vuttaṃ “**bhaṅgānupassanaṃ ādim katvā upari pahānapariññāya bhūmi**”ti.

Aniccato anupassantoti aniccākārato saṅkhāre anupassanto sammasanto.

Niccasaññanti “te niccā sassatā”ti pavattaṃ micchāsaññaṃ. Saññāsīsena diṭṭhicittānampi gahaṇaṃ daṭṭhabbaṃ. Eseva nayo ito paresupi.

Nibbindantoti aniccānupassanādisambhūtāya nibbidānupassanāya saṅkhāre nibbijjanavasena passanto. **Nandinti** sappītikataṇhaṃ. **Virajjantoti** virāgānupassanāya virajjanavasena yathā saṅkhāresu rāgo nuppajjati, evaṃ anupassanto. Tathābhūto hi rāgaṃ pajahatīti vuccati. **Nirodhentoti** nirodhānupassanāya yathā saṅkhārā nirujjhantiyeva, na āyatim punabbhavavasena uppajjanti, evaṃ anupassanto. Tathābhūto hi saṅkhārānaṃ samudayaṃ pajahati nāma anuppattidhammatāpādanato.

Paṭinissajjantoti paṭinissaggānupassanāya yathā saṅkhārā na puna ādiyanti, evaṃ vossajjanto. Tenāha “**ādānaṃ pajahati**”ti, niccādivasena vā gahaṇaṃ vissajjetīti attho. **Sādhittatīti** sampāditattā. **Itarāti** tīraṇapahānapariññā.

Evaṃ pariññā niddisitvā pariññākkamavasenaṃpi kaṅkhāvitaraṇānantaraṃ “kalāpasammasane yogo kātabbo”ti yvāyamattho vutto, taṃ nigamavasena paccāharanto “**tena vuttan**”ti-ādimāha, taṃ vuttatthameva.

694. **Tatrāti** tasmim kalāpasammasane vibhāvetabbe, tassa vā kalāpasammasanassa ādibhāve. **Ayaṃ pālīti** dassiyamānaṃ paṭisambhidāmaggaṃpālīmāha. Tattha **saṅkhipitvā vavattthāne saññāti** atītādibhedabhinne

1. Tīraṇapariññāyo (Syā)

2. Pahānapariññāyopi (Syā)

dhamme ekato saṅgahetvā aniccādivasena vinicchaye sādhetabbe taṃ sādhanīyā paññā. Sammasane aniccatādivasena tīraṇe ñāṇanti pavuccati, sā katham̐ hoṭīti attho. **Vavatthāne sammasaneti** ca nipphādetabbe bhummavacanaṃ. **Yaṃ kiñci rūpanti**-ādīni padāni heṭṭhā vuttatthāneva. **Sabbaṃ rūpaṃ aniccato vavatthapetīti**-ādīni pana yasmā parato vaṇṇiyissanti, tasmā tattheva nesaṃ atthaṃ vibhāvayissāma.

Pāḷivavatthānaṃ pana evaṃ vedītabbaṃ—ettha hi ādikammikānaṃ vipassanāmanasikārasukhatthaṃ “**yaṃ kiñci rūpaṃ**”ti-ādīnā paṭhamaṃ tāva pañcakkhandhā atītādivibhāgamukhena gahitā, te pana khandhā yasmā dvārārammaṇehi saddhiṃ dvārappavattadhammavasena vibhāgaṃ labbhanti, tasmā tadanantaraṃ dvārachakkādivasena dasa chakkā gahitā. Yasmā pana lakkhaṇesu anattalakkhaṇaṃ dukkhavibhāgaṃ, tasmā tassa vibhāvanāya cha dhātuyo gahitā. Tato yesu kasiṇesu ito bāhirakānaṃ attābhīniveso, tāni imesaṃ jhānānaṃ ārammaṇabhāvena upaṭṭhānākāramattānīti dassanatthaṃ dasa kasiṇāni gahitāni. Tato dukkhānupassanāya parivārabhāvena paṭikkūlakāravasena dvattīmsa koṭṭhāsā gahitā. Pubbe khandhavasena saṅkhepato gahitā dhammā nātisaṅkhepavithāranayena, vitthāranayena ca manasi kātabbāti dassanatthaṃ dvādasāyatanāni, aṭṭhārasa dhātuyo ca gahitā. Tesu ime dhammā satipi suññanirīha-abyāpārabhāve dhammasabhāvato ādhipaccavasena pavattantīti anattalakkhaṇavibhāvanatthaṃ indriyāni gahitāni. Evaṃ anekabhedabhinnāpīme dhammā bhūmittayapariyāpannatāya tividhāva hoṭīti dassanatthaṃ tisso dhātuyo gahitā.

Ettāvatā nimittaṃ dassetvā pavattaṃ dassetuṃ kāmabhavādayo navabhavā gahitā. Ettake abhiññeyyavisesse pavattamanasikāraḥkosallena saṅhasukhumesu nibbattitamahaggatadhammesu manasikāro pavattetabboti dassanatthaṃ jhānappamaññārūppāni gahitāni. Tattha jhānāni nāma vuttāvasesārammaṇāni rūpāvacarajjhānāni. Paccayapaccayuppannavibhāgato ime dhammā bhinditvā manasi kātabbāti dassanatthaṃ paṭiccasamuppādaṅgāni gahitāni. Paccayākāramanasikāro hi lakkhaṇattayaṃ sukhena, suṭṭhutarāṇca vibhāveti, tasmā pacchato gahito. Evamete sammasanīyabhāvena

gahitā khandhādivasena koṭṭhāsato pañcavīsatividhā. Pabhedato pana atītādibhedam anāmasitvāva gayhamānā dvīhi ūnāni dvesatāni honti.

Tattha **aniccato vavatthapetī**-ādiko paṭhamo lakkhaṇavavatthāpanavāro. **Aniccam khayaṭṭhenā**-ādiko dutiyo hetuvāro lakkhaṇam hetukittanato. **Aniccam saṅkhatanti**-ādiko pana hetupatiṭṭhāpanavāro pākaṭabhāvasallakkhaṇato. **Khayaṭṭhenā** hi khayasabhāvato yasmā rūpam khayasabhāvam uppajjitvā khayam vayam bhedaṃ gacchati, tasmā aniccanti attho. **Bhayaṭṭhenā** bhāyitabbabhāvato yasmā rūpam pabhaṅguratāya bhayānakaṃ tasmā dukkhanti. Tenāha bhagavā “yadaniccaṃ, taṃ dukkhan”¹. **Asāraṭṭhenā** asārabhāvato, attasāravirahatoti attho. Tatiyavāre pana “rūpam aniccam”² ti vatvā tassa hetum patiṭṭhāpetum **“saṅkhatan”**-ti-ādi vuttam. Yasmā samecca sambhūya paccayehi kataṃ, anurūpe ca paccaye paṭicca, na vinā tehi samaṃ, sammā ca uppannam, tasmā khayavayavirāganīrodhadhammanti. Na hi paccayanibbattam anirujjhanakaṃ nāma atthi. Tenāha bhagavā “yam taṃ rūpam jātam bhūtam saṅkhatam palokadhammam, taṃ vata mā palujjīti netam ṭhānam vijjati”². Etena aniccā pathavīdhātu paccayanibbattatā tadanānam paccayanibbattam viyāti dasseti. Esa nayo sesadhammesupi.

Idāni anvayato, byatirekato ca saṅkhatadhammānam aniccataṃ patiṭṭhāpetum **“jātipaccayā”**-ti-ādi vuttam. Aniccalakkhaṇasseva cettha patiṭṭhāpanam tasmim patiṭṭhāpīte sesalakkhaṇadvayassapi patiṭṭhāpanasiddhito.

Iminā peyyālena ime dhammarāsayo saṅkhittāti sambandho. **“Dvārārammaṇehi saddhim dvārappavattā dhammā, pañcakkhandhā”** ti idaṃ abhiññeyyaniddese “cakkhum bhikkhave abhiññeyyan”³ ti-ādinā³ dvārārammaṇehi saddhim dvārappavatte dhamme dassetvā tesam pañcahi khandhehi saṅgahitataṃ dassetum “rūpam abhiññeyyam -pa- viññāṇam abhiññeyyam”³ ti-āgatattā vuttam. **Paṭisambhidāyam**⁴ pana “yam kiñci rūpan”³ ti-ādinā paṭhamam pañcakkhandhe dassetvā “cakkhun”³ ti-ādinā dvārārammaṇehi saddhim dvārappavattā dhammā dassitā. Tathādassane kāraṇam heṭṭhā vuttameva.

1. Saṃ 2. 19, 37, 68, 69, 92, 236, 237; Khu 9. 295 piṭṭhesu.

3. Khu 9. 7; Saṃ 2. 258 piṭṭhesu.

2. Saṃ 3. 141 piṭṭhe.

4. Khu 9. 51 piṭṭhe.

Kasmā panettha ime dhammarāsayo saṅkhittāti pāliyaṃ vitthārato āgatattāti dassento “**vuttaṃ hetan**”ti-ādimāha. Tenevāha “**taṃ tattha -pa-saṅkhittan**”ti. Tattha tanti abhiññeyyaṃ. **Etthā**ti abhiññeyyaniddese. “Viññāṇaṃ mano dhammā”ti-ādinā tattha tattha koṭṭhāse ye lokuttaradhammā āgatā. Keci pana “**etthā**ti paṭisambhidāyaṃ”ti vadanti, taṃ na sundaraṃ. Sammasanupagā eva hi dhammā paṭisambhidāyaṃ gahitā sammasanavārassa adhippetattā, na abhiññeyyaniddese¹ viya sabbeva abhiññeyyā dhammā. **Ye** rūpārūpadhammā. **Yassā**ti yogino. **Tesu tena sammasanaṃ ārabhitabbaṃ** yathāpākaṭaṃ vipassanābhinivesoti katvā. Pacchā pana anupaṭṭhahantepi upāyena upaṭṭhahāpetvā anavasesatova sammasitabbā.

695. “Atītaṃ rūpaṃ aniccaṃ”ti-ādinā aniccato sammasanassa atītādivibhāgā pavattiṭṭhānabhūtāti āha “**ekādasahi okāseti**”ti. **Vavatthāpanaṃ** nāma sanniṭṭhānaṃ. Aniccato sanniṭṭhānañcettha “aniccaṃ”ti vipassanāvāti āha “**aniccanti sammasatī**”ti.

Kathanti sammasanākāro pucchitoti taṃ parato idheva pāliyaṃ dutiyavāre vuttanayenevāti saṅkhepeneva vissajjeti. Idāni tamatthaṃ pākaṭataraṃ kātuṃ “**vuttañhetan**”ti-ādimāha. Tattha **hī**-ti hetu-atthe nipāto. Yasmā “rūpaṃ atītānāgatapaccuppannaṃ aniccaṃ khayaṭṭhena”ti evaṃ vuttaṃ, tasmā iminā vuttanayena aniccanti sammasatīti yojanā.

Evampi saṅkhepoyevāti vibhajitvā dassetuṃ “**esā**”ti-ādi vuttaṃ. **Atī**teti atīte bhava. Ādikammikassa hi idaṃ sammasanavidhānaṃ, tasmā bhavavasena addhābhedo adhippeto. Tenāha “**nayimaṃ bhavaṃ sampattanti**”ti². Ettha **iti**-saddo hetu-attho. Idaṃ vuttaṃ hoti—yaṃ atītabhave pariyāpannaṃ rūpaṃ, taṃ atīteyeva bhava khīṇaṃ, tato na imaṃ bhavaṃ sampattaṃ, tasmā aniccaṃ khayaṭṭhena khayasabhāvattāti sammasatīti. Esa nayo **yaṃ anāgatanti**-ādīsupi.

1. Khu 9. 7; Saṃ 2. 258 piṭṭhesu.

2. Nayimaṃ bhavaṃ sammattanti (Syā)

Yaṃ bahiddhā, tampi bahiddhā eva khīyati, na ajjhatabhāvaṃ gacchatīti aniccaṃ khayatthenāti, yaṃ oḷārikaṃ, tampi tattheva khīyatīti aniccaṃ khayatthenāti-ādinā yojetabbaṃ.

Idaṃ sabbampīti idaṃ atītādibhedassa rūpassa sammasanato sabbam ekādasavidhampi sammasanaṃ ekaṃ sammasanaṃ aniccato sammasananti katvā.

Tanti taṃ ekādasavidhampi rūpaṃ. **Sappaṭibhayatāyāti** bhayānakatāya. **Bhayāvahaṃ hotīti** appahinavipallāsassa “ahaṃ vinassāmi, mama santakaṃ vinassatī”ti cintentassa bhayajanakaṃ hoti. **Sīhopamasutte devānaṃ viyāti** sīhopamasutte desiyamāne devānaṃ viya, tattha hi—

“Yadā tathāgato loka uppajjati arahaṃ sammāsambuddho -pa- so dhammaṃ deseti ‘iti rūpaṃ, iti rūpassa samudayo, iti rūpassa atthaṅgamo, iti vedanā, iti saññā, iti saṅkhārā, iti viññāṇaṃ, iti viññāṇassa samudayo, iti viññāṇassa atthaṅgamo’ti. Yepi te bhikkhave devā dīghāyukā vaṇṇavanto sukhabahulā uccesu vimānesu ciraṭṭhitikā, tepi tathāgatassa dhammadesanaṃ sutvā yebhuyyena bhayaṃ saṃvegaṃ santāsaṃ āpajjanti ‘aniccāva kira bho mayaṃ samānā niccamhāti amaññimha, addhuvāva -pa- asassatāva kira bho mayaṃ samānā sassatamhāti amaññimha, mayampi kira bho aniccā addhuvā asassatā sakkāyapariyāpannā¹’ti”—

evaṃ devānaṃ bhayuppatti āgatā.

Khandhapañcakaṃ, tadekadeso vā attavādīhi “attā”ti parikappīyati, tañca ekantato aniccaṃ, dukkhañcāti āha “**yañhi aniccaṃ, taṃ dukkhaṃ**”ti-ādi. Tīsu dukkhatāsu saṅkhāradukkhatāva byāpinī, “yadaniccaṃ, taṃ dukkhaṃ”ti ca adhippetāti vuttaṃ “**aniccataṃ vā udayabbayapaṭipīlanam vā**”ti. **Attā abhavissāti** “kāraṃ vedako sayamvasī”ti evambhūto attā abhavissāti adhippāyo. Evañhi sati rūpassa ābādhāya saṃvattanaṃ ayujjamānakaṃ siyā. Yathā rūpakkhandhe abhedato tividhaṃ sammasanaṃ, bhedato tettimsavidhaṃ, evaṃ vedanākkhandhādīsupīti imamatthaṃ “**esa**

1. Saṃ 2. 70; Aṃ 1. 342 piṭṭhe.

nayo”ti atidisati. Tena khandhavasena tāva bhedato pañcasatṭhi-adhikā sataṃ sammasanavārā dassitā honti. Iminā nayena dvārachakkādīsipi yathārahaṃ sammasanabhedo veditabbo.

696. **Niyamato saṅkhatādibhedam hotīti** ekaṃsena saṅkhatatādivisesavantaṃ hoti asaṅkhatādisabhāve aniccatāya asambhavato. **Assāti** aniccassa. **Pariyāyadassanatthanti** vevacanadassanattham, tam pana “khayadhamman”ti-ādīnaṃ vasena veditabbaṃ, na purimānaṃ tiṇṇaṃ. Na hi tadeva tassa pariyāyo hoti, nāpi saṅkhatapaṭiccasamuppannapadāni hutvā abhāvādīpanato pākabhāvādīpanato. Pākabhāvādīpanena pana aniccatāya sādhanapakke tiṭṭhanti. Teneva hi sabbesaṃ padānaṃ pariyāyatābhāvato “**nānākārehi vā**”ti vikappantaraṃ gahitaṃ. **Manasikārappavattidassanatthanti** aniccatāya upabrūhanamanasikārappavattidassanattham.

Cattārisākāra-anupassanākathāvaṇṇanā

697. **Soti** yogāvacarō. **Tassāti** yathāvuttabhedassa aniccatādisammasanassa. **Thirabhāvattahāyāti** dalhabhāvattahāya aniccādi-ākārassa punappunaṃ manasikāro viya bahulikārabhāvato. Yaṃ tam bhagavatā etassa vibhaṅge aniccādisammasanaṃ¹ vuttanti sambandho. **Anulomikanti** ariyamaggādhiḡamassa anukūlaṃ. **Khantinti** ñāṇakhantiṃ. Ñāṇaṃhi visayasabhāvaṃ ogāhetvā vavattahāne khamati sahatīti khantīti vuccati. **Sammattaniyāmantī** ariyamaggaṃ. So hi sammādiṭṭhi-ādisammattañceva anivattidhammatāya niyāmo cāti vuccati. “**Ādinā nayanā**”ti iminā “pañcakkhandhe dukkhato passanto anulomikaṃ khantiṃ paṭilabhati, khandhānaṃ nirodho sukhaṃ nibbānanti passanto sammattaniyāmaṃ okkamatī”ti² evamādiko pāṭhaseso rogādipaṭipakkhajojanāvasena vitthāretabbo. “**Khandhānaṃ nirodho niccaṃ nibbānaṃ**”ti vacanena saṅkhārānaṃ dukkharogatādipaṭipakkho nibbānassa sukhārogyādibhāvo “ādinā nayanā”ti ettha nayaggahaṇena dīpitoti avaseso sabbo pāṭho pakāsito eva hotīti.

1. Aniccatādisammasanaṃ (Syā, Ka)

2. Khu 9. 411 piṭṭhe Paṭisambhidāmagge.

Kāmañcetaṃ cattārīsāya ākārehi sammasanaṃ anulomañāṇe bhāvetabbavidhānaṃ. Tenāha “**anulomañāṇaṃ vibhajantena -pa- vuttan**”ti, ito paṭṭhāya pana kataparicayasseva kiccāvahaṃ hotīti idhāpi vuttantīti daṭṭhabbaṃ. **Tassāpīti** na kevalaṃ kalāpasammasanasseva, atha kho yathādassitassa cattālīsappabhedassa aniccādisammasanassapi. Tañhi anulomikakhantipaṭilābhāya, sammattaniyāṃokkamaṇāya ca saṃvattanato evaṃsato icchitabbaṃ. Vuttañhi—

“So vata bhikkhave bhikkhu kañci saṅkhāraṃ niccato samanupassanto anulomikāya khantiyā samannāgato bhavissatīti netam ṭhānaṃ vijjati, anulomikāya khantiyā asamannāgato sammattaniyāmaṃ okkamissatīti netam ṭhānaṃ vijjati, sammattaniyāmaṃ anokkamamaṇo sotāpattiphalam vā -pa- arahattaṃ vā sacchikarissatīti netam ṭhānaṃ vijjati. So vata bhikkhave bhikkhu sabbasaṅkhāre aniccato samanupassanto”ti¹—

ādi sukkapakkho vitthāretabbo. Tathā “so vata bhikkhave bhikkhukañci saṅkhāraṃ sukhato, dukkhato, kañci dhammaṃ attato, anattato”ti² vitthāretabbo.

698. Ekekaṃ khandhaṃ aniccādisammasanassa vasena sammasatīti sambandho. Tassa pana sammasanassa pañcannaṃ khandhānaṃ sādharmaṇatāya “**ekekaṃ khandhan**”ti vuttaṃ. **Anaccantikātāyāti** accantikātābhāvato, asassatātāyāti attho. Sassatañhi accantikaṃ parāya koṭiyā abhāvato. **Ādi-antavantatāyāti** pubbāparakoṭivantatāya, udayabbayadhammatoti attho. Aniccato sammasatīti sambandho. Esa nayo sabbatta.

Aniccatoti ca addhuvato. Etañhi na niccaṃ, khaṇikatāya asadābhāvitāya vā na iccaṃ na upagantabbanti **aniccaṃ**. **Uppādavayapaṭipīlanatāyāti** uppādena, vayena ca pati pati khaṇe khaṇe taṃsamaṅgino vibādhanasabhāvattā, tehi vā sayameva vibādhetabbattā. Udayabbayavanto hi dhammā abhiṇhaṃ tehi paṭipīlitā eva honti, yā pīlanā “saṅkhāradukkhata”ti vuccati.

1. Am 2. 385; Khu 9. 409 piṭṭhesu.

2. Khu 9. 409, 410 piṭṭhesu nissitāpāli.

Dukkhavatthutāyāti tividhassāpi dukkhassa, saṃsāradukkhassa ca adhiṭṭhānabhāvato. **Paccayayāpanīyatāyāti** yathārahaṃ paccayehi yāpetabbatāya. **Rogamūlatāyāti** mūlabyādhi viya anubandhabyādhiṇaṃ mūlabhāvato, padadvayenāpi yāpyarogasadisatoti dasseti. Yāpyabyādhi hi rogo itaro ābādhoti. **Dukkhatāsūlayogitāyāti** tividhadukkhatāsāṅkhātena ruḷḷanena yujjatāya. **Kilesāsucipaggharaṇatāyāti** yathārahamārammaṇavasena, samannāgamavasena ca rāgādikilesāsucivissandanato. Ahutvā sambhavato uppattiyā **uddhumātātā**.

Antotudanatāyāti abbhantare tudanato. Dukkavedanādayo viya hi ime saṅkhārā attabhāvassa abbhantaragatā eva udayabbayavasena tudanti. Ariyamaggasaṇḍāsena vinā nīharitum asakkuṇeyyatāya **dunnīharaṇīyatā** taṇhādhiṭṭhābhīnivesadaḷhabhāvato. **Aghanti** pāpaṃ viya ariyajanehi vigarahitabbaṃ. Sattānaṃ anattahajananato avaḍḍhi-āvahaṃ, pāpassa ca vatthūbhūtaṃ khandhapañcakanti āha “**vigaraha -pa- aghato**”ti. **Aseribhāvajanakatāyāti** paravasatājananato. Yathā gilāno aññehi saṃvesanavuṭṭhāpanādinā paraṇipāpābaddhasarīravuttiko aserī, evametepi aseribhāvajanakā. **Avasatāyāti** avasavattanato. Yathā parosatanto puriso parassa vasam na gacchati, evaṃ subhasukhādibhāvena vase vattetum asakkuṇeyyato. **Avidheyyatāyāti** “mā jīratha, mā mīyathā”ti-ādinā vidhātum asakkuṇeyyato. **Palujjanatāyāti** byādhi-ādīhi pakārehi chijjanato vinassanato. Tehi eva vā ābyasanato. Byasanattho hi lokasaddo, pasaddo bhusattho daṭṭhabbo. Byādhi-ādīhi ca khandhānaṃ byasananti. Byasanāvahabhāvena etīti **īti**, āgantukānaṃ akusalapakkhiyānaṃ byasanahetunaṃ etaṃ adhivacanaṃ. Khandhā ca edisāti āha “**anekabyasanāvahatāya ītito**”ti.

Upaddavatīti upaddavo, anattamaṃ janento abhibhavati ajjhottharatīti attho, rājadaṇḍādīnaṃ etaṃ adhivacanaṃ. Khandhā ca edisāti vuttaṃ “**aviditānaṃ -pa- upaddavato**”ti. Diṭṭhadhammikasamparāyikabhayāvahato, abhayapaṇipakkhato ca khandhā bhayanti āha “**sabbabhayānaṃ -pa- bhayato**”ti. Bahiddhā nītibyasanādīhi, ajjhattaṃ rāgādīhi anatthehi upasajjanatṭhena,

upasaggasadisatāya ca upasaggo¹. **Upasaggoti** ca devatūpasamhāravasena pavatto byādhi-ādi-anattho. So atthakāmena muhuttampi na ajjuhekkhitabbo hoti. Tena vuttam **“anekehi -pa- upasaggo”**ti. **Dosūpasatṭhatāyā**ti ārammaṇato, sampayogato ca rāgādidoschi upetatāya. Lokadhammā lābhādihetukā anunayapaṭighā, tehi, byādhi-ādīhi ca anavaṭṭhitatā **pacalitā**.

Upakkamenāti attano, parassa vā payogena. **Sarasenā**ti sabhāvena. **Pabhaṅgupagamanasīlatā** bhiduratā². **Sabbāvatthanipātiyā**ti rukkaphalam viya atitaruṇakālato paṭṭhāya sabbāsu avatthāsu nipatanasīlatāya. Anipatassapi sabbena sabbam asāratāya **thirabhāvassa abhāvatāya**. Thirañhi dhuvanā nāma hoti. Tāyitum rakkhitum asamatthatāya na tāyanoti atāyano, tabbhāvo **ātāyanatā**. Tāṇāsīsāya upagatassa **alabbhaneyyakhematā**. Dukkhabhītiyā upaliyanādhippāyena **alliyitum**. Dukkhanivattanam **leṇakiccam**. Jāti-ādibhayānam himsanam vidhamanam **bhayaśarakattam**. **Yathāparikkappitehī**ti paramatthato avijjamānehi bālehi paritappitappakārehi. **Rittatāyā**ti vivittatāya, virahitatāyāti attho. Antosārābhāvo **rittatā**. Sā eva ca tucchatāti āha **“rittatāyeva tucchato”**ti. **Appakattā**ti parittatā, lāmakattā vā. Dhuvasārābhāvādīhi saddhim attasārābhāvam rittapadena vatvā nibbattitamattasārābhāvameva suññapadena dassetum **“sāmi -pa- suññato”**ti vuttam. Yathā kenaci sāmi-ādilakkaṇena attanā suññā ete, evam sayampi atamsabhāvoti āha **“sayañca -pa- anattato”**ti. Na attāti hi anattāti³.

Pavattidukkhatāyāti bhavapavattidukkhabhāvato. Bhavapavatti ca pañcannaṃ khandhānam aniccādi-ākārena pavattanameva, so ca ādīnavo. Yathāha “yam bhikkhave pañcupādānakkhandhā aniccā dukkhā vipariṇāmadhammā. Ayaṃ bhikkhave pañcasu upādānakkhandhesu ādīnavo”ti. Tenāha **“dukkhassa ca ādīnavatāyā”**ti. **Ādīnanti** bhāvanapumsakaniddeso yathā “ekamantan”ti⁴, ativiya kapaṇanti attho. Bhusattho hi ayaṃ ā-kāro.

1. Upasaggo (Syā, Ka)

3. Anattātipi vuttam (Syā)

2. Viduratā (Syā)

4. Dī 1. 48 piṭṭhādīsu.

Yathā “dvidhā chiddakaṃ vicchiddakan”ti ettha dvi-saddassa atthe **vi-saddo**, evamidhāpīti āha “**dvedhā pariṇāmapakatitāya vipariṇāmadhammato**”ti. Vipariṇāmo ca viparītasabhāvāpatti. **Dubbalatāyāti** sarasabhiduratāya balābhāvato. Dubbalampi kiñci mudukammaññābhāvena duppadhamsiyā. Ime pana supadhamsiyā evā¹ti āha “**pheggu viya sukhabhañjanīyatāya cā**”ti. Aghassa pāpassa hetukā **aghahetutā**. Khandhapaṭibaddhameva hi sabbaṃ kibbisanti. Ime rūpādayo sukhahetu, na dukkhahetūti janitavissāsānaṃ hananasīlatāya, khandhesu hi “etaṃ mamā”ti gāhavasena sattā byasaṇaṃ pāpuṇanti, vissāsaṃ vā hanantīti **vissāsaghātino**, tabbhāvato.

Vigatabhavatāyāti apagatavaḍḍhitāya. Vibhavataṇhā, vibhavadiṭṭhi ca vibhavo uttarapadalopena, tato **vibhavato**, pitusadisassa vā sabhāvahetuno **vibhavato** vināsato sambhūtāya. Āsavānaṃ ārammaṇādīnā paccayabhāvo **āsavapadaṭṭhānatā**. Bijādiko asādhāraṇo **hetu**, bhūtasalilādiko sādharmaṇo **paccayo**. Esa nayo ajjhattepi. Tehi samecca sambhūya kato **saṅkhato**. **Maccumārassa** adhiṭṭhānabhāvena, **kilesamārassa** paccayabhāvena saṃvaḍḍhanato **āmisabhūtātā**, khandhāpi khandhānaṃ āmisabhūtā paccayabhāvena saṃvaḍḍhanato, tadantogadhā **abhisāṅkhārā**. **Devaputtamārassa** pana “mametana”ti adhimānavasena āmisabhāvoti khandhādīmārānampi imesaṃ yathārahaṃ āmisabhūtātā vattabbā. Dhammasaddo “jātidhammānaṃ”ti-ādīsu² viya pakati-attho, “dhammapaṭisambhidā”ti-ādīsu³ viya hetu-attho cāti āha “**jātijarābyādhimaraṇapakatitāya, sokaparideva-upāyāsahetutāyā**”ti. **Saṅkilesattaya**ggahaṇena tadekaṭṭhānaṃ dasannaṃ kilesavatthūnampi saṅgaho daṭṭhabbo. Tadārammaṇāpi hi dhammā tadanativattanato saṅkilesikā eva. Tathā khuddā, taṇhā, jaṭādīsu sarīrassa, saṅkilesassa ca saṅgaho daṭṭhabbo.

Cattārīsāpi sammasanāni tīsu anupassanāsu antogadhānevāti tadantogadhābhāvaṃ dassetuṃ “**ettha hī**”ti-ādi vuttam. **Aniccānupassanāni**

1. Ime pana subhedā eva (Syā, Ka)

2. Ma 3. 293; Khu 9. 38 piṭṭhesu.

3. Abhi 2. 307, 308 piṭṭhādīsu.

sarūpato, pariyāyato ca aniccabhāvavibhāvanato. Esa nayo itaresupi.
“Asārakato”ti idaṃ nīccasārābhāvavibhāvanam.

Ettāvatā kalāpato dhamme saṅgahetvā nayato sammasanamattam
 dassitam, na tāva anupadadhammavipassanā vihitāti
“sammasanārambhavidhānan”ti vuttam.

Indriyatikkhākāraṇanavakakathāvaṇṇanā

699. Ekaccassa tikkhindriyassa mahāpaññassa nayavipassanāvaseneva
 udayabbayañāṇam uppajjati, itarassa nuppajjati. Tam sandhāya **“yassa pana
 -pa- na sampajjati”**ti vuttam. Udayabbayañāṇuppatti hi idha
 nayavipassanāya sampajjananti adhippetam. Tena “navahākārehi indriyāni
 tikkhāni bhavanti -pa- antarā ca abbosānenā¹”ti evam vuttānam navannaṃ
 ākārānam vasena indriyāni tikkhāni katvā sappāyāni sevamānena
 sammasitabbanti sambandho.

Tenāti yoginā. **Navahākārehi**ti vakkhamānehi navahi ākārehi.
Indriyāniti saddhādāni indriyāni. **Tikkhāni**ti tikhiṇāni visadāni sūrāni.
Uppannuppannānanti khaṇe khaṇe uppannānam uppannānam. **Saṅkhārānanti**
 vipassiyamānānam rūpārūpadhammānam. **Khayamevāti** paṭhamam uppādam
 disvā tam muñcitvā khayameva bhaṅgameva passati. Tassa
 tathākhayadassanapasutassa vipassanāpaññā tikkhā sūrā vahati, itarāni ca
 indriyāni. **Tatthāti** khayadassane. **Sakkaccakiriyāyāti** ādarakāritāya, yathā
 khayadassanaparameneva vipassanāñāṇam pavattati, evam tam ādarajāto
 sampādeti. **Sātaccakiriyāyāti** avicchedakiriyāya, yathā vipassanāñāṇam
 khayadassanavasena nirantameva pavattati, evam yuttappayutto nam
 sampādeti. **Sappāyakiriyāyāti** anurūpakiriyāya
 āvāsādisattavidhasappāyāsevanakiriyāya. **Nimittaggāhenāti** yathā
 manasikarontassa vipassanāsamādhi uppanno, tassa ākārasa
 sallaṅkhaṇavasena samathanimittaggahaṇena sampādeti sambandho.
Anupavattanatāyāti anurūpato pavattanena bhāvanācittassa līnabhāve
 pītivīriyadhammavicayasambojjhaṅgānam uddhatabhāve passaddhisamādhi-
 upekkhāsambojjhaṅgānam brūhanenāti attho. **Kāye ca jīvite ca**
anapekkhatanti attano kāye asucibhāvena

1. Abyosānena (Ka)

bāhiraka-aviññāṇakakuṇape viya jīvite ahitāvahapaccatthike viya nirapekkhacittam upaṭṭhapeti. **Tattha ca abhibhuyya nekkhadhammanāti** tasmim kāyacitte anapekkhabhāvena indriyānam tikkhabhāvāpādanena uppannam uppannam dukkham vīriyena abhibhavitvā bhāvanam sampādeti. **Antarāti** yathādhippetāya bhāvanāsiddhiyā antarāva. **Abbosānenāti** asaṅkocanena.

Evam vuttānanti evam “navahākārehi indriyāni tikkhāni bhavanti”ti-ādinā aṭṭhakathāyam vuttānam. Ettha ca yathā nāma sukhumānam muttāpavāḷādīnam vijjhane sukhumatarena vedhanena bhavitabbam, evameva saṅhasukhumānam rūpārūpadhammānam, paccayassa ca pariggaṇhane tikkhena nāṇena bhavitabbam. Tesam pana khayavayadassane tikkhatarena bhavitabbam. Tikkhataratā cassa nisānasilāyam saṅhamatṭhatāya karaṇena viya pharasudhārāya nisitabhāvāpādanena indriyānam tikkhabhāvāpādanena sādhetabbā. Tañca yehi navahi ākārehi hoti, tesu khaṇikānam saṅkhārānam khaṇe khaṇe bhijjanākāradassanam paṭhamam vuttam “uppannuppannānam saṅkhārānam khayameva passatī”ti. Asati nāṇassa tikkhatarabhāve tadabhāvato sesindriyatikkhatā tassa sambhārabhāvato vuttā, avinābhāvato vā. Sakkaccakiriyādiggahaṇam pana tassa upāyadassanam. **Asappāyāni** bhojanādīni anupayujjanādivasena **vajjetvā sappāyāni** mattaso **sevamānena**. Rūpārūpadhammānam accantavidhuratāya ekajjam asammasitabbatā, tathā sammasanassa ca idha anadhippetatā **“kālena rūpam sammasitabbam, kālena arūpan”**ti vuttam. Tatthāpi ca rūpassa oḷārikatāya suviññeyyattā paṭhamam sammasitabbatā vuttā. **Nibbatti passitabbāti** paṭhamam tāva āgamānusārato anumānavasena datṭhabbā. Tato param anukkamena balappatte bhāvanāñāṇe paccakkhatopi dissatīti.

Rūpanibbattipassanākārakathāvaṇṇanā

700. **Sabbesanti** kāmāvacarādi-aṇḍajādibhedabhinnānam sabbesam sattānam. **Paṭhamam kammato nibbattati** tammulakattā utujādirūpānam. Parato pavattanakakāyadasakādivasena labbhamānam pabandhattayam, santatisāsam vā sandhāya **“tisantativasenā”**ti vuttam.

Dandham mandam cirena nirodho etassāti **dandhanirodham** sattarasacittakkaṇḍayukattā. Tenāha “**garuparivatti**”ti. **Tenāti** tasmā, yasmā “tato sīghataram kho bhikkhave āyusaṅkhārā khīyanti”ti¹ vacanato rūpadhammāpi ittarakālā eva, arūpadhammā pana tehi sātisayam ittarakālā, tasmā āha bhagavāti attho. Yam panettha vattabham, tam heṭṭhā vicāritameva². **Tehi sadisāti** cittassa uppādabhaṅgakkhaṇehi sadisā. Sabbesampi hi saṅkhārānam uppādabhaṅgakkhaṇesu visadisatā natthi, samānakālāva te. **Ṭhānappattanti** ṭhitikkhaṇappattam. **Tenāti** dutiyabhavaṅgacittena. Vatthurūpam ekassa cittassa nissayo hutvā aññassa na hoti ṭhapetvā maraṇāsannaṃ, tasmā vuttam “**tena saddhin**”ti-ādi.

Evam paṭisandhito paṭṭhāya yāva cuticittassa uppatti, tam dassetvā idāni nirodham dassetuṃ “**paṭisandhicittassā**”ti-ādi āradham. Tattha **ṭhānakkhaṇeti** paṭisandhicittassa ṭhitikkhaṇe. **Yāva pavatti nāma atthīti** yāva saṃsārappavatti nāma atthi, yāva vā cittassa pavatti nāma atthi. Asaññūpapatti yañhi natthi cittappavattīti. Rūpūpapattiyam saṃsedajā opapātikasadisāti opapātikānamyeva gahaṇam. **Opapātikānampīti pi**-saddena vā saṃsedaje sampiṇḍeti. **Sattasantativasenāti** cakkhudasakādīnam sattannaṃ santatisīsānam vasena.

701. **Tatthāti** kammato rūpapavattiyam.

Nānākkhaṇīkakkammappaccayabhūtamyeva idha kammanti adhippetanti āha “**kammaṃ nāma kusalākusalacetanā**”ti. Jīvitāvakam cakkhudasakādi-antogadhameva katvā “**samasattatirūpan**”ti vuttam. Tam vā cakkhudasakādi viya sukhapariggaham na hotīti. **Tadevāti** yathāvuttam vipākakkhandhakaṭattārūpamāha. Kammañhi kammajassa janakam, paripācakampi hoti jīvitindriyassa, kammajaggino ca vasena anurakkhaṇasabbhāvato, āhārādipaṭilābhahetutāya upatthambhakanimittato ca. Tenāha “**upatthambhakapaccayopi hotī**”ti. Upatthambhakapaccayatā cassa upanissayapaccayavaseneva veditabbā. Kammaṃ paccayo etassāti kammappaccayam, tadeva cittam, tam samuṭṭhānam etassāti **kammappaccayacittasamuṭṭhānam**. Vipākacetāsikānampi kammappaccayacittasamuṭṭhānatā vattabbā, na vā vattabbā kammamuṭṭhānakammappaccayaggahaṇena gahitattā. **Ṭhānappattā oja aññam ojaṭṭhamakam samuṭṭhāpeti** āhārānugate sarīreti gahetabham.

1. Saṃ 1. 456 piṭṭhe.

2. Vitthāritameva (Syā)

Tatrāpīti kammamuṭṭhānāhārasamuṭṭhānepi ojaṭṭhamake. **Catasso vā pañca vā pavattiyo ghaṭetīti** sadisasantativasena catasso vā pañca vā rūpakalāpappavattiyo santāneti. Bāhirapaccayavisesena pana visadisā bahūpi pavattiyo ghaṭetīti vadanti. Yathā kammapaccayāhārasamuṭṭhāne pavēṇighaṭanā, evaṃ kammapaccaya-utusamuṭṭhānepīti taṃ dassetuṃ “**kammapaccaya-utusamuṭṭhānaṃ nāmā**”ti-ādi vuttaṃ. Ettha ca yathā tattha tattha koṭṭhāse paramparappavattiṃ dassentena akammajā dutiyādīpavattiyo asambhedena dassitā, evaṃ kammajāhārasamuṭṭhāna-utuvaseṇa, kammajā-utusamuṭṭhānāhāravaseṇa, kammapaccayacittajāhāra-utusamuṭṭhāna-utū-āhāravaseṇa ca sambhedavaseṇāpi rūpappavatti dassetabbāti vadanti. Tattha kammajato pavatta-āhārā visesapaccayalābhe sati yathāvuttaparimāṇāhi pavattihi uddhampi pavattiyo na ghaṭetīti na sakkā vattum. Tathā hi “dasa dvādasa vāre pavattiṃ ghaṭetī”ti¹, “evaṃ dīghampi addhānaṃ anupādinnapakke ṭhatvāpi utusamuṭṭhānaṃ pavattati evā”ti² ca vakkhati.

702. **Janakājanakā matāti** purimakā tikoṭṭhāsasaṅgahitā janakā, pacchimakoṭṭhāsikā “soḷasā”ti vuttā ajanakāti matā nātā. **Kusalakiriyatoti** kusalato ca kiriyato ca. Iriyāya kāyikakiriyāya pavattiṭṭhānatāya pathabhāvato **iriyāpatho**, gamanādi, atthato tadavatthā rūpappavatti. Kāmañcetta rūpavinimutto iriyāpatho, viññatti ca natthi, tathāpi na sabbaṃ rūpasamuṭṭhāpakacittaṃ iriyāpatūpatthambhakaṃ, viññattivikāruppādakañca hoti. Yaṃ pana cittaṃ viññattijanakaṃ, taṃ ekamsato itarassa janakaṃ avinābhāvato, tathā iriyāpathūpatthambhakaṃ rūpassa. Etassa visesassa dassanattamaṃ “**rūpaṃ, iriyāpathaṃ, viññattiñcā**”ti samuccayo kato. **Vipākavajjānīti** ettha vipākābhiññādvayavajjānīti vattabbaṃ tadaññesaṃyeva sesaggahaṇena³ gahetabbatā. Na vā vattabbaṃ sesaggahaṇeneva abhiññācittānampi nivattetabbato. **Na viññattiṃ janayanti** mahaggatakusalādīnaṃ santabhāvena avipphārikabhāvato. Vipphārikameva hi kāmāvacarakusalādīviññattiṃ samuṭṭhāpeti, iriyāpathūpatthambhakāni pana honti satipi santabhāve jhānavegena sa-ussāhatthā, yato tesāṃ javanakkiccatā. Pañca

1. Visuddhi 2. 251 piṭṭhe. 2. Visuddhi 2. 252 piṭṭhe. 3. Sesaggahaṇena vā (Syā, Ka)

bhavaṅgacittānīti sambandho. **Rūpameva janayanti, na iriyāpatharū** nirussāhasantabhāvena paridubbalabhāvato. Kiriyaṃmayacittehi avimissabhavaṅgappavattikāle khandhādisarīrāvayavānaṃ niccalabhāvenāvattānaṃ. Tathā hi abbokiṅṅe bhavaṅge pavattamāne aṅgāni osīdanti pavittāni viya honti. “Dvattimsā”ti pana ādinā vuttesu jāgaraṇacittesu vattamānesu aṅgāni upatthaddhāni yathāpavattā-iriyāpathabhāvene va pavattantīti. **Dvepañcaviññāṇāni** sabbadubbalatāya rūpaṃ na janenti. **Paṭisandhicittarū** vatthudubbalatāya. **Khīṇāsavānarū** cuticittanti ettha—

“Kāmāvacarānaṃ pacchimacittassa uppādakkhaṇe yassa cittassa anantarā kāmāvacarānaṃ pacchimacittarū uppajjissati, rūpāvacare arūpāvacare pacchimabhavikānaṃ, ye ca rūpāvacaraṃ arūpāvacaraṃ upapajjitvā parinibbāyissanti, tesarū cavantānaṃ tesarū vacīsaṅkhāro nirujjhissati, no ca tesarū kāyasaṅkhāro nirujjhissati”ti¹—

pana vacanato aññesampi cuticittarū rūpaṃ na samuṭṭhāpetīti viññāyati. Na hi rūpasamuṭṭhāpakacittassa gabbhagatatādivibandhābhāve kāyasaṅkhārāsamuṭṭhāpane kāraṇaṃ atthi, na ca yuttarū cuto ca cittasamuṭṭhānarūpañcassa pavattati, nāpi “cuticittarū rūpaṃ samuṭṭhāpeti”ti pāḷi atthi, “khīṇāsavānaṃ”ti, pana visesanaṃ appaṭisandhikanirodhena nirujjhantassa tesarū cuticittassa rūpasamuṭṭhāpanaṃ pākaṇanti katvā katanti daṭṭhabbarū. **Soḷasa cittānīti** paricchijja gahaṇaṃ tesarū rūpajanane ekasāto niyametabbatā, aññāni pana bahūni arūpe uppannāni anokāsagatatā rūpaṃ na janentiyeva. Na ṭhitikkhaṇe, bhaṅgakkhaṇe vā rūpaṃ janentīti sambandho. **Uppādakkhaṇe pana balavarū** anantarādipaccayalābhato.

Yathā pathavī-ādayo rūpadhammā cittahetukā cittasamuṭṭhānā, evaṃ vedanādayopīti vuttarū “**cittasamuṭṭhānaṃ nāma tayo arūpino khandhā, saddanavakan**”ti-ādi. Tenevāha “katame dhammā cittasamuṭṭhānā? Vedanākkhandho saññākkhandho saṅkhārakkhandho kāyaviññatti vacīviññatti”ti². Tattha kāyaviññatti-ādināṃ cittasamuṭṭhānatā pariyāyato vuttāti veditabbā tesarū anipphannatā. “**Evaṃ vuttarū catusamuṭṭhānarūpan**”ti iminā atāmasamuṭṭhānasseva cittajarūpassa cippaccayatā dassitā. Yathā pana kammaṇaccayaṃ

1. Abhi 6. 28 piṭṭhe Yamake.

2. Abhi 1. 239, 287 piṭṭhesu.

dassitaṃ, evaṃ cittapaccaye gayhamāne taṃsamuṭṭhānarūpassa, sahaḷāvedanādīnaṅca cittapaccayatā siyā. Cittasamuṭṭhānacittapaccaye pana asaṅkarato dassetuṃ pacchājātapaccayavaseneva cittapaccayaṃ uddhaṭanti daṭṭhabbaṃ. Cittasamuṭṭhāna-utu-āhārehi kammaṣamuṭṭhāna-utu-āhārā balavanto hontīti tesāṃ vasena catupaṅcapavattighaṭanaṃ vuttaṃ, cittasamuṭṭhānānaṃ pana vasena dvattippavattighaṭanaṃ taṃpākaticaccittavasena, mahaggaṭānuttaracittavasena pana bahutarāpi pavattiyo icchitabbā. Taṃnibbattānaṃ cittajarūpānaṃ uḷārapaṇītabhāvato.

703. “**Upādinnaṃ kammajarūpaṃ paccayaṃ labhitvā**”ti etena bahiddhā anupādinna-ojā rūpāharaṇakiccaṃ na karotīti dasseti. Paccayaalābho cassa kammajabhūtasannissayatāvasenāti āha “**tattha patiṭṭhāyā**”ti. Tattha kammapaccayacittasamuṭṭhānādirūpassapi kammamūlakattā siyā kammajapariyāyoti taṃnivattanatthaṃ “upādinnan”ti viśeṣtvā vuttaṃ. Āhārapaccayassa āhāro na kevalaṃ upatthambhakova, atha kho janakoṇīti dassetuṃ “**catusamuṭṭhānarūpan**”ti vuttaṃ. “Dasa dvādasa vāre”ti vatvā kathaṃ imasseva dasa dvādasa vāre pavattighaṭanāti anuyogaṃ sandhāyāha “**ekadivasāṃ paribhuttāhāro**”ti-ādi. **Dārakassa sarīraṃ pharitvā** nābhimūlānugatāhi rasaharaṇīhi pharitvā, aññathā jalābu-antarīke kāye makkhanāvasena na sammāviniyogo āhārassa sambhavatīti.

Upādinnako anupādinnakoti duvidhe āhāre pubbe anupādinnako āhārapaccaya-āhāro dassitoti itaraṃ dassetuṃ “**kammajāhāro**”ti-ādi vuttaṃ. Taṃ kammapaccayāhārasamuṭṭhāne vuttanayameva. Tenāha “**catasso vā pañca vā pavattiyo ghaṭeti**”ti. Āhārapaccaya-utunopi utupaccayāhārassa viya dasa dvādasa vāre pavattighaṭanā veditabbā. Vuttanayatthā na uddhatanti vadanti. **Sesānanti** kammacitta-utusamuṭṭhānānaṃ tisantatirūpānaṃ. Kabaḷīkārāhāro hi aññāhārasamuṭṭhitassa, tisantatirūpānaṅca upatthambhakavasena attanā uppāditassa janako hutvā paccayo hoti. Evaṃ āhārapaccayo hontoyeva atthi-avigatavasenāpi paccayo hoti, nissayabhāvo pana paṭṭhānanayena natthi. Āhārapaccayā pavattamānāni rūpāni

āhāranissayāni nāma hontīti suttantanayena vuttoti daṭṭhabbo. Parato utuno nissayajotanāyapi eseva nayo.

704. Kammasamuṭṭhānādivasena catubbidhāyapi tejodhātuyā rūpuppādane samatthabhāvato “**utu nāma catusamuṭṭhānā tejodhātū**”ti vuttaṃ. **Esa duvidho hotīti** esa utu tejodhātubhāvāvisesepi tikkhamandatāvisesena uṇho, sītoti duvidho hoti. Yaṃ panettha vattabbaṃ, taṃ heṭṭhā vicāritameva¹. Yadiapi utu upādinnakena vināpi rūpaṃ samuṭṭhāpeti, indriyabaddhe pana tena vinā tassa rūpuppādanaṃ natthīti āha “**upādinnaṃ paccayaṃ labhitvā**”ti. Tenāha “catusamuṭṭhāno utū”ti. Utusamuṭṭhānoyeva hi utu upādinnakena vinā rūpaṃ samuṭṭhāpeti. **Utupaccayaṃ** nāma catusamuṭṭhānikaṃ rūpaṃ. Yañhi utusamuṭṭhānaṃ pannarasavidhaṃ rūpaṃ, yañca tadaññatisantatirūpaṃ, tassa sabbassapi sabhāgo utu-upatthambhakaṃ paccayo hotīti. Yasmā visabhāgo utu himādi viya padumādīnaṃ visadisarūpuppattihetubhūtaṃ purimarūpaṃ vināsentaṃ viya hoti, tasmā sabhāgaṃ, visabhāgañca ekajjhaṃ gahetvā vuttaṃ “**utu catusamuṭṭhānikarūpānaṃ pavattiyā ca vināsassa ca paccayo hotī**”ti.

Dīghampi addhānanti “dasa dvādasa vāre”ti aññassa vuttaparicchedato dīghampi kālaṃ. Utu hi sabhāgasantativasena laddhapaccayaṃ ciratarampi kālaṃ sadisākāraṃ rūpappavattim santāneti upādinnaṃ kasannissayena vinā, pageva itarathā. Tenāha “**anupādinnaṃ pakkhe thatvāpī**”ti, maṃsaviniṃ muttakasalomanaṃ khacammakhilatilakādivasena jīvamānasaṃ rīre aññattha matakaḷe varādivasenāti adhippāyo. Rūpassa nibbattiyā diṭṭhāya tassa bhaṅgopi diṭṭhoyeva hoti ittarakālattā dhammappavattiyāti āha “**nibbattim passanto kālena rūpaṃ sammasati nāmā**”ti. Na hi nibbattimattadassanaṃ sammasanaṃ nāma hoti, udayabbayadassanañca adhikatanti. Esa nayo ito paresupi nibbattiggahaṇesu.

Arūpanibbattipassanākārakathāvaṇṇanā

705. **Lokiyacittuppādavasenevāti** avadhāraṇaṃ itarassa avisayattā.

1. Vitthāritameva (Syā)

Nibbattati taṁtaṁbhavavasena. Tadeva ekūnavīsatiṭṭapabhedam cittaṁ bhavaṅgavasena nibbattatīti sambandho. Tathā **cutivasena tadārammaṇavasenā**ti etthāpi. **Tatthā**ti tesu ekūnavīsaticittupādesu. **Anantaracittato paṭṭhāyā**ti-ādināpi pavattiyeva vuttā.

So pana paṭisandhicittānamyeva pavattiyam pavattanākāroti suddhappavatticittānam uppattim dassento “**pavatte panā**”ti-ādimāha. **Asambhinnattā**ti avinaṭṭhattā. “Asambhinnattā cakkhussā”ti-ādinā saṅkhepato vuttamattham vivaritam “**cakkhupasādassa hī**”ti-ādi vuttam. “**Ṭhitippattamevā**”ti iminā yathā nirujjhamānam rūpam kassaci paccayo na hoti, evam uppajjamānampīti dasseti. Cakkhuvīññāṇam uppajjatīti sambandho. Evam sesesupi. Kāmāvacarakusalākusalakiriyacittesu ekam vā pañca, satta vā javanāni hutvā uppajjatīti sambandho. Upekkhāsahagatāhetukam cittaṁ vāti vā-saddam ānetvā sambandhitabban. Voṭṭhabbanañhi sandhāya vuttam, tam pana dutiyamoghavārasena veditabban. **Pañca javanāni** suttamucchitādikāle, **satta** pākatikakāle veditabbāni. **Javanārammaṇānurūpanti** “tihetukam ce javanam, tihetukam, dvihetukam vā”ti-ādinā, “iṭṭham ce ārammaṇam, somanassasahagatan”ti-ādinā ca javanassa, ārammaṇassa ca anurūpam. **Sesadvāresūti** sotadvārādisesadvāresu.

Anukkamenāti udayabbayañāḍadhigamānukkamena **paññābhāvanam sampādeti** arahattam adhigacchati.

Rūpasattakasammasanakathāvaṇṇanā

706. Rūpesu manasikārasattakam **rūpasattakam**, rūpadhammesu sattahākārehi manasi kārotīti attho. Evam arūpasattakampi veditabban. **Imehi ākārehi**ti imehi ādānanikkhepanamanasikārādippakārehi, imehi vā yathāvuttakoṭṭhāsehi. **Āropetvā**ti tilakkhaṇam āropetvā.

Ādānanikkhepanatoti bhavassa gahaṇavissajjanato, jātito, maraṇato cāti attho. **Vayovuḍḍhatthagāmitoti** vayasā vuḍḍhassa atthagāmibhāvato, atthaṅgamato icceva attho. **Āhāratoti**

āhārahetu, rūpassa paccayabhūta-āhāratoti attho.

Ayalohādibhūmipāsāṇādibhedam vividhavaṇṇasaṅghānam
kammānapekkaṃ sabhāvasiddham rūpam **dhammatārūpam**. **Sattā**ti sattadhā
sattahākārehi. **Vipassatī**ti taṃ taṃ koṭṭhāsam tilakkhaṇam āropetvā vipassati
sammasati.

“Bhārādānam dukham loke”¹ti vacanato khandhabhārassa ādito
gahaṇanti katvā “**ādānanti paṭisandhī**”²ti āha. “Sabbeva nikkhipissanti, bhūtā
loke samussayan”³ti pana vacanato khandhabhāranikkhepoti katvā
“**nikkhepananti cutī**”⁴ti vuttam. “Yo ciram jīvati, so vassasatan”⁵ti vacanato
tato unādhikabhāvo appamāṇanti vuttam “**etaṃ vassasatam
paricchinditvā**”⁶ti. **Etthantare sabbe saṅkhārā**ti etasmiṃ ādānanikkhepantare
pavattā sabbe bhūtopādāyarūpappabhedā saṅkhārā. Rūpadhammesu hi idaṃ
sammasanavidhānanti. “Aniccā”⁷ti gahitamattaṃ yuttito hadaye
paṭiṭṭhāpanattham “**kasmā**”⁸ti-ādi vuttam. Tattha **uppādavayavattito**⁹ti
uppajjanavasena, nirujjanavasena ca pavattanato, ahutvā sambhavato hutvā
vayūpagamanatoti attho. **Vipariṇāmatoti** santānassa
purimuttaravisadisabhāvatoti vadanti. Taṃ vassasataparicchinne rūpe idaṃ
sammasananti adhippāyeneva vuttam siyā, jarāmarāṇena
vipariṇāmetabbatoti attho. Asatipi dhammabhede avatthābhedo icchitabbo.
Na hi uppādāvatthā eva bhaṅgāvatthāti yuttā. Tathā hi vuttam “jarāya ceva
marāṇena cāti dvedhā pariṇāmapakatitāyā”¹⁰ti. Sabhāvavigamo eva vā ettha
vipariṇāmo. Khaṇikatā **tāvakālikatā**. Niccasabhāvābhāvo eva
niccapaṭikkhepo. Aniccadhammā hi teneva attano sabhāvena jānantānam
niccataṃ paṭikkhipanti nāma. Yato na niccanti aniccaṃ, uppādakkhaṇe
yadavatthā saṅkhārā, na tadavatthā ṭhitikkhaṇeti avatthantarappattiyā nāyati
tesam kilamanākāroti āha “**ṭhitiyam jarāya kilamantī**”¹¹ti, svāyamattho
pākaṭajarāya veditabbo. Ye pana saṅkhārānam ṭhitiṃ na sampaṭicchanti,
tattha vattabbari heṭṭhā vuttameva. Dhammānam sabhāvo nāma
duratikkamo jarānantaram bhaṅgoti āha “**jaram patvā avassam bhijjantī**”¹²ti.
Tasmāti yasmā

1. Sam 1. 22 piṭṭhe.

3. Dī 2. 3; Sam 1. 109, 110; Am 2. 503 piṭṭhesu.

5. Visuddhi 2. 247 piṭṭhe.

2. Dī 2. 129; Sam 1. 160 piṭṭhesu.

4. Uppādavayavattito (Syā)

uppāda jarābhaṅgavasena saṅkhārānaṃ nirantarabādhatā, tato ca nesamā dussahatāya dukkhamatā, tissannaṃ dukkhatānaṃ, saṃsāradukkhassa ca adhiṭṭhānatāya dukkhavattutā, tasmā. Abhiṅha -pa- dukkhāti yojanā.

“**Sukhapaṭikkhepatō**”ti idaṃ vuttanayameva. **Ṭhitiṃ mā pāpuṇantu**, uppajjamānākāreṇeva pavattantūti adhippāyo. “**Uppannā**”ti iminā uppādakkhaṇasamaṅgitā vuttā. **Ṭhānappattā mā jīrantūti** kasmā vuttaṃ, nanu atthato ṭhiti eva jarāti? Saccametam, jarāvasena pana yo kilamatho, so idha jarāggahaṇena gahitoti daṭṭhabbam. **Mā bhijjantūti** niccataṃ āsīsati. Kassaci dhammissarassāpi bhagavato vasavattibhāvo natthi. Na hi lakkhaṇaññathattam kenaci kātuṃ sakkā. Bhāvaññathattameva hi iddhivisayo. **Suññā** saṅkhārā **tena** tīsu ṭhānesu **vasavattanākāreṇa**. **Tasmāti** vuttakāraṇaparāmasanaṃ. **Suññatoti** nivāsikārakavedaka-adhiṭṭhāyavakavirahena tato suññato, na nissabhāvato ekaccaparikappitasabhāvasuññato. **Assāmikato**ti sāmibhūtassa kassaci abhāvato. Etena anattaniyataṃ dasseti. **Avasavattitoti** yathāvuttavasavattibhāvābhāvato. **Attapaṭikkhepatoti** paraparikappitassa attano paṭikkhipanato. “Suññato”ti-ādinā hi dhammānaṃ bāhirakaparikappita-attaviraho vutto, iminā pana atamsabhāvato attā na hotīti.

707. Ettha ca “uppādavayavattito”ti-ādinā catūhi kāraṇehi aniccā, “abhiṅhasamapaṭipīḷanato”ti-ādinā catūhi kāraṇehi dukkhā, “suññato”ti-ādinā catūhi kāraṇehi anattāti rūpadhamme niruḷhaṃ lakkhaṇattayaṃ pubbe attanā asallakkhitam sallakkhetvā sammāsanto tam tattha āropetīti vuccati. Tathā panānena ādānanikkhepanavasena sammāsittatā āha “**rūpe tilakkhaṇam āropetvā**”ti.

Tattha ca¹ yasmā aniccalakkhaṇaggahaṇapubbakam dukkhalakkhaṇaggahaṇam, dukkhalakkhaṇaggahaṇapubbakam vā anattalakkhaṇaggahaṇam. Aniccalakkhaṇañcetta rūpabhedena dassiyamānaṃ yathoḷārikato dīpetabbanti tam vassasataparicchena paṭhamam dassentena² vassasataṃ ṭhitassa “dasa vā vīsati

1. Yattha ca (Syā, Ka)

2. Dassetvā (Syā)

vā”ti-ādinā vibhajitvā anukkamena yāva-uddharaṇādikoṭṭhāsavasena rūpassa bhaṅgaṃ disvā tato “aniccaṃ dukkhaṃ anattā”ti tilakkhaṇāropanaṃ vayovuḍḍhatthaṅgamato sammasananti¹ dassetuṃ **“tameva vassasatan”**ti-ādinā vayavasena rūpassa sammasanavidhi āraddho. Tattha yasmā oḷārikavasenevāyaṃ ādito rūpabhedo gayhati, tasmā na vassasataṃ samakoṭṭhāsavasena vibhattaṃ, majjhimāvattāya vā tathārūpattā majjhimavaye ekaṃ vassaṃ vaḍḍhitaṃ.

708. Mandatābhūllena pavattaṃ vassānaṃ dasakaṃ **mandadasakaṃ**. Esa nayo sesesupi.

Tadāti paṭhame vassadasake. **Soti** puggalo. **Capaloti** anavaṭṭhitakiriyatāya taralo. Tena momūhabbhāvato viseseti. Na hesa navamadasake viya momūhabbhāvena mando, atha kho capalatāyāti. Tenāha **“kumārako”**ti. Tatiye dasake maṃsapāripūriyā yathārahaṃ chavivaṇṇo vipasīdatīti āha **“vaṇṇāyatanam vepullaṃ pāpuṇāti”**ti. Catutthe dasake aṭṭhīnaṃ, nhārūnañca thirabhāvappattiyā **balāñca thāmo ca vepullaṃ pāpuṇāti**. Pañcame dasake yobbanamadassa dūrībhāvena yebhuyyena kilesatanutāya paññā yathārahaṃ suvisadā hoti. Khiḍḍāya rati **khiḍḍārati**. Kapallikādinissayavisesena padīpassa suddhatādi viya nissayavisesena pañcamachaṭṭhadasakesu paññāya buddhīhāniyo veditabbā. **Purato pabbhāro hoti** kaṭṭisandhigīvāsandhīnaṃ vasena rassassāpi, pageva dīghassa. **Pabbhāro**ti ca garubhāvena palambako. **Momūho hoti** satipaññāvippavāsato. **Sayanabahulova hoti** ṭhānādivasena sarīrabhāraṃ vahituṃ asakkonto.

709. **Tiṇṇaṃ tiṇṇaṃ vassānanti** yebhuyyatāya vuttaṃ. Catuvassikopi hi eko koṭṭhāso hotīti. Dvisataṃ koṭṭhāse katvā ekeka-ayanavasenātipi veditabbaṃ.

Vassāne pavattarūpanti sambandho.

1. Sammasanaṃ, tasmā taṃ (Syā)

Taṃ pana vassānaṃ dvidhā samattaṃ, na pubbe viya catumāsanti āha “**dvemāsan**”ti. Accantasamyoge cetarṃ upayogavacanāṃ. So pana **vassāno** utu sāvaṇapoṭṭhapādamaśā, assayujakattikamāśā **sarado**, migasiraphussamāśā **hemanto**, māghaphaggunamāśā **sisiro**, cittavesākhamāśā **vasanto**, jeṭṭhāsaḥamāśā **gimho** utūti veditabbo. **Cha koṭṭhāse katvā**ti dasadasanāṭikāvasena cha koṭṭhāse katvā.

710. Abhimukhaṃ purato kamaṇaṃ **abhikkamo**. Paṭinivattanavasena kamaṇaṃ **paṭikkamo**. Āmukhaṃ lokanaṃ **ālokanam**. Vividhaṃ ito cito ca lokanaṃ **vilokanam**. Hattapādānaṃ saṅkucanaṃ **samiñjanam**¹. Āyamaṇaṃ **pasāraṇam**.

Pādudharaṇakāleti dutiyapādudharaṇakāle. **Pādassā**ti uddhaṭapādassa. **Omattā**ti sattito hīnappamaṇā. Tenāha “**mandā**”ti. **Itarā**ti tejavāyodhātuyo. Yathā pādassa uddharaṇaṃ sījḥati, tathā pavattacittasamuṭṭhānarūpesu ekaṃsato tejavāyodhātūnaṃ adhimattatā icchitabbā sallahukasabhāvātāya tāsāṃ. Tato eva ca itarāsaṃ omattatā garusabhāvattā. Taṃsambandhattā pana sesāṃ tisamuṭṭhānarūpaṃ taggatikameva hoti. Kāyavacivīññattipavattiyāṃ vāyopathavī-adhimattatā imassa atthassa nidassananti daṭṭhabbaṃ. Purato haraṇe, pacchato haraṇe ca uddharaṇe viya sallahukasabhāvarūpappavattīti tāsāmyeva dvinnaṃ dhātūnaṃ adhimattatā icchitabbāti āha “**tathā atiharaṇavīti haraṇesū**”ti. Yathā uddharaṇādīsu sallahukasabhāvattā pacchimānaṃ dvinnaṃ dhātūnaṃ kiccaṃ adhikaṃ hoti, itarāsaṃ hīnaṃ, evaṃ vossajjanādīsu tīsu garusabhāvattā purimānaṃ dvinnaṃ kiccaṃ adhikaṃ hoti, itarāsaṃ hīnanti dassento āha “**vossajjane**”ti-ādi.

Tadupādāyarūpānīti tā dhātuyo nissāya pavatta-upādārūpāni. **Etthevā**ti uddharaṇeyeva. Tenāha “**atiharaṇaṃ appatvā**”ti. **Itī**ti evaṃ. **Tattha tatthā**ti tasmim tasmim uddharaṇādikoṭṭhāse. **Pabbaṃ**

1. Sammiñjanaṃ (Syā)

pabbanti-ādi tesam dhammānam koṭṭhāsantarasaṅkarābhāvadassanam.
Taṭataṭāyantāti taṭataṭāyanti viya, tena nesam pavattikkhaṇassa ittaratam dasseti.

711. **Assāti** sammasanassa. **Dāruṭiṇukkādīsūti** dāru-ukkāṭiṇukkādīsu.
“Kiṃ andhabāla ekaghanam satatam sabbadābhāvim ekanti maññasī”ti
adhippāyenāha “**kimettha manāpan**”ti. **Idampīti** yadidam telavaṭṭikkhayena
paḍipassa apaññāyanam vuttam, idampi. **Aṅulaṅgulantareti** aṅguliya mitam
aṅgulanti aṅgulappamāṇe padeseti attho. Tantuno avayavalesabhūtam
paramasukhumabhāvappattam amsum sandhāyāha “**amsum pana
muñcitvā**”ti.

Tatthāti-ādi upamāsamsandanam. Tattha kāmam upameyya viya
upamāyam pākaṭo kālabhedo natthi, ekakoṭṭhāsagatam pana koṭṭhāsantaram
na pāpuṇāṭīti ettāvata upamābhāvo veditabbo. Upamāyampi vā tāva yāvā¹ti
kālassa bhedamattā labbhatevāti tassā gahaṇe kālabhedavasenāpi upamā
yojetabbā.

712. Pubbe ādānanikkhepādivasena catusantatirūpam saṅgharivā
dassitam, idāni āhārasamuṭṭhānādivasena bhinditvā dassento “**tadeva rūpam
visaṅkharitvā**”ti-ādimāha. Tattha **visaṅkharitvā** vibhajitvā. “Visaṅgharivā”ti
vā pāḷho, ayamevattho. **Āhāramayanti** āhārena nibbattam. **Jhattan**²ti
milātam. **Kilantanti** khinnam. **Dhātanti** tittam. **Piṇitanti**
maṃsūpacayasampattiyā piṇitam. Tato eva **muḍu**. **Siniddhanti**
siniddhacchavitāya saṅham. Tato eva **phassavantam**.

713. **Uṇhakāle samuṭṭhitam rūpanti** uṇhasantāpena santattam rūpam
sandhāyāha. **Sīta-utunāti** sappāyena sīta-utunā.

714. **Āyatanadvārasenāti** āyatanasaṅkhātadvārasena.
Kammadvāranivattanattham āyatanaggahaṇam. **Kāyadvāreti**
pasādakāyadvāre. **Manodvāram** nāma sāvajjanam bhavaṅgam. Tassa
nissayabhāvato hadayavatthum sandhāya nissitavohārena “**manodvāre**”ti
vuttam, yattha manodvārupatti.

1. Tāvayavā (Ka)

2. Jattam (Syā)

715. **Somanassitadomanassitavasenāti**

somanassitadomanassitapuggalavasena, somanassitadomanassitakālavasena vā.

Ayamatthoti ayam idāni vuccamāno saṅkhārānaṃ ati-ittarakhaṇatāsaṅkhāto attho.

Jīvanti jīvitindriyaṃ. **Sukhadukkhāti** sukhadukkhavedanā. Upekkhāpi hi sukhadukkhāsu eva antogadhā iṭṭhāniṭṭhabhāvato. **Attabhāvoti** jīvitavedanāvīññāṇāni ṭhapetvā avasiṭṭhadhammā vuttā. Saññāti keci. **Kevalāti** attanā, niccabhāvena vā avomissā. **Ekacittasamāyuttāti** ekekena cittena sahitā. **Lahuso vattate khaṇoti** vuttanayena ekacittakkhaṇikatāya lahuko ati-ittaro jīvitādīnaṃ khaṇo vattati.

Cullāsītisahassāni kappanti caturāsītisahassaparimāṇaṃ kappam, accantasamyoge etaṃ upayogavacanaṃ. **Kappanti** ca sāmāññavasena ekavacanaṃ. **Marūti** devā. **Dvīhi cittehi samohitāti** evaṃ cirajīvinopi te dvīhi cittehi sahitā hutvā na tiṭṭhanti. Idaṃ vuttaṃ hoti—tesampi santāne jīvitādīni dvīhi cittehi saha na tiṭṭhanti, ekena cittena saha uppannāni teneva saha nirujjhanato yāva dutiyā na tiṭṭhantīti.

Ye niruddhā marantassāti cavantassa sattassa cuticittena saddhim niruddhāti vattabbā ye khandhā. **Tiṭṭhamānassa vā idhāti** ye vā idha pavattiyam tiṭṭhantassa dharantassa bhaṅgappattiyā niruddhakkhandhā. **Sabbepi sadisā** te sabbepi ekasadisā atthaṅgatā **appaṭisandhikā** puna āgantvā paṭisandhānābhāvena vigatā. Yathā hi cutikkhandhā na nibbantanti, evaṃ tato pubbepi khandhā. Tasmā ekacittakkhaṇikaṃ sattānaṃ jīvanti adhippāyo.

Anantarā ca ye bhaggāti ye saṅkhārā anantareva bhaggā niruddhā. **Ye ca bhaggā anāgateti** ye ca saṅkhārā anāgate bhaggā bhañjanasīlā bhijjissanti. **Tadantarā niruddhānanti** tesam atītānāgatānaṃ antarā vemajjhe paccuppannataṃ patvā niruddhānaṃ bhaggānaṃ. **Vesanaṃ natthi lakkhaṇeti** tesam tividhānampi bhaṅgalakkhaṇanimittam visamatā visadisatā natthi.

Anibbattena na jātoti anuppannena cittena jāto na hoti, ajāto nāma hoti. **Paccuppannena** vattamānena cittena **jīvati** jīvamāno nāma hoti. **Cittabhaṅgā mato lokoti** cuticittassa viya sabbassapi tassa tassa cittassa bhaṅgappattiyā ayam loko paramatthato mato nāma hoti niruddhassa appaṭisandhikattā. Evam santepi **paññatti paramatthiyā** yāyam tam tam santam sanissayam cittam upādāya “tisso jīvati, phusso jīvati”ti evam vacanappavattiyā visayabhūtā santānapaññatti, sā ettha paramatthiyā paramatthabhūtā. Tathā hi vadanti “nāmagottaṃ na jīratī”ti¹.

Anidhānagatā bhaggāti ye bhaggā, na te katthaci nidhānaṃ gatā, atha kho abhāvameva gatā. **Puñjo natthi anāgate** yato āgaccheyyūṃ vattamānabhāvaṃ. **Nibbattā yepīti** ye paṭiladdhattabhāva paccuppannā, tepi **āragge sāsapūpamā tiṭṭhanti**. Yathā nāma sūciyam ṭhitāyam sāsapo khitto tassā sikhāṃ phuṭṭhamatto vigacchati na tiṭṭhati, evam saṅkhārā uppajjitvā bhijjanti, na tesam avatṭhānaṃ atthīti.

Bhaṅgo nesam purakkhatoti tesam nibbattadhammānaṃ bhaṅgo nāma purato eva kato, ekaṃsabhāvī na apasakkatīti attho. **Purāṇehīti** purimakehi atītehi.

Adassanatoti apassitabbato. **Āyantīti** āgacchanti. “**Uppajjanti**”ti imināpi kutoci rāsito āgamanābhāvamevāha. **Bhaggā gacchantya’ dassananti** bhaggāpi katthaci upagamanābhāvato sabbena sabbam adassanaṃ abhāvameva gacchanti. Tattha nidassanamāha “**vijjuppādo -pa- vayanti cā**”ti.

716. “**Vivaṭṭakappato paṭṭhāya uppajjanakarūpan**”ti iminā sayameva uppajjanakadhammatāya “**dhammatārūpan**”ti anvatthanāmataṃ dasseti. Ayalohādīsu **ayo** nāma kāḷalohaṃ. **Lohaṃ** nāma jātilohaṃ vijātilohaṃ kittimalohaṃ piśācalohanti catubbidham. Tattha ayo rajataṃ suvaṇṇaṃ tipu sīsaṃ tambalohaṃ vekantakalohanti imāni satta **jātilohāni**. Nāganāsikalohaṃ **vijātilohaṃ**. Kaṃsalohaṃ

1. Sam 1. 40 piṭṭhe.

vaṭṭalohaṃ hārakūṭanti tīṇi **kittimalohāni**. Morakkhakādi **pisācalohaṃ**. Tattha tambalohaṃ vekantakanti imehi dvīhi jātilohehi saddhim sesaṃ sabbampi idha “lohan”ti gahitanti. **Tipūti** setatipu. **Sīsanti** kāḷatipu. **Suvaṇṇaṃ** ākaruppanarasaviddhādibhedāṃ. **Muttā** sāmuddikamuttādi. **Maṇṇi** veḷuriyalohitaṅgamasāragallāni ṭhapetvā avaseso sabbo maṇiviseso. **Veḷuriyo** vaṃsavaṇṇamaṇi. **Saṅkho** sāmuddikasaṅkho. **Silāti** kāḷasilāpaṇḍusilādibhedā sabbāpi ratanasammataṣilā. **Pavāḷaṃ** nāma vaṭṭumaṃ viddhamaṃ. **Lohitaṅgaṃ** rattamaṇi. **Masāragallaṃ** kabaramaṇi. **Bhūmi**-ādayo pākaṭāva. **Tadassāti** taṃ dhammatārūpaṃ assa yogino.

Taruṇapallavaṇṇanti ambādīnaṃ taruṇapallavena samānavaṇṇaṃ. **Sabhāgarūpasantatinti** vaṇṇādīnā samānabhāgaṃ rūpasantānaṃ. **Anuppabandhāpayamānanti** hetuphalaparamparāya sambandhanavasena¹ pavattanti.

Soti yogī. **Tanti** asokarukkhaṇṇaṃ. **Pariggahetvāti** ñāṇena paricchijja gahetvā. **Iminā nāyēnāti** iminā asokapaṇṇe vuttana nāyena. **Sabbampi** ayalohādibhedāṃ **dhammatārūpaṃ**. Tampi hi sītakāle sītalaṃ, uṇhakāle sūriyasantāpena uṇhataṃ hoti. Tattha sītabhāvena pavattaṃ rūpaṃ uṇhaṃ uṇhabhāvena pavattaṃ rūpaṃ sitaṃ na pāpuṇāti. Tattha tattheva taṭataṭāyantaṃ bhijjati-ādīnā yojetabbaṃ.

Arūpasattakasammasanakathāvaṇṇanā

717. **Kalāpatoti** arūpadhammakalāpatoti.

Yasmā tattha phassaṇcapakā dhammā sabbacittuppādasādhāraṇā supākaṭā, suviññeyyā ca, tasmā tesaṃ vasena dassento “**kalāpatoti** **essapaṇcamakā dhammā**”ti āha. Ye ime sammasane uppannā phassaṇcamakā dhammā, sabbe te vinaṭṭhāti sambandho.

Pavattaṃ cittanti sattasu ṭhānesu sammasanavasena pavattaṃ cittaṃ. **Sammasantoti** ekajjhaṃ gahetvā sammasanto. **Taṃ yuttataranti** taṃ ariyavaṃsakathāyaṃ vuttaṃ yuttataraṃ āsannabhāvena vibhūtataṃ rūpasattake sammasanaṃ saha gahetvā sammasanassa vuttattā. Apica rūpasattake

1. Pabandhanavasena (Syā)

sammasanassa rūpadhammesu sātisayaṃ ghanavinibbhogaṃ katvā pavattattā tabbisayaṃ arūpasammasanaṃ sātisayaṃ aniccādilakkhaṇappaṭivedhāya sampavattatīti taṃ yuttataraṃ, na pana apubbakesādisammasanaṃ¹ katvā tabbisayaṃ pavattitaṃ. Tathā sati kammaṭṭhānaṃ navāṃ navāṃ eva siyā, pubbe gahitaṃ sammasanavisayaṃ chaḍḍetvā aññassa sammasanavisayassa gaṇhanato. **Sesānipīti** yamakato sammasanādīnipi. **Tenevāti** ariyavaṃsakathānayeveva.

718. **Tampi cittanti** ādānanikkhepato sammasanavasena pavattacittuppādampi. Cittasīna hi niddeso. Esa nayo sabbattha. **Yamakato sammasati nāma** nāmarūpadhamme ārabba yugaḷavasena sammasanassa pavattanato. Ayañhi pubbe rūpasattakavasena sammasitvā ṭhitopi idāni ādānanikkhepādivasena sammasitvāva taṃ sammasati. Khaṇikato sammasanādīsupi eseve nayo.

719. **Etampīti** etaṃ catutthasammasanacittampi. **Paṭhamacittanti** ādānanikkhepādivasena rūpaṃ sammasitacittaṃ, yaṃ rūpapariggāhakacittanti adhippetāṃ. Sammasitasammasitacittasammasanena² tesaṃ khaṇikabhāvassa vibhāvanato idaṃ sammasanaṃ “**khaṇikato sammasanaṃ**”ti vuttaṃ.

720. Idameva ca sammasanaṃ diguṇitaṃ anekasammasanapaṭipāṭisambhavato “**paṭipāṭito sammasanaṃ**”ti vuttaṃ. **Vatṭeeyāti** sambhaveyya. Tathā sati paṭipāṭisammasanapasutā eva bhāvanā siyā, na mūlakammaṭṭhānupakārī, na cāyaṃ samāpatticāro. Yasmā ca tattakena rūpadhammesu, arūpadhammesu ca aniccādilakkhaṇāni suṭṭhu vibhūtāni honti, tasmā vuttaṃ “**yāva dasamacittasammasanā -pa-ṭhapetabban**”ti. **Ṭhapetabbanti** ca na ekādasamaṃ dvādasamena sammasitabbanti paṭipāṭito sammasanassa paricchedadassanaparaṃ, na tato sammasanato oramanadassanaparaṃ, tasmā punapi rūpaṃ pariggahetvā yāva dasamacittasammasanā bhāvanamanuyuñjateva. **Vuttanti** ariyavaṃsakathāyaṃ vuttaṃ.

721. **Visuṃ sammasananayo nāma natthīti** aniccādimanasikāravanimutto añño vipassanāmanasikāro natthi. Vipassanāya ca diṭṭhi-ādivikkhambhanā idha diṭṭhi-ugghāṇādayoti adhippetā. Vipassanāya eva hi

1. Apubbakesāti-ādisammasanaṃ (Syā)

2. Sammasitacittasammasanena (Syā)

pavattivisesena diṭṭhi-ugghātanādayo ijjhantīti dassento “**yaṃ panetan**”ti-ādimāha. Tattha **sattasaññā**ti sattā atthīti uppajjanakasaññā. Dubbalāya attadiṭṭhiyā saḥagatasaññātipi vadanti. **Sattasaññāṃ ugghāṭitacittenā**ti sattasaññāya vikkhambhanavasena pavattacittena diṭṭhi nuppajjati, saññāvīpallāsahetu-uppajjanakā cittadiṭṭhivīpallāsā tadabhāvena hontīti. **Māno** nāma yo diṭṭhūpanissayo apāyagamanīyo, so diṭṭhiyā vikkhambhitāya vikkhambhito eva hoti, diṭṭhiyā samucchinnāya samucchiḍḍanatoti āha “**diṭṭhi-ugghāṭita -pa- māno nuppajjati**”ti. Māno vikkhambhiyamāno taṇhāya pavattim nivāreti, abhimatavisayesu **eva** taṇhāya pavattanatoti vuttam “**mānasamugghāṭita -pa- taṇhā nuppajjati**”ti. **Taṇhā**ti idha sukhumā nikanti adhippetāti āha “**taṇhāya -pa- pariyādinā nāma hoti**”ti.

Ayaṃ nayoti idāni vuccamāno sammāsanavidhi.

Mama vipassanāti imassāpi attaniyasaññitāya vipassanāya sāmībhūto¹ attā parāmasīyatīti diṭṭhigāhatāti tathā “**gaṇhato hi diṭṭhisamugghāṭanam nāma na hoti**”ti vuttam. Kāmañcāyaṃ diṭṭhivīsuddhikaṅkhāvitaraṇavisuddhisamadhigamena visuddhadiṭṭhiko, maggena pana asamugghāṭitattā anolārikāya ca diṭṭhiyā vasenevaṃ vuttam.

Suṭṭhūti sammā. **Manāpanti** ca kiriyāvisesanam, manavaḍḍhanākārenāti attho. Ubhayenāpi vipassanāvisayaṃ adhimānamāha. Tena vuttam “**mānasamugghāṭo nāma na hoti**”ti.

Vipassitum sakkomīti tattha samatthātāpadesena guṇavisesayogato vipassanāya assādetabbatā dassīyati, cittaṃ vipassitum sakkomi. Tasmā vipassanto eva kālam vītināmessāmīti vipassanam assādentassāti yojanā.

Yasmā diṭṭhisamugghāṭanam nāmettha visesato anattānupassanāya hoti, tasmā tam dassentena “**sace saṅkhārā**”ti-ādinā anattānupassanāvidhiṃ vatvā yasmā pana anattato anupassantena saṅkhārā

1. Asmībhūto (Syā)

aniccatopi dukkhatopi anupassitabbā eva tadupabrūhanato, tasmā **“hutvā abhāvaṭṭhenā”**ti-ādi vuttaṃ.

Yasmā mānasamugghāṇaṃ nāma aniccānupassanāya hoti. Khaṇe khaṇe bhijjanake saṅkhāre passantassa kuto mānassa avasaro. Aniccasaññā bhāvetabbā asmimānasamugghāṭāyāti hi vuttaṃ.

Yasmā nikantipariyādānaṃ nāma dukkhānupassanāya hoti. Na hi sabhāvato, dukkhavattuto ca dukkhabhūte saṅkhāre passantassa tattha īsakampi abhirato hoti. Assādānupassino hi tattha taṇhā uppajjeyya. Sesāṃ anattalakkhaṇe vuttanayameva. Ayaṃ panettha saṅkhepattho—vuttanayena paṭipāṭito sammāsaṇaṃ pasutassa yogino yadā anattānupassanā tikkhā sūrā visadā pavattati, itarā dvepi tadanugatikā, tadānena diṭṭhi-ugghāṇaṃ kataṃ hoti. Attadiṭṭhimūlikā hi sabbā diṭṭhiyo. Anattānupassanā ca attadiṭṭhiyā ujupaṭipakkhā.

Yadā pana aniccānupassanā tikkhā sūrā visadā pavattati, itarā dvepi tadanugatikā, tadānena mānasamugghāṇaṃ kataṃ hoti. Sati hi niccagāhe mānajappanā “idaṃ niccaṃ, idaṃ dhuvan”ti-ādinā¹ **bakabrahmuno** viya. Aniccānupassanā ca niccagāhassa ujupaṭipakkhā.

Yadā pana dukkhānupassanā tikkhā sūrā visadā pavattati, itarā dvepi tadanugatikā, tadānena nikantipariyādānaṃ kataṃ hoti. Sati hi sukhasaññāya taṇhāgāhova, dukkhānupassanā ca nikantiyā ujupaṭipakkhā. Evaṃ tissannaṃ anupassanānaṃ kiccavisesavasena diṭṭhi-ugghāṇādāni honti. Tena vuttaṃ **“iti ayaṃ vipassanā attano attano ṭhāneyeva tiṭṭhati”**ti. Anupassanānaṃ yathārahaṃ sakakiccakaraṇāhi sakaṭṭhāneyeva ṭhānaṃ, tasmā visum sammāsaṇanayo natthīti na vattabbanti adhippāyo.

722. **Sabbākāratoti** idha viya ekadesena avatvā sabbākārato sarūpato, kiccato ca anavasesato vattabbā. **Idhevāti** tīraṇapariññāyameva. Ekaccānaṃyevettha anupassanānaṃ paṭilābhoti āha **“ekadesaṃ paṭivijjhanto”**ti, tā pana sayameva sarūpato

1. Ma 1. 401 piṭṭhe.

dassessati¹. **Tappaṭipakkhe dhammeti** yā anupassanā idha sambhavanti, tāsāṃ paṭipakkhe dhamme niccasaññādike **pajahati** vikkhambheti.

Khayānupassananti saṅkhārānaṃ khaṇabhaṅgānupassanaṃ. **Bhāventoti** vaddhento. **Ghanasaññanti** santatisamūhakkiccārammaṇānaṃ vasena ekattaggahaṇaṃ. **Khayānupassananti** hutvā abhāvānupassananti vadanti. Yāya paññāya ghanavinibbhogaṃ katvā “aniccaṃ khayaṭṭhenā”²ti² passati, sā **khayānupassanā**. Bhaṅgānupassanato paṭṭhāya tassā pāripūrīti ghanasaññāya pahānaṃ hoti, tato pubbe aparipuṇṇatāya taṃ na hoti. Evamaññatthāpīti paripuṇṇāpuripuṇṇatā pahānatīraṇaparīññāsu vipassanāpaññāya daṭṭhabbā. Paccakkhato, anvayato ca saṅkhārānaṃ bhaṅgaṃ disvā tattheva bhaṅgasankhāte nirodhe adhimuttatā **vayānupassanā**, tāya **āyūhanaṃ pajahati**. Yadatthaṃ, yāya ca āyūhati, tasmim pavatte taṇhāya cassa cittaṃ na namatīti. Tena vuttaṃ “**vayānupassanaṃ bhāvento āyūhanaṃ pajahati**”ti. Jātassa jarāmarañehi dvidhā pariṇāmadassanaṃ, rūpasattakādivasena vā pariggahitassa taṃtaṃparicchedato paraṃ aññabhāvadassanaṃ **vipariṇāmānupassanā**, tāya **dhuvasaññānaṃ** thirabhāvagahaṇaṃ **pajahati**.

Animittānupassanādayo aniccānupassanādayo eva. **Nimittanti** santatiyaṃ, samūhe ca ekattasaññāya gayhamānaṃ kālantarāvaṭṭhāyibhāvena, niccabhāvena ca saṅkhārānaṃ sakiccaparicchedatāya saviggahaṃ viya upaṭṭhānamattaṃ. **Paṇidhinti** sukhapatthanaṃ, rāgādipaṇidhiṃ vā, atthato taṇhāvasena saṅkhāresu ninnataṃ. **Abhinivesanti** attābhinivesaṃ. Etesañhi nimittādīnaṃ paṭipakkhabhāvena aniccānupassanādayo animittādīnāmehi vuttāti aniccānupassanādīhi pahātabbā niccasaññādayo viya nimittaggāhādayova paṭipakkhāti daṭṭhabbā. Rūpādi-ārammaṇaṃ ñatvā tadārammaṇassa cittassa bhaṅgaṃ disvā saṅkhārā eva bhijjanti, saṅkhārānaṃ maraṇaṃ, na añño koci atthīti bhaṅgavasena suññataṃ gahetvā pavattā vipassanā adhipaññā ca sā dhammesu ca vipassanāti **adhipaññādhammavipassanā**, tāya niccasārādi-ādānavasena pavattaṃ abhinivesaṃ sataṇhaṃ diṭṭhiṃ pajahati. **Yathābhūtaññadassanaṃ** nāma sappaccayanāmarūpadassanaṃ. Tena “ahosiṃ nu kho

1. Dassiyanti (Syā)

2. Khu 9. 51 piṭṭhe Paṭisambhidāmagge.

ahamatītamaddhānan”¹ti evamādikaṃ, “issarato² loko sambhavatī”³ti evamādikañca **sammohābhinivesaṃ pajahati**. Bhayatupaṭṭhānavasena uppannaṃ sabbabhavādīsu ādīnavadassanaññāṇaṃ **ādīnavānupassanā**, tāya kassacipi ālayanissaya-adassanato **ālayābhinivesaṃ** tathāpavattaṃ taṇhaṃ **pajahati**. Saṅkhārānaṃ muñcanassa upāyabhūtaṃ paṭisaṅkhāññāṇaṃ **paṭisaṅkhānupassanā**, tāya aniccādīsu appaṭisaṅkhātattā paṭisaṅkhānassa paṭipakkhabhūtaṃ aviijaṃ pajahati. Saṅkhārupekkhā, anulomaññāṇaṃca **vivaṭṭānupassanā**. Tassā hi vasena tassa padumapalāse udakabindu viya sabbasaṅkhārehi cittaṃ paṭilīyati paṭikuṭati³, tasmā tāya **saṃyogābhinivesaṃ** kāmasaṃyogādikilesappavattiṃ **pajahati**. Aniccānupassanādayo satta anupassanā heṭṭhā atthato vibhattāti, parato ca saṃvaṇṇīyantīti idha na vuttā.

Tāsūti atṭhārasasu mahāvīpassanāsu. **Imināti** yoginā. **Tasmāti** aniccādīlakkhaṇattayavasena saṅkhārānaṃ diṭṭhattā. Taṃdassanañhi aniccādi-anupassanāti. **Paṭividdhāti** paṭiladdhā. Yadaggena hi ñāṇena savisayo paṭividdho, tadaggena taṃ paṭiladdhaṃ nāma hoti. **Byañjana**meva **nānaṃ** yathā “rukkho pādapo tarū”³ti. **Tāpi** animittāpaṇihitasuññātānupassanā.

Sabbāpi vipassanā, tasmā ekadesena paṭividdhā hontīti adhippāyo. **Kaṅkhāvitarāṇavisuddhiyā eva saṅgahitaṃ**, tasmā taṃ pageva siddhanti attho. Tenāha **“idampi dvayaṃ paṭividdhameva hotī”**ti. **Sesesu** nibbidānupassanādīsu dasasu. **“Kiñci paṭividdhaṃ kiñci appaṭividdhaṃ”**ti iminā tesāṃ ekadesapaṭivedhamāha. Aniccānupassanāya hi siddhāya nirodhānupassanā, khayānupassanā, vayānupassanā, vipariṇāmanupassanā ca ekadesena siddhā nāma honti, dukkhānupassanāya siddhāya nibbidānupassanā, ādīnavānupassanā ca, anattānupassanāya siddhāya itarāti.

1. Ma 1. 10; Saṃ 1. 265 piṭṭhesu. 2. Issarakato (Syā) 3. Paṭilīyati paṭikuṭati (Syā, Ka)

Udayabbayañāḍakathāvaṇṇanā

723. Parato paṭipadāñāḍadassanakathāyaṃ abbhādivigamena ākāsassa viya, paṅkamalavigamena udakassa viya, kālakāpagamena suvaṇṇassa viya saṅkilesavigamena ñāḍassa parisuddhīti āha “**niccasaññāḍīnaṃ pahānena visuddhañāḍo**”ti. Anekākāravokārasaṅkhāresu lakkhaṇattayasallakkhaṇasammasanassa katattā vuttam “**sammasanañāḍassa pāraṃ gantvā**”ti. Tattha **sammasanañāḍassāti** nayavipassanāsaṅkhātassa kalāpasammasanañāḍassa. Tasseva hi thirabhāvāya itare sammasanavisesāti vadanti. **Sammasanañāḍassāti** vā kalāpasammasanādisammasanañāḍassa. Anupadadhammavipassanāya sadisā hi sā. Tāya hi diṭṭhi-ugghāṭanādi sambhavatīti. Vitthārato bhāvanāvīdhānaṃ parato vattukāmo “**saṅkhepato tava ārabhati**”ti āha. Saṅkhepato hi ārambho ādikammikassa sukaro. **Tatrāti** saṅkhepena ārambhe.

Kathanti kathetukamyatāpucchā. Yaṃ “paccuppannānaṃ -pa-udayabbayānupassane ñāḍan”ti vuttam, taṃ kathaṃ ñāḍabbanti ceti attho. Santatipaccuppanne, khaṇapaccuppanne vā dhamme udayabbayadassanābhiniveso kātabbo, na atītānāgateti vuttam “**paccuppannānaṃ dhammānaṃ**”ti. Udayadassanañcettha yāvadeva vayadassanattanti vayadassanassa padhānataṃ dassetuṃ “**vipariṇāmānupassane paññā**”ti vatvā taṃ pana vayadassanaṃ udayadassanapubbakanti āha “**udayabbayānupassane ñāḍan**”ti.

Jātanti nibbattaṃ paṭiladdhattabhāvaṃ. Ayaṃ hi jātasaddo khaṇattayasamaṅgitaṃ sandhāya vutto “ye dhammā jātā bhūtā”ti-ādīsu¹ viya, na atītā—

“Ye te jātā, na te santi, ye na jātā, tattheva te.

Laddhattabhāvā no bhaggā, teva santi sabhāvato”ti—

ādīsu viya, nāpi jātatāmattaṃ “yaṃ taṃ jātaṃ bhūtaṃ saṅkhatan”ti-ādīsu² viya. Tenāha “**jātaṃ rūpaṃ paccuppannan**”ti, paccuppannarūpaṃ nāma jātaṃ khaṇattayapariyāpannanti attho. Taṃ pana ādito duppariggahanti santatipaccuppannavasena vipassanābhiniveso kātabbo. **Tassāti** rūpassa.

1. Abhi 1. 213 piṭṭhe.

2. Dī 2. 119; Saṃ 3. 141 piṭṭhesu.

Paccayalakkhaṇapapañcaṃ anāmasitvā **nibbattilakkhaṇaṃ udayoti** nibbattanasaññitaṃ saṅkhatalakkhaṇaṃ udayo uppādo.

Vipariṇāmalakkhaṇaṃ vayoti vipariṇāmasaññitaṃ saṅkhatalakkhaṇaṃ vayo vināso. **Anupassanāñānanti** yā udayassa, vayassa ca anupekkhanā, taṃ ñāṇaṃ. Kiñcāpi kalāpasammasanādīsu jātijarāmarañāsīsenā jātijarāmarañavanto dhammā vuttā, idha pana udayabbayañāṇaniddese “jāti paccuppannā, tassā nibbattilakkhaṇaṃ udayo, vipariṇāmalakkhaṇaṃ vayo”ti-ādinā¹ vuccamāne jātijarāmarañānaṃ jātijarāmarañavantatā, nipphannatā ca anuññātā viya hotīti taṃ pariharitum paṭiccasamuppādaṅgesu bhavapariyosānāva desanā katā².

Soti yogī. Iminā pāḷinayenāti imāya “jātaṃ rūpaṃ paccuppannaṃ”ti-ādinā¹ dassitāya pāḷigatiyā. **Jātinti** na pasūtīm, na ca paṭhamābhiniabbattimattaṃ, atha kho uppādaṃ nibbattivikāraṃ. Svāyaṃ vikāro yasmā saṅkhārānaṃ abhinavāvaṭṭhānajarā viya navabhāvāpagamoti āha “**abhinavākāraṃ**”ti. Samanupassatīti sambandho. **Anuppannassa rāsi vā nicayo vā natthi** yato āgaccheyya uppajjamānaṃ aladdhattabhāvassa sabbena sabbaṃ avijjamānattā. Tenāha “**uppajjamāna -pa- natthi**”ti. Yathā anāgate addhani ime dhammā sabbena sabbaṃ natthi, evaṃ atītepi addhanīti dassento “**nirujjhamānassāpi**”ti-ādiṃ vatvā avijjamānānaṃhyeva rūpārūpadhammānaṃ hetupaccayasamavāye uppādo, uppajjitvā ca sabbaso abhāvūpagamoti imamatthaṃ samudāyagataṃ tadekadesabhūtāya upamāya vibhāvetum “**yathā panā**”ti-ādi vuttaṃ. Tattha **rāsitoti** rāsibhāvena samussito puñjo rāsi. Yathā tathā piṇḍibhūto **nicayo**. Bhūmiyaṃ nidahitvā ṭhapitaṃ **nidhānaṃ**. Upavīṇehi etenāti **upavīṇaṃ**, vīṇāvādanaṃ.

724. Evaṃ saṅkhepato udayabbayamanasikāraavidhiṃ dassetvā idāni vitthārato dassetum “**puna yāni**”ti-ādi vuttaṃ. Tattha **avijjāsamudayāti** avijjāya uppādā, atthibhāvāti attho. Nirodhavirodhīhi uppādo atthibhāvavācakopi hotīti vuttovāyamattho. Tasmā purimabhavasiddhāya avijjāya sati imasmim bhava rūpassa uppādo

1. Khu 9. 52 piṭṭhe Paṭisambhidāmagge.

2. Gatā (Syā, Ka)

hotīti attho. **Paccayasamudayaṭṭhenā**ti paccayassa uppanabhāvena, atthibhāvato¹ti attho. Avijjādīhi ca tīhi atītakālikāni tesam sahakārikāraṇabhūtāni upādānādīnīpi gahitānevāti daṭṭhabbam.

Pavattipaccayesu kabaḷikārāhārassa balavatāya so eva gahito “**āhārasamudayā**”ti. Tasmim pana gahite pavattipaccayatāsāmaññena utucittānīpi gahitāneva hontīti catusamuṭṭhānikarūpassa paccayato udayadassanam vibhāvitamevāti daṭṭhabbam.

Avijjātanḥupanissayasahiteneva kammunā rūpakāyassa nibbatti. Asati ca avijjupanissayāya bhavanikantiyā jātiyā asambhavo evāti. Yathā ca rūpassa avijjātanḥupanissayatā, evam vedanādīnāmpi daṭṭhabbā. Āhāro pana uppanassa rūpassa posako, kabaḷikārāhārassa adhippetattā, kāmadhātādhiṭṭhānattā ca desanāya. Ukkamsaniddesena vā āhāraggahaṇam. “**Nibbattilakkhaṇan**”ti-ādinākālavasena udayadassanamāha. Tattha addhānavasena pageva udayam passivā ṭhito idha santativasena disvā anukkamena khaṇavasena passati. **Pañca lakkhaṇānī**ti avijjā tanhā kammam āhāroti imesam paccayānam atthitāsāṅkhātalakkhaṇāni ceva rūpassa nibbattilakkhaṇāncāti imāni pañca lakkhaṇāni. Tesam atthitā hi rūpassa udayo lakkhīyati etehīti lakkhaṇānīti vuccanti. Nibbatti pana saṅkhatalakkhaṇamevāti.

Avijjānirodhā rūpanirodhoti aggamaggañāṇena avijjāya anuppādanirodhato anāgatassa rūpassa anuppādanirodho hoti paccayābhāve abhāvato. **Paccayanirodhaṭṭhenā**ti avijjāsāṅkhātassa anāgate uppajjanakarūpapaccayassa niruddhabhāvena. **Taṇhānirodhā kammanirodhā**ti etthāpi eseva nayo. **Āhāranirodhā**ti pavattipaccayassa kabaḷikārāhārassa abhāve. **Rūpanirodho**ti tamsamuṭṭhānarūpassa abhāvo hoti. Sesam heṭṭhā vuttanayānusārena veditabbam. **Vipariṇāmalakkhaṇanti** bhaṅgakālavasena tesam² vayadassanam. Tasmā tam addhāvasena pageva passivā ṭhito idha santativasena disvā anukkamena khaṇavasena passati. **Pañca lakkhaṇānī**ti idha avijjādīnam catunnam paccayānam anuppādanirodho, rūpassa khaṇanirodho cāti imāni pañca lakkhaṇāni. Tesañhi anuppādanirodhā rūpassa accantanirodho lakkhīyati etehīti lakkhaṇānīti vuccanti.

1. Atthibhāvena (Syā)

2. Hetam (Ka)

Vipariṇāmo saṅkhatalakkhaṇameva. Esa nayo vedanākkhandhādīsu. Ayaṃ pana viseso—“phuṭṭho vedeti, phuṭṭho sañcānāti, phuṭṭho ceteti”¹, “phassapaccayā vedanā, cakkhusamphassajā vedanā, saññā, cetanā”², ca vacanato phasso vedanā saññā saṅkhārakkhandhānaṃ pavattipaccayo, taṃnirodhā ca tesāṃ nirodho, **mahāpadāna**³ **mahānidāna**⁴ suttesu, **abhidhamme** ca aññamaññapaccayavāre “nāmarūpapaccayā viññāṇan”⁵ vacanato nāmarūpaṃ viññāṇassa pavattipaccayo, taṃnirodhā tassa nirodhoti vuttaṃ “**phassasamudayā vedanāsamudayo**”^{ti-ādi.}

Ettha ca keci tāva āhu “arūpakkkhandhānaṃ udayabbayadassanaṃ addhāsantativaseneva, na khaṇavasenā”^{ti.} Tesāṃ matena khaṇato udayabbayadassanameva na siyā. Apare panāhu “paccayato udayabbayadassane atītādivibhāgaṃ anāmasitvā sabbasādhāraṇato avijjādipaccayā vedanāsambhavaṃ labbhamānataṃ passati, na uppādaṃ. Avijjādi-abhāve ca tassā asambhavaṃ alabbhamānataṃ passati, na bhaṅgaṃ. Khaṇato udayabbayadassane paccuppannānaṃ uppādaṃ, bhaṅgaṇca passatī”^{ti,} taṃ yuttaṃ. Santativasena hi rūpārūpadhamme udayato, vayato ca manasi karontassa anukkamena bhāvanāya balappattakāle ñāṇassa tikkhavisadabhāvappattiyā khaṇato udayabbayā upaṭṭhahantīti. Ayañhi paṭhamāṃ paccayato udayabbayaṃ manasi karonto avijjādike paccayadhamme vissajjetvā udayabbayavante khandhe gahetvā tesāṃ paccayato udayabbayadassanamukhena khaṇatopi udayabbayaṃ manasi karoti.

Tassa yadā ñāṇaṃ tikkhaṃ visadaṃ hutvā pavattati, tadā rūpārūpadhammā khaṇe khaṇe uppajjantā, bhijjantā ca hutvā upaṭṭhahanti. Tena vuttaṃ “**evampi rūpassa udayo**”^{ti-ādi.} Tattha **evampi rūpassa udayoti** evaṃ vuttanayena avijjāsamudayāpi. Taṇhā -pa- kamma -pa- āhārasamudayāpi rūpassa sambhavo. **Evampi rūpassa vayoti** evaṃ vuttanayeneva avijjānirodhāpi taṇhā -pa- āhāranirodhāpi rūpassa vayo anuppādoti **paccayato vitthārena manasikāraṃ karoti.** **Evampi rūpaṃ udetīti** evaṃ vuttanayena nibbatilakkhaṇaṃ passantopi kammasamuṭṭhānarūpampi āhāra-utucittasamuṭṭhānarūpampi udeti uppajjati nippajjatīti. Evaṃ vuttanayeneva vipariṇāmalakkhaṇaṃ passanto kammasamuṭṭhānarūpampi

1. Saṃ 2. 292 piṭṭhe.

2. Abhi 2. 143 piṭṭhe.

3. Dī 2. 28 piṭṭhe.

4. Dī 2. 48 piṭṭhe.

5. Abhi 4. 371 piṭṭhe.

āhāra-utucittasamuṭṭhānarūpampi **veti** nirujjhatīti khaṇato vitthārena manasikāraṃ karotīti yojanā.

725. Evaṃ manasi karoto na yāva udayabbayañāṇaṃ uppajjati, tāva udayabbayā suṭṭhu pākaṭā na hontīti katvā vuttaṃ “**iti kirime dhammā -pa- paṭiventī**”ti, nayadassanavasena vā evaṃ vuttaṃ. Paṭhamañhi paccuppannadhammānaṃ udayabbayaṃ disvā atha atītānāgate nayaṃ neti. Dukkhādisaccappabhedā, anulomādipaṭiccasamuppādappabhedā, ekattādinayappabhedā, aniccatādilakkhaṇappabhedā ca **saccapaṭiccasamuppādanayalakkhaṇappabhedā**. Paṭiccasamuppādaggahaṇeneva cettha paṭiccasamuppannadhammānampi gahaṇaṃ, tesampi attano phalaṃ pati paṭicca samuppādabhāvato.

726. **Yanti** karaṇe paccattavacanaṃ, yena ñāṇenāti atthaṃ vadanti. **Yanti** vā kiriyāparāmasanaṃ. **Khandhānaṃ samudayaṃ passati**, **khandhānaṃ nirodhaṃ passatīti** ettha yadetaṃ dassananti attho. **Yaṃ panāti** etthāpi eseva nayo. Ettha ca yathā avijjādisamudayanirodhato khandhānaṃ samudayanirodhassa aññattā “avijjāsamudayā rūpasamudayo”ti-ādi¹ vacanabhedo kato, na evaṃ nibbattivipariṇāmalakkhaṇehi khandhānaṃ udayabbayassa bhedo atthi abhinnādhikaraṇattāti “**nibbatilakkhaṇavipariṇāmalakkhaṇāni passanto khandhānaṃ udayabbayaṃ passatīti**”ti vacanabhedaṃ akatvā vuttaṃ. **Uppattikkhaṇeyeva hīti hi-saddo** hetu-attho. Yasmā uppādakkhaṇeyeva nibbatilakkhaṇaṃ, bhaṅgakkhaṇeyeva ca vipariṇāmalakkhaṇaṃ, tasmā tāni passanto khaṇato khandhānaṃ udayabbaye passati nāmāti “**yaṃ panā**”ti-ādinā vuttamevatthaṃ pākaṭaraṃ karoti.

727. **Iccassevanti** ettha **iti-saddo** hetu-attho. Yasmā “avijjā samudayā”ti-ādi paccayato khandhānaṃ udayabbayadassanaṃ, “nibbatilakkhaṇaṃ”ti-ādi khaṇato, tasmāti attho. **Assāti** yogino. **Evanti** vuttappakāraparāmasanaṃ. Ye pana “**iccassa paccayato**”ti paṭhanti, tesaṃ **itīti** vuttappakāraparāmasanaṃ. **Janakāvabodhatoti** khandhānaṃ janakassa avijjādisamudayassa avabujjhanato. **Jātidukkāvabodhatoti** jātisankhātassa dukkhassa avabujjhanato. **Dukkhasaccaṃ pākaṭaṃ hoti** ekadesadassanena

1. Khu 9. 53 piṭṭhe Paṭisambhidāmagge.

pabbatasamuddādidassanakānaṃ viya. **Marañadukkhāvabodhatoti** etthāpi eseva nayo. **“Paccayānuppādenā”**ti etena paccayānaṃ anuppādanirodho idha paccayanirodhoti dasseti. **Paccayavatanti** paccayato uppajjanakānaṃ. **Yañcassa udayabbayadassananti** yaṃ assa yogino paccayato, khaṇato ca udayabbayānaṃ dassanaṃ. Tattha asammoho, tappadhāno vā vitakkādiddhammapuñjo **maggo vāyaṃ lokikoti** niyyānānulomato lokiko maggo evāyaṃ. **Iti** tasmā **maggasaccaṃ pākaṭaṃ hoti** sabhāvāvabodhato. Tenāha **“tatra sammohavighātato”**ti, tadaṅgavasenāti attho. Atha vā yathāvutto sammādiṭṭhisāṅkhāto maggo ariyamaggassa upāyabhūto asammohasabhāvo attānampi pakāseti padīpo viyāti maggasaccaṃ pākaṭaṃ hoti. Svāyaṃ pākaṭabhāvo mohandhakāraavidhamanenāti āha **“tatra sammohavighātato”**ti.

728. “Avijjāpaccayā”ti-ādiko **anulomo paṭiccasamuppādo** pavattiyā anulomanato. “Avijjāsamudayā”ti-ādinā avijjādīsu santesūti ayamattho vuttoti āha **“imasmiṃ sati idaṃ hotīti avabodhato”**ti. Pavattiyā vilomanato “avijjāyatveva asesavirāganirodhā”ti-ādiko **paṭilomo paṭiccasamuppādo. Te ca** saṅkhatā **paṭiccasamuppannā** “jarāmarāṇaṃ bhikkhave aniccaṃ saṅkhatāṃ paṭiccasamuppannaṃ”ti-ādi¹ vacanato. Paṭiccasamuppannassa ca pākaṭatā paccayākārapākaṭatāya eva “imassetāṃ phalan”ti avabodhato.

729. Purimapurimānaṃ nirodho uttaruttarānaṃ uppādānubandhoti ayamattho paccayato udayadassanena sijjhamāno ekattanayādhigamāya hoti. Yato “añño karoti, añño paṭisaṃvedayatī”ti-ādi² vohārasiddhiyā ucchedadiṭṭhiyā anokāsātā. Tenāha **“hetuphalasambandhenā”**ti-ādi. Saṅkhārā khaṇe khaṇe uppajjantīti ayamattho khaṇato udayadassanena sijjhamāno nānattanayādhigamāya hoti. Yato paccayapaccayuppānānaṃ sabhāvabhedāvabodhato “so karoti, so paṭisaṃvedayatī”ti-ādi³ nayappavattāya sassatadiṭṭhiyā anokāsātā. Tenāha **“khaṇato udayadassanena”**ti-ādi.

1. Saṃ 1. 264 piṭṭhe.

2. Saṃ 1. 260 piṭṭhe.

3. Saṃ 1. 260 piṭṭhe.

paccayato udayabbayadassanena paccaye sati phalassa bhāvo, asati abhāvoti imassa atthassa siddhiyā atthitāmattheneva te dhammā kāraṇanti **abyāpāranayo pākaṭo hoti**. Yato attadiṭṭhiyā anokāsata vasavattitāya alabbhaneyyato. Tena vuttaṃ “**dhammānan**”ti-ādi. **Avasavattibhāvo** parāyattatā, sā ca sappaccayatāya veditabbā. **Paccayato udayadassanena** tehi tehi paccayehi ime dhammā uppajjanti, uppajjamānā ca paccayānurūpameva uppajjantīti hetuphalassa hetu-anurūpato siddhiyā akiriyadiṭṭhiyā anokāsata vāti āha “**paccayato panā**”ti-ādi. Sati kāraṇe kuto akiriyavādo. Karotīti hi **kāraṇaṃ**.

730. Paccayato udayaṃ passato paccaye sati sabhāve sati phalassa sambhavoti atthitāmatthena upakārakatāti saṅkhatānaṃ nirīhatā, asati ca abhāvoti paccayādhīnavuttitā ca viññāyamānā attasuññataṃ vibhāvetīti āha “**paccayato cassa -pa- tāvabodhato**”ti. **Aniccalakkhaṇaṃ pākaṭaṃ hoti** khaṇato udayabbayadassanena saṅkhārānaṃ udayabbayato paricchinnaṭāya viññāyamānattā. Tenāha “**hutvā abhāvāvabodhato**”ti. Uppajjitvā nirujjhanaṃhi **hutvā abhāvo**. **Pubbantāparantaviveko** atītānāgatabhāvasuññatā. Na hi saṅkhārā khaṇattayato pubbe, pacchā ca vijjanti, tasmā **pubbantāparantavivekāvabodhatoti** ādi-antavantatāpaṭivedhatoti attho. **Dukkhalakkhaṇampi pākaṭaṃ hoti** udayabbayadassanena sambandho. Uppajjitvā bhijjantā saṅkhārā uppādato uddhaṃ jarābhaṅgāvattantaruṇṇatīyā niraṇṭaraṃ vibādhiyanteva. Sā ca nesaṃ vibādhiyamānatā sammā udayabbayadassanena vibhūtā hotīti āha “**dukkha -pa- bodhato**”ti.

Sabhāvalakkhaṇampīti udayabbayadassanena na kevalaṃ aniccadukkhalakkhaṇameva, atha kho pathavīphassādīnaṃ kakkhaḷaphusaṇādisaṇṇitaṃ sabhāvasaṅkhātānaṃ lakkhaṇampi pākabhāvaviddhaṃ¹ sabhāvāvacchinnānaṃ pākaṭaṃ hoti. Tenāha “**udayabbayaparicchinnavabodhato**”ti. **Sabhāvalakkhaṇeti** sabhāvasaṇṇite lakkhaṇe, taṃtaṃdhammānaṃ salakkhaṇe. **Saṅkhatalakkhaṇassa tāvakālikattampīti** uppādādisaṅkhatalakkhaṇassa uppādakkhaṇādirittakālikatāpi

1. Pātubhāvaviddhaṃ (Syā), pākaṭabhāvaviddhaṃ (Ka)

khaṇantarānavatṭhānato tassa. Tenāha “**udayakkhaṇe**”ti-ādi.
Udayavayamattaggahaṇaṅceththa udayabbayadassanavaseneva imassa
 ñāṇassa pavattanato, na ṭhitikkhaṇassa abhāvā.

731. Na kevalaṅca niccanavā, atha kho parittakālaṭṭhāyino. Kathanti
 āha “**sūriyuggamane**”ti-ādi. Tattha udaye daḍḍena katalekhā **udake**
daḍḍarāji. Ussāvabindu-ādayo pañca kiccāpi uttaruttari
 atiparittatṭhāyibhāvadassanattamaṃ nidassitā, tathāpi te dandanirodhā eva
 nidassitā, tatopi lahutaranirodhattā saṅkhārānaṃ. Tathā hi gamanassādānaṃ
 devaputtānaṃ heṭṭhupariyāyena paṭimukhaṃ dhāvantaṇānaṃ sirasi, pāde ca
 bandhakhuradhārā sannipātato pi sīghataro rūpadhammānaṃ nirodho vutto,
 pageva arūpadhammānaṃ. Na kevalaṃ niccanavā, nāpi
 parittakālaṭṭhāyino, atha kho asārā. Kathanti āha “**māyā**”ti-ādi. Māyādayo
 hi maṇi-ādivasena dissamānā atamaṃsabhāvatāya **asārā**. Tattha
 mantosadhabhāvitā indajālādikā **māya**. Migataṅhikā **marīci**. Supinameva
supinantaṃ. Maṅḍalākārena āvijjhīyamānaṃ alātameva **alātacakkaṃ**.
 Gandhabbadevaputtānaṃ kīḷanicchāvasena nagaraṃ viya ākāse
 upaṭṭhānamattaṃ **gandhabbanagaraṃ**.

Ettāvatāti yvāyam “jātaṃ rūpaṃ paccuppannaṃ”ti-ādi¹
 pāḷinayānusārena yaṃ kiñci rūpaṃ atītānāgatapaccuppannaṃ”ti-ādi²
 pāḷinayānusārena vā yāva udayabbayapaṭivedhā bhāvanāvidhi āradhho,
 ettāvatā. Kalāpasammasanādikopi hi sabbo bhāvanāvidhi
 udayabbayañāṇuppādanasseva, na parisaparīsarīrakarabandho³ti.
Vayadhammamevāti bhijjanasabhāvameva. **Vayaṃ upeti** attano
 dhammatāya. Yaṅhi upakkameṇa vinasatīti vuccati, tampi attano
 dhammatāya eva vinasati ahetukattā vinasassa. Upakkamahetu pana
 visadisuppādo hoti. **Iminā ākārenāti** “yaṃ kiñci samudayadhammaṃ,
 sabbaṃ taṃ nirodhadhammaṃ”ti⁴ hi vuttaṃ, tasmā vayaṃ anālambitvāpi
 “vayadhammameva uppajjati”ti udayassa, “uppannaṅca idaṃ vayaṃ upeti”ti
 vayassa ca iminā yathāvuttena paccakkhakaṅkārena. Adhunā uppannaṃ,
 na tāva balappattanti āha “**taruṇavipassanāñāṇaṃ**”ti.
 Kalāpasammasanādivasena

1. Khu 9. 52 piṭṭhe Paṭisambhidāmagge.

2. Ma 1. 282, 297; Ma 2. 84; Ma 3. 67, 69; Khu 9. 51 piṭṭhādīsu.

3. Parisasarīrakarabandho (Ka)

4. Saṃ 3. 371; Vi 3. 16; Khu 9. 332 piṭṭhesu.

pavattaṃ sammasanaṃ na nippariyāyena vipassanāsamaññaṃ labhati,
 udayabbayānupassanādivasena pavattameva labhatīti āha “**yassādhighamā
 āradbhavipassakoti saṅkham gacchatī**”ti.

Vipassanupakkilesakathāvaṇṇanā

732. **Imāya** udayabbayānupassanāsaṅkhātāya **taruṇavipassanāya** vasena,
 na āradbhavipassanānaṃ bhaṅgānupassanādisaṅkhātāya taruṇavipassanāya,
 nāpi nibbidānupassanādisaṅkhātāya balavavipassanāya vasenāti attho. Na hi
 tadā vipassanupakkilesā uppajjantīti. **Āradbhavipassakassāti** ca
 āradbhavipassakassevāti evakāro luttaniddiṭṭho. Tenāha “**vipassanupakkilesā
 hī**”ti-ādi. Diṭṭhigāhādivatthubhāvena vipassanaṃ upakkilesantīti
vipassanupakkilesā. “**Ariyasāvakkassā**”ti idaṃ ukkaṭṭhaniddesena vuttaṃ
 balavavipassanāpattassāpi anuppajjanato. **Vippaṭipannakassāti** silavipatti-
 ādivasena yathā tathā vippaṭipannakassa. Tassa pana paṭipattiyā
 garahitabbataṃ dassento “**vippaṭipannakassā**”ti āha. **Ca**-saddo
 uparipadadvayepi yojetabbo. **Nikkhittakammaṭṭhānassāti** vipassanaṃ
 ārabhitvā antarā vosānaṃ āpannassa. **Kusītapuggalassāti** silāsampannasseva
 kosajjena bhāvanaṃ ananuyuñjantassa. Atha vā **vippaṭipannakassāti**
 vipassanābhāvanāsaṅkhātāya sammāpaṭipattiyā abhāvena
 vigarahitapaṭipattikassa. Vipassanāpaṭipattiyeva hi sasambhārā pubbabhāge
 sammāpaṭipatti, tadaññā vippaṭipatti, sā ca tatha nikkhittadhurassa hoti.
 Nikkhittadhuratā ca kosajjenāti vuttaṃ “**nikkhittakammaṭṭhānassa
 kusītapuggalassā**”ti. **Yuttappayuttassāti** yogena ñāṇena
 bhāvanamanuyuñjantassa. Sā pana yuttappayuttatā samathavasenāpi hotīti
 āha “**āradbhavipassakassā**”ti. **Uppajjantiyeva** na nuppajjanti aññathā
 maggāmaggañāṇasseva asambhavato.

Obhāsādīsu “ariyadhammo”ti pavattaṃ uddhaccaṃ vikkhepo
 dhammuddhaccaṃ, tena dhammuddhaccena vipassanāvīthito ukkamanena
 virūpaṃ gahitaṃ pavattitaṃ mānasaṃ **dhammuddhaccaviggahitamānasaṃ**.
Obhāso dhammoti kāraṇūpacārenāha, īdisaṃ obhāsaṃ vissajjento mama
 ariyamaggoti attho. Obhāsaṃ āvajjati “nibbānaṃ”ti vā “maggo”ti vā
 “phalan”ti vā. **Nibbānanti**

gaṇhanto tattha pavattadhamme maggaphalabhāvena gaṇhāti, ñāṇādike pana maggaphalabhāvene va gaṇhāti. **Tato vikkhepo uddhaccanti** tato obhāsahetu yo vikkhepo, taṃ uddhaccanti attho. “**Uddhaccena viggahitamānaso**”ti saṅkhepato vuttamatthaṃ vivaritaṃ “**aniccato**”ti-ādi vuttaṃ.

Tattha **anicca -pa- nappajānāti** “maggam pattaṃ”ti saññāya aniccatādivasena manasikārasseva abhāvato. Ayañca attho—

“Yo hi koci āvuso bhikkhu vā bhikkhunī vā mama santike arahattappattiṃ byākaroti, sabbo so catūhi maggehi, etesaṃ vā aññatarena. Katamehi catūhi? Idhāvuso bhikkhu samathapubbaṅgamaṃ vipassanaṃ bhāveti, tassa samathapubbaṅgamaṃ vipassanaṃ bhāvayato maggo sañjāyati, so taṃ maggaṃ āsevati bhāveti bahuḷīkaroti. Tassa taṃ maggaṃ āsevato -pa- karoto saṃyojanāni pahīyanti anusayā byantīhonti.

Puna caparaṃ āvuso bhikkhu vipassanāpubbaṅgamaṃ samathaṃ bhāveti -pa- samathavipassanaṃ yuganaddhaṃ bhāveti -pa-.

Puna caparaṃ āvuso bhikkhuno dhammuddhaccaviggahitaṃ mānasaṃ hoti, hoti so āvuso samayo yaṃ taṃ cittaṃ ajjhattameva santiṭṭhati sannisīdati ekodi hoti samādhiyati, tassa maggo sañjāyati -pa- anusayā byantīhontī”ti¹—

iminā suttapadeneva veditabbo. Ettha hi catutthamaggavissajjane yathāvuttamaggaphalanibbānadhammā **dhammo**. Tattha **uddhaccam** “adhigatamaggādikohamasmī”ti amaggādīsu vikkhepo dhammuddhaccam, tena upaddutaṃ **viggahitamānasaṃ** hoti. **Nikanti** obhāsādīsu apekkhā sukhumarūpā taṇhā, sā vipassanābhirati-ākārena upaṭṭhahantī adhimānikena “dhammo”ti gayhatīti āha “**nikanti ‘dhammo’ti nikantiṃ āvajjati**”ti.

733. **Vipassanobhāsoti** vipassanācittasamuṭṭhitaṃ, sasantatipatitaṃ utusamuṭṭhānañca bhāsuram rūpaṃ. Tattha **vipassanācittasamuṭṭhitaṃ**

1. Am 1. 475 piṭṭhe.

yogino sarīraṭṭhameva pabhassaraṃ hutvā tiṭṭhati, itaraṃ sarīraṃ muñcitvā ñāṇānubhāvānurūpaṃ samantato pattharati, taṃ tasseva paññāyati, tena phuṭṭhokāse rūpagatampi passati, passanto ca cakkhuviññāṇena passati, udāhu manoviññāṇenāti vīmaṃsitabbanti vadanti. Dibbacakkhulābhino viya taṃ manoviññāṇaviññeyyamevāti vuttaṃ viya¹ dissatīti. **Vipassanāvīthi** nāma paṭipāṭiyā pavattamānā vipassanāva. **Ukkantā nāma hoti** yoginā “maggappattomhī”ti adhimānena vissaṭṭhattā, tassa vā yogino vipassanā tato eva vīthi ukkantā nāma hoti. **Mūlakammaṭṭhānanti** vipassanamevāha.

Vemattatāyāti appavipulatāvasena visadisatāya. **Assāti** obhāsassa. Dvīhi kuṭṭehi paricchinnam geham **dvikuṭṭageham**. Tassa kira abbhantarepi ekā bhitti hoti bahipi, ubhinnaṃ antare anupariyāyapatham hoti, sāyanhe tattha santharītāni **pañcavaṇṇāni kusumāni**, visadañāṇassa obhāsena pharitaṭṭhāne rūpagatañca dibbacakkhuno viya **paññāyanti**. Tena vuttaṃ “**bhante mayhan**”ti-ādi.

Evam obhāsassa vemattatāya vatthum dassetvā cirakālavippalambane vatthum dassetuṃ “**ayaṃ panā**”ti-ādi vuttaṃ. Tattha **ayaṃ pana vipassanupakkilesoti** vakkhamānappakāraṃ sandhāyāha, na sabbaṃ. **Soti** so samathavipassanālābhī adhimāniko.

Divāsaneti divāṭṭhāne nisīditabba-āsane. Paṭhamaṃ “pañham pucchissāmi”ti cintitattā vuttaṃ “**pañham bhante pucchitum āgatomhī**”ti.

Pacchā upāyena puthujjanabhāvaṃ viññāpetvā kammaṭṭhāne niyojessāmīti cintitattā vuttaṃ “**avassayo bhavissāmiccevāham āgato**”ti, tassa ca padhānattā sāvadhāraṇam katvā vuttaṃ. **Ayaṃ dhammoti** ayaṃ ariyamaggānugato paṭisambhidādhammoti therassa ajjhāsaya vasena vadati. **Samādhinti** abhiññāsamādhim. **Añcikaṇṇoti** niccalaṭṭhapitakaṇṇapuṭo. **Palāyitum āradhho** bhayena. Tenāha “**thero kira dosacarito**”ti. Dosacaritassa hi sūrassāpi sahasā bhayaṃ uppajjati. Tenassa khīṇāsavattothero ajjhāsayaṃ ñatvā “iminā upāyena puthujjanabhāvaṃ

1. Yuttaṃ viya (Ka)

jānāpessāmī”ti hatthinimmāpanādimakāsi. Dosacaritattā hi thero khippaṃ paṭivijjhi. Khippavirāgī hi dosacarito.

734. **Tassāti** udayabbayañāṇaṃ matthakaṃ pāpentassa yogino. “Evampi rūpaṃ udeti, evampi rūpaṃ veti”ti-ādinā udayabbayānupassanamevettha tulaṇaṃ, tīraṇaṇca veditabbaṃ. Yathā devānamindena khittaṃ vajiraṃ amoghaṃ, appaṭihataṇca hoti, evamidampi ñāṇaṃ nipuṇaṃ udayabbayadassaneti vuttaṃ **“vissaṭṭha-indavajiramivā”**ti-ādi. Tattha **tikhiṇanti** akuṇṭhaṃ. **Sūranti** tejavantaṃ. **Ativisadanti** nisitabhāvena ativiya paṭutaraṃ ñāṇaṃ uppajjati. Tathā hinena yogī “maggappattosmī”ti maññati.

Vipassanāpīti vipassanācittasampayuttā pīti. Khuddakādayo pītiyo heṭṭhā vaṇṇitā eva. Yasmā udayabbayānupassanāya vīthipaṭipannāya anukkamena pañca pītiyo uppajjanti, tasmā vuttaṃ **“ayaṃ pañca -pa-uppajjati”**ti. Matthakappattena pana udayabbayañāṇena saddhim pharaṇāpītiyeva hoti. Upacārappanākkhaṇato aññadāpi hi pharaṇāpīti hotiyeva. Tenāha **“sakalasarīraṃ pūrayamānā¹ uppajjati”**ti.

Passaddhi-ādīni cha yugaḷakāni aññamaññāviyoginīti passaddhiyā uppannāya itarāpi uppannā eva hontīti kiccadassanamukhena tā sabbāpi dassento **“kāyacittānaṃ neva daratho, na gāraṇa”**ti-ādimāha. Tattha kāyaggahaṇena rūpakāyassapi gahaṇaṃ veditabbaṃ, na vedanādikkhandhattayasseva. Kāyappassaddhi-ādayo hi rūpakāyassapi darathādinimmaddikāti. **Kāyacittāni passaddhāni -pa-ujukāniyeva honti** tesā apassaddhādibhāvassa hetubhūtānaṃ uddhaccādi thinamiddhādi dīṭṭhimānādi sesanīvaraṇādi assaddhiyādi māyāsātheyyādisaṃkilesadhammānaṃ vidhamanavasena tadā vipassanācittuppādassa pavattanato. **Tasmim samayeti** tasmim udayabbayañāṇuppattisamaye. Manussānaṃ ayanti mānusi, manussayoggā kāmasukharati, tādisehi manussavisesehi anubhavitabbatānavattanato dibbā ratipi saṅgahitā, mānusiśadisatāya kāmasukhabhāvena dibbā ratipi vā, tassā atikkantatāya na mānusi **amānusi**.

1. Khobhayamānā (Ka)

Suññāgāranti yaṃ kiñci vivittaṃ senāsanāṃ, vipassanāṃ eva vā. Sāpi hi niccabhāvādisuññatāya, yogino sukhasannissayatāya ca “suññāgāran”ti vattabbataṃ labhati. Cittassa anupassanakarānaṃ kilesānaṃ viḡamena **santacittassa**. Saṃsāre bhayassa ikkhanena **bhikkhuno**. **Sammā** ñāyena rūpārūpadhammānaṃ udayabbayānupassanādivasena **vipassato**. Sammasato anāraddhavipassanānaṃ manussānaṃ avisayatāya **amānusi**.

Vipassanāpītisukhasaññitā **rati hotīti** ayamettha gāthāya saṅkhepattho. Dutiyagāthā pana udayabbayañānameva sandhāya vuttā. Tattha **yato yatoti** rūpato vā arūpato vā.

Vipassanāsukhanti vipassanācittasampayuttaṃ cetāsikasukhaṃ. Yasmā taṃsamuttāhitehi atipaṇṇitarūpehi sabbo kāyo ariphuḡo, paribrūhito ca hoti. Tasmā vuttaṃ “**sakalasarīraṃ abhisandaramānaṃ**”ti.

Adhimokkhoti saddhā, na yevāpanakādhimokkhoti adhippāyo. Sā cettha na kammaphalaṃ, ratanattayaṃ vā saddahanavasena pavattā, atha kho kilesakālussiyāpagamena sampayuttānaṃ ativiya pasannabhāvahetubhūtā. Tenāha “**vipassanāsampayuttā -pa- saddhā uppajjati**”ti.

Purimuppannabhāvanābalasaṃsiddhaṃ samappavattaṃ vīriyaṃ sampayuttadhammānaṃ saṃkilesapakkhato kosajjato paggaṇhanato **paggaho**. Tenāha “**paggahoti vīriyaṃ**”ti-ādi.

Supatṭhitāti sabhāvasallakkhaṇena ārammaṇe suṭṭhu upatṭhitā. **Supatīṭṭhitāti** paṭipakkhavigamena tena acalanīyatāya suṭṭhu patīṭṭhitā. Tato eva nikhātā viya **acalā**. Acalabhāveneva **pabbatarājasadisāti** tīhipi padehi supatīṭṭhitameva dasseti. **Soti** yogāvacarō. **Yaṃ yaṃ ṭhānanti** yaṃ yaṃ attano upatīṭṭhānaṭṭhānaṃ rūpaṃ vā arūpaṃ vā. **Okkhanditvāti** anupavisitvā. **Pakkhinditvāti** tasseva vevacanaṃ. Dibbacakkhuno paribhaṇḍabhūtassa yathākammūpagañāḇassa upatṭṭhahante paralokasaññite satte sandhāyāha “**dibbacakkhuno paraloko viyā**”ti na dibbacakkhuno paralokavisayatā. Vaṇṇāyatanavisayañhi tanti. **Assa** sati **upatṭṭhāti** khāyati, upatīṭṭhatīti vā attho. Yadaggena hi sati ārammaṇaṃ

okkhanditvā upatiṭṭhati, tadaggena ārammaṇampissa okkhanditvā upatiṭṭhatīti vuccati.

Vicinitavisayattā saṅkhārānaṃ vicinane majjhatabhāvena ṭhitā **vipassanupekkhā**. Sā pana atthato tathāpavattā tatramajjhattupekkhāva. Manodvārāvajjanacittasampayuttā cetanā āvajjane ajjupekkhanavasena pavattiyā “**āvajjanupekkhā**”ti vuttā. Udayabbayānaṃ suṭṭharam upaṭṭhānato tadanupassanāyaṃ majjhatabhūtā idha **vipassanupekkhā** nāma. Te pana udayabbayā sabbasaṅkhārānanti āha “**sabbasaṅkhāresu majjhatabhūtā**”ti. Āvajjanāya indavajiratattanārācasadisatā, sūratikkhabhāvo ca sabbaññutaññānapurecarā viya tadanucaraññassa tathābhāvena daṭṭhabbā.

Vipassanānikantīti vipassanāya nikāmanā apekkhā. Obhāsādayo vipassanāya vijambhanabhūtā tassā alaṅkāro viya hontīti āha “**obhāsādipaṭimaṇḍitāyā**”ti. **Ālayanti** apekkham. **Sukhumā, santākārā**ti sukhumākārā, santākārā ca, sā cassā sukhumasantākārātā bhāvanāya sātisayappavattiyā, yato kilesabhāvopissā duviññeyyo hoti. Tenāha “**yā nikanti kilesoti¹ -pa- hotī**”ti.

Etesupīti yathādassitesu ñāṇādīsipi. “**Aññatarasmim uppanne**”ti idaṃ uppanne aññatarasmim “**maggapattomhī**”ti-ādiggahaṇadassanattam vuttam, na aññataraññatarasseva uppajjanato. Na vāpi hi upakkilesā ekakkhaṇepi uppajjanti, paccavekkhaṇā pana visum visum hoti. “**Na vata me ito pubbe evarūpā nikanti uppannapubbā**”ti idaṃ dhammasabhāvadassanavasena vuttam, na pana tadā yogino tathācittappavattivasena. Na hi so tadā tam “**nikantī**”ti jānāti, tathā sati tabbisayassa “**maggapattomhī**”ti-ādiggahaṇassa asambhavo eva. Tasmā evamassa siyā “**na vata me evarūpā bhāvanābhirati uppannapubbā, addhā maggapattomhī**”ti.

735. **Upakkilesavattutāyā**ti nippariyāyato diṭṭhimānatanhā idha upakkilesā tesam vattutāya uppattiṭṭhānatāya. Na sabhāvatoti āha “**na akusalattā**”ti. Yathā pana obhāsādayo, evam nikantipi

1. Yā kilesoti (Syā)

diṭṭhigāhādīnaṃ ṭhānaṃ hotīti vuttaṃ **“upakkilesavatthu cā”**ti.

Vatthuvasevāti gāhe anāmasitvā gāhānaṃ vatthutāvaseneva. Attavādi hi **“ahambuddhinibandhana”**ti parikappito attā obhāsassa sāmibhūto **“mamā”**ti sāmivacanassa visayabhāvena gahitoti āha **“mama obhāso uppannoti gaṇhato hi diṭṭhigāho”**ti. Obhāsassa manāpaggahaṇamukhena tena attānaṃ seyyādito dahatīti vuttaṃ **“manāpo vata obhāso uppannoti gaṇhato mānagāho”**ti. **Assādayatoti** sampiyāyato. **Tesanti** diṭṭhigāhādīsaññitānaṃ upakkilesānaṃ vasena. **Obhāsādīsūti** obhāsādinimittānaṃ. Kammanānaṃ yathāraddhavipassanāya aṭṭhatvā vikkhepāpatti, sā ca obhāsādīsu taṇhādīgāhoti dassento **“obhāsādīsu kampati -pa- samanupassati”**ti āha.

Obhāsanimittānaṃ cittaṃ vikampatīti sambandho. Obhāse vā visayabhūte upakkileshehi cittaṃ vikampatīti yojanā. Tenāha **“yehi cittaṃ pavedhati”**ti. Seseupi eseva nayo. **Upaṭṭhāneti** satiyānaṃ. **Upekkhāya cāti** vipassanupekkhāya ca.

Maggāmaggavavatthānakathāvaṇṇanā

736. **Kusalo panāti**-ādīsu kammaṭṭhānakosallayogena **kusalo**. Paripakkañāṇatāya **paṇḍito**. Āgamabyattiyā **byatto**. Upakkilesatabbisodhanesu ādinavānisamsāvabodhayogato **buddhisampanno**. **Ayaṃ kho so**¹ti yo so ācariyena kammaṭṭhānadānakāle udayabbayañāṇupattisamaye uppajjatīti vutto, ayaṃ kho so obhāso uppannoti upakkilesavatthubhāvavavatthānaṃ dassetvā idānissa vipassanāya visayabhāvūpanayanavidhiṃ dassento **“so kho panā”**ti-ādīmāha. Tattha paṭṭhamanaye aniccalakkhaṇavibhāvanameva dassitaṃ, tasmim̐ siddhe itarampi lakkhaṇadvayaṃ siddhameva hoti. Dutīyanaye pana obhāsādīke nissāya uppajjanakadiṭṭhigāhādīnaṃ ugghāṭanasamugghāṭanapariyādānavasena manasikāraavidhiṃ dassetuṃ **“sace obhāso attā bhaveyyā”**ti-ādi vuttaṃ. Arūpasattake **“sace saṅkhārā attā**

1. Ayaṃ kho (Ka)

bhaveyyun”ti-ādi¹ sabbasaṅkhārasaṅgaṇhanavasena sāmaññato vuttaṃ, idha obhāsādivasena saṅkhāre vibhajja vuttaṃ. Seso manasikāraavidhi tattha vuttanayovāti āha “**sabbaṃ arūpasattake vuttanayena vitthāretabban**”ti.

Obhāsaṃ “netam mamā”ti samanupassanto taṇhāgāhato cittaṃ visodheti, “nesohamasmi”ti samanupassanto mānagāhato, “na meso attā”ti samanupassanto diṭṭhigāhato. Tenāha “**obhāsaṃ netam mamā**”ti-ādi. Esa nayo ñāṇādīsipi.

Imāni dasa ṭhānānīti imāni yathāvuttāni obhāsādīni dasa upakkilesakāraṇāni. **Paññā yassa pariccitāti** yassa yogino paññā obhāsādīsu aniccatādiggahaṇavasena paricitavati² pariggahetvā upaparikkhitvā ṭhitā. Dhammuddhaccassa samaggabhāvaajānanena **dhammuddhaccakusalo hoti**.

Vīthiṭṭhapaṇṇanti udayabbayānupassanāvasena vipassanāvīthiṭṭhapaṇṇam.

Diṭṭhivisuddhiyanti diṭṭhivisuddhiyaṃ adhiyatāyaṃ, diṭṭhivisuddhiñāṇena vā diṭṭhiyā visodhane dukkhasaccassa vavatthānam kataṃ hoti dukkhasaccapariyāpannassa nāmarūpassa vavatthānato. Nāmarūpassa paccayā nāmarūpasamudayaṭṭhivāti āha “**kaṅkhā -pasamudayasaccassa vavatthānam katan**”ti. Abhidhammanayena hi sabbakilesā, kammaṅca samudayasaccam. **Imissanti** imāyaṃ. **Sammāti** aviparītam. **Maggassāti** ariyamaggassa upāyabhūtamaggassa.

Maggāmaggañāṇadassanavisuddhiniddesavaṇṇanā niṭṭhitā.

Iti vīsatiṃparicchedavaṇṇanā.

1. Visuddhi 2. 263 piṭṭhe.

2. Paricitavatiṃ (Ka)

puna paṭisaṅkhānākārena pavattaṃ nāṇaṃ **paṭisaṅkhānupassanāñāṇaṃ**. Nirapekkhatāya saṅkhārānaṃ upekkhanavasena pavattañāṇaṃ **saṅkhārupekkhāñāṇaṃ**. **Tasmā**ti yasmā upakkilesavimuttaṃ udayabbayañāṇādinavavidhañāṇaṃ paṭipadāñāṇadassanavisuddhi, tasmā.

738. “**Upakkilesavimuttan**”ti visesanena vibhāvitamatthaṃ anavabujjhanto codako “**puna udayabbayañāṇe yogo kimatthiyo**”ti pucchati¹. Tattha **kimatthiyoti** kiṃ payojano niraṭṭhako, pageva nibbattitattā pakkassa pacanaṃ viyāti adhippāyo. Atha vā lakkhaṇasallakkhaṇādīhetupaṭipāṭiggahaṇavasena tamatthaṃ nāpetukāmo ācariyova kathetukamyatāvasena “**kimatthiyo**”ti pucchati¹. **Lakkhaṇasallakkhaṇatthoti** aniccādilakkhaṇānaṃ sammadeva upadhāraṇattho. Tattha kāraṇaṃ dassento “**udayabbayañāṇaṃ hī**”ti-ādimāha. Nanu ca udayabbayañāṇaṃ nāma saṅkhārānaṃ udayabbayameva passati, na aniccādilakkhaṇattayaṃ, tena kathaṃ aniccādilakkhaṇattayasallakkhaṇaṃ hotīti? Na kho panetaṃ evaṃ daṭṭhabbaṃ “udayabbayañāṇaṃ lakkhaṇattayavisayaṃ hotī”ti. Udayabbaye pana paṭividdhe aniccalakkhaṇaṃ pākaṭaṃ hutvā upaṭṭhāti. Tato “yadaniccaṃ, taṃ dukkhaṃ. Yaṃ dukkhaṃ, tadanattā”ti² itaralakkhaṇampi. Atha vā udayabbayaggahaṇena hutvā abhāvākāro, abhiṇhasampañipīlanākāro, avasavattanākāro ca vibhūtataro hotīti kāraṇabhāvena udayabbayañāṇe yogassa lakkhaṇattayasallakkhaṇatthā veditabbā, na sammukheneva. **Heṭṭhāti** maggāmaggañāṇadassanavisuddhito heṭṭhā. Tañhi obhāsādi-uppattihetutāya tikkhaṃ visadaṃ hutvā pavattampi diṭṭhi-ādihi upakkiliṭṭhattā kuṇṭhaṃ avisadameva jātaṃ. Tenāha “**dasahi -pa-nāsakkhī**”ti.

739. **Amanasikārāti** hetumhi nissakkavacanaṃ. “**Kissa amanasikārā**”ti hi idaṃ “kena paṭicchannattā”ti pucchitassa paṭicchādakassa hetupucchā. Santatiyā hissa paṭicchannattā aniccalakkhaṇaṃ na upaṭṭhāti, sā ca santati udayabbayāmanasikārena paṭicchādikā jātā. Iriyāpathehi paṭicchannattā dukkhalakkhaṇaṃ na upaṭṭhāti, te ca iriyāpathā abhiṇhasampañipīlanāmanasikārena paṭicchādakā jātā. Ghanena paṭicchannattā

1. Pucchi (Syā)

2. Sam 2. 19, 37, 68, 69, 236, 237; Khu 9, 295 piṭṭhesu.

anattalakkhaṇaṃ na upaṭṭhāti, te ca ghanā
 nānādhātuvinibbhogāmanasikārena paṭicchādakā jātāti. Udayabbayaṃ
 passato na udayāvattā vayāvattam pāpuṇāti, vayāvattā vā udayāvattam.
 Añño udayakkhaṇo, añño vayakkhaṇoti ekopi dhammo khaṇavasena
 bhedato upaṭṭhāti, pageva atītādikoti āha “**udayabbayaṃ pana -pa-
 upaṭṭhāti**”ti. Tattha **santatiyā vikopitāyāti** pubbāpariyena pavattamānānaṃ
 dhammānaṃ aññoññabhāvasallakkhaṇena santatiyā ugghāṭitāya. Na hi
 sammadeva udayabbayaṃ sallakkhentassa dhammā sambandhabhāvena
 upaṭṭhahanti, atha kho ayosalākā viya asambandhabhāvenāti suṭṭhutam
 aniccalakkhaṇaṃ pākaṭam hoti.

Abhiṇhasampaṭipīlanam manasi katvāti yathāpariggahita-
 udayabbayavasena saṅkhārānaṃ nirantaram paṭipīliyamānataṃ
 vibādhiyamānataṃ manasi karitvā. **Iriyāpathe ugghāṭiteti** iriyāpathe
 labbhamānadukkhapaṭicchādakabhāve ugghāṭite. Ekasmiñhi iriyāpathe
 uppanassa dukkhassa vinodakam iriyāpathantaram tassa paṭicchādakam
 viya hoti, evam sesāpīti iriyāpathānaṃ taṃtaṃdukkhapaṭicchādakabhāve
 yāthāvato ñāte tesam dukkhapaṭicchādakabhāvo ugghāṭito nāma hoti
 saṅkhārānaṃ nirantaram dukkhābhittunnatāya pākaṭabhāvato. Tenāha
 “**dukkhalakkhaṇam yāthāvasarasato upaṭṭhāti**”ti. **Nānādhātuyoti** nānāvidhā
 pathavī-ādihātuyo nānāvidhe sabhāvadhamme. **Vinibbhujitvāti** “aññā
 pathavīdhātu, aññā āpodhātu”ti-ādinā, “añño phasso, aññā vedanā”ti-ādinā
 ca visum visum katvā. **Ghanavinibbhoge kateti** samūhaghane,
 kiccārammaṇaghane ca pabhedite. Yā hesā aññamaññūpatthaddhesu
 samuditesu rūpārūpadhammesu ekattābhinivesavasena
 aparimadditasāṅkhārehi gayhamānaṃ **samūhaghanatā**, tathā tesam tesam
 dhammānaṃ kiccabhedassa satipi paṭiniyatabhāve ekato gayhamānā
kiccaghanatā, tathā sārammaṇadhammānaṃ satipi ārammaṇakaraṇabhede
 ekato gayhamānā **ārammaṇaghanatā** ca, tā dhātūsu ñāṇena vinibbhujitvā
 dissamānā hatthena parimajjiyamāno pheṇapiṇḍo viya vilayaṃ gacchanti,
 “yathāpaccayaṃ pavattamānā suññā ete dhammā dhammamattā”ti
 anattalakkhaṇaṃ pākaṭataram hoti. Tena vuttam “**nānādhātuyo -pa-
 upaṭṭhāti**”ti.

740. Dhuvabhāvapaṭikkhepato na niccanti **aniccam**, khandhapañcakam. Yathāha “rūpaṃ kho rādha aniccam, vedanā. Saññā. Saṅkhārā. Viññāṇaṃ aniccan”¹. Tattha kāraṇaṃ vadanto “**uppādavayaññathattabhāvā**”²ti āha. **Uppādo** nibbattilakkhaṇaṃ, **vayo** vipariṇāmalakkhaṇaṃ, **aññathattam** jarā, tesam sabbhāvatoti attho. **Hutvā abhāvatoti** uppajjivā vinassanato. Ettha ca purimena jātijarāmaraṇasabbhāvato **aniccanti** dasseti, dutiyena pākabhāvaviddhamāṣabhāvato. Yassa bhāvena khandhapañcakam “aniccan”²ti vuccati, tam aniccalakkhaṇanti dassetum “**uppādavayaññathattan**”²ti-ādi vuttam. Tena hi tam “aniccan”²ti lakkhīyati. **Ākāravikāro**ti ākāravikati. Abhāvākāro hi vikatirūpena labbhati, virūpattā na uppādākāro. **Ākāravikāro**ti vā ākāraviseso. Hutvā abhāvo hi pākabhāvato bhinno viddhamāṣabhāvattā tattha ca aniccalakkhaṇaṃ niruḷham. Aniccākāro hi dukkhānattākārehi viya uppādākārato ca viṣiṭṭho. Tathā hi saddassa viddhamāṣabhāvo saṅkhatabhāvenapi sādhiyati.

Saṅkhatabhāvo ca atthato uppādavantatā. **Uppādo** ca pākabhāvasādhitā dharamānāvattā. Iminā nayena dukkhānattalakkhaṇāni veditabbāni. Apica yathā niccapaṭikkhepato aniccanti niccākārapaṭikkhepato yathāvutto abhāvākārasaṅkhāto aniccākāro **aniccalakkhaṇam**, evaṃ sukhapaṭikkhepato dukkhanti sukhākārapaṭikkhepato abhiṇhapaṭipīlanākārasaṅkhāto dukkhākāro **dukkhalakkhaṇam**, tathā attapaṭikkhepato anattāti attākārapaṭikkhepato avasavattanākārasaṅkhāto anattākāro **anattalakkhaṇanti** daṭṭhabbāni. Te yime² tayopi ākārā asabhāvadhammattā khandhāpariyāpannā na honti. Khandhehi vinā anupalabbhanīyato khandhavinimuttāpi na honti. Khandhe pana upādāya vohārasena labbhamānā tadādīnavavibhāvanāya visesakāraṇabhūtā tājāpaññattivisesāti veditabbā.

Tayidaṃ sabbampīti yathāvuttalakkhaṇattayañceva lakkhitabbañca khandhapañcakam. “**Udayabbayānupassanāññāṇena yāthāvasarasato sallakkheti**”²ti idaṃ tadatthe tabbohārasena vuttam. Udayabbayaññāṇatthañhi lakkhaṇārammaṇikavipassanā “udayabbayaññāṇaṃ”²ti kathitā. Na hi udayabbayaññāṇaṃ

1. Saṃ 2. 159 piṭṭhe.

2. Ime (Syā)

dukkhalakkhaṇādivisayaṃ. Tabbisayatte vā udayabbayañāṇameva na siyā, udayabbayañāṇaṃ pana tikkhaṃ, visadañca kātukāmena lakkhaṇattayatīraṇameva kātabbāṃ. Parikammasadisañhetāṃ tassa. Esa nayo sesañāṇesupīti.

Bhaṅgānupassanāñāṇakathāvaṇṇanā

741. **Vahatīti** pavattati. Ñāṇassa tikkhabhāvo bhāvanāya paṇḍabhāvena. Paṇḍa ca bhāvanā vikkhepābhāvato ārammaṇe appitā viya pavattatīti ñāṇassa tikkhabhāvena saṅkhārānaṃ lahu-upaṭṭhānatā dassitā. **Saṅkhāresu** pana udayabbayavasena **lahuṃ lahuṃ upaṭṭhahantesu** udayadassanañca “uppādavato vināso”ti yāvadeva vayadassanatthaṃ tassa nibbidāvahattāti vaye evassa ābhogasamannāhāro manasikāro pavattati, tena uppādādiṃ muñcitvā vayamevārabba ñāṇaṃ uppajjati. Tena vuttam “**uppādaṃ vā**”ti-ādi. Tattha **uppādanti** nibbattivikāraṃ. **Ṭhitinti** ṭhitippattaṃ, jaranti attho. **Pavattanti** upādinnakappavattaṃ. **Nimittanti** saṅkhāranimittaṃ. Yaṃ saṅkhārānaṃ samudayādighanavasena, sakiccaparicchadatāya ca saviggahānaṃ viya upaṭṭhānaṃ, taṃ saṅkhāranimittaṃ. Keci pana “**pavattaṃ** nāma saṅkhārānaṃ avicchadena pavattanaṃ uppādova, **nimittaṃ** nāma uppannānaṃ vijjamānatā ṭhānaparamparā, tasmā uppādameva gaṇhāti ce, pavattaṃ gaṇhāti nāma. Ṭhitimyeva gaṇhāti ce, nimittaṃ gaṇhāti nāmā”ti vadanti, taṃ “**uppādaṃ vā**”ti-ādivacanena virujjhati. Na hi asati bhede vikappo yutto. **Na sampāpuṇāti** aggahaṇato. Kiṃ pana sampāpuṇatīti āha “**khaya -pa- santiṭṭhati**”ti. Tattha **nirodhasaddo** anuppādepi dissatīti bhedasaddena visesitaṃ, **bhedasaddo** visesavācakopi hotīti vayasaddena visesitaṃ, sopi anirodhavācakopi atthīti khayasaddena visesitaṃ, khayavayabhedasaṅkhāte khaṇikanirodheti attho. **Sati santiṭṭhatīti** satisīsenā ñāṇamāha. **Etasmim ṭhāneti** upakkilesavinimuttassa udayabbayañāṇassa tikkhabhāvāpattiyāṃ vuttanayena udayampi muñcitvā vayasaveva manasikārakāle.

Ārammaṇapaṭisaṅkhāti rūpavedanādi-ārammaṇaṃ khayavayavaseneva paṭisaṅkhāya. Ya-kāralopena hi niddeso “sayāṃ abhiññā”ti-ādīsu¹ viya.

1. Dī 1. 11, 166 piṭṭhesu.

Yathāvuttassa vā ārammaṇassa khayavayabhedavasena paṭisaṅkhā
ārammaṇapaṭisaṅkhā. Bhaṅgānupassaneti yo tadārammaṇassa cittassa
 bhaṅgo, tassa anupassane. **Paññāti** pakārato jānanā. Yam panettha
 vattabban, tam idāneva samvaṇṇiyati.

742. **Yam kiñci ārammaṇanti** rūpaṃ yāva jarāmaraṇanti
 vipassitabbabhāvena gahitaṃ sabbaṃ saṅkhāragatamāha. Paṭisaṅkhānaṃ
 nāma jānanaṃ, tañca bhaṅgānupassanāya adhippetattā bhaṅgato
 dassanamevāti āha “**jānitvā khayato vayato disvāti attho**”ti. Tassa ñāṇassāti
 sambandho.

Rūpārammaṇameva **rūpārammaṇatā** yathā “devo eva devatā”ti
 imamatthaṃ dassetuṃ “**rūpārammaṇaṃ cittaṃ**”ti vuttaṃ. **Rūpārammaṇatāti**
 vā bhummatthe paccattavacananti dassento “**atha vā rūpārammaṇabhāve**”ti
 āha. **Aparena cittena bhaṅgaṃ anupassatīti** vipassanāvisayaṃ
 bhaṅgānupassanamāha. Evañhi bhaṅgānupassanā paguṇā hoti,
 ārammaṇañcassa vibhūtataraṃ hutvā upaṭṭhāti. **Ñātanti** ārammaṇamāha
 anupassanāvasena ñātattā. **Ñāṇanti** anupassanāñāṇaṃ. **Ubhopi vipassatīti**
 tadubhayampi khayato vayato vipassatīti. Ayam hettha saṅkhepattho—
 rūpassa yāva jarāmaraṇassa khayato vayato dassanaṃ
 ārammaṇapaṭisaṅkhātaṃ, dassanakañāṇassa khayato vayato dassanaṃ
 ārammaṇapaṭisaṅkhāya bhaṅgassa anupassananti ubhayattha paññā.
 Purimaṃ vā tadabhāve abhāvato pacchimāyaṃ pakkhipitvā pacchimā eva
 paññā vipassane ñāṇanti.

Etthāti “tassa cittassa -pa- bhaṅgaṃ anupassatī”ti ettha. **Anekehi**
ākārehīti aniccato anupassanādīhi anekehi ākārehi. **Anu-saddo** “bhiyyo”ti
 etasmim attheti āha “**punappunam passatī**”ti.

Idha saṅkhatadhammo nāma jātijarāmaraṇapakatiko, tassa jāti ādikoṭi,
 jarā majjhimakoṭi, maraṇaṃ osānakoṭi. Tattha kiñcāpi uppādāditividhampi
 saṅkhatalakkhaṇatāya aniccalakkhaṇaṃ, tathāpi jātijarāsu diṭṭhāsu na tathā
 aniccalakkhaṇaṃ pākātaṃ hutvā upaṭṭhāti yathā vayakkhaṇeti āha “**bhaṅgo**
nāma aniccatāya paramā koṭī”ti, uttamā

koṭi pariyosānakoṭīti attho. Yathā hi jarādhammaṃ, maraṇadhammeva ca jāyatīti **jāti** aniccatāya ādi koṭi, tathā jātidhammaṃ, maraṇadhammeva ca jīratīti **jarā** majjhimā koṭi, jātidhammaṃ, jarādhammeva ca bhijjatīti **bhaṅgo** paramā koṭīti. **Aniccato anupassatīti** na kalāpato sammasanto viya “aniccaṃ khayatṭhena”¹ti anumānavasena, nāpi āraddhavipassako viya udayaggahaṇapubbakavayadassanavasena, atha kho udayabbayañāṇanubhāvena paccakkhato upaṭṭhitesu udayavayesu vuttanayena udayaṃ muñcitvā bhaṅgadassanavaseneva aniccato anupassati, evaṃ anupassato panassa niccagāhassa lesopi natthīti āha “**no niccato**”ti. Tathā hesa niccasaññaṃ pajahatīti vuccati. Ettha ca “aniccato eva anupassatī”ti evakāro luttaniddiṭṭhoti tena nivattitamatthaṃ dassetuṃ “**no niccato**”ti vuttaṃ. Na cettha dukkhato anupassanādinivattanamāsaṅkhitabbaṃ paṭiyogīnivattanaparattā, eva-kārassa upari desanāruḷhattā ca tāsāṃ. **Dukkhato anupassatīti**-ādīsupi eseva nayo.

Aniccato tāva anupassanā bhaṅgānupassakassa yuttā “bhaṅgo nāma aniccatāya paramā koṭī”ti, dukkhādito pana kathanti āha “**aniccassa dukkhattā**”ti-ādi. Etena yaṃ aniccaṃ, taṃ ekantato dukkhaṃ anattā, tato ca na abhinandaniyādirūpaṃ. Tasmā upari nibbattetabbato ñāṇaparikkamatthañca itarāsampi channaṃ anupassanānaṃ vasena anupassatīti dasseti. Keci panettha “**aniccato anupassati, no niccatoti**-ādinā visuṃ dassanakiccaṃ natthi, bhaṅgadassaneneva sabbaṃ diṭṭhaṃ hotī”ti vadanti, taṃ bhaṅgānupassanāya matthakappattiyāṃ yuttaṃ, tato pana pubbabhāge anekākāravokārā anupassanā icchitabbāva. Aññathā “aniccato anupassatī”ti-ādika² pāḷi, “anekehi ākārehi punappunaṃ passatī”ti āgatā tassā aṭṭhakathā ca virodhitā siyā. **Tadeva** aniccato diṭṭhameva sabbasaṅkhāragataṃ.

Na taṃ abhinanditabbanti taṃ saṅkhāragataṃ taṇhādīṭṭhābhinandanavasena “etaṃ mama, eso me attā”ti na abhinanditabbāṃ. **Na tatha rañjītabbanti** tatha saṅkhāragate rañjanavasena na pavattitabbāṃ, kāmarāgo, bhavarāgo vā na

1. Khu 9. 51 piṭṭhe Paṭisambhidāmagge.

2. Khu 9. 55 piṭṭhe Paṭisambhidāmagge.

pavattetabboti attho. **Rāgaṃ nirodhetī**ti rāgaṃ vikkhambhananirodhaṃ pāpeti, vikkhambhetīti attho. Tenāha “**lokikeneva tāva nāṇenā**”ti. Sati ca vikkhambhane kathaṃ samudayoti āha “**no samudeti, samudayaṃ na karotī**”ti.

Evam virattoti evaṃ bhaṅgānupassanānusārena viratto. Yathā diṭṭhaṃ sampati upaṭṭhitaṃ saṅkhāragataṃ nirodheti nirodhaṃ manasi karoti, adiṭṭhampi atītānāgataṃ anvayañāṇavasena yathā idaṃ etarahi, evaṃ itarepīti anuminanto nirodheti manasikatassāpi nirodhaṃ karoti. **No samudetīti** etthāpi eseva nayo, no samudayaṃ manasi karotīti attho.

Evam paṭipannoti evaṃ vuttappakārena aniccānupassanādivasena paṭipanno. **Saddhiṃ khandhābhisaṅkhārehi kilesānaṃ pariccajanatoti** khandhehi, abhisaṅkhārehi ca saha kilesānaṃ pajahanato. Kilese hi pajahanto tannimittakakammaṃ, tato nibbattanake khandhe ca pajahati nāma. **Saṅkhatadosadassanenāti** saṅkhatadhammesu aniccadukkhatādi-ādīnavadassanena. **Tabbiparītetī** niccasukhādisabhāve. **Tanninnatāyāti** tadadhimuttatāya. **Paṭinissaggasaddo** pariccāgattho, pakkhandanattho cāti paṭinissaggassa duvidhatā vuttā. Tattha **pakkhandanaṃ** adhimuccanaṃ. **Yathāvuttenāti** tadaṅgādippahānappakārena, tanninnappakārena ca. **Nibbattanavasenaṃ**ti uppādanavasena. Nibbattento hi kilese ādiyatīti te anibbattento kilese na ādiyati nāma. **Adosadassitāvaseṇāti** dosānaṃ adassāvibhāvena. Saṅkhatārammaṇaṃ ādiyatīti yojanā. Anādīnavadassitāya hi saṅkhāre ādiyatīti ādīnavadassitāya te na ādiyati na gaṇhāti.

743. **Assāti** yogino. **Tehi nāṇehīti** aniccānupassanādiñāṇehi. **Tanti** pahānaṃ. **Niccasaññanti** niccagāhaṃ, saññāsīsena niddeso. **Sukhasaññaṃ attasaññanti** etthāpi eseva nayo. **Sappītikaṃ taṇhanti** sa-uppilāvitaṃ abhipatthanaṃ.

744. “**Vatthusāṅkamaṇā**”ti ettha vipassanāya pavattiṭṭhānabhāvato rūpādi-ārammaṇaṃ “vatthū”ti adhippetanti dassento “**rūpassā**”ti-ādīmāha. Tattha **saṅkamaṇāti** vipassanābhāvasāmaññato ekattanayena

vuttaṃ, aññathā aññadeva rūpabhaṅgavisayaṃ ñāṇaṃ, aññadeva tadārammaṇacittabhaṅgavisayanti kuto saṅkamanā. Paññāvivaṭṭanāyapi eseva nayo. **Paññāyāti** udayabbayadassanavasena pavattamānāya vipassanāpaññāya. Vayasseva gahaṇavasena udayato vinivaṭṭanā. Tenāha “**udayaṃ pahāya vaye santiṭṭhanā**”ti. “**Anantarameva āvajjanasamatthatā**”ti iminā bhaṅgānupassanāya paguṇabalavabhāvamāha.

745. **Ubhoti** diṭṭhādīṭṭhabhāvena dvepi ārammaṇāni. **Ekavavatthanāti** khaṇabhaṅguratāya samānāti vavatthāpanā.

Sarṇivijjamānamhīti paccakkhato upalabbhamāne paccuppanne. **Visuddhadassanoti** bhaṅgadassanassa paribandhavidhamanena visuddhañño, suvisuddhabhaṅgadassanoti attho. **Tadanvayaṃ netīti** tassa paccuppannasāṅkhārabhaṅgadassino ñāṇassa anvayaṃ anugatabhūtaṃ ñāṇaṃ pavatteti. Kattha pana pavatteti āha “**atītanāgate**”ti, atīte anāgate ca saṅkhārate. **Sabbepīti**-ādi tassa pavattanākāradassanaṃ.

Bhaṅgasāṅkhāte nirodhe, na nibbānasāṅkhātetī adhippāyo. **Esāti** yā ārammaṇanvayena ubho diṭṭhādīṭṭhe khaṇabhaṅguratāya ekabhāvena vavatthāpanā, esā vayalakkhaṇe vipariṇāmalakkhaṇe **vipassanā** bhaṅgānupassanāti attho.

746. **Ārammaṇaṅca paṭisaṅkhāti**-ādi bhaṅgānupassanāya duppaṭivijjhantā vuttassevatthassa daḷhīkaraṇaṃ. Tayidaṃ bhaṅgadassanaṃ saṅkhārānaṃ avasavattanāvabodhanena anattalakkhaṇapaṭivedhāyāti taṃ dassento “**suññato ca upaṭṭhānan**”ti āha. Ārammaṇassa, hi bhaṅgārammaṇacittassa ca bhaṅgamanupassato visesato saṅkhārā suññā hutvā upaṭṭhahanti. Tenāha “**tassevan**”ti-ādi.

Na catthi aññoti ettha imasmim loke añño khandhavinimutto attā nāma koci natthi. **Tesaṃ khayāṃ passatīti** tesaṃ dhammānaṃ khaṇe khaṇe upaṭṭhahantaṃ bhaṅgaṃ passati. Yathāvuttāya appamādapapaṭṭiyā **appamatto**. Yathā kim? **Maṇim va vijjhaṃ vajirena yoniso** yathā nāma kusalo puriso upāyena maṇim vijjhanto maṇissa chiddameva passati manasi

karoti, na maṇissa vaṇṇādīṃ, evameva saṅkhārānaṃ nirantaraṃ bhaṅgameva yoniso manasi karoti, na saṅkhāreti adhippāyo. Yathā vā vajirena maṇiṃ vijjhantassa viddhaṭṭhānaṃ na puna ruhati, evaṃ vajirasadisena bhaṅgānupassanāñāṇena bhaṅge diṭṭhe na puna niccagāho ruhati, evaṃ bhaṅgameva passatīti attho.

Yā ca ārammaṇapaṭisaṅkhāti “rūpārammaṇatā cittaṃ uppajjitvā bhijjati, taṃ ārammaṇaṃ paṭisaṅkhā”¹ti¹ evamāgatā yā ca ārammaṇapaṭisaṅkhā, “tassa cittaṃ bhaṅgaṃ anupassatī”ti evaṃ vuttā **yā ca bhaṅgānupassanā**, “saṅkhārāva bhijjanti, tesāṃ bhedo maraṇaṃ, na añño koci atthī”ti evaṃ vuttaṃ **yañca suññato upaṭṭhānaṃ**, ayaṃ evaṃ tidhā vuttāpi **adhipaññāvipassanā nāmāti** attho.

747. **Aniccānupassanādīsūti** aniccadukkhānattānupassanāsu. **Nibbidādīsūti** nibbidāvirāganirodhapaṭinissaggānupassanāsu. **Tayo upaṭṭhāneti** aniccādivasena tividhe upaṭṭhāne. Khayato vayato upaṭṭhānañhi aniccato upaṭṭhānaṃ, bhayato upaṭṭhānaṃ dukkhato, suññato upaṭṭhānaṃ anattatoti. **Diṭṭhīsūti** diṭṭhinimittaṃ **na vedhati**. Tā hi asaṃhīratāya na calati.

748. **Dubbalabhājanassa viyāti** tinta-āmamattikābhājanassa viya bhedameva passatīti sambandho. Ettha ca **dubbalabhājanūpamā** sarasabhiduratādassanattamaṃ, **vippakiriyamānasukhumarajūpamā** aññamañña asambandhatādassanattamaṃ, **bhijjiyamānatilūpamā** khaṇe khaṇe bhijjanakabhāvadassanattanti daṭṭhabbā. **Bhedamevāti** vināsameva **passati** uppādādīnaṃ aggahaṇato. **Evamevāti** yathā udakabubbulaṅkāni udakatalādipaccayaṃ paṭicca uppannāni na ciraṭṭhitikāni sīghaṃ sīghaṃ bhijjanti, evameva sabbe rūpārūpadhammā kammādipaccayaṃ paṭicca uppannā khaṇaṭṭhitikā sīghaṃ sīghaṃ bhijjantīti bhedameva passati. Turitaturitañhi nesaṃ bhedadassanattamaṃ **“bhijjanti bhijjanti”**ti āmeḍitavacanaṃ.

Marīcipi ittarakālikāva, nissayapabandhavasena, pana ciratarupaṭṭhānanti **“yathā passe marīcikan”**ti vuttaṃ, na ayāthāvupaṭṭhānatova. **Lokanti** khandhalokaṃ. **Maccurājā na passati** arahattādhigamena punabbhavābhāvato.

1. Khu 9. 55 piṭṭhe Paṭisambhidāmagge.

749. **Bhavadiṭṭhippahānanti** sassatadiṭṭhiyā vikkhambhanam. Na hi nirantaram bhaṅgameva passato sassatadiṭṭhiyā avasaro atthi. Tato evam jīvite nirālayattā **jīvanikantipariccāgo**. **Sadāti** sabbakālam rattindivam. Bhāvanāya **yuttappayuttatā**. Icchācārānam dūrībhāvato **visuddhājīvitā**. **Ussukkappahānam** kiccākicesu abyāvaṭatā tibbasamvegattā. **Vigatabhayatā** kutocipi nibbhayatā attasinehābhāvato. **Khantisoraccapaṭilābho** aniccatāya sudiṭṭhattā. Pantasenāsanesu adhikusalesu ca aratiyā, kāmaguṇesu ratiyā ca sahanato abhibhavanato **aratiratisahanatā**.

Imāni aṭṭhaguṇamuttamānīti liṅgavipallāsena vuttam. **Ma-kāro** ca padasandhikaro, bhavadiṭṭhippahānādike ime aṭṭha uttamānisamseti attho. **Ahinti** tattha bhaṅgānupassanāyanti attho.

Bhaṅgānupassanāññānam niṭṭhitam.

Bhayatupaṭṭhānaññānakathāvaṇṇanā

750. **Sabbasaṅkhārānanti** tebhūmakānam sabbasaṅkhārānam. Adhikāravasena hi padesasabbavisayo idha **sabbasaddo**. **Āsevantassāti** ādaravasena sevantassa pavattentassa. **Bhāventassāti** vaddhentassa brūhentassa. **Bahulīkarontassāti** punappunam karontassa yuñjantassa. **Pabhedakāti** khaṇe khaṇe bhijjanavasena pabhedakā. Ājīvikā byādhi-ādinimittam maritukāmassa, amaritukāmassāpi sūrassa bhāyitabbampi na bhayato upaṭṭhātīti “**sukhena jīvitukāmassa bhīrukapurisassā**”ti vuttam. Yathā bhīrukajātikassa sīhādayo santāsanimittam bhayānakabhāvato, tathā yogino bhaṅgato dissamānā saṅkhārāti āha “**sīha -pa- upaṭṭhahantī**”ti. **Paccuppannāti** addhāpaccuppannā oḷārikā dīghatarapabandhā, khaṇapaccuppannā sukhumatarā ittarakālā, santatipaccuppannā majjhimā idha ādīto pariggahetabbā. Bhayato bhāyitabbato upaṭṭhanakesu **ññānam bhayatupaṭṭhānaññānam**.

Yathā itthiyā puttānaṃ sīsassa chinnatā chijjamānatā gayhamānā bhayāvahā, evaṃ yogino tiyaddhagatānaṃ saṅkhārānaṃ nirodhā gayhamānāti imamatthaṃ dassetuṃ “**ekissā kira itthiyā**”ti-ādi vuttaṃ.

Yathā pūtibhūtaṃ odanādi na sabhāvena tiṭṭhati vinassati, evaṃ yassā itthiyā vijātavijātā puttā na jīvanti maranti eva, sā “**pūtipajā**”ti vuttā.

Pūtipajāggahaṇaṅcettha visesato gabbhagatamaraṇacintādassanena yogino anāgatasāṅkhāranirodhasanniṭṭhānadassanattamaṃ.

Atītapaccuppannasāṅkhāranirodho hissa supākaḷo evāti na so upamāya sādhetabbo. Antimabhavikassa ca yogino sattakkhattuṃ paramādibhāvino atīte dukkhabahutāya, anāgatadukkharittatāya ca dassanattamaṃ bahupajāva itthī nidassitā.

Tattha yathā tassā nava puttā matā, evaṃ ajjhattādippabhedā atītā saṅkhārā, vusitapubbā vā nava sattāvāsā daṭṭhabbā, mīyamānaputto viya paccuppannā saṅkhārā, pavattamāno vā sattāvāso daṭṭhabbo. Ajātaputto viya anāgatā saṅkhārā, bhāvī vā sattāvāso daṭṭhabbo. Evamavaṭṭhite yadeke dasaputtamātaraṃ aggahetvā navaputtamātuggahaṇaṃ sātthakanti vadanti, tadapāhataṃ hoti. Dārakānaṃ maraṇassa cirakālikattā **marañānussaraṇanti** vuttaṃ. Gabbhagato appaccakkhatāya bhāvīpakkhēyeva tiṭṭhatīti adhippāyena kucchigato anāgatasāṅkhāraṭṭhāniyo vutto. **Etasmim̐ khaṇeti** bhaṅgadassanamukhena saṅkhārānaṃ bhayānakabhāvena upaṭṭhānakkhaṇe.

751. **Na bhāyati** ñāṇassa bhāyanākārena appavattanato.

Paṭighacittuppadavasena hi bhāyanaṃ, ñāṇaṃ pana bhāyitabbavattumaṃ bhāyitabbanti yāthāvato jānāti. Tenāha “**atītā -pa- tīraṇamattamevā**”ti, tisso aṅgārakāsuyo atitāpena tikkhamajjhamudubhedāti adhippāyo.

Kāmaḥbhavādīnaṃhi tiṇṇaṃ bhavānaṃ nidassanabhāvena tāsāṃ gahaṇaṃ, tathā khadirādisūlattayassa appaṇītādibhāvato. Tenāha “**kevalaṃ hī**”ti-ādi.

Assāti ñāṇassa. **Byasanāpannāti** nānāvīdhavipulānatthapatitā. **Bhayatoti** bhāyitabbato.

Saṅkhāranimittanti “saṅkhārānaṃ samūhādighanavasena, sakiccaparicchedatāya ca saviggahānaṃ viya upaṭṭhānan”ti vuttovāyamatto. Saṅkhārānaṃ pana tathā upaṭṭhānaṃ saṅkhāravanimuttaṃ na hotīti āha “**atītā -pa- adhivacanan**”ti. **Maraṇamevāti** bhaṅgameva. **Tenāti** bhaṅgadassanena. Khaṇe khaṇe bhaṅgameva passato hi nimittasaññitaṃ saṅkhāragataṃ aniccatāya vuttanayena sappātibhayaṃ hutvā upaṭṭhāti. Pavattaṃ nāma kāmaṃ sabbābhavapavatti, matthakappattāya pana bhaṅgānupassanāya sabbabhavesu abhinhasampaṭipīlanassa suṭṭhutam upaṭṭhānato santasukhābhimatāpi bhavā dukkhasabhāvatāya bhayato upaṭṭhahantīti dassanattamaṃ “**pavattanti rūpārūpabhavapavatti**”ti-ādi vuttaṃ. **Ubhayanti** nimittaṃ, pavattañca. Dvayampi hi taṃ attasuññameva hutvā upaṭṭhahatīti.

Bhayatupaṭṭhānañāṇaṃ niṭṭhitaṃ.

Ādīnavānupassanāñāṇakathāvaṇṇanā

752. **Tāṇanti** saṅkhārahetukā anattato rakkhaṇaṃ. **Neva paññāyati** sabbabhavādīnaṃ sādīnavatāya ekasadisattā. **Leṇanti** tassa pariharaṇatāṇāya upalīyanaṃ. **Gatīti** tadatthaṃ gantabbaṭṭhānaṃ. **Paṭisaraṇanti** tasseva paṭisaraṇaṭṭhānaṃ. **Patthanāti** āsīsanā na hoti. Etena “netamā mamā”ti taṇhāgāhābhāvamāha. **Parāmāsoti** diṭṭhiparāmāso. Tena “eso me attā”ti diṭṭhigāhābhāvamāha. Taṇhāgāhābhāvene va cettha “esohamasmī”ti mānagāhābhāvopi vuttoyeva hoti, **vā-saddaggahaṇena** vā.

Idāni patthanādīnamabhāve kāraṇaṃ dassetuṃ “**tayo bhavā**”ti-ādi vuttaṃ. Tattha **tayo bhavā aṅgārakāsuyo viya jāti-** ādidukkhādhiṭṭhānabhāvena mahābhitaṭṭhānāya. **Cattāro mahābhūtā** kaṭṭhamukha pūtimukha-aggimukha satthamukhasaṅkhātā **ghoravisa-āsīvisā viya** kāyassa thaddhatāvissandanadāhacchedadukkhavidhānato visesato, avisesato pana āsayato visavikārato, anattadānato, durupacārato, durāsadato, akataññuto, avisesakārito, anekādīnavūpaddavato ca. “Cattāro āsīvisā uggatejā ghoravisāti kho

bhikkhave catunnetam mahābhūtānam adhivacanam”¹ hi vuttam.

Pañcakkhandhā ekakkhandhabhede aññakkhandhānavatṭhānato.

Aññamaññāghātanato, maraṇadukkhāvahanato ca **ukkhittāsikavadhakā viya**.

Vuttampi cetam “ukkhittāsiko vadhakoti kho bhikkhave pañcannetaṃ

upādānakkhandhānam adhivacanam”². **Cha ajjhattikāyatanāni**

attattaniyabhāvena gahitānipi tato rittabhāvato **suññagāmo viya**

bhojanādigayhupagamettha atthīti pavitṭhasuññagāmo viya. Tathā hi

vuttam—

“Suññagāmoti kho bhikkhave channetaṃ ajjhattikānam āyatanānam
adhivacanam. Cakkhuto cepi nam bhikkhave paṇḍito byatto medhāvī
upaparikkheyya, rittakaññeva khāyati, tucchakaññeva khāyati,
suññakaññeva khāyati”²—

ādi. **Cha bāhirāyatanāni gāmaghātakacorā viya** sabbathāpi ghātakabhāvato.

Tenevāha “corā gāmaghātakāti kho bhikkhave channetaṃ bāhirānam

āyatanānam adhivacanam. Cakkhu bhikkhave haññati manāpāmanāpesu

rūpesu”²-ādi². Rāgaggi-ādīhi **ekādasahi aggīhi**. Vuttañhetam—

“Cakkhu bhikkhave ādittam. Kena ādittam? Rāgagginā dosagginā
mohagginā jātiyā jarāya maraṇena sokehi paridevehi dukkhehi
domanassehi upāyāsehi”³—

ādi. Saṅkhārānam gaṇḍādisadisatā heṭṭhā vuttāyeva. **Nirassādāti**

assādetabbarahitā dukkhasabhāvattā. **Nirasāti** sampattirahitā

vipattipariyosānattā. Sabbattha yathā heṭṭhā nirassādā nirasā mahā-

ādīnavarāsibhūtā hutvā upaṭṭhahantīti sambandho, evam uparipi

“savāḷakamiva vanagahanam”²-ādīsu tam ānetvā sambandhitabbam.

Sasaddulāti sabyagghā. **Gāhā** kumbhilādayo. **Rakkhaso** dakarakkhaso.

“**Nirasam nirassadan**”²ti iminā ādīnavassa abbokiṇṇatam dasseti. Tathā hissa

yogino sabbesu bhavādisu sabbepi saṅkhārā nissaggato nirantaram

sappaṭibhayāva hutvā upaṭṭhahanti. Yañca sappaṭibhayam, tam sādīnavam.

Tenāha “**tassevan**”²-ādi.

1. Sam 2. 382 piṭṭhe.

2. Sam 1. 383 piṭṭhe, thokam visadisam.

3. Sam 2. 251; Vi 3. 44 piṭṭhesu.

Yanti ādīnavañāṇam. **Idam vuttanti** idam dasavatthukam dvādasavārapaṭimaṇḍitam anvayabyatirekavasena tasseva padabhājanam **paṭisambhidāyam**¹ vuttam.

Uppādo bhayanti saṅkhārānam uppādo akhematṭhena bhayavatthutāya bhayam. Uppādamūlakañhi sabbam tam sabbavatthukanti sabyasanam. **Pavattam bhayanti**-ādīsipi eveda nayo. Natthi etassa uppādo, na vā etasmim adhigate saṅkhārānam āyatim uppādoti **anuppādo**, nibbānam. Tañca sabbaso, bhayābhāvato paramassāsabhūtattā nibbhayaṭṭhena **khemanti**. **Santipadeti** sabbasaṅkhārūpasamabhūte amatapade. **Appavattanti**-ādīhipi pavattādiṭṭhikhepamukhena nibbānameva vadati. Pavattiyam ādīnavam disvā tadanantameva nivattiyam ānisaṃsaddassanavasena sīgham vipassanam ussukkāpentānam vasena “**uppādo bhayam, anuppādo kheman**”ti tatiyavāro vutto. Eveda nayo chaṭṭhavārādīsipi. Ettha ca **uppādo** viseso, **bhayam** visesitabbam sāmāññabhāvatoti satipi dvinnam padānam samānādhikaraṇabhāve līngabhedo gahito. Yathā “**dukkhasamudayo ariyasaccan**”ti². Esa nayo “**gati bhayan**”ti-ādīsipi.

Uppādo saṅkhārāti ettha pana sabbesam saṅkhārānam uppādam sāmāññena gahetvā saṅkhārā bhedato vihitā³ sabbatthakameva tesam vibhāgato vipassiyamānattāti vacanabhedo kato.

Āyūhanam paṭisandhim “**dukkhan**”ti passatīti sambandho. **Ñāṇam ādīnave idanti** ādīnave visayabhūte idam pañcavatthukam ñāṇam veditabbam. **Ñāṇam santipadeti** santipade ninnādibhāvena ṭhitam idam ñāṇanti attho.

753. Kammapaccayā paccuppannabhāve uppajjamānānam saṅkhārānam uppādo pākaṭataro hutvā upaṭṭhātīti āha “**purimakammapaccayā idha uppatti**”ti. Pavattam nāma idha pavattiyam dhammapavattīti āha “**uppannassa pavatti**”ti. **Sabbampīti** tiyaddhagatam rūpārūpam ajjhatabhiddhādivibhāgam sabbampi. **Kammanti** etarahi pavattam kammam. Ettha ca uppādapavatta-āyūhanaggahaṇena paccuppannaddhāpariyāpannā saṅkhārā gahitā, paṭisandhiggahaṇena anāgataddhāpariyāpannā upādittā. Uppādaggahaṇena ca atītaddhāpariyāpannā kamma-saṅkhārā ullīngattā. Nimittaggahaṇena pana sabbepi gahitā. **Yāya gatiyā sā paṭisandhi hoti**

1. Khu 9. 26 piṭṭhe.

2. Dī 3. 231; Ma 3. 293 piṭṭhesu.

3. Gahitā (Syā)

sā nirayādibhedā gati sucaritaduccaritavasena gantabbatā, sā panatthato taṇṭarīkammaniyamitā bhavasamaññārahā vipākakkhandhā, kaṭattā ca rūpanti veditabbā. **Khandhānam nibbattananti** sabbesampi khandhānam nibbattanam. **Pākaṭā eva** saccavibhaṅge lakkhaṇādivasena niddiṭṭhattā. **Vatthuvasenā**ti ārammaṇasaṅkhātapavattiṭṭhānavasena. Yadi te pañceva vatthubhāvena icchitā, atha kasmā sesā vuttāti āha “**sesā tesam vevacanavasenā**”ti. Tena vipassakānam ñāṇavipphārasa visayasamvaḍḍhanattham desanā vaḍḍhitāti dasseti.

Anvayato dassitassa ādīnavaññāṇassa byatirekato dassanattham **paṭipakkhaññānadassanam** “yattha uppādo natthi, tattha sabbena sabbam bhayampi natthi”ti. “**Bhayatupaṭṭhānena vā**”ti-ādīnā pavattiṃ dassetvā nivattidassanam buddhānam, anubuddhānañca āciṇṇametaṃ yathā purimaṃ saccadvayam dassetvā nirodhasaccadesanāti dasseti. Yathā loke kassaci ādīnavadassanam niratthakampi hoti, na tathā idaṃ, idaṃ pana sātthakamevāti imamattam dassetuṃ “**yasmā vā**”ti-ādi vuttam. **Tappaṭipakkhaninam cittam hoti** dāhābhībhūtassa sītaninnatā viya suṭṭhu dīṭṭhādīnavato ekaṃsena muñcitukamyatābhāvato.

Bhayanti bhāyitabbam. “**Niyamato dukkhan**”ti etenassa dukkhabhāvena bhāyitabbatāti bhāyitabbatā dukkhābhāvaṃ na byabhicaratīti dasseti. **Vaṭṭāmisam** upādinnakkhandhāti vadanti. Tividhampi vaṭṭam, vaṭṭasannissitañca **vaṭṭāmisam**. Kilesēhi āmasitabbato **lokāmisam**, pañca kāmagaṇā. Kilesā eva **kilesāmisam**. **Saṅkhāramattamevā**ti ettha **eva**-saddena visāṅkhāram nivatteti. Na hi tattha sāmisaṭālesopi atthīti. **Matta**-saddena pana aparipuṇṇatam vibhāveti. Na hi sabbasaṅkhāragatam sāmīsanti. **Tasmā**ti “bhayan”ti vuttassa dukkhādibhāvena niyatattā¹. Yadi yaṃ bhayaṃ, taṃ dukkhādisabhāvameva, tathā sati bhayādīsu ekeneva atthasiddhi. Kasmā sabbāni gahitānīti anuyogaṃ manasi katvā āha “**evam santepī**”ti-ādi. Yathā tesu eva saṅkhāresu aniccato dukkhato anattato pavattivasena ākāranānattato anupassanānānattam, evam bhayākārādi-ākāranānattato **pavattivasenevettha** ñāṇassa

1. Āyatattā (Syā)

nānattarū. Tattha bhayākārena pavattarū ñāṇarū **bhayatupaṭṭhānañāṇarū**, itarākārasena pavattarū **ādīnavañāṇanti** daṭṭhabbarū.

Yasmā ādīnavañāṇassa visayabhāvena vuttā pannarasāpi atthā uppādādīsū pañcasveva antogadhā, tattha ca ñāṇarū anvayabyatirekavasena pavattanato dasavidharū hoti. Tasmā āha “**dasa ñāṇe pajānātī**”ti. Pajānanañca sātīsayarū visayagatasammohavigamena¹ asammūlharū, attanipi asammūlhavevātī attānampi pajānantarū viya hotīti katvā vuttarū. Tenāha “**paṭivijjhati sacchikarotī**”ti. **Dvinnanti** dvīsū kusalasaddayogena hi bhummatthe sāmīvacanarū yathā “kusalā naccagītassā”ti². **Kusalatātī** karaṇe paccattavacananti āha “**dvinnarū kusalatāyā**”ti. **Dvinnanti** vā dvinnarū ñāṇarū vasenātī attho. Pavattīyā yāthāvato diṭṭhatāyā tappaṭipakkhato santipadarū suvinicchītameva hutvā upaṭṭhātī. Tenassa cīttarū paramadiṭṭhadhammanībbānādīmīcchāgāhasena na vīcalatī. Tattha suparīdiṭṭhādīnavattātī āha “**nānādiṭṭhīsū na kampatī**”ti-ādī. Sesamettha uttānatthameva.

Ādīnavānupassanāñāṇarū niṭṭharū.

Nibbidānupassanāñāṇakathāvaṇṇanā

754. **Saṅkhāragatē**ti sabbasmīrū tebhūmake saṅkhāre. **Nibbindatī**ti ñāṇanībbīdena nibbedarū āpajjati. Tathābhūto ca tattha ukkaṇṭhanto, anabhīramanto ca nāma hotīti vuttarū “**ukkaṇṭhati nābhīramatī**”ti.

Tattha anabhīramaṇassa upamarū dassetuṃ “**seyyathāpī**”ti-ādī vuttarū. Anotattadamarū parikkhipītvā ṭhītesū dviyojanasatubbedhesū yathākkamarū sānu³ añjanarajata suvaṇṇa sattaratanamayesu gandhamādāna kāḷa kelāsasudassana cīttakūṭabhedhesū pañcasū himavato mahāsīkharesū pacchīmo **cīttakūṭapabbato** nāma. Sīhapapātādīsū **sattasū mahāsaresū**.

1. Vidhamanena (Syā)

2. Khu 6. 156 piṭṭhe Jātāke.

3. Masāra (Syā), Am-Ṭṭha 3. 218 piṭṭhe passitabbam.

Suvaṇṇapañjareti suvaṇṇamaye sīhapañcare. **Pakkhittoti** niruddho. **Tividhe sugatibhaveti** kāmasugati-ādike tividhe sampattibhave.

Hattha pāda vāla vatthikosehi bhūmiphusanehi sattahi patiṭṭhitoti **sattapatiṭṭho**. **Nagaramajjhe nābhiramati** dvārapañcaranālanādi-avabādhanabhayena. **Diṭṭheti** adhimutti pubbakena anvayadassanena diṭṭhe. Tenāha “**tanninnatapoṇatappabbhāramānaso**”to.

Nibbidānupassanāñāṇaṃ niṭṭhitam.

755. **Taṃ panetanti** nibbidāñāṇamāha. **Ñāṇadvayenāti** bhayatupaṭṭhānādīnavānupassanāñāṇadvayena. Yasmā bhayato dissamānā eva saṅkhārā mahādīnavā, nibbinditabbā ca hutvā upaṭṭhahanti, tasmā ekampi taṃ ñāṇaṃ tathābhāvanābalappattiyā avatthāvisesayuttaṃ tividhakiccasāmatthiyavantaṃ hotīti vuttaṃ “**atthato ekan**”ti. Tenāha “**sabbasaṅkhāre**”ti-ādi.

Tayidaṃ tāsāṃ anupassanānaṃ matthakappattivasena vuttaṃ, ādimhi pana bhinnathabhāvā eva pavattanti. **Uppādesīti** pātvākāsi, vibhāvesīti attho.

Muñcitukamyatāñāṇakathāvaṇṇanā

756. **Na sajjati** bahvādīnavatāya diṭṭhattā. **Muñcitukāmaṃ nissaritukāmaṃ hoti** anādikālikassa khandhassa pariññāyamānattā. **Muñcitukāmatā** tato attānaṃ nibbedhetukāmatā nissaritukāmatā apagantukāmatā. **Pañjarapakkhittoti** pañjarena samoruddho. **Evamādayoti ādi**-saddena āditta-aṅgāra-upasaṭṭhadesabyālasāpadākusalavanagahanādīnaṃ saṅgaho daṭṭhabbo.

Muñcitukamyatāñāṇaṃ niṭṭhitam.

Paṭisaṅkhānupassanāññakathāvaṇṇanā

757. “Sabbabhava -pa- muñcitukāmo”ti vatvā puna **sabbasmā saṅkhāragatā**ti **sabbaggahaṇaṃ** sātisayamuttidassanatthaṃ adhikavacanaṃ aññamatthaṃ bodhetīti. Yañhi saṅkhārehi ananubandhassa muñcanaṃ, taṃ sātisayaṃ muñcanaṃ. Taṃ pana vuccamānāya paṭisaṅkhānupassanāya hotīti taṃ dassetuṃ “**puna te evaṃ saṅkhāre**”ti-ādi vuttaṃ. Tilakkhaṇaṃ āropetvā saṅkhārapariggaṇhanaṃ pubbepi katanti **punaggahaṇaṃ**. Bhavādigatassa saṅkhārassa aparitulitassa abhāvato “**te**”ti vuttaṃ. Anupassanākārassa apubbassapi atthitāya “**evan**”ti vuttaṃ. Idāni vuccamānākārenāti hi attho. Saṅkhārānaṃ pariggaṇhanaṃ nāma paripuṇṇalakkhaṇavaseneva hotīti “**tilakkhaṇaṃ āropetvā**”ti vuttaṃ.

Anaccantikatoti-ādīsu yaṃ vattabbaṃ, taṃ heṭṭhā vuttameva. Paṭhamena **ādi**-saddena “ādi-antavantato niccapaṭikkhepatō”ti evamādīnaṃ saṅgaho.

Dutiyena “udayabbayapaṭipīlanato sukhapaṭikkhepatō”ti evamādīnaṃ saṅgaho.

Ajaññatoti amanuññato, asobhanato vā. **Jegucchatoti** “dhī”ti jigucchitabbato. **Paṭikkūlatoti** abhiruciyā paṭilomanena paṭikkūlabhāvato. Na maṇḍanena hatā **amaṇḍanahatā**, amaṇḍanena sakkā etesaṃ subhabhāvaṃ hantuntī attho. Amaṇḍanena vā tesāṃ asubhatā pākaṭā hotīti **amaṇḍanahatā**. Maṇḍanena vā na hantabbasabhāvā “asūriyapassā”ti viya **amaṇḍanahatā**. Tato amaṇḍanahatabhāvato rūpasāṅkhāre sandhāya vadati. **Virūpatoti** asundarato. Paṭighasamyojanavatthutāya passante attani bandhatīti **bībhacchaṃ** ativiya virūpaṃ. Yaṃ diṭṭhamattameva domanassuppattinimittaṃ hoti. Ajaññajigucchanīyatā hi gūthaṃ viya pariccajitabbaṃ vā **bībhacchaṃ**. Idha **ādi**-saddena “asucito amanāpatō”ti evamādīnaṃ saṅgaho.

Catutthena **ādi**-saddena “apariṇāyakato attapaṭikkhepatō”ti evamādīnaṃ saṅgaho.

758. **Ayanti** yogāvacaro. **Muñcanassāti** puna ananubandhanattham sumuttamuñcanassa. **Upāyasampādanatthanti** aniccādivasena suṭṭhu pariggaṇhanam parimaddanā upāyo, tassa sādhanattham.

Macchagahaṇattham udake tattha tattha khipanti etanti **khippam**, macchānam gahaṇakūṭapam. **Oḍḍāpesīti**¹ osāresi, khipīti attho. **Sappanti** kaṇhasappam. **Gahaṇeti** yathāgahitam sappam achaddetvā gahaṇe. **Hattham nibbeṭhetvāti** sappena attano bhogena veṭhitam hatthapadesam nibbeṭhetvā mocetvā. **Āvijjhivā** āveṭhikappahāpanena bhametvā. **Nissajjivāti** chaddetvā.

Tatthāti-ādi upamāsamsandanam. Tattha **āditovāti** viññutam pattakāle. **Ghanavinibbhogam katvāti** kammaṭṭhānam gahetvā samūhādighanaggahaṇam bhinditvā. **Sumuttanti** bhāvanapumsakaniddeso “visamam candimasūriyā parivattantī”ti-ādīsu² viya. Saṅkhārānam niccādi-ākārena upaṭṭhātum asamatthata aniccasaññādibhedāya vipassanāya sātisayam balavabhāvappattiyā, sā ca saṅkhārānam aniccādi-ākārassa suṭṭhutarānam sallakkhaṇenāti āha “**tilakkhaṇāropanena -pa- pāpetvā**”ti. Yathā hi nibbuddhakarāṇe balavatarena paṭimallena tattha tattha muṭṭhippahārādīnā vimathito itaro tena yujjhītum asamatthatam pāpito hoti. Na kevalam asamatthatam pāpitova hoti, atha kho maraṇamattaṃ dukkham vā maraṇam vā pāpuṇāti, evametepi saṅkhārā evam dubbalabhāvam pāpitā upariñāṇānubhāvena nibbisevanatam, sabbaso bhaṅgaṇca pāpuṇantīti.

759. **Ettāvatāti** evam “anaccantikato”ti-ādīnā parocattālīsāya ākārehi saṅkhārānam aniccādibhāvasallakkhaṇavasappavattena paṭisaṅkhānena.

Aniccato manasikarototi-ādīsu yam vattabbam, tam bhayatupaṭṭhānakathāyam³ vuttanayameva.

Ayam pana viseso—“**paṭisaṅkhā**”ti padassa “**jānitvā**”ti atthamvatvā paṭisaṅkhānuppajjanakiriyānam samānakhaṇattā asatipi pubbāparakālatte saddavohāramattena evam vuttanti dassento “**kāman**”ti-ādīmāha. Tena

1. Osāpesīti (Syā)

2. Am 1. 386 piṭṭhe.

3. Visuddhi 2. 282 piṭṭhe.

“kusalaṃ dhammaṃ paṭicca kusalo dhammo uppajjati hetupaccayā¹, nihantvā timiraṃ sabbaṃ, uggatoyaṃ divākaro”ti ca evamādisu viya samānakālavasenāyaṃ saddapayogoti. Tathā manañca dhamme ca paṭhamam paṭicca pacchā na manoviññāṇassa uppatti, evamidhāpīti dassetuṃ “**manañca paṭiccā**”ti-ādi vuttaṃ. Ediso saddapayogo yebhuyyena loke pubbakālavaseneva dissatīti pubbakālavaseneva idhāpi taṃ dassetuṃ “**ekattanayena vā -pa- veditabban**”ti āha. Tassattho—aparāparam uppannesu ñānesu purimassa vasena paṭisaṅkhānakiriyā, tadaññassa vasena uppajjanakiriyā ca yojetabbā, na ca tāni bhedato apekkhitabbāni ekasantānapatitātāya ekattanayavasena gahitattāti. **Itarasmim padadvayeti** “pavattaṃ paṭisaṅkhā, nimittañca pavattañca paṭisaṅkhā”ti imasmim padadvaye.

Paṭisaṅkhānupassanāññāṇam niṭṭhitam.

Saṅkhārupekkhāññānakathāvaṇṇanā

760. Saṅkhārānaṃ aniccadukkhākārādipariggaṇhanavasena pavattampi paṭisaṅkhānupassanāññāṇam visesato anattākārapariggaṇhanapadhānanti vuttaṃ “**sabbe saṅkhārā suññāti pariggahetvā**”ti-ādi. Tasmīñhi sati saccasampañivedho ijjhati, na asati. Tadabhāvato hi aniccadukkkhalakkaṇapaññāpakampi **sarabhaṅgasatthārādīnaṃ sāsanaṃ** aniyyānikameva jātaṃ. Atha vā tesam nicasārādīhi² rittakaṃ sandhāya “**sabbe saṅkhārā suññāti pariggahetvā**”ti vuttaṃ. Yañhi yato rittakaṃ, taṃ tena suññanti. Saṅkhārānaṃ attasuññātāya diviññeyyabhāvato anekavāraṃ paṭividdhāyapi suññātānupassanāya daḥhībhāvāpādanattham “**puna suññamidam**”ti-ādi āradham. Tattha yadaggena saṅkhārā anattatā, tadaggena anattaniyā. Sati hi attani attaniyena bhavitabbanti vuttaṃ “**suññamidam attena vā attaniyena vā**”ti. **Dvikotikanti** dvi-amsikaṃ, attānaṃ neva disvā ñāṇacakkhunā paccakkhato, anumānato ca tassa anupalabbhaniyatoti adhippāyo. Paraṃ aññaṃ sattaṃ, saṅkhāraṃ vā parikkhārabhāve attano sukhadukkkhasādhanabhāve ṭhitam na disvāti yojanā. Puna pariggaṇhātīti sambandho. **Ettāti** etasmim suññātānupassanādhikāre.

1. Abhi 8. 19 piṭṭhe Paṭṭhāne.

2. Nicasārādīhipi (Syā)

Kvacīti katthaci ṭhāne, kāle, dhamme vā. Atha vā **kvacīti** ajjhattaṃ, bahiddhā vā. **Attano attānanti** sakattānaṃ. “Ayaṃ kho bhavaṃ brahmā mahābrahmā -pa- seṭṭho sajitā vasī pitā bhūtabhabyānaṃ”ti-ādinā¹ parehi parikappitaṃ attānañca kassaci² kiñcanabhūtaṃ na passatīti dassento “**kassaci**”ti-ādimāha. Tattha **parassāti** “parajāti, paro puriso”ti ca evaṃ gahitassa. **Na ca mama kvacanīti** ettha **mama-saddo** aṭṭhāne payuttoti āha “**mama-saddaṃ tāva ṭhapetvā**”ti. **Parassa cāti** attato aññassa. “Paro puriso”ti evaṃbhūto attho mamatthāya ṭhito, tassa vasena mayhaṃ sabbaṃ sijjhatīti evaṃ ekaccadiṭṭhigatikaparikappitavasena paraṃ attānaṃ tañca attano kiñcanabhūtaṃ na passatīti dassento “**na ca kvacanī**”ti-ādimāha. Ettha ca **nāhaṃ kvacanīti** saka-attano abhāvaṃ passati. **Na kassaci kiñcanatasminti** saka-attano eva kassaci anattaniyataṃ passati. **Na ca mamāti** ekaṃ dvayaṃ yathāsaṅkhyāṃ sambandhitabbaṃ. **Atthīti** paccekāṃ. **Na ca kvacani parassa attā atthīti** parassa attano abhāvaṃ passati. **Tassa parassa attano mama kiñcanatā na catthīti** parassa attano anattaniyataṃ passati. Evaṃ ajjhattaṃ, bahiddhā ca khandhānaṃ attattaniyasuññatā suddhasaṅkhārapuñjātā catukoṭikasūññatāpariggaṇhanena diṭṭhā hoti. Tena vuttaṃ “**evamayan**”ti-ādi.

761. “**Chahākārehi**”ti-ādinā niddesādīsu tattha tattha āgate pakāre suññatānupassanāya paribrūhanaṃ saṅgahetvā dasseti. Tattha **chahākārehi**ti chahi gahaṇākārehi, gahetabbākārehi vā. **Niccenāti** “nicco”ti parikappitena attanā vā aññena vā kenaci. **Niccenāti** vā niccabhāvena. Dhuvādayo “nicco”ti gahitasseva gahetabbākārā. Tabbibhāgena hi imassa chakkatā. Tattha niccatā nāma kūṭaṭṭhatā. Dhuvabhāvo thiratā. Sadā bhāvitā sassatatā. Nibbikāratā avipariṇāmadhammatā. **Yāva jarāmarañāti** peyyālaṃ akatvā pariyoṣānapadameva dasseti.

762. Na sāranti **asāraṃ**, natthi etassa sāranti **nissāraṃ**. Sārato apagataṃ, sāraṃ vā tato apagatanti **sārāpagataṃ**. Keci

1. Dī 1. 17 piṭṭhe.

2. Tassa (Syā)

panettha “niccasārasārena vā sukhasārasārena vā attasārasārena vā”ti pāḷīti adhippāyena “asāraṃ nissāraṃ sārāpagatan”ti padattayaṃ eko suññatāpariggahākāro, aññathā satteva ākāraṃ siyumaṃ, na atṭhāti vadanti. Apare pana “subhasārasārenātipi pāḷiyaṃ atthīti ‘asāraṃ nissāraṃ sārāpagatan’ti idaṃ padattayaṃ ‘niccasārasārenā’ti-ādīsu paccekamaṃ yojetabban”ti vadanti. **Setavacchoti** setavarupaṅako. “Minarukkho”tipi vadanti. **Pāḷibhaddakoti** kimsuko.

763. Niccasārādīnaṃ abhāvato **rittato passati**. Parittato, lāmakattā vā **tucchato**. Attasārābhāvena **suññato**. Sayamaṃ anattatāya **anattato**. Issariyassa abhāvato, kenaci issariyamaṃ kāretumaṃ asakkuṇeyyatāya ca **anissariyato**. Pheṇapiṇḍena bhājanādiṃ kātukāmassa viya rūpassa niccatādiṃ kātukāmassa taṃ na sijjhati, saka-icchāvasena vā kāci kiriyā natthīti **akāmakāriyato**. “Evaṃ rūpaṃ hotu, mā evaṃ”ti **alabbhanīyato**. Sayamaṃ aññassa vase na vattati, nāpi aññaṃ attano vase vattetīti **avalavattakato**. Yasmiṃ santāne sayamaṃ tassa paro viya avidheyyatāya **parato**. Kārakādi viya kāraṇehi, phalena ca **vivittato**. Na hi kāraṇena phalaṃ, phalena vā kāraṇaṃ sagabbhaṃ tiṭṭhati. Esa nayo vedanādīsipi.

764. **Rūpaṃ na sattoti**-ādīsu yo lokavohārena satto, rūpaṃ so na hotīti ayamatto idha nādhippeto tassāvuttasiddhattā. Na hi loko rūpamattaṃ “satto”ti voharati, bāhirakaparikkappito pana attā “satto”ti adhippetā. So hi tehi rūpādīsū sattavisattatāya paresamaṃ sañjāpanaṭṭhena “satto”ti vuccati, rūpaṃ so na hotīti attho. Suññatāpariggaṇhanañhetanti. Esa nayo **na jīvoti**-ādīsipi. Tattha jīvanaṭṭhena **jīvo**. Naranatṭhena netubhāvena **naro**. “Ahamasmī”ti mānuppattiṭṭhānatāya māno ettha vāti pavattatīti **mānavo**¹. Thiyati ettha gabbhoti **itthī**. Padhānabhāvena puri setīti

1. Mānavo (Ka)

puriso. Āhito ahaṃmāno etthāti **attā.** Paccattaṃ tassa tassa ahaṃkāravatthutāya “ahan”ti ca diṭṭhigatikehi attā vuccati, rūpaṃ pana tādisaṃ na hotīti suññatāpariggaṇhanavidhiṃ dassetuṃ “**rūpaṃ na satto**”ti-ādi vuttaṃ. Tasmā aṭṭhahipi padehi rūpassa attasuññatāva dassitā. Itarehi catūhi tassa kiñcanatābhāvo. Tattha **na mamā**ti mayhaṃ attano santakaṃ na hoti, tathā aññassa attano santakaṃ na hoti, kassacipi attano santakaṃ na hoti attanoyeva abhāvato. “**Na attaniyan**”ti padena pakāsito evattho pariyāyantarehi tīhipi padehi pakāsito. Esa nayo vedanādīsupi.

765. Heṭṭhā kalāpasammasanassa daḷhabhāvāya vuttasammasananayāpi suññatānupassanāya daḷhabhāvāya saṃvattantīti dassento “**tiraṇaparīññāvasenā**”ti-ādimāha. Tattha bhayassa ahimsanena **asaraṇato.** “Saraṇan”ti gahetuṃ ayuttatāya **asaraṇībhūtato.** “**Anassādato**”ti idaṃ pāḷiyāṃ natthi. Sati ca tecattālīsa ākāraṃ siyūṃ. Rūpappavattiyāṃ sabbādīnavūpaladdhiyā **ādīnavato.** “**Samudayato atthaṅgamato**”ti idaṃ dvayaṃ yathā aniccato dassanaṃ panālikāya, niccasāravirahadīpanena vā suññatāvibhāvanāṃ hoti, evaṃ suññatāvibhāvananti katvā vuttaṃ. Tathā “yaṃ kho rūpaṃ paṭicca uppajjati sukhaṃ somanassaṃ, ayaṃ rūpassa assādo”ti¹ dassanaṃ paccayapaccayuppannatāvibhāvanena suññatāvibhāvanāṃ. “Yaṃ rūpaṃ aniccaṃ dukkhaṃ vipariṇāmadhammaṃ, ayaṃ rūpassa ādīnavo”ti¹ ca dassanaṃ niccatādisuññatābhāvanato. Tathā “yo rūpe chandarāgavinayo chandarāgappahānaṃ, idaṃ rūpassa nissaraṇan”ti¹ evaṃ samudayādidassanānaṃ, itaresañca yathārahaṃ suññatānupassanānubrūhanatā daṭṭhabbā. Yaṃ pana ādīnavato dassanaṃ, pubbe vatvāpi puna vacanaṃ assādapaṭikkhepato dassanaṃ sandhāya vuttanti veditabbaṃ. Sesam heṭṭhā vuttanayameva. Vedanādīsupi dvācattālīsa ākāraṃ netabbāti āha “**vedanaṃ -pa- viññāṇaṃ aniccato -pa-nissaraṇato passatī**”ti.

Vuttampi ca niddese² etaṃ suññatāpariggaṇhanakathāsandassanaṃ “asukāya pāḷiyā ayaṃ niddeso”ti dassanatthaṃ, tassa phalāsandassanatthaṃca.

1. Saṃ 2. 23 piṭṭhe.

2. Khu 8. 448 piṭṭhe.

766. Evaṃ tīraṇapariññāvasena paccekam khandhesu dvācattālisāya ākārehi suññatam pariggahetvāpi tividhānupassanāvaseneva bhāvanam anuyuñjantassa saṅkhārupekkhāñāṇuppattīti dassento “**evaṃ suññato**”ti-ādimāha. Tattha **pariggaṇhantoti** sammasanto. **Bhayañca nandiñca vippahāyāti** ajjupekkhakatāya saṅkhārānam vipattiṃ nissāya uppajjanakabhayañceva tesaṃ sampattiṃ nissāya uppajjanakapītiñca pajahitvā. Atha vā bhayatupaṭṭhānavasena uppajjanakāñāṇabhayañca sammasanavasena uppajjanakapītisaṅkhātānam nandiñca pahāya. Na hi sabbaso suññatāya diṭṭhāya bhayanandīnam avasaro atthi atha kho upekkhāva saṅṭhāti. Tenāha “**saṅkhāresu udāsīno hoti**”ti. Tattha yena micchāgāhena anudāsīnatā siyā, tadabhāva dassento “**ahanti vā mamanti vā na gaṇhāti**”ti āha. Idānissa udāsīnatāya upamaṃ dassento “**vissaṭṭhabhariyo viya puriso**”ti-ādimāha.

Tattha anudāsīnatāpubbikā udāsīnatā vuccamānā idha opammattham pharatīti dassetuṃ “**iṭṭhā kantā**”ti-ādi vuttam. **Ativiya nam mamāyeyya** itthīnam sātheyyakūṭeyyavañkeyyādīnam ajānanato. **Muñcitukāmo hutvāti** muñcitukāmo va hutvā, **taṃ vissajjeyya** nirapekkhatāya vasenevāti adhippāyo. **Ayam** yogāvacaro. Muñcitukāmatāya uddham yāva saṅkhārupekkhāñāṇam na uppajjati, tāva pavattā vipassanā paṭisaṅkhānupassanā evāti āha “**paṭisaṅkhānupassanāya saṅkhāre pariggaṇhanto**”ti.

Patilīyatīti ekapassena nilīyati nilīnam viya hoti. **Patikuṭatīti** saṅkucati. **Paṭivattatīti**¹ vivattati. **Na sampasāriyatīti** na visarati, abhirativasena na pakkhandatīti attho.

Iccassāti iti evaṃ assa yogino.

767. Tikkhavisadasūrabhāvena saṅkhāresu ajjupekkhane sijjhamāne **taṃ panetaṃ** saṅkhārupekkhāñāṇam anekavāram pavattamānam paripākagamanena anulomañāṇassa paccayabhāvaṃ gacchantam **nibbānam santato passati** nāma. Tathābhūtañca **sabbaṃ saṅkhārappavattaṃ vissajjetvā nibbānameva pakkhandati** nāma. Tayidaṃ idha ñāṇam anulomagotrabhūñāṇehi saddhiṃ ekattaṃ netvā vuttam

1. Pativattati (Ka)

ekattanayavasena. **No ce nibbānaṃ santato passatīti** tāva saṅkhārupekkhāñāṇassa aparipakkatamevāha. Samuddaṃ tarantīti **sāmuddikā**, saṃyattikā¹. Disājānanako kāko **disākāko**, lakkhaṇamattañcetam yo koci tādiso sakunto veditabbo. **Videsanti** adesaṃ samudde aparicitaṭṭhānaṃ. **Anugantvāti** anu anu gantvā.

Tayidaṃ² vipassanāñāṇaṃ. **Piṭṭhaṃ vaṭṭayamānaṃ viyāti** thūlathūlato vivecanavasena nipphoṭiyamānaṃ³ saṅhaṃ saṅhaṃ piṭṭhacūṇṇaṃ viya. **Nibbaṭṭitakappāsanti** nibbaṭṭitabijaṃ kappāsaṃ. **Vihanaṃ mānaṃ**⁴ viyāti dhanukena vihaññaṃ mānaṃ viya. Upamādvayenapi punappunaṃ sammasanena vipassanāñāṇassa sukhumatarabhāvāpattimāha. Yathā yathā hi vipassanābhāvanābalena tikkhā, visadā, sūrā ca hoti, tathā tathā sukhumatarāpi hotīti. **Saṅkhāravicināneti** pavicayassa sikhāpattatāya saṅkhāresu viya tesāṃ vicinānapi udāsīnaṃ hutvā tividhānupassanāvasena tiṭṭhati pakārantarassa abhāvato. “Sattadhā aṭṭhārasadhā”ti-ādinā vibhattāpi hi anupassanāpakārā aniccānupassanādisveva tīsu antogadhāti matthakappattā vipassanā tāsāṃ eva vasena tiṭṭhati.

768. **Tatrāti** tasmim vimokkhamukhabhāvāpajjane, ariyapuggalavibhāgapaccayatthe ca. **Idaṃ** vipassanā ñāṇaṃ. **Tiṇṇaṃ indriyānanti** saddhindriyasamādhindriyapaññindriyānaṃ. **Ādhipateyyavasena**ti sampayuttadhammānaṃ adhipatibhāvavasena. Aniccānupassanābahulassa hi saddhindriyaṃ balavaṃ hoti, dukkhānupassanābahulassa samādhindriyaṃ, anattānupassanābahulassa paññindriyanti tissannaṃ anupassanānaṃ vasena balavatarabhāvaṃ pattāni imāni tīni indriyāni vimokkhamukhabhāvaṃ āpādentīti āha “**tividhānupassanā -pa- āpajjati nāmā**”ti. **Tividhavimokkhamukhabhāvanti** ettha ke pana tayo vimokkhā, kāni vā tīni vimokkhamukhānīti antolīne anuyoge vimokkhamukhādhīnattā vimokkhādhigamassa vimokkhamukhāni tāva dassento “**tisso hi -pa- vuccantī**”ti vatvā ayañca attho pālito eva viññāyatīti dassento “**yathāhā**”ti-ādimāha.

1. Savantikā (Syā, Ka)

3. Niccoriyamānaṃ (Ka)

2. Tadidaṃ (Ka)

4. Vihatamānaṃ (Syā)

Lokaniyyānāyāti lokato nikkhamanāya, sattalokassa vā vaṭṭadukkhato nikkhamanāya. **Paricchedaparivaṭumato**ti udayabbayavasena paricchedato ceva parivaṭumato ca. **Samanupassanatāyāti** sammadeva anu anu passanāya saṁvattantīti sambandho. Aniccānupassanā hi saṅkhāre ādito udayena, antato vayena paricchinne passati. Ādi-antavantatāya hi te aniccāti. **Animittāya ca dhātuyāti** sabbasaṅkhāranimittavirahato “animittā”ti laddhanāmāya asaṅkhatāya dhātuyā. **Cittasampakkhandanatāyāti** paricchinditvā anulomañāḍādibhāvena sammadeva adhicittassa anupavisanatthāya. **Appaṇihitāyāti** rāgapaṇidhi-ādīnaṁ abhāvena “appaṇihitā”ti laddhanāmāya. **Suññatāyāti** attasuññatāya “suññatā”ti laddhanāmāya.

Gatinti nibbattiṁ¹. Saṅkhārānaṁ sabhāvavibhāvanena saṁvejjyamānaṁ cittaṁ sammāpaṭipattiyāṁ samuttejitaṁ nāma hotīti āha “**manosamuttejanatāyāti cittaśaṁvejanatāyā**”ti. Mammaṅkārena attaniyasaññitassa vatthuno sāmibhūto attā paṭhamāṁ parāmasīyati, tato attaniyanti āha “**nāhaṁ, na mamāti evaṁ anattato samanupassanatāyā**”ti. **Tiṇi padānīti** paricchedaparivaṭuma, manosamuttejana, samanupassanapadānīti vadanti, “sabbasaṅkhāre”ti-ādīni pana tiṇi vākyāni tiṇi padānīti veditabbāni. **Tenevāti** aniccānupassanādīnaṁ vasena tesāṁ tiṇṇaṁ padānaṁ vuttattā eva. **Pañhavissajjaneti** “aniccato manasi karoto kathaṁ saṅkhārā upaṭṭhahantī”ti pañhassa vissajjane.

769. Evaṁ vimokkhamukhāni dassetvā idāni vimokkhe dassetuṁ “**katame panā**”ti-ādi vuttaṁ. **Aniccato manasikarontoti** aniccānupassanaṁ anuyuñjanto. **Adhimokkhabahuloti** saddhindriyabahulo. Yassa visesato aniccānupassanā tikkhā sūrā hoti, tassa saddhindriyaṁ adhimattaṁ hoti. “Aniccā saṅkhārā”ti hi ādito saddhāmattakena paṭipajjitvā vipassanāya ukkaṁsagatāya tarupallavādīsu viya maṇikanakādīsopi tesāṁ aniccataṁ sātīsayāṁ paccakkhato passato “sammāsambuddho vata so bhagavā”ti satthari saddhā balavatī pavattatīti so adhimokkhabahuloti, adhimattasaddo ca hoti. Tassa aniccānupassanābahulatāya

1. Nipphattiṁ (Syā)

aniccākārato vuṭṭhānaṃ hotīti so **“animittaṃ vimokkhaṃ paṭilabhati”**ti vuttaṃ. **Passaddhibahuloti** dukkhānupassanaṃ anuyuñjanto “dukkhā saṅkhārā, tappaṭipakkhato sukho nirodho”ti ca manasikāravasena nibbānassa santapaṇītasukhabhāvaṃ adhimuccanto abhiñhaṃ pītipāmojjasamāyogato passaddhibahulo hoti. Tato ca adhimattasamādhindriyapaṭilābhena rāgapaṇidhiyā dūrībhāvato appaṇihitavimokkhasamadhigamo hotīti vuttaṃ **“dukkhato -pa- paṭilabhati”**ti. **Vedabahuloti** anattānupassanaṃ anuyuñjanto attasuññatāya¹ nipuṇaṇāṇavisayattā ñāṇabahulo hoti. Tato ca adhimattapaṇṇindriyapaṭilābhena mohassa dūrībhāvato suññatavimokkhasamadhigamo hotīti āha **“anattato -pa- paṭilabhati”**ti.

Yo aniccānupassanāya nimittavasena saṅkhāre pariggahetvā vipassanaṃ anuyuñjanto yattha idaṃ saṅkhāranimittaṃ sabbaso natthi, taṃ “animittaṃ nibbānaṃ”ti animittākārena adhimuccanto vuṭṭhānagāminimaggena ghaṭeti. Tassa maggo animittato nibbānaṃ sacchikarotīti vuccatīti āha **“animittākārena nibbānaṃ ārammaṇaṃ katvā pavatto ariyamaggo”**ti. Svāyaṃ nibbānassa animittākāro neva maggena kato, na vipassanāya, atha kho sabhāvasiddho. Tadārammaṇatāya ca maggo animittoti vuccatīti dassento āha **“animittāya dhātuyā uppannattā animitto”**ti. Yo dukkhānupassanāvasena paṇidhiyā dūrībhāvakaraṇena appaṇihitaṃ adhimuccanto, yo anattānupassanāvasena attūpaladdhiyā dūrībhāvakaraṇena suññataṃ adhimuccantoti ca ādinā yojetabbaṃ. Tenāha **“eteneva nāyena”**ti-ādi.

770. Yadi ariyamaggo tividhampi vimokkhanāmaṃ labhati, atha kasmā **abhidhamme** vimokkhadvayameva āgatanti codanaṃ sandhāyāha **“yaṃ panā”**ti-ādi. Tattha **tanti** abhidhamme vimokkhadvayavacanaṃ. **Nippariyāyato vipassanāgamaṇaṃ sandhāyāti** ujukameva vipassanato maggassa nāmāgamaṇaṃ sandhāya vuttaṃ. Kasmā?² Animittavipassanā āgamaṇiyatṭhāne ṭhatvā attano maggassa nāmaṃ dātuṃ na sakkoti. Kāmaṃ **sutte** “animittaṃca bhāvehi, mānānusayamujjahā”ti³ animittavipassanā kathitā, sā pana

1. Anattasuññatāya (Ka)

2. Yasmā (Syā)

3. Khu 1. 329 piṭṭhe Suttanipāte.

niccanimittadhuvanimitta attanimittāni ugghāṭentīpi sayam
nimittadhammesu eva caratīti sanimittāva hotīti. Apica abhidhammo nāma
paramatthadesanā, animittamaggassa ca paramatthato hetuvekallameva.
Aniccānupassanāvasena hi **animittavimokkho** kathito. Tattha ca
saddhindriyam adhimattam hoti, tam ariyamagge ekaṅgampi na hoti,
amaggaṅgattā attano maggassa nāmam dātum na sakkoti. Itaresu
dukkhānupassanāya vasena **appaṇihitavimokkho**, anattānupassanāya vasena
suññatavimokkho.

Tesu appaṇihitavimokkhena samādhindriyam, suññatavimokkhena
paññindriyam adhimattam hotīti tāni ariyamaggassa aṅgattā attano maggassa
nāmam dātum sakkonti, na animittamaggo tadabhāvatoti keci. Ye pana
vadanti “animittamaggo āgamanato nāmam alabhantopi saguṇato ca
ārammaṇato ca nāmam labhati”ti, tesam matena appaṇihitasuññatamaggāpi
saguṇato eva, ārammaṇato eva ca nāmam labheyyunti? Tam ayuttam.
Kasmā? Maggo hi dvīhi kāraṇehi nāmam labhati sarasato ca paccanīkato
cāti, sabhāvato ca paṭipakkhato cāti attho. **Appaṇihitamaggo** hi rāgapaṇidhi-
ādīhi vimutto, **suññatamaggo** rāgādīhi suñño evāti te sarasato nāmam
labhanti. Tathā **appaṇihitamaggo** paṇidhissa paṭipakkho, **suññatamaggo**
attābhinivesassa evāti te paccanīkato nāmam labhanti, **animittamaggo** pana
rāgādinimittānam, niccanimittādīnam vā abhāvena sarasato eva nāmam
labhati, no paccanīkato. Na hi so saṅkhāranimittārammaṇāya
aniccānupassanāya paṭipakkho, sā panassa anulomabhāve ʘhitāti sabbathāpi
abhidhammapariyāyena animittamaggo na labbhati. Tena vuttam “**tam
nipariyāyato vipassanāgamanam sandhāya**”ti.

Yasmā suttantapariyāyena animittamaggo labbhati. Vuṭṭhānagāminī hi
vipassanā yaṁ yaṁ sammasantī vuṭṭhānam gacchati, tassa tassa vasena
āgamanīyaṭṭhāne ʘhatvā attano maggassa nāmam deti, tattha aniccato
vuṭṭhahantassa maggo animitto hoti, dukkhato vuṭṭhahantassa appaṇihito,
anattato vuṭṭhahantassa suññato, tasmā suttantasamvaṇṇanā esāti katvā idha
tayopi vimokkhā uddhaṭā. **Yaṁ pana paṭisambhidāmagge**
abhinivesanimittapaṇidhimuñcanam upādāya tissannampi anupassanānam
tadāgamanavasena tadanvayassa maggassa ca suññatavimokkhādibhāvo
niddiṭṭho, tassa

pariyāyabhāve vattabbameva natthīti dassetuṃ “**vipassanāñāṇaṃ hī**”ti-ādi vuttaṃ. Vipassanāñāṇaṃ paṭisambhidāmagge “appaṇihito, vimokkho”ti ca kiñcāpi vuttanti sambandho.

Aniccānupassanāñāṇanti “aniccā saṅkhārā”ti anupassanāvasena pavattañāṇaṃ. **Niccato abhinivesaṃ muñcatīti** “te niccā”ti niccākārato pavattamicchābhinivesavidhamsanavasena, tadanvayaṃ pana maggañāṇaṃ samucchadavasena muñcati. **Itīti** tasmā. Aniccābhinivesato rittatāya, vimuttatāya ca **suññato vimokkho**. Sesapadesupi eseva nayo.

Tanti tividhaṃ vipassanāñāṇaṃ. Tattha yassa pariyāyato, yassa ca nippariyāyato nāmalobho, taṃ dassetuṃ “**saṅkhāranimittassā**”ti-ādi vuttaṃ. **Na nippariyāyena**, atha kho pariyāyenaṭi attho. **Tasmāti** nippariyāyakathābhāvato. **Vimokkhadvayameva vuttaṃ** abhidhammeti adhippāyo. **Etthāti** etasmiṃ vipassanādhikāre. “Tividhavimokkhamukhabhāvaṃ āpajjitvā”ti etasmiṃ vā uddesavacane.

771. **Tesaṃ vibhāgāyāti** tesaṃ yathāvuttānaṃ sattannaṃ ariyapuggalānaṃ saddhānusārī-ādibhāvena vibhattasabhāvatāya.

772. **Saddhindriyaṃ paṭilabhati**ti saddhānusārībhāvitākāraṇabhūtaṃ adhimattaṃ saddhindriyaṃ paṭilabhati. Adhimokkhabahulatāya, saddhindriyādhimattatāya ca kāraṇaṃ heṭṭhā vuttameva. Apica ayamettha saṅkhepattho—aniccākārasallakkhaṇassa saddhābhībuddhiyā upanissayabhāvato tadanvaye magge saddhā, tikkhatarā hoti, tena aṭṭhamako **saddhānusārī** nāma hoti. **Sesesu sattu** **ṭhānesūti** paṭhamaphalato paṭṭhāya yāva aggaphalā sattu **ṭhānesu**. “Sattu **ṭhānesū**”ti kasmā vuttaṃ, nanu sesesu chasu **ṭhānesu** saddhāvimutto, aggaphale pana sacāyaṃ arūpajjhānalābhī, ubhatobhāgavimutto hoti, no ce arūpajjhānalābhī, paññāvimutto, na saddāvimutto. **Abhidhamme** hi—

“Katamo ca puggalo **saddhāvimutto**? Idhekacco puggalo ‘idaṃ dukkhaṇ’ti yathābhūtaṃ pajānāti, ‘ayaṃ dukkhasamudayo’ti, ‘ayaṃ dukkhanirodhā’ti, ‘ayaṃ dukkhanirodhagāminī paṭipadā’ti yathābhūtaṃ pajānāti. Tathāgatappaveditā cassa dhammā paññāya

diṭṭhā honti, paññāya cassa disvā ekacce āsavā parikkhīṇā honti, no ca kho yathādiṭṭhippattassa. Ayaṃ vuccati puggalo saddhāvimutto”ti¹—

ekaccāsavaparikkhayavacanato saddhāvimuttassa sekkhabhāvo viññāyati, na asekkhabhāvo. Aṭṭhakathāyaṅca “dve dhurāni, dve abhinivesā, dve sīsāni”ti vacanato natthi arahato saddhāvimuttatāti? Saccametaṃ nippiariyāyato. Nippiariyākathā hi abhidhammo, idha pana pariyaṅyena evaṃ vuttaṃ. Yadi pariyaṅyato arahato saddhāvimuttatā, ko pana so pariyaṅyo? Saddhāvimuttanvayatā. Yo hi aggamaggakkaṇe saddhāvimutto hoti, so aggaphalakkhaṇepi tadanvayatāya saddhāvimuttoti **paṭisambhidāmagge** pariyaṅyena vuttoti idhāpi atheva vuttaṃ. Atha vā saddhāvimuttasadisatāya arahā saddhāvimutto. Kā panettha sadisatā? Yathā saddhāvimuttassa sekkhassa kilesakkhayo kuṇṭhena asinā kadalimchedasadiso “no ca kho yathādiṭṭhippattassa”ti vacanato, evaṃ tadanvayassāpi arahatoti ayamettha sadisatā. Kiṃ pana nesam kilesapahāne nānattaṃ atthīti? Natthi. Atha kasmā saddhāvimutto diṭṭhippattaṃ na pāpuṇātīti? Āgamanīyanānattena. Diṭṭhippattaṃ hi āgamanamhi kilese vikkhambhento appakasirena akilamanto vikkhambhetuṃ sakkoti, saddhāvimutto kicchena kasirena vikkhambhetuṃ sakkoti. Apica paññāyapi nesam vemattatā. Sā ca yāvatikā labbhatevāti vadanti. Evaṅca katvā paṭhamamaggādīsū satipi indriyasamatte saddhādīnaṃ tikkhatāvacanampi samatthitaṃ hoti.

773. **Soti dukkhato vuṭṭhito. Sabbathāti aṭṭhasupi ṭhānesu.** Nanu ca aṭṭhakathāyaṃ “dve dhurāni”ti niyamitattā paṭhamamaggakkaṇe saddhānusārī vā siyā, dhammānusārī vā? Idha na² saddhānusārī yutto, kāyasakkhitāpi arahato natthi. **Abhidhamme** hi—

“Katamo ca puggalo **kāyasakkhī**? Idhekacco puggalo aṭṭha vimokkhe kāyena phusitvā viharati, paññāya cassa disvā ekacce āsavā parikkhīṇā honti. Ayaṃ vuccati puggalo kāyasakkhī”ti¹—

1. Abhi 3. 184 piṭṭhe.

2. Pana (Ka)

ekaccāsavaparikkhayavacanato kāyasakkhino sekkhabhāvova viññāyatīti? Saccametaṃ nippariyāyato, idha pana pariyāyena vuttaṃ. Ko pana so pariyāyoti? Kāyasakkhisadisatā. Upacārarūpajjhānasamādhito hi sātisayam arūpasamādhisamphassaṃ laddhā nibbattīti ekaccāsavaparikkhayam upādāya “kāyasakkhī”ti vattabbapuggalena sātisayasamādhisamphassatadadhiṭṭhānāsavaparikkhayasāmaññaṃ apekkhitvā kāyasakkhī viya **kāyasakkhīti** arahā **paṭisambhidāmagge** vuttoti idhāpi tameva nayaṃ gahetvā arahatopi kāyasakkhitā vuttā. Suttantaṃvaṇṇanā hesāti. Nippariyāyena pana paṭhamaphalato paṭṭhāya chasu ṭhānesu kāyasakkhī nāma hoti, so ca kho aṭṭhasamāpattilābhī, na vipassanāyāniko sukkhavipassako, upacāramattalābhī, rūpajjhānamattalābhī vā. **Passaddhibahuloti** ca passaddhisīsenā samādhī vuttoti sātisayasamādhilābhī samathayānikova adhippeto, samathayānikasseva ca kāyasakkhibhāvo heṭṭhā vutto. **Arūpajjhānanti** catubbidham arūpajjhānaṃ. Tattha pana ekampi laddhā arahattaṃ patto ubhatobhāgavimutto eva hotīti imamatthaṃ dassetuṃ “**arūpajjhānam**”icceva vuttaṃ, na “cattāri arūpajjhānāni”ti. Tenāyaṃ catunnaṃ arūpasamāpattīnaṃ, nirodhasamāpattiyā ca vasena pañcavidho hoti. Esa nayo kāyasakkhimhipi. Dvīhi bhāgehi dve vāre vimuttoti **ubhatobhāgavimutto**.

774. Paññavato nipuṇatarā, gambhīrā ca atthā pākaṭā hutvā upaṭṭhahantīti anattato manasi karoto vedabahulatā, paññindriyapaṭilābho ca vutto. **Dhammānusārī hoti** paññindriyassa adhimattattā. Paññā hi idha “dhammā”ti adhippetā¹ “saccaṃ dhammo dhiti cāgo”ti-ādīsu² viya.

775. Yassā pāḷiyā vasena idha ariyapuggalassa saddhāvīmuttādibhāvo vutto, taṃ pāḷim dassetuṃ “**vuttaṃ hetan**”ti-ādi āraddhaṃ, taṃ suviññeyyameva.

776. “Saddhindriyassa adhimattattā saddhāvīmutto”ti evamādi-attassa sādhaṃ **aparampi vuttaṃ**. “**Saddahanto vimutto**”ti etena sabbathā

1. Adhippeto (Ka)

2. Khu 5. 14 piṭṭhe Jātake.

avimuttassa saddhāmattena vimuttabhāvadassanena saddhāvimuttassa sekkhabhāvameva vibhāveti. **Saddhāvimuttoti** vā saddhāya adhimuttoti attho.

Phuṭṭhantaṃ sacchikatoti phuṭṭhānaṃ¹ anantaraṃ phuṭṭhanto, phuṭṭhānaṃ arūpajjhānānaṃ anantaro kāloti adhippāyo, accantasamyoge cetanaṃ upayogavacananaṃ, phuṭṭhānantarakārameva sacchikaraṇūpāyena sacchikātabbaṃ sacchākāsīti vuttaṃ hoti. Bhāvanapuṃsakaṃ vā etaṃ yathā “ekamantaṃ”². Yo hi arūpajjhānena rūpakāyato, nāmakāyekadesato ca vikkhambhanavimokkhena vimutto, tena nirodhasaṅkhāto vimokkho ālocito³ pakāsito viya hoti, na pana kāyena sacchikato, nirodhaṃ pana ārammaṇaṃ katvā ekaccesu āsavesu khepitesu tena so sacchikatova hoti. Tasmā so sacchikātabbaṃ yathā-ālocitaṃ⁴ nāmakāyena sacchākāsīti **kāyasakkhīti** vuccati, na tu vimutto ekaccānaṃ āsavānaṃ aparikkhīṇattā. **Diṭṭhantaṃ pattoti** dassanasāṅkhātassa sotāpattimaggañāṇassa⁵ anantaraṃ pattoti vuttaṃ hoti. Paṭhamaphalato paṭṭhāya hi yāva aggamaggā diṭṭhippattoti. **“Diṭṭhiyā patto”**ti vā pāṭho, catusaccadassanasāṅkhātāya diṭṭhiyā nirodhaṃ pattoti attho. Ime ca saddhāvimuttādayo tayo paramatthato apariyositañāṇakiccāti taṃ nayaṃ dassetuṃ **“saddahanto vimuccati”**ti-ādi vuttaṃ. **Jhāna phassanti** sātisayaṃ jhānaphassaṃ. Tena arūpajjhānaphasso saṅgahito hoti.

“Dukkhā saṅkhārāti ñātaṃ hoti”ti⁶ iminā dukkhasaccapaṭivedhamāha, **“sukho nirodhoti ñātaṃ hoti”**ti⁶ iminā nirodhasaccapaṭivedhaṃ. Tadubhayaena ca samudayamaggasaccapaṭivedhaṃ nānantariyakabhāvato. **“Ñātaṃ hoti”**ti iminā dutiyamaggakiccaṃ, **“diṭṭhaṃ hoti”**ti iminā tatiyamaggakiccaṃ, **“viditaṃ hoti”**ti iminā catutthamaggakiccaṃ, **“sacchikatan”**ti iminā paṭhamaphalakiccaṃ, **“phusitan”**ti iminā sesaphaladvayakiccaṃ. Iti diṭṭhippattassa maggaphalañāṇabyāpāradassanāni imāni padānīti vadanti.

777. **Itaresūti** saddhānusāri-ādipadesu. **Saddhaṃ anusaratīti** āgamanīyaṭṭhāne ṭhitāṃ saddhaṃ anugacchati. Yathā sā tikkhā sūrā

1. Anto (Syā)

2. Vi 1. 1 piṭṭhe.

3. Āropito (Syā, Ka)

4. Āropitaṃ (Syā)

5. Sotāpattimaggañāṇakiccassa (Ka)

6. Ñānaṃ hotīti (Syā)

ahosi, maggakkhaṇepi tadanurūpameva pavattetīti attho. **Saddhāya vā anusarati**ti saddhāya kāraṇabhūtāya saccapaṭivedhassa anurūpaṃ sarati gacchati, paṭipajjatīti attho. Dvīhipi atthavikappehi saddhāya adhimattataṃyeva vibhāveti. **Dhammānusārī**ti etthāpi eseva nayo. **Ubhatobhāgavimuttoti** dvīhi bhāgehi dve vāre vimutto, rūpakāyato ca nāmakāyato ca vikkhambhanavasena, samucchedavasena ca vimuttoti attho. Arūpajjhānena rūpakāyato ca nāmakāyekadesato ca vimutto, ariyamaggena nāmakāyato vimuttoti ubhohi bhāgehi dve vāre vimuttattā ubhatobhāgavimutto. **Pajānanto vimuttoti** paṭhamajjhānaphassena vinā pari jānanādippakārehi cattāri ariyasaccāni jānanto paṭivijjhanto tesāṃ kiccānaṃ matthakappattiyā niṭṭhitakiccatāya viśesena muttoti vimutto.

Ayaṃ panettha nippariyāyato saṅkhepakathā—yassa aniccākārato vuṭṭhānaṃ hoti, so adhimokkhabahulo saddhindriyassa tikkhabhāvena paṭhamamaggakkhaṇe **saddhānusārī** nāma hoti, majjhe chasu ṭhānesu **saddhāvimutto**. Aggaphalakkhaṇe **paññāvimutto** nāma hoti. Tathā yassa dukkhākārato vuṭṭhānaṃ hoti, tassa passaddhibahulatāya samādhindriyaṃ adhimattaṃ hoti dukkhupanisāya saddhāyapi tibbatarattā, dhuraniyamato ca. Sopi paṭhamamaggakkhaṇe **saddhānusārī** eva hoti, majjhe chasu ṭhānesu **saddhāvimutto**, ante **paññāvimutto** ca hoti. Yassa pana anattākārato vuṭṭhānaṃ hoti, so vedabahulo paññindriyassa tikkhabhāvena paṭhamamaggakkhaṇe **dhammānusārī**, eva hoti, majjhe chasu ṭhānesu **diṭṭhippato**, ante **paññāvimutto** eva hoti. Ime pana na aṭṭhavimokkhalābhino, aṭṭhavimokkhalābhī pana paṭhamamaggakkhaṇe **saddhānusārī** vā **dhammānusārī** vā siyā. Majjhe chasu ṭhānesu **kāyasakkhī**, pariyosane **ubhatobhāgavimuttoti**.

Saṅkhārupekkhāñānaṃ.

778. Yaṃ taṃ vimokkhamukhabhāvaṃ āpajjitvā satta-ariyapuggalavibhāgāya ca paccayo hotīti vuttaṃ, **taṃ panetaṃ** saṅkhārupekkhāñānaṃ. **Purimena ñāṇadvayenā**ti muñcitukamyatāpaṭisaṅkhānupassanāñāṇadvayena

atthato ekaṃ, pavatti-ākārabhedato nānanti adhippāyo. Yathāvuttamatthaṃ aṭṭhakathāya, pāliya ca sādhetum **“tenāhū”**ti-ādi vuttaṃ.

Muñcitukamyatāmuñcanupāyakaraṇañāṇānipi saṅkhāresu udāsīnabhāveneva pavattanato saṅkhārupekkhāsamaññāneva hontīti vuttaṃ **“idaṃ saṅkhārupekkhāñāṇaṃ ekameva tīpi nāmāni labhati”**ti. Tena saṅkhārupekkhāvohāro muñcitukamyatādiñāṇasamudāyavisayoti dasseti.

780. **Uppādādīnīti** uppādapavattādi-apadesena vutte saṅkhāre.

Pariccajitukāmatāti tappaṭibandhachandarāgappahānena vissajjitukāmatā.

Paṭisaṅkhānanti punappunaṃ tīraṇaṃ. **Muñcitvāti** nirālayabhāvāpattiyā apekkhāvissajjanavasena vissajjitvā. **Avasāneti** tathākaraṇassa uttarakālaṃ. Yāva nibbānasampakkhandanā na ijjhati, tāva vicinanepi udāsīnatāya ñāṇassa santānavasena pavattiṃ sandhāyāha **“ajjupekkhanaṃ santiṭṭhanā”**ti. **Evanti** ajjupekkhanākārasāmaññato “muñcitukamyatā ca sā santiṭṭhanā ca”ti vuttākārena.

781. **Ime dhammāti** ime ñāṇasaṅkhātā dhammā, ñāṇapariyāyo vā idha dhammasaddo, tasmā imāni ñāṇānīti attho. **Ekattāti** ekasabhāvā.

782. **Vuṭṭhānagāminī hoti** vuṭṭhānagamanato.

Saṅkhārupekkhādiñāṇattayassāti saṅkhārupekkhānulomagotrabhusaññitassa ñāṇattayassa. Kiccavasena pavattiṭṭhānavasenapi lokiyañāṇaṃ upari ṭhitattā vuttaṃ **“uttamabhāvaṃ pattattā”**ti. **Nimittabhūtato**ti vipassanāya ārammaṇabhūtato khandhapañcakato. Tenāha **“abhiniviṭṭhavatthuto”**ti.

Taṅhi vipassanāya gocarakaraṇasaṅkhātena abhinivesena abhiniviṭṭhavatthunti pavuccati. Taṃ panetaṃ sasantatipariyāpannampi parato diṭṭhitāya “bahiddhā”ti vuttaṃ. Tadeva hi “bahiddhā sabbanimittāni”ti tattha tattha vuccati. **Ajjhattapavattatoti** sasantāne micchādiṭṭhipavattana-ādito, tadanuvattakakilesakkhandhehi ca. Taṅhi sasantatiyaṃ kilesappavattabhāvato, tannimittāni asati maggabhāvanāya uppajjanaka-upādinnakkhandhapavattabhāvato ca tathā vuttaṃ. Vuṭṭhahanañca nesaṃ ārammaṇākaraṇaṃ, āyatim anuppattidhammatāpādanañca. **Ghaṭiyati** attano anantameva maggasamuppattito.

783. **Tatrā**ti tasmim̄ “abhiniviṭṭhavatthuto vuṭṭhahanato”ti saṅkhepavacane. Ajjhattabahiddhā rūpārūpapapañcakkhandhalakkhaṇattayavasena ayam̄ **mātikā** uddeso. **Ajjattam̄ abhinivisitvā**ti sasantatipariyāpannesu khandhesu vipassanam̄ paṭṭhapetvā. “**Ajjhattā vuṭṭhātī**”ti idam̄ puṭṭhānagāminiyā ajjhattadhammārammaṇattā pariyāyato vuttam̄, nipariyāyato pana maggo sabbatopi vuṭṭhātī. **Bahiddhā vuṭṭhātī**ti-ādīsupi eseva nayo. **Ekappahārenā**ti ekajjham̄, tam̄ pana ajjhattādivibhāgam̄ akatvā “yam̄ kiñci samudayadhammam̄, sabbam̄ tam̄ nirodhadhamman”ti¹ avibhāgena vuṭṭhānagāminiyā pavattivasena veditabbam̄, tayidam̄ satthu sammukhā desanānusārena ñāṇam̄ pesentassa ñāṇuttarassa sambhavatīti vadanti.

784. **Suddha-ajjhattadassanamatteneva maggavuṭṭhānam̄ na hoti** mamam̄kāravatthunopi pariññeyyattā maggasaṅkhātam̄ vuṭṭhānam̄, maggena vā vuṭṭhānam̄ **maggavuṭṭhānam̄**.

785. **Rāsim̄ katvā**ti bhūtopādāyavasena duvidham̄ antarabhedavasena anekabhedampi “ruppanatthena rūpan”ti piṇḍato gahetvā. Yathā rūpe vipassanābhiniveso yebhuyyena vipassanāyānikassa, evam̄ arūpe vipassanābhiniveso yebhuyyena samathayānikassa hoti. **Abhinivesoti** ca vipassanāya pubbhāge kattabbanāmarūpaparicchedo veditabbo. Tasmā paṭhamam̄ rūpapariggaṇhanam̄ rūpe abhiniveso. Esa nayo sesesupi.

786. **Yam̄ kiñci samudayadhammam̄, sabbam̄ tam̄ nirodhadhammanti** kāmam̄ udayabbayapariggaṇhanam̄ abhinivesoti dassitam̄, yathā-upaṭṭhite pana rūpārūpadhamme, tesañca paccaye pariggahetvā saṅkhepeneva vipassanāñāṇam̄ cārento ñāṇuttaro yathānisinnova ñāṇapaṭipāṭiyā khippameva saccāni paṭivijjhanto ekappahārena pañcahi khandhehi vuṭṭhātī nāma. Aññathā ekeneva lokiyacittena pañcannam̄ khandhānam̄ pariggahaparijānanādīnam̄ asambhavato. Na hi sanidassanasappaṭighādīm̄ ekajjham̄ ārammaṇam̄ kātuṃ sakkā. Yassa pana ekavāram̄ ñāṇena phassitam̄, puna tam̄ phassitabbameva, tādisassa vasena vuttanti vadanti.

1. Dī 1. 102; Saṃ 3. 371; Vi 3. 16; Khu 9. 332 piṭṭhesu.

788. Ettha ca abhiniveso akāraṇaṃ vuṭṭhānameva pamāṇaṃ, tasmā heṭṭhā vuttavimokkha-ariyapuggalavibhāgāpi vuṭṭhānavasena sambhavantīti dassetuṃ “**ettha ca yopi**”ti-ādi āradhāṃ. Tattha **tayopi janāti** vuṭṭhānavasena bhede asatipi abhinivesavaseneva laddhaṃ bhedaṃ gahetvā vuttaṃ.

789. **Saddhiṃ purimapacchimañāṇehīti** bhayatupaṭṭhānādipurimañāṇehi ceva gotrabhu-ādi pacchimañāṇehi ca saha. **Uddānanti** uddeso.

Yattha katthaci -pa- vaṭṭeyyūṃ taṃtaṃñāṇaṭṭhāniyassa upamāvatthuno labbhanato. **Imasmiṃ pana ṭhāneti** imasmiṃ vuṭṭhānagāminivipassanāpadese. **Sabbanti** sabbaṃ ñāṇaṃ, sabbaṃ vā ñāṇakiccaṃ pākaṭaṃ hoti vemajjhe ṭhatvā vibhāviyamānattā. **Vuttā** visuddhikathāyaṃ.

790. **Nilīyitvāti** upavisitvā. **Parāmasitvāti**¹ vīmaṃsitvā.

Gayhupagaṃ adisvāti gahaṇayogaṃ niccasārādiṃ adisvā. Cittassa vaṅkabhāvakarāṇaṃ māyādīnaṃ suṭṭhu vikkhambhanena anulomassa ujukasākhāsadisatā. Nibbānālocanato gotrabhuñāṇassa uddhaṃ ullokanasadisatā. Appatiṭṭhe nibbāne patiṭṭhitattā maggañāṇassa ākāse uppatanasadisatā.

791. **Sappavissajjanaṃ viya gotrabhuñāṇaṃ** sabbasaṅkhāragataṃ vissajjitvā nibbānassa ālambanato. **Āgatamaggaṃ oloketassa ṭhānaṃ viya maggañāṇaṃ** asammoḥapaṭivedhavasena attanopi dassanato. **Abhayaṭṭhāne ṭhānanti** abhayaṭṭhānaṃ sampattamāha, na tassa pāpuṇapaṭipattiṃ.

792. Attatthādīnaṃ anavabujjhanato “ahaṃ, mamā”ti gahaṇassa niddokkamanasadisatā. **Muñcitukamyatā**ggahaṇeneva paṭisaṅkhā santiṭṭhanāpi gahitā. Tissannampi tāsāṃ saṃsārato nikkhamanādhimuttatāya nikkhamanamaggolokanasadisatā. Magge diṭṭhe maggapaṭipatti viya anulome siddhe maggo siddho evāti anulomassa maggadassanasadisatā. Saṅkhāranimittato nikkhantattā ādittagharato **nikkhamanaṃ viya gotrabhuñāṇaṃ. Vegena**

1. Parimaṃsitvāti (Syā, Ka)

gamanam viya maggañānam vissajjetabbagahetabbapadesesu sādhanakiccavisesayogato.

793. Parato na mamāyitabbato ca passitabbānam khandhānam “**aham, mamā**”ti gahaṇassa rājagoṇānam sakagahaṇasadisatā vuttā.

794. Sabhaye abhayadassanahetutāya khandhānam “**aham, mamā**”ti gahaṇassa yakkhiniyā saṁvāsasadisatā. **Susānavijahanam viya** saṅkhārasusānam vijahitvā nibbānārammaṇavasena pavattam **gotrabhu**.

795. **Puttagiddhinī**ti puttavacchalā. **Ottappamānā**ti sārājJayamānā. Oḷārikoḷārikalobhakkhandhādivikkhambhanena saṅkhārapariccajanato anulomassa tattheva dāra koropanasadisatā.

796. **Vuṭṭhānagāminiyā -pa-** **dassanattham vuttā**, na purimāsu viya bhayatupatṭhānādīsu ṭhitassa bhāyanādi-ākāradassanatthanti adhippāyo. Aparāparuppattito, cirānubandhato, dussahato ca vaṭṭadukkkhasadisam jighacchādukkhanti āha “**saṁsāravaṭṭajighacchāyā**”ti. Kāyagatāsati eva bhojanam **kāyagatāsati bhojanam**. Sā panettha maggasampayuttā sammāsati kāyānupassanādikiccāsādhanavasena amatarasaparibhogatāya ca “**amatarasam kāyagatāsati bhojanam**”ti vuttā. Tenāha bhagavā “amataṁ te bhikkhave paribhuñjanti, ye kāyagatāsatiṁ paribhuñjanti”ti-ādī¹.

Phalarasāmalakasiṅgīveramuggamāsādi **anekaṅgasambhāram**.

Kapaṇāseribhāvādikaraṇena taṇhāsinehassa sītasadisatā. **Maggatejanti** ariyamaggasaṅkhātam indaggiṁ.

Rāgaggi-ādayo ekādasaggī vūpasananti² etthāti **ekādasaggivūpasamam**, nibbānam.

Andhakāraparetoti caturaṅgasamannāgatena andhakārena kiñci attattham vā parattham vā kātuṁ asakkuṇeyyabhāvena abhibhūto. Ñāṇamayo āloko etissāti **ñāṇālokā**, maggabhāvanā.

1. Am 1. 47 piṭṭhe.

2. Vupasamenti (Syā)

Amatabhūtaṃ, amatabhāvasādhakaṃ vā osadhaṃ **amatosadhaṃ**, nibbānaṃ. Heṭṭhā attanā vuttameva saṅkhārupekkhābyāpāraṃ nigamanavasena dassento “**tena vuttan**”ti-ādimāha.

797. Nirālayatāya taṇhāvasena bhavādisu avisaṭṭajjhāsayo hutvā tato saṅkucitacitto patilīnabhāvena carati pavattatīti patilīnacaro, tassa **patilīnacarassa**. Saṃsāre bhayassa ikkhanatāya **bhikkhuno** kāyacittavivekasiddhiyā **vivittamāsanam bhajamānassa**. **Sāmaggiyanti** yuttaṃ, patirūpanti attho. **Bhavaneti** kāmabhavādike tividhepi bhave. So hi idha bhavanatṭhena bhavanti vutto. **Na dassayeti** anuppajjanavasena na dasseyya. **Tassa tam** adassanaṃ sāmaggiyanti buddhādayo ariyā āhūti yojanā.

Niyamtvāti niyataṃ ekamsitaṃ katvā. Bojjhaṅgavisesaṃ, maggaṅgavisesaṃ, jhānaṅgavisesaṃ, paṭipadāvīsesaṃ, vimokkhavisesanti vīsesasaddo paccekaṃ yojetabbo. **Vīsesanti** chasattabhāvo sattaṭṭhabhāvo pañcādibhāvoti imaṃ yathākkamaṃ bojjhaṅgādīnaṃ ariyamagge labbhamānabhedaṃ. **Pādakajjhānanti** maggassa āsanna vuṭṭhānagāminiyā vipassanāya padaṭṭhānabhūtaṃ jhānaṃ. **Vipassanāya ārammaṇabhūtāti** maggāsannāya eva vuṭṭhānagāminiyā vipassanāya gocarabhūtā vipassitā. **Puggalajjhāsayoti** ubhinnaṃ bhede sati vipassakassa ajjhāsayo. Ettha ca paṭhamam **kecīti** vutto moravāpīvāsīmahādattatthero. Tatiyaṃ **kecīti** vutto tipīṭakacūḷābhayatthero.

Tesampi vādesu ayaṃ pubbabhāgavuṭṭhānagāminivipassanā niyametiyevāti veditabbā. Kasmā? Vipassanāniyameneva hi paṭhamattheravādepi apādakapaṭhamajjhānapādakamaggā paṭhamajjhānikāva honti, itare ca dutiyajjhānikādīmaggā pādakajjhānavipassanāniyameti tamtamjhānikāva tato tato dutiyādīpādakajjhānato uppannassa saṅkhārupekkhāñāṇassa pādakajjhānātikantānaṃ aṅgānaṃ asamāpajjitukāmatāvīrāgabhāvanābhāvato itarassa ca atabbhāvato. Yathā hi maggāsannāya vipassanāya somanassasahagatatte maggassa paṭhamādījhānikatā ca upekkhāsahagatatte pañcamajjhānikatā eva ca hoti, tato ca

bojjhaṅgādīnaṃ viśesoti teśaṃ niyamane āśannakāraṇaṃ, padhānakāraṇaṃca vuṭṭhānagāminivipassanā, na evaṃ pādakajjhānādayo. Yaśmā pana pādakajjhānena vinā vipassanāva imaṃ yathāvuttavīśesaṃ niyametuṃ na sakkoti, vuttanayena pana padhānakāraṇaṃ hotīyeva¹, taśmā “vuṭṭhānagāminivipassanāva niyameti”ti avatvā “vuṭṭhānagāminivipassanā niyametiyevā”ti vuttaṃ. Evaṃ śesavādeśupi vipassanāniyamamo yathāśambhavaṃ yojetabbo. Yathā hi pādakajjhānātikantānaṃ aṅgānaṃ aśamāpajjitukāmatāvīrāgabhāvanābhūtā vuṭṭhānagāminivipassanā adhiṭṭhānabhūtena pādakajjhānena āhitavīśeśā maggaśśa bojjhaṅgādivīśeśaniyāmikā hoti, evaṃ āraṃmaṇabhūtaśśamaśśitaajjhānātikantānaṃ aṅgānaṃ jīgucchanākāravīrāgabhāvanābhūtā śamaśśitaajjhānena āhitavīśeśā, ubhayaśśabbhāve ajjhāśayaśśasena tato aññatarena āhitavīśeśā ca vuṭṭhānagāminivipassanā maggaśśa bojjhaṅgādivīśeśaṃ niyameti.

798. **Tatra** taśmiṃ bojjhaṅgādivīśeśaniyamane. Ajhānalābhī śuddhavīpassanāyānikova śukkhavīpassako. Śo hi jhānaśśinehena vipassanāya aśnidhabhāvato śukkhā lūkhā vipassanā etaśśāti **śukkhavīpassakoti** vuccati. **Pakiṇṇakaśśaṅkhāreti** pādakajjhānato aññe śaṅkhāre. Tena pādakajjhānaśśaṅkhāreśśu śamaśśiteśśu vattaśśbameva natthīti daśśeti. “**Paṭhaṃaṃ jhānaṃ pādakaṃ katvā**”ti hi vuttaṃ. Ettha ca śukkhavīpassakādīggahaṇaṃ vipassanāniyamāśśa ekantikabhāvadaśśanaṭṭhaṃ. Na hi vuṭṭhānagāminīṃ vinā kevalaṃ pādakajjhānādayo niyamahetū diṭṭhā, vuṭṭhānagāminīṃ pana pādakajjhānādīnaṃ abhāvepi² śukkhavīpassakādīnaṃ maggaśśa paṭhamajjhānikabhāvahetu, taśmā śā bojjhaṅgādivīśeśaniyamane ekantikahetūti. Idāni yathāvuttamaṭṭhaṃ pākaṭataṃ kātuṃ “**teśaṃ hī**”ti-ādi vuttaṃ. **Ayaṃ viśeśoti** ayaṃ jhānādīnaṃ caturaṅgikādivīśeśo, na pubbe viya vipassanāniyameneva, aṭṭha kho pādakajjhānaniyamena ceva vipassanāniyamena ca. **Tesaṃpīti** pañcakanaye dutiyatatiyacatutthajjhānāni pādakāni katvā uppāditaṃ maggānaṃpi. “**Āśannaśśadese**”ti iminā vipassakena antaraṅtaraṃ paṃiṭṭhaśśamaṃpattiyā vaśśena ayaṃ viśeśo natthīti daśśeti.

1. Na hotīyeva (Śyā, Ka)

2. Abhāve (?)

799. **Tatrāpi cāti** dutiyattheravādepi. Taṃtaṃsamāpattisadisatā taṃtaṃsammasitasāṅkhāravipassanāniyamehi hoti. Tatrāpi hi vipassanā taṃtaṃvirāgāviraṅgabhāvanābhāvena somanassasahagatā, upekkhāsahagatā ca hutvā jhānaṅgādiniyamaṃ maggassa karotīti evaṃ vipassanāniyamo vuttanayeneva vedītabbo.

800. **Tanti** taṃtaṃjhānasadisabhavaṃ¹. **Svāyamattho** pādakajjhānasammasitajjhānupanissayehi vinā ajjhāsayaṃmattena asiḷḷhanāṃ upanissayena vinā saṅkappamattena sakadāgāmiphalādīnaṃ asiḷḷhanadīpakena **nandakovādena dīpetabbo**. Tattha hi yathā sotāpannāyapi paripuṇṇasaṅkappataṃ vadantena bhagavatā “yassa yassa upanissayo atthi, tassa tasseva ajjhāsayo niyāmakko, nāññassā”ti tena tena paripuṇṇasaṅkappatā hoti, na tato paraṃ, saṅkappasabbhāve satipi asiḷḷhanatoti ayamattho dīpito, evamidhāpi yassa yassa dutiyādijhānikassa maggassa yathāvutto upanissayo atthi, tassa tasseva ajjhāsayo niyāmakko, nāññassa satipi tasmīṃ asiḷḷhanato. Imasmīṃ pana vāde pādakasammasitajjhānupanissayasabbhāve ajjhāsayo ekantena hoti taṃtaṃphalūpanissayasabbhāve taṃtaṃsaṅkappo viyāti tadabhāvābhāvato “ajjhāsayo niyameṭī”ti vuttaṃ. **Etthāpīti** tatiyattheravādepi. **Vuttanayenevāti** “yato yato samāpattito vuṭṭhāyā”ti-ādinā vuttanayena. Tasmā “tatrāpi hi vipassanā”ti-ādinā idha vuttanayena tadattho vedītabbo.

801. Evaṃ vipassanāya bojjaṅgādiniyāmikataṃ dassetvā idāni paṭipadāniyāmikataṃ dassento “**sace panāyan**”ti-ādimāha. Tattha **ayanti** saṅkhārupekkhā vuttā. Sāpi hi kāmaṃ “īmaṃ vāraṃ rocesun”ti² ettha kalāpasammasanāvasāne udayabbayānupassanāya pavattamānāya uppannassa vupassanupakkilesassa tikkhattuṃ vikkhambhanena kicchatāvāraṃ dukkhāpaṭipadāti rocesunti vadanti, **aṭṭhakathāyaṃ** pana “vipassanāñāṇe tikkhe sūre pasanne vahante uppannaṃ vipassanānikantiṃ dukkhena kasirena kilamanto pariyādiyati”ti vuttattā pubbabhāve muñcitukamyatādibhāvena

1. ...bhāvaṃ (Ka)

2. Ropesunti (Syā)

pavattamānā saṅkhārupekkhā attano paṭipakkhe kicchena kasirena vikkhambhentī dukkhāpaṭipadāpakkheyeva tiṭṭhatīti. Tenāha “**ādito kilese vikkhambhayamānā**”ti-ādi. Keci pana “yena ñāṇena vipassanupakkilesā vikkhambhitā, tena saddhim idam ñāṇam ekattanayavasena ekaṁ katvā ‘**ādito kilese vikkhambhayamānā**’ti vuttan”ti vadanti. **Sappayogenā**ti cittappayogasaṅkhātena sa-ussāhanena. **Sasaṅkhārenā**ti tasseva vevacanam. Ubhayenāpi vikkhambhanassa kicchāsiddhimeva vadati. **Vipariyāyenā**ti adukkhena appayogena asaṅkhārena. Maggasaññitam icchitaṭṭhānam anugantvā parivasati vippavasati etthāti parivāso, vipassanā parivāso etassa atthīti **vipassanāparivāso**, maggapātubhāvo, tam pana sīgham kurumānā khippābhiññā nāma hotīti vuttam “**saṅikan**”ti¹. Kurumānā ayam saṅkhārupekkhāti yojanā. Yato maggo āgacchati, tam āgamanīyaṭṭhānam, tasmim **āgamanīyaṭṭhāne**. Maggassa pabhavaṭṭhāne ṭhatvā nāmam detīti sambandho. Dukkāpaṭipadādandhābhiññādivipassanānayo añño, añño eva maggoti āha “**attano attano maggassā**”ti. **Tena** āgamanato laddhanāmena “**dukkāpaṭipadā dandhābhiññā**”ti-ādīni² cattāri nāmāni labhati. Na hi maggassa sarasato edisam nāmam atthi.

Sā panāyam vuttappabhedā **paṭipadā**. **Nānā hotīti** visum visum hoti. Ekassa bhikkhuno **catūsūpi maggesu ekāva** hotīti niyamo natthi calanato. **Ahesunti** vuttam, amhākam bhagavantam sandhāya hontīti pana vattabbam. Sabbesampi hi sammāsambuddhānam cattāropi maggā sukhāpaṭipadā khippābhiññāva hontīti. Paṭipadāpasāṅgena adhipatimpi dassetuṁ “**yathā cā**”ti-ādi vuttam. **Adhipatayoti** chandādi-adhipatayo. Pubbābhisāṅkhārānurūpañhi maggo paccekam chandādhigateyyo vā hoti vīriyādīsu aññatarādhigateyyo vā, na kassaci niyamo atthi. Tenāha “**kassaci bhikkhuno**”ti-ādi.

802. Pubbe vuttappakārato sātisayam katvā anavasesato maggassa nāmalābhe kāraṇam dassetuṁ “**apicā**”ti-ādi vuttam. Tattha **sarasenā**ti sabhāvena attano pavattivisesena. **Paccanīkenā**ti paṭipakkhavasena. **Saḡuṇenā**ti attano ḡuṇavasena.

1. Vuttam. Saṅikam (Ka)

2. Dukkāpaṭipadā khippābhiññāti-ādīni (Syā), dukkhāpaṭipadāti-ādīni (Ka)

Kāmañcetta yathā āgamanena vinā saguṇena, ārammaṇena ca maggassa nāmalābho avavatthito, evaṃ paccanīkena vinā saraseneva nāmalābho, tathāpi sarasādayo paccekam nāmalābhassa kāraṇamevāti dassetuṃ “**sarasena vā**”ti-ādinā sabbattha aniyamattho **vā**-saddo vutto. Te ca asaṅkarato dassetuṃ “**sace hī**”ti-ādi āraddham. Tattha **sammasitvāti** sammasanahetu. Hetu-attho hi ayaṃ **tvā**-saddo “ghataṃ pivitvā balaṃ hoti, sīhaṃ disvā bhayaṃ hoti”ti-ādīsu viya, maggakattukāya vuṭṭhānakiriyāya ekantikahetubhūtā saṅkhārupekkhā phalūpacārena “**vuṭṭhāti**”ti vuttā. Yasmā vā¹ saṅkhārupekkhāti vuṭṭhānagāminiyā etaṃ upalakkhaṇaṃ, tadantogañce gotrabhuñāṇaṃ nimittato vuṭṭhāti, tasmā vuttaṃ ekattanayena “**sammasitvā vuṭṭhāti**”ti. **Animittavimokkhena vimuccatī**ti animittasaññitena vimuccanena vimuccati, “maggo”ti ānetvā sambandhitabbaṃ. **Vimuccatī**ti vā taṃ samaṅgī-ariyapuggalo. Sesadvayepi eseva nayo. **Idaṃ sarasato nāmaṃ nāmāti** idaṃ nimittādivirahato animittaṃ appaṇihitaṃ suññatanti tividhampi maggassa sabhāvato siddhanāmaṃ nāma.

Esāti maggo. So ca kho pubbabhāgamaggena saddhiṃ ekaṃ katvā vutto ekattanayena. **Idaṃ paccanīkato nāmaṃ nāmāti** idaṃ niccanimittādīnaṃ paṇidhiyā, attasaññāya ca pahānavasena laddhaṃ maggassa animittādināmattayaṃ paṭipakkhato siddhanāmaṃ nāma.

Suññattāti vivittattā. Na hi magge rāgādayo santi. **Rūpanimittādīnanti** rūpanimittavedanānimittādīnaṃ gahetabbānanti adhippāyo. **Rāganimittādīnanti** etthāpi eseva nayo. Saviggahānaṃ viya upaṭṭhānañhettha nimittanti adhippetam. **Idamassa saṅgato** nāmanti idaṃ rāgādivivittattā rūpanimittādipaṇidhi-ādi-abhāvavasena assa maggassa saṅgato siddham nāmaṃ.

Svāyanti so ayaṃ maggo. **Suññatanti**² sabbasaṅkhārasuññato, attasuññato ca **suññatam**. Sabbasaṅkhāranimittābhāvato **animittam**. Taṇhāpaṇidhi-ādīnaṃ abhāvena **appaṇihitam**. **Idamassa ārammaṇato nāmanti** yathā sukhārammaṇaṃ rūpaṃ “sukhan”ti vuccati, evaṃ suññatādīnaṃassa

1. Yasmā (Ka)

2. Suññanti (Ka)

nibbānassa ārammaṇakaraṇato idaṃ assa maggassa suññatādibhedam ārammaṇato siddham nāmaṃ.

803. Anattānupassanā attasuññatāya diṭṭhattā sarasato **suññatā nāma**. Tassā suññatāvipassanāya maggo vipassanāgamanena **suññato. Animittā nāma** niccanimittādīnaṃ ugghāṭanato. **Idaṃ pana** maggassa animittanāmaṃ na **abhidhammapariyāyena labbhati**. Kim kāraṇam? Abhidhamme sarasaṃ anāmasitvā paccanīkato nāmalābhato. Yo hi saguṇārammaṇehi nāmalābho, so sarasappadhāno hoti, saraseneva ca nāmalābhe sabbamaggānaṃ suññatādibhāvoti vavatthānaṃ na siyā. Tasmā abhidhamme satipi dvīhipi kāraṇehi animittanāmalābhe paccanīkatova nāmavavatthānakaraṇaṃ gayhatīti tadabhāvā na labbhati. Atha vā **na labbhatīti** aññanirapekkhehi saguṇārammaṇehi na labbhati. Kim kāraṇam? Abhidhamme sarasapaccanīkehi sahitehi nāmalābhato. Paccanīkañhi vavatthānakaraṇaṃ anapekkhitvā kevalassa sarasassa nāmahetubhāvo abhidhamme natthi, avavatthānāpattito. Tasmā attābhīnivesapaṇidhipaṭipakkhavipassanānulomā maggā satipi sarasantare paccanīkasahitena sarasena nāmaṃ labhanti. Animittamaggassa pana vipassanā nimikkapaṭipakkhā na hoti, sayam nimittaggahaṇato nimittaggahaṇānivāraṇāti tadanulomo maggopi na nimittassa paṭipakkho. Yadi siyā, nimittagatavipassanāyapi paṭipakkho siyā, tasmā vijjamaṇopi saraso vavatthānakarapaccanīkābhāvā abhidhamme animittanāmadāyako na gayhatīti. Yadi evaṃ aniccānupassanānulomo maggo abhidhamme saṅgahito siyāti? Na, suddhikapaṭipadānaye tassa saṅgahitattā. Tasmā eva hi so vutto. Suttante pana pariyāyadesanattā saguṇārammaṇamattenapi¹ nāmaṃ gayhatīti āha “**suttantapariyāyena labbhati**”ti. Yaṃ panettha vattabbaṃ, taṃ heṭṭhā vuttameva. Āgamanavasenaṃ maggassa animittanāmaṃ labbhatiyevāti dassetuṃ “**tatrā hi**”ti-ādi vuttam. **Āgamanīyatthāneti** āgamanapaṭipadāṭhāne. Sesam vuttanayattā uttānamevāti.

Saṅkhārupekkhāñānaṃ niṭṭhitam.

1. Saguṇārammaṇamaggepi (Syā)

Anulomañāṇakathāvaṇṇanā

804. **Adhimokkhasaddhā**ti pasādabhūto vatthugato nicchayo adhimokkho. Tasmā tathābhūtā bhāvanāvīsesena kiccato adhimattatāya balavatarā nibbattati. **Supaggahitanti** suṭṭhu paggahitaṃ. Asallīnaṃ paṭutarabhāvena paṭipakkhavidhamanasamatthaṃ vīriyaṃ hoti. **Sūpaṭṭhitā**ti tikkhataratāya ārammaṇābhimukhabhāvena suṭṭhu upaṭṭhitā sati hoti. **Susamāhitanti** passaddhisukhānaṃ sātisayatāya suṭṭhu samāhitaṃ ārammaṇe sammadeva ṭhapitaṃ appitaṃ viya hoti. **Tikkhatarā**ti anulomañāṇupattiyā paccayo bhavituṃ samatthabhāvena sātisayaṃ tikkhā sūrā. Saṅkhārānaṃ vicinanepi majjhatabhūtasāṅkhārupekkhā paññā **uppajjati**. **Aniccāti vā -pa-sammasitvā bhavaṅgaṃ otaratī**ti aniccādīsu ekenākārena sammasantī sattakkhattuṃ pavattitvā bhijjantī bhavaṅgaṃ otiṇṇā nāma hoti tato paraṃ bhavaṅgassa vāroti katvā. **Sāṅkhārupekkhāya katanayenevā**ti aniccādīna ālambanakaraṇanayeneva, na sammasitanayena. Tenāha “**ārammaṇaṃ kurumānaṃ**”ti. **Āvaṭṭetvā**ti nivattetvā¹ cittassa bhavaṅgavasena vattitūṃ adatvā. Visadisacittapavattisaṅkhātāya vīciyā abhāvena avīcikā, cittasantati. Kiriyaṃanodhātuyā hi bhavaṅge āvaṭṭite kiriyamayacittapavattivīpākacittupattiyā savīcikā santarā, na evaṃ manodvārāvajjanenāti vuttaṃ “**avīcikaṃ cittasantatiṃ anuppabandhamānaṃ**”ti. **Tathevā**ti yathā atītāsu dvattimsajavanavīthīsu saṅkhārupekkhā “aniccā”ti vā “dukkhā”ti vā “anattā”ti vā saṅkhāre ārammaṇamakāsi, tatheva. **Parakammanti vuccati** maggassa parikammattā paṭisaṅkhārakattā. **Upacāranti vuccati** maggassa āsannattā, samīpacārikattā vā. Anulomattaṃ² sayameva vadati.

Ayañca nayo kāmaṃ maggavīthiyaṃ paṭhamajavanassa paṭisaṅkharaṇaṭṭho, dutiyassa tato āsannaṭṭho, tatiyassa heṭṭhimuparimānaṃ anulomaṭṭho ca yuttoti vutto, tathāpi sabbesampi imā samaññā sambhavanāti dassetuṃ “**avīsesena paṇā**”ti-ādi vuttaṃ. Tattha **āsevananti** ādarena sevanāṃ. **Purimabhāgapacchimabhāgānanti** heṭṭhimānaṃ, uparimānañca dhammaḷḷhāsānaṃ. **Aṭṭhannanti** udayabbayañāṇādīnaṃ aṭṭhannaṃ. Sabbāpi vipassanā

1. Vinivaṭṭetvā (Syā)

2. Anulomattaṃ (Syā)

lakkhaṇattayasammasanakiccāva, idampi tathevāti vuttaṃ
“tathakiccatāyā”ti. Uparīti magge. **Bodhipakkhiyadhammānaṃ**
 tathakiccatāya anulometi sammosādipaṭipakkhavidhamanato. Idāni
 anulomañāṇassa tadubhayakiccānulomaṃ vitthārato dassetuṃ **“tañhī”**ti-ādi
 vuttaṃ. Tattha anulomañāṇaṃ saccapaṭicchādakamohakkhandhādīnaṃ
 sātisayaṃ vidhamanena lokiyañāṇesu ukkaṃsapariyantagataṃ, tato eva
 heṭṭhā nibbattita-udayabbayañāṇādīnampi kiccaṃ paṭipakkhadūrībhāvena
 atthato sādhentameva hutvā pavattati, tathāpavattamānañca tesāṃ kiccaṃ
 anulomentaṃ viya hotīti āha **“udayabbayavantānaṃ -pa- tathakiccatāya**
anulometi”ti. Tattha **“bhayato upaṭṭhitan”**ti imināpi ārammaṇasīsena
 ñāṇabyāpārameva vadati sappatībhayānaṃ saṅkhārānaṃ
 yathāsabhāvadassanadīpanato. Seseṣu pana sattasupi ṭhānesu ñāṇabyāpārova
 dassito. Yasmā etaṃ anulomañāṇaṃ aniccādīsū aññataralakkhaṇavaseneva
 saṅkhāre ārabha pavattati, tasmā vuttaṃ **“aniccalakkhaṇādivasena**
saṅkhāre ārabha pavattattā”ti. **Tāya paṭipattiyāti** yā sā anulomañāṇassa
 thūlathūlasaccapaṭicchādakasāṃkilesavikkhambhanapaṭipatti, tāya. Na hi
 anulomañāṇe tathā anuppanne gotrabhuñāṇaṃ nibbānaṃ ālambituṃ sakkoti
 gotrabhuñāṇe vā anuppanne maggañāṇaṃ uppajjatīti.

Vuttamatthaṃ opammena pākaṭataraṃ kātuṃ **“yathā hī”**ti-ādi vuttaṃ.
 Tattha aṭṭhannaṃ **voḥārikamahāmattānaṃ agatigamaṇaṃ pahāya**
 taṃtaṃvinicchaya karaṇaṃ viya aṭṭhannaṃ ñāṇānaṃ yathāsakaṃ
 paṭipakkhaṃ pahāya saṅkhāresu udayabbayādipaṭipatti, rañño
 majjhatabhāvo viya anulomañāṇassa purimacchimadhammakotṭhāsassa
 anukūlatā. **Tenevāti** heṭṭhimañāṇānaṃ anulomanamukhena
 uparibodhipakkhiyānaṃ anulomanatoyeva. **Saccānulomikanti vuccati**
 maggasaccassa anulomikattā.

Anulomañāṇaṃ niṭṭhitaṃ.

Vuṭṭhānagāminīvipassanākathāvaṇṇanā

805. Kiñci asaṅkhatārammaṇampi ñāṇam¹ vuṭṭhānagāminiyā ekasaṅgahanti katvā “**saṅkhārārammaṇāyā**”ti visesanaṃ kataṃ. Tañhi visesato vuṭṭhānaṃ ariyamaggaṃ gacchati upetīti vuṭṭhānagāminīti vattabbataṃ labhati. Tenāha “**sabbena sabbān**”ti-ādi. **Asammohatthanti** tattha tattha sutte pariyāyantarehi āgatāya sammohābhāvatthaṃ. **Suttalaṅsandanā**ti suttānaṃ tesāṃ tesāṃ suttapadānaṃ anusandānaṃ.

Ye lokiye saṅkhāre ārabha anulomapariyosānā vuṭṭhānagāminīvipassanā pavattati, taṃsannissitā tappaṭibaddhā taṇhā tehi vinā appavattanato tammayā nāma, tammayāva tammayatā, tammayā vā taṇhāsampayuttā khandhā, tesāṃ bhāvo tammayatā, sā eva taṇhā. Tappaṭipakkhā vuṭṭhānagāminīvipassanā **atammayatā**. Tena vuttaṃ **aṭṭhakathāyaṃ** “tammayatā nāma taṇhā, tassā pariyādiyanato² vuṭṭhānagāminīvipassanā atammayatāti vuccatī”ti³. **Nissāyāti** taṃ atammayatāṃ nissayaṃ katvā, bhāvetvāti attho. **Ekattāti** ettha ayaṃ pāḷi “atthi bhikkhave upekkhā rūpesu -pa- phoṭṭhabbesu, ayaṃ bhikkhave upekkhā nānattā nānattasitā”ti⁴, sayampi⁵ nānāsabhāvā, nānārammaṇanissitā cāti attho. Sā pana samādhisampayuttā vipassanupekkhā veditabbā. “Atthi bhikkhave upekkhā ākāsaññāyatananissitā -pa- nevaññānāsaññāyatananissitā, ayaṃ bhikkhave upekkhā ekattā ekattasitā”ti⁶. Yā hi taṃtaṃrūpacittuppādapariyāpannā upekkhā, sā ekasabhāvattā, ekārammaṇattā ca ekattā, ekattasitā cāti vuccati, sā pana taṃtaṃjhānasahagatavedanupekkhā ca tadārammaṇavipassanupekkhā, cāti vadanti. **Taṃ pajahathāti** tadārammaṇakilesapahānena pajahatha. Tenāha “**taṃ samatikkamathā**”ti.

Nibbidāti vuṭṭhānagāminī. Tattha hi sutte **virajjatīti** maggakkiccamāha, **vimuccatīti** phalakkiccam.

1. Asaṅkhatārammaṇaṃ viññāṇampi (Syā)

2. Pariyādānato (Aṭṭhakathā)

3. Ma-Ṭṭha 4. 189 piṭṭhe.

4. Ma 3. 263 piṭṭhe.

5. Ayampi (Syā)

6. Ma 263 piṭṭhe.

Susimasuttaṃ nidānavagge. Tattha **dhammaṭṭhitiññaṃ** vuṭṭhānagāminīti **vuttā** dhammaṭṭhitiyaṃ paṭiccasamuppāde asammuyhanavasena pavattanato. **Nibbāne ñāṇanti** maggañāṇamāha.

Saññā kho poṭṭhapādāti ettha kāmaṃ “saññā”icceva vuccati, pubbe pana “saññaggaṃ phusati”ti vuttattā āha “**saññagganti vuttā**”ti.

Paṭipadāññānadassanavisuddhīti tadekadesabhūtā vuṭṭhānagāminī vuttā. Samudāyesu hi pavattā vohārā avayavesupi pavattantīti.
Pārisuddhipadhāniyaṅganti pārisuddhiyā padhānakāraṇaṃ.

Tīhi nāmehīti anulomagotrabhuvodānasaṅkhātehi tīhi nāmehi.

Kittitāti thomitā ariyamaggādhiṭṭhānatāya. Mahantānaṃ sīlakkhandhādīnaṃ esanaṭṭhena **mahesinā** sammāsambuddhena. Santakilesatāya **santā**. **Yoganti** bhāvanaṃ, bhāvanābhīyogaṃ vā.

Paṭipadāññānadassanavisuddhiniddesaṇṇanā niṭṭhitā.

Iti ekavīsatiaparicchedavaṇṇanā.

22. Nāṇadassanavisuddhiniddesavaṇṇanā

Paṭhamamaggañāṇakathāvaṇṇanā

806. Idāni nāṇadassanavisuddhiyā niddese anuppatte sā yassa nāṇassa¹ anantaram uppajjati, tam tāva dassento “**ito param gotrabhuñānam hoti**”ti āha. **Ito paranti** ito anulomañāṇato upari. Tanti gotrabhuñānam. **Neva paṭipadāñāṇadassanavisuddhim bhajati** aniccādivasena saṅkhārānam aggahaṇato. **Na nāṇadassanavisuddhim bhajati** satipi nibbānārammaṇatte kilesānam akhepanato. Tato evetaṃ viññāṇadhātūnam visayaṃ uddesantaṃ dassanakiccaṃ karontaṃ kiriyamanodhātu viya maggassa āvajjanaṭṭhāniyaṃ vuccati. **Antarāti** chaṭṭhasattamavisuddhīnam vemajjhe. **Abbohārikameva hoti** ubhayavisuddhilakkhaṇatābhāvato. Tathāpi vuṭṭhānagāminiyā pariyoṣānatāya vipassanāpakkhitaṃ. Tenevassa tamsotapatitā. Tenāha “**vipassanāsote -pa- saṅkham gacchatī**”ti. Etenassa paṭipadāñāṇadassanavisuddhibhajanam dasseti. Sotassa ariyassa² ādito pajjanam sotāpatti, so eva maggo, sotaṃ vā ariyaṃ ādito pajjati adhigacchatīti sotāpatti, paṭhamako. Tassa maggo **sotāpattimaggo**. Paṭisandhivasena sakideva imaṃ manussalokaṃ āgacchatīti sakadāgāmī, tassa maggo **sakadāgāmimaggo**. Paṭisandhivasena kāmabhavam na āgacchatīti anāgāmī, tassa maggo **anāgāmimaggo**. Kilesādīnam hananādīnā araham, aggamaggaṭṭho. Tassa bhāvo arahattaṃ, so eva maggoti **arahattimaggo**. **Catūsu maggesu nāṇam** ekajjham gahetvā **nāṇadassanavisuddhi nāma**.

Tehi tīhipīti heṭṭhā tiṇṇam anulomañāṇānam vuttatā vuttaṃ, tīsu vā dvinnam antogadhattā. **Tīhipīti** vā vikappantarasaṃpiṇḍanatto pi-saddo, tena tīhipi dvīhipīti vuttaṃ hoti. **Attano balānurūpenāti** attano attano ānubhāvānukūlam. Paṭhamañhi anulomañāṇam sabboḷārikam, dutiyaṃ tato nāti-oḷārikam, tatiyaṃ tato nāti-oḷārikam tamarā antaradhāpeti. Atha vā **balānurūpenāti** heṭṭhā saṅkhārupekkhāya

1. Nāṇadassanassa (Syā)

2. Ariyamagassa (Syā)

āhitabalānurūpena. Pubbābhisāṅkhāravasena hi anulomañāṇassāpi maggañāṇassa viya saddhāvimuttadiṭṭhippattānaṃ pavatti-ākārasiddho attheva mudutikkhatāviseso. **Palibodhato upaṭṭhāti** palibodhabhāvapaṭicchādakassa tamassa antaradhāpitattā. “**Āsevanante**”ti iminā dutiyassa vā tatiyassa vā anulomañāṇassa anantaraṃ gotrabhuñāṇupatti, na paṭhamassāti dasseti tassa anāsevanattā. Na hi aladdhāsevanaṃ gotrabhuñāṇaṃ uppādetuṃ sakkoti. Nimittādivirahato, tabbidhurato ca “**animittan**”ti-ādinā nibbānaṃ visesitaṃ. **Puthujjanagottanti** ariyehi asammissaṃ puthujjanasamaññaṃ. **Gottanti** hi ekavaṃsajānaṃ samānā samañña, evaṃ idhāpīti. **Puthujjanasaṅkhanti** tasseva vevacanaṃ, **puthujjanabhūminti** puthujjanavatthum. Ekantikātāya ekavārameva ca uppajjanato **apunarāvattakarā**.

Bahiddhā vuṭṭhānavivaṭṭaneti asaṅkhatadhātuyā bahibhāvato bahiddhāsaññitā saṅkhāragatā vuṭṭhānabhūte vivaṭṭane nipphajjamāne paññā. **Abhibhuyyati** abhibhavati. **Pakkhandati** anupavisati. Ettha ca “**uppādaṃ abhibhuyyati**”ti-ādinā puthujjanagottābhibhavanaṃ tadatikkamanamāha. “**Anuppādaṃ pakkhandati**”ti-ādinā ariyagottabhāvanaṃ tadubhayabhāvato.

807. Ekāvajjanānaṃ nānāvīthitā natthīti na taṃ nisedhanāya ekavīthiggahaṇaṃ, atha kho nānārammaṇānampi ekāvajjanānaṃ nānāvīthitā natthīti dassanattanti daṭṭhabbaṃ. **Mahāmātikanti** mahantaṃ udakavāhakaṃ. **Laṅghitvāti** anotaranto eva atikkamivā. **Ullaṅghitvāti** uparibhāgeneva laṅghitvā. Ninnapoṇapabbhāratā uttaruttaravisiṭṭhā ninnatāva.

Aṭṭhahi ñāṇehi anukkamena āhitavisesaṃ anulomañāṇaṃ nibbānārammaṇassa ñāṇassa paccayo bhavituṃ samatthaṃ jātanti āha “**udayabbayānupassanādinā vegena dhāvivā**”ti. Rūpaṃ anekasantatisambandhatāya anekavaṭṭaracitā rajju viya hotīti vuttaṃ “**rūparajjuṃ vā**”ti. Atta bhāvassa rukkhaṭṭhāniyatāya vuttattā taṃ sambandhadāṇḍaṭṭhāniyatā vedanādīsu ekasseva yuttā, na vedanādisamudāyassāti vuttaṃ “**vedanādīsu aññataradaṇḍaṃ vā**”ti. **Anulomāvajjanenāti** anulomassa āvajjanena. Yena āvajjanena anulomañāṇaṃ uppajjati, tena taṃ ārammaṇaṃ. “**Paṭhamena anulomacittena ullaṅghitvā**”ti idaṃ sakkāyatīrassa tassa

atikkamanārambhatāya vuttam. “**Dutiyena nibbānaninnaṇaṇapabbhāramānaso**”ti idam tassa sabbasaṅkhārato sātisaṃyam alaggaṃ hutvā visaṅkhāre allīnabhāvato vuttam. **Nibbāne** ārammaṇakaraṇavasena **patati** yogāvacaro. **Ekārammaṇeti** ekavāraṃyeva ālambite ārammaṇe. Tenāha “**aladdhāsevanatāyā**”ti. Tena ekārammaṇe āsevanā upakāravatī, na tathā nānārammaṇehi dasseti.

808. **Tatrāti** anulomagotrabhūnam itarītarakiccākaraṇe. **Nakkhattayoganti** nakkhattena candassa yogaṃ, nakkhattayogavibhāvanīyam vā kālam, divasanti attho.

Tatthāti-ādi upamāsaṃsandanam.

Evaṃ nibbattāhīti anulomañāṇāni viya saṅkhāre anālambitvā ahaṃ viya nibbānārammaṇe vattāhīti maggassa gotrabhunā dinnasaññāmuñcanam, anubandhanañca nibbānārammaṇakaraṇameva sandhāya vuttam.

809. **Tatrāti** tasmim gotrabhunā dinnasaññam amuñcitvā viya tena gahitārammaṇeyeva vattitvā maggassa lobhakkhandhādiniḃbijjhane. Usum asati khippatīti **issāso**, dhanuggaho. Saragocaraṭṭhānam nāma aṭṭha-usabhamattam. Tañca kho dūre pātino majjhimapurisassa vasena catutatthāya yaṭṭhiyā vīsatiyaṭṭhi usabham, tena **aṭṭha-usabhamatte padese** tatthavasena cattārīsādhikachasatahatthe padese. **Phalakasatanti** asanasāramayam phalakasatam. Kumbhakāracakkasadise **cakkayante**. **Āvijjhītvāti** bhametvā. Daṇḍakaghaṭṭanāya uppādetabbasaddo **daṇḍakasaññā**. Phalakasabhavinivijjhanassa paccayabhūtā **daṇḍakasaññā viya**¹ **gotrabhuññam** lobhakkhandhādiniḃbijjhanassa maggaññassa paccayabhāvato. **Issāso viya maggaññam** nibbijjhītabbaniḃvijjhanato.

810. Aṭṭhamabhavato paṭṭhāya nibbattanakam **anamataggasaṃsāravatṭadukkkhasamuddam soseti**. Saddhāddhanam sīladhanam hiridhanam ottappadhanam sutadhanam cāgadhanam paññādhananti imesam **sattannam ariyadhanānam**. **Sammukhībhāvanti** paccakkhasiddhim.

1. Daṇḍakasaññam viya (Ka)

Pāṇātipātādipaṅcaverāni ceva paṅcaviṣatimahābhayāni cāti **sabbaverabhayāni. Aññesañca** ratanattaye niviṭṭhasaddhādīnaṃ. Samudāye pavatto sotāpattimaggasaddo tadekadeseṇi pavattatīti āha “**sotāpattimaggena sampayuttaṃ ñāṇaṃ**”ti.

Paṭhamamaggañāṇaṃ niṭṭhitaṃ.

Sotāpannapuggalakathāvaṇṇanā

811. **Tasseva** sotāpattimaggacittassa. Kāmañcetta nātittikkhapaññassa dve, tikkhapaññassa tīṇi phalacittāni honti, avisesato pana gahitassa maggassa vasena “**dve, tīṇi vā**”ti vuttaṃ. **Samādhimānantarikaññamāhūti** yaṃ attano pavattisamanantaram niyameneva phalappadānato ānantarikasamādhīti āhūti attho. Anantameva pavattanakaṃ phalaṃ anantaram, tattha niyutto, taṃ vā payojanaṃ etassāti ānantariko, maggo.

Āsevananteti āsevanato ante, āsevanalābhino anulomañāṇassa anantaranti attho. Laddhāsevanameva anulomaṃ gotrabhuṃ uppādeti. Upari pana cha, satta vā javanāni pavattanti, tasmā cattāri phalacittāni hontīti vadeyyāti āha “**sattacittaparamā ca kovajjanavīthi**”ti.

Taṃ pana na sārato paccetabbanti yojanā. Yaṃ panettha vattabbaṃ, taṃ heṭṭhā vuttameva.

812. **Ettāvatāti** paṭhamamaggānantaram phalassa uppattimattena. **Bhusaṃ pamattopīti** devarajjacakkavattirajjadipamādaṭṭhānaṃ āgamma bhusaṃ pamattopi. **Yesam** yathāvutta-āvajjanajavanacittānaṃ **uppattiyā esa** sotāpanno **paccavekkhati** nāmāti adhippāyo.

Eteneva pasaṅgena sesānaṃ ariyānaṃ paccavekkhaṇāni dassetuṃ “**yathā cā**”ti-ādi vuttaṃ.

Ukkatṭhaparicchedoyeva ceso, yadidaṃ pañcannaṃ, catunnañca paccavekkhaṇānaṃ dassananti attho. “**Abhāvenevā**”ti etena pahīnāvasiṭṭhakilesapaccavekkhaṇasamatthatā kassaci hoti, kassaci na hotīti dasseti. Lobho eva **lobhadhammo**.

Dutiyamaggañānakathāvaṇṇanā

813. **Kāmarāgabyāpādānaṃ tanubhāvāyāti** etesaṃ kilesānaṃ tanubhāvattaṃ. Tattha dvīhi kāraṇehi tanubhāvo adhiccuppattiyā, pariyaṭṭhānamandatāya ca. Sakadāgāmissa hi vaṭṭānusārimahājanassa viya kilesā abhiṇṇaṃ na uppajjanti, kadāci kadāci viraḷākārā hutvā uppajjanti. Tathā uppajjantāpi maddantā chādentā andhakāraṃ karontā na uppajjanti, dvīhi pana maggehi pahīnattā mandamandā tanukākārā hutvā uppajjanti. Keci pana “sakadāgāmissāpi kilesā cirena uppajjanti, uppajjantāpi bahalāva uppajjanti. Tathā hissa puttadhītarō dissantī”ti, taṃ akāraṇaṃ vatthupaṭisevanena vināpi gabbhaggahaṇasabbhāvato. Tasmā vuttanayeneva dvīhi kāraṇehi tesāṃ tanubhāvo veditabbo. **Dutiyāyāti** gaṇanavasēnapi dutiyāya, uppattivāsēnapi dutiyāya **bhūmiyā**. **Pattiyāti** sāmāññaphalassa paṭilābhāya. Tañhi sampayuttānaṃ nissayabhāvato te dhammā bhavanti etthāti **bhūmi**. Yasmā vā samānēpi lokuttarabhāve sayampi bhavati uppajjati, na nibbānaṃ viya apātubhūtaṃ, tasmāpi “**bhūmi**”ti vuccati. **Yogaṃ karotīti** vipassanābhīyogaṃ karoti. “Navahākārehi indriyāni tikkhāni bhavanti”ti-ādinā¹ vuttanayeneva yadaggena indriyānaṃ tikkhataṃ sampādeti, tadaggena balāni, bojjhaṅgāni ca paṭutarabhāvaṃ āpādentō **indriyabalabojjhaṅgāni samodhānetvā** lakkhaṇattayatīraṇavasena **ñāṇena parimaddati**². Tattha aparāparaṃ ñāṇaṃ cārento **parivatteti**. Tenāha “**vipassanāvīthiṃ ogāhatī**”ti. **Vuttanayenevāti** udayabbayañāṇādīnaṃ uppādane vuttanayena. **Gotrabhu-anantaranti** ettha gotrabhu viya gotrabhu. Paṭhamamaggapurecārikañāṇaṃhi puthujjanagottābhībhavanato, ariyagottabhavanato ca nippariyāyato gotrabhūti vuccati, idaṃ pana taṃsadiatāya pariyāyato gotrabhu.

1. Visuddhi 2. 248 piṭṭhe.

2. Parimajjati (Ka)

Ekaccasaṅkilesavisuddhiyā, pana accantavisuddhiyā ārammaṇakaraṇato ca vodānanti vuccati. Tenāha **paṭṭhāne** “anulomaṃ vodānassa anantarapaccayena paccayo”¹. Yasmā pana **paṭisambhidāmagge** uppādādi-abhibhavanatthaṃ upādāya “aṭṭha gotrabhudhammā samādhivasena uppajjanti, dasa gotrabhudhammā vipassanāvasena uppajjanti”²ti-ādīsu² gotrabhunāmenevetam āgataṃ, tasmā idhāpi “gotrabhu-anantaran”²ti vuttanti daṭṭhabbam.

Dutiyañāṇaṃ niṭṭhitam.

Tatiyamaggañāṇakathāvaṇṇanā

814. **Sakidevāti** ekavāraṃyeva. “**Imaṃ lokaṃ āgantvā**”³ti iminā pañcasu sakadāgāmīsu cattāro vajjetvā ekova gahito. Ekacco idha sakadāgāmiphalaṃ patvā idheva loke parinibbāti³, ekacco idha patvā devaloke parinibbāti, ekacco devaloke patvā tattheva parinibbāti, ekacco devaloke patvā idhūpapajjitvā parinibbāti. Ime cattāropi idha na gahitā. Yo pana idha patvā devaloke yāvatāyukaṃ vasitvā puna idhūpapajjitvā parinibbāti, ayaṃ ekova idha gahitoti veditabbo.

Kāmarāgabyāpādānaṃ anavasesappahānāyāti tesamīyeva sakadāgāmimaggena tanukatānaṃ⁴ saṃyojanānaṃ niravasesappahānāya. Paṭisandhivasena kāmabhavassa anāgamanato **anāgāmī**.

Tatiyañāṇaṃ niṭṭhitam.

Catutthamaggañāṇakathāvaṇṇanā

815. **Opapātikoti** upapātayoniko. Imināssa gabbhaseyyā paṭikkhittā. **Tattha parinibbāyīti** tattha suddhāvāse parinibbāyitā. **Anāvattidhammo tasmā lokāti** paṭisandhiggaṇavasena tasmā lokā

1. Abhi 8. 138 piṭṭhe.

3. Parinibbāyati (Abhi-Ṭṭha 3. 48 piṭṭhe)

2. Khu 9. 65 piṭṭhe.

4. Patanukatānaṃ (Syā)

idha anāvattanasabhāvo, buddhadassanadhammassavanānaṃ panatthāya āgamaṇaṃ hotiyeva.

Rūparāga-arūparāgamāna-uddhacca-avijjānaṃ anavasesappahānāyāti etesaṃ pañcannaṃ uddhambhāgiyasaṃyojanānaṃ nissesappajahanatthāya. Tatha rūpabhava chandarāgo **rūparāgo**. Arūpabhava chandarāgo **arūparāgo**. **Māno** arahattamaggavajjhamāno. Tathā **uddhaccāvijjā**.

Catutthañāṇaṃ niṭṭhitaṃ.

Arahantapuggalakathāvaṇṇanā

816. **Mahākhiṇāsavoti** mahānubhāvātānibandhanaṃ pūjāvacaṇametaṃ, na upādāyavacaṇaṃ yathā “mahāmoggallāno”ti. Na hi cūlakhiṇāsavo nāma¹ atthi. Antimadehaṃ dhāretīti **antimadehadhārī**.

Khandhakilesābhisankhārābhārānaṃ ohitattā oropitattā **ohitabhāro**. Anuppatto sadatthaṃ sakatthanti **anuppattasadattho**. **Sadatthoti** ca arahattaṃ veditabbaṃ. Tañhi attupanibandhanaṭṭhena, attānaṃ avijhanaṭṭhena, attano paramatthaṭṭhena ca attano atthattā sakatthoti vuccati. Parikkhīṇāni dasapi bhavasāmyojanāni etassāti **parikkhīṇabhavasāmyojano**. Khandhādi-atthamā sammā aññāya vimuttoti **sammadaññāvimutto**. Aggo ca so dakkhiṇeyyo ca, aggadakkhiṇaṃ vā arahatīti **aggadakkhiṇeyyo**.

Bodhipakkhiyakathāvaṇṇanā

817. Catunnaṃ maggañāṇānaṃ vasena **catuññāya**. **Ānubhāvavijjānanatthanti** satipaṭṭhānapāripūri-ādikassa ānubhāvassa bodhanattham.

Paripuṇṇā bodhipakkhiyā etassāti paripuṇṇabodhipakkhiyo, maggo. Tassa bhāvo **paripuṇṇabodhipakkhitabhāvo**. Vuṭṭhānabalehi sampayuttatāva² **vuṭṭhānabalasamāyogo**, ye saṃyojanādayo **yena** paṭhamamaggādinaṃ **pahātabbā**.

1. Cullakhiṇāsavo nāma (Ka)

2. Saṃyuttatāva (Syā)

818. Bujjhaṇaṭṭhena vā bodho, maggacittuppādo. Tassa bujjanakiriyāya anuguṇabhāvato pakkhe bhavāti **bodhipakkhiyā**.

819. Tesu bodhipakkhiyesu. **Ārammaṇesūti** kāyādi-ārammaṇesu. **Okkhanditvāti** anupavisitvā. **Pakkhanditvāti** tasseva vevacanaṃ. **Upaṭṭhānatoti** asubhākārādiggahaṇavasena upagantvā avaṭṭhānato. Kāyādīsu asubhākārādiggahaṇaṃ pubbabhāgasatipaṭṭhānavasena subhasaññā dipahānakiccasādhanam maggasatipaṭṭhānavasena veditabbaṃ. Tattha hi ekāva sati catukiccasādhanavasena pavattati.

820. **Padahantīti** vāyamanti, kāyacittāni paggaṇhanti vā. Asobhāhetūnaṃ saṃkilesadhammānaṃ pajahanena, sobhāhetūnaṃca vodānadhammānaṃ bhāvanena **sobhanaṃ**, sundaranti attho. **Seṭṭhabhāvāvahanatoti** pāsamsatamabhāvasādhanato. **Padhānabhāvākāraṇatoti** uttamabhāvahetuko.

821. **Pubbe vuttenāti** iddhi vidhañāṇaniddese¹ vuttena. **Ijjanatṭho** nipphajjanatṭho, paṭilābhasampadā vā, yena vā ijjhanti iddhā vuddhā ukkaṃsagatā honti, taṃ **ijjhanam**. Samādhipadhāna saṅkhārapamukhā maggadhammā idha “iddhī”ti adhippetā. **Pubbaṅgamatṭho** adhipatipaccayabhāvo. Tasmā sotāpattimaggo ijjatīti **iddhi**, tasmā sampayuttā chandādayo **pubbaṅgamatṭhena pādo**. Tassā eva **phalabhūtāya** vuṭṭhānagāminiyā chandādayo **pubbabhāgakāraṇatṭhena pādo**. **Soti** iddhipādo. **Ime lokuttarā vāti** ime yathāvuttā chandādayo uttaracūḷabhājanīye āgatanayena lokuttarā veditabbā. **Chandādi-adhipativasena paṭiladdhadhammāpi** phassādayo iddhipādā hontīti attho. Kāmañcetha iddhipādo no adhipati, adhipati vā no iddhipādo nāma natthi, yathā pana ekasmiṃ rajje rajjārahesu catūsu rajakumāresu ekasmiṃ kāle ekova rajjamanusāsati, na sabbe, evaṃ ekamekasmiṃ cittuppāde ekova adhipati, iddhipādo ca hotīti veditabbo.

1. Visuddhi 2. 6 piṭṭhe.

822. **Assaddhiyaṃ** saddhāpaṭipakkhā akusalā dhammā, avatthugato paśādapatirūpako micchādhimokkho vā. **Kosajjaṃ** thinamidhpadhāno akusalacittuppādo. **Pamādo** satisammoso tathāpavattā akusalā khandhā. **Abhibhavanasaṅkhātena adhipatiyaṭṭhenāti** assaddhiyādīnaṃ abhibhavanato abhibhavananti vattabbena adhimokkhapaggaha-upaṭṭhāna-avikkhepapajānanassa ekalakkhaṇena sampayuttadhammesu adhipatiyaṭṭhena. **Assaddhiyādīhi cāti ca-saddo** samuccayatto aṭṭhānapayutto, tasmā akampiyaṭṭhena ca sampayuttadhammesu thirabhāvena ca **balanti** evamettha adhippāyo veditabbo.

823. **Bujjhanakasattassāti** catunnaṃ ariyasaccānaṃ paṭivijjhanakasattassa. Yo heso lokuttaramaggakkhaṇe uppajjamānāya sati-ādidhammasāmaggiyā karaṇabhūtāya bujjhati kilesasantānaniddāya uṭṭhahati, cattāri vā ariyasaccāni paṭivijjhati, nibbānameva vā sacchikarotīti bodhīhi vuccati ariyasāvako, tassa bodhissa bujjhanakasattassa aṅgāti **bojjhaṅgā**. **Niyyānikaṭṭhenāti** vaṭṭato nissaraṇaṭṭhena.

824. Pubbabhāge nānācittesu labbhantīti sambandho. **Cuddasavidhenāti** ānāpāna iriyāpatha catusampajañña paṭikkūlamanasikāra dhātumanasikārapabbāni, nava sivathikapabbāni cāti evaṃ cuddasavidhena. **Kāyaṃ parigaṇhato ca kāyānupassanāsatiṭṭhānaṃ** labbhati, na vedanādayo parigaṇhato. Esa nayo sesesupi. “Sukhaṃ vedanan”ti-ādināti vā “sāmisāna”ti-ādināti vā “nirāmisāna”ti-ādināti vā evaṃ **navavidhena**. Sarāgadosamohasāṃkhittamahaggata samāhitasa-uttara vimuttapadānaṃ sapaṭipakkhānaṃ vasena **soḷasavidhena**. Nīvaraṇupādānakkhandhāyatanabojjhaṅgasaccapabbānaṃ vasena **pañcavidhena**. **Imasmim attabhāveti** paccuppane attabhāve. **Anuppannapubbanti** attano abhūtapubbaṃ. **Parassa uppannaṃ akusalānaṃ disvā** tannimittaṅca vadhabandhārahādīnīti adhippāyo. **Tassāti** tādisassa. Bhavati hi taṃsadisepi tabbohāro yathā “tāniyeva osadhānī”ti. **Tassa pahānāyāti** etthāpi eseva nayo. Jhānavipassanā ito aññasmim attabhāve uppannapubbāpi siyunti vuttaṃ “**imasmim attabhāve anuppannapubban**”ti, chandiddhipādasammāvācānaṃyeva gahaṇaṃ. Tesu vuttesu sesiddhipādasasaviratiyo

atthato vuttāva hontīti lakkhaṇahāravasena ayamattho veditabbo. **Evam nānācittesu labbhanti** pubbabhāge ete satipaṭṭhānasammappadhāna-iddhipādā. **Catunnam nāṇānanti** catunnam ariyamaggañāṇānam. Kāmaṃ sabbepe bodhipakkhiyadhammā maggacittuppādapariyāpannāva, tathāpi sātisayo sammappadhānabyāpāro maggakkhaṇeti vuttaṃ “**phalakkhaṇe ṭhapetvā cattāro sammappadhāne**”ti. **Avasesā tettimsa labbhanti**, te ca kho pariyāyato, na nipariyāyatoti adhippāyo.

825. **Sesesu panāti** iddhipādādāsu pañcasu koṭṭhāsesu. Yathā sativīriyesu “satipaṭṭhānaṃ sammappadhānaṃ”ti saṅkhipanavasena hāpanaṃ, “kāyānupassanā”ti-ādivibhāgadassanavasena vadḍhanaṃ atthi, īdisaṃ hāpanavaddhanaṃ natthīti attho.

826. Idāni sabbesu eva yathārahaṃ labbhamānavibhāgadassanattham “**apicā**”ti-ādi āradḍham. Tattha **tesūti** sattatiṃsāya bodhipakkhiyadhammesu. **Chaddhāti** ekadhā dvedhā catudhā pañcadhā aṭṭhadhā navadhāti evaṃ chappakārena **te bhavanti**.

Chandiddhipādādivasenāti chando chandiddhipādavaseneva, cittaṃ cittiddhipādavaseneva, pītipassaddhi-upekkhā bojjaṅgavaseneva, saṅkappādayo maggavasenevāti evaṃ **nava ekavidhāva honti**.

Cuddasseva asambhinnāti sati vīriyaṃ chando cittaṃ paññā saddhā samādhi pīti passaddhi upekkhā sammāsaṅkappo sammāvācā sammākammanto sammā-ājīvoti ime asambhinnā padantarāsambhedena vinā aggahitaggahaṇena gayhamānā cuddaseva ca sabhāvadhammā. **Cuddasāti** ca ukkaṃsaparicchena vuttaṃ. Tañca kho paṭhamajjhānikamaggacittuppādavasena, dutiyajjhānike pana sammāsaṅkappābhāvato terasa, tatiyacatutthapañcamajjhānikesu pītisambojjaṅgābhāvato dvādasa honti. “**Sattatiṃsappabhedato**”ti idampi ukkaṃsavaseneva vuttaṃ, avakaṃsato pana vuttanayena ekasmiṃ khaṇe chattimsa, pañcatimsa honti, catunnam adhipatīnaṃ ekajjham anuppajjanato ekasmiṃ khaṇe ekasseva iddhipādassa sambhavoti dvattimsa ca hontīti veditabbaṃ.

Sattatimsapabhedato kathanti āha “**sakiccanipphādanato**”ti-ādi, ekaccassa sabhāvato ekassāpi attano ānubhāvānurūpakāyānupassanāditaṃtaṃkiccāsādhanaṃ attho. **Sarūpena ca vuttitoti** abhedassa cittiddhipādādikassa sarūpeneva pavattanato ca.

Etthāti nānadassanavisuddhiyaṃ. Kasmā pana bodhipakkhiyesu jhānakoṭṭhāso na gahito, nanu jhānarahito ariyamaggo natthīti? Saccam natthi, tato eva na kho panetaṃ evaṃ daṭṭhabbam “bodhipakkhiyesu jhānam na gahitaṃ”ti lakkhaṇūpanijjhānalakkhaṇassa jhānassa maggaggahaneva gahitattā. Tañhi sandhāya “yasmim samaye lokuttaram jhānam bhāveti”ti-ādi¹ vuttam. Ārammaṇūpanijjhānalakkhaṇassa panettha sambhavo eva natthi. Aparo nayo—kasmā pana bodhipakkhiyesu jhānakoṭṭhāso na gahito, nanu jhānarahito ariyamaggo natthi, na ca taṃ paṭipadā viya ekantapubbabhāgiyaṃ, nāpi ekaccapaṭisambhidā viya magganissando, atha kho maggacittuppādapariyāpanno, yato “lokuttaram jhānam bhāveti”ti¹ vuttam, maggamaggaparivāradhammā ca bodhipakkhiyadhammāti? Vuccate—yaṃ tāva vuttam jhānarahito ariyamaggo natthī”ti, tattha na ariyamaggasampayogamattena jhānassa bodhipakkhiyatā labbhati atippasaṅgato. Āhārādīnampi hi bodhipakkhiyatā āpajjeyyāti. Etena maggacittuppādapariyāpannatā bodhipakkhiyabhāvassa akāraṇanti dassitaṃ hoti.

Yaṃ pana vuttam “maggamaggaparivāradhammā ca bodhipakkhiyā”ti, tattha parivāraṭṭho kiṃ sahapavatti-attho, udāhu parikkhāraṭṭhoti? Yadi purimo pakkho, so pageva nillocito. Atha dutiyo, idaṃ vicāretabbam. Kathaṃ pavattamānam jhānam maggassa parikkhāro? Yadi sahaṇātipaccayabhāvena, evaṃ sati phassādīnampi maggaparikkhāratā āpajjati. Atha paṭipakkhavidhamāsanena, na sabbe jhānadhammā paṭipakkhavidhamāsanasamatthā. Na hi vicāro, vedanā ca kassaci saṃkilesadhammassa ujupaṭipakkhabhāvena pavattanti. Yaṃ pana **peṭake** “sukham uddhaccakukkucassa, vicāro vicikicchāya paṭipakkho”ti vuttam, taṃ pariyāyena vuttam. Na hi sukham sayam uddhaccakukkucassa paṭipakkho, paṭipakkhassa pana samādhissa paccayatāya paṭipakkho. Na ca vicāro paññā viya, adhimokkho viya vā vicikicchāya paṭipakkho, paṭipakkhassa paṭirūpatāya pana

1. Abhi 1. 72, 84 piṭṭhesu.

paṭipakkho vutto. Tathā pītipi na byāpādassa adoso viya ujupaṭipakkho, adosasampayogato pana paṭipakkho vutto. Tena vuttam “taṃ pariyāyena vuttan”ti. Vitakkasamādhayo eva pana jhānadhammesu ujukam paṭipakkhavidhamsanasamatthāti paṭipakkhavidhamsanasamatthassa paripuṇṇassa jhānakoṭṭhāsassa abhāvato na cassa bodhipakkhiyesu saṅgho kato. Yasmā pana sammāsaṅkappo, sammāsamādhi ca maggapariyāpannā jhānadhammā, tasmā te sandhāya taṃsampayuttatāya vā itarepi gahetvā pariyāyena vuttam **pāḷiyam** “yasmim samaye lokuttaram jhānam bhāveti niyyānikan”ti-ādi¹.

Vuṭṭhānabalasamāyogakathāvaṇṇanā

827. **Vuṭṭhānam** nimittato, pavattato ca vuṭṭhānam. **Balasamāyogo** samathavipassanābalehi sampayuttatā. Pariññābhisamayādivasena dukkhādīsu visesadassanaṭṭhena maggapaññāpi vipassanāti vuccatīti “**lokiyavipassanā**”ti visesetvā vuttam. Tenevāha “vuṭṭhānaṭṭhena samathavipassanam yuganaddham bhāveti”ti². Nimittārammaṇattā neva nimittā vuṭṭhāti, pavatti -pa- chindanato na pavattā vuṭṭhātīti yojanā. Tattha nimittato vuṭṭhānam saṅkhāranimittam nissajjitvā nibbānārammaṇakaraṇam. Pavattato vuṭṭhānam hetunirodhena āyatim vipākappavattassa anuppavattidhammatāpādanam. Tenāha “**samudayassa asamucchindanato pavattā na vuṭṭhātī**”ti.

Dubhatoti ubhato, da-kārāgamam katvā evam vuttam. **Dubhāti** vā padantamevetam ubhayasaddena samānattham. **Dassanaṭṭhenāti** pariññābhisamayādilakkhaṇena catusaccadassanaṭṭhena. **Micchādiṭṭhiyāti** dvāsaṭṭhippabhedāyapi micchādiṭṭhiyā. **Tadanuvattakakilesehīti** apāyagamanīyatāya tassā micchādiṭṭhiyā anuvattakehi vicikicchādikileseti. **Khandhehīti** etthāpi tadanuvattakasaddo ānetvā sambandhitabbo. Te ca micchādiṭṭhi-ādipaccayā uppajjanārahā veditabbā. **Micchāsaṅkappāti-ādīsupi** tadanuvattakakilesehi ca khandhehi ca vuṭṭhāti. **Bahiddhā ca sabbanimittehi vuṭṭhātīti** pāḷi saṅkhittā. Yathā micchādiṭṭhimicchāsaṅkappā, evam micchāvācādayopi apāyagamanīyā eva veditabbā. **Micchāvācākammantājivā** cetanāsabhāvā. **Micchāsati** tathāpavattā cattāro khandhā. Uparimagattaye sammādiṭṭhi

1. Abhi 1. 72 piṭṭhe.

2. Khu 9. 289 piṭṭhe paṭisambidāmagge.

taṁtaṁmaggavajjhā mānato vuṭṭhāti. So hi “ahamasmi”ti pavattiyā diṭṭhiṭṭhāniyo, micchāmagгато panettha vuṭṭhānam anuddharitvā taṁtaṁmaggavajjhasaṁyojanānusayeheva vuṭṭhānam uddhaṭam.

Aṇusahagatā¹ti aṇubhāvaṁ gatā pattā, tanubhūtāti² attho.

828. Evaṁ vuṭṭhānam dassetvā idāni balasamāyogaṁ dassetuṁ “**lokiyānañcā**”ti-ādi vuttaṁ. **Samathabalaṁ adhikaṁ hoti** samādhībhāvanābhāvato. **Vipassanābalaṁ adhikaṁ hoti** ñāṇuttarattā vipassanābhāvanāya. Samānabhāvena yuge naddhā baddhā viya hontīti **yuganaddhā**. Tenāha “**aññamaññam anativattanaṭṭhenā**”ti, kiccato anūnādhikabhāvenāti attho. Tato eva **samāyogoti** samaparicchedayogoti attho.

Samādhīpaṭipakkhadassanattam “**uddhaccasahagatakilesehī**”ti vuttaṁ, uddhaccapadhānehi kilesehīti adhippāyo. **Avikkheposamādhīti** samucchindanena vikkhepassa ujupaṭipakkhabhūto samādhī. **Nirodhagocaroti** nibbānārammaṇo. **Vuṭṭhanaṭṭhenāti** vuṭṭhānakabhāvena nimittato, pavattato ca vuṭṭhahamānavasena. **Ekarasāti** samānakiccā.

Pahātabbadhammapahānakathāvaṇṇanā

829. **Ye dhammāti** ye saṁkilesadhammā. Saṁyojanādīsu saṁyojanaṭṭhena bandhanaṭṭhena **saṁyojanāni**, vibādhanatṭhena, upatāpanatṭhena vā **kilesā**, micchāsabhāvāti **micchattā**, loke dhammā lokapariyāpannā dhammāti **lokadhammā**, maccherassa bhāvo, kammaṁ vāti **macchariyaṁ**, viparītātṭhena **vipallāsā**, ganthanaṭṭhena **ganthā**, ayuttā gatīti **agati**, āsavantīti **āsavā**, ohanantīti **oghā**, yojanaṭṭhena **yogā**, nīvarantīti **nīvaraṇāni**, dhammasabhāvaṁ atikkamma parato āmasantīti **parāmāsā**, bhusaṁ ādiyantīti **upādānāni**, appahīnabhāvena santāne anu anu sentīti **anusayā**, malīnabhāvakaraṇatṭhena **malā**, akusalakammāni ca tāni sugatiduggatīnam, tattha nibbattanakasukhadukkhānañca pathā cāti **akusalakammāpathā**, cittaṁ uppajjati ettāti **cittupādo**,

1. Anusahagatā (Ka)

2. Patanubhūtā (Syā)

cittacetasikarāsi, akusalo ca so cittuppādo cāti akusalacittuppādoti akusalasaddaṃ ānetvā sambandhitabbaṃ.

Khandhehi khandhānanti idhalokakkhandhehi paralokakkhandhānaṃ. **Yāvañhi teti** te rūparāgādayo yāva pavattanti na samucchijjanti, **tāva etesaṃ** khandhaphaladukkhānaṃ **anuparamo** avicchedoti. Etena tesam saṃyojanatthaṃ vibhāveti. **Uddhanti** rūpārūpabhavesu, tatiyamagguppattiyā vā uddhaṃ. Uddhaṃ bhajanṭīti uddhambhāgā, rūpārūpabhavā, tesam avicchedahetutāya hitāni **uddhambhāgiyāni**.

Kilissanti, kilesenti cāti duvidhampi atthaṃ dassento “**sayam saṃkiliṭṭhattā**”ti-ādimāha.

Micchāvimutti “lokathūpikādīsu mokkho”ti pavattamicchāvimokkho. Abhinivisanādivasena micchā viparītaṃ na sammā pavattanato **micchāñāṇaṃ** mohova.

Lokappavattiyāti khandhappavattiyam sati. **Anuparamadhammakattāti** puññapāpavasena aparāparaṃ avicchijjanato. “Lābhahetuko lābho”ti-ādinā **kāraṇopacārena**.

Āvāse macchariyam, āvāsahetukaṃ vā macchariyam **āvāsamacchariyam**.

Tayoti vatthuṃ abhinditvā vuttaṃ, bhinditvā pana vuccamāne dvādasa honti.

Ganthakaraṇam kāraṇabhāvena paṭibaddhatākaraṇam **ganthananti** taṃ rūpakāyepi labbhatīti āha “**nāmakāyassa ceva rūpakāyassa cā**”ti. Tattha byāpādassāpi abhisajjanupanayhavasena pavattanato ganthanaṭṭho veditabbo, yato tassa paṭighasaṃyojanabhāvo vutto.

Chandadosamohabhayehīti chandadosamohabhayahetu. **Tañhīti** akattabbakaraṇam, kattabbākaraṇaṇca.

Savanāti pavattanato. **Savanatoti** kilesāsucibhāvena vissandanato. Puna **savanatoti** pasavanato.

Ākaḍḍhanaṭṭhena, duruttaraṇaṭṭhena cāti etena oghā viya **oghāti** dasseti. Ārammaṇena, dukkhena ca viyogassa appadānasaṅkhātena yojanaṭṭhena **yogāti** dasseti, saṅkilesakaraṇaṭṭhenāti attho. **Tesaññevāti** kāmarāgādīnaṃyeva. Te hi sotavasena vattamānā soto viya sotapatite satte apāyasamuddaṃ pāpentī, saṃsārasamuddato ca sīsaṃ ukkhipitum na denti, yathāgahitaṅca ārammaṇaṃ vissajjitum na denti, yādisaṅca pāpaṃ katvā dukkhapatte punapi tādisena yojenti.

Cittassāti kusalacittassa, visesato jhānacittassa. Ādīto varaṇaṃ **āvaraṇaṃ**. Kilesavāsaṇaṃ netvā varaṇaṃ **nīvaraṇaṃ**. Kuṭṭakavāṭādīhi viya pidahaṇaṃ **paṭicchādanaṃ**, taṃ pana kusalādīni saṅgaṇhitum, pariññātum, ñātuṅca appadānavasena daṭṭhabbaṃ.

Tassa tassa dhammassa sabhāvanti kāyādikassa tassa tassa dhammassa asubhādisabhāvaṃ. **Abhūtaṃ sabhāvanti** subhādisabhāvaṃ.

Thāmagataṭṭhenāti thāmagatabhāvena. **Thāmagatanti** ca anaññasādhāraṇo kāmarāgādīnaṃ sabhāvo daṭṭhabbo. Yena te eva bhagavatā “**anusayā**”ti vuttā. Anusayanaṅca maggena appahīnabhāvena paccayasamavāye uppajjanārahata. Tenāha “**punappunaṃ kāmarāgādīnaṃ uppattihetubhāvena anusentiyeva**”ti.

Dummocanīyabhāvena pavattiṃ sandhāyāha “**telañjanakalalaṃ viyā**”ti.

830. **Sesāti** anapāyagamanītā. Sukhumā kāmarāgapaṭighāti sambandho. **Catutthañāṇavajjhā evāti** avadhāraṇena paṭhamañāṇādivajjhata nivattīyati. Tayidaṃ niyamadassanaṃ aññatthāpi netabbanti dassento “**parato**”ti-ādimāha. Tattha “**niyamaṃ na karissāmā**”ti etena niyame akate heṭṭhimamaggavajjhataṃ anuññātā eva hotīti.

Lobha -pa- catutthañāṇavajjhānīti-ādīsu paṭhamañāṇādīhi hatāpāyagamanīyādibhāvānīti¹ adhippāyo veditabbo. Ādisaddena oḷārikasukhumatā gahitā.

Yaseti parivāre.

1. Pihatāpāya... (Syā)

sahāvaṭṭhānato. **Vippayuttatā vā kilesānaṃ** cittavippayuttasaṅkhāravādināṃ vippayuttasaṅkhārānaṃ viyāti adhippāyo. Taṃ pana nesāṃ vādināṃ yathā matimattāṃ, evamidhāpīti dassento āha “**na ca paccuppannakilesa cittavippayutto nāma atthī**”ti. Arūpadhammā hi ekavattthukādibhāvena vattamānā khaṇattayapariyāpannā paccuppannā, te kathāṃ cittaena vippayuttā nāma siyūṃ, tasmā nattheva vippayuttatā kilesānaṃ. **Āvenikā**ti asādhāraṇā, sayameva uppāditā pāḷi anārulhāti adhippāyo. Pāḷiyāmyeva hi paṭikkhittanti sambandho. **Svāyaṃ** puggalo. **Hañcī**ti yadi.

Vinibaddhoti mānena patthaddhacitto. **Parāmatṭhoti** micchābhiniṅgā. **Thāmagatoti** thāmagatakilesa thirabhāvagatānusayo. **Tena hi natthi maggabhāvanā**ti yasmā tisupi kālesu kilesānaṃ pahānaṃ na yujjati, tikālikā ca kilesā, tasmā natthi maggabhāvanā, tāya sādhetabbaṃ kiccaṃ natthīti attho. “**Na hi natthi maggabhāvanā**”ti-ādinā catukkhattuṃ vuttassa paṭikkhepassa paṭikkhepo. Idaṃ vuttam “pāḷiyāmyeva hī”ti-ādiṃ ānetvā sambandhitabbaṃ.

Evamevāti yathā ajātaphale taruṇarukkhe mūle chinne asati chedane āyatim uppajjanārahāni chedanapaccayā anuppajjamānāni vinaṭṭhāni nāma honti, evameva maggabhāvanāya asati uppajjanārahā kilesā maggabhāvanāya anuppajjamānā “pahīnā”ti vuccantīti upamāsaṃsandanaṃ veditabbaṃ. **Uppādoti** uppādasīsena uppādavanto khandhā vuttā. **Anuppādeti** nibbāne. **Ajātāyeva na jāyanti**, tasmā pahīnā nāma hontīti “natthi kilesappahānan”ti paravādinā kato paṭikkhepo “na hī”ti paṭikkhito. Te pana neva uppajjitvā vigatā, nāpi bhavissanti, na ca uppānāti “atīte kilese pajahatī”ti-ādi na vattabbanti dasseti. **Hetunirodhāti** dukkhahetūnaṃ kilesānaṃ nirodhā. **Dukkhanirodhoti** āyatim uppajjanakadukkhassa nirodho. Uppādapavattanimitāyūhanā paccuppannabhavasena gahitā.

832. **Etenāti** “ajātāyeva na jāyanti”ti-ādivacanena. Vipassanāya ārammaṇabhūtaṃ upādānakkhandhapañcakasaṅkhātāṃ, bhūmipavattiṭṭhānaṃ laddhavanto **bhūmiladdhā** yathā “aggi-āhito”ti, laddhabhūmikāti

attho. Vattamānādi-uppannavidhuratāya **bhūmiladdhuppannā eva nāma teti vuttam.**

833. Anubhavitvā, bhavitvā ca apagataṃ **bhūtāpagataṃ.** Anubhūtabhūtā hi bhūtataṣāmaññaena bhūtasaddena vuttā. Sāmaññaeva hi upasaggena visesīyatīti. **Anubhūtasaddo** ca kammavacanicchāya abhāvato anubhāvavakavācako daṭṭhabbo. Vikappagāhavasena rāgādīhi, tabbipakkhehi ca akusalaṃ, kusalañca ārammaṇarasam anubhavati, na vipāko kammavegakkhattatā, nāpi kiriyā ahetukānaṃ atidubbalatāya, sahetukānañca khīṇakilesassa chaḷaṅgupekkhāvato uppajjamānānaṃ atisantavuttittā. Ettha ca purimanaye kusalākusalameva vuttam adhippāyavasena “bhūtāpagatan”ti vuttam. Yaṃ “uppannānaṃ akusalānaṃ dhammānaṃ pahānāya uppannānaṃ kusalānaṃ dhammānaṃ ṭhitiyā”ti¹ ettha “uppannan”ti gahetvā taṃsadisānaṃ pahānaṃ, vuddhi ca vuttā. Pacchimanaye ca-saddena kusalākusalañca ākaḍḍhitvā sabbaṃ saṅkhatam vuttam bhutvāpagatabhāvābhidhānādhippāyena. Vipaccitum okāsakaraṇavasena uppattitam atītam kammañca tato uppajjitum āraddho vipāko ca anāgato **okāsakatuppannoti** vutto okāso kato etena, okāso kato etassāti ca atthadvayavasena, yaṃ uppannasaddena vināpi viññāyamānaṃ uppannam sandhāya “nāham bhikkhave sañcetanikānaṃ kammānaṃ”ti-ādi² vuttam.

Tāsu tāsu bhūmīsūti manussadevādi-attabhāvasaṅkhātesu upādānakkhandhesu. Tasmim tasmim santāne anuppattidhammataṃ anāpāditatāya **asamūhatam.** Asamūhatattāyeva hissa natthīti navattabbatāya uppannavohāro.

834. “Kā bhūmi, ko vā bhūmiladdho”ti āsaṅkam nivattetum “**ettha cā**”ti-ādi āraddham. “**Vipassanāya ārammaṇabhūtā**”ti etena khandhānaṃ apariññātataṃ dasseti, na ārammaṇabhāvamattaṃ tebhūmakaggahaṇeneva tassa siddhattā. Apariññātā hi khandhā kilesānaṃ bhūmīti adhippetā. **Khandhesu** vatthubhūtesu. **Ārammaṇavasenāti** ārammaṇakaraṇavasena. **Atītānāgate,** pageva paccuppanneti adhippāyo. **Tanti** taṃ

1. Saṃ 3. 214, 215; Abhi 2. 216 piṭṭhādīsu.

2. Am 3. 497, 503 piṭṭhesu.

aññasantānagataṃ kilesajātaṃ. Tato aññasmiṃ santāne ārammaṇakaraṇamattena bhūmiladdhaṃ nāma yadi siyāti sambandho. **Tassāti** kilesajātassa. **Appaheyyato** parasantatipatitattā **na koci bhavamūlaṃ pajaheyya**. Bhūmiladdhañhi anusayitaṃ nāma hotīti adhippāyo. **Vatthuvasenāti** uppattiṭṭhānavasena. **Yattha yattha** bhava, santāne vā. Pariññātānaṃ abhūmibhāvato “**apariññātā**”ti vuttaṃ. **Uppādato pabhutīti** tesam khandhānaṃ uppajjanato paṭṭhāya. Kilesānaṃ appahīnabhāvaṃ ṭhapetvā aññaṣa kāraṇassa abhāvato **tesu** khandhesu **kilesajātaṃ anuseti**, tasmā **taṃ** anusayitaṃ kilesajātaṃ, teneva anusayanaṣaṅkhātena **appahīnaṭṭhena bhūmiladdhanti veditabbaṃ**.

835. Tattha ca bhūmibhūtesu khandhesu na sabbe sabbesaṃ vatthū honti, atha kho vireso atthīti taṃ dassento āha “**yassa yesū**”ti-ādi. Tattha **yassāti** yassa puggalassa. **Yesūti** satipi ajjhatabhāvasāmaññe yesu atītādikāmāvacarādibhedabhinnesu khandhesu. **Te eva** yathānusayitā **khandhā**. Kim panete kilesā ārammaṇaṃ karontā viya paricchijja paricchijja anusentīti? Yato te eva khandhā tesam kilesānaṃ vatthūti vuttā, na heva kho anusayānaṃ vatthūṃ paricchijja pavatti atthi. Atītādikāmāvacarādivasena pana yathāparicchinne vatthusmiṃ yo kilesānaṃ appahīnaṭṭho, so paricchijja pavatto viya hotīti “**atītakhandhesū**”ti-ādi vuttaṃ. Tena vatthuvaseṇa bhūmiladdhaṃ hotīti vatthubhedena siyā tassa bhedoti dasseti. Tathāvavatthitabhāvato eva hi “aññataro lolajātiko taṃ rasapathaviṃ aṅguliya sāyī”ti-ādi¹ vacanaṃ kāmāvacarakkhandhesu anusayitānaṃ rasataṇhādīnaṃ rūpārūpāvacarakkhandhe atikkamitvā puna kāmāvacarakkhandhavatthukataṃ vibhāveti. Tenāha “**tathā kāmāvacarakkhandhesū**”ti-ādi. Yathā cettha rūpārūpāvacarakkhandhe atikkamitvā pavatti, evaṃ kāmāvacarakkhandhe atikkamitvā pavatti hotīti āha “**esa nayo rūpārūpāvacaṇesū**”ti.

Pariyuṭṭhānābhibhavanavasena ca kilesānaṃ anusayanaṭṭho anumīyati tadabhāve abhāvato. Yassa ye anusayā pahīnā, tesam vatthū

tena samatikkantaṃ pariññātattāti kuto nesaṃ bhūmisamaññāti dassetuṃ vuttaṃ “**sotāpannādīsu panā**”ti-ādi. Idha **vaṭṭamūlakilesāti** anusayā adhippetā, na avijjā, bhavataṇhā ca. **Yaṃ kiñci** cetanācetasikabhedam, kāyikādibhedam vā. **Itīti** evaṃ, appahīnānusayattāti adhippāyo. **Assāti** puthujjanassa. Te panete anusayā atītādikāmāvacarādivasena yathāparicchinne tattha tattha vatthusmiṃ anusayantāpi te te pañcupādānakkhandhe avibhāgeneva vatthuṃ katvā anusentīti dassento “**tassetam vaṭṭamūlan**”ti-ādimāha.

836. Idāni tamattham anvaḃyabyatirekavasena upamāya vibhāvetuṃ “**pathavīrasādi viyā**”ti-ādi vuttaṃ. Rukkhaḃacchalatādīnam paccayabhūto sasambhārapathavīyā raso **pathavīraso**. **Āporasepi** eseḃa nayo. **Sākhā** nāma khuddakasākhā. **Pasākho** viṭapo. **Rukkhapaveninti** rukkhaparāparam. **Santānayaṃāne**¹ti aparāparam anuppabandhante.

Maṇḍūkakaṇṭakoti eko macchakaṇṭakoti vadanti. **Anupādānoti** pahīnacaturupādāno, rūpādīsu vā kiñcipi agaṇhanto.

837. Idha **samudācāro** nāma laddhattalābhatāti khaṇattayasamaṅgisamudācāruruppanti āha “**vattamānuppannameva samudācāruruppanna**”ti. **Pubbabhāge anuppajjamānampīti** tasmīṃ apāthagate ārammaṇe ādīto pavattajavanavāresu anuppajjamānampi. **Adhiggahitattāti** ayonisomanasikārena abhiruyha gahitattā, daḃham gahitattāti attho. **Aparabhāgeti** aparasmīṃ kālabhāge, kālantareti attho. **Ekantena uppattitoti** paccayasamavāye sati tathā ayonisomanasikārassa tattha nibbattattā niyameṃa uppajjanato. **Kalyāṇigāme**²ti evaṃnāmake gāme. Rohaṇe kira abhirūpānaṃ itthīnaṃ uppattitṭhānatāya so gāmo tathā vuccati. **Cittasantatimanārūḃhanti** paccuppannataṃ paṭisedheti. “**Uppattinivāraḃassa hetumano abhāvā**”ti etena paccaye sati paccayasamavāye uppajjanārahatāya avikkhambhitassa uppannatāpariyāyoti dasseti. Nanu ca asamūhatuppannampi paccaye sati uppajjanārahameḃa? Saccametaṃ,

1. Sandhāyamāne (Ka)

2. Kalyāṇagāme (Syā, Ka)

pahānavisesabhāvakato pana nesaṃ bhedo. Yathā avikkhambhitāsamūhatabhūmiladdhuppannaṃ sati paccayasamavāye uppajjanārahaṃ, evaṃ ārammaṇādhiggahituppannampīti tividhassāpi bhūmiladdhena ekasaṅgahatā vuttā.

838. Akusalampi bhūtāpagatuppannaṃ atītattā na pahātappaṃ, tathā ekaccaṃ okāsakatuppannaṃ itaraṃ appahātabbato, sesadvayaṃ khaṇattayasamaṅgibhāvatoti āha “**amaggavajjhata**”ti. **Kenacīti** catūsu maggañāṇesu kenaci¹. **Tassāti** yathāvuttassa catubbidhassapi uppannaṃ. **Taṃ uppannabhāvaṃ vināsayamānanti** anuppattidhammatāpādanena uppajjanārahataṃ vināsentāṃ. Paṭhamaṃ lokiyañāṇena yathābalaṃ pahīnameva lokuttarañāṇaṃ pajahatīti lokiyaggahaṇaṃ kataṃ.

Pariññādikiccakathāvaṇṇanā

839. **Saccābhisamayakālasmin**²ti catunnaṃ ariyasaccānaṃ paṭivijjhanakkhaṇe. **Vuttānīti** “dukkhaṃ pariññeyyaṃ”ti-ādinā³, “yo bhikkhave dukkhaṃ passatī”ti-ādinā³ ca vuttāni. **Yathāsabhāvenāti** aviparītasabhāvena. “Jānitabbāni”ti vatvā tesāṃ jānanaividhiṃ upamāvasena aṭṭhakathāyaṃ tāva vuttanayaṃ dassetuṃ “**vuttaṃ hetan**”ti-ādi vuttaṃ.

Tattha **yathā padīpoti**-ādi ekassa ñāṇassa ekakkhaṇe cattāri kiccāni kathaṃ sambhavanti. Na hi tādisaṃ kiñci loke diṭṭhaṃ atthi, na ca vacanaṃ labbhatīti antolīnacodanaṃ manasi katvā vuttaṃ “**pariññābhisamayenā**”ti. Anavasesato paricchijja jānanaśākhātena paṭivijjhanena **abhisameti** asammoahasena **paṭivijjhati**. **Pahānābhisamayenāti** samucchadappahānaśākhātena paṭivijjhanena asammoahato **abhisameti**. **Maggaṃ bhāvanābhisamayenāti** maggañāṇaṃ sammāsaṅkappādisesamaggaṃ saha-jātādipaccayatāvasena bhāvanābhisamayena. **Abhisameti** pubbhāgabhāvanāśākhātena ariyamaggabhāvanāśākhātena paṭivijjhanena abhisameti aṭṭhaṅgikaṃ magga asammoahato paṭivijjhati. Maggañāṇaṃhi sampayuttadhammesu sammohaṃ viddhamsentāṃ attanipi sammohaṃ viddhamsetiyeva. **Nirodhanti** nibbānaṃ. **Sacchikiriyābhisamayenāti** paccakkhakaṇaśākhātena paṭivijjhanena.

1. Ekenapi (Ka)

2. Saccābhisamayakālaṃ (Ka)

3. Saṃ 3. 382 piṭṭhe.

Pāpuṇāṭiti adhigacchati. Svāyaṃ adhigamo dassanapaṭivedhoti āha “**passati paṭivijjhatī**”ti.

“**Nirodham -pa- paṭivijjhatī**”ti etena nirodhasaccamekaṃ ārammaṇapaṭivedhena cattāripi saccāni asammoḥapaṭivedhena maggañāṇaṃ paṭivijjhatīti evaṃ yuttivasena vibhāvitaṃ ekapaṭivedhaṃ āgamenapi sādhetuṃ “**vuttampi cetan**”ti-ādi vuttaṃ. “**Sabbaṃ veditabban**”ti iminā “yo dukkhasamudayaṃ passati, so dukkhampi passatī”ti-ādinā āgataṃ samudayaṃ saccādimūlakaṃ yojanaṃ saṅgaṇhāti.

Na cetanā kālantaradassanaṃ sandhāya vuttaṃ, atha kho ekapaṭivedhamevāti dassentena “maggasamaṅgissa ñāṇaṃ, dukkhepetanā ñāṇaṃ”ti-ādinā² aparaṃ suttapadaṃ ānītaṃ. Tathā hi “yo nu kho āvuso dukkhaṃ passati, dukkhasamudayampi so passati -pa- paṭipadampi so passatī”ti³ ekasaccadassanasamaṅgino aññasaccadassanasamaṅgibhāvavicāraṇāya tamatthaṃ sādhetuṃ āyasmatā **gavampati**therena vuttaṃ, paccekañca saccattayadassanayojanā katā. Aññathā kamābhisaṃmaye parimadiṭṭhassa puna adassanato⁴ samudayādiṃ passato dukkhādidassanaṃ puna avattabbaṃ siyā, vuccamāne ca sabbadassanaṃ dassanantaraparamanti dassanānuparamo eva siyāti.

Nissayabhāvahetutāya dukkhapariññāya vaṭṭijjhāpanasadisatā, paṭipakkhavidhamāsanatāya samudayappahānassa andhakāraviddhamānasadisatā, ñāṇālokaparibrūhanatāya maggabhāvanāya ālokavidhamānasadisatā, tena tena maggena yathā yathā nirodhassa sacchikiriyā, tathā tathā kilesasnehapariyādānaṃ hotīti nirodhasacchikiriyāya snehapariyādānasadisatā kāraṇūpacārena vuttā.

840. **Obhāsetī**ti pakāseti. **Kilesapaṭippassaddhinti** sabbakilesadarathapariḷāhavūpasamabhāvato kilesānaṃ paṭippassaddhibhūtaṃ.

841. **Appetī**ti pappoti. Dukkhapariññāya sakkāyatīrasamatikkamabhāvato orimatīrappahānasadisatā, maggabhāvanāya sattattimsa bodhipakkhiyadhammāvahanatāya bhaṇḍavahanasadisatā.

1. Saṃ 3. 382 piṭṭhe.

3. Saṃ 3. 382 piṭṭhe.

2. Abhi 2. 341; Khu 9. 114 piṭṭhesu.

4. Dassanato (Syā)

842. Pavattam nāṇam assāti **pavattañāṇo**, maggo. **Assa** maggassa.

Tathaṭṭhenāti tathasabhāvena, pīlanādi-aviparītasabhāvenāti attho. **Ekapaṭivedhānī**ti ekajjham paṭivijjhitabbākārāni.

Dukkhassa pīlanatṭhoti-ādīsu yaṁ vattabbam, taṁ hetṭhā **buddhānussativanṇanāyam**¹ vuttameva. **Ekasaṅgahitānī**ti ekeneva saṅgahitāni. Kena? Tathaṭṭhena, saccaṭṭhenāti attho. **Yaṁ ekasaṅgahitanti**-ādi nāṇassa ekapaṭivedhadassanam. Maggañāṇaṇhi nirodhameva ārammaṇam karontampi yo so dukkhādīsu tacchāvīpallāsabhūtabhāvasaṅkhāto saccaṭṭho, tappaṭicchādakasammohaviddhamsanena taṁ yāthāvato paṭivijjhamtaṁ paccakkham karontameva pavattati. Yato aparabhāge pīlanādayo soḷasapi saccaṭṭhā ariyassa hatthāmalakam viya yāthāvato upaṭṭhahanti.

843. **Atthā**ti nāṇena araṇīyato atthāti laddhasamaññā ākārā.

Aññasaccadassanavasenāti samudayādisaccantaradassanavasena.

Āvibhāvatoti pakāsabhāvato. Idam vuttam hoti—ye ākārā dukkhādīsu sabhāvavasena, saccantaradassanavasena ca āvibhavanti, te pīlanādayo cattāroyevāti soḷaseva vuttā, na aññeti. Ayamatto idhādhippetoti kathamidam viññāyatīti āha “**tattha katamam dukkhe nāṇan**”ti-ādi. Tenetaṁ dasseti—yasmā pāḷiyam visum visum ārammaṇakaraṇavasenapi saccañāṇam vuttam kiccanibbattivasenapi, tasmā viññāyatīti “sabhāvato, saccantaradassanato ca saccānam ākārā āvibhavanti”ti.

Kiccanibbattivasena dassanam āvibhāvato dassanasadisanti taṁ anāmasitvā itarameva dassento “**tatthā**”ti-ādimāha. **Tatthā**ti tesu dvīsu dassanesu. **Āyūhitanti** piṇḍavasena nibbattitam. Yaṇhi kiñci paccayuppannam nāma, tabbam taṁ samuditameva nibbattatīti. **Saṅkhatanti** paccayantarehi samecca sambhūya kataṁ. **Rāsikatanti** puñjakataṁ. Anekameva hi paccayuppannam ekajjham nibbattamānam attano paccayehi rāsikataṁ viya hotīti. **Tasmā**ti samudayena āyūhitattā. **Assāti** dukkhasaccassa. Yasmim santāne

1. Visuddhi-Ṭī 1. 257 piṭṭhe.

uppanno, tassa **kilesasantāpaharo**. Sayampi kilesapariḷāhābhāvato **susītaḷo**. **Santāpaṭṭho āvibhavati** uḷāradassanena tadaññassa anuḷārabhāvo viyāti dassento āha “**āyasmato**”ti-ādi. **Avipariṇāmadhammassa** niccasabhāvassa **vattabbameva natthi** paṭipakkhato āvibhavanākārassa sukhasiddhito.

Nidānaṭṭho āvibhavati idamassa nidadātīti. Saṃyogapalibodhaṭṭhā paṭipakkhavasena āvibhavanākārāti dassento āha “**visaṃyogabhūtassā**”ti-ādi. Kilesadukkhehi saṃyojanaṭṭho **saṃyogaṭṭho**. Samsāracārake palibuddhanaṭṭho **palibodhaṭṭho**.

Kilesasaṅgaṇikādivasena **avivekabhūtassa**. **Vivekaṭṭho** upadhivivekatā. Sabbasaṅkhāravivittatā asaṅkhatabhāvoti evaṃ acchariyabbhutasabhāvopi ariyamaggo saṅkhato eva, ayameva ca eko asaṅkhatoti nirodhassa asaṅkhatabhāvo supākaṭo hoti. **Dukkhaṃ visaṃ** maraṇadhammato tassa agadabhūtaṃ **amataṃ nibbānaṃ**.

“Maggo”ti sambhāvetabbataṃ patto sukhumasantabhāvena upaṭṭhito nikantibhūtopi **nāyaṃ** samudayo **hetu nibbānassa pattiya**. **Ayaṃ** ariyamaggo **hetūti** maggāmaggañāṇadassane vuttanayena maggassa **hetuṭṭho āvibhavati**. **Nirodhadassanenāti** ativiya nipuṇassa paramagambhīrassa nirodhasaccassa dassanena. Tenāha “**paramasukhumāni**”ti-ādi. **Dukkhadassanenāti** ativiya ādīnavappattiya vipulatarādīnavassa dukkhasaccassa dassanena. Tappaṭipakkhato **ādhipateyyaṭṭho**¹. Tenāha “**anekarogātura -pa- uḷārabhāvo viyā**”ti. Evamete yathārahaṃ anvayato, byatirekato ca saccesu āvibhavanākārā vibhāvitā.

Ekekassāti ekekassa atthassa, pīlanāyūhananissaraṇaniyyānaṭṭhe sandhāyāha. **Tiṇṇaṃ tiṇṇanti** saṅkhatādi-atthe. **Ye pana** vādino. **Nānābhisamayanti** nānāñāṇena abhisamayaṃ, catunnaṃ saccānaṃ nānākkhaṇe nānāñāṇena paṭivijjhananti attho. Yadi hi maggañāṇassa catūsu saccesu nānābhisamayo siyā, dukkhadassanādīhi paṭhamamaggādīhi pahātabbānaṃ

1. Adhipateyyaṭṭho (Syā)

saṃyojanattayādīnaṃ ekadesappahānaṃ āpajjati. Tathā ca sati ekadesasotāpattimaggaṭṭhatādippasaṅgo. Taṃtaṃdassanānantaraṅca taṃtaṃphalena bhavitabbanti taṃtaṃpaheyyakilesapaṭippassaddhibhūtānaṃ phalānaṃ maggānaṃ viya catukkatā siyā. Tathā ca sati ekadesasotāpannatādippasaṅgo. Kiñcabhiyyo¹—yadi maggañāṇassa nānābhisamayo siyā, aññena ñāṇena dukkhaṃ passati. Aññena samudayaṃ, aññena nirodhaṃ, aññena maggaṃ, evaṃ sati maggakiccaṃ aparipuṇṇameva siyā. Maggadassanena hi dvayagati, teneva vā tassa dassanaṃ, aññena vāti. Tattha paṭhamo tāva pakkho na yujjati attani pavattiyā asambhavato. Na hi teneva aṅgulaggena tameva parāmasitum sakkā. Atha aññena anavaṭṭhānappasaṅgo “yena maggaṃ passati, sopi maggo. Tampi yena passati, sopi maggo”ti. Tasmā ekābhisamayato yathāvutto asammohaṇapaṭivedhova yutto. Apica paricchinditabbaṃ, samucchinditabbaṅca saccadvayaṃ ārabba pavattamānassa maggañāṇassa paricchindanasamucchindanāni na sambhavanti tato anissaraṇato. Na hi dukkhaṇiññāsamudayappahānāni dukkhasamudayasaccārammaṇena ñāṇena kātum sakkuṇeyyāni. Nibbānārammaṇena pana tattha, itaradvaye ca sammohaṃ viddhaṃsentena sakkā kātunti ekābhisamayo eva yutto. Ayaṃ pana² attho pāḷiyam āgato evāti “**tesaṃ uttaraṃ abhidhamme kathāvatthusmiṃ vuttamevā**”ti.

Pariññādippabhedakathāvaṇṇanā

845. **Abhiññāpaññā**ti-ādīnaṃ attho heṭṭhā vuttoyeva. Apica sutamayāya, cintāmayāya, ekaccabhāvanāmayāya ca abhivisiṭṭhāya paññāya ñātā **abhiññātā. Āveṇikā bhūmi** pariññantarānaṃ avisayabhāvato. Na hi nāmarūpaparicchedaṇapaccayapariggahaṇavasena tīraṇapariññādīnaṃ pavatti atthi.

846. Anulomañāṇampi aniccādivaseneva saṅkhāre ārabba pavattati, pageva paṭisaṅkhānupassanādayoti āha “**yāva anulomā āveṇikā bhūmī**”ti. Kāmañcetha tīraṇapariññābhūmiyaṃ ñātappahānapariññāyopi laddhāvasarā, tattha pana yathā tīraṇapariññā sātisaṃyamaṃ kiccaṅkāri, na tathā itarāti āveṇikaggahaṇaṃ.

1. Kiñci bhiyyo (Syā, Ka)

2. Ayaṃ panettha (Ka)

847. Nippariyāyena pahānapariññā nāma maggañāṇanti “**yāva maggañāṇā bhūmī**”ti vuttam. **Ayam idha adhippetāti** idha abhisamayakāle kiccavicāre ayam pahānapariññā adhippetā tadatthattā sesapariññānam. Tenāha “**yasmā vā**”ti-ādi.

Tadatthāyevāti pahānapariññatthā eva. Atha vā **tadatthāyevāti** pahānatthā eva. Atha vā **tadatthāyevāti** maggatthā eva. Nātatīraṇapariññā hi yāvadeva maggādhigamatthāya pavattā. **Niyamato nātā ceva tīritā ca honti** nātātīritabhāvehi vinā pahānābhāvato, pahānasiddhiyañca nātātīritabhāvasiddhito. Maggañāṇāhi dukkhe pariññābhisamayavasena pavattamānam tassa sabhāvalakkhaṇa viya sāmāññalakkhaṇampi paṭivijjhatīti vuccati tappaṭicchādakasammohavidhamsanato. Tenāha “**pariññattayampi -pa- veditabban**”ti.

848. **Pariññā viyāti** tividhatāsāmaññam nidasseti, na pariññāpahātabbatāsāmaññam vikkhambhanappahānassa aripaññākiccabhāvato. Kāmacchandādayo yathā na cittaṃ pariyuṭṭhāya tiṭṭhanti, evaṃ pariyuṭṭhānassa nisedhanam appavattikaraṇam vikkhambhanam, vikkhambhanameva pahānam **vikkhambhanappahānam**. **Pākaṭattāti** “ayam abyāpannacitto vigatathinamidho”ti-ādinā¹ paresampi pākaṭattā. “**Na sahasā cittaṃ ajjhottharanti**”ti idaṃ paṭiladdhamattassa jhānassa vasena vuttam, subhāvite pana paṇaṇajjhāne yāva carimakacittampi na ajjhottharanteva. Atha vā **jhānassa pubbhāgepīti** jhānādhigamatthāya pubbhāgepaṭipattiyā. **Pacchābhāgepīti** jhānam labhitvā aññakiccappasutassapi. **Vitakkādayoti** vitakkavicārapītisukharūpasaññādayo. Dutiyaññānādinam paṭipakkhā dutiyādīsu appitesuyeva vikkhambhanti, tato tato vuṭṭhitamattassa pana pavattanti parittacittavaseneva vuṭṭhahanato.

849. “**Padīpena andhakārassa viyā**”ti idaṃ paṭipakkhena pahīnabhāvadassanattham vuttam. Paṭipakkho hi padīpo andhakārassa, ghaṭappahāro pana sevālassa na paṭipakkho, kevalam pavattinivāraṇamattameva karotīti. Tena asatipi ujuvipaccanīkatāya dutiyaññānādinam vitakkādinam vikkhambhanassa taṃ nidassanam suṭṭhutam yujjati. “**Vipassanāya avayavabhūtenā**”ti idaṃ

1. Am 1. 531 piṭṭhe.

idhādhikatatadaṅgappahānassa dassanattham vuttaṃ. Sīlavisodhanādināpi hi tadaṅgappahānaṃ hotiyevāti. **Nāṇaṅgenāti** nāṇasaṅkhātena kāraṇena. Tadaṅgena tadaṅgassa pahānaṃ **tadaṅgappahānaṃ**. Sati vijjamāne khandhapañcakasaṅkhāte kāye, sayam vā tattha sati diṭṭhi **sakkāyadiṭṭhi**, “rūpaṃ attato samanupassatī”ti-ādinā¹ nayena vuttā attānudiṭṭhi. Soḷasavatthukā, aṭṭhavatthukā ca kaṅkhāva malaṃ **kaṅkhāmalaṃ**. **Samūhagāhassāti** “attā attaniyan”ti evaṃ pavattasamūhagahaṇassa pahānaṃ kalāpasammasanena ekādasasu okāsesu pakkhipitvā vikiraṇavasena khandhānaṃ dassanato. **Assādasaññāyāti** pañcakkhandhe assādanavasena pavattamicchāsaññāya. **Appaṭisaṅkhānassāti** paṭisaṅkhānapaṭipakkhassa mohassa. **Anupekkhanassāti** apekkhāya. Saṅkhāresu niccādigāho **saccapaṭilomagāho** maggasaccādhigamassa vilomanato. Sādinavesu anādinavasāññitā, anādinave ca sādinavasāññitā **saccapaṭilomagāhoti** ca vadanti.

Evaṃ visuddhikkamena tadaṅgappahānaṃ dassetvā idāni aṭṭhārasamahāvīpassanāvasenapi taṃ dassetuṃ “**yaṃ vā panā**”ti-ādi vuttaṃ. Tattha yaṃ vā pana pahānanti sambandho.

850. **Vuttameva** “sabbaṃ saṅkhāragataṃ aniccato anupassatī”ti-ādinā².

Santatisamūhakkiccārammaṇānaṃ vasena ghanaggahaṇaṃ ghanasaññā, tassā **ghanasaññāya**.

Nirodhe adhimuttatā, tāyāti³ tiyaddhagatānaṃ saṅkhārānaṃ nirodhameva disvā tattha adhimuccanavasena pavattapaññā, tāya⁴. **Āyūhanassāti** abhisāṅkharaṇassa.

Taṃ taṃ paricchedanti ādānanikkhepādikaṃ taṃ taṃ paricchedaṃ. **Aññathāpavattidassananti** vuttaparicchedato pubbe, pacchā ca aññākārappavattiyā dassanaṃ, avatthāvisesappavattidassanaṃ vā. **Dhuvasaññāyāti** thirabhāvaggahaṇassa.

1. Saṃ 2. 79, 80, 81, 478 piṭṭhesu.

2. Visuddhi 2. 279 piṭṭhe.

3. Adhimuttatāyāti (Syā)

4. Pavattasaññā tāya (Syā)

Sārādānābhīnivesassāti asāresu sārāgahaṇābhīnivesassa.

Saṁsayamicchāñāṇānaṁ vasena sammuyhanaṁ sammoho, so eva abhīnivesoti **sammohābhīniveso**. Saṅkhāresu leṇatāṇabhāvaggahaṇaṁ **ālayābhīniveso**, atthato bhavanikanti.

Yathā cittaṁ saṅkhāre muñcitvā vivaṭṭaṁ nibbānaṁ pakkhandati, tathā pavattanato saṅkhārupekkhā ca anulomaṅca “vivaṭṭānupassanā”ti vuttaṁ. Nivīṭṭhabhāvena oḡāḷhabhāvena pavattasaṁyojanādīkilesā eva **kilesābhīniveso**. **Nibbedhabhāgiyaṁ samādhinti** vipassanāsamādhimāha.

851. **Asanivicakkaṁ** asanīmaṇḍalaṁ. **Evāṁ pahānanti** anupattidhammatāpādanamāha. Kammakilesānaṁ, sabbesampi vā saṅkhārānaṁ khayaṁ nirodhaṁ gacchatīti **khayagāmī**, ariyamaggo. Lokuttaraggahaṇeneva siddhepi khayagāmiggahaṇaṁ vaṇṇabhaṇanattamaṁ. **Samucchedappahānamevāti** avadhāraṇaṁ nippariyāyataṁ upādāya. **Tadatthānevāti** samucchedappahānatthāneva. Tena vikkhambhanatadaṅgappahānānaṁ maggasambhāratamāha tehi vinā asijjhanato. Atha vā **tadatthānevāti** maggatthāneva. Tena tadatthatāya tesāṁ taṁkiccatāṁ dasseti. Tenāha “**tasmā**”ti-ādi. Tamevatthaṁ upamāya dassetuṁ “**paṭirājānaṁ vadhitvā**”ti-ādi vuttaṁ. **Yampi tato pubbe katanti** yaṁ tatorajjappattito pubbe kataṁ paccantasādhanaduggaviddhaṁsanādi. Yathā **idaṅcīdaṅca raññā katantiyeva vuccati**, evāṁ lokiyañāṇena sādhitānīpi vikkhambhanatadaṅgappahānāni samucchedappahānavasena pavattassa maggassa kiccabhāvena vuccanti, tadatthatāya, tesāṁ taṁsantatīpatitāya ca maggassāti vedītabbā.

852. Lokiyassa, lokiyā vā sacchīkīriyā **lokiyasacchīkīriyā**. Evāṁ **lokuttarasacchīkīriyā** vedītabbā. **Lābhīmīti** lābhī amhi. Tathā **vasīmīti** etthāpi. **Paccakkhato ñāṇaphassenāti** paccakkhato ārammaṇakaraṇasaṅkhātēna ñāṇaphassanena. “**Paccakkhato**”ti ca iminā anumānato ārammaṇakaraṇaṁ nivatteti, “īdisamīdan”ti paccavekkhaṇavasena paccakkhato jānaṇaṁ hettha “ñāṇaphasso”ti adhippeto. **Phassitāti**¹ ñāṇena phuṭṭhā.

1. Phusitāti (Syā)

Jhānamaggaphalāni viya attano santāne anuppādetvāpi
tappaṭicchādakasammohaviddhaṃsanavasena
tathāviddhaṃsanapavattañāṇaṃ **aparappaccayañāṇaṃ**.

Passanto paccakkhato jānanto. **Amatogadhanti** amatapariyāpannaṃ,
amatasāṅkhātanti attho.

Sotāpattimaggo paṭhamam nibbānadassanato dassanaṃ, tena dassanena
sacchikiriyaṃ **dassanasacchikiriyaṃ**. Kiñcāpi gotrabhuññaṃ tato
paṭhamataram nibbānaṃ passati, ālambanakaraṇato disvā
kattabbakiccākaraṇato pana na dassananti vuccati. **Sā dhuvidhāpī** sā
dassanabhāvanāvasena duvidhāpi sacchikiriyaṃ. **Dassanabhāvanāvasenāti**
dassanamaggabhāvanāmaggasena. Tena amaggavasena pavattanibbānassa
paccavekkhaṇasacchikiriyaṃ nivatteti. **Nibbānassāti** pana iminā
maggaphalesu paccavekkhaṇasacchikiriyaṃ. **Imassa ñāṇassāti** imassa
yathādhigatassa lokuttarañāṇassa.

853. **Abhimatāti** adhippetā. Bhāvanā nāma uppādanā,
santānaparibhāvanā cāti tadubhayaṃ dassento “**lokiyānan**”ti-ādimāha.
Yadaggena hi lokiyaṃ kusalādayo uppādita, vaḍḍhitā ca, tadaggenassa
sīlabhāvanā, kāyabhāvanā, cittabhāvanā, paññābhāvanā ca lokiyaṃ nipphādita
hoti, tāya ca santānopi paribhāvitoti. **Tāsu** lokiyalokuttarabhāvanāsu **idha**
ñānadassanavisuddhikathāyaṃ **lokuttarabhāvanā adhippetā**, na itarā tassā
sambhārabhāvato. **Catubbidhampetaṃ ñāṇanti** etaṃ catubbidhampi
ariyamaggañāṇaṃ lokuttarāni sammāvācādibhedāni **sīlādīni uppādeti**.
Katham? Sahajātādipaccayatāya. **Sīlādīnīti** ettha **ādi**-saddena samādhissa
gahaṇaṃ, na paññāya. Na hi tadeva taṃ uppādeti, maggacittuppādo pana
uppādeti. Tadantogadhabhāvā sammāsaṅkappo. So hi
pañcakkhandhasaṅgahitoti vadanti. **Sīlādīnīti** vā phalasīlādīnampi gahaṇanti
paññāyapi gahaṇaṃ yujjatiyeva. **Sahajātapaccayādītāyāti** ettha **ādi**-saddena
anantarapaccayādītāyapi saṅgaho daṭṭhabbo. **Tehi ca santānaṃ vāsetīti** tehi
samucchindanapaṭipassambhanavasena pavattehi lokuttarehi sīlādīhi
ariyapuggalo attano santānaṃ paribhāveti. Yaṃ nissāya parāvuttīti vadanti.
Yathā

pariññattayampi pahānattayampi maggañāṇassa kiccanti vuttaṃ pariyāyena, na evamidha. Idha pana **lokuttarabhāvanāva assa** maggañāṇassa **kiccaṃ**. Na hettha bhāvanāya pariyāyo labbhatīti avadhāraṇaṃ. Tena lokiyabhāvanaṃ nivatteti.

Evam **sarūpeneva āgatāya**¹ti “cittaṃ bhāvayan”ti samādhi viya cittaśisena anāgantvā “paññaṃ bhāvayan”ti evam sarūpeneva āgatāya¹ paññāya. **Yaṃ vuttaṃ** uddesavasena. **Ettāvatā taṃ vitthāritaṃ**² hoti. Ayañca pañho vissajjito hotīti sambandho.

Ñāṇadassanavisuddhiniddesavaṇṇanā niṭṭhitā.

Iti bāvīsati maparicchedavaṇṇanā.

1. Ābhatāya (Ka)

2. Vissajjitaṃ (Syā, Ka)

23. Paññābhāvanānisamsaniddesavaṇṇanā

Ānisamsapakāsanāvaṇṇanā

854. **Anekasatānisamsā** sāvaka bodhi-ādivipulodātaguṇa¹visesāvahattā. **Vitthāratoti** nayadassanaṃ akatvā “ayampi paññābhāvanāya ānisamsa, ayampi”ti anupadadassanavasena vitthārato kāsetuṃ na sukaraṃ atibahubhāvato. **Assāti** paññābhāvanāya. **Nānākilesaviddhamsananti** sakkāyaditṭhivicikicchādivasena nānāvidhānaṃ kilesadhammānaṃ tadaṅgādivasena pajhanaṃ. **Ariyaphalarasānubhavananti** sotāpatti phalā diphalasukhapaṭisaṃvedanaṃ.

Nānākilesaviddhamsanakathāvaṇṇanā

855. “Ariyaphalarasānubhavanā”ti eteneva kilesānaṃ paṭippassaddhippahānaṃ dīpīyatīti “**ariyamaggakkhaṇe**”ti visesavacanaṃ, tabbhāvabhāvato vā. Siddhe hi samucchadappahāne paṭippassaddhippahānaṃ siddhameva hotīti.

Bhīmavegānupatitāti sakalaṃ lokaṃ bhindantena viya bhīmena bhayānakena vegena sahasā patitā. **Siluccayeti** pabbate selaputhule². **Satejujjalamāṇḍaloti** saradakālasamiddhena attano tejasā samujjaladuddikkhamaṇḍalo. Vadhabandanādiduggatiparipakkilesādijāti-ādisabbānatthavidhāyakaṃ. **Sandiṭṭhikanti** paccakkhabhūtaṃ. **Jaññāti** jāneyya. **Idhāti** imissaṃ paññābhāvanāyaṃ.

Phalasaṃpattikathāvaṇṇanā

856. Ariyassa maggassa phalaṃ **ariyaphalaṃ**, ariyañca taṃ visuddhattā phalañcātipi **ariyaphalaṃ**, tassa **raso**, paṭippassaddhivimuttisukhaṃ, **anubhavanaṃ** nibbānārammaṇassa tassa paṭisevanaṃ. **Tatrāti** tesu dvīsu ākāresu. **Assāti** ariyaphalassa.

1. Vipuloḷāraguṇa (Syā)

2. Puthusele (Syā)

857. Saṃyojanesu pahīnesu sabbepi kilesā pahīnāyeva hontīti saṃyojanānamyeva gahaṇaṃ. **Saṃyojanappahānamattameva** ariyamaggassa **phalaṃ nāma**, na aññaṃ kiñci atthantaraṃ vipākabhūtaṃ adhippāyo. Tenāha “**phalaṃ nāma na koci añño dhammo atthi**”¹ti. Te panetaṃ¹ vadantīti? Andhakādayo. Te hi “arahattaṃ arahattanti āvuso vuccati -pamohakkhayo”²ti suttapadassa atthaṃ aññathā gahetvā nippariyāyato “arahattaṃ nāma kiñci natthi, kilesappahānameva tathā voharīyati”²ti vadantā sesaphalepi paṭikkhipanti. **Idaṃ suttampīti** paṭisambhidāmaggaṃ paṭimāha. Pakaṭṭho ukkaṭṭho yogeti payogo, ariyamaggo, payoganimittaṃ jātakilesānaṃ paṭippassaddhi **payogapaṭippassaddhi**. Yā pana ariyamaggassa bhāvitattā labbhamānāpi yassā vipākapaññāya nipparijamānāya nipparijati, sā paṭippassaddhiyaṃ nipphādetabbāyaṃ paññāti **paṭippassaddhipaññāti** vuttā. **Sammādiṭṭhi micchādiṭṭhiyā vuṭṭhātīti** sammādiṭṭhiyā ujuvipaccanīkadassanavasena vatvā tadanñatopi vuṭṭhānaṃ dassetuṃ “**tadanuvattakakilesehi**”²ti vuttaṃ, tassā micchādiṭṭhiyā sampayogato, upanissayato ca anuvattakakilesehi. Tena tadekaṭṭhappahānamāha. **Khandhehi** tadanuvattakakkhandhehi, tāya micchādiṭṭhiyā sampayuttakkhandhehi ceva tappaccayā āyatim uppajjanakkhandhehi cāti attho. **Bahiddhā ca sabbanimittehi** yathāvuttakilesakkhandhehi bahiddhābhūtehi vipassanāya gocarabhūtehi sabbasaṅkhāranimittehi.

Evam maggakiccaṃ dassetvā idāni tassa vasena phalaṃ dassetuṃ “**tampayogapaṭippassaddhattā**”²ti-ādi vuttaṃ. Tattha **tampayogapaṭippassaddhattāti** tassa ajjhatabhiddhā vuṭṭhānādipayogassa paṭippassaddhattā. Maggo hi nimittato, pavattato ca vuṭṭhahanto kilese pajahatīti attano khaṇe taṃ payogaṃ karoti nāma, phalakkhaṇe panassa so payogo paṭippassaddho vūpasanto nāma hoti. Tena vuttaṃ “tampayogapaṭippassaddhattā”²ti. **Uppajjati**ti maggānantaraṃ dvikkhattuṃ vā tikkhattuṃ vā uppajjati. Phalasaṃpattikāle pana bahukkhattuṃ, nirodhā vuṭṭhahantassa dvikkhattuṃ uppajjati. Sabbampi yathāvuttapayogapaṭippassaddhiminittaṃ uppajjanato “tampayogapaṭippassaddhattā uppajjati”²ti vuttaṃ. **Maggasetaṃ phalanti** yathāvuttā vipākā sammādiṭṭhi nāma, etaṃ

1. Ke panevaṃ (Syā)

2. Saṃ 2. 447 piṭṭhe.

ariyamaggassa phalanti veditabbaṃ. **Vitthāretabbanti**

“sotāpattimaggakkhaṇe abhiniropanaṭṭhena sammāsaṅkappo micchāsaṅkappā”¹ti ādinā saṅkappādivasena, sesamaggavasena ca vitthārato veditabbaṃ.

Cattāri ca sāmāññaphalāni, ime dhammā appamāṇārammaṇāti appamāṇārammaṇatāya maggehi nibbisesatāya. Tathā nevasaññānāsaññāyatanasaṅkhāto mahaggato dhammo nirodhato vuṭṭhānavelāyaṃ appamāṇassa dhammassa anantarapaccayena paccayoti ariyaphalassa anantarapaccayatāya ca dīpanāti **evamādīnipi ettha** ariyaphalassa sabhāvadhammabhāvena atthitāya **sādhakāni**, na yathādassitapaṭisambhidāmaggapāḷiyevāti adhippāyo.

858. **Phalasaṃpattiyanti** phalapavattisaṅkhātāya saṃpattiyāṃ. **Assāti** ariyaphalassa. Sarūpakattukāraṇākāraṭṭhitivutṭhānānantaravasena **idaṃ pañhākammaṃ**.

859. **Ariyaphalassa nirodhe appanāti** ariyassa phalajhānassa nibbāne ārammaṇabhūte appanākārena pavatti.

860. **Sabbepi puthujjanāti** jhānasamāpattilābhinopi puthujjanā na samāpajjanti, pageva itare. **Ariyā sabbepi** phalasaṃpattim **samāpajjantīti** kāmaṃ sāmāññajotanā, sā pana visesanivutṭhāyeva hoti. **Adhigatattāti** pana hetukittanaṃ. Uparimānampi heṭṭhimāya lokiyasaṃpattiyā viyā sammāpajjanaṃ sādheṭṭhanti viya ṭhitanti taṃ nivattento **“uparimā panā”**ti-ādimāha. Tattha **uparimāti** sakadāgāmi-ādayo. **Heṭṭhimanti** sotāpattiphalādiṃ. **Na samāpajjanti** satipi adhigatatte. Kasmāti ce? Kāraṇamāha **“puggalantarabhāvūpagamanena paṭippassaddhattā”**ti. Etena uparimo ariyo heṭṭhimaṃ phalasaṃpattim samāpajjati attanā adhigatattā, yathā taṃ lokiyasaṃpattinti, evaṃ pavattaṃ hetuṃ byaticāreti. Na hi lokiyajjhānesu puggalantarabhāvūpagamaṇaṃ nāma atthi visesābhāvato. Idha pana asamugghāṭitakammakilesanirodhanena puthujjanehi viya sotāpannaṃ, sotāpannādīhi sakadāgāmi-ādīnaṃ puggalantarabhāvūpagamaṇaṃ atthi. Yato heṭṭhimā heṭṭhimā phaladhammā uparūpari

1. Khu 9. 68 piṭṭhe Paṭisambhidāmagge.

maggadhammehi nivattitā paṭipakkhehi viya abhibhūtā
appavattidhammatāmyeva āpannā. Tenāha “paṭippassaddhattā”ti.

Apica kusalakiriyapavatti nāma aññādisī, vipākapavatti ca aññādisī, anantaraphalattā ca lokuttarakusalānaṃ heṭṭhimato uparimo bhavantaragato viya hoti. Taṃtaṃphalavaseneva hi ariyānaṃ sotāpannādināmalābho. Te sace aññaphalāsamaṅginopi honti, sotāpannādināmapi tesāṃ avaṭṭhitaṃ siyā, tena tena jhānena gahitapaṭisandhiko viyāti tassa tassa ariyassa taṃ taṃ phalaṃ bhavaṅgasadisanti na uparimassa heṭṭhimaphalāsamaṅgitāya lesopi sambhavati, kuto tassa samāpajjananti daṭṭhabbaṃ. **Heṭṭhimā ca uparimanti** heṭṭhimā ca sotāpannādayo ariyā uparimaṃ sakadāgāmiphalaṃ na samāpajjantīti sambandho. Tattha kāraṇamāha **“anadhigatattā”**ti. Na hi anadhigatasamāpattim samāpajjitum sakkā.

“Attano attanoyeva pana phalaṃ samāpajjantī”ti iminā sabbepi ariyā attano attano phalāsamaṅgīti samāpajjantīti atthe āpanne tattha kesañci matibhedam dassetum **“keci panā”**ti-ādi vuttam. **Ete hi samādhismim paripūrakārinoti** yasmā hi te “uparimā dve”ti vuttā anāgāmino, arahanto ca samādhismim paripūrakāriṇo, itare pana sīlesu paripūrakāriṇo, tasmā dve eva phalāsamaṅgīti samāpajjantīti. Na hi samādhipāriyā vinā samāpattivaḷaṅjanaṃ sambhavatīti adhippāyo. Tanti “samādhismim paripūrakāriṇo”ti tehi vuttakāraṇam. **Akāraṇamevā**ti ayuttiyeva. Kasmāti ce? Āha **“phuthujjanassāpi”**ti-ādi. Tassattho—sabbaso asamucchinnakilesassa puthujjanassāpi attanā paṭiladdhalokiyasamāpattisamāpajjanam¹ labbhati, kimaṅgam pana samucchinnakilesānaṃ heṭṭhimānaṃ ariyānaṃ, tasmā tesāṃ samādhismim aparipūrakāritā attano phalāsamaṅgīti asamāpajjanassa akāraṇanti. Yutticintā nāma pāli-anāruḷhe atthe yuttā, ayaṃ panattho pāli-āruḷhoti kāraṇāpadese anādarakāraṇamukhena pālim dassento **“kiñcethā”**ti-ādimāha. **Sotāpattimaggapaṭilābhatthāyā**ti sotāpattimaggassa samadhigamāya. **Sotāpattiphalāsamaṅgīti**ti sotāpattiphalāsamaṅgīti samāpajjanattham. Esa nayo sesesupi.

1. Samādhisamāpajjanam (Syā)

Ettha ca “suññatavihārasamāpattatthāya animittavihārasamāpattatthāyā”ti-ādinā sarūpato uddhaṭattā tato pubbe āgatā maggaphalavārā appaṇihitavasena vuttā. Tattha anattānupassanāmukhena, aniccānupassanāmukhena ca pavattānaṃ phalasangāhānaṃ purecarā gotrabhuddhammā navadasabhāvena vuttāti veditabbā.

“Sotāpatti phalasangāhānaṃ”ti-ādinā pana catūsupi phalesu ekasadisam desanāya āgatattā sotāpannasakadāgāminopi attano phalaṃ samāpajjantīti viññāyati. Maggānantaraphalavasena taṃ vuttanti ca na sakkā vattum vipassanāvasena dasannaṃ gotrabhuddhammānaṃ dassanavasena desanāya āradhattā, maggavāreneva ca tadatthasiddhito. Na ca maggānantaraṃ phalaṃ “phalasangāhānaṃ”ti vuccati visum parikammābhāvato. Tasmā phalasangāhānāvacaneneva sotāpānādīnampi phalasangāhānāpajjanaṃ siddhaṃ. Tenāha “**tasmā**”ti-ādi.

861. Payojanampi tadatthāya paṭipattiyā kāraṇaṃ hoti tannimittaṃ paṭipajjanatoti “**kasmā samāpajjantī**”ti kāraṇaṃ pucchivā “**diṭṭhadhammasukhavihāratthan**”ti payojanaṃ vissajjitaṃ. **Kasmāti** vā sampadāne nissakkavacanaṃ, kissāti vuttaṃ hoti.

Diṭṭhadhammasukhavihāratthanti diṭṭheva dhamme kilesadarathapariḷāhavūpasamena santena sukhavihārena viharāṇatthaṃ. Satipi vipākabhāve parikammaṃ vinā anuppajjanato phalasangāhānānaṃ tassa tassa ariyassa rucivaseneva pavatti, yato nesaṃ sādhipatitāti āha “**addhāna -pa- samāpajjantī**”ti.

862. **Dvīhi akārehi**ti dvīhi kāraṇehi. Yathā hi lokiyajjhānānaṃ samadhigamo sampayogasamaṅgibhāvena sijjhamāno pahānaṅgasamatikkamamukhena vuccati tathā samadhigantabbattā, evaṃ phalasangāhānānaṃ nibbānāmanasikāreṇa sijjhamānā tadaññārammaṇāmanasikāramukhena vuccati sabbasaṅkhārato vinivaṭṭitamānasatāvāsena samijjhanato. Tenāha “**nibbānato**”ti-ādi.

Udayabbayañāṇādīñāṇaparāmparavasena hi sabbaphalacittaṃ saṅkhārato sabbaso nibbinnavirattacittassa tato vinissaṭṭānāmanasikāreṇa pavattati. Evaṃ pavattamānaṃ taṃ **nibbānato aññassa ārammaṇassa amanasikārā, nibbānassa ca manasikārā** pavattatīti vuccati.

Animittāya cetovimuttiyāti animittavimokkhadvayāya phalasaṃpattiyā, aniccānupassanāmukhena vā saṃpajjitabbāya phalasaṃpattiyā. **Samāpattiyāti** saṃpajjanatthāya. **Sabbanimittānantī** rūpādisabbasaṅkhāranimittānaṃ. **Amanasikāroti** ādīnavato disvā vissaṭṭhatāya anāvajjanaṃ asamannāhāro. **Animittāya ca dhātuyā manasikāroti** sabbasaṅkhāranimittābhāvato animittāya. Kehici paccayehi na saṅkhatattā ca asaṅkhatāti laddhanāmāya asaṅkhatāya dhātuyā phalasaṃpattisahajātena manasikārena manasikaraṇaṃ, tassā vā dhātuyā phalasaṃpatticittasaṅkhāte manasikaraṇaṃ.

863. **Udayabbayādivasenā**ti udayabbayabhaṅgabhayatupaṭṭhānādivasena pavattanakānaṃ navannampi ñāṇānaṃ byāpāraṃ vadati. Tenāha “**pavattānupubbavipassanassā**”ti. **Saṅkhārārammaṇagotrabhuñṇānāntaraṃ**¹ti saṅkhārārammaṇassa “vodānaṃ”ti laddhanāmassa gotrabhuñṇāṇassa anantaraṃ. Kasmā panettha gotrabhuñṇānaṃ maggañāṇapurecārikaṃ viya nibbānārammaṇaṃ na hotīti? Phaladhammānaṃ aniyyānikabhāvato. Ariyamaggadhammā eva hi niyyānikā. Vuttañhetāṃ “katame dhammā niyyānikā? Cattāro maggā aparīyāpannā”ti². Tasmā ekantena niyyānikasabhāvassa ubhatovuṭṭhānabhāvena pavattamānassa maggañāṇassa anantarapaccayabhūtena ñāṇena nimittato vuṭṭhiteneva bhavitabbanti tassa nibbānārammaṇatā yuttā, na pana ariyamaggassa bhāvitattā tassa vipākabhāvena pavattamānānaṃ kilesānaṃ asamucchindanato aniyyānikattā avuṭṭhānasabhāvānaṃ phalañāṇānaṃ purecārikañāṇassa kadācīpi nibbānārammaṇatā ubhayattha anulomañāṇānaṃ atulyākārato. Ariyamaggavīthiyañhi anulomañāṇāni anibbidhappubbānaṃ thūlathūlalobhakkhandhādīnaṃ sātīsayāṃ padālanena likiyañāṇesu ukkaṃsapāramippattāni maggañāṇānugūṇāni uppajjanti. Phalasaṃpattivīthiyaṃ pana tāni tena tena magena tesāṃ tesāṃ kilesānaṃ samucchinnattā tattha kilesavikkhambhane nirussukkāni kevalaṃ ariyānaṃ phalasaṃpattisukhasamaṅgibhāvassa parikammamattāni hutvā uppajjantīti na tesāṃ kutoci vuṭṭhānasambhavo, yato nesāṃ pariyoṣānañāṇaṃ saṅkhāranimittavuṭṭhānato nibbānārammaṇaṃ siyā.

1. Ñāṇāntarā (Ka)

2. Abhi 1. 254, 298 piṭṭhesu.

Evañca katvā “sekkhassa attano phalasaṃpattivaḷaṇṇanattāya udayabbayādivasena saṅkhāre sammasantassa vipassanāñāṇanupubbiyā phalameva uppajjati, na maggo”ti idaṅca aṭṭhakathāvacanaṃ samatthitaṃ hoti. Tenāha “**sekkhassāpi phalameva uppajjati, na maggo**”ti. Nibbānārammaṇe appanajjhānavasena yathāparicchinnaḷālaṃ nirantaraṃ phalacittasseva pavattanaṃ saṃpajjanaṃ phalasaṃpattitī āha “**phalasaṃpattivasena nirodhe cittaṃ appetī**”ti. Yadi anupubbavipassanānaṃ vasena phalasaṃpattisaṃpajjanaṃ, tena nīhārena sekkhassa uparimaggēnāpi bhavitabbanti anuyogaṃ sandhāyāha “**phalasaṃpattininnatāyā**”ti-ādi. Tena aññoyeva vipassanācāro ariyamaggāvaho, añño phalasaṃpatti-āvahoti dasseti, svāyaṃ vipassanāya vibhāgo vutto eva.

Ye paṇāti abhayagirivāsino sandhāyāha. Te hi maggaphalavipassanāya āloḷetvā vadanti. Teneva hi “**evaṃ satī**”ti-ādi vuttaṃ. **Arahā paccekabuddho bhavissati** yadi itarattāpi vipassanā tadattāya saṃvatteyyāti adhippāyo. **Pāḷivaseneva ca paṭikkhittanti** “dasa gotrabhudhammā vipassanāvasena uppajjanti”ti maggatthā phalattā vipassanā visuṃ katvā pavattapāḷivaseneva tesāṃ vacanaṃ paṭikkhittanti na gahetabbāṃ, aññathā “dasa gotrabhudhammā”ti vacanaṃ virujjheyyāti. **Idameva pana gahetabbanti** vuttassevatthassa nigamanaṃ. **Phalañcassāti**-ādi mahaggatavipākānaṃ viya lokuttaravipākānañca kusalasarikkhatādassanaṃ. Jhānato sarikkhatādassaneneva cettha bojjaṅgamaggaṅgavasēnāpi sarikkhatā dassitāyevāti vedittabbāṃ.

864. **Ṭhitiyāti** pabandhaṭṭhitiyā. Yathāparicchinnaḷālaṅhi saṃpattiyā bandhavasēnāvattānaṃ idha **ṭhiti**. “Cande vā sūriye vā ettakaṃ ṭhānaṃ gate vuṭṭhahissāmi”ti kālāvadhiggahaṇavasēna saṃpajjanaṃ cittassa abhisāṅkharānaṃ **abhisāṅkhāro**.

865. **Sabbānevetānī**ti rūpanimittādisabbāneva etāni ekato kāmaṃ na manasi karoti asambhavato. **Sabbasaṅgāhikavasēnāti** anavasesapariyādānavasēna. Samudāyasaddā¹ hi avayavesupi

1. Samudāyasiddhā (Ka)

pavattanti, avayavabyatirekena ca samudāyo na labbhatīti avayavagatampi kiccaṃ samudāyavasena vuttaṃ. **Tasmāti** sabbesaṃ saṅkhāranimittānaṃ ekato manasikārābhāvato. Yasmā bhavaṅgacitte uppanne phalasaṃpattito vuṭṭhito nāma hoti, tasmā vuttaṃ “**yaṃ bhavaṅgassā**”ti-ādi. **Bhavaṅgassa ārammaṇaṃ** nāma kammādi. **Manasi karototi** bhavaṅgasahagatena manasikārena manasi karoto, taṃ vā ārammaṇaṃ bhavaṅgamanasi karoto.

866. **Phalassa phalameva vā anantaraṃ hoti**¹ purimassa purimassa pacchimaṃ pacchimaṃ. **Bhavaṅgaṃ vā** sabbapacchimassa. **Phalānantaraṃ** maggavīthiyaṃ phalasaṃpattiyaṅca. “**Yena phalena nirodhā vuṭṭhānaṃ hoti**”ti idaṃ phaluppattiyā nirodhā vuṭṭhānabhāvato vuttaṃ. **Tanti** nirodhāvuṭṭhānabhāvena vuttaṃ anāgāmi-phalaṃ vā aggaphalaṃ vā. **Nevasaññānāsaññāyatanānantaranti** nevasaññānāsaññāyatanassa kusalassa, kiriyaṃ vā anantaraṃ satipi sattāhātikkame vijātiyena antarikkattā.

Paṭippassaddhadarathanti sabbaso passaddhakilesadarathaṃ. **Amatārammaṇanti** nibbānārammaṇaṃ. **Subhanti** asobhanatāya kilesassāpi abhāvato sotanaṃ. Taṇhāsaṅkhātāṃ lokāmiṣaṃ vantaṃ chaḍḍitaṃ etenāti **vantalokāmiṣaṃ**. Vūpasantakilesatāya, susantatāya ca **santaṃ**. Yena dhammena yogato samaṇo nāma hoti, tassa ariyamaggasaṅkhātassa sāmaññassa phalanti **sāmaññaphalaṃ**.

Ojavantenāti sabhāvasampanna. **Sucināti** kilesāsucivirahato parisuddhena. **Sukhenāti** anuttarasukhena. **Abhisanditanti** sabbaso lūkhabhāvāpagamanena sinehitaṃ. **Sātātisātenāti** mahaggatasātato lokuttarakusalasātato ca ativiya sātēna madhurena. Maggasukhatopi hi phalasukhaṃ santataratāya paṇītataṃ. **Amatena** sammoditaṃ “**Madhuraṃ viyā**”ti iminā sātātisātataṃyeva vibhāveti.

Tassa ariyassa phalassa rasabhūtaṃ sārabhūtaṃ taṃ sukhaṃ paññaṃ bhāvetvā yasmā paṇḍito vindati paṭilabhatīti yojanā.

1. Phalameva vā anantaraṃ hoti (Syā, Ka)

Nirodhasamāpattikathāvaṇṇanā

867. **Tatrā**ti tasmim “nirodhasamāpattiyā samāpajjanasamatthā”ti saṅkhittavacane. **Idaṃ** sarūpādivasena **pañhākammaṃ**. **Katthā**ti kasmim bhave.

868. **Anupubbanirodhavasena**ti vipassanānugatā aṭṭha samāpattiyo ārohanena taṃtaṃpaṭipakkhanirodhamukhena tiṇṇaṃ saṅkhārānaṃ anupubbato nirodhavasena. Yathāparicchinnakālaṃ yā cittacetāsikānaṃ appavatti, ayaṃ nirodhasamāpattīti attho. **Ke samāpajjanti, ke na samāpajjanti**ti kāmaṃ samāpajjanasamatthā padhānatāya paṭhamam paṇṇāpucchitā, tabbissajjanam pana garubhāvato pacchā vissajjetum asamāpajjanake tāva dassento “**sabbepi -pa- na samāpajjanti**”ti āha yathā “vāmaṃ muñca, dakkhiṇaṃ gaṇhā”ti. Tattha “**sabbepi**”ti idaṃ puthujjanādīnaṃ tiṇṇaṃ visesanaṃ. Te hi aṭṭhannaṃ samāpattīnaṃ lābhini paṭipāpāsiya viya samādhismiṃ aparipūrakāritāya nirodham samāpajjitum na sakkonti. Kāmacchandādisamucchindanaena hi samādhismiṃ paripūrakāritā, na jhānādhigamamattena. **Anāgāmino, arahantoti** ettha sukkhavipassakā ca anāgāmino, sukkhavipassakā ca arahantoti sukkhavipassakasaddo paccekaṃ yojetabbo. Ubhayepi cete satipi vipassanābale samādhibalassa abhāvato nirodham na samāpajjanti. Anupubbavīhārasambhavataññevettha samādhibalaṃ icchitabbaṃ. Purimakā pana tayo satipi samādhibalassa vipassanābalassa abhāvato, aparipuṇṇattā ca samāpajjitum na sakkonti. Aparipuṇṇakā cassa saṅkhārānaṃ na sammā parimadditattā. **Aṭṭha samāpatti -pa- samāpajjanti**”ti vatvā tattha kāraṇaṃ pālīvaseneva dassetuṃ “**dvīhi balehi**”ti-ādi vuttaṃ. **Tayo ca saṅkhārānanti** ettha **tayoti** sāmi-atthe paccattavacanaṃ, tiṇṇanti attho. **Ñāṇacariyāhīti** ñāṇappavattīhi. **Nirodhasamāpattiyā**ti nirodhasamāpajjanāya ñāṇaṃ. **Ayaṃca sampadāti** ayaṃ baladvayasamannāgamādikā yathāvuttanirodhasamāpatti-āvahā sampatti. **Anāgāmikhīṇāsaveti** anāgāmino ceva khīṇāsava ca.

869. **Samathabalanti** kāmacchandādike paccanīkadhamme sametīti samatho, so eva paṭipakkhehi akampiyatṭhena balaṃ. Aniccādivasena

vividhehi ākārehi passatīti vipassanā, sā eva vuttanayena balanti **vipassanābalaṃ**. **Nekkhammavasenā**ti-ādīsu kāmacchandavikkhambhanassa nekkhammasaṅkappaṃ, alobhapadhānassa vā tathāpavattakusalacittuppādassa vasena cittassa ekaggatāsaṅkhāto yo avikkhepo, taṃ **samathabalaṃ**. Byāpādavikkhambhanassa abyāpādavittakkassa, adosapadhānassa vā tathāpavattakusalacittuppādassa vaseneva. Thinamiddhavikkhambhikāya vibhūtaṃ katvā manasikaraṇena upaṭṭhita-ālokasaññāya vasena. Uddhaccavikkhambhanassa avikkhepassa samādhānassa vasena. Sakalamicchāvitakkavikkhambhanassa sikhāpattānāpānassatisiddhapaṭinissaggānupassi-assāsapassāsānaṃ vasena cittassa ekaggatāsaṅkhāto yo avikkhepo, taṃ **samathabalanti** atthayojanā.

Evam upacārassa jhānassa vasena samathabalaṃ dassetvā idāni taṃ aṭṭhannaṃ samāpattīnaṃ vasena paṭipakkhehi anabhibhavanīyatāya ca balappattivasena dassetuṃ “**paṭhamajjhānenā**”ti-ādi vuttaṃ. Tattha **nīvaraṇeti** nīvaraṇanimittaṃ nīvaraṇapaccayā. **Na kampati** jhānasamaṅgipuggalo, jhānasampayuttasamādhī vā. So hi visesato idha “samathabalan”ti adhippeto. Tathā hi **kenatṭhena samathabalanti** balaṭṭho pucchito. **Uddhacceti** uddhaccanimittaṃ. **Uddhaccasahagatakileseti** uddhaccena sampayuttamoha-ahirikādikilesahetu. **Khandheti** uddhaccasampayuttacatukkhandhanimittaṃ. **Na kampatīti**-ādīni aññamaññavevacanāni. **Kampanaṃ** vā ṭhānāpagamo. **Calanaṃ** paribbhamanaṃ. **Vedhanaṃ** sandhāvanaṃ. **Uddhacce** na kampati, uddhaccasahagatakilese na calati, uddhaccasahagatakkhandhe na vedhatīti vā yojetabbaṃ. Uddhaccaggahaṇaṅcetha samathassa ujupaṭipakkhatāya tadabhibhavana balappattidassanattaṃ. Tenetaṃ aṭṭhannampi samāpattīnaṃ sādharmaṇato kiccātisayadassanaṃ daṭṭhabbaṃ. **Idaṃ samathabalanti** yā’yaṃ nekkhammādivasena laddhāya cittekaggatāya nīvaraṇādīhi akampanīyatā, tāni ca abhibhavitvā avaṭṭhānaṃ, idaṃ samathabalaṃ.

Idāni vipassanābalaṃ niddisanto yasmā vipassanā saṅkhepato sattahi anupassanāhi saṅgahitā, tasmā tato tato samāpattito vuṭṭhāya tāsāṃ vasena anupassanā kātabbā, tattakeneva cetha anupassanākiccaṃ paripuṇṇaṃ hotīti “**aniccānupassanā vipassanābalaṃ -pa- paṭinissaggānupassanā vipassanābalan**”ti sarūpato dassetvā puna tā

heṭṭhā vuttanayena visayavibhāgena dassetuṃ “**rūpe aniccānupassanā**”ti-ādi vuttaṃ. Idhāpi paṭipakkhehi anabhibhavanīyatāva balaṭṭhoti dassetuṃ “**kenatṭhena vipassanābalan**”ti-ādi āradham. Tattha **avijjāyā**ti dvādasasu akusalacittuppādesu avijjānimittāṃ. **Avijjāsahagatakileseti** avijjāya sampayuttalobhadosādikilesavatthunimittāṃ. Sesāṃ heṭṭhā vuttanayattā suviññeyyameva. Avijjaggahaṇaṅcetha vipassanāya ujuṇāpaṭipakkhatāya tadabhibhavana balappattidassanattāṃ. Tenetaṃ sattannampi anupassanānaṃ sādharmaṇato kiccātisayadassanaṃ daṭṭhabbaṃ. **Idaṃ vipassanābalanti** yā’yaṃ aniccānupassanādivasena laddhassa vipassanāñāṇassa niccasaññādinimittāṃ akampanīyatā, tā ca abhibhavitvā avaṭṭhānaṃ, idaṃ vipassanābalaṃ.

Vitakkavicārā vacīsaṅkhārā vācaṃ saṅkharonti pavattenti katvā. Tenāha “pubbe kho āvuso visākha vitakketvā vicāretvā pacchā vācaṃ bhindati, tasmā vitakkavicārā vacīsaṅkhāro”ti¹. Te pana dutiyajjhāne vūpasantā hontīti āha “**dutiyajjhānaṃ -pa- paṭippassaddhā hontī**”ti. Kāyena saṅkharīyantīti **kāyasaṅkhārā**, assāsapassāsā. Tathā hi vuttaṃ “assāsapassāsā kho āvuso visākha kāyikā ete dhammā kāyappaṭibaddhā, tasmā assāsapassāsā kāyasaṅkhāroti”². Te pana yasmā catutthajjhāne vūpasantā honti, tasmā āha “**catutthajjhānaṃ -pa- paṭippassaddhā hontī**”ti. Cittena saṅkharīyantīti **cittasaṅkhārā**, saññā vedanā. Tathā hi vuttaṃ “saññā ca vedanā ca cetāsikā ete dhammā cittappaṭibaddhā, tasmā saññā ca vedanā ca cittasaṅkhāro”ti³. Te pana yasmā nirodham samāpannessa vūpasamanti, tasmā vuttaṃ “**saññāvedayita -pa- paṭippassaddhā hontī**”ti.

Ñāṇacariyāsu vivaṭṭānupassanāggahaṇeneva tassa ādibhūtā sesānupassanāpi gahitāva honti tadavinābhāvato. **Maggo ñāṇacariyā, phalasaṃpatti ñāṇacariyā**ti maggaphalasaṃpattīnaṃ ñāṇacariyābhāvavacanaṃ maggaphaladhammānaṃ ñāṇapadhānattā, ñāṇena vā indriyādhipatīhetumaggapaccayādivasena sātīsayapaccayabhūtena sesā maggaphaladhammā caritā pavattitīti katvā tathā vuttaṃ. Samādhicariyāsupi eseva

1. Ma 1. 376; Saṃ 2. 413 piṭṭhesu.

2. Ma 1. 375; Saṃ 2. 483 piṭṭhesu.

3. Ma 1. 376; Saṃ 2. 483 piṭṭhesu.

nayo. **Imāhi soḷasahī**ti aṭṭhannaṃ anupassanānaṃ, aṭṭhannañca maggaphalañāṇānaṃ vasena imāhi soḷasahi ñāṇapavattīhi.

Navahi samādhicariyāhīti aṭṭha samāpattiyo aṭṭha samādhicariyā, tāsam upacārasamādhi upacārasamādhībhāvanāsāmaññena ekā samādhicariyāti evaṃ navahi samādhicariyāhi. Tenāha “**paṭhamajjhānaṃ samādhicariyā**”ti-ādi. **Paṭhamajjhānapaṭilābhatthāya vitakko cāti**-ādi nānāvajjanupacāravasena vuttanti daṭṭhabbaṃ, uparisamāpattīnampi upacārasa tatheva vuttatā. Na hi ekāvajjane catutthajjhānādi-upacāre pīti-ādayo sambhavanti. Ettha ca “paṭhamajjhānapaṭilābhatthāya”ti-ādivacanena upacārasamādhissāpi pāripūri icchitabbāti dasseti. Kiṃ panettha samathabalasamādhicariyānaṃ nānattaṃ, kiṃ vā vipassanābalalokiyañāṇacariyānaṃ. Yathā samathabalepi “nekkhamavasena”ti-ādinā upacārasamādhinā saddhim aṭṭhasu samāpattīsu appanāsamādhiyeva vutto, tathā samādhicariyāsu, vipassanābalalokiyañāṇacariyāsu ca vipassanāva vuttāti? Kiñcāpi vuttā, vivaṭṭānupassanā pana¹ purecarañāṇādivipassanābale avuttā eva ñāṇacariyāsu vuttā. Apica paṭipakkhehi akampiyatṭho **balatṭho**, pañcannaṃ vasībhāvānaṃ vasena suciṇṇatā **cariyatṭho**, eteneva samathabalasamādhicariyānampi nānattaṃ samvaṇṇitanti daṭṭhabbaṃ.

Vasībhāvatā paññāti ettha vaso etassa atthīti vasī, tassa bhāvo vasībhāvo, sā eva vasībhāvatā. “**Vasiyo**”ti pana pāḷiyā itthilingavasena vuttatā tāyo dassetuṃ “**vasīti pañca vasiyo**”ti-ādi vuttaṃ. Tattha jhānaṃ āvajjantassa niraṇṭaraṃ jhānaṅgesu cittappavattanasamatthatā **āvajjanavasī**. Samāpajjitukāmassa sīghaṃ jhānaṃ samāpajjanasamatthatā **samāpajjanavasī**. Accharāmatam vā katipayaccharāmatam vā khaṇaṃ jhānaṃ ṭhapetuṃ samatthatā **adhittānavasī**. Tatheva lahuṃ vuṭṭhātuṃ samatthatā **vuṭṭhānavasī**. **Paccavekkhaṇavasī** pana āvajjanavasīyā eva sijjhati. Paccavekkhaṇajavanāneva hi tattha āvajjanānantarānīti. Ayamettha saṅkhepo. Vitthāro pana heṭṭhā āgato eva. Ayañca vasībhāvo samādhicariyānaṃ vasena vutto. Ñāṇacariyāsu pana lokuttarānaṃ ñāṇacariyānaṃ vasībhāvāpādanakiccaṃ nāma natthi. Paṭipakkhassa suvihatattā sabhāvasiddho

1. Panassa (Syā)

tattha vasībhāvo, lokiyānaṃ pana paṇḍabalavabhāvāpādanena vasībhāvo labbhateva.

870. **Ukkaṭṭhaniddesoti** anavasesaniddeso. **Cuddasahi** ñāṇacariyāhi hoti aggamaggaphalaṇaṃ anadhigatattāti. **Yadi evanti** yadi ukkaṭṭhaniddesavasena “soḷasahi ñāṇacariyāhi”ti vuttaṃ, tato avakaṃsavasenapi icchitabbaṃ, **evam** sante **kiṃ na hoti** nirodhasamāpajjananti adhippāyo. Pañca kāmagaṇā vatthubhūtā etassa santīti **pañcakāmagaṇiko**, kāmarāgo. **Appahīnattā** asamucchinnattā. Na hi kāmarāgassa vikkhambhanappahānamattaṃ nirodhassa adhiṭṭhānaṃ bhavituṃ sakkoti. **Tasmāti** samādhipāripanthīkassa¹ kāmarāgassa supahīnattā. Etena kāmam maggaphalañāṇacariyā lokiyañāṇasamādhicariyā viya nirodhasamāpajjane sarūpena na viniyujjanti tadā appavattanato, tassa tassa pana paṭipakkhassa samucchindanena balacariyānaṃ visesapaccayatāya nirodhasamāpattiyā adhiṭṭhānaṃ hotīti dasseti. **Esāti** anāgāmī. Idañhi “nirodhā vuṭṭhahantassā”ti-ādivacanaṃ anāgāminova nirodhā vuṭṭhānaṃ sandhāya vuttaṃ “nevasaññānāsaññāyatanakusalānaṃ”ti² vacanato, aññathā “nevasaññānāsaññāyatanakiriyaṃ”ti vucceyya.

871. **“Pañcavokārabhave”**ti kasmā vuttaṃ, nanu catuvokārabhavepi arūpajjhānavasena yathārahaṃ anupubbasaṃpatti labbhatīti? Kāmam labbhati, sā pana “anupubbasaṃpatti”ti na vuccati ekadesabhāvato. Aṭṭhasamāpattivaseneva ca “anupubbasaṃpatti”ti vuccatīti dassento āha **“paṭhamajjhānādīnaṃ uppatti natthī”**ti. **Vatthussa abhāvāti** hadayavatthuno abhāvāti vadanti, karaḷakāyasaṅkhātassa pana vatthuno abhāvāti attho. Yadi hi āruppe nirodham samāpajjeyya, cittacetāsikānaṃ, aññassa ca kassaci abhāvato apaññattikova bhaveyya anupādisesāya nibbānadhātuyā parinibbutasadiso. Kiñcāyaṃ upādāya nirodham samāpannoti vucceyya, kiṃ vā etāya vatthucintāya. Aṅgavekallatova natthi āruppe nirodhasamāpattisamāpajjanaṃ.

1. Samādhipāribandhikassa (Ka)

2. Abhi 8. 138 piṭṭhe Paṭṭhāne.

872. **Saṅkhārānaṃ pavattibhedeti** saṅkhatadhammānaṃ khaṇe khaṇe uppajjane, bhijjane ca, tesam vā kusalādibhedabhinne yathārahaṃ tīhi dukkhatāhi upaddute pavattivibhāge. Cittacetasikavigamehi rūpadhammesu labbhamānāpi saṅkhāradukkhata abbohārikataṃ āpajjati. **Ukkaṇṭhitvāti** nibbinditvā. **Nibbānaṃ patvāti** anupādisesanibbānaṃ patvā viya. **Sukhanti** niddukkhaṃ.

873. **Samathavipassanāvasenāti** yuganaddhānaṃ viya aññamaññūpakāritāya sahitānaṃ vasena. **Ussakkivāti** ukkaṃsaṃ patvā yāva nevasaññānāsaññāyatanā, yāva ca anulomaññā āruhitvā. **Nirodhayatoti** nevasaññānāsaññāyatanam samāpajjitvā tam nirodhentassa. Aññassa kassacipi cittassa anuppajjanena **evamassā** nirodhasamāpattiyā **samāpajjanaṃ hoti**. “**Yo hī**”ti-ādinā “samathavipassanāvasenā”ti vuttamevatthaṃ byatirekamukhena vivarati.

Nevasaññānāsaññāyatanasamāpattiṃ patvā tiṭṭhati taduddham suddhasamathavipassanāya abhāvato. **Yo vipassanāvaseneva ussakkati** sace ariyo phalasangāpattatthiko, so attano **phalasangāpattiṃ patvā tiṭṭhati**. Atha puthujjano, sekho vā maggatthiko tāya ce vipassanāya maggaṃ patvā phale ṭhito, soṇi phalasangāpattiṃ patvā tiṭṭhaticeva vuccati. **Soti** ubhayavasena paṭipanno. **Tanti** nirodhasamāpattiṃ.

874. Yena phaladvayasamannāgamādinā nirodhaṃ samāpajjituṃ samattho hoti, so vidhi pageva vibhāvitoti samāpajjanākārameva dassento “**katabhattakicco**”ti-ādimāha. Tañhi sabbāsampi bhāvanānaṃ sādharmaṇaṃ pubbakiccaṃ. **Tattha saṅkhāreti** tasmim paṭhamajjhāne, paṭhamajjhānacittuppāde vā saṅkhāre.

“Vipassatī”ti vuttaṃ, kīdisī panettha vipassanā icchitabbāti tam niddhāraṇatthaṃ “**vipassanā panesā**”ti-ādinā tameva vipassanaṃ tidhā bhinditvā dasseti. **Mandā** ce vipassanā, dandhābhiññaṃ maggaṃ sādheti. **Tikkhā** ce, khippābhiññanti ayaṃ mandatikkhataya viseso. Lakkhaṇappattā pana vipassanā maggassa paccayo hotiyevāti imamatthaṃ dassento āha “**saṅkhāra -pa- hotiyevā**”ti. **Tikkhāva vaṭṭati** saṅkhārārammaṇepi sati sabbasaṅkhārehi vivaṭṭanākāreneva pavattanato, maggo viya visāṅkhāragatassa

phalassa paccayabhāvato ca. Tenāha “**maggabhāvanāsadisā**”ti. Yasmā atimandā samathādikā saṅkhārānaṃ nirodhane asamatthā samathaniṭṭhā hoti, atitikkhā nīṇādikā sātisayaṃ saṅkhāresu dosadassane phalasaṃpattiniṭṭhā hoti, tasmā vuttam “**nātimandanātitikkhā vaṭṭati**”ti. Esa nirodhasaṃpajjanako. **Te saṅkhāreti** te paṭhamajjhānasāṅkhāre.

“**Tathevā**”ti iminā “nātimandāya nātitikkhāyā”ti imamattham ākaḍḍhati. Esa nayo sesesupi. “Ākiñcaññāyatanam saṃpajjitvā vuṭṭhāya tattha saṅkhāre tatheva vipassatī”ti vattabban, heṭṭhā vuttanayattā pana tam avatvā “**catubbidham pubbakiccaṃ karoti**”cceva vuttanti keci, tam tesam matimattam. Vipassanācārato hi samādhicāro, tasmā samāpattito vuṭṭhāya pubbakiccaṃ kātabban. Tathā hi paratopi “ākiñcaññāyatanam saṃpajjitvā vuṭṭhāya imam pubbakiccaṃ katvā”ti-ādim vakkhabhi¹, na pana “tattha saṅkhāre tatheva vipassitvā”ti. **Nānābaddha-avikopananti** attanā asambaddhassa parikkhārassa avināsanam. Yathā tam na vinassati, tathā adhiṭṭhānam. **Samghapaṭimānananti** samghassa paṭimānanāvajjanam. **Satthupakkosananti** satthu pakkosanāvajjanam. **Addhānaparicchanti** jīvitaddhānaparicchadam pubbakiccaṃ karotīti sambandho.

875. **Adhiṭṭhātabbanti** cittam uppādetabban. Tathā cittuppādanameva hettha adhiṭṭhānam.

Cittajarūpādīnam anuppajjanato, pacchājātapaccayādi-upatthambhābhāvato ca sattāhameva tathā sarīram pavattati, tato param kilamatīti sattāhameva paricchinditvā nirodham saṃpajjantīti vadanti.

Samāpattivasevāti nirodhasaṃpattivaseva. **Nam** aggi-ādi-antarāyam **rakkhati** saṃpannako adhiṭṭhānavasevāti adhippāyo. **Āyasmato sañjīvassati**-ādīsu yam vattabban, tam heṭṭhā **iddhikathāyam**² vuttameva.

1. Visuddhi 2. 350 piṭṭhe.

2. Visuddhi 2. 9 piṭṭhe.

876. **Etassāti** nirodham samāpajjantassa, nirodhasamāpajjanassa vā. **Tasmim samayeti** tasmim tassa bhikkhuno upasaṅkamanasamaye vuṭṭhātiyeva. Kālaparicchedasadiṣaṅhetam.

Evam garukāti aggi-ādīhipi anabhibhavanīyam nirodham samāpannam samāpattito vuṭṭhāpanato evam garukā hi **saṅghassa āṇā nāma**, tasmā attano hitasukham ākaṅkantaena jīvitahetupi saṅghassa āṇā na atikkamitabbāti adhippāyo.

877. **Na pakkosati** “sathā tam āvuso āmantetī”ti. “Vuṭṭhahissāmī”ti āvajjitabbanti sambandho.

878. **Jīvitaddhānassāti** attano jīvitakālassa jīvitappavattiyā. **Āyu eva āyusaṅkhārā**. “Āyu-usmāviññāṇāni”ti ca vadanti, te cassa pakaticittasseva ārammaṇam honti. **Antonirodhe** maraṇam natthi carimabhavaṅgena mīyanato. **Āvajjitvāva samāpajjitabham** “sahasā maraṇam mā ahoṣī”ti. Sahasā hi maraṇe aññabyākaraṇabhikkhu-ovādadānasāsanānubhāvādīpanānam anissaro siyā, anāgāmino vā aggamaggānadhigamo siyā. **Avasesanti** nānābandha-avikopanāditi vidhampi pubbakiccaṃ. **Vuttaṃ** aṭṭhakathāyam.

879. Kiñcāpi “ekam vā dve vā”ti aniyametvā viya vuttaṃ, dve vāre eva pana niyamato vadanti. **Cittavāreti** nevasaññānāsaññāyatana cittavāre. **Nirodham phusatīti** acittakabhāvamevāha. **Nirodhassa payogattāti** cittanirodhāya payogabhāvato, baladvayasambharaṇādīpayogassa cittanirodhattāti attho. Samathavipassanābalasamannāgamo, ñāṇasamādhicariyāvasābhāvo cettha aññamaññānativattanavaseneva icchitabboti āha “**dve samathavipassanādhamme yuganaddhe katvā**”ti. **Anupubbanirodhassa payogoti** paṭhamajjhānādīnam, tadanupassanānaṅca anupubbato nirodhanassāyam payogo. **Idam vuttanayena aṭṭhasamāpattī-ārohanam na nevasaññānāsaññāyatana samāpattiyā** samāpajjanassa. Tasmā dvinnam cittānam upari cittāni na pavattantīti yojanā¹.

1. Cittaṃ na pavattatīti yojanā (Syā)

Parato acittako bhavitum na sakkotiti sakalam yathāparicchinna-kālam acittako bhavitum na sakkoti. Tañca kho saṅghapaṭimānana sathupakkosana addhānaparicchedāvajjanānam akaraṇena, na nānābaddha-avikopanassa. Tassa hi akaraṇena kadāci kevalam tādissassa parikkhārassa avināso na siyā, na nirodhasamāpattivibandho. Ayañca attho **mahānāgatttheravatthunā** vibhāvito eva. Evaṃ sante tīhi ākārehi nirodhasamāpattiyā vuṭṭhānam hotīti āpajjati, tasmā tam na sārato paccetabbaṃ. **Paṭinivattivā puna ākiñcaññāyataneveva paṭiṭṭhātīti** iminā¹ samāpattiyā vibandhe jāte evaṃ hotīti dasseti, avibandheneva pana yathāparicchinna-kālavītikkamane phalacittupattiyā vuṭṭhānam hoti. Evañca katvā gambhīrakandaroruḥhatattapāsāṇakkantapurisanidassanampi samatthitam hotīti keci vadanti. Apare pana “pubbakiccassa akatattā nevasaññānāsaññāyatanaṃ samāpannamattova ‘paṭinivattivā ākiñcaññāyatane paṭiṭṭhātī’ti vuttattā saṅghapaṭimānanādi-ekaccapubbakiccakaraṇe aṅgavekallato nirodhasamāpattisamāpajjanaṃ na ijjhatevā”ti vadanti. Vattasadiṣaṅhetam nirodhasamāpattiyā, yadidaṃ pubbakiccakaraṇam. Tasmā tattha yaṃ garutaram, tassa akaraṇam samāpajjanaṃ vibandhatīti apare. Vīmaṃsitvā gahetabbaṃ. “Ākiñcaññāyatane paṭiṭṭhātī”ti ca idaṃ puna ākiñcaññāyatanaṃ samāpajjitabbattā vuttam. Samāpajjitvā hi vuṭṭhāya pubbakiccassa kātabbattā.

Yathā panāti-ādi katapubbakiccatāsāmaññena upamāsaṃsandanaṃ.

880. **Assāti** nirodhasamāpattiyā. “**Kālaparicchedavasena**”ti-ādinā catūhi ākārehi nirodhasamāpattiyā ṭhānam dasseti.

882. **Vivekaninnanti** nissaraṇavivekaninnaṃ, pageva saṅkhāravimukhatāya, phalacittupattiyā cāti veditabbaṃ.

883. Saṅkhāratayapaṭippassaddhiyā, avasesacetasi-kaviññābhāvena rūpadhammattāvasesatāya ca matanirodhasamāpannānam avisesam gahetvā pucchā “**matassa ca samāpannassa ca ko viseso**”ti. Kāmaṃ nesaṃ

1. Paṭinivattivā pana ākiñcaññāyatane paṭiṭṭhātīti iminā (Syā, Ka)

saṅkhārattaya paṭippassaddhi-ādīhi aviseso, rūpadhammamattāvasesatāya pana āyu-usmā-indriyānaṃ apagamānapagamaṇaṃ visesoti dassetuṃ “**yvāyan**”ti-ādi vuttaṃ.

884. **Sabhāvatoti** sabhāvadhammato, paramatthatoti attho. Paramatthato hi vijjamānaṇaṃ saṅkhatādibhāvena vattabbataṃ labhati, na avijjamānaṃ. **Samāpajjantassa vasenāti** yasmā samāpajjantassa ariyapuggalassa samathavipassanādhamme yuganaddhe katvā aṭṭha samāpattiyo ārohantassa anukkamena saṅkhārānaṃ paṭippassambhanapayoganibbattiyā nirodhasamāpatti nippahānā nāma hoti, tasmā taṃ payoganibbattiṃ upādāya “**nippahānā**”ti vattuṃ vaṭṭati.

Saṅkhāravūpasamato, santadhammasamanvayato ca **santaṃ**. Ariyehi eva nisevitabbattā **ariyanisevitaṃ**. Tissannampi dukkhatānaṃ nibbutabhāvato **nibbānamiti saṅkhaṃ upāgataṃ**. **Ariyaṃ paññanti** suvisuddhaṃ maggaphalapaññaṃ. **Imissāpīti** nirodhasamāpattiyā. **Samāpattisamatthatāti** samāpajjanasamatthatā.

Āhuneyyabhāvādisiddhikathāvaṇṇanā

885. **Āhuneyyabhāvādisiddhīti** āhuneyyapāhuneyya dakkhiṇeyya añjalikaraṇīya anuttarapuññaakkhettabhāvasiddhi. **Avisesenāti** dassanamaggapaññādivisesena vinā, **etissā** lokuttarapaññāya. Ānetvā huntabbanti āhunaṃ, dūratopi ānetvā dātābbadānaṃ, taṃ paṭiggahetuṃ yuttoti **āhuneyyo**. Pāhunaṃ vuccati āgantukadānaṃ, taṃ paṭiggahetuṃ yuttoti **pāhuneyyo**. Dakkhiṇaṃ ārahatīti **dakkhiṇeyyo**, añjalikaraṇaṃ añjalikammaṃ, taṃ arahatīti **añjalikaraṇīyo**. Anuttaraṃ uttamaṃ sattānaṃ puññaviruhanaṭṭhānanti **anuttaraṃ puññaakkhettaṃ lokassāti** ayamettha saṅkhepo. Vitthāro pana heṭṭhā vuttoyeva.

886. **Mandāya vipassanāya āgatoti** atikkhāya vipassanāya vasena paṭhamamaggapaññaṃ bhāvetvā sotāpannabhāvaṃ āgato. Saddhādīnaṃ mudūnaṃ indriyānaṃ vasena **mudindriyopi** samāno. **Sattakkhattuparamoti** sattakkhattuṃ paramā bhavūpapatti attabhāvaggahaṇaṃ, tato parama aṭṭhamaṃ bhavaṃ

nādiyatīti sattakkhattuparamo. **Saṃsaritvā**ti paṭisandhiggahaṇavasena aparāparam gantvā. **Dukkhassantaṃ karotī**ti vaṭṭadukkhassa pariyaṇtaṃ pariyoṣānaṃ karoti. Ayaṃ kālena devalokassa, kālena manussalokassāti missakassa bhavassa vasena “**sattasugatibhave saṃsaritvā**”ti vutto. Kulato kulaṃ gacchatīti **kolamkolo**. Sotāpattiphalasacchikiriyato paṭṭhāya hi nīcakule upapatti nāma natthi, mahābhogakulesuyeva nibbattatīti attho. **Dve vā tīṇi vā kulānī**ti devamanussavasena dve vā tayo vā bhave. Iti ayampi missakabhaveneva kathito. Desanāmetameva cetam “dve vā tīṇi vā”ti. Yāva chaṭṭhabhavā saṃsarantopi kolamkolova hoti. Attabhāvaggahaṇasaṅkhātaṃ ekamyeva khandhabījaṃ etassa atthīti **ekabījī**. “**Mānusakaṃ bhavan**”ti idampi desanāmetam. “Devabhavaṃ nibbattetī”tipi vattum vaṭṭatiyeva. Ko panetesam imam pabhedam niyametīti? Tiṇṇam maggānam vipassanā. Sace hi uparitiṇṇam maggānam vipassanā balavatī hoti, ekabījī nāma hoti. Tato mandāya kolamkolo, tato mandatarāya sattakkhattuparamo.

887. Paṭisandhivasena sakiṃ āgacchatīti sakadāgāmī. **Sakidevā**ti ekavāraṃyeva. “**Imaṃ lokaṃ āgantvā**”ti iminā pañcasu sakadāgāmīsu cattāro vajjetvā ekova gahito. Ekacco hi idha sakadāgāmiphalaṃ patvā idheva parinibbāti, ekacco idha patvā devaloke parinibbāti, ekacco devaloke patvā tattheva parinibbāti, ekacco devaloke patvā idhūpapajjitvā parinibbāti. Ime cattāropi idha na gahitā. Yo pana idha patvā devaloke yāvatāyukaṃ vasitvā puna idhūpapajjitvā parinibbāti, ayaṃ idha gahito.

888. Paṭisandhivasena idha anāgamanato **anāgāmī**. **Indriyavemattatāvasenā**ti saddhādīnaṃ vimuttiparipācaka-indriyaṇaṃ paropariyattena. **Pañcadhā idha vihāya niṭṭho hotī**ti so anāgāmī antarāparinibbāyi-ādībhāvena pañcapakārena imam lokaṃ pajahitvā parinibbāyanako hoti. Āyuvemajjhassa antarāyeva kilesaparinibbānena parinibbāyanato¹

1. Parinibbāyanako (Syā)

antarāparinibbāyī. Upahaccāti vā upagantvā kālakiriyaṃ. **Appayovenāti** adhimattapayogena vinā appakasireneva tikkhindriyatāya sukheneva. **Sappayogenāti** ettha vuttavipariyāyena attho veditabbo. Uddhaṃ vāhibhāvena uddhamassa taṇhāsotaṃ, vaṭṭasotaṃ vāti **uddhaṃsoto.** Uddhaṃ vā gantvā paṭilabhitabbato uddhamassa maggasotanti **uddhaṃsoto.** Paṭisandhivasena akaniṭṭhabhavaṃ gacchatīti **akaniṭṭhagāmī.**

Yatthupapannoti avihādīsu yattha yattha upapanno. Imesaṃ pana anāgāmīnaṃ pabhedajānanatthaṃ uddhaṃsota-akaniṭṭhagāmicatukkaṃ veditabbaṃ—yo hi avihato paṭṭhāya cattāro devaloke sodhetvā akaniṭṭhaṃ gantvā parinibbāti, ayaṃ **uddhaṃsoto akaniṭṭhagāmī** nāma. Yo pana heṭṭhā tayo devaloke sodhetvā sudassīdevaloke ṭhatvā parinibbāti, ayaṃ **uddhaṃsoto na-akaniṭṭhagāmī** nāma. Yo ito akaniṭṭhameva gantvā parinibbāti, ayaṃ **na-uddhaṃsoto akaniṭṭhagāmī** nāma. Yo pana heṭṭhā catūsu devalokesu tattha tattheva parinibbāti, ayaṃ **na-uddhaṃsoto na-akaniṭṭhagāmī** nāma. Ete pana avihesu upapannasamanantarā āyugemajjhaṃ appatvā, patvā ca parinibbāyanavasena tayo antarāparinibbāyino, eko upahaccaparinibbāyī, eko uddhaṃsototi pañca. Te asaṅkhārasasaṅkhāraparinibbāyivibhāgena dasa hontī. Tathā atappa sudassa sudassīsūti cattāro dasakā cattālīsaṃ. Akaniṭṭhe pana uddhaṃsoto natthi. Tayo antarāparinibbāyino, eko upahaccaparinibbāyīti cattāro. Te asaṅkhārasasaṅkhāraparinibbāyivibhāgena aṭṭhāti aṭṭhacattālīsaṃ anāgāmino.

Sotāpannā pana paṭipadābhedena cattāro sattakkhattuparamā, cattāro kolaṅkolā, cattāro ekabījīnoti saddhādhurena paṭipannā dvādasa, tathā paññādhurenāti catuvīsati.

Sakadāgāmino suññatavimokkheṇa vimuttā paṭipadāvasena cattāro, tathā animitta-appaṇihitavimokkhehīti dvādasa.

889. Tathā arahanto. Te pana dvādasa paññāvimuttā, dvādasa ubhatobhāgavimuttā, dvādasa tevijjā, dvādasa chaḷabhiññā, dvādasa

paṭisambhidāppattāti samasaṭṭhi honti. Evamete saddhiṃ
 paccekasambuddhasammāsambuddhehi chacattālisādhikasataṃ ariyā. Yasmā
 tesāṃ ariyabhāvasiddhi ariyāya paññābhāvanāya, tena vuttaṃ
 “āhuneyyabhāvādisiddhipi imissā lokuttarapaññābhāvanāya ānisaṃso”ti.
 Lokiyavijjābhīṇṇāhi vināpi ubhatobhāgavimuttatā hoṭīti ubhatobhāgavimutto
 visuṃ gahito. **Yaṃ sandhāya vuttanti** yaṃ catutthamaggapaññābhāvanam
 sandhāya heṭṭhā saṅkhepato gāthāvaṇṇanāyaṃ vuttaṃ, taṃ pana vuttākāraṃ
 nigamanavasena dassetuṃ “**maggakkhaṇe**”ti-ādi vuttaṃ. Kāmaṃ catūsupi
 maggakkhaṇesu taṃ jaṭaṃ vijaṭeti nāma, phalakkhaṇesupi yathārahaṃ
 vijaṭitajaṭo, aggaphalakkhaṇeyeva¹ pana sabbaso vijaṭitajaṭo tato paraṃ
 vijaṭetabbāya jaṭāya abhāvato. Tenettha heṭṭhā
 heṭṭhimamaggapaññābhāvanānisaṃsassa vuttattāva
 catutthamaggapaññābhāvanāvasena attho vutto.

Ratinti abhiratiṃ, abhirucinti attho. **Tatthāti** ariyāya paññābhāvanāya.

890. **Imissā gāthāyāti** imissāṃ gāthāyaṃ. Gāthā hi attano atthabhūtaṃ
 visuddhimaggassa ādhārabhāvena vuttā, sāmivacanāṃ vā etaṃ atthassa
 taṃsambandhibhāvato.

Paññābhāvanānisaṃsaniddesavaṇṇanā niṭṭhitā.

Iti tevīsatiṃparicchedavaṇṇanā.

1. Maggaphalakkhaṇeyeva (Syā, Ka)

Nigamanakathāvaṇṇanā

891. **I**missā dāni gāthāyāti-ādīnaṃ gāthānaṃ attho heṭṭhā vutto eva. Svāyaṃ “visuddhimaggaṃ bhāsissan”ti evaṃ paṭiññāto visuddhimaggo ettāvata bhāsito hotīti sambandho.

892. **T**atthāti-ādīsu ayaṃ padasambandhena saddhiṃ saṅkhepattho—**tesaṃ** “sīle paṭiṭṭhāyā”ti gāthāyaṃ vuttānaṃ sīlādippabhedānaṃ **atthānaṃ pañcannampi mahānikāyānaṃ aṭṭhakathānaye aṭṭhakathātantiyaṃ** tattha tattha **vutto yo vinicchayo, yebhuyyena taṃ sabbāṃ samāharitvā samānetvā** nikāyantarassa nikāyagatavādadosasaṅkarehi **mutto so nicchayo yasmā pakāsito, tasmā visuddhikāmehi yogīhi etasmim¹ visuddhimagge ādaro karaṇīyoyevāti.**

1. Tattha (Syā, Ka)

Nigamanagāthāyo

Ettāvata ca—

Suvisuddhasamācāro¹, visuddhanayamaṇḍitaṃ.

Visuddhimaggaṃ lokassa, yadaccantavisuddhiyā.

Abhāsi karuṇāvega-samussāhitamānaso.

Mahesi vipulodāta²-visuddhimatipāṭavo.

Tassa atthaṃ pakāsetuṃ, kathāmaggaṃ purātaṃ.

Nissāya yā samāraddhā, atthasaṃvaṇṇanā mayā.

Āyācito siddhagāma-pariveṇanivāsina.

Therena **dāṭhanāgena**, suddhācārena dhīmatā.

Sā esā paramatthānaṃ, tattha tattha yathārahaṃ.

Nidhānato **paramattha-mañjūsā** nāma nāmato.

Sampattā pariniṭṭhānaṃ, anākulavinicchayā.

Aṭṭhāsītippamāṇāya, pāliya bhāṇavārato.

Iti taṃ saṅkharontena, yaṃ taṃ adhigataṃ mayā.

Puññaṃ tassānubhāvena, lokanāthassa sāsane.

Ogāhetvā visuddhāya, sīlādipaṭipattiyā.

Sabbepi dehino hontu, vimuttirasabhāgino.

Ciraṃ tiṭṭhatu lokasmiṃ, sammāsambuddhasāsaṇaṃ.

Tasmiṃ sagāravā niccaṃ, hontu sabbepi paṇino.

Sammā vassatu kālena, devo, rājā mahīpati.

Saddhammanirato lokaṃ, dhammeneva pasāsātūti.

Badaratitthavihāravāsina ācariyadhammapālena katā paramatthamañjūsā
nāma visuddhimaggamahāṭikā samattā.

Visuddhimaggamahāṭikā samattā.

1. Suvisuddhisamācāro (Syā)

2. Vipuloḷāra (Syā)

Visuddhimaggamahāṭīkāya dutiyabhāge

Samvaṇṇitapadānaṃ anukkamaṇīkā

Padānukkamo	Piṭṭhaṅko	Padānukkamo	Piṭṭhaṅko
[A]		[A]	
Akaṭṭhapāko	52	Ajimhatāpaccupaṭṭhānā	145
Akaṇo	52	Ajīvasaññā	360
Akatam	195, 210	Ajjhattam	323
Akatābhīniveso	42	Ajjhattābhīnivesā	77
Akammaññabhāvo	145	Ajjhattikaṃ	106
Akusalam	114	Ajjhosānaṭṭho	346
Akkhalitapaṭivedho	144	Añcītakāṇṇo	429
Agati	495	Añjalikaraṇīyo	530
Agādham	348	Aññāṇam	149, 258
Agedho	143	Aññāṇaṭṭho	345
Agelaññabhāvalakkhaṇā	145	Aññamaññavirodhitā	381
Aggaḷantarikāya	25	Aṭṭiyamāno	364
Aggidhamanādīhi	5	Aṭṭhaṅgasamannāgataṃ	8
Aggilakkhaṇam	193	Aḍḍhekādasa	353
Aṅgasaṅkantito	2	Aṇu-ādīnam	209
Aṅgasambhārā	362	Aṇusahagatā	495
Aṅgīrasam	21	Atammayatā	481
Aṅgulaṅgulantare	410	Atikkantamānusakaṃ	57
Aṅgulivedhakam	94	Atikkantamānusikā	38
Acaṇḍikkam	144	Atipāteyya	224
Acalā	431	Atimaññanti	52
Accutirasam	193	Ativisadam	430
Ajaññato	453	Atītam	156
Ajātam	210	Atītaddhānam	245
Ajātabuddhi	75	Attakilamatho	218
Ajigucchanam	149	Attagāhapatitam	163

Padānukkamo	Piṭṭhaṅko	Padānukkamo	Piṭṭhaṅko
[A]		[A]	
Attadubbālā	366	Anabhinataṃ	20
Attapaṭikkhepato	407	Anallīnanissayo	92
Attabhāvaṃ	29	Anallīnabhāvo	143
Attabhāvo	411	Anallīyamānopi	141
Attavādupādānaṃ	327	Anavaṭṭhānaraṣaṃ	150
Attasaṅkantiḍassanaṃ	342	Anāgataṃ	156
Attā	458	Anāgāmimaggo	483
Atthanayā	347	Anāgāmī	531
Atthapaṭisambhidā	81	Anāpāthaṃ	24
Atthasādhikā	377	Anāsavā	77
Atthānantaratāya	273	Aniccaṃ	226
Atthuddhāro	194	Aniccatā	88
Athaddhatā	101	Aniccānupassanāya	11
Adandhatā	101, 145	Aniyatā	139
Adassanaṭṭho	145	Aniyametvā	22
Adassanato	412	Anissitaṃ	20
Addhasāro	75	Anukūlamitto	144
Addhuvam	340	Anugantvā	460
Adhiggaḥitattā	502	Anuttaraṃ	43
Adhiṭṭhātabbaṃ	527	Anuttāso	149
Adhiṭṭhānavasena	11	Anutthunanaṃ	203
Adhiṭṭhānā	10	Anutthunanti	53
Adhipaññādharmavipassanā	417	Anunnataṃ	20
Adhipatayo	476	Anupagamma	332
Adhipatiyaṭṭho	346	Anupacchedakaraṇaṃ	193
Adhimuccanaṃ	146	Anupaddave	204
Adhimutti	142	Anuparamadhammakattā	496
Anaññathā	190	Anupādinnaṃ	353
Anaññātaṃ	185	Anuppannapubbaṃ	491
Anapanataṃ	20	Anuppabandhanarasā	102

Padānukkamo	Piṭṭhaṅko	Padānukkamo	Piṭṭhaṅko
[A]		[A]	
Anuppādanirodho	192	Apavaggagāho	210
Anuppādo	449	Apāyaṁ	349
Anubodhañāṇaṁ	216	Apāyakosallaṁ	77
Anulomikā	79	Apāyo	80
Anulomentena	241	Apilāpanaṁ	143
Anuvidhānaṁ	188	Apunarāvaṭṭakaṁ	484
Anusayā	495	Appaṭighātapaccupaṭṭhānā	145
Anussarati	467, 468	Appaṭipajjanīyato	163
Anussaritaṁ	377	Appaṭipatti	254
Anussavavasena	332	Appaṭibaddhaṁ	20
Anussāhalakkhaṇaṁ	150	Appaṭisandhikā	411
Anussāhito	117	Appatti	202
Anuḷāresu	130	Appanā	62
Anūnādhikato	162	Appanādhigamo	4
Anūhate	204	Appanāraso	215
Anonataṁ	19	Appabhavaṁ	209
Antaraparicchedo	354	Appavipākā	161
Antarahito	25	Appahātabbato	163
Antarāparinibbāyī	532	Appahīnattā	525
Antarāva	23	Appeti	504
Antogadhā	333	Abbāhati	36
Andhakāraṁ	24	Abyākataṁ	114
Andhakārapaccupaṭṭhāno	149	Abhabbo	21
Andhakārapareto	472	Abhāvitabhāvano	4
Andhatamaṁ	48	Abhikkamo	409
Apanetvā	318	Abhijjhādīnaṁ	8
Apalibuddhā	37	Abhiññācittena	289
Aparanto	181	Abhiññātā	507
Apariccāgo	149	Abhiññeyyāni	224
Apare	23		

Padānukkamo	Piṭṭhaṅko	Padānukkamo	Piṭṭhaṅko
[A]		[A]	
Abhinandati	66	Ayo	412
Abhinandato	243	Ayoniso	149
Abhinanditaṭṭho	346	Arati	150
Abhinivesaṃ	417	Aratirabhisahanatā	445
Abhinivesato	327	Arahattamaggo	483
Abhinīhāraḅkhamaṃ	8	Ariyakantānaṃ	219
Abhibhavanato	160	Ariyañāṇassa	193
Abhibhavitvā	54	Ariyaphalaṃ	513
Abhimatā	511	Ariyā	10
Abhivadato	243	Arūpabhavo	331
Abhisamyūhitvā	158	Arūpānaṃ	119
Abhisāṅkhāraṣṣa	253	Alaggabhāvo	143
Abhisāṅkhāro	315	Alaggamāno	26
Abhisāṅkhāsi	25	Alātacakkaṃ	426
Abhisāṅgo	149	Avakujjena	29
Abhisandahati	141	Avasavattito	407
Abhisanditaṃ	520	Avikkhepo	142
Abhisamayaṭṭho	191	Avijjāgato	266
Abhisambujjhati	227	Avijjūpanisā	250
Abhiantvā	54	Avitathā	190
Abhūtaṃ	210	Avidvā	266
Amaṇḁanaḁatā	453	Avināsaṃ	363
Amatārammaṇaṃ	520	Avinibbhuttā	76
Amatogadhaṃ	511	Avinibbhogo	254
Amatosadhaṃ	473	Avipākaṃ	319
Amaddanaṃ	148	Avirodhitā	101
Amaratapo	265	Avirodho	144
Amānusī	430	Avisāro	142
Ambavane	22	Avihimsā	178
Ayā	61	Avīcijarā	103

Padānukkamo	Piṭṭhaṅko	Padānukkamo	Piṭṭhaṅko
[A]		[Ā]	
Avūpasame	150	Ākaḍḍhanaṁ	198
Avekallaṭṭhena	234	Ākaro	172
Asaṁsaṭṭhatā	162	Ākārā	338
Asaṁsappanaṁ	146	Ākāsakālā	361
Asaṁsīdanto	117	Ākāsadhātu	88
Asaṅkhataṁ	210	Ākoṭentena	224
Asaṅkhāraṁ	116	Ācayalakkhaṇo	102
Assaddhiyaṁ	491	Ācikkhati	227
Asanaṁ	224	Ājānato	185
Asanivicakkamiva	348	Ātāpanaṁ	199
Asampaṭivedho	149	Ādānanikkhepanato	405
Asambhinnattā	405	Ādikammiko	4
Asammissaṁ	219	Ādimattakathanaṁ	336
Asammissassa	253	Ādhipaccaṁ	186
Asammohapaccupaṭṭhānā	76	Ādhipateyyaṭṭho	191
Asayaṁvasī	381	Ānubhāvena	131
Asarikkhatā	162	Āneñjappatte	9
Asāraṁ	456	Āpānabhūmiṁ	29
Asārajjāṁ	149	Āposamvaṭṭo	50
Asārā	426	Āyakosallaṁ	77
Asubhatā	221	Āyatanaghaṭṭanaṁ	343
Asubhapharaṇaṁ	13	Āyanti	412
Asurasadisāṁ	61	Āyā	172
Assaddhiyena	7	Āyāso	253
Assabandhā	14	Āyūhanaṁ	141
Assādayamānaṁ	313	Āyūhanarasā	253
Assādeti	170	Āyūhanā	338
Ahaṁkāro	359	Āyūhitam	505
Ahetukaṁ	106	Āyo	79
Ahosikammaṁ	376	Ārakkhapaccupaṭṭhānā	143

Padānukkamo	Piṭṭhaṅko	Padānukkamo	Piṭṭhaṅko
[Ā]		[I]	
Ārabhati	265	Īcchāvacarānaṃ	8
Ārammaṇakaraṇasampatti	145	Ījjhati	10
Ārammaṇapaṭivijānaṃ	356	Ījjhanaṭṭhena	10
Ārammaṇapaṭisaṅkhā	439	Ījjhanaṭṭho	490
Ārammaṇasaṅkanti	3	Ījjhanti	10
Āropeti	32	Īti	135
Ālambitvā	271	Ītthākappo	95
Ālayarāmā	329	Ītthikuttaṃ	95
Ālokaajātaṃ	24	Ītthinimittaṃ	95
Āvaṭṭanti	201	Ītthindriyaṃ	88
Āvaṭṭetvā	479	Ītthibhāvalakkhaṇaṃ	95
Āvaraṇaṃ	497	Ītthilingaṃ	95
Āvāsamacchariyaṃ	496	Ītthī	457
Āvijjhivā	454	Īdappaccayatā	233
Āveṇikā	499	Īddhābhisaṅkhāraṃ	25
Āsannaṃ	312	Īddhipaṭilābhāya	16
Āsavā	495	Īddhipāṭihāriyaṃ	25
Āsādukkhaṃ	183	Īddhipādabhāvūpagameṇa	9
Āsiṃ	55	Īddhipādā	17
Āsevaṇaṃ	479	Īddhilābhāya	16
Āsevaṇaṭṭho	280	Īddhivasiṭāya	17
Āsevantassa	445	Īddhivikubbaṇaṃ	2
Āhārajaṃ	108	Īddhivikubbaṇatāya	16
Āhāramayaṃ	410	Īddhivisaviṭāya	17
Āhāro	88	Īddhivesārajjāya	17
Āhunaṃ	328	Īndaliṅgaṭṭho	185
Āhuneyyo	530	Īndasiṭṭhaṃ	186
Āhundarikaṃ	48	Īriyāpatho	401
Āḷinde	25	Īssarakāraṇino	217

Padānukkamo	Piṭṭhaṅko	Padānukkamo	Piṭṭhaṅko
[I - Ī]		[U]	
Issāso	485	Upaṭṭhāne	433
Īsikaṃ	36	Upaḍḍharattacīvare	22
[U]		Upatthambhanaṃ	141
Ukkaṃsāvakaṃso	322	Upatthambheti	341
Ukkaṇṭhitvā	526	Upanayanarasā	103
Ukkantā	429	Upanijjhāyanaṭṭho	283
Ukkāpabhā	47	Upanissayakoṭiyā	334
Uggaho	350	Upanissayo	278
Uṭṭhahanti	172	Upamāto	162
Utujāṃ	108	Upavīṇaṃ	420
Utupaccayaṃ	404	Upahacca	532
Uttarimanussadhammā	25	Upapajjavedanīyaṃ	376
Uttānīkaroti	227	Upapattikkhaṇe	308
Udakānugataṃ	54	Upapattibhavo	257
Uddānaṃ	471	Upapāte	56
Uddhampādaṃ	201	Upapīḷakaṃ	379
Uddhambhāgiyaṇi	496	Upādānāni	495
Uddhamṣoto	532	Upādāyaṃ	86
Uddhaccaṃ	150	Upādinnaṃ	30
Uddhaccānugataṃ	43	Upādinnattā	107
Unnataṃ	20	Upādiyati	253
Unnati	151	Upādiyim	26
Upakkamena	311	Upāyakosallaṃ	77
Upakkilesavimutti	37	Upāyasampadāya	10
Upakkhalanaṃ	342	Upāyasampādanatthaṃ	454
Upaghātaṃ	379	Upāyā	80
Upacayo	88, 103	Upekkhako	13
Upacitaṃ	58	Uppattideso	171
Upaṭṭhāti	431	Uppādaṭṭhitibhaṅgappattaṃ	65

Padānukkamo	Piṭṭhaṅko	Padānukkamo	Piṭṭhaṅko
[U - Ū]		[O]	
Uppādo	237, 438	Oghaniyato	160
Uppannā	257	Oghā	495
Ubbahanapaccupaṭṭhānaṃ	98	Ojavantena	520
Usūyanaṃ	152	Oḍḍāpesi	454
Ussakkitvā	75	Ottappati	143
Ussannatare	55	Ottappamānā	472
Ussāhanabhāvena	141	Otarati	479
Ūkāsiramattaṃ	94	Odhūnanaṃ	198
[E]		Onahanaṃ	150
Ekajaṃ	110	Opapātikā	329
Ekattagataṃ	20	Opapātiko	488
Ekadhammampi	7	Obhāsagataṃ	8
Ekantamiṭṭhārammaṇe	126	Omato	303
Ekantharikavasena	4	Omattā	409
Ekapaṭipāṭiyā	30	Oropetum	13
Ekapaṭivedhāni	505	Olambanti	299
Ekabījī	531	Olokayamāno	29
Ekabhavaparicchinnaṃ	65	Osadhitārakappabhā	47
Ekādasa	308	Ossajjitvā	12
Ekuppādo	346	Oḷārikā	159
[O]		Oḷārike	107
Okāsakatuppanno	500	[Ka]	
Okāse	28	Kaṅkhāmalāṃ	509
Okkantassa	32	Kaṭukañcukatā	152
Okkantikkhaṇe	274	Katakaṭṭhim	355
Okkamantā	47	Kadalikkhandho	167
Okkamitvā	17	Kapotakandarāyaṃ	12
Okkhanditvā	490	Kappaṭṭhitikā	161
		Kappo	49

Padānukkamo	Piṭṭhaṅko	Padānukkamo	Piṭṭhaṅko
[Ka]		[Ka]	
Kabaḷikāro	88	Kāmāvacaraṃ	115
Kammaṃ	313	Kāmupādānaṃ	329
Kammakkhame	7	Kāmesu	328
Kammajaṃ	108	Kāyaṃ	32
Kammaje	352	Kāyaduccaritaṃ	59
Kammaññatā	88	Kāyaviññatti	88
Kammanimittaṃ	312	Kāyasakkhi	467
Kammaniyaṃ	7	Kāyasaṅkhārā	523
Kammantaraṃ	379	Kāyasaṅkhāro	253
Kammaṃpaccayena	298	Kāyasamaññā	361
Kammabhavo	257	Kāyā	11
Kammavipākajā	10	Kāyikavīriyaṃ	253
Kammasambhavo	380	Kāyindriyaṃ	185
Kammasambhārā	340	Kāyo	59
Kammassakataṃ	78	Kāraṅgaṃ	380
Kammāyatanesu	78	Kāraṇaṃ	268
Kammindriyāni	359	Kālānantaratāya	273
Karajakāyassa	31	Kiccaghanatā	437
Karaṇḍāya	36	Kittimalohāni	413
Kalalakaddamaṃ	355	Kiriyaviññāṇaṃ	129
Kalyāṇadhammo	10	Kiriyā	380
Kasa-ṇaparikkamaṃ	4	Kilantaṃ	410
Kasiṇānulomato	2	Kilesā	495
Kāmacchando	328	Kilesāmisam	450
Kāmanandī	328	Kukataṃ	152
Kāmapaṭisaṃhyutto	178	Kukkuccaṃ	200
Kāmayānassa	335	Kumārakavaṇṇaṃ	34
Kāmarāgo	328	Kulikuṇḍikajātā	348
Kāmasneho	328	Kusalaṃ	113
Kāmānaṃ	329	Kusalakiriyato	401

Padānukkamo	Piṭṭhaṅko	Padānukkamo	Piṭṭhaṅko
[Ka]		[Ga]	
Kusītapuggalassa	427	Gatapaccāgatikabhāvena	84
Kūṭāgāraṇṇikatthāya	48	Gatim	461
Kūṭo	75	Gatinimittam	312
Ketukamyatā	151	Gatiyo	303
Kevalā	411	Ganthanam	496
Kokanadam	21	Ganthaniyam	160
Koṭiyā	224	Ganthā	495
Kolaṅkolo	531	Gandhabbanagaram	426
Kosajjam	491	Gandho	87
Kosallam	79	Gabbhaseyyakā	197
Kosiyā	36	Gabbhe	339
[Kha]		Gambhīram	381
Khaggena	358	Gambhīrā	224
Khajjupanakappabhāsadisam	47	Gayhupagam	471
Khanti	79	Garahitabbam	53
Khandhapaṭipāṭi	45	Garukam	312
Khayagāmī	510	Garubhāvo	145
Khayadhammam	226	Gahaṇam	339
Khārāpaṭicchakam	198	Giribhaṇḍavāhanapūjā	5
Khiḍḍārati	408	Guṇaparidhamśanena	59
Khipanti	312	Gotrabhu	472
Khipitum	13	Gobandhā	14
Khippam	454	[Gha]	
Khippanisantibhāvo	5	Ghaṭṭanam	100
Khīyitabbam	53	Ghaṭṭanavasena	107
Khīranvayassa	363	Ghaṭṭanā	132
[Ga]		Ghanavinibbhogam	454
Gaṅgāṭire	31	Ghanavinibbhoge	437
Gaṇḍavikārā	342	Ghanasaññā	342

Padānukkamo	Piṭṭhaṅko	Padānukkamo	Piṭṭhaṅko
[Gha]		[Cha]	
Ghātetvā	379	Chandasamādhi	18
Ghātena	6	Chandahetuko	18
Ghānaṃ	87	Chandādhipati	271
[Ca]		Chando	146
Cakkhati	87	Cha pāṇakā	176
Cakkhu	87	Chaḷaṅgupekkham	14
Cakkhudasako	307	Chādanapaccupaṭṭhānā	253
Cakkhundriyaṃ	185	Chiddaṃ	26
Cakkhumanto	363	Chupati	28
Caṇḍikkam	151	Cheko	75
Catuṇṇāyā	489	[Ja]	
Candapūve	31	Jaṅghasetu	47
Calanaṃ	100	Jaccandho	366
Cittakūṭapabbato	451	Janakam	372
Cittagamaṇaṃ	32	Janakājanakā	401
Cittajaṃ	108	Jātim	49
Cittaje	352	Jāti	113
Cittapayogo	281	Jātiyo	361
Cittasaṅkhārā	523	Jātilohāni	412
Cittasaṅkhāro	253	Jigucchamānā	364
Cittuppādo	495	Jivhā	87
Cintāmayā	77	Jivādikā	360
Cutipaṭṭisandhivasena	46	Jivitaṃ	411
Cutiya	56	Jivitaddhānassa	528
[Cha]		Jivitindriyaṃ	88
Chadhāturo	177	Jīvo	360
Chandajātassa	335	Juṭṭham	186
Chandarāgo	20	Juṇhāya	12
		Jeṭṭhakabhāvena	271

Padānukkamo	Piṭṭhaṅko	Padānukkamo	Piṭṭhaṅko
[Jha]		[Tha]	
Jhattaṃ	410	Ṭhitiṃ	439
Jhānaṃ	2	Ṭhitiyā	519
Jhānavibbhantako	63	Ṭhite	9
Jhānaphassaṃ	467	[Ta]	
Jhānā	277	Taṃtaṃsamayaṃ	155
Jhānānulomato	2	Taṅkhaṇappavattaṃ	80
Jhānukkantikaṃ	2	Taṅkhaṇe	12
[Ña]		Tacchaniyyānabhāvattā	194
Ñāṇaṃ	440	Taṭataṭāyantā	410
Ñāṇaṅgena	509	Taṇhaṃ	442
Ñāṇacariyāhi	521	Taṇhānusaye	204
Ñāṇañeyyāvayavā	177	Tathatā	193
Ñāṇañeyyo	177	Tathattena	220
Ñāṇavippayuttaṃ	116	Tathā	190
Ñāṇavipphārā	10	Tadaṅgappahānaṃ	509
Ñāṇasampayuttaṃ	116	Tadabhilāpe	82
Ñāṇānubhāvanibbatto	11	Tadupakkamasambhūto	202
Ñāṇāloka	472	Tantākulakajātā	348
Ñāṇuppattito	11	Tanti	240
Ñāṇena	10	Tappaccanīkakilesā	355
Ñātapariññā	167	Taruṇapallavavaṇṇaṃ	413
Ñāyo	235, 244	Tāṇaṃ	447
Ñeyyappabhedo	177	Tālacchiggaḷena	25
[Tha]		Tikkhatarā	479
Ṭhapanam	96	Tikhiṇaṃ	430
Ṭhānaṃ	30	Titthiyā	45
Ṭhānaviruddho	292	Tipu	413
Ṭhānuppattikaṃ	80	Tibbandhakāre	198
		Tiro	319

Padānukkamo	Piṭṭhaṅko	Padānukkamo	Piṭṭhaṅko
[Ta]		[Da]	
Tilapiṭṭhaṃ	355	Diṭṭhadhammavedanīyaṃ	376
Tivaṭṭaṃ	338	Diṭṭhi	79
Tividhanātakehi	29	Diṭṭhisaccaṃ	194
Tīraṇapariññā	167	Dinnaṃ	328
Tuṭṭhahaṭṭho	366	Dibbacakkhunā	57
Tumbaṃ	15	Dibbavihārasena	37
[Tha]		Dibbasadisattā	37
Thambho	145	Dibbe	38
Thāmagataṃ	497	Divāsane	429
Thāmajātaṃ	39	Disākāko	460
Thinatā	150	Dīpappabhāsadisaraṃ	47
Thinamiddhānugataṃ	43	Dukkhaṃ	136
Therambatthalaṃ	5	Dukkhadukkhaṃ	197
[Da]		Dubbaṇṇe	58
Dakkhiṇeyyo	530	Dubbuṭṭhi	220
Daṭṭhabbabhāvo	107	Duratikkamaṭṭho	346
Daṇḍakasaññā	485	Duratiyānaṃ	348
Daṇḍakasetu	47	Durabhisambhavataraṃ	224
Daṇḍābhīhataṃ	365	Dussanti	151
Dadhiraṣaṃ	64	Dūre	107
Daratho	144	Devaloke	51
Dassanaṭṭhena	57	Deseti	227
Dassanaṭṭho	191	Dosamūlaṃ	120
Dassanabhūmi	77	Drabyādikā	359, 360
Dassanaraṣaṃ	254	Drabyāni	360
Dassanavisayattā	108	Dvikuṭṭagehaṃ	429
Dahati	81	[Dha]	
Dalhe	204	Dhammakathā	23
		Dhammaṭṭhitatā	227

Padānukkamo	Piṭṭhaṅko	Padānukkamo	Piṭṭhaṅko
[Dha]		[Na]	
Dhammaṭṭhiti	227	Nitthunanaraso	201
Dhammaṭṭhitiñāṇaṃ	384	Nidānaṃ	190
Dhammatā	175	Niddhūnaṃ	198
Dhammatārūpaṃ	406	Nidhānaṃ	420
Dhammato	330	Nipphattivaseṇa	11
Dhammaniḥḥānakkhanti	79	Nibbaṭṭitakappāsaṃ	460
Dhammaniyāmatā	227	Nibbindati	451
Dhammapaṭisaṃbhida	81	Nibbeṭṭetvā	454
Dhammasabhāvo	76	Nimittaṃ	384, 417
Dhammasamūho	233	Nimittāramaṇaṃ	20
Dhammā	171	Nimittuppādanaṃ	4
Dhamme	235	Niyataviratitā	149
Dhātāṃ	410	Niyatā	139
Dhuvasaññaṃ	417	Niyamato	321
[Na]		Niyametvā	473
Nakkhattadivase	31	Niyyānaṃ	191
Natthitā	288	Niyyānikaṭṭhena	491
Nandiṃ	26	Nirasā	448
Nandī	243	Nirassādato	160
Nandīrāgasahagatā	203	Niruttipaṭisaṃbhida	81
Namati	253	Nirussāhaṃ	127
Nānattakilesehi	20	Nirodhadhammaṃ	226
Nānāvaṇṇe	22	Nirodheti	442
Nikkhittā	240	Nilīyitvā	471
Nicayo	420	Nissaraṇaṃ	191
Niccabhāvāpatti	209	Nissāraṃ	456
Viccasaññaṃ	442	Nīlamātikaṃ	31
Niccena	456	Nīvaraṇaṃ	497
Nijjaro	361	Nekkhammaṃ	10
Nittejaṃ	365	Neyyaṃ	322

Padānukkamo	Piṭṭhaṅko	Padānukkamo	Piṭṭhaṅko
[Pa]		[Pa]	
Pakativāṇṇaṃ	11, 34	Paṭiccasamuppādo	217
Pakatisāvaka	45	Paṭicchannaṃ	24
Pakatisūriye	51	Paṭicchādanam	497
Pakkhapāto	147	Paṭibhānapaṭisambhidā	81
Pakkhitto	452	Paṭilābhaṭṭhena	9
Paggaho	216	Paṭivijjheyya	224
Paccanīkena	476	Paṭivedho	345
Paccayaṃ	381	Paṭisaṅkhānaṃ	469
Paccayatāya	233	Paṭisandhipaccupaṭṭhānaṃ	253
Paccayato	228	Paṭisandhiyaṃ	196
Paccayabhedo	174	Paṭihanaṇabhāvo	107
Paccayavataṃ	424	Paṭhamataraṃ	279
Paccayā	364	Paṭhamajjhānike	148
Paccayānaṃ	6	Paṭṭhabeti	227
Paccavekkhaṇaṃ	56	Paṇidahissati	10
Paccābhiññānaṃ	139	Paṇītabhāvūpagamena	9
Paccuppanna	412	Paṇītā	179
Pajahati	417	Paṇḍito	433
Pajānāti	42	Patikuṭati	459
Pañcakāmaguṇiko	525	Paṭiṭṭhābhāvo	5
Pañcavokārabhave	296	Patito	39
Pañjarapakkhitto	452	Patilīnacarassa	473
Pañhākammaṃ	73	Patilīyati	459
Paññāpeti	227	Patīyamāno	233
Paññāpariggahitaṃ	8	Pathavito	53
Paññāvimutto	468	Pathavīkasiṇaṃ	27
Paṭikkamo	409	Pathavīdhātu	356
Paṭikkūlato	453	Pathavīraso	502
Paṭighoso	313	Padabhāṇaṃ	23
Paṭicca	230	Padahanti	490

Padānukkamo	Piṭṭhaṅko	Padānukkamo	Piṭṭhaṅko
[Pa]		[Pa]	
Padumaṃ	21	Paritāpanaṃ	199
Padhānaggahaṇaṃ	18	Paridayhanaṃ	203
Padhānabhūtā	18	Paridametabbaṃ	2
Papatanti	201	Paripantho	63
Pabbhāro	408	Paripucchā	84
Pabhavā	51	Paribhaṇḍañāṇāni	63
Pabhavo	193	Parimajjati	28
Pabhāvitā	366	Pariyāti	40
Pabhedakā	445	Pariyādinnaśinehaṃ	51
Paradhamavasānuvattino	366	Pariyāpannā	120
Parapaccayato	366	Pariyāpuṇaṇaṃ	84
Paramasambādhe	198	Pariyuṭṭhānaṭṭhāyī	335
Parāmaṭṭho	499	Pariyuṭṭhitā	363
Parāmasitvā	471	Pariyesantena	41
Parāmāsā	495	Parihāyanti	335
Parāmāso	150	Parihāyamāno	49
Parikaḍḍhanaṃ	198	Palibodhaṭṭho	191
Parikappanato	343	Palibodhenti	336
Parikammaṃ	40	Palibodho	193
Parikammasamādhī	38	Palujjivā	51
Parikammasamādhīñāṇaṃ	49	Pallaṅkaṃ	27
Parikammasamādhicittassa	39	Pavattaṃ	380
Parikkhatatā	141	Pavatta-ututo	318
Parikkhayamānaṃ	52	Pavattañāṇo	505
Pariggahetabbaṃ	354	Pavattanaṃ	96
Pariggahetvā	413	Pavattipaccupaṭṭhānaṃ	193
Pariccajanato	442	Pavattibhāvato	222
Pariccajitukāmatā	469	Pavattilakkhaṇā	102
Parijappitvā	15	Pavatto	233
Paritassati	253		

Padānukkamo	Piṭṭhaṅko	Padānukkamo	Piṭṭhaṅko
[Ba]		[Bha]	
Balavapubbayogānaṃ	5	Bhavasammuditā	363
Bahulaṃ	377	Bhavārāmā	363
Bahulīkatam	7	Bhave	196
Bahuvidhā	74	Bhavo	330
Bādhati	29	Bhāro	4
Bādhanalakkhaṇaṃ	193	Bhāvayati	253
Bījarukkhādīkānaṃ	381	Bhāvanānukkamo	5
Bībhacchaṃ	453	Bhāvanāpāripūriyā	9
Bujjhanakasattassa	491	Bhāvanābhūmi	77
Buddhisampanno	433	Bhāvitam	7
Bojjhaṅgā	491	Bhāventassa	445
Bodhipakkhiyā	490	Bhāventā	417
Byatto	433	Bhijjate	383
Byasanāpannā	446	Bhīmavegānupatitā	513
Byāpārābhāvo	348	Bhumavajjesu	304
[Bha]		Bhūtam	86
Bhaṅgaṃ	376	Bhūtāni	359
Bhaṅgānupassanāñāṇaṃ	435	Bhūtāpagataṃ	500
Bhaddassa	200	Bhūmiyo	16
Bhantattaṃ	150	Bhedo	309
Bhayaṃ	25	[Ma]	
Bhayatupaṭṭhānañāṇaṃ	435	Maggatejaṃ	472
Bhayato	446	Maggabhāve	209
Bhavagāmi	330	Maggaviññāṇe	148
Bhavaṅgacalanam	132	Maggavuṭṭhānam	470
Bhavaṅgamanam	180	Maggassa	434
Bhavaditṭhippahānam	445	Maṅgalakiriyā	328
Bhavantarapaṭisandhānam	339	Macchariya	495
Bhavaratā	363	Maṇḍūkakaṇṭako	502

Padānukkamo	Piṭṭhaṅko	Padānukkamo	Piṭṭhaṅko
[Ma]		[Ma]	
Manasikātabbaṁ	354	Māpetvā	5
Manāpaṁ	415	Māyā	167, 426
Manindriyaṁ	185	Māraṇantikadukkhāṁ	203
Manu	94	Micchā	149
Manussūpacāraṁ	38	Micchāñāṇaṁ	496
Mano	65	Micchāpaṭipatti	254
Manodhātu	123	Micchābhiniveso	150
Manomayaṁ	11	Missakakese	22
Manomayā	10	Mukhanimittaṁ	355
Manomayiddhi	11	Muñcanassa	454
Manovighātarasaṁ	201	Muñcitukamyatāñāṇaṁ	435
Mandaṁ	368	Muñjapabbajabhūtā	348
Mandadasakaṁ	408	Muñjamhā	36
Mandabahuvipākatā	330	Mutaṁ	108
Mamattena	325	Muti	79
Maraṇakāle	377	Muttasirā	51
Marīci	426	Muttā	413
Marīcikā	166	Muduṁ	7
Maru	411	Muddā	313
Masāragallaṁ	413	Munāti	171
Mahaggataṁ	43	Muyhanti	149
Mahājaṅghamaggo	47	Mettāya	13
Mahādhārāhi	53	Mohamūlaṁ	120
Mahānubhāve	28		
Mahābodhiṁ	31	[Ya]	
Mahāmātikaṁ	484	Yañño	265
Mahiddhike	28	Yathābhūtañāṇaṁ	384
Mānavo	457	Yadavatthā	344
Mānusikā	38	Yanti	366
Mānuse	38	Yamakaṁ	364

Padānukkamo	Piṭṭhaṅko	Padānukkamo	Piṭṭhaṅko
[Ya]		[La]	
Yāthāvasarasato	362	Lakkhaṇaṃ	173
Yiṭṭhaṃ	328	Laṅghitvā	484
Yuganaddhā	495	Laddhapaccayaṃ	133
Yogavihitesu	78	Laddhāvasesapaccayo	312
Yogino	215	Lahusaññaṃ	17, 32
Yoniyo	303	Lālappanaṃ	203
[Ra]		Līnatā	150
Rajo	22	Lubbhanti	149
Rajoharaṇaṃ	22	Leṇaṃ	447
Raṅjitabbaṃ	441	Lokadhammā	495
Raṅjeti	53	Lokaniyyānāya	461
Ramme	22	Lokapakati	193
Raso	88	Lokabyūhā	50
Rāgakkhayo	208	Lokavivaraṇaṃ	24
Rāgādīnaṃ	289	Lokasamudayo	231
Rāgo	20	Lokāmiṣaṃ	450
Rāsito	420	Lokiyā	106
Rukkhapaveṇiṃ	502	Lokiyā	77
Ruci	79	Lokuttaraṃ	43
Rucivasena	33	Lokuttarā	77
Rujjhati	60	Lobhamūlaṃ	120
Ruppanalakkhaṇaṃ	86	Lohitaṅgaṃ	413
Rūpaṃ	87	[Va]	
Rūpato	323	Vacānāvayavo	267
Rūpaparipāko	103	Vacīpalāpo	200
Rūpabhavo	331	Vacībhedo	100
Rūpasattakaṃ	405	Vacīviññatti	88
Rūpiṃ	11	Vacīsaṅkhāro	253
		Vaṭṭaṃ	380

Padānukkamo	Piṭṭhaṅko	Padānukkamo	Piṭṭhaṅko
[Va]		[Va]	
Vaṭṭāmisam	450	Vijjam	15
Vaṭṭeyya	414	Vijjāṭṭhānam	78
Vaḍḍhetabbaṃ	39	Vijjāmayā	10
Vaḍḍhetvā	4	Viññāṇam	66
Vaṇṇavasena	21	Viññāṇaṭṭhiti	303
Vatthu	109	Vitujjānādhamaṇam	200
Vatthurūpā	365	Vitthārenti	172
Vado	336	Vidahati	176
Vadhentassa	199	Videsam	460
Vantalokāmisam	520	Vināsam	363
Vayadhammaṃ	226	Vinipātaṅca	349
Vayānupassanaṃ	417	Vinipātikānaṃ	14
Vasanto	409	Vinibaddho	499
Vasavattāpanam	187	Vinibbhujitvā	437
Vahati	439	Vinibbhogo	346
Vāyamanti	172	Vinodanam	101
Vāyu	180	Vipariṇāmaṭṭho	190
Vālayakkhānucarite	12	Viparītam	27
Vikiṇṇakesā	51	Viparītattā	107
Vikiraṇarasam	254	Viparīto	374
Vikubbanā	10	Vipallāsā	495
Vikkhambhanappahānam	508	Vipassati	406
Vikkhepo	122	Vipassanānikanti	432
Vigatatā	288	Vipassanāsukham	431
Vigataparīlāho	333	Vipākavajjāni	401
Vighāto	235	Vipāko	328
Vicittam	199	Vippaṭṭisāro	152
Vijambhikā	150	Vippamuttam	20
Vijātilohaṃ	412	Vippasīdati	65
Vijāniyā	185	Vibhajjavādimāṇḍalam	240

Padānukkamo	Piṭṭhaṅko	Padānukkamo	Piṭṭhaṅko
[Va]		[Va]	
Vibhāvinā	163	Vusīmato	326
Vibhūtaṃ	133	Vusīmā	326
Vimariyādikataṃ	20	Vejjakammaṃ	15
Viyogarasam	199	Vedanattāya	165
Virāgadhamaṃ	226	Vedayitalakkhaṇam	112
Virāgo	345, 346	Vedeyyo	336
Virūḷamūlā	269	Veraṃ	220
Vilokanaṃ	409	Verasamugghāto	220
Vivaṭṭanti	201	Vehāsaṃ	14
Vivaṭṭamānaṃ	13	Veḷuriyo	413
Vivaṭṭo	49		
Vivaraṃ	180	[Sa]	
Vivekajabhūmi	16	Samkilesikā	160
Vivekaninnaṃ	529	Samkhittaṃ	43
Visamyuttaṃ	20	Samghaṭṭanaṭṭho	346
Visaṅkharitvā	410	Sāmpaggaharaso	151
Visappanaraso	151	Sambhuñjanarasaṃ	138
Visayo	329	Samyogaṭṭho	191
Visasallaṃ	200	Samvaṭṭati	50
Visuddhadassano	443	Samvaṭṭasīmā	50
Vissajjanaṃ	73	Samvaro	361
Vihatā	236	Samvegapadaṭṭhānaṃ	141
Vihanamānaṃ	460	Samsayo	153
Vihimsādhātu	178	Samsaritvā	531
Vītarajassa	22	Samsīdanapaccupaṭṭhānaṃ	150
Vīthipaṭipannaṃ	434	Samhīrati	66
Vīriyaṃ	141	Sa-uttaraṃ	43
Vīriyapariggahitaṃ	8	Sa-ussāhato	159
Vīriyasamādhi	18	Sakaṭamūle	12
Vuṭṭhānapaccupaṭṭhānaṃ	193	Sakaṭasetu	47

Padānukkamo	Piṭṭhaṅko	Padānukkamo	Piṭṭhaṅko
[Sa]		[Sa]	
Sakadāgāmiṃmaggo	483	Sattārammaṇattā	153
Sakalassa	253	Satthesu	84
Sakiccakkhaṇo	156	Sadehasannissitā	38
Saguṇena	476	Saddanimittam	39
Saṅkamanto	42	Saddo	87
Saṅkhataṃ	226	Saddhammatejavihatam	179
Saṅkhataṭṭho	190	Saddhāpariggahitam	7
Saṅkhatabhāvo	438	Saddhāvimutto	468
Saṅkhāragatam	51	Saddheyyavatthu	142
Saṅkhāragate	451	Santacittassa	431
Saṅkhārā	148	Santati	88
Saṅkhārupekkhāññaṇam	436	Santānavinivattake	131
Saṅkhāro	18	Santāpaṭṭho	190
Saṅkhepadesanā	179	Santāpanarasam	193
Saṅkhepo	340	Santi	193
Saṅkho	413	Santīraṇam	375
Saccañāṇassa	216	Sanniṭṭhāpanavasena	21
Saccato	364	Sannipātam	311
Saccānulomikam	78	Sappaccayam	106
Sacchikato	467	Sappadesattā	223
Sajātito	223	Sappītikam	442
Sajjayiṃsu	29	Sabyāpārato	159
Sañjānanalakkhaṇā	139	Sabyābajjhato	159
Saṅṭhahantam	50	Sabhāgatā	162
Satataṃ	335	Sabhāvalakkhaṇam	293
Satipariggahitam	8	Samathabalam	521
Sato	13	Samadhigate	192
Sattakkhattuparamo	530	Samādhitto	12
Sattapatiṭṭho	452	Samādhipariggahitam	8
Sattasaññā	415		

Padānukkamo	Piṭṭhaṅko	Padānukkamo	Piṭṭhaṅko
[Sa]		[Sa]	
Samāpattiyā	31	Sarāgo	345
Samāpannassa	79	Sarikkhatā	162
Samāhitam	43	Savanaṭṭhena	38
Samijjhati	9	Savanato	496
Samitam	335	Savipākato	159
Samīpatā	218	Savipphārato	160
Samuggam	358	Sasaṅkhāram	116
Samuṭṭhānam	165	Sassate	363
Samūhaghanatā	437	Sasaddulā	448
Samohaṃ	43	Saha	235
Sampajāno	13	Sahite	234
Sampatijāto	197	Sādhenti	335
Sampayogo	254	Sāmaggiṃ	228
Sambhavo	268	Sāmaggi-aṅgānam	234
Sambhārehi	381	Sāmaññaphalam	520
Sambhāro	340	Sāmuddikā	460
Sambhedo	160	Sārāpagataṃ	456
Sammadassanam	381	Sāsavam	106
Sammaneyyāma	53	Sāsavā	77
Sammasanūpagāni	354	Siniddham	410
Sammasitabbaṃ	354	Sineruparibhaṇḍam	29
Sammāpayogena	15	Sippakammaṃ	15
Sammāpayogo	10	Silā	413
Sammohanarasā	253	Sisiro	409
Sammoheti	341	Sīta-utunā	410
Saradasūriyamaṇḍalasadisaṃ	47	Sītā	15
Sarabhaṅgasadisassa	47	Sīlabbataṃ	327
Sarabhaññaṃ	23	Sīlavā	10
Sarasena	311	Sīsam	413
		Sīhokkantavasena	47

Padānukkamo	Piṭṭhaṅko	Padānukkamo	Piṭṭhaṅko
[Sa]		[Sa]	
Su-ucchinno	333	Soko	200
Sukatakammāni	328	Sotaṃ	87
Sukkajāti	361	Sotadhātukiccaṃ	38
Sukhaṃ	136	Sotāpattimaggo	483
Sukhasaññaṃ	17, 32	Sote	39
Sugandham	21	Sobhanaṃ	490
Sucaritakammanibbattā	37	Sommabhāvo	144
Suññaṃ	381	[Ha]	
Suññattā	477	Haṭṭhatuṭṭhā	52
Sutapaṭibhānabahulānaṃ	84	Hadayarūpaṃ	41
Supaggahitaṃ	479	Hadayavatthu	88
Supaṭṭhitā	431	Harāyamāno	364
Subhāvitattā	7	Hasituppādanarasā	130
Suvaṇṇaṃ	413	Hiriyati	143
Suvaṇṇapañjare	452	Hīnapaṇītatā	334
Suvaṇṇapabbato	15	Hīnavatthukā	162
Suvaṇṇe	58	Hīnā	179
Suvikkhālitaṃ	355	Hutaṃ	328
Susamāhitaṃ	479	Hetu	106, 267
Susiraṃ	26	Hetuṭṭho	191
Sūcayati	171	Hetupaccayā	372
Sūraṃ	430	Hetusambhārapaccayā	382
Setavaccho	457	Hetusambhārā	340
Sena sena	172	Hemanto	409